

# NUEVO TESTAMENTO GUARANÍ PE



**NUEVO TESTAMENTO**  
en Guaraní de Chuquisaca, Bolivia

Primera edición  
© 1984, Liga Bíblica Internacional

Segunda edición  
© 2012, Liga Bíblica Internacional

[www.ScriptureEarth.org](http://www.ScriptureEarth.org)



Este obra está bajo una licencia Creative Commons Reconocimiento-  
NoComercial-SinObraDerivada 3.0 Unported.  
<http://creativecommons.org/licenses/by-nc-nd/3.0>

# ÍNDICE

página

San Mateo .....	Mt.....	5
San Marcos.....	Mc.....	74
San Lucas.....	Lc.....	116
San Juan.....	Jn.....	188
Los Hechos del los Apóstoles.....	Hch.....	237
Carta a los Romanos.....	Rm.....	295
Primera Carta a los Corintios.....	1 Co.....	321
Segunda Carta a los Corintios.....	2 Co.....	346
Carta a los Gálatas.....	Ga.....	363
Carta a los Efesios.....	Ef.....	372
Carta a los Filipenses.....	Flp.....	381
Carta a los Colosenses.....	Col.....	387
Primera Carta a los Tesalonicenses.....	1 Ts.....	393
Segunda Carta a los Tesalonicenses.....	2 Ts.....	398
Primera Carta a Timoteo.....	1 Tm.....	401
Segunda Carta a Timoteo.....	2 Tm.....	409
Carta a Tito.....	Tt.....	415
Carta a Filemón.....	Flm.....	419
Carta a los Hebreos.....	Heb.....	421
Carta de Santiago.....	Stg.....	443
Primera Carta de San Pedro.....	1 P.....	450
Segunda Carta de San Pedro.....	2 P.....	458
Primera Carta de San Juan.....	1 Jn.....	463
Segunda Carta de San Juan.....	2 Jn.....	470
Tercera Carta de San Juan.....	3 Jn.....	472
Carta de San Judas.....	Jds.....	474
Apocalipsis.....	Ap.....	477
Mapas.....		507



# EL SANTO EVANGELIO SEGUN SAN MATEO

---

Jesucristo itenondegua reta  
(Lc 3.23-38)

**1** <sup>1</sup>Tamimbeu cua tupapire pe Jesucristo itenondegua reta. Jesucristo co jae David iñemoñaeta reta pegua. Jae ramiño vi jae co Abraham iñemoñaeta reta pegua.

<sup>2</sup>Abraham iñemoñaeta Isaac, jare Isaac iñemoñaeta Jacob, jare Jacob iñemoñaeta reta Judá jare tiqei reta jare tivi reta. <sup>3</sup>Jare Judá umiñemoñaeta Tamar güi Fares jare Zara. Jare Fares iñemoñaeta Esrom, jare Esrom iñemoñaeta Aram. <sup>4</sup>Jare Aram iñemoñaeta Aminadab, jare Aminadab iñemoñaeta Naasón, jare Naasón iñemoñaeta Salmón. <sup>5</sup>Jare Salmón umiñemoñaeta Rahab güi Booz. Jare Booz umiñemoñaeta Rut güi Obed. Jare Obed iñemoñaeta Isaí. <sup>6</sup>Jare Isaí iñemoñaeta David. Jae co Israel pegua reta juvicha guasu.

Jare mburuvicha guasu David umiñemoñaeta Urías jembirecocue güi Salomón. <sup>7</sup>Jare Salomón iñemoñaeta Roboam, jare Roboam iñemoñaeta Abías, jare Abías iñemoñaeta Asa. <sup>8</sup>Jare Asa iñemoñaeta Josafat, jare Josafat iñemoñaeta Joram, jare Joram iñemoñaeta Uzías. <sup>9</sup>Jare Uzías iñemoñaeta Jotam, jare Jotam iñemoñaeta Acaz, jare Acaz iñemoñaeta Ezequías. <sup>10</sup>Jare Ezequías iñemoñaeta Manasés, jare Manasés iñemoñaeta Amón, jare Amón iñemoñaeta Josías. <sup>11</sup>Jare Josías iñemoñaeta reta Jeconías jare tivi reta. Jare Jeconías ico yave, ivi Babilonia pegua reta umiamiri Israel pegua reta jare güiraa jeta Israel pegua reta Babilonia pe.

<sup>12</sup>Jare yugüiraa ma Babilonia pe yave, Jeconías iñemoñaeta Salatiel, jare Salatiel iñemoñaeta Zorobabel. <sup>13</sup>Jare Zorobabel iñemoñaeta Abiud, jare Abiud iñemoñaeta Eliaquim, jare Eliaquim iñemoñaeta Azor. <sup>14</sup>Jare Azor iñemoñaeta Sadoc, jare Sadoc iñemoñaeta Aquim, jare Aquim iñemoñaeta Eliud. <sup>15</sup>Jare Eliud iñemoñaeta Eleazar, jare Eleazar iñemoñaeta Matán, jare Matán iñemoñaeta Jacob. <sup>16</sup>Jare Jacob iñemoñaeta José - jae co María ime. Jare María imembi Jesús - jae co Cristo jee vae.

<sup>17</sup>Jáeramo yaipapa catorce ñemoñaeta Abraham güi David pe. Jae ramiño vi yaipapa catorce ñemoñaeta David güi Jeconías pe. Echa'a

Jeconías ico yave, Israel pegua reta uyereraaca Babilonia pe. Jae ramiño vi yaipapa catorce ñemoña Jeconías güi Cristo pe.

### Jesucristo oa vae regua

(Lc 2.1-7)

<sup>18</sup>Añave tamimbeu quirāi Jesucristo oa ichi güi vae regua. María José ndive umendata yave, ndei José güireco mbove, uyecuaa ipurúa oĩ. Ipurúa co Espíritu Santo imbaepuere pe. <sup>19</sup>Jayave José ipía pe uyemingueta jei vaerā chupe ndarau umenda jae ndive, ãrei uipota'ā uyapo opaete vae reta jovaque. Echa'ā José penti cuimbae jupi vae co jare uipota'ā umimaraca María opaete vae reta jovaque. <sup>20</sup>Ñrei cua re ipía pe uyemingueta oĩ rambueve, penti ángel yandeYa pe uyeyocui vae uyecuaa chupe ipau pe jare jei chupe:

—José. Nde co jae David ñemoña reta pegua. Ndepuere nemenda María ndive ndequiye mbae reve. Echa'ā ipurúa oĩ Espíritu Santo imbaepuere pe —jei—. <sup>21</sup>Jare imembita penti cuimbae jare nembijeeta Jesús. Echa'ā jae umbiasata ivi pegua reta. Echa'ā umbaita imbaeyoa reta —jei.

<sup>22</sup>Jare opaete cua uyeyapo, Tumpa ñnee aracae umimbeu vae rupi yandeYa jei vae uyeyapo vaerā. <sup>23</sup>Echa'ā jei cuarāi:

“Mase, penti cuñatai cuimbae güireco'ā etei vae ipuruata jare imembita penti cuimbae.

Jare umbijeeta reta Emanuel.”

Jucuarāi jei. (Cua tee uipota jei: “Tumpa ime yande ndive oĩ”).

<sup>24</sup>Jayave José usareco yave, umenda María ndive ángel yandeYa pe uyeyocui vae jei chupe rami. <sup>25</sup>Ñrei José opoco'ā María re ndei imembiripi oa mbove. Jare María imembi oa ma yave, José umbijee Jesús.

### Cuimbae yasitata re uyemboe vae reta

**2** <sup>1</sup>Jesús oa ma yave tenta guasu Belén ivi Judea pegua pe, Herodes ico mburuvicha guasurā. Jare jocua ara rupi yugüeru cuimbae reta yasitata re uyemboe vae reta guarasi oẽ vae coti güi uvãe tenta guasu Jerusalén pe. <sup>2</sup>Jare jei reta:

—¿Quiape pa ime oĩ sambiaí judío reta juvicha guasurā icota vae? Echa'ā nduecha yasitata uicuaaca oreve vae guarasi oẽ vae coti. Jáeramo ndoyu ma nuvãe numbiadora vaerā —jei reta.

<sup>3</sup>Mburuvicha guasu Herodes cua uyandu yave, uyemipia'ā. Opaete Jerusalén pegua reta uyemipia'ā vi. <sup>4</sup>Jayave Herodes umbatica opaete sacerdote reta itenondegua reta jare mboroyocui re oporomböe vae reta, jare upirandu chupe reta quiape ra oata Cristo, Tumpa ombou vae. <sup>5</sup>Jare jae reta jei chupe:

—Oata Belén Judea pegua pe. Echa'ā Tumpa ñnee aracae umimbeu vae jei cuarāi:

<sup>6</sup>‘Belén Judea pegua penti tenta guasu Judea pegua icavi vae.

Echa'ā joco pe oata penti mburuvicharā.

Jae oyocuita Israel pegua reta.

Israel pegua reta chembae co.’

Jucuarãi jei —jei reta chupe.

<sup>7</sup>Jayave Herodes uenica viari jocua yasitata re uyemboe vae reta, jare upirandu chupe reta quirãi yave ra uyecuaa jocua yasitata. <sup>8</sup>Jayave Herodes jei chupe reta:

—Pecua Belén pe peeca cavi jocua sambiaï. Jare pevãe ma chupe yave, peyu ye cua pe pemimbeu cheve, che vi aa vaerã ambiadora —jei.

<sup>9</sup>Uyandu reta ma yave mburuvicha guasu jei vae, cuimbae reta yugüïraa Jerusalén güi. Jare uecha reta ye jocua yasitata guarasi oẽ vae coti ñugüïnoi yave uecha vae. Jare yasitata oo jae reta jenonde uyemboi sambiaï oï vae íarambo. <sup>10</sup>Jocua yasitata uecha reta yave, cuimbae reta tuicha rupi uyerovia. <sup>11</sup>Jare uique reta yave sambiaï oï vae pe, uecha reta sambiaï ichi ndive - jae co María jee vae. Jayave jae reta uyeatica jare umbiadora sambiaï. Jayave uipea jivita reta jare umee sambiaï pe güeru reta chupe vae - oro jare mbae ipiche cavi vae reta incienso jare mirra jee vae.

<sup>12</sup>Jare Tumpa umimbeu cuimbae reta pe ipau pe agüïye vaerã yugüïraa ye Herodes jenta rupi. Jáeramo yugüïraa ye iivi pe ñru tape rupi.

### Herodes uyucaca sambiaï reta

<sup>13</sup>Jare cuimbae reta yugüïraa ma yave, penti ángel yandeYa pe uyeyocui vae uyecuaa José pe ipau pe jare jei chupe:

—Epüa. Eraa sambiaï jare ichi pecua Egipto pe. Pepita joco pe amimbeu ye ndeve regua. Echa'ã Herodes uecacata sambiaï uyucaca vaerã —jei.

<sup>14</sup>Jayave José upüa, jare pïtu oï reve güïraa sambiaï jare ichi ivi Egipto coti. <sup>15</sup>Jare jae reta upita Egipto pe Herodes umano regua. Jucuarãi uyapo José, uyeyapo vaerã Tumpa ñnee aracae umimbeu vae rupi yandeYa jei vae. Echa'ã jei cuarãi: “Egipto güi aeni cheRaï.”

<sup>16</sup>Jayave Herodes uicuaa jocua yasitata re uyemboe vae reta uyapo'ã co jae jei vae. Jáeramo tanta rupi pochi jare omondo sundaro reta uyuca vaerã opaete sambiaï cuimbae mi retaño Belén pe jare Belén iyipi rupi ñugüïnoi vae reta ndei mocui año güïnoi vae. Echa'ã yasitata re uyemboe vae reta opou Herodes pe yave, Herodes upirandu cavi chupe reta quirãi yave ra uecha yasitata.

<sup>17</sup>Jare jucuarãi uyeyapo Tumpa ñnee aracae umimbeu vae Jeremías jei vae. <sup>18</sup>Echa'ã jei cuarãi:

“Ramá pe uyendu ñee.

Uyendu uyao ñugüïnoi tuicha ipiatiti vae reta.

Raquel uyao oï imembi reta re.

Ipuere'ã etei quía umbipiäcatu imembi reta umano ma ramo.”

Jucuarãi jei.

<sup>19</sup>Ñerei Herodes umano ma yave, José Egipto pe oï rambueve, penti ángel yandeYa pe uyeyocui vae uyecuaa José pe ipau pe. <sup>20</sup>Jare jei chupe:

—Epüa. Eraa ye sambiaï jare ichi Israel pegua reta iivi pe. Echa'ã uipota tēi uyucaca sambiaï vae reta umano ma —jei.

<sup>21</sup>Jayave José upüa jare güiraa sambiaï jare ichi Israel pegua reta iivi pe. <sup>22</sup>Ērei uyandu quirãï Arquelao ico mburuvicha guasurã Judea pe. Echa'ã Arquelao Herodes tai co. Jayave José uquiye oo vaerã Judea pe. Ērei Tumpa umimbeu José pe ipau pe oo vaerã ivi Galilea pe. Jáeramo jocoti oo. <sup>23</sup>Jare José oo uvãe penti tenta guasu Nazaret jee vae pe jare joco pe ico, uyeyapo vaerã Tumpa ñnee aracae umimbeu vae reta jei vae. Echa'ã jei reta cuarãï: “Īru vae reta umbijeeta penti Nazaret pegua.”

### Juan upurumbibautiza vae umimbeu Tumpa ñnee

(Mr 1.1-8; Lc 3.1-20; Jn 1.19-28)

**3** <sup>1</sup>Jocua ara reta rupi ou Juan ñana Judea pe oĩ vae pe upurumbibautiza jare umimbeu Tumpa ñnee. <sup>2</sup>Jae jei:

—Peeya piyemingueta icavi mbae vae pepia pe oĩ vae. Echa'ã outa ma uvãe mboroyocua ara pegua —jei.

<sup>3</sup>Tumpa ñnee aracae umimbeu vae Isaías jee vae imiari Juan re. Echa'ã Isaías jei cuarãï:

“Jae ñneeãta reve jeita ñana pe:

‘Piyapicatu yandeYa japerã.

Pemisimi tape.’ ”

Jucuarãï jei.

<sup>4</sup>Jare Juan jemimonde maemimba camello jee vae jaagüe pegua co, jare jumbicuaa guacapi pegua co. Jare jembü co jae tucu jare ei ñana rupigua. <sup>5</sup>Jare jeta Jerusalén pegua reta jare Judea pegua reta jare jeta tenta iãca Jordán iyipi rupi ñugüinoi vae pegua reta yugüiraa Juan oĩ vae pe. <sup>6</sup>Jare Juan umbibautiza reta iãca Jordán pe imbaeyoa reta opa umimbeu yave. <sup>7</sup>Jare jeta fariseo reta jare saduceo reta yugüeru Juan oĩ vae pe, jae umbibautiza vaerã. Jare Juan uecha reta yave, jei chupe reta:

—Pe reta co jae mboi reta rami. ¿Quía pa umimbeu peve piyero vaerã Tumpa coti agüiye vaerã Tumpa uiporaraca peve? <sup>8</sup>Piyapo icavi vae, jucuarãï picuaaca vaerã añetete peeya co piyemingueta icavi mbae vae pepia pe oĩ vae. <sup>9</sup>Agüiye pere piyupe pepia pe: ‘Yandetenondegua co jae Abraham.’ Echa'ã che jae peve cua: Tumpa ipuere uyapo cua ita reta güi Abraham ñnemoña retarã —jei Juan chupe reta—. <sup>10</sup>Yamijaanga penti temiti. Temiti ía icavi'ã yave, iya uyasía japo reve jare uapi. Jae ramiño vi piyapo'ã yave icavi vae, Tumpa uiporaracata peve —jei—. <sup>11</sup>Che pumbibautiza i pe piyemingueta icavi mbae vae pepia pe oĩ vae peeya yave. Ērei cheraicue rupi outa ipuere ete chegüi vae. Jupi'ã co che amboi araa vaerã ipipasa. Jae pumbibautizata Espíritu Santo pe jare tata pe —jei—. <sup>12</sup>Jae co trigo uipoo vae rami. Echa'ã trigo uipoo vae umbiveve trigo uequi vaerã iti. Jayave uñuvatu trigo jiru pe. Ērei uapi iti tata pe. Tata Cristo uiporuta vae opa mbae vae co —jei.



### Juan umbibautiza Jesús

(Mr. 1.9-11; Lc 3.21-22)

<sup>13</sup>Jare Jesús ou Galilea güi uvãe Jordán pe Juan oĩ vae pe, Juan pe uyembibautizaca vaerã. <sup>14</sup>Èrei Juan ñatêi umbibautiza Jesús. Jáeramo jei chupe:

—¿Maera pa ndipota che numbibautiza vaerã? Echa'ã icavi co nde chembibautiza vaerã —jei.

<sup>15</sup>Jayave Jesús jei chupe:

—Icavi co nde chembibautiza vaerã añave. Echa'ã jucuarãi icavi co yayapo vaerã opaete jupi vae —jei.

Jayave Juan umbibautiza Jesús. <sup>16</sup>Jare Juan umbibautiza ma yave, Jesús oẽ i güi. Jare jupivoi uecha ara uyepea oĩ, jare uecha vi Tumpa iEspíritu ugüeyi jese picasu rami. <sup>17</sup>Jare jupivoi uyendu ñee ara güi jei:

—Cua co jae cheRaĩ aau ete vae. Chembiyerovia ete —jei.

### Aña guasu umingueta Jesús uyavica vaerã tẽi chupe

(Mr 1.12-13; Lc 4.1-13)

**4** <sup>1</sup>Jayave Espíritu Santo güiraa Jesús ñinaa pe. Jare joco pe aña guasu umingueta uyavica vaerã tẽi chupe. <sup>2</sup>Jare Jesús jou'ã mbae ave cuarenta ara. Jáeramo cuarenta ara uasa ma yave, iyembaĩ. <sup>3</sup>Jayave aña guasu umingueta uyavica vaerã tẽi chupe.

—Nde co jae Tumpa Tai yave, ere cua ita reta pe uyeyapo vaerã mbiyaperã —jei.

<sup>4</sup>Èrei Jesús jei chupe:

—Tumpa ñnee pe uyecuatía oĩ cuarãi:

‘Icavi co ivi pegua reta jou vaerã mbiyape güinoi vaerã tecove.

Èrei icavi ete co uyapisaca vaerã Tumpa ñnee re jare uyapo vaerã jei vae güinoi vaerã tecove opa mbae vae.’

Jucuarãi uyecuatía oĩ —jei.

<sup>5</sup>Jayave aña guasu güiraa Jesús Jerusalén pe jare umbuyupi Tumpa jo iyapite re. <sup>6</sup>Jayave jei chupe:

—Nde co jae Tumpa Tai yave, ea cua güi. Echa'ã Tumpa ñnee pe uyecuatía oĩ cuarãi:

‘Tumpa oyocuita ángel reta uyandareco vaerã nderé.

Ipo pe ndepisi ndeocota reta,

agüiye vaerã ndepi uyererocua ita re.’

Jucuarãi uyecuatía oĩ —jei.

<sup>7</sup>Jayave Jesús jei chupe:

—Tumpa ñnee pe uyecuatía oĩ cuarãi: ‘Che co jae ndeYa Tumpa. Agüiye mbae iyapo ndicuaa vaerã tuicha ra chepiaguasu.’ Jucuarãi uyecuatía oĩ —jei.

<sup>8</sup>Jayave aña guasu güiraa Jesús penti ivitu guasu ivate vae re jare uechaca chupe opaete mburuvicha guasu reta iporoyocua ivi pe ñugüinoi vae reta opaete ipõra vae reve. <sup>9</sup>Jayave aña guasu jei chupe:

—Tamee ndeve opaete cua, ndiyeatica yave chembiadora vaerã.

<sup>10</sup>Jayave Jesús jei chupe:

—Esiri chegüi, Satanás. Echa'ã Tumpa ñee pe uyecuatía oĩ cuarãi: ‘Che co jae ndeYa Tumpa. Chembiadora. Jaño cheve iyeyocui.’ Jucuarãi uyecuatía oĩ —jei.

<sup>11</sup>Jayave ãña guasu usiri Jesús güi, jare jupivoi yugüeru ángel reta ombori Jesús.

### **Jesús umbipi iparaviqui**

*(Mr 1.14-15; Lc 4.14-15)*

<sup>12</sup>Jare Jesús uicuaa ma yave Juan uyemiingueca ma co peresoriru pe, oo Galilea pe. <sup>13</sup>Oo Nazaret güi uvãe tenta guasu Capernaum pe jare joco pe ico, (Capernaum oĩ i guasu jembei pe Zabulón jare Neftalí iivi pe) <sup>14</sup>uyeyapo vaerã Tumpa ñee aracae umimbeu vae Isafás jei vae. Echa'ã jae jei cuarãi:

<sup>15</sup>“Zabulón iivi jare Neftalí iivi, i guasu jembei pe, Jordán jovaicho pe, Galilea judío mbae vae reta pegua.

<sup>16</sup>Pĩtumimbi pe yugüireco vae reta uecha ma tembipe tuicha vae.

Mano iguarasã pe yugüireco vae reta pe uyecuaa tembipe.”

Jucuarãi jei.

<sup>17</sup>Jayave Jesús umbipi umimbeu Tumpa ñee. Jae jei:

—Peeya piyemingueta icavi mbae vae pepia pe oĩ vae. Echa'ã outa ma uvãe mboroyocua ara pegua —jei.

### **Jesús ueni irundi cuimbae pira uipisi vae reta**

*(Mr 1.16-20; Lc 5.1-11)*

<sup>18</sup>Jare uguata rambueve Galilea pe i guasu jembei rupi, Jesús uecha Simón - jae co Pedro jee vae - jare Simón tivi Andrés jee vae. Jae reta omombo ñugüinoi pisa i guasu pe, pira uipisi vaerã. Echa'ã jae reta pira uipisi vae reta co. <sup>19</sup>Jare Jesús jei chupe reta:

—Peyu cherupíe, jare che chembaepuere pe pemboeta ñru vae reta güirovia vaerã cheré.

<sup>20</sup>Jayave jae reta ueya voi ipisa, jare yugüiraa jae jupíe.

<sup>21</sup>Jesús oo catu ye joco güi, jare uecha Zebedeo tai reta. Penti jee Jacobo jare tivi jee Juan. Uyapicatu ñugüinoi pisa reta chalana pe tu ndive. Jayave Jesús ueni. <sup>22</sup>Jayave jae reta ueya voi chalana jare tu, jare yugüiraa jae jupíe.

### **Jesús omboe jeta vae**

*(Lc 6.17-19)*

<sup>23</sup>Jare Jesús oo opaete Galilea rupi, jare oporomböe judío reta itupaopao rupi. Umimbeu ñee icavi vae Tumpa iporoyocua pegua, jare umbigüera imbaerasi vae reta ipotave mbaerasi güi. <sup>24</sup>Jare opaete iivi Siria pegua reta uyandu Jesús uyapo vae regua. Jare ñru vae reta güeru jae oĩ vae pe imbaerasi vae reta. Amocue vae uiporara ete jasi vae, jare ãña oya amocue vae re, jare amocue vae imbiquere,

jare amocue vae ipuere mbae omi vae. Jayave Jesús umbigüera reta. <sup>25</sup>Jare yugüiraa Jesús jaicue jeta vae Galilea güi, jare ivi Decápolis jee vae güi, jare Jerusalén güi, jare Judea güi, jare iäca Jordán jovaicho güi.

### Ivitu guasu re Jesús jei vae

(Lc 6.20-23)

**5** <sup>1</sup>Jare Jesús jeta vae reta uecha yave, uyupi penti ivitu guasu re. Joco pe uguapi oĩ, jare jemimboe reta yugüeru jae oĩ vae pe.

<sup>2</sup>Jayave Jesús umbipi omboe reta. <sup>3</sup>Jei chupe reta:

—Tuyerovia icoi Tumpa ueca vae reta. Echa'ã Tumpa umeeta chupe reta yugüireco vaerã mboroyocua ara pegua pe —jei—. <sup>4</sup>Tuyerovia ipiatiti vae reta. Echa'ã Tumpa umbipiacatuta reta —jei—. <sup>5</sup>Tuyerovia uñemimichi vae reta. Echa'ã Tumpa umeeta chupe reta ivi imbaerã —jei—. <sup>6</sup>Tuyerovia iquirëi jupi vae uyapo vae reta. Echa'ã Tumpa umbujupita reta —jei—. <sup>7</sup>Tuyerovia ñru vae reta uiparareco vae reta. Echa'ã Tumpa uipararecota reta —jei—. <sup>8</sup>Tuyerovia ipia iquia mbae vae reta. Echa'ã uechata reta Tumpa —jei—. <sup>9</sup>Tuyerovia ñru vae reta umbipiacatu vae reta. Echa'ã Tumpa jeita chupe reta: 'Pe co jae cheraí reta' —jeita, jei—. <sup>10</sup>Tuyerovia jupi vae uyapo ramo ñru vae reta icavi mbae vae uyapo chupe vae reta. Echa'ã Tumpa umeeta chupe reta yugüireco vaerã mboroyocua ara pegua pe —jei—.

<sup>11</sup>Ñru vae reta jeita icavi mbae vae peve jare uyapota icavi mbae vae peve. Ipotave icavi mbae vae jeita pecoti iyapu reve, pe reta cherau ramo. Ërei piyeroviaño peĩ —jei—. <sup>12</sup>Piyerovia ete. Echa'ã Tumpa güinoi ara pe mbae icavi ete vae pembaerã. Echa'ã jae reta itenondegua reta uyapo cua nunga icavi mbae vae Tumpa ñnee araca umimbeu vae reta pe —jei—.

### Yuqui rami vae

(Mr 9.50; Lc 14.34-35)

<sup>13</sup>Pe reta co jae yuqui rami cua ivi pe. Ërei yuqui jembochi'ã ma yave, ¿quirãita ra jembochi ye? Icavi'ã ma mbaerã. Icavi co yamombo vaerã jare ñapĩro jese vaerã —jei—.

### Mechero rami vae

<sup>14</sup>Pe reta co jae penti mechero ivi pegua reta pe tembipe umee vae rami. Yayapo yave tenta guasu penti ivitu re, yandepuere'ã etei ñañomi. Opaete vae ipuere uecha —jei—. <sup>15</sup>Jae ramiño vi mechero yamiendĩ yave, ndarau ñañono yapepo uyembovapo oĩ vae igüi pe. Ñañono co mechero jenda pe, opaete o pe ñugüinoi vae reta güinoi vaerã tembipe —jei—. <sup>16</sup>Mechero umee yandeve tembipe. Jae ramiño vi pe reta pico cavi ñru vae reta jovaque, jae reta uicuaa vaerã pe reta piyapo co icavi vae. Echa'ã jucuarãi yave, umbiadorata reta peRu ara pe oĩ vae —jei—.

### Jesús jare mboroyocui

<sup>17</sup>Aramoi pe reta pepia pe piyemingueta che ayu co ambai vaerã Moisés iporoyocui jare Tumpa ñee aracae umimbeu vae reta jei vae. Ërei jucuarãi'ã co. Che ayu ayapo vaerã, ayu'ã co ambai vaerã —jei—. <sup>18</sup>Añete che jae peve, ara jare ivi uasa regua ndarau uyembai penti cuatía michi ete vae yepe Moisés iporoyocui güi ndei opaete uyeyapo mbove —jei—. <sup>19</sup>Ime yave quía penti mboroyocui michi vae uyapo'ã jare umimbeu ñru vae reta pe agüiye vaerã uyapo vae, ñru vae reta jeita jae co taicuegua vae mboroyocua ara pegua pe. Ërei ime yave quía uyapo jare umimbeu ñru vae reta pe uyapo vaerã vae, ñru vae reta jeita jae co tenondegua vae mboroyocua ara pegua pe —jei—. <sup>20</sup>Echa'ã che jae peve cua: Jupi vae pe reta piyapo vae jupi ete'ã yave jupi vae mboroyocui re oporomboe vae reta jare fariseo reta uyapo vae güi, ndarau etei pico mboroyocua ara pegua pe —jei—.

### Jesús iporomboe mbochi regua

*(Lc 12.57-59)*

<sup>21</sup>Piyandu ma quirãi Moisés jei yandetenondegua reta pe cuarãi: 'Agüiye epuruyuca. Echa'ã upuruyuca vae uñeãcata co.' Jucuarãi jei —jei—. <sup>22</sup>Ërei che jae peve, ime yave quía pochì tivì pe vae, uñeãcata co. Jare ime yave quía tivì güirño vae, judío reta itenondegua reta uãata. Jare ime yave quía tivì pe: 'Nembiquere', jei vae, tata guasu pe uiporarata —jei—. <sup>23</sup>Jáeramo nderu yave penti ofrenda uñemearendã pe, jare joco pe nemandúa yave quirãi nderivì pochì ndeve mbae re, <sup>24</sup>eeya joco pe jocua ofrenda uñemearendã jovai. Ecuã rani iyeyapicatu nderivì ndive. Jayave taicue rupi ndepuereta neme jocua ofrenda Tumpa pe —jei—.

<sup>25</sup>Iyeyapicatu imambae uipota uñeapo nderé mbae re vae ndive jae ndive ndeo rambueve tape rupi mburuvicha oĩ vae coti. Echa'ã ndiyeyapicatu'ã yave, uñeapota nderé mburuvicha pe, jare mburuvicha nemondota peresoriru iyandarecoa pe jare peresoriru iyandarecoa neñonota peresoriru pe —jei—. <sup>26</sup>Añete che jae ndeve, ndarau etei neë peresoriru güi ndei opaete ndepía nembiepi mbove —jei—.

### Jesús iporomboe menda re uyuvanga vae regua

<sup>27</sup>Piyandu ma quirãi Moisés jei yandetenondegua reta pe cuarãi: 'Agüiye iyuvanga menda re.' Jucuarãi jei —jei—. <sup>28</sup>Ërei che jae peve, ime yave quía umae cuña re uipota reve vae, uyuvanga ma menda re ipia pe —jei—. <sup>29</sup>Jare nderesa ndeacata cotigua uyapoca yave mbaeyoa ndeve, enoë emombo ndiyugüi. Icavi co penti nderesa ucañi vaerã ndegüi, tata guasu pe opaete nderete reve Tumpa nemondo vaerã tēi güi —jei—. <sup>30</sup>Jae ramiño vi ndepo ndeacata cotigua uyapoca yave mbaeyoa ndeve, iyasia emombo ndiyugüi. Icavi co penti ndepo ucañi vaerã ndegüi, tata guasu pe opaete nderete reve Tumpa nemondo vaerã tēi güi —jei—.

**Jesús iporomboe omombo jembireco vae regua**  
(Mt 19.1-10; Mr 10.1-12; Lc 16.18)

<sup>31</sup>Aracae Moisés jei vi cuarãi: 'Jembireco omombo vae tumee chupe tupapire umimbeu vaerã pipe omombo ma vae co.' Jucuarãi jei —jei—. <sup>32</sup>Ërei che jae peve, penti cuimbae ipuere omombo jembireco, cuña aguasa uyapo yave. Ërei cuña uyapo'ã yave aguasa jare cuimbae omombo yave jembireco, jocua cuña uyuvanga co menda re umenda yave ïru cuimbae ndive. Jae ramiño vi jocua cuimbae cuña ndive umenda vae uyuvanga co menda re —jei—.

**Jesús iporomboe Tumpa jee re jei vae**

<sup>33</sup>Piyandu ma quirãi Moisés jei yandetenondegua reta pe cuarãi: 'Agüiye ere: YandeYa jee re ayapota, ndepurumbitavi vaerã. Echa'ã ndere yave: YandeYa jee re ayapota, iyapo.' Jucuarãi jei —jei—. <sup>34</sup>Ërei che jae peve, agüiye ere jucuarãi. Agüiye ere: 'Ara jee re ayapota.' Echa'ã ara Tumpa iguapia co. <sup>35</sup>Agüiye vi ere: 'Ëvi jee re ayapota.' Echa'ã ïvi Tumpa ipi jenda co. Agüiye vi ere: 'Jerusalén jee re ayapota.' Echa'ã Jerusalén Mburuvicha Guasu mbaepuere güinoi vae jenta guasu co. <sup>36</sup>Agüiye vi ere: 'Cheãca jee re ayapota.' Echa'ã ndepuere'ã ndiyapo ndea ti ani jü —jei—. <sup>37</sup>Ërei ndipota yave ndere: 'Ayapota', ere: 'Ayapota.' Jae ramiño vi ndipota yave ndere: 'Ndarau ayapo', ere: 'Ndarau ayapo.' Echa'ã jeta cua güi ndere yave, ndiyapota icavi mbae vae —jei—.

**Jesús iporomboe uyeepi vae regua**  
(Lc 6.27-31)

<sup>38</sup>Piyandu ma quirãi Moisés aracae jei cuarãi: 'Ime yave quía ïru vae jesa urucumegua vae, ïru vae reta turucumegua vi jae jesa. Jae ramiño vi ime yave quía ïru vae jãi omopẽ vae, ïru vae reta tomopẽ vi jae jãi.' Jucuarãi jei —jei—. <sup>39</sup>Ërei che jae peve, emaeño ïru vae re uyapo vaerã ndeve icavi mbae vae. Ime yave quía ocua nderovaïque re vae, erova ipuere vaerã ocua ye jovaicho re. <sup>40</sup>Jae ramiño vi ime yave quía uñeapo nderé ndecamisa upïro vaerã ndegüi vae, emaeño jese upïro vaerã ndegüi ndeasoya vi —jei—. <sup>41</sup>Jae ramiño vi ime yave quía ndeocui nderaa vaerã jïvita penti kilómetro, eraa chupe mocui kilómetro rupi —jei—. <sup>42</sup>Jae ramiño vi ime yave quía uyerure ndeve mbae re vae, emee chupe, jare ime yave quía mbae uiporu ndeve vae, iporuca chupe —jei—.

**Peau perovaicho reta**  
(Lc 6.27-36)

<sup>43</sup>Piyandu ma quirãi Moisés aracae jei cuarãi: 'Eau neïru jare emitarëi nderovaicho.' Jucuarãi jei —jei—. <sup>44</sup>Ërei che jae peve, peau perovaicho reta. Piyerure Tumpa pe umivendise vaerã uyepipeyu peré vae reta. Piyapo icavi vae pemitarëi vae reta pe. Piyerure Tumpa pe icavi mbae vae uyapo peve vae

reta re —jei—. <sup>45</sup>Jucuarãi piyapo yave, picota peRu ara pe oĩ vae tai retarã. Echa'ã peRu umee guarasi icavi mbae vae uyapo vae reta jare icavi vae uyapo vae reta pe, opaete vae güinoi vaerã tembipe. Jae ramiño vi umee ama jupi vae reta jare jupi mbae vae reta pe, opaete vae güinoi vaerã i —jei—. <sup>46</sup>Echa'ã peau yave perau vae retaño, jocua mbaeti etei co mbae icavi vae. Jáeramo Tumpa ndarau umee peve mbae jocua jeco pegua. Echa'ã mburuvicha peguarã ocovara vae reta vi uyapo jucuarãi —jei—. <sup>47</sup>Jae ramiño vi pembisaluda picuãva reve yave perivi retaño, jocua mbaeti etei co mbae icavi vae. Echa'ã upurugüirovia mbae vae reta vi uyapo jucuarãi —jei—. <sup>48</sup>Jáeramo jecuaño piyapo icavi vae. Echa'ã peRu ara pe oĩ vae jecuaño uyapo icavi vae —jei—.

### Quirãi nemee vaerã mbae iparavete vae reta pe

**6** <sup>1</sup>Jupi vae piyapo yave, agüiye piyapo opaete vae jovaque jae reta uecha vaeraño. Echa'ã piyapo yave opaete vae jovaque, peRu ara pe oĩ vae ndarau umee peve mbae jocua jupi vae piyapo vae jeco pegua —jei—.

<sup>2</sup>Jáeramo nemee mbae iparavete vae reta pe yave, agüiye iyapo upurumbitavi vae reta uyapo rami. Echa'ã jae reta omondo jenonde judío reta itupao reta pe jare calle rupi uyemimbi vae, ñru vae reta icavi uyemingueta jese vaerã umee mbae iparavete vae reta pe yave. Añete che jae peve, jocua upurumbitavi vae reta güinoita'ã imbaerã jucuarãi uyapo ramo —jei—. <sup>3</sup>Èrei nde nemee mbae iparavete vae reta pe yave, agüiye tuicuaa ndepo ndeaso cotigua ndepo ndeacata uyapo vae, <sup>4</sup>agüiye vaerã quía ye uicuaa nde ndiyapo vae regua. Èrei ndeRu uicuaata nde ndiyapo viari vae jare umeeta ndeve mbae opaete vae jovaque —jei—.

### Jesús oporomoe yerure re

(Lc 11.1-4)

<sup>5</sup>Jare ndiyerure Tumpa pe yave, agüiye iyapo upurumbitavi vae reta uyapo rami. Echa'ã jae reta uyerure Tumpa pe yave, uipota quía reta uecha vaerã. Jáeramo uyemboi judío reta itupao reta pe jare calle uyerea pe uyerure Tumpa pe yave. Añete che jae peve, jocua upurumbitavi vae reta güinoita'ã imbaerã jucuarãi uyapo ramo —jei—. <sup>6</sup>Èrei nde ndiyerure Tumpa pe yave, ique ndero pe jare iyuquenda onque. Jayave iyerure ndeRu pe quía reta uicuaa mbae reve. Jare ndeRu uicuaata nde ndiyapo viari vae jare umeeta ndeve mbae opaete vae jovaque —jei—.

<sup>7</sup>Èrei piyerure Tumpa pe yave, agüiye iyapo upurugüirovia mbae vae reta uyapo rami. Echa'ã jae reta jecuaño umbiaicuerecuere jei penti vaño. Echa'ã ipia pe uyemingueta tẽi Tumpa uyapisacata jese reta jucuarãi uyapo yave —jei—.

<sup>8</sup>Jáeramo agüiye piyapo jae reta uyapo rami. Echa'ã peRu uicuaa mbae uata peve vae ndei piyerure chupe jese mbove —jei—. <sup>9</sup>Jáeramo piyerure Tumpa pe cuarã: 'OreRu ara pe neĩ vae, tuyembiaadoraca nderee.

<sup>10</sup>Tou ndeporoyocua.

Tuyeyapo nde ndere vae cua ivi pe ara pe uyeyapo oĩ rami.

11 Emee oreve opa ara orerembiurã.

12 Embiasa oreve orembaeyoa reta, ore numbiasa ipotave iyoa orecoti vae pe rami.

13 Jare agüiye emaeño año guasu re uyapoca vaerã oreve mbaeyoa.

Orerepi año guasu güi.

Echa'ã nembae co mboroyocua.

Nde neni opaete mbaepuere.

Opaete vae nembiaadorata jaño mai pegua.

Amén.'

Jucuarãi piyerure —jei—.

14 Echa'ã pe reta pembiasa yave iyoa pecoti vae reta, peRu ara pe oĩ vae umbiasata vi peve pembaeyoa reta —jei—. 15 Ërei pembiasa'ã yave iyoa pecoti vae reta, peRu ndarau vi umbiasa peve pembaeyoa reta —jei—.

### **Tembú güi uyecuacu vae reta**

16 Piyecuacu tembú güi yave, agüiye piyapo upurumbitavi vae reta uyapo rami. Echa'ã jae reta uyecuacu tembú güi yave, uyecuaa ipiatiti, ñru vae reta uicuaa vaerã uyecuacu co ñugüinoi tembú güi. Añete che jae peve, jae reta güinoita'ã imbaerã jucuarãi uyapo ramo —jei—. 17 Ërei nde tembú güi ndiyecuacu yave, iyapicatu ndea jare iyovae, 18 agüiye vaerã ñru vae reta uicuaa ndiyecuacu co neĩ tembú güi. Jaño ndeRu uicuaata ndiyecuacu co neĩ tembú güi vae. NdeRu uicuaata nde ndiyapo viari vae jare umeeta ndeve mbae opaete vae jovaque —jei—.

### **Piñuvatu mbaembae icavi vae piyupeguarã ara pe**

*(Lc 12.32-34)*

19 Agüiye piñuvatu cua ivi pe jeta mbaembae icavi vae piyupeguarã. Echa'ã cua ivi pe cupii reta urucumegua mbaembae jare ñru mbaembae iyuquiri urucumegua, jare imonda vae reta uique viari mbaembae oñomi vaerã —jei—. 20 Piñuvatu mbaembae icavi vae piyupeguarã ara pe. Echa'ã joco pe ndarau cupii reta urucumegua vaerã mbaembae jare ndarau mbae iyuquiri, jare ndarau imonda vae reta uique viari mbaembae oñomi vaerã —jei—. 21 Echa'ã piñuvatu yave mbaembae icavi vae piyupeguarã ivi pe, jecuaño pepia pe piyeminguetata ivi pegua re. Ërei piñuvatu yave mbaembae icavi vae piyupeguarã ara pe, jecuaño pepia pe piyeminguetata ara pegua re —jei—.

### **Tembipe yanderete pegua**

*(Lc 11.34-36)*

22 Tembipe uique yanderete pe yanderesa rupi. Icavi yave nderesa, nderete tineeta tembipe pe. 23 Ërei icavi'ã yave nderesa, nderete tineeta pĩtumimbi pe. Nderete tineeta tẽi tembipe pe. Ërei tinee yave pĩtumimbi pe, pĩtumimbi ete co —jei—.

**Mocui patrón***(Lc 16.13)*

<sup>24</sup>Penti uyeyocui vae uipota yave uyeyocui mocui patrón pe, umitarēita penti patrón jare uauta ĩru vae, ani uparaviqui cavita penti patrón pe jare güirĩrota ĩru vae. Pepuere'ã piyeyocui Tumpa pe corepoti peau reve —jei—.

**Agüiye piyemipia'ã mbaembae re***(Lc 12.22-31)*

<sup>25</sup>Jáeramo che jae peve, agüiye piyemipia'ã mbae re. Agüiye piyemipia'ã perembiurã vae re. Jae ramiño vi agüiye piyemipia'ã peremimonderã vae re. Ndarau pepuere pico cavi jecuaeño piyemipia'ã yave perembiurã vae re jare peremimonderã vae re —jei—. <sup>26</sup>Pemae güira reta re. Jae reta umaeti'ã jare umbaeviro'ã. Uñuvatu'ã vi avati avatio pe. Ĕrei peRu ara pe oĩ vae umingaru reta. Jare Tumpa perau ete güira reta güi —jei—. <sup>27</sup>Aramoi piyemipia'ã pipota tēi pepucu ramo. Ĕrei ndarau etei pepuere piyembicuacuaa pepucu ete vaerã —jei—.

<sup>28</sup>¿Maera pa piyemipia'ã peremimonderã vae re? Pemae mbaepoti reta re, quirãi ucuacuaa reta. Uparaviqui'ã reta. Umaepova'ã reta vi. <sup>29</sup>Ĕrei che jae peve, mbaepoti reta ipõra ete Salomón jemimonde ipõra vae güi. <sup>30</sup>Tumpa omopõra ñana, yepe tēi penti ara ñana oĩ co pe jare piareve pe ocai. Jáeramo Tumpa umeeta co peve peremimonderã. Michi ete co pepurugüirovia —jei—. <sup>31</sup>Agüiye piyemipia'ã mbae re. Agüiye piyemipia'ã perembiurã vae re. Jae ramiño vi agüiye piyemipia'ã peremimonderã vae re —jei—. <sup>32</sup>Echa'ã opaete ivi pegua reta uyemipia'ã cua mbaembae re. Jare peRu ara pe oĩ vae uicuaa icavi co penoi vaerã opaete cua mbaembae —jei—. <sup>33</sup>Ĕrei icavi co pipota ete vaerã Tumpa iporoyocua jare pipota vaerã piyapo jupi vae Tumpa jupi vae uyapo rami. Jucuarãi yave, Tumpa umeeta peve opaete cua mbaembae —jei—. <sup>34</sup>Jáeramo agüiye piyemipia'ã piareve peguarã vae re. Echa'ã piareve pe uyeyapo yeta mbae pemipia'ã vaerã. Opa ara uyeyapo mbaembae pemipia'ã vaerã —jei—.

**Agüiye piñera ĩru vae re***(Lc 6.37-38, 41-42)*

**7** <sup>1</sup>Agüiye piñera ĩru vae re, agüiye vaerã ĩru vae iñera peré. <sup>2</sup>Echa'ã piñera yave ĩru vae re, ĩru vae iñerata vi peré. Jae ramiño vi icavi vae piyapo yave ĩru vae pe, ĩru vae uyapota vi icavi vae peve. Jae ramiño vi icavi mbae vae piyapo yave ĩru vae pe, ĩru vae uyapota vi icavi mbae vae peve —jei—. <sup>3</sup>Agüiye emae iti michi vae neĩru jesa pe oĩ vae re, ime yave neni itĩ tuicha vae nderesa pe —jei—. <sup>4</sup>Ndarau ndepuere ndere neĩru pe: 'Cherĩvi, taequi nderesa güi jocua itĩ michi vae.' Echa'ã nde neni itĩ tuicha vae nderesa pe —jei—. <sup>5</sup>Nde co jae upurumbitavi vae. Eequi rani itĩ tuicha vae nderesa güi. Jayave nenia cavita ndepuere vaerã ndeequi itĩ michi vae neĩru jesa güi —jei—.



<sup>6</sup>Agüiye pemee mbae uñeño tee Tumpa peguarã vae yimba reta pe. Jae ramiño vi agüiye piñono ita ipõra vae reta cuchi reta ñugüinoi vae rupi. Echa'ã jucuarã piyapo yave, upiõta jese reta jare aramoi uyerovata pesuu vaerã —jei—.

**Yerure regua**  
(Lc 11.9-13; 6.31)

<sup>7</sup>Piyerure Tumpa pe mbae re, jare Tumpa umeeta peve. Peeca, jare pevãeta. Pembopu onque, jare onque uyepeata peve —jei—. <sup>8</sup>Echa'ã piyerure yave Tumpa pe mbae re, Tumpa umeeta peve. Jare peeca yave mbae, pevãeta. Jare pembopu yave onque, uyepeata peve —jei—. <sup>9</sup>Nde neno yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe —jei—. <sup>10</sup>Jae ramiño vi nderai uyerure yave ndeve pira re, ndarau nemee chupe penti mboi pira ipepica pe —jei—. <sup>11</sup>Yepe tõi pe reta jecuaeño piyapo icavi mbae vae, ãrei pemee co mbaembae icavi vae pesambiai reta pe. Jáeramo peRu ara pe oï vae iquirõi umee mbaembae icavi vae uyerure chupe jese vae reta pe —jei—.

<sup>12</sup>Jáeramo piyapo ñru vae reta pe pipota ñru vae reta uyapo vaerã peve vae rami. Echa'ã cua co jae mboroyocui jei vae jare Tumpa ñnee araca umimbeu vae reta jei vae —jei—.

**Onque ipi-rai vae**  
(Lc 13.24)

<sup>13</sup>Pique onque ipi-rai vae rupi. Echa'ã onque ipiguasu vae rupi uique vae reta uguata tape ipiguasu vae rupi, ãrei yugüüraa cañitei pe. Jare jeta vae uique jocua onque ipiguasu vae rupi —jei—. <sup>14</sup>Echa'ã onque ipi-rai vae rupi uique vae reta uguata tape ipi-rai vae rupi, ãrei yugüüraa tecove opa mbae vae güinoi vae reta ñugüinoi vae pe. Jare mboviño uvãe jocua onque ipi-rai vae —jei—.

**Ía icavi vae jare ía icavi mbae vae**  
(Lc 6.43-45)

<sup>15</sup>Amocue upurumbitavi vae reta jeita: 'Che co jae Tumpa ñnee umimbeu vae.' Agüiye perovia. Jae reta jei peve uipota co umimbeu peve Tumpa ñnee, ãrei uipota uyapo icavi mbae vae peve —jei—. <sup>16</sup>Picuaata jae reta upurumbitavi vae reta co icavi mbae vae uyapo ramo. Yaequi'ã uva penti yai jãti vae güi. Jae ramiño vi yaequi'ã ñva penti yai jãti vae güi —jei—. <sup>17</sup>Penti temiti icavi vae umee ía icavi vae. Jae ramiño vi penti temiti icavi mbae vae umee ía icavi mbae vae —jei—. <sup>18</sup>Penti temiti icavi vae umee'ã ía icavi mbae vae. Jae ramiño vi penti temiti icavi mbae vae umee'ã ía icavi vae —jei—. <sup>19</sup>Temiti ía icavi'ã yave, iya uyasía jare uapí —jei—. <sup>20</sup>Jáeramo picuaata jae reta upurumbitavi vae reta co icavi mbae vae uyapo ramo —jei—.

**Pucuaa'ã etei***(Lc 13.25-27)*

<sup>21</sup>Jeta vae jeita cheve: 'CheYa, cheYa.' Ërei amocue jucuarãi jei vae ndarau yugüireco mboroyocua ara pegua pe. Echa'ã jaeño cheRu ara pe oĩ vae jei vae uyapo vae reta yugüirecota joco pe —jei—. <sup>22</sup>Jeta vae jeita cheve jocua ara: 'CheYa, cheYa, ore numimbeu Tumpa ñee nderee pe. Jae ramiño vi nderee pe numbisiri ña reta oya jese vae reta güi. Jae ramiño vi nderee pe nduyapo jeta miacañi reta.' Jucuarãi jeita —jei—. <sup>23</sup>Ërei che jaeta chupe reta: 'Che pucuaa'ã etei. Pesiri chegüi. Echa'ã pe reta piyapo icavi mbae vae.' Jucuarãi jaeta —jei—.

**Tenta iguapica***(Lc 6.46-49)*

<sup>24</sup>Jáeramo ime yave quía uyapisaca cheré vae, jae uyapo yave che jae chupe uyapo vaerã vae, jae co penti cuimbae iyaracuaa vae jentarã uyapo vae rami. Echa'ã cuimbae iyaracuaa vae oñono jenta iguapicarã itape re —jei—. <sup>25</sup>Jayave tuicha oqui jare jeta i usiri tenta coti. Tanta vi ivitu tenta re. I jare ivitu umbiyaparata tẽi tenta. Ërei uyapara'ã. Echa'ã iguapica oĩ penti itape re —jei—.

<sup>26</sup>Ërei ime yave quía uyapisaca cheré vae, uyapo'ã yave che jae chupe uyapo vaerã vae, jae co penti cuimbae iyaracuaa mbae vae jentarã uyapo vae rami. Echa'ã cuimbae iyaracuaa mbae vae uyapo jentarã ivicuĩti re —jei—. <sup>27</sup>Jayave tuicha oqui jare jeta i usiri tenta coti. Tanta vi ivitu tenta re. I jare ivitu umbiyapara. Opa uyembai jocua tenta —jei—.

<sup>28</sup>Jare Jesús opaete cua jei ma yave, opaete uyapisaca jese vae reta ipiacañi iporomboe re. <sup>29</sup>Echa'ã omboe reta mbaepuere güinoi vae rami. Jucuarãi'ã oporomboe mboroyocui re oporomboe vae reta.

**Jesús umbigüera cuimbae ipire ocui vae***(Mr 1.40-45; Lc 5.12-16)*

**8** <sup>1</sup>Jare Jesús ugüeyi ma ivitu guasu güi yave, jeta yugüiraa jaicue. <sup>2</sup>Jayave ou Jesús oĩ vae pe penti cuimbae ipire ocui vae. Uyeatica Jesús jovai.

—CheYa, ndipota yave, ndepuere chembigüera —jei chupe.

<sup>3</sup>Jayave Jesús oñono ipo jese.

—Aipota. Ecuera —jei chupe.

Jare jupivoiño cuimbae ucuera imbaerasi güi. Ocui'ã ma ipire. <sup>4</sup>Jayave Jesús jei chupe:

—Agüiye emimbeu quía pe. Ecu a iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei—.

**Jesús umbigüera sundaro reta juvicha jembiocui**  
(Lc 7.1-10)

<sup>5</sup>Jare Jesús oo uvãe yave Capernaum pe, ou jae oĩ vae pe penti sundaro reta juvicha uyerure vaerã chupe mbae re. <sup>6</sup>Jae jei Jesús pe:

—CheYa, cherembiocui imbaerasi oĩ cherenta pe. Ipuere'ã omi. Jasi ete oĩ chupe —jei.

<sup>7</sup>Jayave Jesús jei chupe:

—Taa tambigüera.

<sup>8</sup>Ërei sundaro reta juvicha jei chupe:

—CheYa, agüiye ecua cherenta pe. Echa'ã mbae'ã co che. Ndepuere ndere cua güiño cherembiocui ucuera vaerã jare ucuera co —jei—.

<sup>9</sup>Echa'ã ime mburuvicha mbaepuere güinoi cheré vae reta. Jae ramiño vi che anoi mbaepuere sundaro reta re. Che jae penti sundaro pe: 'Ecua', jare jae oo. Jae ramiño vi che jae ñru sundaro pe: 'Eyu', jare jae ou. Jae ramiño vi che jae cherembiocui pe: 'Iyapo cua', jare jae uyapo —jei.

<sup>10</sup>Jare Jesús cua uyandu yave, ipiacañi sundaro reta juvicha re, jare jei yugüiraa jaicue vae reta pe:

—Añete che jae peve, avãe'ã cua nunga mburugüirovia tuicha vae Israel pegua reta ipite pe. <sup>11</sup>Jare che jae peve, jeta vae yugüeruta guarasi oẽ vae coti güi jare guarasi uique vae coti güi jare uguapita reta Abraham jare Isaac jare Jacob ndive mboroyocua ara pegua pe —jei—.

<sup>12</sup>Ërei mboroyocua pe yugüirecota tẽi vae reta uyemombocata oca pe pĩtumimbi oĩ vae pe. Joco pe uyaota reta jare jãi umbiquiririuta —jei.

<sup>13</sup>Jayave Jesús jei sundaro reta juvicha pe:

—Ndepuere ndeo. Ayapo ma ndipota ayapo vaerã vae nderovia cheré ramo —jei.

Jare jocua ora pe etei sundaro reta juvicha jembiocui ucuera.

**Jesús umbigüera Pedro jaicho**  
(Mr 1.29-31; Lc 4.38-39)

<sup>14</sup>Jare Jesús uique Pedro jenta pe yave, uecha Pedro jaicho jacu oĩ jupa pe. <sup>15</sup>Jayave Jesús uipisi ipo pe jare jacu upita voi chugüi. Jayave cuña upã jare umee mbae jou reta vaerã.

**Jesús umbigüera jeta imbaerasi vae reta**  
(Mr 1.32-34; Lc 4.40-41)

<sup>16</sup>Jare guarasi uique ma yave, tenta guasu pegua reta güeru Jesús pe jeta aña oya jese vae reta. Jayave Jesús oyocui aña reta usiri vaerã opaete oya jese vae reta güi, jare umbigüera opaete imbaerasi vae reta. <sup>17</sup>Jucuarãi uyapo Jesús uyeyapo vaerã Tumpa iñee aracae umimbeu vae Isaías jei vae. Echa'ã jae jei cuarãi: “Jae etei güiraa yandegüi yanembaerasi reta.”

**Jesús Jupíe uipota yugüiraa vae reta**  
(Lc 9.57-62)

<sup>18</sup>Jare jeta yugüeru Jesús oĩ vae pe. Jare Jesús uecha yave, jei jemimboe reta pe yugüiraa vaerã i guasu jovaicho pe. <sup>19</sup>Jare penti mboroyocui re oporomboe vae ou Jesús oĩ vae pe jare jei chupe:

—Oporomboe vae, taa nderupíe opaete que rupi ndeo vae rupi.

<sup>20</sup>Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerã ayeyapo vae mbaeti cherenta —jei.

<sup>21</sup>Jare ñru jemimboe jei Jesús pe:

—CheYa, emaeño rani cheré aa vaerã aico cheru re umano regua.

<sup>22</sup>Ërei Jesús jei chupe:

—Eyu cherupíe. Tecove opa mbae vae güinoi mbae vae reta toñoti umano vae reta —jei.

**Jesús umiquíi ivitu jare i guasu**  
(Mr 4.35-41; Lc 8.22-25)

<sup>23</sup>Jayave Jesús uyupi chalana pe jare jemimboe reta vi uyupi pípe.

<sup>24</sup>Jare ou ivitu tanta uyepeyu, jare i uyembiaparoaroa uique chalana pe, jare umitínee seri ma. Ërei Jesús oque oĩ. <sup>25</sup>Jayave Jesús jemimboe reta yugüiraa omomba. Jei reta chupe:

—OreYa, orerepi. Ñamanota ma.

<sup>26</sup>Jayave Jesús jei chupe reta:

—¿Maera pa pequiye? Michi ete co pepurugüirovia —jei.

Jayave upüa jare uñeengata ivitu jare i guasu pe. Jare opaete voi quíi ngatu upita. <sup>27</sup>Jare Jesús jemimboe reta ipiacañi jare jei:

—¿Mbae nunga cuimbae pa cua? Ivitu jare i guasu uyapo jae oyocui vae.

**Mocui cuimbae aña oya jese vae reta**  
(Mr 5.1-20; Lc 8.26-39)

<sup>28</sup>Jayave yugüiraa uvãe i guasu jovaicho pe, gadareno reta iivi pe. Jare yugüeru teögüerirurenda güi oovãiti Jesús mocui cuimbae aña oya jese vae reta. Pochi reta. Jáeramo mbaeti quía ipuere uguata jocua tape rupi. <sup>29</sup>Jare jae reta iñeeãta reve jei:

—¿Maera pa ndeyu oremambeco, Jesús? Nde co jae Tumpa Tai. ¿Ndeyu pa ndiporaraca oreve añave? Taicue rupi ramo co ndiporaracata tēi oreve —jei reta.

<sup>30</sup>Jare mbiri catu jeta cuchi reta ucaru ñugüinoi. <sup>31</sup>Jare aña reta uyerure Jesús pe:

—Cua cuimbae reta güi orembisiri yave, emaeño oreré ndoo vaerã ndoya cuchi reta re.

<sup>32</sup>Jayave Jesús jei chupe reta:

—Pecua.

Jare yugüiraa ma yave cuimbae reta güi, ña reta yugüiraa oya cuchi reta re. Jayave opaete cuchi reta tanta osi ivia rupi oa i guasu pe, jare joco pe opa ipitupa reta.

<sup>33</sup>Jayave cuchi iyandarecoa reta opa osi, jare yugüiraa tenta guasu pe, jare umimbeu joco pegua reta pe opaete uyeyapo vae regua. Umimbeu vi chupe reta mbae ña oyase jese vae reta pe uyeyapo vae. <sup>34</sup>Jayave opaete joco pegua reta yugüeru oovãiti Jesús. Jare uecha yave, umiñera oo ye vaerã jae reta ivi güi.

### Jesús umbigüera cuimbae ipuere mbae omi vae

(Mr 2.1-12; Lc 5.17-26)

**9** <sup>1</sup>Jare Jesús uyupi ye penti chalana pe jare oo ye i guasu jovaicho pe. Jayave oo uvãe jenta guasu pe. <sup>2</sup>Jayave amocue vae güeru penti cuimbae imbaerasi vae. Cua cuimbae ipuere mbae omi vae. Jupa pe oĩ. Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Iyerovia, cherivi. Nembraeyoa reta uyembai ma —jei.

<sup>3</sup>Jayave amocue mboroyocui re oporomboe vae reta ipia pe uyemingueta: “Cua cuimbae jei icavi mbae vae Tumpa coti.”

<sup>4</sup>Ërei Jesús uicuaa jae reta ipiayemingueta, jare jei chupe reta:

—¿Maera pa penoi pepia pe yemingueta icavi mbae vae reta?

<sup>5</sup>Chepuere jae cua cuimbae pe: ‘Nembraeyoa reta uyembai ma.’ Jae ramiño vi chepuere jae chupe: ‘Epüa eguata.’ ¿Mbae nunga pa yavai jae vaerã? —jei—. <sup>6</sup>Ërei aipota picuaa vaerã cua: Che cuimbaerã ayeyapo vae chepuere ambiãa quã pe imbaeyoa reta cua ivi pe aĩ rambueve —jei.

Jayave jei cuimbae ipuere mbae omi vae pe:

—Epüa evoi nderupa, jare ecua nerenta pe.

<sup>7</sup>Jayave cuimbae upüa, jare oẽ oo jenta coti. <sup>8</sup>Ërei jeta joco pe ñugüinoi vae reta uecha yave, uquiye jare umbiadora reta Tumpa, mbaepuere tuicha vae umee Jesús pe ramo.

### Jesús ueni Mateo

(Mr 2.13-17; Lc 5.27-32)

<sup>9</sup>Jare Jesús joco güi oo yave, uecha penti cuimbae Mateo jee vae uguapĩ oĩ mburuvicha peguarã ocovara ñugüinoi vae pe, jare jei chupe:

—Eyu cherupíe.

Jayave Mateo upüa, jare oo jae jupíe.

<sup>10</sup>Jare Jesús ucaru oĩ rambueve Mateo jenta pe, jeta mburuvicha peguarã ocovara vae reta jare teco icavi mbae vae uyapo vae reta yugüeru ucaru vaerã Jesús jare jemimboe reta ndive. <sup>11</sup>Jare fariseo reta cua uecha yave, jei Jesús jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

<sup>12</sup>Ërei Jesús cua uyandu yave, jei chupe reta:

—Icove catu vae reta ueca'ã upurupiano vae. Imbaerasi vae retaño ueca —jei—. <sup>13</sup>Pecua piyemboe mbae uipota jei cua: 'Aipota pepuruparareco vaerã, aipota'ã maemimba uyeyucacue reta pemee cheve vaerãño.' Echa'ã che ayu aeca vaerã iyoa vae reta. Ayu'ã aeca vaerã jupi vae reta —jei.

**Maera Jesús jemimboe reta uyecuacu'ã tembiú güi**

*(Mr 2.18-22; Lc 5.33-39)*

<sup>14</sup>Jayave yugüeru Juan jemimboe reta Jesús oĩ vae pe jare upirandu chupe: —¿Maera pa ore jare fariseo reta nduyecuacu tembiú güi, ãrei nderemimboe reta uyecuacu'ã tembiú güi?

<sup>15</sup>Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembiú güi, umendata vae jae reta ndive oĩ rambueve. Ërei outa uvã ara umendata vae uyereraaca vaerã chugüi reta. Jayave ramo uyecuacuta tembiú güi —jei—.

<sup>16</sup>Icavi'ã yamboya vaerã temimonde indechi vae maemboyaa ipiau vae pe. Echa'ã jucuarã yayapo yave, maemboyaa ipiau vae umiãta temimonde indechi vae, jare temimonde jeiete osoro —jei—. <sup>17</sup>Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarã yayapo yave, vino omondoro jiru, jare vino uyepiyere, jare jiru icavi'ã ma. Jáeramo yambiru vino ipiau vae jiru ipiau vae pe. Echa'ã jucuarã yayapo yave, jiru osoro'ã jare vino uyepiyere'ã —jei.

**Jairo tayi jare cuña Jesús jemimonde uyaviqui vae**

*(Mr 5.21-43; Lc 8.40-56)*

<sup>18</sup>Jare Jesús cua jei chupe reta rambueve, ou Jesús oĩ vae pe uvã penti mburuvicha. Jae uyeatica Jesús jovai jare jei:

—Cherayi umanota ma oĩ. Ërei yaa iñono ndepo jese embigüera, agüiye vaerã umano —jei.

<sup>19</sup>Jayave Jesús jare jemimboe reta yugüiraa mburuvicha jupie.

<sup>20</sup>Jare penti cuña doce año ma uiporara tugüiguasu vae oya Jesús re icupe coti jare uyaviqui jemimonde jembei. <sup>21</sup>Echa'ã jae jei ma iyupe ipia pe: “Yepe tã jemimondeño tayaviqui, acuerata co.” <sup>22</sup>Ërei Jesús uyerova, jare uecha yave, jei chupe:

—Cherindi, ndepiacatu. Ndecuera ma nderovia cheré ramo.

Jare jupivoiño cuña ucuera.

<sup>23</sup>Jare Jesús uique mburuvicha jo pe yave, uecha uyemimbi vae reta umiñee ma jemimbi reta teögüe güiraa oñoti vaerã jare jeta joco pe yati ñugüinoi vae reta umbiapu ñugüinoi. <sup>24</sup>Jayave jei chupe reta:

—Pecua oca pe. Cua cuñatai umano'ã co. Oqueño co oĩ —jei.

Ërei joco pe ñugüinoi vae reta oyoyai Jesús. <sup>25</sup>Jayave Jesús omoẽ opaete vae oca pe. Jayave uique ye o pe jare uipisi cuñatai ipo pe, jare cuñatai upüa voi.

<sup>26</sup>Jare opaete jocua ivi pegua reta pe jerãcua quirãi Jesús uyapo cua miacañi.

### Mocui cuimbae jesa mbae vae reta

<sup>27</sup>Jare Jesús joco güi oo yave, mocui cuimbae jesa mbae vae reta yugüiraa jaicue, jare ñneeãta reve jei chupe:

—Nde co jae David ññemoñaã reta pegua. Oreparareco.

<sup>28</sup>Jare Jesús uique ma yave o pe, cuimbae jesa mbae vae reta vi uique jaicue. Jayave Jesús upirandu chupe reta:

—¿Perovia pa chepuere co ayapo cua peve?

—Ndugüirovia, oreYa —jei reta.

<sup>29</sup>Jayave Jesús uyaviqui jae reta jesa, jare jei chupe reta:

—Perovia ramo, pema.

<sup>30</sup>Jare mocui reve ipuere umae. Jayave Jesús jei chupe reta:

—Agüiye pemimbeu quía pe ave.

<sup>31</sup>Ërei jae reta yugüiraa ma yave, umimbeu jeta jocua ivi pegua reta pe Jesús uyapo chupe reta vae.

### Iupa vae umbipi uyemingueta

<sup>32</sup>Jare jae reta yugüiraa ma yave, ñru vae reta güeru Jesús oĩ vae pe penti cuimbae iupa vae, ñña oya jese vae. <sup>33</sup>Jayave Jesús umbisiri ñña chugüi jare iupa vae umbipi uyemingueta. Jare jeta vae reta ipiacañi jare jei reta:

—Yaecha'ãi cua nunga miacañi Israel pe.

<sup>34</sup>Ërei fariseo reta jei:

—Ñña gasu imbaepuere pe umbisiri ñña reta oya jese vae reta güi.

### Jeta co yaaviro vaerã

<sup>35</sup>Jare Jesús oo opaete tenta gasu reta jare tenta gasu-rai reta rupi, jare oporomboe judío reta itupaopao pe. Umimbeu ñee icavi vae Tumpa iporoyocua pegua, jare umbigüera imbaerasi vae reta ipotave mbaerasi güi. <sup>36</sup>Ërei uecha yave jeta vae, uiparareco umae jese reta. Echa'ã jae reta uyemipia'ã jare ipiatiti. Ovecha mbaeti iyandarecoa güinoi vae reta rami co. <sup>37</sup>Jayave Jesús jei jemimboe reta pe:

—Jeta ete co yaaviro vaerã. Ërei mbovi ete co umbaeviro vae reta.

<sup>38</sup>Jáeramo pe reta piyerure yandeYa pe omondo vaerã uparaviqui vae reta umbaeviro reta vaerã —jei.

### Jesús jemimondo reta jee

(Mr 3.13-19; Lc 6.12-16)

**10** <sup>1</sup>Penti ara Jesús umbati jocua doce jemimboe reta, jare umee chupe reta mbaepuere umbisiri vaerã ñña reta oya jese vae reta güi jare umbigüera vaerã imbaerasi vae reta ipotave mbaerasi güi. <sup>2</sup>Cua co jae jocua doce Jesús jemimondo reta jee: Simón (Pedro jee vae), jare Simón tiví Andrés jee

vae, jare Zebedeo tai reta Jacobo jare Juan jee vae, <sup>3</sup>Felipe, Bartolomé, Tomás, Mateo ocovara vae, Alfeo tai Jacobo jee vae, Tadeo, <sup>4</sup>Simón (jae co Zelote pe ueni vae), jare Judas Iscariote (cua cuimbae umee Jesús jovaicho reta pe).

### Jesús omondo jocua doce jemimboe reta

(Mr 6.7-13; Lc 9.1-6)

<sup>5</sup>Jare ndei omondo reta mbove, Jesús oyocui cua doce reve.

—Agüiye pecua judío mbae vae reta ñugüinoi vae pe. Agüiye pecua Samaritano jenta guasu reta pe —jei—. <sup>6</sup>Pecua Israel pegua reta ñugüinoi vae pe. Echa'ã jae reta ovecha ucañi vae reta rami co —jei—. <sup>7</sup>Jare peguata rambueve, pemimbeu ñru vae reta pe cuarai: 'Mboroyocua ara pegua outa ma uvãe' —jei—. <sup>8</sup>Pembigüera imbaerasi vae reta. Pembigüera ipire ocui vae reta. Pembijecove ye umanocue vae reta. Pembisiri añã reta oya jese vae reta güi. Che amee ma peve cua mbaepuere jepi mbae reve. Jáeramo agüiye pecovara mbae quía pe piyapota chupe vae re —jei—. <sup>9</sup>Agüiye peraa oro jare corepoti. <sup>10</sup>Agüiye vi peraa peurupucu, jare agüiye peraa mocui camisa. Peraa jaeño penti pepopoca jare pepipasa pemonde vae. Echa'ã icavi co ñru vae reta umbiepi vaerã uparaviqui vae pe —jei—.

<sup>11</sup>Jare peo yave penti tenta guasu pe ani penti tenta guasu-rai pe, pepirandu quía ra pepuere perovia catu joco pe. Jayave pico joco pe peo ye regua —jei—.

<sup>12</sup>Jare pevãe yave penti tenta pe, pere: 'Tumpa tumee peve mbiacatu.' <sup>13</sup>Jare pepuere yave perovia catu joco pe yugüireco vae reta, Tumpa umeeta chupe reta mbiacatu. Ërei pepuere'ã yave perovia catu, pe retaiño penoita mbiacatu —jei—.

<sup>14</sup>Jare ime yave tenta pegua reta ani tenta guasu pegua reta uipota'ã pepita vaerã joco pe jare uipota'ã uyapisaca peré vae, pecuaño joco güi, jare pemitimo ivicuii pepi güi —jei—. <sup>15</sup>Añete co jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei—.

### Uiporarata co

<sup>16</sup>Mase, pomondo icavi mbae vae uyapo vae reta ipite rupi. Pe reta ovecha reta rami co. Jae reta co yaguapita reta rami. Jáeramo pearacuaa catu mboi iyaracuaa catu rami. Jae ramiño vi agüiye piyapo icavi mbae vae picasu uyapo'ã icavi mbae vae rami —jei—. <sup>17</sup>Piñemoa ngatu. Echa'ã ñru vae reta pereraata mburuvicha reta yati vae pe, uñeapo vaerã peré. Jare penupata judío reta itupao reta pe —jei—. <sup>18</sup>Jare piyereraacata mburuvicha reta jare mburuvicha guasu reta jovai chereco pegua, pepuere vaerã chemimbeu chupe reta jare judío mbae vae reta pe —jei—. <sup>19</sup>Ërei jae reta pemee yave, agüiye piyemipia'ã mbae pereta mburuvicha reta pe vae re. Echa'ã Espíritu Santo uicuaacata peve jocua ora pe etei mbae pere vaerã —jei—. <sup>20</sup>Echa'ã peRu iEspíritu pemborita piyemingueta vaerã, pe retaiño'ã co piyeminguetata —jei—.

<sup>21</sup>Jare penti cuimbae umeeta tiví uyeyucaca vaerã. Jae ramiño vi penti cuimbae umeeta tai uyeyucaca vaerã. Jare sambiai reta oyovaichota tu jare



ichi ndive, jare uyucacata —jei—. <sup>22</sup>Jare piñemitarẽicata opaete vae pe chereco pegua. Ërei jõsata oo uvãe iyapi pe vae uyembiasacata co —jei—. <sup>23</sup>Ërei penti tenta guasu pe uyapo reta icavi mbae vae peve yave, pesi ïru tenta guasu pe. Añete che jae peve, ndarau peo opaete Israel pegua reta jenta guasu pe ndei che cuimbaerã ayeyapo vae ayu ye mbove —jei—.

<sup>24</sup>Penti uyemboe oĩ vae uicuaa ete'ã oporomboe vae uicuaa vae rami. Jae ramiño vi penti uyeyocui vae imbaepuere tuicha'ã ete ipatrón imbaepuere rami —jei—. <sup>25</sup>Icavi co penti uyemboe oĩ vae uyemboe cavi vaerã oporomboe vae uicuaa vae re. Jae ramiño vi icavi co penti uyeyocui vae uiporu cavi vaerã mbaepuere ipatrón umee chupe vae. Che co jae peYa, jare ïru vae reta chembijee Beelzebú. Jáeramo pembijeeta Beelzebú tai reta. Echa'ã pe reta piyeyocui cheve —jei—.

### **Pequiye Tumpa güi**

*(Lc 12.2-7)*

<sup>26</sup>Ërei agüiye pequiye chugüi reta. Ime yave mbae uyeyasoi vae, uyeechacañotai co. Jare ime yave mbae uñeñomi vae, uyecuaañotai co —jei—. <sup>27</sup>Pĩtumimbi pe che jae peve vae re piyemingueta tembipe pe. Jare che jae viari peve vae pemimbeu opaete vae pe —jei—. <sup>28</sup>Agüiye pequiye upuruyuca vae reta güi. Echa'ã pereteño ipuere uyuca. Ipuere'ã uyuca perecove. Pequiye Tumpa güi. Echa'ã jae ipuere omondo quía jete jare jecove tata guasu pe —jei—. <sup>29</sup>Picuaa co quirãi umaemee vae reta umee mocui güira-rai mbovi ete corepoti re. Ërei mbaeti penti yepe umano oa ivi pe peRu uicuaa'ã reve —jei—. <sup>30</sup>Tumpa uicuaa mbovi pea penoi peãca re vae —jei—. <sup>31</sup>Jáeramo agüiye pequiye. Echa'ã Tumpa perau ete jeta güira-rai reta güi —jei—.

### **Ïru vae reta jovaque uyecuaaca vae**

*(Lc 12.8-9)*

<sup>32</sup>Ime yave quía ïru vae reta jovaque jei yave: ‘Che co jae Jesús jemimboe’, che jaeta cheRu ara pe oĩ vae jovaque: ‘Cua co jae cheremimboe’ —jaeta, jei Jesús—. <sup>33</sup>Ërei ime yave quía ïru vae reta jovaque checuacu vae, che vi aicuacuta cheRu ara pe oĩ vae jovaque —jei—.

### **Ayu uyembiyao vaerã uyugüi ivi pegua reta**

*(Lc 12.51-53; 14.26-27)*

<sup>34</sup>Aramoi pepia pe piyemingueta che ayu co amee vaerã mbiacatu ivi pegua reta pe. Ërei jucuarãi'ã co. Che ayu uyembiyao vaerã uyugüi ivi pegua reta, mbaeti güinoi vaerã mbiacatu —jei—. <sup>35</sup>Ayu penti cuimbae oyovaicho vaerã tu ndive, jare cuñatai oyovaicho vaerã ichi ndive, jare cuña oyovaicho vaerã imesi ndive —jei—. <sup>36</sup>Jare cuimbae jenta pegua reta oyovaichota jae ndive —jei—. <sup>37</sup>Ime yave quía uau ete tu jare ichi chegüi vae, ndarau ipuere ico cheremimboerã. Jae ramiño vi ime yave quía uau ete isambiai reta chegüi vae, ndarau ipuere ico cheremimboerã

—jei—. <sup>38</sup>Jare ime yave quía ovoĩã icurusu oo vaerã cherupíe vae, ndarau ipuere ico cheremimboerã —jei—. <sup>39</sup>Uipota uñuvatu jecove vae ndarau ipuere. Ërei umeeta jecove chereco pegua vae uñuvatuta co —jei—.

### Ambijecoviata co chupe

(Mr 9.41)

<sup>40</sup>Ime yave quía uyapo icavi vae peve, cheve uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei—. <sup>41</sup>Ime yave quía icavi vae uyapo penti Tumpa ñee umimbeu vae pe Tumpa ñee umimbeu ramo, Tumpa umeeta chupe ñee umimbeu vae pe umeeta vae. Jae ramiño vi ime yave quía icavi vae uyapo penti jupi vae uyapo vae pe jupi vae uyapo ramo, Tumpa umeeta chupe jupi vae uyapo vae pe umeeta vae —jei—. <sup>42</sup>Añete che jae peve, ime yave quía umees penti vaso i roisa vae yepe penti sambiai jou vaerã vae, uyapo yave jucuarã jae co cheremimboe ramo, ambijecoviata co chupe —jei—.

### Juan ombou vae reta

(Lc 7.18-35)

**11** <sup>1</sup>Jare Jesús opa ma oyocui yave jocua doce jemimboe reta, jae etei oo joco güi oporomböe vaerã jare umimbeu vaerã Tumpa ñee Israel pegua tenta guasu reta pe.

<sup>2</sup>Jare Juan peresoriru pe oĩ rambueve, uicuaa Cristo uyapo oĩ vae regua. Jayave ombou mocui jemimboe reta Jesús oĩ vae pe <sup>3</sup>jei vaerã chupe:

—¿Nde pa co jae Cristo outa vae? ani ¿nuãrota pa ñru vae ou vaerã?

<sup>4</sup>Jayave Jesús jei chupe reta:

—Pecua ye pemimbeu Juan pe piyandu jare peeche vae regua. <sup>5</sup>Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umanocue vae reta icove ye ma. Iparavete vae reta uyapisaca ñee icavi vae re —jei—. <sup>6</sup>Jare Tumpa umivendiseta jecuae güirovia cheré vae reta —jei—.

<sup>7</sup>Jare yugüiraa ye yave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quía re pa co peo ñuu pe pemae? Jae ipirãta mbae vae'ã co tacuarãsi omi ivitu uipeyu yave vae rami —jei—. <sup>8</sup>¿Quía re pa co peo pemae? Jae omonde'ã temimonde ipõra vae. Mase, temimonde ipõra vae omonde vae reta yugüireco mburuvicha guasu reta jenta pe —jei—. <sup>9</sup>¿Quía re pa co peo pemae? ¿Peo ra pemae vaerã penti Tumpa ñee umimbeu vae re? Añete che jae peve, Tumpa umees chupe uyapo vaerã jeta ete ñru Tumpa ñee umimbeu vae reta uyapo vae güi —jei—. <sup>10</sup>Tumpa ñee uyecuatía oĩ jese cuarã:

‘Mase’ —jei Tumpa—, ‘che amondota chiñee güiraata vae nderenonde, uyapicatu vaerã nderaperã.’

Jucuarã uyecuatía oĩ —jei—. <sup>11</sup>Añete che jae peve, Tumpa umees Juan upurumbibautizase vae pe uyapo vaerã jeta ete ñru Tumpa ñee umimbeu vae reta

uyapo vae güi. Ërei taicuegua vae ara pegua mboroyocui pegua uyembutuichaca eteta Juan güi —jei—. <sup>12</sup>Juan upurumbibautizase vae umbipi Tumpa iporoyocui regua umimbeu güive, opaete vae uipota uique jocua mboroyocui ara pegua pe —jei—. <sup>13</sup>Echa'ã opaete Tumpa ñee aracae umimbeu vae reta uicuatía vae jare mboroyocui vi uicuaaca Tumpa iporoyocui regua ndei Juan ou mbove —jei—. <sup>14</sup>Jare pipota yave perovia, jae co Elías. Echa'ã Tumpa ñee aracae umimbeu vae jei outa co Elías —jei—. <sup>15</sup>Uipota uyandu vae tuyapisaca cua re —jei—.

<sup>16</sup>Tamimbeu peve mbae ndive amboyovaque añave yugüireco vae reta. Jae reta co sambiai plaza pe uguapi ñugüinoi vae reta rami. Jae reta jei uyupe cuarãi: <sup>17</sup>'Nduyemimbi ma peve, ãrei pe reta pepirae'ã. Orepititi perovaque, ãrei pe reta piyao'ã.' Jucuarãi jei —jei—. <sup>18</sup>Echa'ã Juan ou, jare jae uyecuacu tembú jare vino güi. Jáeramo uicuaa vae reta jei añã oya co Juan re —jei—. <sup>19</sup>Che cuimbaerã ayeyapo vae ayu, jare che ayecuacu'ã tembú jare vino güi. Jáeramo checuaa vae reta jei cuarãi: 'Mase, jae jou jeta tembú jare vino. Jae co mburuvicha peguarã ocovara vae reta jare teco icavi mbae vae uyapo vae reta iamigo.' Jucuarãi jei —jei—. Ërei opaete iyaracuaa vae reta uicuaaca aracuaa icavi co —jei.

### **Tenta guasu pegua uiporarata vae reta**

*(Lc 10.13-15)*

<sup>20</sup>Jayave Jesús umbipi ñeengata jocua tenta guasu jeta miacañi uyapo pipe vae reta pe. Echa'ã jocua tenta guasu pegua reta ueya'ã iyemingueta icavi mbae vae ipia pe oĩ vae. Jae jei:

<sup>21</sup>—Corazín pegua reta uiporarata co. Betsaida pegua reta uiporarata co. Echa'ã jeta miacañi reta ayapo ipite pe chembaepuere pe. Jucuarãi ayapo yave mona Tiro jare Sidón pe, joco pegua reta ueyata tẽi aracae ma iyemingueta icavi mbae vae ipia pe oĩ vae. Omondeta tẽi temimonde jaimbe vae jare oñonota tẽi tanimbu ñãca re uicuaaca vaerã ipiatiti co —jei—. <sup>22</sup>Ërei che jae peve, Tumpa uãa yave ivi pegua reta, Corazín jare Betsaida pegua reta tanta uiporarata Tiro jare Sidón pegua reta güi —jei—. <sup>23</sup>Jare Capernaum pegua reta ipia pe uyemingueta tẽi icavi co yugüireco vaerã Tumpa ndive. Ërei Tumpa omondota reta yugüireco vaerã cañitei pe. Echa'ã jeta miacañi reta ayapo ipite pe chembaepuere pe. Jucuarãi ayapo yave mona Sodoma pe, Sodoma ndarau tẽi uyembai —jei—. <sup>24</sup>Ërei che jae peve, Tumpa uãa yave ivi pegua reta, Capernaum pegua reta tanta uiporarata Sodoma pegua reta güi —jei.

### **Peyu checoti peputuu vaerã**

*(Lc 10.21-22)*

<sup>25</sup>Jayave Jesús jei:

—CheRu, nde co jae ara pegua reta jare ivi pegua reta iYa. Amee yasurupai ndeve quirãi nde nemaño'ã cua ivi pegua iyaracuaa vae reta re uicuaa vaerã cua mbaembae, ãrei ndicuaaca sambiai rami vae reta pe. <sup>26</sup>Icavi co, cheRu. Echa'ã icavi co ndeve ndiyapo vaerã jucuarãi —jei.

<sup>27</sup>Jayave jei vi:

—CheRu umee ma cheve opaete. Mbaeti quía uicuaa cavi cheregua, jaeño cheRu. Jae ramiño vi mbaeti quía uicuaa cavi cheRu regua, jaeño che jare che aicuaaca chupe vae reta —jei—.

<sup>28</sup>Opaete piyemipia'ã jare pepiatiti pico vae reta peyu checoti. Che tambuputuú perecove —jei—. <sup>29</sup>Piñemĩru che ndive jare piyemboe che aipota pomboe jese vae re. Echa'ã che añemimichi. Ayembutuicha'ã etei. Jucuarã piyapo yave, perecove uputuuta —jei—. <sup>30</sup>Echa'ã piñemĩru yave che ndive, ndarau piyemipia'ã jare ndarau pepiatiti —jei.

### Jesús jemimboe reta uipoo trigo mbutuu ara pe

(Mr 2.23-28; Lc 6.1-5)

**12** <sup>1</sup>Mbutuu ara pe Jesús oo co rupi jemimboe reta ndive. Jesús jemimboe reta iyembaí jare umbipí uipoo trigo jare jou. <sup>2</sup>Èrei fariseo reta uecha yave, jei Jesús pe:

—Mase, nderemimboe reta uyapo ñugüinoi aguiyeta tēi uyapo mbutuu ara pe vae.

<sup>3</sup>Jayave Jesús jei chupe reta:

—¿Pemingueta'ã pa David uyapocue vae regua, jae jare jae ndive ñugüinoi vae reta iyembaí yave? <sup>4</sup>David uique Tumpa jo pe jare jou mbiyape Tumpa jo pe uñeño tee vae reta. Aguiyeta tēi co David jare jae ndive ñugüinoi vae reta jou jocua mbiyape. Jaeño sacerdote reta ipuere jou —jei—. <sup>5</sup>Jare ¿pemingueta'ã etei pa mboroyocui pe quirã mbutuu ara pe sacerdote Tumpa jo pe ñugüinoi vae reta uyapo aguiyeta tēi quía uyapo mbutuu ara pe vae? Èrei Tumpa umbijeco'ã reta —jei—. <sup>6</sup>Èrei che jae peve, che cua pe aĩ vae ayembutuichaca ete Tumpa jo güi —jei—. <sup>7</sup>Èrei picuaa'ã mbae uipota jei cua Tumpa iñee pe uyecuatía oĩ vae: 'Aipota pepuruparareco vaerã' —jei Tumpa—, 'aipota'ã maemimba uyeyucacue reta pemee cheve vaerãño.' Jucuarã uyecuatía oĩ. Echa'ã picuaa yave mona, ndarau tēi pembijeco mbaeti teco güinoi vae reta —jei—. <sup>8</sup>Echa'ã che cuimbaerã ayeyapo vae chepuere jae mbae icavi uyeyapo vaerã mbutuu ara pe —jei.

### Cuimbae ipo jovaicho tipa vae

(Mr 3.1-6; Lc 6.6-11)

<sup>9</sup>Jare Jesús oo joco güi uique judío reta itupao pe. <sup>10</sup>Jare joco pe oĩ penti cuimbae ipo jovaicho tipa vae. Jare joco pe ñugüinoi vae reta upirandu Jesús pe:

—¿Icavi pa yambigüera vaerã quía mbutuu ara pe? ¿Mbae pa jei mboroyocui cua re? —jei reta.

Echa'ã jae reta uipota tēi umbijeco Jesús.

<sup>11</sup>Jayave Jesús jei chupe reta:

—Penti cuimbae güinoi yave penti ovecha, jare ovecha oa yave ivicua pe mbutuu ara pe, cuimbae uipisi voita güinoẽ ivicua güi. <sup>12</sup>Ërei penti cuimbae jepi ete penti ovecha güi. Jáeramo jupi co yayapo vaerã icavi vae mbutuu ara pe —jei.

<sup>13</sup>Jayave jei cuimbae pe:

—Eupi ndepo.

Jayave cuimbae ipo uupi, jare ucuera voi. Oyovaque ma ipo jovaicho ipo icavi vae ndive. <sup>14</sup>Jayave fariseo reta oẽ judío reta itupao güi, jare uyemboemboe quirãi ra uyucacata Jesús.

### Cherembiocui aiparavo vae

<sup>15</sup>Ërei Jesús cua uicuaa yave, oo joco güi. Jare jeta vae reta yugüiraa jaicue, jare Jesús umbigüera opaete imbaerasi vae reta. <sup>16</sup>Jare Jesús oyocui reta agüiye vaerã umimbeu quía co jae vae. <sup>17</sup>Cua uyapo, uyeyapo vaerã Tumpa iñee aracae umimbeu vae Isaías jei vae. Echa'ã jae jei cuarãi:

<sup>18</sup>“Mase, jae co cherembiocui aiparavo vae” —jei Tumpa—.

“Aau ete. Ayerovia tuicha jese.

Ameeta chupe cheEspíritu, jare jae uãata judío mbae vae reta.

<sup>19</sup>Ndarau uyeaca quía ndive. Ndarau vi quía uyandu iñee calle rupi.

<sup>20</sup>Ndarau uaquio tacuarãsi uyeca vae.

Ndarau vi ombove mechero michi ete jendi oĩ vae, ndei upurumiamiri upuruãa vaerã mbove.

<sup>21</sup>Jare jae jee re judío mbae vae reta güiroviata.”

Jucuarãi jei.

### Jei reta icavi mbae vae Espíritu Santo coti

(Mr 3.20-30; Lc 11.14-23; 12.10)

<sup>22</sup>Jayave amocue vae güeru Jesús oĩ vae pe penti cuimbae aña oya jese vae. Cuimbae jesa mbae vae jare iupa vi. Jare Jesús umbigüera. Cuimbae umae ma jare uyemingueta ma. <sup>23</sup>Jare opaete joco pe ñugüinoi vae reta ipiacañi jare jei:

—¿Cua ra co jae David iñemoñaeta reta pegua?

<sup>24</sup>Ërei fariseo reta cua uyandu yave, jei reta:

—Aña guasu Beelzebú imbaepuere pe umbisiri aña reta oya jese vae reta güi.

<sup>25</sup>Jesús uicuaa fariseo reta ipiyemingueta jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramiño vi penti tenta pegua reta oyovaicho uyupii yave, opata co jocua tenta —jei—. <sup>26</sup>Jare Satanás umbisiri yave Satanás oya jese vae reta güi, imbaepuere uyembiyao ma co. Jáeramo ndarau etei ma oĩ iporoyocua —jei—. <sup>27</sup>Ërei che umbisiri yave aña reta oya jese vae reta güi Beelzebú imbaepuere pe, ¿quía imbaepuere pe ra umbisiri aña reta oya jese

vae reta güi perentarã reta? Pepuere pepirandu chupe reta jese —jei—. <sup>28</sup>Ërei che ambisiri añã reta oya jese vae reta güi Tumpa iEspíritu imbaepuere pe. Jáeramo pepuere picuaa ou ma co uvãe peve Tumpa iporoyocua —jei—.

<sup>29</sup>Ime yave quía uipota uique cuimbae ipirãta vae jenta pe upïro vaerã imbaembae chugüi vae, uipocuata rani cuimbae ipirãta vae. Jayave ramo ipuereta upïro imbaembae chugüi —jei—.

<sup>30</sup>Ime yave quía uipota'ã ico cheïrurã vae, oyovaicho co che ndive. Jae ramiño vi ime yave quía chembori'ã vae, uyapo co icavi mbae vae checoti —jei—. <sup>31</sup>Jáeramo che jae peve, opaete ivi pegua reta imbaeyoa reta jare opaete iñee icavi mbae Tumpa coti vae Tumpa ipuere umbai. Ërei Tumpa ndarau etei umbiasa jei icavi mbae vae Espiritu Santo coti vae pe —jei—. <sup>32</sup>Jare ime yave quía jei icavi mbae vae che cuimbaerã ayeyapo vae coti vae, Tumpa umbiasata chupe. Ërei ime yave quía jei icavi mbae vae Espiritu Santo coti vae, Tumpa ndarau etei umbiasa chupe, añave jare ara reta outa vae pe —jei—.

**Ía icavi vae jare ía icavi mbae vae**  
(Lc 6.43-45)

<sup>33</sup>Penoi yave temiti icavi vae, penoita vi ía icavi vae. Jae ramiño vi penoi yave temiti icavi mbae vae, penoita vi ía icavi mbae vae. Echa'ã peeche yave temiti ía, picuaata icavi ra temiti —jei—. <sup>34</sup>Pe reta co jae mboi pochí vae reta ramí. Echa'ã pe reta piyapo icavi mbae vae. Jáeramo pepuere'ã etei pere icavi vae. Echa'ã penti penti uyemingueta ipia pe güinoi vae rupi —jei—. <sup>35</sup>Quía nunga jecocavi vae güinoi icavi vae ipia pe. Jáeramo jei icavi vae. Jae ramiño vi quía nunga jecopochí vae güinoi icavi mbae vae ipia pe. Jáeramo jei icavi mbae vae. <sup>36</sup>Ërei che jae peve, jocua ara Tumpa upuruãa yave, jae umbijecota ivi pegua reta opaete ñee icavi mbae vae regua re —jei—. <sup>37</sup>Echa'ã Tumpa jeita icavi vae co piyapo, icavi vae pere yave. Jae ramiño vi Tumpa jeita icavi mbae vae co piyapo, icavi mbae vae pere yave —jei—.

**Uipota reta uecha miacañi**  
(Mr 8.12; Lc 11.29-32)

<sup>38</sup>Jayave amocue mboroyocui re oporombœ vae reta jare fariseo reta jei Jesús pe:

—Oporombœ vae, nduipota ndiyapo vaerã mbae ndicuaaca vaerã oreve quía co nde.

<sup>39</sup>Jayave Jesús jei chupe reta:

—Añave yugüireco vae reta icavi mbae vae uyapo vae reta co. Upurugüirovia'ã. Jáeramo uipota ayapo vaerã miacañi chupe reta. Ërei jaeño uyeyapota mbae Tumpa iñee araca umimbeu vae Jonás pe uyeyapo vae rami, jae reta uicuaa vaerã quía co che —jei—. <sup>40</sup>Echa'ã Jonás upita mbapi ara jare mbapi piare jocua pira guasu jie pe. Jae ramiño vi che cuimbaerã ayeyapo vae apitata mbapi ara jare mbapi piare ivigüi pe —jei—. <sup>41</sup>Tumpa upuruãa yave, Nínive pegua reta

upĩata umbijeco vaerã añave yugüireco vae reta. Echa'ã jae reta ueya iyemingueta icavi mbae vae ipia pe oĩ vae, Jonás umimbeu chupe reta yave Tumpa ñee. Ërei chembaepuere tuicha ete co Jonás imbaepuere güi —jei—. <sup>42</sup>Tumpa upuruãa yave, jocua cuña mburuvicha guasu ico sur coti vae upĩata umbijeco vaerã añave yugüireco vae reta. Echa'ã jae ou mbiri ete güi uyapisaca vaerã Salomón iyaracuaa catu vae re. Ërei che chearacuaa catu ete Salomón güi —jei—.

### Aña usiri jare ou ye vae

(Lc 11.24-26)

<sup>43</sup>Penti aña usiri ma yave oya jese vae güi, uguata ñana rupi ueca quiape ico vaerã. Ërei ipuere'ã yave uvãe quiape ico vaerã, <sup>44</sup>jei iyupe: Taa ye jocua chero ayu chugüi vae pe —jei, jei—. Echa'ã yandepuere yamijaanga penti o jocua cuimbae aña usiri ma chugüi vae re. Aña ou ye uvãe yave jocua o pe, uecha ipo'ã. O iya utupeĩ ma jare uyapicatu —jei—. <sup>45</sup>Jayave oo ye aña güeru siete aña icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerã. Tenonde yave, penti aña oya jese yave, jocua cuimbae uiporara. Ërei taicue rupi ocho aña reta oya jese. Jáeramo tanta uiporara. Jae ramiño vi ueyapota añave yugüireco vae icavi mbae vae uyapo vae reta pe —jei.

### Jesús ichi jare tivi reta

(Mr 3.31-35; Lc 8.19-21)

<sup>46</sup>Jare Jesús uyemingueta rambueve joco pe ñugüinoi vae reta pe, Jesús ichi jare tivi reta yugüeru uvãe jae oĩ vae pe, jare oca pe ñugüinoi. Jae reta uipota uyemingueta Jesús ndive. <sup>47</sup>Jayave penti joco pe oĩ vae jei Jesús pe: —¡Aipo! Ndesi jare nderivi reta oca pe ñugüinoi. Uipota uyemingueta nde ndive —jei.

<sup>48</sup>Ërei Jesús jei chupe:

—¿Quía nunga pa co jae chesi jare cherivi reta?

<sup>49</sup>Jayave uupi ipo jemimboe reta coti, jare jei:

—Cua nunga reta co jae chesi jare cherivi reta. <sup>50</sup>Echa'ã opaete cheRu ara pe oĩ vae jei vae uyapo vae reta co jae cherivi jare cherindi jare chesi —jei.

### Jesús umijaanga umaeti vae

(Mr 4.1-9; Lc 8.4-8)

**13** <sup>1</sup>Jocua ara Jesús oẽ tenta güi oo uguapi i guasu jembei pe. <sup>2</sup>Jare jeta vae uyembati Jesús oĩ vae pe. Jáeramo Jesús uyupi penti chalana i guasu pe oĩ vae pe, jare uguapi pipe. Jare yati vae reta uyemboi ñugüinoi i guasu jembei pe. <sup>3</sup>Jare Jesús omboe reta jeta mbaembae re umijaanga reve. Jei chupe reta:

—Penti cuimbae oo umaeti vaerã. <sup>4</sup>Umaeti yave, umiai temiti, jare amocue oa tape rupi. Jayave yugüeru güira reta opa jou —jei—. <sup>5</sup>Ëru temiti oa mbovño

ivi itape íarambo oĩ vae pe. Cua imambae oẽ, jeta'ã ivi chupe ramo —jei—. <sup>6</sup>Ërei guarasi jasi yave, ipiru. Jare japo quipe'ã oĩ ramo, utini —jei—. <sup>7</sup>Ëru temiti oa ñanapite pe. Ñana ucuacuaa yave, opa uyuca temiti. <sup>8</sup>Jare ïru temiti oa ivicavi pe. Cua reta ucuacuaa cavi jare ía. Amocue jeta ete jái, jare ïru jeta catu jái, jare ïru mbovño jái —jei—. <sup>9</sup>Uipota uyandu vae tuyapisaca cua re —jei.

**Maera Jesús oporomboe umijaanga reve**

*(Mr 4.10-12; Lc 8.9-10)*

<sup>10</sup>Jayave Jesús jemimboe reta yugüeru upirandu chupe:

—¿Maera pa nemingueta reta nemijaanga reve?

<sup>11</sup>Jayave Jesús jei chupe reta:

—Amimbeu ma peve mboroyocua ara pegua regua. Cua uyecuaa'ã ïru vae reta pe —jei—. <sup>12</sup>Echa'ã güinoi vae pe uñemiiruta, jeta güinoi vaerã. Ërei mbaeti güinoi vae güi mbovi ete güinoi vae uyeequita —jei—. <sup>13</sup>Jáeramo amingueta reta amijaanga reve, agüiye vaerã uicuaa cavi, yepe tẽi uecha, jare agüiye vaerã uicuaa, yepe tẽi uyandu —jei—. <sup>14</sup>Jare uyeyapo chupe reta Tumpa iñee aracae umimbeu vae Isaías jei vae. Echa'ã jae jei cuarãi:

‘Piyandu tẽita, ãrei ndarau picuaa.

Peecha tẽita, ãrei ndarau picuaa cavi.

<sup>15</sup>Echa'ã cua reta ipiatanta,  
jare iyapisa pe uyandu tẽi,  
jare usapimiño,  
agüiye vaerã uecha jesa pe,  
jare agüiye vaerã uyandu iyapisa pe,  
jare agüiye vaerã uicuaa ipia pe,  
jare agüiye vaerã uyerova checoti.

Echa'ã uyerova checoti yave, ambaita tẽi imbaeyoa reta' —jei Tumpa. Jucuarãi jei Isaías —jei—.

<sup>16</sup>Ërei Tumpa pemivendise ma. Echa'ã pe reta peecha peresa pe, jare piyapisaca peapisa pe —jei—. <sup>17</sup>Añete che jae peve, jeta Tumpa iñee aracae umimbeu vae reta jare jupi vae reta uipota tẽi uecha pe reta peecha ma vae, ãrei uecha'ã. Jae ramiño vi jae reta uipota tẽi uyandu pe reta piyandu ma vae, ãrei uyandu'a —jei—.

**Umaeti vae uyemijaanga jese vae**

*(Mr 4.13-20; Lc 8.11-15)*

<sup>18</sup>Amimbeu ma peve amijaanga reve cuimbae umaeti vae. Jáeramo piyapisaca ye jese —jei—. <sup>19</sup>Ime yave quía uyapisaca Tumpa iporoyocua re vae, uicuaa cavil'ã yave uyandu vae, ou voi jocua icavi mbae vae jare umiacañi Tumpa iñee güi. Amijaanga cua nunga re temiti tape rupi oa vae —jei—. <sup>20</sup>Jae ramiño vi jocua temiti uñeñoti mbovño ivi itape íarambo oĩ vae pe vae uyemijaanga ïru vae reta Tumpa iñee uyandu vae re. Jupivoiño uyerovia reta, jare uipota cua ñee —jei—. <sup>21</sup>Ërei cua reta jocua temiti japo quipe'ã oĩ vae rami co. Jáeramo imambae icueri



reta. Mbaesusera uyeyapo chupe reta ani ñru vae reta uyapo icavi mbae vae chupe reta Tumpa ñnee uicuaa ramo. Jare jupivoiño uipota'ã ma uyapisaca reta Tumpa ñnee re —jei—. <sup>22</sup>Jae ramiño vi jocua temiti uñeñoti ñanapite pe vae uyemijaanga ñru vae reta Tumpa ñnee uyandu vae re. Ërei jae reta umbipi uyemipia'ã ivi pe mbaembae uyeyapo vae re, jare uyembitavi, uipota icocatu ramo. Jare opaete cua umiacañi reta Tumpa ñnee güi. Jáeramo jae reta jocua temiti ia'ã vae rami co —jei—. <sup>23</sup>Ërei jocua temiti uñeñoti ivicavi pe vae uyemijaanga ñru vae reta Tumpa ñnee uyandu vae re. Cua reta uicuaa cavi Tumpa ñnee. Amocue vae jocua temiti jeta ete jái vae rami co. Ñru vae reta jocua temiti jeta catu jái vae rami co. Jare ñru vae reta jocua temiti mboviño jái vae rami co —jei.

### Trigo jare trigo-raanga

<sup>24</sup>Jesús imiari ye yati vae reta pe umijaanga reve. Jei chupe reta: —Mboroyocua ara pegua penti cuimbae temiti icavi vae ico pe oñoti vae rami co. <sup>25</sup>Ërei opaete vae oque rambueve, cuimbae jovaicho ou oñoti trigo-raanga trigo ipite rupi, jare oo ye —jei—. <sup>26</sup>Trigo ucuacuaa jare ía. Ërei ucuacuaa vi trigo-raanga trigo ipite rupi —jei—. <sup>27</sup>Jáeramo co iya jembiocui reta yugüeru ipatrón pe jei chupe: 'Patrón, ¿niñoti'ã pa trigo icavi vae ndeco pe? ¿Maera pa ucuacuaa trigo-raanga?' —jei reta, jei—. <sup>28</sup>Jayave ipatrón jei chupe reta: 'Penti cherovaicho oñoti.' Jayave jembiocui reta jei chupe: '¿Ndipota pa ndoo vaerã nduequi trigo-raanga?' <sup>29</sup>Ërei ipatrón jei: 'Agüiye peequi. Echa'ã peequi yave trigo-raanga, aramoi peequita vi trigo trigo-raanga ndive' —jei, jei—. <sup>30</sup>'Tucuacuaa päve mocui reve trigo yaipoo regua. Jare yaipoo yave, jaeta uipoo vae reta pe: Pembati rani trigo-raanga piyocua peapi vaerã. Ërei pembati trigo jiru pe' —jei, jei.

### Mostaza jáicue

(Mr 4.30-32; Lc 13.18-19)

<sup>31</sup>Jesús imiari ye yati vae reta pe umijaanga reve. Jei chupe reta: —Mboroyocua ara pegua penti mostaza jáicue cuimbae güiraa oñoti ico pe vae rami co. <sup>32</sup>Cua jáicue michi-rai ete opaete ñru temiti reta jáicue güi. Ërei ucuacuaa ma yave, tuicha ete opaete ñru temiti penti año peguaño ucuacuaa vae reta güi. Uyeyapo penti ivira. Jáeramo güira reta ipuere uyapo jaitirã jáca reta re —jei.

### Levadura

(Lc 13.20-21)

<sup>33</sup>Jesús imiari ye yati vae reta pe umijaanga reve. Jei chupe reta: —Mboroyocua ara pegua levadura rami co. Cuña umbiyea levadura jeta catu harina ndive, levadura uñemiai vaerã opaete masa rupi —jei.

**Maera Jesús oporomboe umijaanga reve**

*(Mr 4.33-34)*

<sup>34</sup>Opaete cua jei Jesús yati vae reta pe umijaanga reve. Jare jecuaeño imiari chupe reta umijaanga reve, <sup>35</sup>uyeyapo vaerã Tumpa iñee aracae umimbeu vae jei vae. Echa'ã jei cuarãi:

“Chemiarita amijaanga reve.

Amimbeuta ivi uyeyapo güive uyecuaa mbae vae.”

Jucuarãi jei.

**Mbae trigo jare trigo-raanga uyemijaanga jese vae**

<sup>36</sup>Jayave Jesús omondo ye yati vae reta, jare uique o pe. Jare Jesús jemimboe reta yugüeru jei chupe:

—Nemimbeu ma oreve nemijaanga reve jocua co trigo-raanga ucuacuaa pipe vae. Emimbeu oreve mbae uipota jei vae.

<sup>37</sup>Jayave Jesús jei chupe reta:

—Temiti icavi vae oñoti vae uyemijaanga che cuimbaerã ayeyapo vae re. <sup>38</sup>Jocua co uyemijaanga opaete ivi re. Trigo icavi vae uyemijaanga Tumpa iporoyocua pegua reta re. Ërei trigo-raanga uyemijaanga icavi mbae vae uyapo vae reta re —jei—. <sup>39</sup>Jocua co iya jovaicho trigo-raanga oñoti vae uyemijaanga aña guasu re. Mbaepoo uyemijaanga cua ara reta iyapi re. Umbaepoo vae reta uyemijaanga ángel reta re —jei—. <sup>40</sup>Jocua trigo-raanga uyembatica jare ocai tata pe. Jae ramiño vi jucuarãita uyeyapo cua ara reta iyapi pe —jei—. <sup>41</sup>Che cuimbaerã ayeyapo vae abouta ángel cheve uyeyocui vae reta, jare jae reta umbatita opaete iyoa vae reta jare icavi mbae vae uyapo vae reta, omombo reta vaerã cheporoyocua güi —jei—. <sup>42</sup>Jare omombota reta tata guasu pe. Joco pe yuaota reta jare jãi umbiquiririuta —jei—. <sup>43</sup>Jayave jupi vae reta uyecuaata Tu iporoyocua pe guarasi jembipe rami. Uipota uyandu vae tuyapisaca cua re —jei—.

**Corepoti uñeñoti vae**

<sup>44</sup>Mboroyocua ara pegua corepoti uñeñoti vae rami co. Echa'ã penti cuimbae uvãe yave jocua corepoti uñeñoti vae, oñomi ye, jare uyerovia reve oo umee corepoti re opaete imbaembae ogua vaerã jocua co —jei—.

**Ita ipõra vae**

<sup>45</sup>Mboroyocua ara pegua penti umaemee vae ita ipõra vae reta ueca vae rami co —jei—. <sup>46</sup>Uvãe yave penti ita ipõra vae jepi ete vae, oo umee corepoti re opaete imbaembae ogua vaerã jocua ita ipõra vae —jei—.

### Pisa jare jevae i rupigua reta

<sup>47</sup>Mboroyocua ara pegua penti pisa rami co. Echa'ã cuimbae reta omombo pisa i guasu pe omboa vaerã ipotave jevae i rupigua reta —jei—. <sup>48</sup>Jare pisa tinee ma yave, cuimbae reta güeru i guasu jembei pe. Jayave uguapi joco pe jare umbati umbiru jevae i rupigua icavi vae reta jiru pe, ãrei omombo jevae i rupigua icavi mbae vae reta —jei—. <sup>49</sup>Jae ramiño vi jucuarãita uyeyapo cua ara reta iyapi pe. Ángel reta yugüeruta jare umbatita icavi mbae vae uyapo vae reta omombo vaerã jupi vae reta ipite güi —jei—. <sup>50</sup>Jare omombota reta tata guasu pe. Joco pe uyaota reta jare jãi umbiquiririuta —jei.

### Mbaembae ipiau vae jare indechi vae

<sup>51</sup>Jayave Jesús upirandu chupe reta:

—¿Picuaa cavi ma pa opaete cua?

—Nduicuaa cavi ma, oreYa —jei reta chupe.

<sup>52</sup>Jayave Jesús jei chupe reta:

—Penti mboroyocui re oporomboe vae mboroyocua ara pegua re uyemboe vae, penti tenta iya rami co. Echa'ã tenta iya umee jenta pegua reta pe mbaembae ipiau vae jare mbaembae indechi vae jo pe uñuvatu vae güi —jei.

### Jesús Nazaret pe

(Mr 6.1-6; Lc 4.16-30)

<sup>53</sup>Jare Jesús opa ma yave cua jei umijaanga reve, oo ye joco güi. <sup>54</sup>Jare oo uvãe yave iivi pe, oporomboe judío reta itupao pe, jare uyapisaca jese vae reta ipiacañi jare jei.

—¿Quíape ra uyemboe cua cuimbae iyaracuaa catu vaerã? ¿Quía ra umee chupe mbaepuere cua miacañi reta uyapo vaerã? <sup>55</sup>Jae co carpintero tai. Jae co María imembi. Jae co Jacobo, José, Simón jare Judas tiquei —jei reta—. <sup>56</sup>Jare opaete jindi reta yugüireco yandepite pe. Jáeramo ¿quirã ra ipuere uyapo opaete cua? —jei reta.

<sup>57</sup>Jáeramo jae reta pochi Jesús pe. Jayave Jesús jei chupe reta:

—Opaete vae uipiu penti Tumpa iñee umimbeu vae. Jaeño jentaigua reta jare jenta pegua reta uipiu'ã reta —jei.

<sup>58</sup>Jare joco pe ipuere'ã uyapo jeta miacañi reta jae reta güirovia'ã jese ramo.

### Juan imano

(Mr 6.14-29; Lc 9.7-9)

**14** <sup>1</sup>Jare jocua ara reta pe mburuvicha guasu Herodes uyandu Jesús regua. <sup>2</sup>Jare jei jembicui reta pe:

—Jae co Juan upurumbibautizase vae. Icove ye ma ou umanocue vae reta ipite güi. Jáeramo uyapo cua miacañi reta —jei.

<sup>3</sup>Echa'ã ndei Juan umano mbove, Herodes uipisica Juan, jare oñonoca peresoriru pe, Herodías jei ramo. Herodías co jae Herodes tivi Felipe jee vae jembireco. <sup>4</sup>Echa'ã tenonde yave Juan jei Herodes pe: “Icavi'ã nemenda vaerã nderivi jembireco ndive.” <sup>5</sup>Jáeramo Herodes uipota tēi uyucaca Juan. Ërei uquiye tenta guasu pegua reta güi. Echa'ã jae reta güirovia Juan co jae penti Tumpa iñee umimbeu vae.

<sup>6</sup>Ërei Herodes uyembiara yave oa vae regua, Herodías imembi cuña ou upirae ipite pe jare umbiyerovia Herodes. <sup>7</sup>Jayave Herodes jei Tumpa jee re umeeta co cuñatai pe ipotave mbae ueca chupe vae. <sup>8</sup>Jayave cuñatai jei Herodes pe:

—Emee cheve cua pe Juan upurumbibautizase vae iñaca penti plato pe.

Echa'ã cuñatai ichi umimbeu ma chupe jucuarãi jei vaerã.

<sup>9</sup>Jayave mburuvicha guasu ipiatiti. Ërei Tumpa jee re jei chupe ramo, jare ñru vae reta uyandu ramo, omondo sundaro Juan iñaca güeru vaerã umee chupe. <sup>10</sup>Jayave oo sundaro peresoriru pe uñacasia Juan. <sup>11</sup>Jayave güeru iñacacue penti plato pe, jare umee cuñatai pe. Jayave cuñatai güiraa umee ichi pe. <sup>12</sup>Jare Juan jemimboe reta yugüeru güiraa jetecue jare oñoti. Jayave yugüiraa umimbeu Jesús pe.

### **Jesús umingaru cinco mil cuimbae reta**

*(Mr 6.30-44; Lc 9.10-17; Jn 6.1-14)*

<sup>13</sup>Jare Jesús cua uyandu yave, oo penti chalana pe quĩ ngatu vae pe. Ërei jeta vae uicuaa yave, yugüiraa ivi rupiño tenta guasu reta güi Jesús oo vae pe. <sup>14</sup>Jesús ugüeyi yave chalana güi, uecha jeta vae, jare uiparareco reta. Jayave umbigüera imbaerasi vae joco pe ñugüinoi vae reta.

<sup>15</sup>Caaru ma yave, Jesús jemimboe reta yugüeru jei chupe:

—Mbaeti quiave ico cua rupi, jare caaru ma oĩ. Emondo cua jeta vae, ogua vaerã jembipurã tenta tenta rupi —jei reta.

<sup>16</sup>Ërei Jesús jei chupe reta:

—Agüiye tuyugüiraa. Pe reta pemee tucaru —jei.

<sup>17</sup>—Jaeño ime cua pe nonoi pandepo mbiyape jare mocui pira —jei reta chupe.

<sup>18</sup>—Peru cheve cua pe —jei.

<sup>19</sup>Jayave Jesús oyocui jocua jeta vae reta uguapĩ vaerã capiichape re. Jayave uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerã yati vae reta pe. <sup>20</sup>Opareve ucaru, jare iyangapĩi reta. Jayave Jesús jemimboe reta umbati tembũ uñepisãacue jembire vae, jare umitinee doce canasta. <sup>21</sup>Jare ucaru vae reta güi cuimbae retaño uyepapa cinco mil rupi. Uyepapa'ã cuña reta jare sambiai reta.

**Jesús uguata i iárambo**  
(Mr 6.45-52; Jn 6.16-21)

22Jare Jupivoiño Jesús oyocui jemimboe reta uyupi vaerã chalana pe, jare yugüiraa vaerã jenonde i guasu jovaicho pe, jae omondo rambueve uyembati vae reta. 23Jare opa omondo yave, Jesús uyupi ivitu guasu re uyerure vaerã Tumpa pe. Jare pïtu ma yave, jaeño Jesús joco pe oï. 24Ërei chalana oo ma uvãe i guasu mbite pe. Yavai Jesús jemimboe reta uruguata vaerã. Echa'ã tuicha i uyembiaparoaroa jare ivitu tanta oovãiti. 25Jare cõeta ma yave, Jesús uguata oo i iárambo güiraa uepiti. 26Jare Jesús jemimboe reta uecha yave uguata ou i iárambo rupi, uquiye. Jei reta:

—Penti mbae iäcúe co.

Usapícai reta uquiye güi.

27Ërei Jupivoiño Jesús ombou iñee chupe reta.

—Piñemiatangātu. Che co. Agüiye pequiye —jei.

28Jayave Pedro jei chupe:

—CheYa, jae co nde yave, cheocui aguata vaerã aa i iárambo rupi ndecoti.

29—Eyu —jei Jesús chupe.

Jayave Pedro ugüeyi chalana güi, jare umbipi uguata i iárambo oo vaerã Jesús coti. 30Ërei uecha yave quirãi ivitu tanta chupe, Pedro uquiye. Jayave umbipi uique i pe, jare iñeeãta reve jei:

—CheYa, cherepi.

31Jupivoiño Jesús uupi ipo jare uipisi Pedro. Jayave jei chupe:

—Michi ete ndepurugüirovia. ¿Maera pa nderovia'ã cheré? —jei.

32Jare uyupi reta yave chalana pe, upita ivitu. 33Jare chalana pe ñugüinoi vae reta umbiadora Jesús. Jei reta:

—Añete co, nde co jae Tumpa Tai.

**Jesús umbigüera Genesaret pegua imbaerasi vae reta**  
(Mr 6.53-56)

34Jare i guasu uasa reta yave, yugüiraa uvãe ivi Genesaret pe. 35Jare joco pegua reta uicuaa jae co Jesús. Jáeramo jae reta yugüiraa opaete jocua ivi rupi, jare güeru Jesús oï vae pe imbaerasi vae reta. 36Jare güeru vae reta uyerure Jesús pe umaño imbaerasi vae reta uyaviqui vaerã jemimonde jembei yepe. Jare opaete jemimonde uyaviqui vae reta ucuera.

**Yandepia uminguia vae**  
(Mr 7.1-23)

**15** 1Jayave fariseo reta jare mboroyocui re oporomboe vae reta yugüeru Jerusalén güi Jesús oï vae pe jare jei chupe:

2—¿Maera pa nderemimboe reta uyapo'ã yandetenondegua reta iporomboe? ¿Maera pa ucaru reta uyepoe mbae reve? —jei reta.

<sup>3</sup>Jayave Jesús jei chupe reta:

—¿Maera pa pe reta piyavi Tumpa iporoyocui piyapo vaerã yandetenondegua reta iporoyocui? <sup>4</sup>Tumpa oporoyocui cuarãi: ‘Ipiu nderu jare ndesi.’ Jare oporoyocui vi cuarãi: ‘Jei icavi mbae vae tu ani ichi coti vae uyeyucacata co.’ Jucuarãi oporoyocui Tumpa —jei—. <sup>5</sup>Ërei pe reta pere cuarãi: ‘Penti vae ipuere jei tu jare ichi pe umeeta tẽi chupe reta ombori vaerã vae umee ma Tumpa pe.’ Jucuarãi pere —jei—. <sup>6</sup>Jare jucuarãi ombori!ã tu jare ichi. Jucuarãi pe reta pemombo Tumpa iporoyocui piyugüi piyapo vaerã yandetenondegua reta iporoyocui —jei—. <sup>7</sup>Pe reta co jae upurumbitavi vae reta. Añete yepe Isaías imiari peré. Echa!ã jae jei cuarãi:

<sup>8</sup>‘Cua reta chepiu iyuru peño’ —jei Tumpa—.

‘Ërei ipia pe chepiu!ã etei.

<sup>9</sup>Chemiadora-raangaiño.

Oporombocue cuimbae iporoyocui re.

Che jucuarãi!ã aporoyocui’ —jei Tumpa.

Jucuarãi jei Isaías —jei.

<sup>10</sup>Jare Jesús ueni opaete joco pe ñugüinoi vae reta.

—Piyapisaca cua re, picuaa cavi vaerã —jei—. <sup>11</sup>Ipotave mbae peu vae ipuere!ã umingüia pepia. Jupi mbae vae pere vae, jocua umingüia pepia —jei.

<sup>12</sup>Jayave Jesús jemimboe reta yugüeru jei chupe:

—¿Ndicuaa pa fariseo reta pochì co ndeve jocua ndere chupe reta vae re?

<sup>13</sup>Jayave Jesús jei chupe reta:

—Opaete temiti reta cheRu ara pe oĩ vae oñoti!ã vae uyeequita co.

<sup>14</sup>Pemaño jese reta. Echa!ã jae reta jesa mbae vae reta uechaca ñugüinoi tape ñru jesa mbae vae reta pe vae rami co. Jare jesa mbae vae uechaca yave tape ñru jesa mbae vae pe, mocui reve uasavita ivicua pe —jei.

<sup>15</sup>Jayave Pedro jei Jesús pe:

—Emimbeu oreve mbae uipota jei cua nemijaanga reve ndere vae.

<sup>16</sup>Jayave Jesús jei chupe reta:

—¿Pe retave pa picuaa cavi!ã? <sup>17</sup>Picuaa cavi cua: Ipotave mbae peu vae oo perie pe, jare pemombo —jei—. <sup>18</sup>Ërei jupi mbae vae pere vae, jocua umingüia pepia. Echa!ã pere vae ou pepia güi —jei—. <sup>19</sup>Echa!ã pepia güi oẽ opaete icavi mbae vae: pepia pe piyemingüeta icavi mbae vae, pepuruyuca, piyuvanga menda re, piyapo aguasa, pemonda, peapu ñru vae reta re, icavi mbae vae pere ñru vae reta coti —jei—. <sup>20</sup>Cua reta umingüia pepia. Ërei pecaru yave piyepoe mbae reve, jocua umingüia!ã pepia —jei.

### **Cuña Canaán pegua ipurugüirovia**

(Mr 7.24-30)

<sup>21</sup>Jayave Jesús oo ye joco güi Tiro jare Sidón iyipi rupi. <sup>22</sup>Jare penti cuña ivi Canaán pegua joco pe ico. Jae ou Jesús oĩ vae pe jare ñneeãta reve jei chupe:

- CheYa, cheparareco. Nde co jae David ññemoñaeta reta pegua. Chemembĩ cuña uiporara oĩ. Echa'ã penti aña oya ma jese —jei.
- <sup>23</sup> Ërei Jesús jei'ã mbae chupe. Jayave Jesús jemimboe reta yugüeru jei chupe: —Emondo ye jocua cuña. Echa'ã ññeeãta ou yanderaicue.
- <sup>24</sup> Jayave Jesús jei: —Tumpa chembou Israel pegua reta peño. Jae reta ovecha ucañi vae reta rami co —jei.
- <sup>25</sup> Jayave cuña ou uyeatica Jesús jovai, jare jei chupe: —Carai, chembori.
- <sup>26</sup> Ërei Jesús jei chupe: —Icavi'ã yaequi vaerã tembú sambiaí reta güi, ñamee vaerã yimba-rai reta pe —jei.
- <sup>27</sup> —Añete tẽi co, carai —jei cuña Jesús pe—. Ërei yimba-rai reta jou tembú usururucue iya imesa güi oa vae —jei.
- <sup>28</sup> Jayave Jesús jei chupe: —Cuña, tuicha co ndepurugüirovia. Tuyeyapo ndeve nde ndipota rupi —jei. Jare jupivoño cuña imembĩ ucuera.

### Jesús umbigüera jeta vae

<sup>29</sup> Jayave Jesús oo joco güi uvãe ñ guasu Galilea pe oĩ vae pe. Jayave uyupi penti ivitu guasu re, jare uguapĩ joco pe. <sup>30</sup> Jare jeta vae yugüeru jae oĩ vae pe. Jae reta güeru icõcho vae reta, jare ipo jovaicho mbae vae reta, jare jesa mbae vae reta, jare iupa vae reta, jare jeta ñru imbaerasi vae reta oñono Jesús jovai. Jayave Jesús umbigüera reta. <sup>31</sup> Jáeramo joco pe yati vae reta ipiacañi. Echa'ã uyandu iupa vae reta uyemingueta, jare uecha ipo jovaicho mbae vae reta ucuera, jare icõcho vae reta uguata cavi, jare jesa mbae vae reta uma. Jare opaete vae umbiadora Israel pegua reta iTumpa.

### Jesús umingaru cuatro mil cuimbae reta

(Mr 8.1-10)

- <sup>32</sup> Jayave Jesús ueni jemimboe reta jare jei chupe reta: —Aiparareco cua yati vae reta. Echa'ã mbapĩ ara ma ñngüinoi che ndive, jare mbaeti mbae güinoi jou vaerã. Ndarau amondo ye reta ucaru mbae reve, agüiye vaerã ipitu tape rupi —jei.
- <sup>33</sup> Jayave Jesús jemimboe reta upirandu chupe: —¿Quirãita pa yandepuere ñamee mbiyape cua jeta vae reta pe cua mbaeti quiave ico vae pe, jae reta ucaru cavi vaerã?
- <sup>34</sup> Jayave Jesús upirandu chupe reta: —¿Mbovi pa mbiyape penoi? —Ime nonoi siete, jare mbovi pira —jei reta.
- <sup>35</sup> Jayave Jesús oyocui yati vae reta uguapi vaerã ivi pe. <sup>36</sup> Jayave uipisi jocua siete mbiyape jare mbovi pira, jare umee yasurupai Tumpa

pe. Jayave upisãa mbiyape jare pira, jare umee jemimboe reta pe, jae reta umee vaerã yati vae reta pe. <sup>37</sup>Opareve ucaru, jare iyangapii reta. Jayave Jesús jemimboe reta umbati tembú uñepisãacue jembire vae, jare umitinee siete canasta. <sup>38</sup>Jare ucaru vae reta güi cuimbae retaño uyepapa cuatro mil rupi. Uyepapa'ã cuña reta jare sambiai reta.

<sup>39</sup>Jayave Jesús omondo ye yati vae reta. Jayave uyupi chalana pe, jare oo uvãe ivi Magdala pe.

### Uipota reta uecha miacañi

(Mr 8.11-13; Lc 12.54-56)

**16** <sup>1</sup>Jare fariseo reta jare saduceo reta yugüeru Jesús oĩ vae pe, jare jei chupe uechaca vaerã chupe reta miacañi ara güi. Echa'ã jae reta uipota uicuaa uyapota ra miacañi chupe reta. <sup>2</sup>Ërei Jesús jei chupe reta:

—Amo pe pītuta ma yave pe reta pere: 'Ara cavita co curiye. Echa'ã pīta co amapītu reta.' <sup>3</sup>Jae ramiño vi amo pe neimbove yave pere: 'Ara pochita co cua ara. Echa'ã pīta co amapītu reta jare ara uyasoi oĩ' —pere, jei—. Pe reta co jae upurumbitavi vae reta. Echa'ã ara re pemae yave, picuaa mbae uyeyapota vae. Ërei picuaa'ã etei mbae añave uyeyapo oĩ vae —jei—. <sup>4</sup>Añave yugüireco vae reta icavi mbae vae uyapo vae reta co. Upurugüirovia'ã. Jáeramo uipota ayapo vaerã miacañi chupe reta. Ërei jaeño uyeyapota mbae Tumpa iñee aracae umimbeu vae Jonás pe uyeyapo vae rami, jae reta uicuaa vaerã quía co che —jei.

Jayave Jesús oo ye chugüi reta.

### Fariseo reta ilevadura

(Mr 8.14-21)

<sup>5</sup>Jesús jare jemimboe reta uyupi chalana pe yugüiraa i guasu jovaicho coti. Jare i guasu jovaicho pe yugüiraa ma uvãe yave ramo, Jesús jemimboe reta uicuaa ñacañi co güeru vaerã mbiyape. <sup>6</sup>Jare Jesús jei chupe reta:

—Piñemoa ngatu fariseo reta jare saduceo reta ilevadura güi.

<sup>7</sup>Jayave jemimboe reta jei uyupe:

—Cua jei, yaru'ã mbiyape ramo.

<sup>8</sup>Jesús uicuaa chugüi mbae jei reta vae, jare jei chupe reta:

—Michi ete co pepurugüirovia. ¿Maera pa piyemingueta mbiyape peru mbae vae re? —jei—. <sup>9</sup>¿Ndeño pa picuaa cavi? ¿Pemandua'ã pa? Cue yave apisãa pandepo mbiyape ucaru vaerã cinco mil vae reta. Tembú jembirecue pembati yave, ¿mbovi canasta pa pemitinee? —

jei—. <sup>10</sup>Jare siete mbiyape apisãa vi, ucaru vaerã cuatro mil vae reta? Tembú jembirecue pembati yave, ¿mbovi canasta pa pemitinee? —jei—.

<sup>11</sup>¿Maera pa picuaa'ã che jae peve vae? Che jae peve piñemoa ngatu vaerã fariseo reta jare saduceo reta ilevadura güi. Jae'ã peve mbiyape re —jei.



<sup>12</sup>Jayave ramo jemimboe reta uicuaa Jesús jei'ã co chupe reta uñemoa ngatu vaerã mbiyape ilevadura güi. Jaeño uipota jei chupe reta uñemoa ngatu vaerã fariseo reta jare saduceo reta iporomboe güi.

**Pedro jei Jesús co jae Cristo, Tumpa ombou vae**  
(*Mr 8.27-30; Lc 9.18-21*)

<sup>13</sup>Jare Jesús coiño ma oo uvãe tenta guasu Cesarea Filipino güi. Jayave upirandu jemimboe reta pe:

—¿Quía pa co che cuimbaerã ayeyapo vae ñru vae reta pe?

<sup>14</sup>Jayave jae reta jei chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae Jeremías ani ñru Tumpa iñee aracae umimbeu vae —jei reta.

<sup>15</sup>Jayave Jesús upirandu chupe reta:

—Ërei ¿quía pa co che peve?

<sup>16</sup>Jayave Simón Pedro jei chupe:

—Nde co jae Cristo, Tumpa ombou vae. Nde co jae Tumpa jecuaeño ico vae Tai —jei.

<sup>17</sup>Jayave Jesús jei Pedro pe:

—Simón, nde co jae Jonás tai. Tumpa nemivendise ma. Echa'ã cheRu ara pe oĩ vae uicuaaca ndeve cua. Mbaeti quía ye uicuaaca ndeve —jei—.

<sup>18</sup>Jare che jae ndeve, nde co jae Pedro. (Pedro uipota jei: “ita”.) Jare che etei amimírātata aiparavo vae reta, ipirāta vaerã penti tenta ita tuicha vae iárambo oĩ vae ipirāta rami. Jáeramo cañitei ndarau ipuere jese reta —jei—. <sup>19</sup>Jare ameeata ndeve mboroyocuaia ara pegua illave reta. Jare ime yave mbae ivi pe niñapītita vae, Tumpa vi uñapītita ara pe. Jae ramiño vi ime yave mbae ivi pe ndiyorata vae, Tumpa vi oyorata ara pe —jei.

<sup>20</sup>Jayave Jesús oyocui jemimboe reta agüiye vaerã umimbeu quía pe jae co Cristo, Tumpa ombou vae.

**Jesús umimbeu umanota co**  
(*Mr 8.31-9.1; Lc 9.22-27*)

<sup>21</sup>Jare jocua ara reta güiive Jesús umimbeu jemimboe reta pe quirāi jae oota co Jerusalén pe, jare quirāi tenta guasu pegua reta itenondegua reta jare sacerdote reta itenondegua reta jare mboroyocui re oporomboe vae reta uiporaracata co chupe, jare quirāi jae uyeyucacata, jare quirāi mbapi ara rupi icove yeta ou umanocue vae reta ipite güi.

<sup>22</sup>Jayave Pedro güiraa Jesús ñru reta ipite güi, jare umbipi umbieta chupe. Jei: —Tumpa tanembori, cheYa. Agüiye etei tuyeyapo ndeve cua —jei.

<sup>23</sup>Ërei Jesús uyerova jare jei Pedro pe:

—Esiri chegüi, Satanás. Ndiporta chembiavai. Echa'ã nde ndiyemingueta neĩ ivi pegua reta uyemingueta rami, ndiyemingueta'ã Tumpa uyemingueta rami —jei.

<sup>24</sup>Jayave Jesús jei jemimboe reta pe:

—Ime yave quía uipota oo cherupíe vae, tiñacañi iyugüi, tovoi icurusu, jare too cherupíe —jei—. <sup>25</sup>Uipota uñuvatu jecove vae ndarau ipuere. Ērei umeeta jecove chereco pegua vae uñuvatuta co —jei—. <sup>26</sup>¿Mbae ra uminganata quía, umingana yave opaete ivi pegua, ěrei ipuere'ã yave uñuvatu jecove? ¿Mbovi ra umbiepita quía ogua ye vaerã jecove? —jei—. <sup>27</sup>Echa'ã che cuimbaerã ayeyapo vae ayu yeta cheRu imbaepuere reve ángel cheve uyeyocui vae reta ndive. Jare jayave ameeta opaete vae pe penti penti uyapo vae rupi —jei—. <sup>28</sup>Añete che jae peve, ndei amocue cua pe ñugüinoi vae reta umano mbove, cherechata che cuimbaerã ayeyapo vae cheporoyocua pe —jei.

### Jesús uyembíambie

(Mr 9.2-13; Lc 9.28-36)

**17** <sup>1</sup>Seis ara ma uasa yave, Jesús güiraa Pedro, Jacobo jare Juan - jae co Jacobo tiví - iru reta ipíte güi penti ivitu guasu ivate vae re.

<sup>2</sup>Jare joco pe uyembíambie jae reta jovai. Jova jembipe guarasi jembipe rami, jare jemimonde tĩ asi jare uvera. <sup>3</sup>Jare uyecuaa chupe reta Moisés jare Elías uyemingueta ñugüinoi Jesús ndive. <sup>4</sup>Jayave Pedro jei Jesús pe:

—OreYa, icavi co ñaĩ vaerã cua pe. Nde ndipota yave, turuyapo cua pe mbapí guarasía ñanaroquí pegua, penti nembraerã, penti Moisés peguarã jare penti Elías peguarã —jei.

<sup>5</sup>Pedro uyemingueta oĩ rambueve, amapĩtu jembipe vae umiguarasía reta, jare amapĩtu güi uyendu ñee.

—Cua co jae cheRai aau ete vae. Chembiyerovia ete. Piyapisaca jese —jei.

<sup>6</sup>Jare Jesús jemimboe reta cua uyandu yave, oa ivi re. Echa'ã uquiye ete reta. <sup>7</sup>Jayave Jesús ou oñono ipo jese reta jare jei:

—Pepüa. Agüiye pequiye.

<sup>8</sup>Jare umae reta ye yave, uecha'ã ma quía jae reta ndive, jaeño Jesús.

<sup>9</sup>Jare ivitu guasu güi ugüeyi yugüeru rambueve, Jesús oyocui reta:

—Agüiye pemimbeu quía pe cua peeche vae, ndei che cuimbaerã ayeyapo vae aicove ye ayu umanocue vae reta ipíte güi mbove.

<sup>10</sup>Jayave jemimboe reta upirandu chupe:

—¿Maera pa jei mboroyocui re oporomboe vae reta Elías rani co outa?

<sup>11</sup>—Añete Elías rani co outa —jei Jesús—, jare opaete uyapicatuta. <sup>12</sup>Ērei che jae peve, Elías ou ma co, jare Israel pegua reta uicuaa'ã. Jáeramo uyapo reta chupe jae reta uipota vae. Jae ramiño vi jae reta uiporacata cheve —jei.

<sup>13</sup>Jayave Jesús jemimboe reta uicuaa jae imiari oĩ chupe reta Juan upurumbibautizase vae re.

**Jesús umbigüera cunumi aña oya jese vae**  
(*Mr 9.14-29; Lc 9.37-43*)

14Jare yugüeru uvãe yave jeta ñugüinoi vae pe, penti cuimbae ou oovãiti Jesús. Uyeatica jae jovai, jare jei chupe:

15—CheYa, iparareco cherai. Echa'ã imbaerasi iñãca pe jare uiporara oĩ. Jeta vese ma oa tata pe. Oa vi i pe —jei—. 16Aru nderemimboe reta pe umbigüera vaerã tẽi, ãrei jae reta ipuere'ã —jei.

17Jayave Jesús jei joco pe ñugüinoi vae reta pe:

—Yavai pe reta cua ivi pe pico vae pepurugüirovia vaerã. ¿Quirãĩ regua ra apitata pe reta ndive? ¿Quirãĩ regua ra arupiata peve? Peru cheve cua pe jocua cunumi —jei.

18Jayave Jesús uñeengata aña pe, jare aña usiri cunumi güi. Jare jupivoiño cunumi ucuera.

19Jayave Jesús jemimboe reta yugüeru Jesús oĩ vae pe upirandu chupe, jae retaño jae ndive ñugüinoi yave:

—¿Maera pa ore orepuere'ã numbisiri aña?

20—Pepurugüirovia'ã ramo —jei Jesús chupe reta—. Añete che jae peve, aramoĩ pepurugüirovia michi ete penti mostaza jáicue michi-rai vae rami. ãrei jocua nunga mburugüirovia penoi yave, pepuereta pere cua ivitu guasu pe: 'Ecuã cua güi epita joco pe', jare oota co. Ndarau mbae yavai peve —jei—. 21ãrei ndarau pepuere pembisiri cua nunga aña, jaeño piyerure yave Tumpa pe piyecucu reve tembú güi —jei.

**Jesús umimbeu ye umanota co**  
(*Mr 9.30-32; Lc 9.44-45*)

22Jare Galilea pe ñugüinoi rambueve, Jesús jei jemimboe reta pe:

—Che cuimbaerã ayeyapo vae penti vae chemeeta ñru vae reta pe.

23Jae reta cheyucata. ãrei amano ma yave, mbapĩ ara rupi aicove yeta ayu umanocue vae reta ipite güi —jei.

Jayave jemimboe reta ipiatiti tuicha.

**Mburuvicha ocovara vae**

24Jare Capernaum pe yugüiraa uvãe yave, mburuvicha peguarã ocovara vae reta yugüeru upirandu Pedro pe:

—¿Umbiẽpi pa pemboe vae mburuvicha ocovara vae?

25—Umbiẽpi —jei Pedro chupe reta.

Jare uique yave tenta pe, Jesús jei Simón Pedro pe:

—Simón, mburuvicha ivi pegua reta ocovara ñru vae reta pe. ¿Ocovara reta vi pa tai reta pe ani ñru vae reta peño? ¿Mbae pa ndepia pe ndiyemingueta cua re? —jei.

26—Ñru vae reta peño —jei Pedro.

Jayave Jesús jei chupe:

—Jáeramo tai reta umbiepi'ã chupe reta. <sup>27</sup>Ërei agüiye vaerã yayapo icavi mbae vae echa chupe reta, ecua epindapo i guasu pe. Ipea jocua pira tenonde ndipisi vae iyuru. Joco pe nevãeta penti corepoti. Eraa emee mburuvicha peguarã ocovara vae reta pe cheve peguarã jare ndeve peguarã —jei.

### Tenondegua vae

(Mr 9.33-37; Lc 9.46-48)

**18** <sup>1</sup>Jayave jemimboe reta yugüeru jei Jesús pe —¿Quía pa co jae tenondegua vae mboroyocua ara pegua pe?

<sup>2</sup>Jayave Jesús ueni penti sambiai, jare oñono jae reta ipite pe.

<sup>3</sup>—Añete che jae peve, piyero'ã yave Tumpa coti jare piyeyapo'ã yave sambiai reta rami, ndarau pique mboroyocua ara pegua pe —jei—.

<sup>4</sup>Ime yave quía ñemimichi cua sambiai rami vae, jae icota tenondeguarã mboroyocua ara pegua pe —jei—. <sup>5</sup>Jare ime yave quía uyapo icavi vae cua nunga sambiai pe cheree pe vae, cheve co uyapo icavi vae —jei—.

### Mbaeyoa uyapoca vae

(Mr 9.42-48; Lc 17.1-2)

<sup>6</sup>Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tõi co ñru vae reta ñapãti vaerã iyayu re penti ita tuicha vae umbaesõ pipe vae, omombo vaerã i tipí pe i guasu pe jae ipitupa vaerã —jei—. <sup>7</sup>Amocue ivi pegua reta uiporara ñru vae reta uyapoca chupe reta mbaeyoa ramo. Jecuaño amocue vae reta uyapoca mbaeyoa ñru vae reta pe. Ërei jocua mbaeyoa uyapoca vae reta uiporarata vi co —jei—.

<sup>8</sup>Jáeramo ndepo jovaicho ani ndepi jovaicho uyapoca yave mbaeyoa ndeve, iyasia emombo ndiyugüi. Icavi co tecove opa mbae vae nenoí vaerã ndepo jovaicho mbae reve ani ndepi jovaicho mbae reve, tata guasu opa mbae vae pe mocui ndepo reve ani mocui ndepi reve Tumpa nemondo vaerã tõi güi —jei—. <sup>9</sup>Jae ramiño vi nderesa jovaicho uyapoca yave mbaeyoa ndeve, eequi emombo ndiyugüi. Icavi co tecove opa mbae vae nenoí vaerã nderesa jovaicho mbae reve, tata guasu pe mocui nderesa reve Tumpa nemondo vaerã tõi güi —jei—.

### Ovecha ucañi vae

(Lc 15.3-7)

<sup>10</sup>Agüiye perĩro penti upurugüirovia vae. Che jae peve, ara pe ángel uyandareco cua nunga sambiai reta re vae reta jecuaño ñugüinoí cheRu ara pe oĩ vae jovai —jei—. <sup>11</sup>Echa'ã che cuimbaerã ayeyapo vae ayu ambiasa vaerã ucañi Tumpa güi vae reta —jei—.

<sup>12</sup>Pepia pe piyemingueta cua re. Ime yave penti cuimbae cien ovecha güinoí vae, penti ovecha ucañi yave, cuimbae ueya jocua noventa y nueve

ovecha reta oo ivitu guasu rupi ueca ucañi vae —jei—. <sup>13</sup>Jare uvãe chupe yave, añete che jae peve, uyerovia tuicha jocua ovecha re noventa y nueve ovecha ucañi mbae vae reta re güi. <sup>14</sup>Jae ramiño vi peRu ara pe oĩ vae uipota'ã cua upurugüirovia vae reta güi penti ave ucañitei vaerã —jei—.

### **Nderivi iyoa yave ndecoti**

*(Lc 17.3-4)*

<sup>15</sup>Jare nderivi iyoa yave ndecoti, ecua emimbeu chupe uyapo vae regua quía uicuaa mbae reve. Jare nderivi uyapisaca nderé yave, ndiyeyapicatura jae ndive —jei—. <sup>16</sup>Ërei uipota'ã yave uyapisaca nderé, eraa nderupíe penti ani mocui neĩrurã, ñru vae reta uicuaa vaerã mocui ani mbapí vae rupi mbae pere vae —jei—. <sup>17</sup>Jare uipota'ã yave uyapisaca jese reta, emimbeu upurugüirovia vae reta pe. Ërei nderivi uipota'ã yave uyapisaca upurugüirovia vae reta re, emae jese penti upurugüirovia mbae vae rami ani mburuvicha peguarã ocovara vae rami —jei—. <sup>18</sup>Añete che jae peve, ime yave mbae ivi pe piñapítita vae, Tumpa vi uñapítita ara pe. Jae ramiño vi ime yave mbae ivi pe piyorata vae, Tumpa vi oyorata ara pe —jei—.

<sup>19</sup>Jare che jae ye peve, mocui vae ivi pegua omboyovaque iyemingueta jei yave: 'Yayerure Tumpa pe jocua re', cheRu ara pe oĩ vae uyapota chupe reta uyerure chupe jese vae —jei—. <sup>20</sup>Echa'ã mocui ani mbapí vae uyembati yave cheree re, jae reta ipite pe che aĩta —jei—.

<sup>21</sup>Jayave Pedro ou jei Jesús pe:

—CheYa, cherivi iyoa yave checoti jeta vese, ¿mboví vese pa ambiasata chupe? ¿Siete vese pa? —jei.

<sup>22</sup>Jayave Jesús jei Pedro pe:

—Che jae ndeve, embiasa chupe setenta vese siete, mbaeti siete veseño.

### **Mocui cuimbae ipía vae reta**

<sup>23</sup>Echa'ã mboroyocua ara pegua penti mburuvicha guasu jembiocui reta pe ipía uipota ocovara vae rami co —jei—. <sup>24</sup>Mburuvicha guasu umbipí ocovara chupe reta yave, ou uyemboi jae jovai penti jembiocui jeta ete corepoti re ipía chupe vae —jei—. <sup>25</sup>Jocua jembiocui ipuere'ã umbiepi. Jáeramo mburuvicha guasu oyocui uñemee vaerã corepoti re jembiocui jare jembireco jare isambiai reta, jare opaete imbaembae, jembiocui ipuere vaerã umbiepi chupe —jei—. <sup>26</sup>Jayave jembiocui uyeatica mburuvicha guasu jovai, jare jei chupe: 'Agüiye ndepochi cheve. Ndepiaguasu cheve yave, ambiepita ndeve opaete' —jei, jei—. <sup>27</sup>Jayave mburuvicha guasu uiparareco jocua jembiocui jare oyora. Umbai chupe ipía —jei—.

<sup>28</sup>Ërei jocua uyeyocui vae oẽ mburuvicha guasu oĩ vae güi jare uvãe ñru uyeyocui vae mboví corepoti re ipía chupe vae. Jayave uipisi uyasiombiri jare jei chupe: 'Embiepi cheve ndepía.' <sup>29</sup>Jayave jocua ñru uyeyocui vae uyeatica jae jovai, jare uyerure chupe: 'Agüiye ndepochi cheve. Ndepiaguasu cheve

yave, ambiepita ndeve opaete' —jei, jei—. <sup>30</sup>Ērei uipota'ã ipiaguasu chupe. Umĩngueca peresoriru pe opaete ipía umbiepi regua —jei—. <sup>31</sup>Jare ĩru uyeyocui vae reta uicuaa yave uyeyapo vae, ipiatiti, jare yugüüraa umimbeu mburuvicha guasu pe opaete uyeyapo vae regua —jei—. <sup>32</sup>Jayave mburuvicha guasu ueni jocua jembiocui, jare jei chupe: 'Nde co jae cherembiocui icavi mbae vae. Che ambai ndeve opaete ndepía, nde ndiyerure cheve jese ramo' —jei, jei—. <sup>33</sup>¿Maera pa ndiparareco'ã nderapicha, che nduparareco rami?' —jei, jei—. <sup>34</sup>Jayave mburuvicha guasu pochi jembiocui pe, jare oyocui peresoriru iyandarecoa reta uiporaraca vaerã chupe opaete ipía umbiepi regua —jei—. <sup>35</sup>Jae ramiño vi cheRu ara pe oĩ vae uyapota jucuarãi peve, pembiasa'ã yave opaete pepia reve perivi iyoa pecoti vae pe —jei.

### ¿Jupi pa cuimbae omombo vaerã jembireco?

(Mr 10.1-12; Lc 16.18)

**19** <sup>1</sup>Jare Jesús opaete cua jei ma yave, oo Galilea güi Judea pe Jordán jovaicho pe. <sup>2</sup>Jare jeta vae yugüüraa jaicue. Jayave Jesús umbigüera imbaerasi vae joco pe ñugüinoi vae reta. <sup>3</sup>Yugüeru vi fariseo reta Jesús oĩ vae pe. Jae reta uipota tēi uyavica chupe. Jáeramo upirandu reta chupe:

—¿Jupi pa cuimbae omombo vaerã jembireco ipotave mbae jeco pegua?

<sup>4</sup>Jayave Jesús jei chupe reta:

—¿Pemingueta'ã pa Tumpa iñee pe quirãi Tumpa uyapo ramo yave, uyapo cuimbae jare cuña? —jei—. <sup>5</sup>Jare Tumpa jei cuarãi: 'Jáeramo cuimbae usirita tu jare ichi güi, jare oota ico vaerã jembireco ndive. Jare mocui vae uyeyapota penti ramiño.' Jucuarãi jei Tumpa —jei—. <sup>6</sup>Jáeramo mbaeti ma mocui rami. Yugüireco penti ramiño. Jáeramo agüiye quía tumbisiri Tumpa umĩru vae reta —jei.

<sup>7</sup>Jayave fariseo reta jei chupe:

—¿Maera pa Moisés oyocui cuimbae uicuatía vaerã tupapire jembireco omombo vaerã?

<sup>8</sup>—Moisés umaño peré pemombo vaerã pembireco pepiatanta ramo —jei Jesús—. Ērei Tumpa uyapo ramo yave, jucuarãi'ã —jei—. <sup>9</sup>Jare che jae peve, penti cuimbae ipuere omombo jembireco, cuña aguasa uyapo yave. Ērei cuña uyapo'ã yave aguasa, jare cuimbae omombo yave jembireco, jocua cuimbae uyuvanga co menda re umenda yave ĩru cuña ndive. Jae ramiño vi ĩru cuimbae umenda yave jocua cuña uyemomboca vae ndive, jae vi uyuvanga menda re —jei.

<sup>10</sup>Jayave Jesús jemimboe reta jei chupe:

—Jucuarãi yaveño cuimbae ipuere omombo jembireco, icavi'ã cuimbae umenda vaerã.

<sup>11</sup>Ērei Jesús jei chupe reta:

—Amocue vaeño ipuere uicuaa cua che jae peve vae. Jocua Tumpa umee uicuaa vaerã vae reta peño ipuere uicuaa —jei—. <sup>12</sup>Echa'ã amocue vae ichi güi oa güiye yugüireco eunucorã reta. Jare amocue vae yugüireco eunucorã reta ĩru vae reta

uapiavo reta ramo. Jare amocue vae yugüireco eunucorã reta rami mboroyocua ara pegua jeco pegua. Ime yave quía ipuere uicuaa cua, tuicuaa —jei.

**Jesús uyerure Tumpa pe sambiai reta re**

*(Mr 10.13-16; Lc 18.15-17)*

<sup>13</sup>Jare amocue vae güeru Jesús oĩ vae pe sambiai reta, Jesús oñono vaerã ipo jese reta jare uyerure vaerã Tumpa pe jese reta. Ërei jemimboe reta uñeengata güeru vae reta pe. <sup>14</sup>Ërei Jesús jei:

—Pemaño sambiai reta re yugüeru vaerã checoti. Echa'ã cua nunga uyeyocui Tumpa pe mboroyocua ara pegua pe —jei.

<sup>15</sup>Jayave oñono ipo jese reta. Jayave oo joco güi.

**Cuimbae icocatu vae**

*(Mr 10.17-31; Lc 18.18-30)*

<sup>16</sup>Jare penti cuimbae ou jei Jesús pe:

—Oporomboe vae, nde ndepiacavi co. ¿Mbae nunga mbae icavi vae pa ayapota anoi vaerã tecove opa mbae vae? —jei.

<sup>17</sup>Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaño co Tumpa. Ërei ndipota yave neni tecove opa mbae vae, iyapo mboroyocui reta —jei.

<sup>18</sup>—¿Mbae nunga reta pa? —jei Jesús pe.

Jayave Jesús jei chupe:

—'Agüiye epuruyuca. Agüiye iyuvanga menda re. Agüiye nemonda. Agüiye ndapu ñru vae reta re. <sup>19</sup>Ipiu nderu jare ndesi. Jare eau nderapicha nde ndiyerau rami' —jei.

<sup>20</sup>Jayave cuimbae jei Jesús pe:

—Ayavi'ã penti ave cua mboroyocui reta chemichi güive. ¿Mbae ye pa uata cheve ayapo vaerã? —jei.

<sup>21</sup>Jayave Jesús jei chupe:

—Ndipota yave ndiyapo opaete icavi ndiyapo vaerã vae, ecua emee opaete mbaembae neni vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupíe —jei.

<sup>22</sup>Ërei cua uyandu yave, cuimbae oo ipiatiti reve. Echa'ã jeta mbaembae güinoi.

<sup>23</sup>Jayave Jesús jei jemimboe reta pe:

—Añete che jae peve, yavai ete co icocatu vae uique vaerã mboroyocua ara pegua pe. <sup>24</sup>Che jae ye peve, yavai ete icocatu vae uique vaerã Tumpa iporoyocua pe, maemimba camello jee vae yuu jesacua rupi uasa vaerã güi —jei.

<sup>25</sup>Jesús jemimboe reta cua uyandu yave, ipiacañi jare jei:

—Jucuarãi yave, ¿quía pa ipuere uyembiasaca?

<sup>26</sup>Jayave Jesús umae jese reta jare jei:

—Ivi pegua reta ipuere'ã uyembiasa. Ërei Tumpa ipuere umbiasa reta. Echa'ã Tumpa ipuere uyapo opaete mbaembae —jei.

<sup>27</sup>Jayave Pedro jei chupe:

—Mase, ore opaete mbaembae ndueya, ndoyu vaerã nde ndive. ¿Mbae pa nonoita ore?

<sup>28</sup>Jayave Jesús jei jemimboe reta pe:

—Añete che jae peve, che cuimbaerã ayeyapo vae aguapita cheguapia pe ayembadoraca vaerã, opaete uyeyapicatu yave. Jae ramiño vi pe reta che ndive peyu vae peguapita doce guapia pe, jare peãata doce ati Israel pegua reta —jei—. <sup>29</sup>Jare ime yave quía ueya jenta, ani tiquei reta, ani tivi reta, ani jindi reta, ani tu, ani ichi, ani jembireco, ani isambiai reta, ani iivi reta chereco pegua vae, cien rupi jecoviata co chupe, jare güinoita imbaerã tecove opa mbae vae —jei—. <sup>30</sup>Erei Tumpa umbitaicuenta uyembutuicha vae reta, jare umitenondeta uñemimichi vae reta —jei—.

### Co pe uparaviqui vae reta

**20** <sup>1</sup>Echa'ã mboroyocuía ara pegua penti co iya rami co. Co iya oẽ neimbove asi ueca quía ipuere uparaviqui vaerã ico pe —jei—. <sup>2</sup>Upirandu amocue vae pe uparaviquita ra chupe umbiepi yave chupe reta penti denario ara rupi. (Penti denario co penti ara mbaraviqui jepi pegua.) Jare jae reta jei uparaviquita co chupe. Jayave co iya omondo reta ico pe —jei—. <sup>3</sup>Jayave co iya oẽ ye guarasi ivate catu mi yave, jare uecha ñru vae reta uyemboi ñugüinoi plaza pe. Mbaeti co jae reta iparaviqui. <sup>4</sup>Jayave co iya jei chupe reta: 'Pe reta vi pecua reparaviqui checo pe. Tambiepi peve jupi co ambiepi peve vaerã vae' —jei, jei—. Jayave jae reta yugüiraa co pe —jei—. <sup>5</sup>Jayave co iya oẽ ye guarasi ara mbite ma oi yave, jare omondo ñru vae reta ico pe uparaviqui vaerã. Jae ramiño vi oẽ ye mbapi ora ma caaru yave, jare omondo ye ñru vae reta ico pe uparaviqui vaerã —jei—. <sup>6</sup>Jare co iya oẽ ye caaru ete yave, jare uecha ñru vae reta uyemboi ñugüinoi mbaeti iparaviqui ramo. Jayave jei chupe reta: '¿Maera pa pei cua pe opaete ara reparaviqui mbae reve?' —jei, jei—. <sup>7</sup>'Mbaeti quía oremimbaraviquica ramo' —jei reta, jei—. Jayave co iya jei chupe reta: 'Pe reta vi pecua reparaviqui checo pe. Tambiepi peve jupi ambiepi peve vaerã vae' —jei, jei—. <sup>8</sup>Guarasi uique ma yave, co iya jei jembiocui pe: 'Eeni uparaviqui vae reta embiepi chupe reta. Embiepi rani taicue rupi umbiepi uparaviqui vae reta pe, jare taicue rupi embiepi tenonde yave umbiepi uparaviqui vae reta pe' —jei, jei—. <sup>9</sup>Jare co güi yugüeru ye yave caaru ete umbiepi uparaviqui vae reta, co iya jembiocui umee penti penti pe penti denario —jei—. <sup>10</sup>Jare neimbove asi umbiepi uparaviqui vae reta co güi yugüeru yave, ipia pe uyemingueta tõi co iya jembiocui umbiepi co chupe reta jeta caaru ete umbiepi uparaviqui vae reta pe umbiepi vae güi. Erei co iya jembiocui umbiepi vi chupe reta penti denario ñru reta pe rami —jei—. <sup>11</sup>Jayave penti denarioño güinoi yave, ñeenguru co iya pe —jei—. <sup>12</sup>Jae reta jei chupe: 'Cua taicue rupi umbiepi uparaviqui vae reta penti oraño uparaviqui. Erei nde nembiepi chupe reta penti denario oreve nembiepi rami, yepe tõi ore nduparaviqui tanta guarasi jasi reve' —jei reta,



jei—. <sup>13</sup>Ērei co iya jei penti vae pe: ‘Cheamigo, ayapo'ã etei icavi mbae vae ndeve. Echa'ã nde ndere cheve ndeparaviquita checo pe che ambiepi ndeve yave penti denario’ —jei, jei—. <sup>14</sup>‘Ecu eraa cua neminganacue. Aipota ambiepi taicue rupi umbipi uparaviqui vae pe penti denario ndeve ambiepi rami’ —jei, jei—. <sup>15</sup>‘Echa'ã jupi co che ayapo vaerã aipota vae chembaembae ndive. Agüiye neacataã cua ñru vae re che ayapo icavi vae chupe ramo’ —jei, jei—.

<sup>16</sup>Jae ramiño vi Tumpa umbitaicueta uyembutuicha vae reta, jare umitenondeta uñemimichi vae reta —jei.

### **Jesús umimbeu ye umanota co**

*(Mr 10.32-34; Lc 18.31-34)*

<sup>17</sup>Jare Jesús Jerusalén coti oo rambueve, ueni jocua doce jemimboe reta ñru reta ipite güi, jare jei chupe reta:

<sup>18</sup>—Mase, yaa co ñaĩ Jerusalén pe. Jare che cuimbaerã ayeyapo vae penti vae chemeeta sacerdote reta itenondegua reta jare mboroyocui re oporombocue vae reta pe. Jae reta jeita amano vaerã, <sup>19</sup>jare chemeeta judío mbae vae reta pe. Jae reta cheyoyaita, chenupata chicote pe, jare checututa curusu re. Ērei mbapi ara rupi aicove yeta ayu umanocue vae reta ipite güi —jei.

### **Jacobo jare Juan uipota vae**

*(Mr 10.35-45)*

<sup>20</sup>Cua jaicue rupi ou Jesús oĩ vae pe Zebedeo jembireco imembi reta Jacobo jare Juan ndive. Cuña uyeatica Jesús jovai jare jei chupe uipota uyapo vaerã mbae chupe. <sup>21</sup>Jayave Jesús upirandu cuña pe:

—¿Mbae pa ndipota?

—Emaeño cua mocui chemembi re uguapi vaerã ndeyipi pe ndeporoyocua pe, penti ndeacata coti jare ñru ndeaso coti —jei cuña chupe.

<sup>22</sup>Ērei Jesús jei Jacobo jare Juan pe:

—Picuaa'ã mbae re piyerure vae. ¿Pepuereta pa piporara che aiporarata vae rami? ¿Pepuereta pa piyembibautizaca che ayembibautizacata vae rami? —jei.

—Orepuereta co —jei reta.

<sup>23</sup>—Añete pe reta piporarata che aiporarata vae rami, jare pe reta piyembibautizacata che ayembibautizacata vae rami —jei Jesús chupe reta—. Ērei chepuere'ã jae peve peguapi vaerã cheyipi pe, penti cheacata coti jare ñru cheaso coti. Echa'ã cheRu umicuatĩro ma joco pe uguapita vae reta peguarã —jei.

<sup>24</sup>Jare ñru diez Jesús jemimboe reta cua uyandu yave, pochi reta Jacobo jare Juan pe. <sup>25</sup>Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güinoi vae reta jei ñru reta pe mbae uyapo vaerã —jei—. <sup>26</sup>Ērei pe reta agüiye piyapo jucuarã —jei—. Ime yave penti pepite pe oĩ vae uipota mbaepuere güinoi vae, tuyeyocui ñru reta pe —jei—. <sup>27</sup>Jare ime yave

penti pepite pe oĩ vae uipota tenondeguarã ico vae, tuyeyocui ñru reta pe —jei—. <sup>28</sup>Echa'ã che cuimbaerã ayeyapo vae ayu ayeyocui vaerã ñru vae reta pe. Ayu'ã ñru vae reta uyeyocui cheve vaerã. Ayu amano vaerã, jeta vae aepi vaerã —jei.

### Mocui cuimbae jesa mbae vae

(Mr 10.46-52; Lc 18.35-43)

<sup>29</sup>Jare yugüiraa yave tenta guasu Jericó güi, jeta vae yuguiraa Jesús jaicue. <sup>30</sup>Jare mocui cuimbae jesa mbae vae uguapi ñugüinoi joco pe tape jembei pe. Jare uicuaa reta Jesús uasa oo oĩ yave, ñneeãta reve jei reta:

—OreYa, reparareco. Nde co jae David ññemoñaeta reta pegua.

<sup>31</sup>Jeta joco pe ñugüinoi vae reta ññeengata chupe reta. Uipota tẽi umiquĩ. Erei jae reta jeiete ññeeãta reve jei:

—OreYa, reparareco. Nde co jae David ññemoñaeta reta pegua.

<sup>32</sup>Jayave Jesús uyemboi, jare uenica cuimbae jesa mbae vae reta.

—¿Mbae pa pipota ayapo vaerã peve? —jei chupe reta.

<sup>33</sup>—Nduipota numae, oreYa —jei reta chupe.

<sup>34</sup>Jayave Jesús uiparareco reta jare uyaviqui jesa chugüi. Jare jupivoiño mocui reve ipuere umae, jare yugüiraa Jesús jaicue.

### Jesús oo Jerusalén pe

(Mr 11.1-11; Lc 19.28-40; Jn 12.12-19)

**21** <sup>1</sup>Jare coiño ma Jerusalén güi ñugüinoi yave, yugüiraa uvãe tenta guasu-rai Betfagé iyipi pe, ivitu guasu Olivos jovai. Jayave Jesús oyocui mocui jemimboe reta:

<sup>2</sup>—Pecua pea tenta guasu-rai yanderovai oĩ vae pe —jei—. Peo pevãe yave, pevãeta penti mburica ññeñapĩti oĩ, jare pevãeta vi mburica tairusu vae jae ndive. Piyora peru —jei—. <sup>3</sup>Jare ime yave quía mbae jei peve, pere chupe: 'Yandeyã uipota uiporu, ññe imambae güeruruca yeta cua pe' —pere, jei.

<sup>4</sup>Opaete cua uyeyapo, Tumpa ññee aracaeta umimbeu vae jei vae uyeyapo vaerã. Echa'ã jae jei cuarã:

<sup>5</sup>“Pemimbeu Jerusalén pegua reta pe:

‘Mase, peRuvicha Guasu ou peve.

Uñemimichi oĩ.

Echa'ã opo ou mburica tairusu vae re.’”

Jucuarãi jei.

<sup>6</sup>Jayave Jesús jemimboe reta yugüiraa, jare uyapo Jesús jei chupe reta uyapo vaerã vae. <sup>7</sup>Jare güeru mburica jare mburica tairusu vae Jesús oĩ vae pe. Jayave Jesús jemimboe reta oñono iyasoya maemimba reta icupe re, jare Jesús opo mburica tairusu vae re. <sup>8</sup>Jare jeta vae uipiso iyasoya tape rupi mburica tairusu vae jenonde, jare ñru vae reta uyasia ññanarوقي jare oñono tape rupi. <sup>9</sup>Jare Jesús jenonde yugüiraa vae reta jare jaicue rupi yugüiraa vae reta ññeeãta reve jei:

—¡Cavi co! Cua co jae David ñnemoñaá reta pegua. Tuyembiadoraca yandeYa jee re ou vae. Tei reta 'icavi co' ara pe —jei reta.

<sup>10</sup>Jare Jesús oo ma uvãe yave Jerusalén pe, opaete Jerusalén pegua reta ipiacañi reve jei:

—¿Quía pa co jae?

<sup>11</sup>Jare jeta vae reta jei:

—Cua co jae Jesús. Jae co penti Tumpa ñnee umimbeu vae Nazaret pegua. Nazaret Galilea pegua co —jei reta.

### Jesús Tumpa jo pe uyapo vae

(Mr 11.15-19; Lc 19.45-48; Jn 2.13-22)

<sup>12</sup>Jayave Jesús uique Tumpa jo pe, jare omoë joco güi opaete umaemee vae reta jare mbae ogua vae reta, jare umbiyapara corepoti uipepica vae reta imesa reta jare picasu reta umee vae reta jenda reta. <sup>13</sup>Jare jei chupe reta:

—Tumpa ñnee pe uyecuatía oĩ cuarãi: 'Chero uyembijeeta o yerure pegua pe.' Jucuarãi uyecuatía oĩ. Ërei pe reta piyapo ma imonda vae reta ñnemía rami —jei.

<sup>14</sup>Jare yugüeru Jesús oĩ vae pe Tumpa jo pe jesa mbae vae reta jare icõcho vae reta, jare Jesús umbigüera reta. <sup>15</sup>Jare sacerdote reta itenondegua reta jare mboroyocui re oporombocoe vae reta uecha miacañi Jesús uyapo vae reta, jare uyandu vi sambiaí Tumpa jo pe ñngüinoi vae reta ñneeãta reve jei:

—¡Cavi co! Cua co jae David ñnemoñaá reta pegua.

Jáeramo jae reta pochí. <sup>16</sup>Jayave jei reta Jesús pe:

—¿Ndiyandu pa cua reta jei vae?

Jayave Jesús jei chupe reta:

—Ayandu. ¿Pemingueta'ã pa cua Tumpa ñnee pe uyecuatía oĩ vae?

'Nde neme sambiaí reta jare imeño ucambu vae reta pe nembiadora vaerã.' Jucuarãi uyecuatía oĩ —jei.

<sup>17</sup>Jayave Jesús ueya reta. Oo Jerusalén güi Betania pe, jare joco pe ico.

### Iva ía mbae vae

(Mr 11.12-14, 20-26)

<sup>18</sup>Piareve pe neimbove yave Jesús oo ye Jerusalén coti, jare iyembai.

<sup>19</sup>Jare uecha penti íva coiño tape güi. Jayave oo umae jese, Ërei uvãe'ã ía, jaeño joqui. Jayave jei íva pe:

—Ndarau etei ma ndeía.

Jare imambae íva yípi.

<sup>20</sup>Jare Jesús jemimboe reta uecha yave íva yípi vae, ipiacañi jese jare jei:

—Imambae yípi jocua íva.

<sup>21</sup>Jayave Jesús jei chupe reta:

—Añete che jae peve, pepurugüirovia yave, pe reta vi pepuereta piyapo che ayapo íva pe vae rami. Ërei pepurugüirovia yave, pepuereta vi pere cua ivítu guasu pe: 'Pecua cua güi piyemombo i guasu pe', jare jucuarãita

uyeyapo. Pere'ã yave pepia pe: 'Ndarau ndipo uyeyapo', uyeyapota co peve —jei—. <sup>22</sup>Jare ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei.

**Jesús imbaepuere**  
(Mr 11.27-33; Lc 20.1-8)

<sup>23</sup>Jare Jesús uique ye yave Tumpa jo pe, sacerdote reta itenondegua reta jare tenta guasu pegua reta itenondegua reta yugüeru jae oĩ vae pe oporomböe rambueve, jare upirandu chupe:

—¿Mbae nunga mbaepuere pa nenoĩ cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

<sup>24</sup>Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerã —jei—. <sup>25</sup>¿Quía pa ombou Juan upurumbibautiza vaerã? ¿Tumpa pa ombou? ani ¿ivi pegua reta pa ombou? —jei.

Jayave jae reta jei uyupe:

—Yae yave: 'Tumpa co ombou', jae jeita yandeve: 'Jucuarãĩ yave, ¿maera pa perovia'ã?' —jei reta uyupe—. <sup>26</sup>Èrei yandepuere'ã yae: '¿vi pegua reta co ombou.' Echa'ã yaquíye tenta guasu pegua reta güi. Echa'ã opaete vae güirovia Juan co jae penti Tumpa ñee umimbeu vae —jei reta uyupe.

<sup>27</sup>Jayave jei reta Jesús pe:

—Nduicuaa'ã.

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei Jesús chupe reta—.

**Mocui tai reta**

<sup>28</sup>¿Quirãĩ pa pepia pe piyemingueta cua re? Pentĩ cuimbae güinoĩ mocui tai reta. Ou jei penti tai pe: 'Cheraĩ, cua ara ecua eparaviqui checo pe.'

<sup>29</sup>Tai jei chupe: 'Aata'ã aparaviqui.' Èrei taicue rupi iquirẽĩ oo. Jáeramo oo uparaviqui tu ico pe —jei—. <sup>30</sup>Jare cuimbae jei ñru tai pe: 'Cheraĩ, cua ara ecua eparaviqui checo pe.' Tai jei chupe: 'Aata aparaviqui, cheru.' Èrei oo'ã —jei—. <sup>31</sup>¿Quía nunga pa cua mocui vae güi uyapo tu jei vae? —jei.

Jayave jae reta jei chupe:

—Jocua tenonde tu oyocui vae.

Jayave Jesús jei chupe reta:

—Añete che jae peve, mburuvicha peguarã ocovara vae reta jare cuña aguasa rupi yugüireco vae reta uiqueta perenonde Tumpa iporoyocua pe. <sup>32</sup>Echa'ã Juan ou uicuaaca peve jupi vae, èrei pe reta perovia'ã. Èrei mburuvicha peguarã ocovara vae reta jare cuña aguasa rupi yugüireco vae reta güirovia. Jare yepe tẽĩ cua picuaa, èrei peeya'ã piyemingueta icavi mbae vae pepia pe oĩ vae. Jecuae peatẽĩ perovia Juan —jei—.

**Co iporúa icavi mbae vae reta**  
(*Mr 12.1-12; Lc 20.9-19*)

<sup>33</sup>Tamimbeu ye peve amijaanga reve cua: Ico penti cuimbae icorã uiquẽse vae. Jayave oñoti pipe jeta uva. Jayave oyoo ivi, jare uyapo uva uitami pipe vaerã. Uyapo vi penti chapapa, umae vaerã ivate güi opaete co re. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe —jei—. <sup>34</sup>Jare uva yagüiye ma yave, co iya ombou amocue jembiocui reta co iporúa reta pe, jae reta umbiyao vaerã tẽi uva reta, iya güinoi vaerã imbaerã —jei—. <sup>35</sup>Ërei co iporúa reta uipisi co iya jembiocui reta, jare uinupa penti vae, jare uyuca ñru vae, jare uyapi ita pe ñru vae —jei—. <sup>36</sup>Jayave co iya ombou ye jeta catu ete jembiocui reta tenonde ombou vae güi. Ërei co iporúa reta jecuae jucuarã uyapo ye chupe reta —jei—. <sup>37</sup>Jayave taicue rupi co iya ombou tai. Jei tẽi iyupe: ‘Aramoi uipiuta cheraí’ —jei, jei—. <sup>38</sup>Ërei co iporúa reta uecha yave co iya tai, jei reta uyupe: ‘Cua co jae iyarã vae. Yaa yayuca, jare yande yaicota co iyarã’ —jei reta, jei—. <sup>39</sup>Jayave jae reta uipisi co iya tai omombo co güi jare uyuca —jei—. <sup>40</sup>Jáeramo co iya ou ye yave, ¿mbae ra uyapota jocua co iporúa reta pe? —jei.

<sup>41</sup>Jayave jae reta jei Jesús pe:

—Opata uyuca jocua cuimbae icavi mbae vae reta, jare uiporucata ico ambie vae reta pe. Jae reta umeeta co iya pe imbaerã uva yagüiye ma yave —jei reta.

<sup>42</sup>Jayave Jesús jei chupe reta:

—¿Pemingueta!ã pa cua Tumpa ñnee pe uyecuatía oĩ vae?

‘Ita tenta iyapoa reta omombo vae uyeyapo ma ita tenondegua vae.

YandeYa uyapo cua.

Yaecha ma, jare yandepiacañi jese.’

Jucuarãi uyecuatía oĩ —jei—.

<sup>43</sup>Jáeramo che jae peve, pe reta ndarau pico Tumpa iporoyocua pe. Tumpa umeeta ñru reta pe yugüireco vaerã joco pe. Jae reta uyapota jupi vae —jei—. <sup>44</sup>Ime yave quía jocua ita re uyepiaca vae, uñemopëta co. Jare ime yave quía jocua ita oa jese vae, opata umbiperasoraso —jei.

<sup>45</sup>Jare sacerdote reta itenondegua reta jare fariseo reta cua uyandu yave, uicuaa cua Jesús umijaanga reve jei vae uicuaaca quirã jae reta teco güinoi. <sup>46</sup>Jare jae reta uipota tẽi uipisi Jesús. Ërei ipuere!ã. Echa!ã uquiye jeta vae reta güi. Echa!ã jocua jeta vae reta güirovia Jesús co jae penti Tumpa ñnee umimbeu vae.

**Parea menda pegua**  
(*Lc 14.15-24*)

**22** <sup>1</sup>Jare Jesús imiari ye joco pe ñugüinoi vae reta pe umijaanga reve. Jei chupe reta:

<sup>2</sup>—Mboroyocua ara pegua penti mburuvicha guasu rami co. Jocua mburuvicha guasu tai umendata. Jáeramo mburuvicha guasu uyapo parea —jei—

.<sup>3</sup>Uparea ma amocue vae pe yugüeru vaerã menda pe. Jayave omondo jembiocui reta ueni reta vaerã. Ërei jae reta ñatëi yugüeru —jei—. <sup>4</sup>Jayave mburuvicha guasu oyocui ye ñru jembiocui reta. Jei chupe reta: ‘Pecua pemimbeu aparea chupe vae reta pe: Mase, jáema oĩ peu vaerã. Ayucaca ma chegüeyeta jare ñru cherimba iquira vae reta. Ayapicatu ma opaete. Pecua menda pe’ —pere, jei, jei—. <sup>5</sup>Ërei jae reta uipota'ã yugüiraa. Penti vae oo ico pe. Ñru vae oo umaamee. <sup>6</sup>Jare ñru reta uipisi mburuvicha guasu jembiocui reta, uyapo icavi mbae vae chupe reta jare uyuca reta —jei—. <sup>7</sup>Ërei mburuvicha guasu uicuaa yave cua regua, pochi ete co. Jáeramo omondo isundaro reta opa vaerã uyuca jocua upuruyuca vae reta jare uapi vaerã jenta guasu —jei—. <sup>8</sup>Jayave mburuvicha guasu jei jembiocui reta pe: ‘Opaete ueyapicatu ma oĩ yayapo vaerã menda. Ërei aparea chupe vae reta uyapo'ã jupi vae’ —jei, jei—. <sup>9</sup>Jáeramo pecua calle rupi jare pere opaete pevãe chupe vae reta pe yugüeru vaerã menda pe’ —jei, jei—. <sup>10</sup>Jayave mburuvicha guasu jembiocui reta yugüiraa calle rupi jare umbati opaete uvãe chupe vae reta - icavi vae uyapo vae reta jare icavi mbae vae uyapo vae reta. Jare mburuvicha guasu jo tinee ma —jei—.

<sup>11</sup>Jare mburuvicha guasu ou uvãe yave uma vaerã yugüeru vae reta re, uecha joco pe penti cuimbae temimonde menda pegua mbaeti güinoi vae —jei—.

<sup>12</sup>Jayave jei chupe: ‘Cheamigo, ¿quirã pa ndique cua pe temimonde menda pegua mbae reve?’ Ërei cuimbae jei'ã mbae ave —jei—. <sup>13</sup>Jayave mburuvicha guasu jei jembiocui reta pe: ‘Piñapiti ipo rupi jare ipi rupi, jare peraa cua güi pemombo oca pe pítumimbi oĩ vae pe. Joco pe uyaota jare jái umbiquirirüta’ —jei—. <sup>14</sup>Echa'ã Tumpa ueni jeta vae reta ërei mboviño uiparavo —jei—.

### ¿Jupi pa yambiëpi vaerã César pe?

(Mr 12.13-17; Lc 20.20-26)

<sup>15</sup>Jayave fariseo reta uyembati, jare uyemboemboe quirã ipuere uyavica Jesús pe jae uyemingueta yave. <sup>16</sup>Jayave jae reta omondo jemimboe reta Jesús oĩ vae pe herodiano reta ndive. Jae reta jei Jesús pe:

—Oporomboe vae, nducuaa nde ndere vae añete co. Nde ndeporomboe cavi quirã Tumpa uipota yaico vaerã vae re. Nde netae oyovaque opaete pãve re. Nembutuicha'ã penti ave ñru vae güi —jei reta—. <sup>17</sup>Jáeramo emimbeu ove, ¿quirã pa ndepia pe ndiyemingueta cua re? César yandecui yambiëpi vaerã chupe corepoti pe. ¿Jupi pa yambiëpi vaerã chupe? ani ¿jupi'ã pa? —jei reta.

<sup>18</sup>Ërei Jesús uicuaa jae reta uipota tã co uyapo icavi mbae vae chupe, jare jei chupe reta:

—¿Maera pa pipota piyavica cheve? Pe reta co jae upurumbitavi vae reta —jei—. <sup>19</sup>Peechaca cheve corepoti mburuvicha guasu ocovara peve vae —jei.

Jayave güeru reta chupe penti corepoti. <sup>20</sup>Jayave Jesús upirandu chupe reta: —¿Quía jova íã pa cua? ¿Quía jee pa cua uyecuatía oĩ vae? —jei.

<sup>21</sup>—Jocua César imbae co —jei reta.

Jayave Jesús jei chupe reta:

—Pemeé César pe Cesar pegua, jare pemeé Tumpa pe Tumpa pegua.  
 22 Cua uyandu reta yave, ipiacañi reta jese. Jayave jae reta yugüiraa Jesús güi.

### ¿Icove yeta pa umanocue vae reta?

(Mr 12.18-27; Lc 20.27-40)

23 Jare jocua ara etei amocue saduceo reta yugüeru Jesús oĩ vae pe. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

24—Oporomböe vae, Moisés jei ueya yandevé cuarãi: 'Penti tiquei vae umano yave, jembirecocue mbaeti imembi chupe yave, cuimbae amiri tiví tumenda jocua cuña ndive. Jayave cuña imembi yave, cuimbae tumbijee sambiai tiquei amiri jee pe.' Jucuarãi jei Moisés —jei reta chupe—. 25 Ico orepite pe penti cuimbae seis tiví reta güinoi vae. Cua cuimbae umenda, jare umano umimembi mbae reve. Cuimbae amiri jaicue rupigua umenda jembirecocue ndive —jei reta—. 26 Ërei jae vi umano umimembi mbae reve. Jae ramiño vi uyeyapo jaicue rupigua ye pe. Opaete siete reve umenda jocua cuña ndive, jare opaete siete reve umano umimembi mbae reve —jei reta—. 27 Taicue rupi cuña umano vi. 28 Jayave umanocue vae reta icove ye yave, ¿quí nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

29 Ërei Jesús jei chupe reta:

—Pe reta piyavi co. Echa'ã picuaa'ã Tumpa iñee uyecuatía oĩ vae jare Tumpa imbaepuere —jei—. 30 Umanocue vae reta icove ye yave, cuimbae reta jare cuña reta ndarau umenda. Yugüirecota ángel ara pe ñugüinoi vae reta yugüireco rami —jei—. 31 Tamimbeu peve umanocue vae reta regua. Icove yeta co. ¿Pemingueta'ã pa Tumpa iñee pe uyecuatía oĩ vae? 32 Echa'ã uyecuatía oĩ cuarãi: 'Che co jae Abraham, Isaac jare Jacob i'Tumpa' —jei Tumpa. Jucuarãi uyecuatía oĩ —jei—. Tumpa mbaeti co umanocue vae reta i'Tumpa. Jae co tecove güinoi vae reta i'Tumpa —jei.

33 Jare yati vae reta cua uyandu yave, ipiacañi Jesús iporomböe re.

### Mboroyocui tenondegua vae

(Mr 12.28-34)

34 Ërei fariseo reta uicuaa yave saduceo reta ipuere'ã ma co mbae jei Jesús pe, amocue jae reta uyembati Jesús oĩ vae pe. 35 Jayave penti fariseo - jae co penti mboroyocui re oporomböe vae vi - upirandu Jesús pe mbae re. Uipota tēi uyavica chupe. 36 Jei chupe:

—Oporomböe vae, ¿mbae nunga mboroyocui pa co jae tenondegua vae?

37 Jayave Jesús jei chupe:

—Mboroyocui tenondegua vae co cua: 'Eau ndeYa Tumpa opaete ndepia reve, opaete nderecove reve, jare opaete ndepiyemingueta reve' —jei—. 38 Cua co jae mboroyocui tenondegua vae —jei—. 39 Jare jaicue rupigua vae co cua: 'Eau nderapicha nde ndiyerau rami' —jei—. 40 Cua mocui

mboroyocui ndiyapo yave, ndiyapo ma co opaete Moisés iporoyocui jei vae jare Tumpa ñnee aracae umimbeu vae reta jei vae —jei.

**¿Quía ñnemoñaeta reta pegua pa co Cristo?**

*(Mr 12.35-37; Lc 20.41-44)*

<sup>41</sup>Jare fariseo reta Jesús oñ vae pe uyembati yave, Jesús upirandu chupe reta:

<sup>42</sup>—¿Mbae pa pepia pe piyemingueta Cristo re? ¿Quía ñnemoñaeta reta pegua pa co jae?

—Jae co David ñnemoñaeta reta pegua —jei reta chupe.

<sup>43</sup>—Jucuarái yave, ¿maera pa David etei jei chupe: ‘CheYa’? Echa’á Espíritu Santo uicuaaca David pe jucuarái jei vaerá —jei chupe reta—.

<sup>44</sup>Echa’á David jei cuarái:

‘YandeYa jei cheYa pe:

Eguapí cheyipí pe cheacata cotí,

nderovaicho reta opa amiamiri regua’ —jei yandeYa.

Jucuarái jei David aracae —jei—. <sup>45</sup>¿Quirái pa ipuere ico David ñnemoñaeta reta peguará? Echa’á David etei jei chupe: ‘CheYa’ —jei Jesús chupe reta.

<sup>46</sup>Jare mbaeti quía ipuere umimbeu chupe. Jare jocua ara güive mbaeti ye quía uipota upirandu Jesús pe mbae re.

**Jesús umbijeco mboroyocui re oporombocoe vae reta jare fariseo reta**

*(Mr 12.38-40; Lc 11.37-54; 20.45-47)*

**23** <sup>1</sup>Jayave Jesús jei jeta vae pe jare jemimboe reta pe:

<sup>2</sup>—Mboroyocui re oporombocoe vae reta jare fariseo reta umimbeu

peve Moisés iporoyocui reta. <sup>3</sup>Jáeramo jecuaeño piyapo jei reta peve piyapo vaerá vae. Ërei agüiye piyapo jae reta uyapo rami. Echa’á jae reta etei uyapo’á

jei peve piyapo vaerá vae —jei—. <sup>4</sup>Jae reta jei ñru vae reta pe uyapo vaerá yavai uyapo vaerá vae. Yamijaanga penti tivita. Jae reta jei ñru vae reta pe ovoi vaerá

pentí tivita poi vae. Ërei jae reta ombori’á etei ovoi vaerá. Uyaviqui’á etei reta jivita —jei—. <sup>5</sup>Mboroyocui re oporombocoe vae reta jare fariseo reta mbae uyapo

yave, uipota ñru vae reta uecha vaerá. Echa’á jae reta oñono iyee Tumpa ñnee jiru tuicha vae jare uyapo jemimonde pucu —jei—. <sup>6</sup>Yugüiraa yave tupao pe

jare parea pe, jecuaeño uipota uguapí tenda tenondegua vae reta pe —jei—.

<sup>7</sup>Jare uipota ñru vae reta pe uyembisaludaca vaerá calle reta rupi jare jei vaerá chupe reta: ‘Oporombocoe vae’ —jei—. <sup>8</sup>Ërei agüiye pipota ñru vae reta jei vaerá

peve: ‘Oporombocoe vae.’ Echa’á che co jae pomboe vae, jare opaete pe reta cherivi reta co —jei—. <sup>9</sup>Jare agüiye pere: ‘Cheru’, penti cuimbae ivi pegua pe. Echa’á

pentíño co jae peRu, jare jae ico ara pe —jei—. <sup>10</sup>Jare agüiye pipota ñru vae reta jei vaerá peve: ‘Cheya.’ Echa’á pentíño co jae peYa. Jae co che. Echa’á che

co jae Cristo, Tumpa ombou vae —jei—. <sup>11</sup>Ime yave quía uipota tenondeguará ico vae, tuyeyocui opaete ñru reta pe —jei—. <sup>12</sup>Echa’á uyembutuicha vae

uñemimichicata co. Jae ramiño vi uñemimichi vae uyembutuichacata co —jei.



<sup>13</sup>Jayave Jesús jei mboroyocui re oporombœ vae reta jare fariseo reta pe:

—Pe reta co jae mboroyocui re oporombœ vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta piyopia ïru vae reta agüiye vaerã uique mboroyocui ara pegua pe. Pe reta etei pique'ã. ïru vae reta uipota tẽi uique, ãrei pe reta piyopia reta agüiye vaerã uique —jei—. <sup>14</sup>Pe reta co jae mboroyocui re oporombœ vae reta jare fariseo reta. Piporarata co. Pe reta co jae upurumbitavi vae reta. Echa'ã pepĩro cuña ime umano vae reta güi opaete imbaembae, jare pucu piyerure Tumpa pe pepurumbitavi vaerã. Jáeramo piporara eteta co —jei—. <sup>15</sup>Pe reta co jae mboroyocui re oporombœ vae reta jare fariseo reta. Piporarata co. Pe reta co jae upurumbitavi vae reta. Echa'ã peo peeca opaete i guasu rupi jare ivi rupi pevãe vaerã penti pepuere pemiquirei peporombœ güirovia vaerã vae. Jare güirovia yave peporombœ, jecuae pemboe mbaembae re. Jocua jeco pegua jae uyeyapo icavi mbae vaerã. Pe reta peota tata guasu pe. Jare jae peporombœ re güirovia ramo, oota vi tata guasu pe —jei—. <sup>16</sup>Pe reta co jae jesa mbae vae uechaca ñugüinoi tape ïru vae reta pe vae reta rami. Piporarata co. Echa'ã pe reta pere: 'Ime yave quía: Tumpa jo jee re ayapota, jei vae, jocua mbae'ã co. ãrei ime yave quía: Oro Tumpa jo pegua jee re ayapota, jei vae, uyapota co jocua jei uyapota vae' —pere, jei—. <sup>17</sup>Pe reta co jae jesa mbae vae reta rami. Pe reta pearacuaa'ã. Echa'ã jocua oro uñeñoño tee Tumpa peguarã, Tumpa jo pegua co ramoño. Jáeramo Tumpa jo uyembujupica ete jocua oro Tumpa jo pegua güi —jei—. <sup>18</sup>Jae ramiño vi pe reta pere: 'Ime yave quía: Uñemeearenda jee re ayapota, jei vae, jocua mbae'ã co. ãrei ime yave quía: Ofrenda jee re uñemeearenda pe oĩ vae ayapota, jei vae, uyapota co jei uyapota vae' —pere, jei—. <sup>19</sup>Pe reta co jae jesa mbae vae reta rami. Pe reta pearacuaa'ã. Echa'ã jocua ofrenda uñeñoño tee Tumpa peguarã, uñemeearenda pe oĩ ramoño. Jáeramo uñemeearenda uyembujupica ete ofrenda uñemee vae güi —jei—. <sup>20</sup>Jáeramo ime yave quía: Uñemeearenda jee re ayapota, jei vae, opaete ofrenda uñemeearenda pe oĩ vae uñemĩru uñemeearenda ndive —jei—. <sup>21</sup>Jae ramiño vi ime yave: Tumpa jo jee re ayapota, jei vae, Tumpa jo pe ico vae uñemĩru Tumpa jo ndive —jei—. <sup>22</sup>Jae ramiño vi ime yave quía: Ara jee re ayapota, jei vae, Tumpa uñemĩru ara ndive. Echa'ã ara Tumpa iguapia co —jei—. <sup>23</sup>Pe reta co jae mboroyocui re oporombœ vae reta jare fariseo reta. Piporarata co. Pe reta co jae upurumbitavi vae reta. Echa'ã pemee Tumpa pe diezmo temiti reta penoi vae güi. ãrei cua michi ete. Mboroyocui jei peve piyapo vaerã jeta ete cua güi. Echa'ã jei peve piyapo vaerã jupi vae jare pepuruparareco vaerã jare pepurugüirovia vaerã. Piyapo'ã opaete cua. Icavi co pemee vaerã Tumpa pe jocua nunga diezmo. ãrei piyapota tẽi jupi vae jare pepurupararecota tẽi jare pepurugüiroviata tẽi —jei—. <sup>24</sup>Pe reta co jae jesa mbae vae uechaca ñugüinoi tape ïru vae reta pe vae reta rami. Pe reta peatẽi pemocui penti ñeti, ãrei pemocui penti camello —jei—. <sup>25</sup>Pe reta co jae mboroyocui re oporombœ vae reta jare fariseo reta. Piporarata co. Pe reta co jae upurumbitavi vae reta. Pe reta co jae taza jare plato icupe rupiño uyeyoe vae rami. ãrei pepia iquia co. Echa'ã pipota ïru vae

reta imbaembae jare piyapo icavi mbae vae —jei—. <sup>26</sup>Pe reta co jae fariseo reta. Pe reta co jae jesa mbae vae reta rami. Piyoe rani pepia, taza jare plato japipe rupi piyoe rami. Jayave icupe rupi vi uyeyoeta —jei—. <sup>27</sup>Pe reta co jae mboroyocui re oporombocue vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta co jae teögüeriru uñemotí cavi vae reta rami. Jocua nunga teögüeriru ipõra echa, ãrei japipe pe tinee umanocue vae reta icãgüecue reta pe jare iquia —jei—. <sup>28</sup>Jae ramiño vi ñru vae reta ipia pe uyemingüeta tõi pe reta co jae jupi vae reta, ãrei pepia tinee tavi jare icavi mbae vae pe —jei—.

<sup>29</sup>Pe reta co jae mboroyocui re oporombocue vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta piyapo Tumpa ñnee aracae umimbeu vae reta iteögüeriru reta, jare pemopõra jupi vae reta iteögüeriru reta —jei—. <sup>30</sup>Jare pere: 'Yande yaico yave mona yandetenondegua reta yugüireco yave, yande yamborita'ã tõi jae reta uyuca yave Tumpa ñnee aracae umimbeu vae reta' —pere, jei—. <sup>31</sup>Jucuarãi pere ramo, picuaaca quirãi pe reta co jae Tumpa ñnee aracae umimbeu vae reta uyuca vae reta ñnemoñaeta reta pegua —jei—. <sup>32</sup>Agüiyeta tõi ma piyapo petenondegua reta uyapo rami —jei—. <sup>33</sup>Pe reta mboi reta rami co. Añete co, pe reta mboi reta ñnemoñaeta reta rami co. Ndarau etei piyerepi Tumpa perãa yave peo vaerã tata guasu pe —jei—. <sup>34</sup>Amondota peve chiñee umimbeu vae reta jare iyaracuaa catu vae reta jare cheporoyocui re oporombocue vae reta. Picututa curusu re amocue vae piyuca, jare pinupata chicote pe amocue vae petupao reta pe jare peaicuemoñaeta reta penti tenta guasu güi ñru tenta guasu pe —jei—. <sup>35</sup>Jare pe reta penoita teco opaete jupi vae reta imano re. Tenonde voi Abel uyeyucaca - jae co jupi vae - jare taicue rupi Berequías tai Zacarías jee vae uyeyucaca. Echa'ã Zacarías umano maemimba uyeyucacue uñemearendeta jare Tumpa jo ipãu pe —jei—. <sup>36</sup>Añete che jae peve, cua reta jare opaete ñru vae reta imano re pe reta añave pico vae piyembijecota —jei—.

### Jesús ipiatiti Jerusalén pegua reta re

(Lc 13.34-35)

<sup>37</sup>Jerusalén pegua reta, pe reta piyuca Tumpa ñnee aracae umimbeu vae reta. Pe reta piyapi ita pe piyuca Tumpa ombou peve vae reta. Jeta vese ma chequirõi tõi pumbati, uru umbati imembi reta ipepo igüi pe rami, ãrei pe reta pipota'ã —jei—. <sup>38</sup>Mase, Tumpa usirita ma pegüi. <sup>39</sup>Che jae peve, ndarau ma cherecha pere regua: 'Tuyembiaadoraca yandeYa jee re ou vae' —jei.

### Tumpa jo uyeitita

(Mr 13.1-2; Lc 21.5-6)

**24** <sup>1</sup>Jayave Jesús oẽ Tumpa jo güi. Jare jemimboe reta yugüeru uechaca Jesús pe opaete o Tumpa jo pe ñngüinoi vae reta. <sup>2</sup>Jare Jesús jei chupe reta:

—¿Pema pa peĩ opaete cua o reta re? Añete che jae peve, ndarau upita penti ave ita ñru ita iárambo. Opaete uyeitita co —jei.

**Mbaesusere reta uyeyapota vae**  
(*Mr 13.3-23; Lc 21.7-24; 17.22-24*)

<sup>3</sup>Jare Jesús uguapí oĩ rambueve ivitu guasu Olivos re, jemimboe reta yugüeru jae oĩ vae pe jare jei chupe, jae retaño jae ndive ñugüinoi yave:

—Emimbeu oreve, ¿quirái yave pa cua uyeyapota? Jare ndeyu yeta ma yave, ¿quiráita pa nduicuaa? Jare cua ara reta opata ma yave, ¿quiráita pa nduicuaa? —jei reta.

<sup>4</sup>Jayave Jesús jei chupe reta:

—Piñemoa ngatu agüiye vaerã petavi. <sup>5</sup>Echa'ã yugüeruta jeta cheree pe uyembijeeta vae reta. Jae reta jeita: 'Che co jae Cristo.' Jare umbitavita jeta vae reta —jei—. <sup>6</sup>Imeta co ñerãro reta coiño pegüi. Imeta vi ñerãro reta mbiri pegüi. Piyandu yave cua reta regua, agüiye pequiye. Cua susere reta uyeyapoñotai co. Ërei cua susere reta ndei ave co opa vaerã —jei—. <sup>7</sup>Penti ivi pegua reta uñerãrota ambie ivi pegua reta ndive, jare mburuvicha reta uñerãrota ñru mburuvicha reta ndive. Jare imeta caruai reta jare ivicãta jeta que rupi —jei—. <sup>8</sup>Ërei cua susere reta uyembipi ramo co oĩ —jei—.

<sup>9</sup>Jayave ñru vae reta pemeeta uiporacata peve vae reta pe, jare piyeyucacata. Jare piñemitarëicata opaete vae pe chereco pegua —jei—.

<sup>10</sup>Jare jeta vae uñatima yeta Tumpa güi jare uñemeeta reta jare uñemitarëita —jei—. <sup>11</sup>Jare jeta upurumbitavi vae reta jeita: 'Che co jae penti Tumpa ñnee umimbeu vae.' Jáeramo jae reta umbitavita jeta vae —jei—. <sup>12</sup>Jare jeta vae uyapota icavi mbae vae. Jáeramo jeta tenonde yave upuruau vae reta ndarau ma upuruau —jei—. <sup>13</sup>Ërei jösata oo uvãe iyapi pe vae uyembiasacata co —jei—. <sup>14</sup>Jare cua ñee icavi vae Tumpa iporoyocua pegua jerãcuata opaete ivi rupi opaete ivi pegua reta uyandu vaerã. Jayave cua ara reta opata co —jei—.

<sup>15</sup>Jare peechata icavi mbae vae opaete urucumegua vae uyemboi oĩ o uñeñoño tee Tumpa peguarã vae pe. Tumpa ñnee aracae umimbeu vae Daniel jei uyecuaata co. (Umingueta vae tuicuaa) —jei—. <sup>16</sup>Jayave Judea pe ñugüinoi vae reta tosi ivitu guasu coti. <sup>17</sup>Jare o cupe re oĩ vae agüiye tuique jo pe güiraa vaerã imbaembae —jei—. <sup>18</sup>Jare ico pe oĩ vae agüiye tou ye jenta pe güiraa vaerã iyasoya —jei—. <sup>19</sup>Jare ipurúa vae reta jare umicambu vae reta uiporara eteta jocua ara reta pe —jei—. <sup>20</sup>Jare piyerure Tumpa pe agüiye vaerã pesi roi ma yave ani mbutuu ara pe —jei—. <sup>21</sup>Echa'ã jocua ara reta pe ivi pegua reta uiporara eteta. Jucuarã'ã uiporara reta ivi uyeyapo güiye, jare ndarau ye jucuarãi uiporara reta —jei—. <sup>22</sup>Jare yandëya uipota'ã yave opa vaerã jocua ara reta, mbaetita tẽi quía ipuere ico. Ërei Tumpa uiparavo vae reta jeco pegua opata jocua ara reta —jei—.

<sup>23</sup>Aramoi jocua ara reta pe quía jeita peve: 'Mase, co oĩ Cristo', ani jeita: 'Mase, pee oĩ Cristo.' Jucuarãi jei yave, agüiye perovia —jei—.

<sup>24</sup>Amocue upurumbitavi vae reta jeita: 'Che co jae Cristo', jare ñru upurumbitavi vae reta jeita: 'Che co jae Tumpa ñnee umimbeu vae.' Jare

jae reta uyapota miacañi reta, umbitavi vaerã tẽi Tumpa uiparavo vae reta —jei—. <sup>25</sup>Mase, amimbeu ma peve cua, ndei uyeyapo mbove —jei—.

<sup>26</sup>Jayave ñru vae reta jei yave peve: ‘Mase, ime co ñana pe oĩ’, agüiye pecua. Jare ñru vae reta jei yave peve: ‘Mase, ime co cua o pe oĩ’, agüiye perovia —jei—. <sup>27</sup>Tamijaanga ama uvera vae. Echa’ã ama uvera vae uyecuaa opaete ara re guarasi oẽ vae coti güi guarasi uique vae coti pe. Jae ramiño vi che cuimbaerã ayeyapo vae ayecuaata opaete vae pe ayu ye yave —jei—.

<sup>28</sup>Umano vae jetecue oĩ vae pe uyembatita uruvi reta —jei—.

### Cuimbaerã uyeyapo vae ou yeta

(Mr 13.24-37; Lc 21.25-36; 17.26-36)

<sup>29</sup>Jayave opa uiporara reta jocua ara reta pe yave, guarasi uñemipitumimbata, jare yasi ndarau ma jembipe, jare yasitata reta oata ara güi, jare opaete ara re mbaepuere güinoi vae reta ucãtata —jei—. <sup>30</sup>Jayave mbae uyecuaata ara re. Jocua uicuaacata ivi pegua reta pe che cuimbaerã ayeyapo vae ayu yeta co. Jayave opaete ati Israel pegua reta ipiatitãta jare cherechata ayu amapĩtu reve ara güi. Che cuimbaerã ayeyapo vae anoita mbaepuere tuicha vae, jare ayembadoracata opaete vae pe —jei—. <sup>31</sup>Jare amondota ángel cheve uyeyocui vae reta trompeta uñee reve, jae reta güeru vaerã aiparavo vae reta opaete ivi rupi güi —jei—.

<sup>32</sup>Yandepuere yamijaanga iva. Piyemboe jese —jei—. Joqui yave, picuaa uyaro ma co ama oqui vaerã —jei—. <sup>33</sup>Jae ramiño vi pe reta peeche yave opaete cua mbaembae uyeyapo ñngüinoi vae, picuaata che coiño ma co aĩ —jei—. <sup>34</sup>Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei—. <sup>35</sup>Ara jare ivi opata, ãrei chiñee ndarau opa —jei—.

<sup>36</sup>Ërei mbaeti quía uicuaa mbae ara pe ani mbae ora pe yepe cua uyeyapota, jaeño cheRu. Ángel ara pe ñngüinoi vae reta uicuaa’ã. Che co jae Tumpa Tai. Ërei che ave aicuaa’ã —jei—. <sup>37</sup>Noé ico rambueve, ivi pegua reta uyapo icavi mbae vae. Jae ramiño vi che cuimbaerã ayeyapo vae ayu ye yave, ivi pegua reta uyapota icavi mbae vae —jei—. <sup>38</sup>Ndei iporu guasu ou mbove, ivi pegua reta ucaruñoi jare ucauñoi yugüireco, jare jecuaeño cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerã. Ërei penti ara Noé uique jocua chalana guasu pe —jei—. <sup>39</sup>Jare uyepocouca reta, iporu guasu ou yave. Jáeramo iporu guasu opa uyuca reta. Jucuarãita vi uyeyapo che cuimbaerã ayeyapo vae ayu ye yave —jei—. <sup>40</sup>Jocua ara mocui cuimbae imeta co pe ñngüinoi. Penti vae uyereraacata jare ñru vae upitata co pe —jei—. <sup>41</sup>Jae ramiño vi mocui cuña umbaesota ñngüinoi penti angúa pe. Penti vae uyereraacata jare ñru vae upitata —jei—. <sup>42</sup>Jáeramo jecuaeño peãro. Echa’ã picuaa’ã mbae ara pe ayu yeta. Che co jae peYa —jei—. <sup>43</sup>Aipotã picuaa vaerã cua: Penti tenta iya uicuaa yave mbae ora pe outa uvãe imonda vae oñomi vaerã imbaembae jenta güi, uñemicuatĩrota tẽi jare ndarau tẽi umaeño imonda vae re

güüraa vaerã imbaembae chugüü —jei—. <sup>44</sup>Jae ramiño vi pe reta peãro, agüiye vaerã che cuimbaerã ayeyapo vae ayu ye avãe piyandareco'ã pëi yave —jei—.

**Uyeyocui vae uyapo'a ipatrón jei vae**  
(Lc 12.41-48)

<sup>45</sup>Penti uyeyocui vae iyaracuaa vae uyapo ipatrón jei chupe uyapo vaerã vae. Jare ipatrón umee chupe ico vaerã ñru jembiocui reta juvicharã, jare umee vaerã chupe reta jembiurã opa ara —jei—. <sup>46</sup>Ipatrón ou ye uvãe yave jenta pe, uecha yave jocua jembiocui uyapo oĩ iparaviquí, jocua jembiocui uyeroviata co —jei—. <sup>47</sup>Añete che jae peve, ipatrón umeeta chupe uyandareco vaerã opaete imbaembae re —jei—. <sup>48</sup>Ërei aramoi uyeyocui vae uyapo icavi mbae vae jare jei iyupe ipia pe: ‘Chepatrón ndarau ou ye imbae.’ <sup>49</sup>Jare umbipi uinupa ñru uyeyocui vae reta, jare ucaru jare ucau usavipo vae reta ndive —jei—. <sup>50</sup>Jayave penti ara ipatrón ou yeta uvãe jembiocui uyandareco'ã oĩ yave. Jocua ora pe etei ipatrón uipocouta —jei—. <sup>51</sup>Jayave ipatrón uiporacata chupe jare omondota ico vaerã opaete ñru upurumbitavi vae reta ndive. Joco pe uyaota jare jãi umbiquiririuta —jei—.

**Diez cuñatai cuimbae güireco'ã etei vae reta**

**25** <sup>1</sup>Mboroyocua ara pegua diez cuñatai cuimbae güireco'ã etei vae reta rami co. Penti penti cuñatai güüraa ilámpara oë oo uñeovãiti vaerã cuimbae umendata vae ndive —jei—. <sup>2</sup>Jare pandepo jocua cuñatai reta iyaracuaa, jare ñru pandepo vae reta iyaracuaa mbae vae —jei—. <sup>3</sup>Jocua iyaracuaa mbae vae reta güüraa ilámpara, ërei güüraa'ã aceite lámpara peguarã —jei—. <sup>4</sup>Ërei iyaracuaa vae reta güüraa vi aceite lámpara peguarã aceite jiru pe —jei—. <sup>5</sup>Jare ndeiño ou uvãe cuimbae umendata vae. Jáeramo opaete cuñatai reta jopei jare oque —jei—.

<sup>6</sup>Jare piare mbite yave uyendu ñee. ‘Mase, outa ma uvãe cuimbae umendata vae. Pecua peovãiti’ —jei, jei—. <sup>7</sup>Jayave opaete jocua cuñatai reta upüa jare uyapicatu ilámpara —jei—. <sup>8</sup>Jare cuñatai iyaracuaa mbae vae reta jei cuñatai iyaracuaa vae reta pe: ‘Pemee mi oreve michi peaceite. Echa'ã orelámpara ove ma’ —jei reta, jei—. <sup>9</sup>Ërei cuñatai iyaracuaa vae reta jei: ‘Numee yave peve, ndarau ndipo uepiti oreve. Icavi ndipo pe reta peo vaerã aceite umee vae reta pe pegua vaerã piyupe’ —jei reta, jei—. <sup>10</sup>Jare cuñatai iyaracuaa mbae vae reta yugüüraa aceite ueca rambueve, ou uvãe cuimbae umendata vae. Jare cuñatai iyaracuaa vae reta uique jae ndive menda uyeyapo oĩ vae pe. Jayave onque uyeyuquenda —jei—.

<sup>11</sup>Jare taicue rupi yugüeru uvãe jocua ñru cuñatai reta jare jei: ‘Oreya, oreya, ipea oreve onque.’ <sup>12</sup>Ërei cuimbae jei chupe reta: ‘Añete che jae peve, pucuaa'ã.’

<sup>13</sup>Jáeramo jecuaeño peãro. Echa'ã picuaa'ã mbae ara pe jare mbae ora pe che cuimbaerã ayeyapo vae ayu yeta —jei—.

**Talento reta**  
(Lc 19.11-27)

<sup>14</sup>Tamijaanga penti cuimbae iivi güi ambie ivi mbiri oĩ vae pe oota vae. Ndei oo mbove, ueni jembiocui reta jare jei chupe reta uyandareco vaerã imbaembae re —jei—. <sup>15</sup>Jayave umee penti jembiocui pe pandepo corepoti talento jee vae. Jare umee ñru jembiocui pe mocui talento. Jare umee ñru jembiocui pe penti talento. Echa'ã umee chupe reta penti penti ipuereta uyapo vae rupi. Jayave cuimbae oo ambie ivi coti —jei—. <sup>16</sup>Jayave pandepo talento güinoi vae umbipi umimbaraviqui icorepoti, jare jucuarãi umñru jocua pandepo talento ndive pandepo ye —jei—. <sup>17</sup>Jae ramiño vi mocui talento güinoi vae umbipi umimbaraviqui icorepoti, jare jucuarãi umñru jocua mocui talento ndive mocui ye —jei—. <sup>18</sup>Ërei penti talento güinoi vae oo oyoo ivi jare oñomi ivigüi pe corepoti ipatrón umee chupe vae —jei—.

<sup>19</sup>Jare ima ma yave jocua uyeyocui vae reta ipatrón ou ye uvãe iivi pe jare upirandu chupe reta mbae ra uyapo icorepoti umee chupe reta vae pe —jei—.

<sup>20</sup>Jare tenonde yave pandepo talento güinoi vae güeru jocua pandepo talento ñru pandepo talento umñru vae reve, jare jei ipatrón pe: 'Patrón, nde nemecheve pandepo talento. Mase, amñru jae reta ndive pandepo talento ye' —jei, jei—.

<sup>21</sup>Jayave ipatrón jei chupe: 'Cavi ndiyapo. Nde co jae cherembiocui icavi vae. Ndiyeyocui cavi cheve cua mbovi vae re. Jáeramo tamee ndeve jeta mbaembae ndiyandareco jese vaerã. Iyerovia che ndive' —jei, jei—.

<sup>22</sup>Jae ramiño vi tenonde yave mocui talento güinoi vae ou jei ipatrón pe: 'Patrón, nde nemecheve mocui talento. Mase, amñru jae reta ndive mocui talento ye' —jei, jei—. <sup>23</sup>Jayave ipatrón jei chupe: 'Cavi ndiyapo. Nde co jae cherembiocui icavi vae. Ndiyeyocui cavi cheve cua mbovi vae re. Jáeramo tamee ndeve jeta mbaembae ndiyandareco jese vaerã. Iyerovia che ndive' —jei, jei—.

<sup>24</sup>Jayave tenonde yave penti talento güinoi vae ou jei ipatrón pe: 'Patrón, che nducuaa co. Aicuaa nde co jae penti cuimbae jecopochi vae. Nde nepñro mbaembae ñru vae reta güi, jare ndeaviro ñru vae reta oñoti vae' —jei, jei—. <sup>25</sup>Jáeramo aquiye ndegüi ramo, aa añomi ndecorepoti ivigüi pe. Mase, co oĩ nembae' —jei, jei—. <sup>26</sup>Jayave ipatrón jei chupe: 'Nde co jae cherembiocui icavi mbae vae. Nde aqui co. Nde ndicuaa quirãi apñro mbaembae ñru vae reta güi jare quirãi aaviro ñru vae reta oñoti vae' —jei, jei—. <sup>27</sup>Jáeramo nderaata tẽi checorepoti banco pe. Echa'ã jucuarãi ndiyapo yave, ayu ye yave nemeeta tẽi co cheve corepoti amee ndeve vae jare mbovi ye banco pegua reta umñruta tẽi jae ndive vae' —jei, jei—. <sup>28</sup>Jayave ipatrón jei jembiocui reta pe: 'Pepñro chugüi jocua penti talento emee diez talento güinoi vae pe' —jei, jei—. <sup>29</sup>'Echa'ã güinoi vae pe unemñruta. Jeta eteta güinoi. Ërei mbaeti güinoi vae güi mbovi ete güinoi vae uyeequita' —jei, jei—. <sup>30</sup>Ërei pemombo cua cherembiocui uyeyocui cavi'ã cheve vae oca pe pñtumimbi oĩ vae pe. Joco pe uyaota jare jãi umbiquirñruta' —jei, jei—.

### Opaete ivi pegua reta uñeaácata

<sup>31</sup>Che cuimbaerã ayeyapo vae ayu ye yave ayembadoraca vaerã, opaete ángel uñeñono tee Tumpa peguarã vae reta yugüeruta che ndive. Jayave aguapita cheguapia yembiadora pegua pe —jei—. <sup>32</sup>Jare uyembatita cherovai opaete ivi pegua reta. Jare ambiyaota amocue vae ñru vae reta güi, penti cuimbae umbiyao lovecha reta icapura reta güi rami —jei—. <sup>33</sup>Jare añonocata ovecha reta cheacata coti jare capura reta cheaso coti —jei—. <sup>34</sup>Che co jae Mburuvicha Guasu. Jaeta cheacata coti ñugüinoi vae reta pe: ‘Peyu pico mboroyocua ivi uyeyapo güive uñemicuatĩro peve vae pe. CheRu pemivendise ma’ —jaeta, jei—. <sup>35</sup>‘Echa’ã chiyembaí yave, pemee acarú. Cheúe aico yave, pemee jau i. Yepe tẽi che co jae ambie ivi pegua, ãrei pemaño vite cheré aico vaerã perenta pe’ —jaeta, jei—. <sup>36</sup>‘Chenani yave, pemee cheve cheremimonderã. Chembraerasi yave, pepou chepi. Peresoriru pe aĩ yave, peyu pepou chepi’ —jaeta, jei—. <sup>37</sup>Jayave jupi vae reta jeita cheve: ‘OreYa, ¿quirãí yave pa nduecha ndiyembaí yave jare numee ndecaru? ¿Quirãí yave pa nduecha ndeúe yave jare numee ndeu i?’ —jeita, jei—. <sup>38</sup>‘¿Quirãí yave pa nduecha penti ambie ivi peguarã ndico yave, jare numañeño nderé ndico vaerã orerenta pe? ¿Quirãí yave pa nduecha nenani jare numee ndeve nderemimonderã?’ —jeita, jei—. <sup>39</sup>‘¿Quirãí yave pa nduecha nembraerasi ani peresoriru pe jare ndopou ndepi?’ —jeita, jei—. <sup>40</sup>Jayave che jaeta chupe reta: ‘Añete che jae peve, jucuarãí piyapo cherivi reta pe, yepe tẽi uñererĩroca. Jare jucuarãí piyapo yave, piyapo co cheve vi’ —jaeta, jei—.

<sup>41</sup>Jayave jaeta cheaso coti ñugüinoi vae reta pe: ‘Pesiri chegüi pecua tata opa mbae vae pe. Jocua tata uñemicuatĩro ma oĩ añã guasu jare opaete ángel chupe uyeyocui vae reta pe. Tumpa uiporacata peve’ —jaeta, jei—. <sup>42</sup>‘Echa’ã chiyembaí yave, pemee’ã acarú. Cheúe yave, pemee’ã i jau’ —jaeta, jei—. <sup>43</sup>‘Che co jae ambie ivi pegua jare pemaño’ã cheré aico vaerã perenta pe. Chenani yave, pemee’ã cheve cheremimonderã. Chembraerasi yave jare peresoriru pe aĩ yave, pepou’ã chepi’ —jaeta, jei—. <sup>44</sup>Jayave jae reta vi jeita cheve: ‘OreYa, ¿quirãí yave pa nduecha ndiyembaí yave, ani ndeúe yave, ani ambie ivi peguarã ndico yave, ani nenani yave, ani nembraerasi yave, ani peresoriru pe neĩ yave, jare nombori’ã?’ —jeita, jei—. <sup>45</sup>Jayave che jaeta chupe reta: ‘Añete che jae peve, pembori’ã cherivi uñererĩroca vae reta. Jare jucuarãí co chembori’ã’ —jaeta, jei—. <sup>46</sup>Jare cua reta yugüiraata tata guasu pe. Joco pe uiporata reta jaño mai pegua. Ërei jupi vae reta güinoita tecove opa mbae vae —jei.

### Uipota reta uyucaca Jesús

(Mr 14.1-2; Lc 22.1-2; Jn 11.45-53)

# 26

<sup>1</sup>Jare opaete cua jei ma yave, Jesús jei jemimboe reta pe:  
<sup>2</sup>—Picuaa mocui araño ma co uata pascua iara uvãe vaerã, jare che cuimbaerã ayeyapo vae añemeecata co ayecutuca vaerã —jei.

<sup>3</sup>Jare sacerdote reta itenondegua reta jare tenta guasu pegua reta itenondegua reta uyembati sacerdote tenondegua joca pe. Sacerdote tenondegua jee co Caifás. <sup>4</sup>Jare uyemboemboe reta quirái ipuere uipisi viari Jesús uyucaca vaerã. <sup>5</sup>Ërei jei reta:

—Agüiye yaipisi pascua ara rupi, agüiye vaerã tenta guasu pegua reta uyapo tecorai.

### **Cuña upiyere mbae ipiche cavi vae Jesús re**

*(Mr 14.3-9; Jn 12.1-8)*

<sup>6</sup>Jare Jesús oĩ rambueve tenta guasu-rai Betania pe Simón ipire ocuise vae jenta pe, <sup>7</sup>uique penti cuña. Jae güeru iru-rai ita alabastro jee vae pegua. Cua iru-rai tinee mbae ipiche cavi vae jepi vae pe. Jare cuña upiyere mbae ipiche cavi vae Jesús inãca re, Jesús mesa pe uguapi oĩ rambueve.

<sup>8</sup>Jare Jesús jemimboe reta cua uecha yave, pochi cuña pe. Jei reta:

—¿Maera pa umicañitei? <sup>9</sup>Echa'ã umee yave corepoti re, guñoita tēi jeta corepoti umee vaerã iparavete vae reta pe —jei reta.

<sup>10</sup>Ërei Jesús uicuaa jei reta vae, jare jei chupe reta:

—¿Maera pa pemambeco cuña? Icavi vae co uyapo cheve —jei—.

<sup>11</sup>Echa'ã yugüirecoñotai co iparavete vae reta pe reta ndive, ãrei che ndarau aicoño pe reta ndive —jei—. <sup>12</sup>Cua mbae ipiche cavi vae upiyere cheré vae pe chembipiche cavi ma, ndei añeñotica mbove —jei—.

<sup>13</sup>Añete che jae peve, opaete ivi rupi ñee icavi vae jerãcua vae rupi, cua uyapo vae vi jerãcuata, iru vae reta imandúa vaerã jese —jei.

### **Judas umeeta Jesús**

*(Mr 14.10-11; Lc 22.3-6)*

<sup>14</sup>Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüinoi vae pe, <sup>15</sup>jare jei chupe reta:

—¿Mbae pa pemeeta cheve, amee yave Jesús peve?

Jayave jae reta jei umeeta co chupe treinta corepoti. <sup>16</sup>Jayave jocua güive Judas ueca quirái ipuere umee Jesús chupe reta.

### **Jesús ucaru jemimboe reta ndive**

*(Mr 14.12-25; Lc 22.7-23; Jn 13.21-30; 1 Cor 11.23-26)*

<sup>17</sup>Jare jocua ara judío reta umbipi jou mbiyape ovu mbae vae yave, Jesús jemimboe reta yugüeru jei chupe:

—¿Quiápe pa ndipota nduyapicatu vaerã, tembú pascua pegua ndeu vaerã?

<sup>18</sup>Jayave Jesús jei chupe reta:

—Pecua tenta guasu pe pere cuimbae amimbeu peve vae pe:

‘Oporomboe vae jei: Ora uvãe ma. Jauta tembú pascua pegua nerenta pe cheremimboe reta ndive’ —jei, pere chupe, jei.



<sup>19</sup>Jayave jemimboe reta uyapo Jesús jei chupe reta uyapo vaerã vae. Jare uyapo reta tembú pascua pegua jou reta vaerã.

<sup>20</sup>Jare pĩtu ma yave Jesús uguapĩ ucaru vaerã jocua doce jemimboe reta ndive. <sup>21</sup>Jare ucaru ñugüinoi rambueve, Jesús jei chupe reta:

—Añete che jae peve, penti pepite pe oĩ vae chemeeta cherovaicho reta pe.

<sup>22</sup>Jayave jae reta ipiatiti, jare jei Jesús pe penti penti rupi:

—CheYa, ¿che pa co jae?

<sup>23</sup>Jayave Jesús jei chupe reta:

—Mbiyape umãqui oĩ che ndive plato pe vae co jae. <sup>24</sup>Che cuimbaerã ayeyapo vae aãnotai amano vaerã, uyecuatía oĩ cheregua rami. Ërei jocua cuimbae chemeeta vae uiporarata co. Icavi tẽi mona jocua cuimbae mbaeti ico yave —jei.

<sup>25</sup>Jayave Judas (Jesús umee vae) jei chupe:

—Oporomboe vae, ¿che pa co jae?

—Ndere ma co —jei Jesús chupe.

<sup>26</sup>Jare ucaru ñugüinoi rambueve, Jesús uipisi mbiyape, jare umee yasurupai Tumpa pe. Jayave upisãa mbiyape jare umee jemimboe reta pe.

—Peu —jei chupe reta—. Cua co jae cherete —jei.

<sup>27</sup>Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe.

—Peu opaete pe reta —jei—. <sup>28</sup>Cua co jae cherugüi. Cherugüi uyepiyereta, Tumpa jei piau ye vae uyeyapo vaerã, jare Tumpa umbiasa vaerã jeta vae pe imbaeyoa reta —jei—. <sup>29</sup>Ërei che jae peve, ndarau ma jau uva ticuecue, cheRu iporoyocua pe uva ticuecue ipiau vae pe reta ndive jau regua —jei.

### Pedro uicuacuta Jesús

(Mr 14.26-31; Lc 22.31-34; Jn 13.36-38)

<sup>30</sup>Jare opa yave ucanta reta Tumpa pe, oẽ reta yugüiraa ivitu guasu Olivos coti. <sup>31</sup>Jayave Jesús jei chupe reta:

—Opaete pe reta chereyata cua pĩtu. Echa'ã Tumpa iñee pe uyecuatía oĩ cuarãi: 'Ayucata ovecha reta iyandarecoa, jare ovecha reta opata uñemiai.' Jucuarãi uyecuatía oĩ —jei—. <sup>32</sup>Ërei aicove ye ayu yave umanocue vae reta ipite güi, aata perenonde Galilea pe —jei.

<sup>33</sup>Jayave Pedro jei Jesús pe:

—Yepe tẽi opaete ñru reta tandereya, ãrei che ndarau ndueya.

<sup>34</sup>—Añete che jae ndeve —jei Jesús chupe—, cua pĩtu etei, ndei uru cuimbae uñee mbove, mbapĩ vese ma checuacuta —jei.

<sup>35</sup>Ërei Pedro jei chupe:

—Yepe tẽi tamano nde ndive, ãrei ndarau nducua.

Jare jucuarãi vi jei opaete Jesús jemimboe reta.

**Jesús uyerure Getsemaní pe***(Mr 14.32-42; Lc 22.39-46)*

<sup>36</sup>Jayave Jesús oo jae reta jupíe uvãe Getsemaní pe. Jare Jesús jei jemimboe reta pe:

—Peguapi cua pe, che aa pea pe ayerure Tumpa pe rambueve.

<sup>37</sup>Jayave güiraa Pedro jare jocua mocui Zebedeo tai reta, jare umbipi ipiatiti jare uiporara. <sup>38</sup>Jayave jei jocua mbapi jemimboe reta pe:

—Tuicha chepiatiti, jare amano pota echa. Pepita cua pe, jare agüiye peque —jei.

<sup>39</sup>Jayave Jesús usiri catu chugüi reta, jare uyeatica ivi re jare uyerure Tumpa pe.

—CheRu, nde ndipota yave, embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

<sup>40</sup>Jayave Jesús ou ye jemimboe reta ñugüinoi vae pe, jare uecha oque ñugüinoi. Jayave jei Pedro pe:

—¿Pepuere'ã pa penti ora yepe peque mbae peĩ chembori vaerã?

<sup>41</sup>Agüiye peque. Piyerure Tumpa pe, agüiye vaerã peyoa. Pepia pe peratangātu co, ërei perete iyaquí co —jei.

<sup>42</sup>Jayave Jesús usiri ye uyerure Tumpa pe.

—CheRu, nde ndipota yave aiporara vaerã, tuyeyapo cheve nde ndere vae —jei.

<sup>43</sup>Jayave ou ye jemimboe reta ñugüinoi vae pe, jare uecha oque ye ñugüinoi. Echa'ã jae reta jopei ete ma.

<sup>44</sup>Jayave Jesús usiri ye chugüi reta uyerure Tumpa pe. Uyerure ye tenonde yave uyerure rami. <sup>45</sup>Jayave ou ye jemimboe reta ñugüinoi vae pe jare jei chupe reta:

—Peque jare peputuuño ma. Mase, ora uvãe ma. Che cuimbaerã ayeyapo vae penti vae chemeeta cuimbae jeco pochi vae reta pe —jei—.

<sup>46</sup>Pepüa. Yaaño ma. Mase, chemeeta vae coiño ma ou —jei.

**Uipisi reta Jesús***(Mr 14.43-50; Lc 22.47-53; Jn 18.2-11)*

<sup>47</sup>Jare uyemingueta oĩ rambueve, ou Judas - jae co jocua doce vae güi penti. Jeta vae yugüeru jae ndive iquisepucu reve jare iivira reve reve. Sacerdote reta itenondegua reta jare tenta guasu pegua reta itenondegua reta ombou Jesús pe cua reta. <sup>48</sup>Jare umeeta vae umimbeu ma ñru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi —jei.

<sup>49</sup>Judas ou voi Jesús oĩ vae pe.

—Pĩtu ma, oporomboe vae —jei chupe.

Jayave uyurupite.

<sup>50</sup>Jayave Jesús jei chupe:

—Cheamigo, ¿maera pa ndiyapo jucuarãi?

Jayave ñru reta yugüeru uipisi Jesús. <sup>51</sup>Jare penti Jesús ndive oĩ vae uipisi iquisepucu jare uequi ñiru güi, jare uiporu sacerdote tenondegua jembicui inambi re, jare uyasia inambi chugüi. <sup>52</sup>Jayave Jesús jei chupe:

—Ñono ye quisepucu ñiru pe. Echa'ã opaete quisepucu uiporu vae reta uyeyucacata quisepucu pe —jei—. <sup>53</sup>Aipota yave, chepuere ayerure cheRu pe ombou voi vaerã jeta ángel reta cherepi vaerã. ¿Ndicuaa'ã pa cua? —jei—. <sup>54</sup>Ñrei jucuarãi yave, ¿quirãita pa uyeyapo Tumpa ñnee pe uyecuatía oĩ vae? Echa'ã jei jucuarãita co uyeyapo cheve —jei.

<sup>55</sup>Jayave Jesús jei yugüeru vae reta pe:

—¿Maera pa peru quisepucu reta jare ivira reta chepisi vaerã, imonda vae pipisi vae rami? Opa ara aguapi pe reta ndive Tumpa jo pe. Joco pe aporomboe, jare chepisi'ã —jei—. <sup>56</sup>Ñrei opaete cua uyeyapo oĩ Tumpa ñnee aracae umimbeu vae reta uicuatía vae uyeyapo vaerã —jei.

Jayave opaete jemimboe reta ueya Jesús, jare opa osi.

### Jesús uyemboi jovaicho reta jovai

(Mr 14.53-65; Lc 22.54, 63-71; Jn 18.12-14, 19-24)

<sup>57</sup>Jayave Jesús uipisi vae reta güiraa sacerdote tenondegua Caifás jenta pe. Jare joco pe uyembati ma mboroyocui re oporomboe vae reta jare tenta guasu pegua reta itenondegua reta. <sup>58</sup>Jare Pedro oo vi Jesús jaicue. Ñrei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembicui reta ndive, uecha vaerã mbae uyeyapota vae. <sup>59</sup>Jare sacerdote reta itenondegua reta jare opaete ñru mburuvicha reta ueca quía ñneapo vaerã Jesús re iyapu reve, uyucaca vaerã. <sup>60</sup>Ñrei uvãe'ã reta teco jese, yepe tẽi jeta vae iyapu reve ñneapo jese. Taicue rupi mocui vae iyapu reve ñneapo jese. <sup>61</sup>Jae reta jei:

—Cua cuimbae jei: ‘Chepuere ambusururu Tumpa jo jare ayapo ye mbapi ara pe’ —jei, jei reta.

<sup>62</sup>Jayave sacerdote tenondegua upãa uyemboi jare upirandu Jesús pe:

—¿Maera pa ñnee nemoẽ'ã? ¿Mbae re pa cua reta ñneapo nderé? —jei.

<sup>63</sup>Ñrei Jesús quiiño. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? Che ndoyocui Tumpa jecuaeño ico vae jee re nemimbeu vaerã oreve —jei.

<sup>64</sup>Jayave Jesús jei chupe:

—Nde ndere rami jae co che. Ñrei che jae peve, che cuimbaerã ayeyapo vae cherechata co aguapi añ Tumpa mbaepuere güinoi vae iyipi pe iyacata coti. Cherechata vi ayu amapĩtu reve ara güi —jei.

<sup>65</sup>Jayave sacerdote tenondegua cua uyandu yave, pochĩ ramo omondo jemimondei, jare jei:

—Jei ma icavi mbae vae Tumpa coti. ¿Maera ma pa yaeca yeta ñru vae reta ñneapo vaerã jese? Mase, pe reta piyandu ma icavi mbae vae jei Tumpa coti —jei—. <sup>66</sup>¿Mbae pa pere añave? —jei.

Ïru reta jei chupe:

—Icavi'ã co. Icavi co yayucaca vaerã —jei reta.

<sup>67</sup>Jayave amocue vae undivi Jesús jova re, jare uinupa. Jare ïru vae reta ocua jese, <sup>68</sup>jare jei chupe:

—Nde co jae Cristo, Tumpa ombou vae yave, emimbeu oreve quía ra ocua oĩ nderé.

### Pedro uicuacu Jesús

(Mr 14.66-72; Lc 22.56-62; Jn 18.15-18, 25-27)

<sup>69</sup>Jare Pedro uguapí oĩ oca pe. Jare penti cuñatai ou jei chupe:

—Nde vi co jae Jesús Galilea pegua ïru.

<sup>70</sup>—Che jae ïru'ã co —jei Pedro opaete vae jovaque—. Aicuaa'ã mbae ndere vae —jei.

<sup>71</sup>Jayave Pedro oo onque tuicha vae coti. Jare ïru cuñatai uecha jare jei joco pe ñugüinoi vae reta pe:

—Cua cuimbae co jae penti Jesús Nazaret pegua ïru.

<sup>72</sup>Ërei Pedro jei ye:

—Che jae ïru'ã co. Tumpa jee re aicuaa'ã jocua cuimbae —jei.

<sup>73</sup>Jare ndei ima mbove joco pe ñugüinoi vae reta yugüeru jei Pedro pe:

—Añete co, nde co jae penti Jesús ïru. Echa'ã nde ndiyemingueta Jesús ïru reta uyemingueta vae rami —jei reta.

<sup>74</sup>Jayave Pedro jei Tumpa jee re:

—Tumpa tuiporaraca cheve cua jae vae añetete'ã yave. Aicuaa'ã jocua cuimbae.

Jare jupivoi uru cuimbae uñee. <sup>75</sup>Jare Pedro imandúa Jesús jei chupe vae re: “Ndei uru cuimbae uñee mbove, mbapí vese ma checuacuta.” Jayave Pedro oẽ joco güi, jare tanta ipiatiti reve uyao.

### Jesús uyemboi Pilato jovai

(Mr 15.1; Lc 23.1-2; Jn 18.28-32)

**27** <sup>1</sup>Jare cõe ma yave, opaete sacerdote reta itenondegua reta jare tenta guasu pegua reta itenondegua reta uyemboemboe Jesús re, uyucaca vaerã. <sup>2</sup>Jayave uipocua Jesús jare güiraa mburuvicha guasu Poncio Pilato pe umee.

### Judas imano

<sup>3</sup>Jayave Judas (Jesús umee vae) ipiatiti uyapo vae re. Echa'ã uicuaa ma quirã Jesús jovaicho reta umbijeco ma Jesús. Jayave güiraa ye jocua treinta corepoti sacerdote reta itenondegua reta jare tenta guasu pegua reta itenondegua reta ñugüinoi vae pe. <sup>4</sup>Jare jei chupe reta:

—Ayapo mbaeyoa. Echa'ã amee peve jocua cuimbae teco güinoi mbae vae piyucaca vaerã —jei.

Jayave jae reta jei Judas pe:

—Jocua mbae'ã co oreve. Nde co nenoï teco.

<sup>5</sup>Jayave Judas omombo corepoti Tumpa jo pe. Jayave oẽ Tumpa jo güi oo uyeyuvi. <sup>6</sup>Jayave sacerdote reta itenondegua reta omonoo jocua corepoti jare jei:

—Jupi'ã co ñañoño ye vaerã cua corepoti jiru Tumpa jo pe oï vae pe. Echa'ã ñamee Judas pe yandepuere vaerã yayucaca Jesús —jei reta.

<sup>7</sup>Jayave uyemingueta reta uicuaa vaerã mbae ra uyapota corepoti pe. Jayave ogua ñaeu iyapoa iivi, uñeñotica vaerã joco pe ambie ivi pegua reta. <sup>8</sup>Jáeramo umbijee jocua ivi: Ivi tugüi jepicue.

<sup>9</sup>Jare jucuarãï uyeyapo Tumpa iñee aracae umimbeu vae Jeremías jei vae. Echa'ã jae jei cuarãï: “Jare jae reta omonoo jocua treinta corepoti. Echa'ã Israel pegua reta umbiepi treinta corepoti jocua cuimbae re. Jepi co treinta corepoti. <sup>10</sup>Jayave ogua pipe ñaeu iyapoa ico, yandéYa jei cheve rami.” Jucuarãï jei.

### **Pilato uyemingueta Jesús ndive**

*(Mr 15.2-5; Lc 23.3-5; Jn 18.33-38)*

<sup>11</sup>Jare Jesús uyemboï mburuvicha guasu jovai. Jayave mburuvicha guasu upirandu chupe:

—¿Nde pa co jae judío reta juvicha guasu? —jei.

—Nde ndere rami jae co che —jei Jesús chupe.

<sup>12</sup>Jare sacerdote reta itenondegua reta jare tenta guasu pegua reta itenondegua reta uñeapo Jesús re yave, Jesús jei'ã mbae ave. <sup>13</sup>Jayave Pilato jei chupe:

—¿Ndiyandu'a pa quirãï jeta mbaembae re uñeapo reta nderé?

<sup>14</sup>Èrei Jesús jei'ã mbae ave chupe. Jáeramo mburuvicha guasu ipiacañi jese.

### **Pilato jei Jesús umanota co**

*(Mr 15.6-20; Lc 23.13-25; Jn 18.38-19.16)*

<sup>15</sup>Jare pascua ara rupi Pilato oyoracañoï penti pereso tenta guasu pegua reta uipota vae. <sup>16</sup>Jare peresoriru pe oï penti cuimbae jerãcua vae. Jee co Barrabás. <sup>17</sup>Jayave Pilato upirandu yati vae reta pe:

—¿Pipota pa ayoraca vaerã peve Barrabás ani Jesús, Cristo jee vae?

<sup>18</sup>Echa'ã jae uicuaa judío reta umee Jesús chupe ñacatãa jese ramo.

<sup>19</sup>Jare Pilato uguapï oï yave uãa vaerã Jesús, jembireco ombou quía jei vaerã chupe:

—Agüiye iyapo mbae jocua cuimbae jupi vae pe. Echa'ã aiporara ma piare chepau pe jae jeco pegua.

<sup>20</sup>Èrei sacerdote reta itenondegua reta jare tenta guasu pegua reta itenondegua reta omboemboe yati vae reta uyerure vaerã Pilato pe oyoraca vaerã Barrabás jare uyucaca vaerã Jesús. <sup>21</sup>Jayave Pilato upirandu chupe reta:

—¿Quía nunga pa cua mocui cuimbae güi pipota ayoraca vaerã peve?

—Barrabás —jei reta chupe.

22 Jayave Pilato upirandu chupe reta:

—Jucuarãi yave, ¿mbae pa pipota ayapo vaerã Jesús, Cristo jee vae pe? Jayave opaete vae jei:

—Tuyecutuca curusu re.

23 Ërei Pilato upirandu chupe reta:

—¿Mbae icavi mbae vae pa uyapo?

Ërei jae reta iñeeãta reve jei:

—Tuyecutuca curusu re.

24 Jare Pilato uicuaa yave ipuere'ã mbae uyapo oyoraca vaerã Jesús - echa'ã judío reta umbipì uyapo tecorai - jei güeru vaerã chupe i jare uyepoe yati vae reta jovai. Jayave jei chupe reta:

—Che anoi'ã teco cua cuimbae jupi vae imano re. Pe reta penoi teco —jei.

25 Jayave opaete yati vae reta jei:

—Ore jare oriñemoñaeta reta turugüinoi teco imano re.

26 Jayave Pilato oyoraca chupe reta Barrabás. Jare uinupaca ma yave Jesús chicote pe, umee sundaro reta pe, uicutu vaerã curusu re.

27 Jayave mburuvicha guasu isundaro reta güiraa Jesús palacio pe, jare umbati opaete ñru sundaro reta joco pe. 28 Jayave sundaro reta omboi Jesús güi jemimonde jare omondeca chupe temimonde pita vae. 29 Jayave oñope reta yurãti catuui vae jare umbapúa oñoño Jesús iñãca re. Umee reta vi chupe penti tacuarãsi uipisi vaerã ipo iyacata pe. Jayave uyeatica reta jae jovai jare oyoyai.

—¡Viva, judío reta juvicha guasu! —jei reta.

30 Jare undivi reta jese. Jayave uipisi reta tacuarãsi uiporu iñãca re.

31 Jare opa oyoyai reta yave, sundaro reta omboi chugüi temimonde pita vae, jare omondeca ye chupe jemimondei. Jayave güiraa reta mburuvicha guasu joca güi, uicutu vaerã curusu re.

### Jesús uyecutuca curusu re

(Mr 15.21-32; Lc 23.26-43; Jn 19.17-27)

32 Jare yugüiraa reta rambueve, uecha penti cuimbae Simón jee vae. (Cua Simón tenta guasu Cirene pegua co.) Jayave sundaro reta güiraa Simón pe Jesús icurusu. 33 Jare sundaro reta güiraa Jesús Gólgata jee vae pe. (Cua uipota jei: “Ácacuerenda”.) 34 Jayave umee reta Jesús pe vino uyea mbae iro vae ndive vae. Ërei Jesús uicuaa yave mbae jocua, joul'ã.

35 Jayave sundaro reta uicutu curusu re. Jayave uyuguari reta Jesús jemimonde re, uicuaa vaerã mbae nunga penti penti güiraa iyupe vaerã. Jucuarãi uyapo reta uyeyapo vaerã Tumpa iñee aracae umimbeu vae jei vae. Echa'ã jei cuarã: “Uyuguari reta cheremimonde re, uicuaa vaerã mbae nunga penti penti güiraa iyupe vaerã.” Jucuarãi jei. 36 Jayave sundaro reta uguapì joco pe uyandareco vaerã Jesús re. 37 Jare oñoño reta curusu re Jesús iñãca iárambo uyecuatía mbae umbijeco jesegua vae: “Cua

co Jesús, judío reta juvicha guasu.”<sup>38</sup> Jare sundaro reta uicutu vi mocui imonda vae reta, jare oñono penti Jesús iyacata coti jare ñru iyaso coti.

<sup>39</sup> Jare uasa vae reta ñueñcambivava reve jei icavi mbae vae Jesús pe.

<sup>40</sup>—Nde ndere nembusururuta co Tumpa jo jare ndiyapo yeta mbapi ara pe — jei reta chupe—. Iyerepi. Nde co jae Tumpa Tai yave, egüeyi curusu güi —jei reta.

<sup>41</sup> Jae ramiño vi sacerdote reta itenondegua reta jare mboroyocui re oporombocue vae reta jare tenta guasu pegua reta itenondegua reta oyoyai.

<sup>42</sup>—Jae uepi ñru vae reta —jei reta—. Ërei ipuere'ã jae uyerepi. Jae co Israel pegua reta juvicha guasu yave, tugüeyi añave curusu güi, yarovia vaerã jese —jei reta—. <sup>43</sup> Güirovia Tumpa re; Tumpa tuepi añave, uipota yave. Echa'ã jae jei: ‘Che co jae Tumpa Tai’ —jei, jei reta.

<sup>44</sup> Jare imonda vae Jesús ndive uyecutuca vae reta jei icavi mbae vae chupe.

### Jesús umano

(Mr 15.33-41; Lc 23.44-49; Jn 19.28-30)

<sup>45</sup> Jare guarasi ara mbite güive mbapi ora rupi ñnemipitumimbi opaete ivi pe. <sup>46</sup> Jayave mbapi ora ma caaru yave Jesús ñneeãta reve jei:

—Elí, Elí, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

<sup>47</sup> Amocue joco pe ñugüinoi vae reta uyandu jare jei tēi:

—Mase, Elías ueni.

<sup>48</sup> Jare jupivoi penti vae osi oo umãqui esponja vinagre pe, jare oñono tacuarãsi re, jare omondo Jesús iyuru coti. <sup>49</sup> Ërei ñru reta jei:

—Eãro. Yaecha ou Elías umbigüeyi vaerã.

<sup>50</sup> Jayave Jesús tanta usapicai, jare umano.

<sup>51</sup> Jayave Tumpa jo umbiyao vae osoro mbite rupi ivate güi ivi coti.

Jare ivi ucãta jare itape reta ovo. <sup>52</sup> Jare teögüeriru reta uyepea, jare jeta ñueñoño tee Tumpa peguarã umanocue vae reta icove ye, <sup>53</sup> jare oē teögüeriru reta güi Jesús icove ye yave ou umanocue vae reta ipite güi. Jae reta yugüiraa Jerusalén pe jare uyecuaa jeta vae pe.

<sup>54</sup> Jare sundaro reta juvicha Jesús re uyandareco oĩ vae jare jae ndive ñugüinoi vae reta uecha yave quirã ivi ucãta jare opaete uyeyapo vae, uquiye ete jare jei:

—Añeteñoi yepe, cua cuimbae co jae Tumpa Tai.

<sup>55</sup> Jare jeta cuña reta umae ñugüinoi mbiri güi. Cua cuña reta yugüeru Jesús ndive Galilea güi uyeyocui vaerã chupe. <sup>56</sup> Cua reta ipite pe ñugüinoi María Magdalena, jare Jacobo jare José ichi María jee vae, jare Zebedeo tai reta ichi.

### José oñono Jesús jetecue teögüeriru pe

(Mr 15.42-47; Lc 23.50-56; Jn 19.38-42)

<sup>57</sup> Jare guarasi uique ma yave, penti cuimbae icocatu vae tenta guasu Arimatea pegua José jee vae - jae vi co penti Jesús jemimboe - <sup>58</sup> oo Pilato pe, jare uyerure chupe Jesús jetecue re. Jayave Pilato oyocui ñnemee vaerã

chupe Jesús jetcue. <sup>59</sup>Jayave José umbigüeyi Jesús jetcue, jare oñoma penti nieso iquia mbae vae pe. <sup>60</sup>Jayave oñono penti teögüeriru ipiau vae itape uyeyoo vae pe, (José imbae co jocua teögüeriru) jare umbiyapayere ita tuicha vae teögüeriru jonque re. Jayave José oo ye teögüeriru güi. <sup>61</sup>Jare María Magdalena jare ñru cuña María jee vae uguapi ñugüinoi teögüeriru jovai.

### Sundaro reta uyandareco teögüeriru re

<sup>62</sup>Jare jocua ara opaete judío reta uyeyapícatu ñugüinoi piareve peguardã. Jayave piareve pe sacerdote reta itenondegua reta jare fariseo reta yugüiraa Pilato pe, <sup>63</sup>jare jei chupe:

—Oreruvicha, oremandúa ma quirãi jocua cuimbae upurumbitavise vae ndei umano mbove jei mbapí ara rupi icove yeta ou umanocue vae reta ipite güi. <sup>64</sup>Iyocui ndesundaro reta uyandareco vaerã teögüeriru re mbapí ara pegua, agüiye vaerã jemimboe reta yugüiraa joco pe pítu yave oñomi vaerã jetcue. Echa'ã jucuarãi yave, jeita reta opaete vae pe icove ye ma co ou umanocue vae reta ipite güi. Jare jucuarãi yave, jae reta umbitavita jeta Jesús umbitavi vae reta güi —jei reta.

<sup>65</sup>Jayave Pilato jei chupe reta:

—Joco pe penoi chesundaro reta. Pecua pembiyandarecoca cavi jese pepuere rupi —jei.

<sup>66</sup>Jayave jae reta yugüiraa jare uyuquenda cavi teögüeriru jonque. Echa'ã oñono mbae ita tuicha vae re agüiye vaerã quía uipea, jare ueya joco pe sundaro reta uyandareco vaerã teögüeriru re.

### Jesús icove ye

(Mr 16.1-8; Lc 24.1-12; Jn 20.1-10)

**28** <sup>1</sup>Mbutuu ara uasa ma yave, neimbove asi domingo ara pe María Magdalena jare ñru cuña María jee vae yugüiraa teögüeriru coti. <sup>2</sup>Jare ivi tanta ucãta. Echa'ã penti ángel yandeYa pe uyeyocui vae ugüeyi ara güi jare umbisiri ita tuicha vae teögüeriru jonque güi. Jayave ángel uguapi oí ita re. <sup>3</sup>Jare jova uyecuaa ama uvera vae rami. Jare jemimonde tí asi roi tí asi vae rami. <sup>4</sup>Jare teögüeriru re uyandareco ñugüinoi vae reta uriri uquiye ramo, jare umano vae echa upíta reta.

<sup>5</sup>Jayave ángel jei cuña reta pe:

—Agüiye pequiye. Echa'ã aicuaa peeca peí Jesús curusu re uyecutuca vae. <sup>6</sup>Mbaeti ma cua pe oí. Icové ye ma ou umanocue vae reta ipite güi, jae jei rami. Peyu pemae jendacue re —jei—. <sup>7</sup>Jare pecua voi pere jemimboe reta pe: 'Jae icove ye ma ou umanocue vae reta ipite güi. Jae oota perenonde Galilea pe. Joco pe peechata.' Amimbeu ma co peve —jei chupe reta.

<sup>8</sup>Jayave cuña reta oé voi teögüeriru güi. Uquiye reta jare uyerovia tuicha reta. Jare osi yugüiraa umimbeu vaerã Jesús jemimboe reta pe.

<sup>9</sup>Jare Jesús uñeovãiti jae reta ndive jare jei chupe reta:



—Piyerovia catu.

Jayave cuña reta uyeatica ivi pe uicuãva ipi rupi jare umbiadora.

<sup>10</sup>Jayave Jesús jei chupe reta:

—Agüiye pequiye. Pecua pemimbeu cherivi reta pe yugüiraa vaerã Galilea pe. Joco pe cherechata —jei.

### **Sundaro reta umimbeu vae**

<sup>11</sup>Jare cuña reta yugüiraa ye rambueve teögüeriru güi, amocue sundaro tenonde yave teögüeriru re uyandareco vae reta yugüiraa vi tenta guasu pe, jare umimbeu sacerdote reta itenondegua reta pe opaete uyeyapo vae re. <sup>12</sup>Jare sacerdote reta itenondegua reta uyembati tenta guasu pegua reta itenondegua reta ndive. Jare uyemboemboe ma yave, umee jeta corepoti sundaro reta pe. <sup>13</sup>Jare jei chupe reta:

—Pere: ‘Jesús jemimboe reta yugüiraa teögüeriru pe pïtu yave, jare oñomi Jesús jetecue ore ndoque noï rambueve’ —pere, jei reta—. <sup>14</sup>Jare mburuvicha guasu cua uicuaa yave, numimbeuta chupe pe reta mbaeti co teco penoi —jei reta.

<sup>15</sup>Jayave sundaro reta uipisi corepoti jare uyapo sacerdote reta itenondegua reta jare tenta guasu pegua reta itenondegua reta jei chupe reta uyapo vaerã vae. Jare jecuaeño opaete judío reta jei jucuarãi co uyeyapo.

### **Jesús oyocui jocua once jemimboe reta** (*Mr 16.14-18; Lc 24.36-49; Jn 20.19-23*)

<sup>16</sup>Jayave jocua once Jesús jemimboe reta yugüiraa Galilea pe penti ivitu guasu re Jesús umimbeu chupe reta vae rami. <sup>17</sup>Jare jemimboe reta uecha yave Jesús, umbiadora. Èrei amocue vae ipuere!ã güirovia jae co Jesús vae. <sup>18</sup>Jare Jesús ou jei chupe reta:

—Opaete mbaepuere uñemee ma cheve ara pe jare ivi pe. <sup>19</sup>Jáeramo pecua peporomboe opaete que rupi rupi jare pembibautiza cheRu jee re jare cheree re jare Espiritu Santo jee re —jei—. <sup>20</sup>Jare pemboe reta opaete che poyocui vae re. Jare che aïta pe reta ndive jaeño mai pegua cua ara reta opa regua —jei.

# EL SANTO EVANGELIO SEGUN SAN MARCOS

---

**Juan upurumbibautiza vae umimbeu Tumpa iñee**  
(*Mt 3.1-12; Lc 3.1-20; Jn 1.19-28*)

**1** <sup>1</sup> Añave aicutía añ ñee icavi vae Jesucristo regua. Jesucristo co jae Tumpa Tai.

<sup>2</sup> Isaías co jae penti Tumpa iñee aracae umimbeu vae. Jae uicutía cuarãi: “Mase” —jei Tumpa—, “che amondota chiñee güiraa vae nderenonde, uyapícatu vaerã nderaperã.

<sup>3</sup> Jae iñeeãta reve jeita ñana pe:

‘Piyapícatu yandeYa japerã.

Pemisimi tape” —jeita, jei Tumpa.

Jucuarãi uicutía Isaías. <sup>4</sup> Jáeramo Juan ou upurumbibautiza ñana pe, jare umimbeu yatí ñügüinoi vae reta pe:

—Peeya piyemingueta icavi mbae vae pepia pe oĩ vae, jare che pumbibautizata, Tumpa umbiasa vaerã peve pembaeyoa reta —jei chupe reta. <sup>5</sup> Jare jeta ivi Judea pegua reta jare tenta guasu Jerusalén pegua reta yugüiraa Juan oĩ vae pe. Jare Juan umbibautiza reta iãca Jordán jee vae pe, imbaeyoa reta opa umimbeu yave. <sup>6</sup> Jare Juan jemimonde maemimba camello jee vae jaagüe pegua co, jare jumbicuaa guacapi pegua co. Jare jembíu co jae tucu jare ei ñana rupigua. <sup>7</sup> Jae umimbeu yatí vae reta pe:

—Cheraícue rupi outa ipuere ete chegüi vae. Jupi'ã co che chepe ayora vaerã ipípasa ichã. <sup>8</sup> Che pumbibautiza i pe, ãrei jae pembibautizata Espíritu Santo pe —jei chupe reta.

**Juan umbibautiza Jesús**  
(*Mt 3.13-17; Lc 3.21-22*)

<sup>9</sup> Jare mbovi ara rupi ou Jesús tenta guasu Nazaret ivi Galilea pegua güi. Jare Juan umbibautiza Jesús iãca Jordán pe. <sup>10</sup> Jare Jesús oẽ ye i güi

yave, uecha ara uyepea oĩ, jare uecha vi Espiritu Santo ugüeyi jese picasu rami. <sup>11</sup>Jayave uyendu ñee ara güi jei:

—Nde co jae cheRai nduau ete vae. Chembiyerovia ete —jei.

**Satanás umingueta Jesús uyavica vaerã tẽi chupe**

*(Mt 4.1-11; Lc 4.1-13)*

<sup>12</sup>Jayave Espiritu Santo omondo Jesús ñana pe. <sup>13</sup>Jare upita ñana pe cuarenta ara, jare Satanás umingueta uyavica vaerã tẽi chupe. Jare ico Jesús maemimba ñana rupigua reta ñugüinoi vae pe. Jare yugüeru ángel reta ombori vaerã.

**Jesús umbipi iparaviqui**

*(Mt 4.12-17; Lc 4.14-15)*

<sup>14</sup>Juan uyemiingueca ma peresoriru pe yave, oo Jesús Galilea pe, jare umimbeu ñee icavi vae Tumpa iporoyocuiã regua. <sup>15</sup>Jesús jei:

—Ara uvãe ma. Outa uvãe Tumpa iporoyocuiã. Peeya piyemingueta icavi mbae vae pepia pe oĩ vae, jare perovia Tumpa ñnee icavi vae —jei.

**Jesús ueni irundi cuimbae pira uipisi vae reta**

*(Mt 4.18-22; Lc 5.1-11)*

<sup>16</sup>Jare uguata rambueve i guasu Galilea jembei rupi, Jesús uecha Simón jare Simón tiví Andrés jee vae. Jae reta omombo ñugüinoi pisa i guasu pe, pira uipisi vaerã. Echa'ã jae reta pira uipisi vae reta co. <sup>17</sup>Jayave Jesús jei chupe reta:

—Peyu cherupíe, jare che chembaepuere pe pemboeta ñru vae reta güirovia vaerã cheré —jei.

<sup>18</sup>Jayave ueya reta ipisa, jare yugüiraa jae jupíe. <sup>19</sup>Ndei mbiri oo mbove, Jesús uecha Zebedeo tai reta. Penti jee Jacobo, jare tiví jee Juan. Uyapicatu ñugüinoi pisa reta chalana pe. <sup>20</sup>Jare Jesús ueni voi. Jayave jae reta ueya tu chalana pe uparaviqui chupe vae reta ndive, jare yugüiraa Jesús jupíe.

**Cuimbae ñaña oya jese vae**

*(Lc 4.31-37)*

<sup>21</sup>Jare yugüiraa uvãe tenta guasu Capernaum pe. Jare mbutuu ara pe Jesús uique judío reta itupao pe, jare joco pe oporomboc. <sup>22</sup>Jare uyapisaca jese vae reta ipiacañi iporomboc re. Echa'ã omboc reta mbaepuere güinoi vae rami. Jucuarãi'ã oporomboc mboroyocui re oporomboc vae reta.

<sup>23</sup>Jare uique oo tupao pe cuimbae ñaña oya jese vae. Jae ñneeãta reve jei:

<sup>24</sup>—¿Maera pa ndeyu oremambeco, Jesús Nazaret pegua? ¿Ndeyu pa oremicãñitei vaerã? Che nducuaa. Nde co jae Tumpa Tai —jei.

<sup>25</sup>Jayave Jesús ñneengata ñaña pe.

—¿Nequii! Esiri chugüi —jei.

<sup>26</sup>Jayave ñaña umbiriri ete jocua cuimbae, jare tanta jãse reve usiri chugüi. <sup>27</sup>Jare opaete uecha vae reta ipiacañi, jare upirandu uyupe:

—¿Mbae pa co cua uyapo vae? ¡Moromboe ipiauí vae ndipo! Mbaepuere pe oyocuí añá reta usirí vaerã oya jese vae reta güi, jare jae reta uyapo oyocuí vae —jei reta.

<sup>28</sup>Jayave imambaño jerãcua jesequa opaete Galilea rupi.

### **Jesús umbigüera Pedro jaicho**

*(Mt 8.14-15; Lc 4.38-39)*

<sup>29</sup>Jare Jesús judío reta itupao güi oẽ ye yave, oo Simón jare Andrés jenta pe Jacobo jare Juan ndive. <sup>30</sup>Simón jaicho jacu oĩ jupa pe. Jare ñru reta umimbeu Jesús pe jesequa. <sup>31</sup>Jayave Jesús oo uipisí ipo pe, jare umupã. Jare jacu upita voi chugüi. Jayave jocua cuña umee mbae jou reta vaerã.

### **Jesús umbigüera jeta imbaerasí vae reta**

*(Mt 8.16-17; Lc 4.40-41)*

<sup>32</sup>Jare guarasí uique ma yave, tenta guasu pegua reta güeru Jesús pe imbaerasí vae reta jare añá oya jese vae reta. <sup>33</sup>Jare jeta joco pegua reta uyembatí jocua tenta jonque pe. <sup>34</sup>Jayave Jesús umbigüera jeta imbaerasí vae reta ipotave mbaerasí güi, jare umbisirí jeta añá reta oya jese vae reta güi. Jare umaño'ã añá reta re uyemingueta vaerã. Echa'ã jae reta uicuaa quía co jae.

### **Jesús oo ivi Galilea rupi umimbeu Tumpa ñnee**

*(Lc 4.42-44)*

<sup>35</sup>Piareve pe Jesús upã ndei cõe mbove, jare oẽ oo quíi ngatu vae pe. Joco pe uyerure oĩ Tumpa pe. <sup>36</sup>Jayave Simón jare jae ndive ñngüinoi vae reta yugüiraa ueca. <sup>37</sup>Jare uvã chupe yave, jei reta Jesús pe:

—Ndereca ñngüinoi reta —jei reta.

<sup>38</sup>Jayave Jesús jei chupe reta:

—Yaa ñru tenta guasu-rai reta coiño ñngüinoi vae pe, joco pe vi amimbeu vaerã Tumpa ñnee. Echa'ã ayu cua ayapo vaerã —jei.

<sup>39</sup>Jare oo opaete ivi Galilea rupi, jare umimbeu Tumpa ñnee judío reta itupaopao rupi, jare umbisirí añá reta oya jese vae reta güi.

### **Jesús umbigüera cuimbae ipire ocui vae**

*(Mt 8.1-4; Lc 5.12-16)*

<sup>40</sup>Jayave ou Jesús oĩ vae pe penti cuimbae ipire ocui vae. Uyeatica Jesús jovai jare uyerure chupe:

—Ndipota yave, ndepuere chembigüera —jei chupe.

<sup>41</sup>Jesús uiparareco umaee jese, jare oñono ipo jese.

—Aipota. Ecuera —jei chupe.

<sup>42</sup>Jare jupivoiño cuimbae ucuera imbaerasí güi. Ocui'ã ma ipire. <sup>43</sup>Jare jupivoiño Jesús oyocuí ete, ndei omondo mbove:

44—Agüiye emimbeu quía pe. Ecuá iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei.

45Ërei cuimbae oo, jare umbipi umimbeu ñru vae reta pe. Jecuae umimbeu jeta vae pe. Jáeramo Jesús ipuere'ã ma oo tenta guasu reta pe joco pegua reta jovaque. Upita ñana rupi, jare yugüeru jae oï vae pe opaete que rupi rupi güi.

### Jesús umbigüera cuimbae ipuere mbae omi vae

(Mt 9.1-8; Lc 5.17-26)

**2** <sup>1</sup>Mbovi ara rupi Jesús oo ye Capernaum pe, jare jerãcua jae ime oï jenta pe. <sup>2</sup>Jayave jeta vae uyembati joco pe, jare tinee ñugüinoi o pe jare onque rupi. Jare Jesús umimbeu Tumpa ñnee chupe reta. <sup>3</sup>Jayave amocue yugüeru vae reta güeru penti cuimbae imbaerasi vae. Cua cuimbae ipuere mbae omi vae. Uyerevoica ou irundi cuimbae reta pe. <sup>4</sup>Ërei güeru vae reta ipuere'ã uruique jocua cuimbae Jesús oï vae pe, uyembiape'ã ye ñugüinoi reta ramo. Jáeramo uruyupi o iárambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve. <sup>5</sup>Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe: —Nembaeyoa reta uyembai ma, cherivi.

<sup>6</sup>Amocue mboroyocui re oporomoe vae reta uguapi ñugüinoi joco pe, jare ipia pe uyemingueta reta: <sup>7</sup>“¿Maera pa jei cuarãi cua cuimbae? Jei icavi mbae vae Tumpa coti. Tumpaño co ipuere umbiasa quía pe imbaeyoa reta.” Jucuarãi ipia pe uyemingueta reta. <sup>8</sup>Jare Jesús uicuaa voi jae reta ipiayemingueta, jare jei chupe reta:

—¿Maera pa pepia pe piyemingueta jucuarãi? <sup>9</sup>Chepuere jae cua cuimbae ipuere mbae omi vae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epüa evoi nderupa, jare eguata.’ ¿Mbae nunga pa yavai jae vaerã? — jei Jesús chupe reta—. <sup>10</sup>Ërei aipota picuaa vaerã cua: Che cuimbaerã ayeyapo vae chepuere ambiasa quía pe imbaeyoa reta cua ivi pe aï rambueve —jei.

Jayave jei cuimbae ipuere mbae omi vae pe:

<sup>11</sup>—Che jae ndeve: Epüa evoi nderupa, jare ecua nerenta pe.

<sup>12</sup>Jayave cuimbae upüa, jare ovoi jupa, jare oë voi oo opaete joco pe ñugüinoi vae reta jovaque. Opareve ipiacañi, jare umbiadora reta Tumpa. —Yaecha'ãi cua nunga —jei reta.

### Jesús ueni Leví

(Mt 9.9-13; Lc 5.27-32)

<sup>13</sup>Jayave Jesús oo ye i guasu jembei pe. Jare jeta vae reta uyembati jae oï vae pe, jare jae omboe reta. <sup>14</sup>Jare joco güi oo yave, uecha Alfeo tai Leví jee vae uguapi oï mburuvicha peguarã ocovara ñugüinoi vae pe, jare jei chupe: —Eyu cherupíe.

Jayave Leví upüa, jare oo jae jupíe.

<sup>15</sup>Jare Jesús ucaru oĩ rambueve Leví jenta pe, jeta mburuvicha peguarã ocovara vae reta jare teco icavi mbae vae uyapo vae reta ucaru vi ñugüinoi Jesús jare jemimboe reta ndive. Echa'ã jecuaeño jeta jae reta yugüiraa Jesús ndive. <sup>16</sup>Jayave mboroyocui re oporombocue vae reta jare fariseo reta uecha yave Jesús ucaru oĩ ocovara vae reta jare teco icavi mbae vae uyapo vae reta ndive, jei jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

<sup>17</sup>Jesús cua uyandu yave, jei chupe reta:

—Icove catu vae reta ueca'ã upurupiano vae. Imbaerasi vae retaño ueca. Che ayu aeca vaerã iyoa vae reta. Ayu'ã aeca vaerã jupi vae reta —jei.

### **Maera Jesús jemimboe reta uyecuacu'ã tembú güi**

*(Mt 9.14-17; Lc 5.33-39)*

<sup>18</sup>Jare Juan jemimboe reta jare fariseo jemimboe reta uyecuacu ñugüinoi tembú güi. Jayave amocue vae yugüeru, jare upirandu Jesús pe:

—¿Maera pa Juan jemimboe reta jare fariseo jemimboe reta uyecuacu tembú güi, ãrei nderemimboe reta uyecuacu'ã chugüi?

<sup>19</sup>Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembú güi, umendata vae jae reta ndive oĩ rambueve. Echa'ã umendata vae jae reta ndive oĩ rambueve, uyecuacu'ã tembú güi. <sup>20</sup>Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembú güi —jei—. <sup>21</sup>Icavi'ã yamboya vaerã temimonde indechi vae maemboyaa ipiau vae pe. Echa'ã jucuarãi yayapo yave, maemboyaa ipiau vae umiãta temimonde indechi vae, jare temimonde jeiete osoro —jei—. <sup>22</sup>Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarãi yayapo yave, vino omondoro jiru, jare vino uyepiyere, jare jiru icavi'ã ma. Jáeramo yambiru vino ipiau vae jiru ipiau vae pe —jei chupe reta.

### **Jesús jemimboe reta uipoo trigo mbutuu ara pe**

*(Mt 12.1-8; Lc 6.1-5)*

<sup>23</sup>Mbutuu ara pe Jesús oo co rupi jemimboe reta ndive. Uasa rambueve, jemimboe reta uipoo trigo. <sup>24</sup>Jayave fariseo reta jei Jesús pe:

—Mase, ¿maera pa uyapo reta agüiyeta tãi uyapo mbutuu ara pe vae?

<sup>25</sup>Jesús jei chupe reta:

—¿Pemingüeta'ã pa David uyapocue vae regua, jae jare jae ndive ñugüinoi vae reta mbaeti ma mbae güinoi yave jare iyembaï reta? —jei—.

<sup>26</sup>David uique Tumpa jo pe, sacerdote tenondegua Abiatar jee vae ico yave, jare jou mbiyape Tumpa jo pe uñeño tee vae reta. Agüiyeta tãi co quía jou jocua mbiyape, jaño sacerdote reta. Jare David umee vi jae ndive ñugüinoi vae reta pe —jei chupe reta.

27 Jayave Jesús jei chupe reta:

—Mbutuu ara uyeyapo yanembori vaerã. Yande yayeyapo'ã mbutuu ara peguarã. 28 Jáeramo che cuimbaerã ayeyapo vae chepuere jae mbae icavi uyeyapo vaerã mbutuu ara pe —jei.

### **Cuimbae ipo jovaicho tipa vae**

*(Mt 12.9-14; Lc 6.6-11)*

**3** 1 Jesús uique ye judío reta itupao pe, jare joco pe oĩ penti cuimbae ipo jovaicho tipa vae. 2 Jare joco pe ñugüinoi vae reta umae ngatu Jesús re, uecha vaerã umbigüerata ra quía mbutuu ara pe. Echa'ã jae reta uipota tẽi umbijeco Jesús. 3 Jayave Jesús jei cuimbae ipo jovaicho tipa vae pe:

—Epüa eyu iyemboi cua reta jovai.

4 Jare Jesús upirandu joco pe ñugüinoi vae reta pe:

—¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca vaerã mbutuu ara pe? ¿Mbae pa jei mboroyocui cua re? —jei chupe reta.

Ërei jae reta jei'ã mbae ave. 5 Pochi reve Jesús umae iyipi rupi ñugüinoi vae reta re, jare tuicha ipiatiti jae reta ipiatanta ramo.

—Eupi ndepo —jei cuimbae pe.

Jayave cuimbae ipo uupi, jare ucuera voi. 6 Jayave fariseo reta oẽ judío reta itupao güi, jare uyemboemboe voi herodiano reta ndive Jesús re, quirãita ra uyucaca vaerã.

### **Jeta uyembati i guasu jembei pe**

7-8 Jayave Jesús jare jemimboe reta yugüiraa i guasu pe, jare yugüiraa vi jaicue jeta Galilea güi. Jare yugüeru vi jae oĩ vae pe jeta Judea pegua reta, Jerusalén pegua reta, ivi Idumea pegua reta, Jordán jovaicho pegua reta, jare tenta guasu Tiro jare Sidón iyipi rupigua reta, uyandu yave opaete Jesús uyapo vae regua. 9 Jare Jesús oyocui jemimboe reta umicutiño chalana jae oĩ vaerã pipe, agüiye vaerã oyopi yati vae reta. 10 Echa'ã jae umbigüera ma jeta vae, jare opaete ñru imbaerasi vae reta unẽmiañamiaña yugüeru icoti. Echa'ã uipota oya jese, uyaviqui vaerã. 11 Jare aña reta uecha Jesús yave, uyeatica jae jovai jare iñeeãta reve jei:

—Nde co jae Tumpa Tai.

12 Jare Jesús oyocui ete:

—Agüiye pemimbeu quía co che.

### **Jesús uiparavo doce cuimbae reta**

*(Mt 10.1-4; Lc 6.12-16)*

13 Jayave Jesús oo ivitu guasu re, jare ueni jae uiparavo vae retaño. Jare jae reta yugüeru jae oĩ vae pe. 14 Jare jocua reta güi uiparavo doce cuimbae

reta umĩru vaerã. Jae omondota reta umimbeu vaerã Tumpa iñee. <sup>15</sup>Umeeta vi chupe reta mbaepuere umbigüera vaerã imbaerasi vae reta jare umbisiri vaerã aña reta oya jese vae reta güi. <sup>16</sup>Cua co jae uiparavo vae reta jee: Simón (Jesús umbijee Pedro), <sup>17</sup>jare Zebedeo tai reta Jacobo jare Juan jee vae (Jesús umbijee cua mocui reve Boanerges. Cua jee uipota jei: “Ara jiapu vae rami”), <sup>18</sup>jare Andrés, Felipe, Bartolomé, Mateo, Tomás, Alfeo tai Jacobo jee vae, Tadeo, Simón (jae co Zelote pe ueni vae), <sup>19</sup>jare Judas Iscariote (cua cuimbae umee Jesús jovaicho reta pe). Jayave Jesús ou ye jenta pe jae reta ndive.

### **Jei reta icavi mbae vae Espíritu Santo coti**

*(Mt 12.22-32; Lc 11.14-23; 12.10)*

<sup>20</sup>Jare uyembati ye jeta vae. Jáeramo Jesús jare jemimboe reta iquii'ã ucaru vaerã. <sup>21</sup>Jesús jentarã reta cua uicuaa yave, yugüeru güiraa vaerã tẽi. —Iyaracuaa'ã ma oĩ —jei reta.

<sup>22</sup>Jare mboroyocui re oporomboe vae yugüeru Jerusalén güi vae reta jei: —Aña guasu Beelzebú jee vae oya ma jese, jare aña guasu imbaepuere pe umbisiri aña reta oya jese vae reta güi —jei reta.

<sup>23</sup>Jayave Jesús ueni reta, jare jei chupe reta umijaanga reve: —Ndarau Satanás jaei uyembisiri cuimbae güi. <sup>24</sup>Penti tenta guasu pegua reta oyovaicho uyupii yave, opata co jocua tenta guasu. <sup>25</sup>Jae ramiño vi penti tenta pegua reta oyovaicho uyupii yave, opata co jocua tenta. <sup>26</sup>Jare Satanás pochi iyupe yave, jare imbaepuere uyembiyao yave, ndarau tẽi ma ico. Opata tẽi co —jei chupe reta—. <sup>27</sup>Ime yave quía uipota uique cuimbae ipirãta vae jenta pe upĩro vaerã imbaembae chugüi vae, uipocuata rani cuimbae ipirãta vae. Jayave ramo ipuereta upĩro imbaembae chugüi —jei—.

<sup>28</sup>Añete che jae peve, opaete ivi pegua reta imbaeyoa reta jare opaete iñee icavi mbae Tumpa coti jei reta vae Tumpa ipuere umbai. <sup>29</sup>Èrei Tumpa ndarau etei umbiasa jei icavi mbae vae Espíritu Santo coti vae pe. Uyembijecota jaeño mai pegua —jei chupe reta.

<sup>30</sup>Echa'ã tenonde yave jae reta jei:

—Aña oya ma jese.

Jáeramo Jesús jei jucuarãi chupe reta.

### **Jesús ichi jare tivi reta**

*(Mt 12.46-50; Lc 8.19-21)*

<sup>31</sup>Jayave Jesús ichi jare tivi reta yugüeru uvãe Jesús oĩ vae pe, jare oca güi omondo uenica. <sup>32</sup>Jare uguapi ñugüinoi iyipi rupi vae reta jei chupe: —¡Aipo! Ndesi jare nderivi reta oca pe ñugüinoi, jare ndereca.

<sup>33</sup>—¿Quía nunga pa co jae chesi jare cherivi reta? —jei Jesús chupe reta.

<sup>34</sup>Jayave umae iyipi rupi uguapi ñugüinoi vae reta re.

—Cua nunga reta co jae chesi jare cherivi reta —jei—. <sup>35</sup>Echa'ã Tumpa jei vae uyapo vae reta co jae cherivi jare cherindi jare chesi —jei.



### Jesús umijaanga umaeti vae

(Mt 13.1-9; Lc 8.4-8)

**4** <sup>1</sup>Jesús umbipi ye oporomboe i guasu jembei pe. Jayave jeta yugüeru uyembati jae oĩ vae pe. Jáeramo Jesús uyupi penti chalana i guasu pe oĩ vae pe, jare uguapĩ pipe. Jare yati vae reta ñugüinoi i guasu jembei pe. <sup>2</sup>Jare Jesús omboe reta jeta mbaembae re umijaanga reve. Jei chupe reta: <sup>3</sup>—Piyapisaca cheré. Penti cuimbae oo umaeti vaerã —jehi—. <sup>4</sup>Umaeti yave, umiai temiti, jare amocue oa tape rupi. Jayave yugüeru güira reta opa jou —jehi—. <sup>5</sup>Ëru temiti oa mboviño ivi itape iárambo oĩ vae pe. Cua imambae oẽ, jeta'ã ivi chupe ramo. <sup>6</sup>Ërei guarasi jasi yave, ipiru. Jare japo quipe'ã oĩ ramo, utini —jehi—. <sup>7</sup>Ëru temiti oa ñanapite pe. Ñana ucuacuaa yave, opa uyuca temiti. Jáeramo temiti ia'ã —jehi—. <sup>8</sup>Jare Ëru temiti oa ivicavi pe. Cua reta oẽ, jare ucuacuaa, jare ía. Amocue mboviño jã, jare Ëru jeta catu jã, jare Ëru jeta ete jã —jehi chupe reta. <sup>9</sup>Jayave Jesús jehi chupe reta: —Uipota uyandu vae tuyapisaca cua ñee re.

### Maera Jesús oporomboe umijaanga reve

(Mt 13.10-17; Lc 8.9-10)

<sup>10</sup>Mboviño ma upita jae ndive yave, jocua doce uiparavo vae reta jare Ëru upita vae reta upirandu Jesús pe umijaanga reve jehi vae re. <sup>11</sup>Jayave Jesús jehi chupe reta:

—Amimbeu ma peve Tumpa iporoyocua regua. Cua uyecuaa'ã Ëru vae reta pe. Jáeramo amboe Ëru vae reta amijaanga reve —jehi—. <sup>12</sup>Cua ayapo agüiye vaerã uicuaa cavi, yepe tẽ uecha, jare agüiye vaerã uicuaa, yepe tẽ uyandu, jare agüiye vaerã uyerova Tumpa coti, imbaeyoa reta uyembai vaerã —jehi.

### Umaeti vae uyemijaanga jese vae

(Mt 13.18-23; Lc 8.11-15)

<sup>13</sup>Jayave Jesús jehi chupe reta:

—¿Picuaa'ã pa mbae cua amijaanga reve jae peve vae uipota jehi vae? Picuaa'ã yave, ¿quirãita pa picuaa mbae opaete amijaanga reve jaeta peve vae uipota jehi vae? —jehi—. <sup>14</sup>Jocua umaeti vae uyemijaanga Tumpa ñee umimbeu vae re —jehi—. <sup>15</sup>Temiti tape rupi oa vae uyemijaanga amocue Tumpa ñee uyandu vae re. Ërei jupivoiño ou Satanás, jare umiacañi Tumpa ñee güi —jehi—. <sup>16</sup>Jae ramiño vi jocua temiti uñeñoti mboviño ivi itape iárambo oĩ vae pe vae uyemijaanga Ëru vae reta Tumpa ñee uyandu vae re. Jupivoiño uyerovia reta, jare uipota ete cua ñee. <sup>17</sup>Ërei cua reta jocua temiti japo quipe'ã oĩ vae rami co. Jáeramo imambae icueri reta. Mbaesusere uyeyapo chupe reta ani Ëru vae reta uyapo icavi mbae vae chupe reta Tumpa ñee uicuaa ramo. Jare jupivoiño uipota'ã ma uyapisaca reta Tumpa ñee re —jehi—. <sup>18</sup>Jae ramiño vi jocua temiti uñeñoti ñanapite

pe vae uyemijaanga ñru vae reta Tumpa ñnee uyandu vae re. <sup>19</sup>Ñerei jae reta umbipi uyemipia'ã ivi pe mbaembae uyeyapo vae re, jare uyembitavi, uipota icocatu ramo. Uipota vi güinoi jeta mbaembae. Jare opaete cua umiacañi reta Tumpa ñnee güi. Jáeramo jae reta jocua temiti ia'ã vae rami co —jei—. <sup>20</sup>Ñerei jocua temiti uñeñoti ivicavi pe vae uyemijaanga ñru vae reta Tumpa ñnee uyandu vae re. Cua reta güirovia. Amocue vae jocua temiti mboviño jái vae rami co. Ñru vae reta jocua temiti jeta catu jái vae rami co. Jare ñru vae reta jocua temiti jeta ete jái vae rami co —jei.

### Uñeñomi vae uyeechacañotai co

(Lc 8.16-18)

<sup>21</sup>Jayave Jesús jei chupe reta:

—Mechero yaruique yave o pe, ndarau ñañono yapepo uyembovapo oĩ vae igüi pe, ani güirapembi igüi pe. Ñañono co mechero jenda pe —jei—. <sup>22</sup>Ime yave mbae uñeñomi vae, uyeechacañotai co. Jae ramiño vi ime yave mbae uyeyasoí vae, uyecuaañotai co —jei—. <sup>23</sup>Uipota uyandu vae tuyapisaca cua ñee re —jei Jesús.

<sup>24</sup>Jare jei chupe reta:

—Pepia pe piyemingueta cavi piyandu vae re. Tumpa umiaangata umee peve pemiaanga pemee ñru vae reta pe rami, jare umiiruta vi peve —jei—. <sup>25</sup>Echa'ã güinoi vae pe uñemiruta, jare mbaeti güinoi vae güi mbovi ete güinoi vae uyeequita —jei.

### Jesús umijaanga temiti ucuacuaa vae

<sup>26</sup>Jare Jesús jei chupe reta:

—Tumpa iporoyocua penti cuimbae oo umaeti vae rami co —jei—. <sup>27</sup>Cuimbae oque pĩtu yave, jare upũa cõe yave. Temiti oẽ jare ucuacuaa, jare umaeti vae uicuaa'ã quirai ra ucuacuaa vae. <sup>28</sup>Echa'ã temiti ucuacuaa yambori mbae reve, tenonde ii, jayave avatiqui, joco güi avati —jei—. <sup>29</sup>Jare yagüiye ma yave, iya uaviro. Echa'ã uvãe ma ara uaviro vaerã —jei chupe reta.

### Jesús umijaanga mostaza jãicue

(Mt 13.31-32; Lc 13.18-19)

<sup>30</sup>Jare Jesús jei:

—¿Mbae ra ipuere uyemijaanga Tumpa iporoyocua re? ¿Mbae ra yamijaangata jese? —jei—. <sup>31</sup>Yandepuere yamijaanga jese penti mostaza jãicue —jei—. Uñeñoti yave, cua jãicue michi-rai ete opaete ñru temiti reta jãicue ivi pe oĩ vae güi. <sup>32</sup>Ñerei uñeñoti yave, ucuacuaa, jare tuicha ete opaete ñru temiti penti año peguaño ucuacuaa vae reta güi, jare tuicha jãca uyeyapo. Jáeramo güira reta ipuere uyapo jaitirã jese guarasã pe —jei chupe reta.

**Maera Jesús umijaanga mbaembae**

(Mt 13.34-35)

<sup>33</sup>Jeta cuarãi Jesús umimbeu Tumpa ñnee chupe reta umijaanga reve, jare reta ipuere uicuaa rupiño. <sup>34</sup>Jare jecuaeño imiari chupe reta umijaanga reve. Ërei jemimboe reta peño uicuaaca cavi mbae uipota jei vae.

**Jesús umiquĩi i guasu**

(Mt 8.23-27; Lc 8.22-25)

<sup>35</sup>Jocua ara guarasi uique ma yave, Jesús jei jemimboe reta pe:

—Yaa i guasu jovaicho pe —jei.

<sup>36</sup>Jayave jae reta ueya yati vae reta, jare güiraa Jesús jocua chalana oĩ pipe vae pe. Jare ñru vae reta yugüiraa vi ambie chalana reta pipe. <sup>37</sup>Jare ou ivitu tanta uyepeyu, jare i uyembiaparoaroa uique chalana pe, jare umitinee seri ma. <sup>38</sup>Jare Jesús uñemiãcanita chalana iyapi pe, jare oque oĩ. Jayave jae reta omomba jare jei chupe:

—¡Oporomboe vae! ¿Ndepiã'ã pa opata ma ñamano?

<sup>39</sup>Jayave Jesús upña, jare uñeengata ivitu pe.

—¡Epita! ¡Nequĩi! —jei i guasu pe.

Jare ivitu javoi upña, jare opaete quĩi ngatu. <sup>40</sup>Jayave Jesús upirandu chupe reta:

—¿Maera pa pequiye? ¿Ndeño pa pepurugüirovia? —jei.

<sup>41</sup>Jare uquiye ete reta, jare jei uyupe:

—¿Mbae nunga cuimbae pa cua? Ivitu jare i guasu uyapo jae oyocui vae —jei reta.

**Gadara pegua ñña oya jese vae**

(Mt 8.28-34; Lc 8.26-39)

**5** <sup>1</sup>Jayave yugüiraa uvãe i guasu jovaicho pe, gadareno reta iivi pe. <sup>2</sup>Jesús ugüeyi chalana güi rupive, ou oovãiti teögüerirurenda güi penti cuimbae ñña oya jese vae. <sup>3</sup>Jae ico teögüerirurenda rupi, jare ipuere'ã ma quía uñapĩti, yepe tẽi uñapĩti cadena pe. <sup>4</sup>Jeta vese ma jae reta uipocua tẽi ipo jare ipi cadena pe. Ërei jae opa omondoo cadena reta. Jare ipuere'ã quía jese. <sup>5</sup>Jare jecuaeño pĩtu rupi jare ara rupi oĩ teögüerirurenda rupi jare ivitu guasu rupi, jare jecuae usapicai jare uyembipere ita pe. <sup>6</sup>Cua cuimbae uecha yave Jesús mbiri güi, osi ou icoti jare uyeatica jovai. <sup>7</sup>Jare ñneeãta reve jei:

—¿Maera pa ndeyu chemambeco, Jesús? Nde co jae Tumpa ara pe oĩ vae Tai. Ayerure ndeve Tumpa jee re agüiye iporaraca cheve —jei.

<sup>8</sup>Echa'ã Jesús jei ñña pe:

—Esiri cua cuimbae güi, ñña.

<sup>9</sup>Jayave Jesús upirandu chupe:

—¿Mbae pa nderee?

—Cheree co jae jeta vae. Echa'ã jeta vae co ore —jei chupe.

<sup>10</sup>Jare aña reta uyerure Jesús pe agüiye vaerã umbisiri reta jocua ivi güi. <sup>11</sup>Jare joco pe jeta cuchi reta ucaru ñugüinoi coïño ivitu guasu güi.

<sup>12</sup>Jayave aña reta uyerure Jesús pe:

—Oremondo pea cuchi reta coti. Emaeño oreré ndoya vaerã jese reta —jei reta.

<sup>13</sup>Jayave Jesús umaeño jese reta. Jare aña reta usiri cuimbae güi, jare oya cuchi reta re. Jayave cuchi reta tanta osi ivia rupi oa i guasu pe, jare joco pe opa ipitupa reta. Cuchi reta uyepapa dos mil rupi.

<sup>14</sup>Jayave cuchi iyandarecoa reta opa osi, jare umimbeu tenta guasu pegua reta pe jare jocoropi ñugüinoi vae reta pe cua uyeyapo vae regua. Jare uyandu vae reta yugüeru, uecha vaerã mbae uyeyapo vae. <sup>15</sup>Jare yugüeru uvãe yave Jesús oï vae pe, uecha cuimbae aña oyase jese vae uguapi oï joco pe. Uecha uyemonde ma jare iyaracuaaño ma oï. Jae co tenonde yave jeta aña reta oyase jese vae. Jare opaete yugüeru vae reta uquiye. <sup>16</sup>Jare jocua tenonde yave uecha vae reta umimbeu ñru reta pe quirã uyeyapo cuimbae aña oyase jese vae pe jare cuchi reta pe. <sup>17</sup>Jayave yatí vae reta umiñera Jesús oo ye vaerã jae reta iivi güi. <sup>18</sup>Jare Jesús uyupi ye ma oï yave chalana pe, jocua cuimbae aña reta oyase jese vae uyerure chupe:

—Emaeño cheré aa vaerã nderupíe —jei.

<sup>19</sup>Ërei Jesús umaeño'ã jese.

—Eua nerenta pe emimbeu nerentarã reta pe mbae icavi vae ndeYa uyapo ndeve vae, jare quirã ndeparareco vae —jei chupe.

<sup>20</sup>Jayave cuimbae oo, jare umbipi umimbeu ivi Decápolis jee vae rupi mbae icavi vae Jesús uyapo chupe vae. Jare opaete ipiacañi jese.

### Jairo tayi jare cuña Jesús jemimonde uyaviqui vae

(Mt 9.18-26; Lc 8.40-56)

<sup>21</sup>Jesús oo uvãe yave i guasu jovaicho coti chalana pipe, yugüeru jeta vae reta jae oï vae pe. Jare Jesús upita i guasu jembei pe. <sup>22</sup>Jayave ou penti cuimbae Jairo jee vae. Jae co judío reta itupao re uyandareco vae. Uecha yave Jesús, uyeatica jovai. <sup>23</sup>Jare uyerure chupe:

—Cherayi umanota ma oï —jei—. Yaa iñono ndepo jese embigüera, agüiye vaerã umano —jei chupe.

<sup>24</sup>Jayave Jesús oo voi jupíe. Jare jeta yuguiraa Jesús jupíe, jare oyopi reta. <sup>25</sup>Jare jae reta ipite pe oo penti cuña doce año ma uiporara tugüiguasu vae. <sup>26</sup>Jare uiporara ma jeta upurupiano vae reta uipiano tēi reve, jare opaete ma icorepoti umee iyugüi upurupiano vae reta pe. Ërei ucuera'ã. Jeseve jeieteño ma imbaerasi. <sup>27</sup>Jae uyandu Jesús regua yave, oya Jesús re icupe coti jeta vae reta ipite rupi, jare uyaviqui jemimonde.

<sup>28</sup>—Yepe tēi jemimondeño tayaviqui, acuerata co —jei.

<sup>29</sup>Jare jupivoiño jugüiguasu upita chugüi, jare uyandu jete ucuera ma imbaerasi güi. <sup>30</sup>Jayave Jesús uicuaa umbigüera ma co quía imbaepuere pe. Jáeramo uyerova umae jeta vae re, jare upirandu:

—¿Quía pa cheremimonde uyaviqui?

<sup>31</sup>Jayave jemimboe reta jei chupe:

—Ndeecha co cua jeta vae reta ndeopi ñugüinoi. ¿Maera pa ndepirandu: ‘Quía pa cheremimonde uyaviqui?’ —jei reta chupe.

<sup>32</sup>Ërei Jesús umae iyipi rupi, uecha vaerã quía ra jucuarãi uyapo. <sup>33</sup>Cuña uicuaa uyeyapo ma chupe vae, jare ou icoti. Uquiye güi uriri, jare uyeatica Jesús jovai, jare umimbeu chupe opaete uyeyapo ma vae. <sup>34</sup>Jayave Jesús jei chupe:

—Ndecuera ma, cherindi, nderovia cheré ramo. Ecu ndepiacatu reve. Ndecuera ma co nembraerasi güi —jei.

<sup>35</sup>Jare Jesús uyemingueta oĩ rambueve, yugüeru uvãe amocue vae tupao re uyandareco vae jenta güi. Jare jei reta Jairo pe:

—Nderayi umano ma. Agüiye ma emambeco oporombocue vae —jei reta chupe.

<sup>36</sup>Ërei Jesús cua uyandu yave, jei tupao re uyandareco vae pe:

—Agüiye ndepiatiti. Epurugüiroviaño —jei.

<sup>37</sup>Jare umaño'ã ñru reta re yugüiraa vaerã jae ndive, jaeño Pedro, Jacobo jare Juan. Juan co jae Jacobo tivi. <sup>38</sup>Yugüiraa uvãe yave tupao re uyandareco vae jenta pe, Jesús uecha jeta vae reta icorai jare uyao ñugüinoi reta jãse reve. <sup>39</sup>Jesús uique yave o pe, jei chupe reta:

—¿Maera pa picorai jare piyao? Cua cuñatai umano'ã co. Oqueño co oĩ —jei.

<sup>40</sup>Ërei jae reta oyoyai. Jayave Jesús omoë opaete vae oca pe, jare uruique cuñatai oĩ vae pe cuñatai tu jare ichi, jare jemimboe jae ndive yugüiraa vae reta. <sup>41</sup>Jayave Jesús uipisi cuñatai ipo pe.

—Talita cumi —jei chupe. (Cua uipota jei: “Cuñatai, che jae ndeve, epüa”.)

<sup>42</sup>Jayave cuñatai upüa jare umbipi uguata. Cua cuñatai doce año ma güinoi. Jare Jesús ndive ñugüinoi vae reta ipiacañi ete. <sup>43</sup>Jayave Jesús oyocui ete reta agüiye vaerã umimbeu quía pe ave, jare oyocui vi umingararu vaerã cuñatai.

### Jesús Nazaret pe

(Mt 13.53-58; Lc 4.16-30)

**6** <sup>1</sup>Jesús oo joco güi iivi pe, jare jemimboe reta yugüiraa jupíe.

<sup>2</sup>Jayave mbutuu ara pe Jesús umbipi oporombocue judío reta itupao pe. Jare jeta vae uyapisaca jese, jare ipiacañi reta. Jei reta uyupe:

—¿Quiape ra uyemboe cua cuimbae opaete cua re? ¿Mbae nunga aracuaa ra unemee chupe? ¿Mbae nunga miacañi ra cua uyapo ipo pe vae? —jei reta—. <sup>3</sup>Cua co jae carpintero. Jae co María imembi. Jae co Jacobo, José, Judas jare Simón tiquei. Jare jindi reta yugüireco vi yandepite pe —jei reta.

Jáeramo jae reta pochi Jesús pe. <sup>4</sup>Jayave Jesús jei chupe reta:

—Opaete vae uipiu penti Tumpa iñee umimbeu vae. Jaeño jentaigua reta, jentarã reta jare jenta pegua reta uipiu'ã reta —jei.

<sup>5</sup>Jare joco pe ipuere'ã uyapo jeta miacañi. Jaeño oñono ipo mbovi imbaerasi vae reta re umbigüera vaerã. <sup>6</sup>Jare Jesús ipiacañi jese reta, güirovia'ã jese ramo. Jayave Jesús oo oporomboe ñru tenta guasu-rai jocoropi ñngüinoi vae reta rupi.

### **Jesús omondo jocua doce jemimboe reta**

*(Mt 10.5-15; Lc 9.1-6)*

<sup>7</sup>Penti ara Jesús umbati jocua doce jemimboe reta, jare omondo mocui mocui rupi, jare umee chupe reta mbaepuere umbisiri vaerã aña reta oya jese vae reta güi. <sup>8</sup>Jare oyocui:

—Peo yave, agüiye mbae peraa, jaeño pepopoca. Agüiye peraa peurupucu, peremiurã jare corepoti —jei chupe reta—. <sup>9</sup>Pemonde pepipasa, jare agüiye peraa mocui camisa —jei.

<sup>10</sup>Jare jei vi chupe reta:

—Peo pevãe yave penti tenta pe, joco pe peĩ, jocua tenta guasu güi peo ye regua —jei—. <sup>11</sup>Jare ime yave penti tenta guasu pegua reta uipota'ã pepita vaerã joco pe jare uipota'ã uyapisaca peré vae, pecuaño joco güi, jare pemitimo ivicuii pepi güi, uicuaa vaerã jae reta co teco güinoi —jei—. Añete che jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei.

<sup>12</sup>Jayave jae reta yugüiraa, jare umimbeu ñru vae reta pe:

—Peeya piyemingueta icavi mbae vae pepia pe oĩ vae.

<sup>13</sup>Jare jae reta umbisiri jeta aña reta oya jese vae reta güi, jare jeta imbaerasi vae reta re oñono aceite umbigüera vaerã.

### **Juan imano**

*(Mt 14.1-12; Lc 9.7-9)*

<sup>14</sup>Opaete vae uyandu ma Jesús regua. Mburuvicha guasu Herodes jee vae uyandu vi. Jae jei:

—Juan upurumbibautizase vae icove ye ma ou umanocue vae reta ipite güi. Jáeramo uyapo cua miacañi reta —jei.

<sup>15</sup>Ñru vae reta jei:

—Jae co Elías.

Jare ñru vae reta jei:

—Jae co penti Tumpa ñnee umimbeu vae Tumpa ñnee aracae umimbeu vae rami.

<sup>16</sup>Èrei Herodes uyandu yave, jei:

—Jae co Juan añãcasiaca vae. Icove ye ma ou umanocue vae reta ipite güi —jei.

<sup>17</sup>Echa'ã ndei Juan umano mbove, Herodes umenda Felipe jembireco Herodías jee vae ndive. Felipe co jae Herodes tiví. Jayave Herodes omondo uipisica Juan, jare oñonoca peresoriru pe, Herodías jei ramo. <sup>18</sup>Echa'ã tenonde yave Juan jei Herodes pe: “Icavi'ã nemenda vaerã nderivi jembireco ndive.”

<sup>19</sup>Jáeramo Herodías pochì Juan pe, jare uipota tēi uyucaca, ãrei ipuere'ã. <sup>20</sup>Echa'ã Herodes uicuaa Juan co jae cuimbae jupi vae. Jáeramo uipiù, jare umaño'ã quía re uyapo vaerã icavi mbae vae chupe. Jare uyandu yave Juan jei vae, uyemipia'ã tuicha. Ërei jecuaño uipota uyapisaca jese. <sup>21</sup>Ërei uvã ara Herodías uyapo vaerã icavi mbae vae Juan pe. Jocua ara Herodes uyembiara oa vae regua, jare umbatica ïru mburuvicha reta, sundaro reta juvicha reta, jare icocatu vae reta Galilea pegua, umingaru vaerã. <sup>22</sup>Jare Herodías imembi cuña uique upirae yave, umbiyerovia Herodes jare jae ndive ucaru ñugüinoi vae reta. Jayave Herodes jei cuñatai pe:

—Eeca cheve mbae ndipota vae, jare che ameeta ndeve —jei.

<sup>23</sup>Jare jei ye chupe Tumpa jee re:

—Ipotave mbae ndeeca cheve vae ameeta co ndeve, cheivi mbite rupi yepe.

<sup>24</sup>Jayave cuñatai oẽ oo upirandu ichi pe:

—¿Mbae pa aecata chupe?

—Eeca chupe Juan upurumbibautizase vae iñãca —jei ichi chupe.

<sup>25</sup>Jayave imambaeño cuñatai uique ye mburuvicha guasu oĩ vae pe.

—Aipota neme vae vaerã cheve añave voi Juan upurumbibautizase vae iñãca penti plato pe —jei chupe.

<sup>26</sup>Jayave mburuvicha guasu ipiatiti tuicha. Ërei Tumpa jee re jei chupe ramo, jare ïru vae reta uyandu ramo, uipota'ã uicuacu iñee. <sup>27</sup>Jáeramo omondo sundaro Juan iñãca güeru vaerã. <sup>28</sup>Jayave oo sundaro peresoriru pe unãcasia Juan. Jare güeru iñãcacue penti plato pe, jare umee cuñatai pe. Jayave jae umee ichi pe. <sup>29</sup>Jare Juan jemimboe reta cua uicuaa yave, yugüeru güiraa jetecue oñoti vaerã.

### **Jesús umingaru cinco mil cuimbae reta**

*(Mt 14.13-21; Lc 9.10-17; Jn 6.1-14)*

<sup>30</sup>Jesús jemimondo reta uyembati ye yave jae ndive, umimbeu reta chupe opaete uyapo vae jare oporomoe jese vae. <sup>31</sup>Jayave Jesús jei chupe reta:

—Pe retaño peyu yaa quíi ngatu vae pe, peputuu vaerã michi pegua —jei.

Echa'ã jecuaecuae jeta vae yugüeru opou ipi. Jáeramo Jesús jare jemimboe reta iquíil'ã ucaru vaerã. <sup>32</sup>Jayave jae retaño yugüiraa chalana pe quíi ngatu vae pe. <sup>33</sup>Ërei jeta vae reta uecha yugüiraa, jare uicuaa quía co jae vae. Jare yugüiraa ivi rupiño tenta guasu reta güi Jesús oo vae pe, jare yugüiraa uvã ndei Jesús oo uvã mbove, jare uyembati joco pe. <sup>34</sup>Jesús ugüeyi yave chalana güi, uecha jeta vae, jare uiparareco reta. Echa'ã jae reta ovecha mbaeti iyandarecoa güinoi vae reta rami co. Jare umbipi omboe reta jeta mbaembae re.

<sup>35</sup>Caaru ma yave, Jesús jemimboe reta yugüeru jei chupe:

—Mbaeti quiave ico cua rupi, jare caaru ma oĩ. <sup>36</sup>Emondo cua reta ogua vaerã jembiurã tenta tenta rupi. Echa'ã mbaeti mbae jou reta vaerã cua pe —jei reta.

37 Ërei Jesús jei chupe reta:

—Pe reta pemee tucaru.

—¿Ndoota pa ndogua doscientos ara mbaraviquí jepi pegua mbiyape, numee jou reta vaerã? —jei reta chupe.

38 Jesús jei chupe reta:

—¿Mbovi pa mbiyape ime penoi? Pecua peeca —jei.

Jae reta uicuaa ma yave, umimbeu Jesús pe:

—Ime nonoi pandepo mbiyape jare mocui pira —jei reta.

39 Jayave Jesús oyocui opaete vae uyembatimbati vaerã uguapi capiichape re. 40 Jayave uyembatimbati reta uguapi cien rupi jare cincuenta rupi. 41 Jayave Jesús upisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerã yati yati ñugüinoi vae reta pe. Jesús upisãa vi jocua mocui pira, uñemee vaerã opaete vae pe. 42 Opareve ucaru, jare iyangapii reta. 43 Jayave Jesús jemimboe reta umbati tembú uñepisãacue jembire vae, jare umitinee doce canasta. 44 Jare ucaru vae reta güi cuimbae retaño uyepapa cinco mil.

### **Jesús uguata i iárambo**

*(Mt 14.22-27; Jn 6.16-21)*

45 Jare jupivoiño Jesús oyocui jemimboe reta uyupi vaerã chalana pe, jare yugüüraa vaerã jenonde i guasu jovaicho pe tenta guasu Betsaida pe, jae omondo rambueve uyembati vae reta. 46 Jare opa omondo yave, Jesús uyupi ivitu guasu re uyerure vaerã Tumpa pe. 47 Pítu ma yave, jemimboe reta yugüüraa chalana pe i guasu mbíte rupi, jare Jesús jaeño upita ivi pe. 48 Jare Jesús uecha tanta ma uparaviquí reta, uruguata vaerã chalana. Echa'ã ivitu tanta oovãiti. Jare cõeta ma yave, Jesús uguata oo i iárambo rupi güüraa uepiti. Jare uasata tõi chugüi reta. 49 Jae reta uecha yave uguata oo i iárambo rupi, ipia pe uyemingueta tõi uecha mbae iãcue, jare usapicai reta. 50 Echa'ã opaete jae reta uecha, jare uquiye ete reta. Ërei jupivoiño Jesús ombou iñee chupe reta: —Piñemiatangātu. Che co. Agüiye pequiye —jei.

51 Jayave Jesús ou uyupi chalana pe, jare upita ivitu. Jare jae reta ipiacañi. 52 Echa'ã jocua miacañi mbiyape regua uyapo yave, Jesús uipota tõi jae reta uicuaa cavi vaerã. Ërei ndeiño uicuaa. Echa'ã jecuaeño ipiatanta.

### **Jesús umbigüera Genesaret pegua imbaerasi vae reta**

*(Mt 14.34-36)*

53-54 ñ guasu uasa reta yave, yugüüraa uvãe ivi Genesaret pe. Jare ugüeyi reta yave chalana güi i guasu jembei pe, jupivoiño joco pegua reta uicuaa jae co Jesús vae. 55 Jare yugüüraa opaete jocua ivi rupi, jare umbipi güeru imbaerasi vae reta jupa reve Jesús oĩ vae pe. Ìru vae reta umimbeu chupe reta quiape oĩ vae. 56 Jare Jesús oo tenta guasu-rai reta rupi, jare tenta guasu reta rupi, jare tenta ñana rupi ñugüinoi vae reta pe. Jare oo vae rupi joco pegua reta güeru oñono imbaerasi



vae reta tape rupi, jare uyerure Jesús pe umaño imbaerasi vae reta uyaviqui vaerã jemimonde jembei yepe. Jare opaete uyaviqui vae reta ucuera.

**Yandepia umingüia vae**  
(Mt 15.1-20)

**7** <sup>1</sup>Fariseo reta jare amocue mboroyocui re oporomböe vae Jerusalén güi yugüeru vae reta uyembati Jesús oĩ vae pe. <sup>2</sup>Jae reta uecha amocue Jesús jemimboe reta ucaru ñugüinoi uyepoe mbae reve. Echa'ã jae reta uyapo ve'ã ma itenondegua reta iporomböe. Jáeramo umbijeco reta. <sup>3</sup>Echa'ã fariseo reta jare opaete judío reta uyepoñoi ndei ucaru mbove, uyapo vaerã itenondegua reta iporomböe. <sup>4</sup>Jare yugüeru ye yave umaeme vae reta ñugüinoi vae güi, jecuaño uyepoe ndei ucaru mbove. Jare uyapoñoi reta jeta ñru mbaembae itenondegua reta iporomböe. Echa'ã oyoe vaso reta, yapepo reta, paila reta jare tupa reta. <sup>5</sup>Jayave fariseo reta jare mboroyocui re oporomböe vae reta upirandu Jesús pe:  
—¿Maera pa nderemimboe reta uyapo'ã yandetenondegua reta iporomböe? ¿Maera pa ucaru reta uyepoe mbae reve? —jei reta.

<sup>6</sup>Jayave Jesús jei chupe reta:

—Añete yepe Isaías imiari peré. Echa'ã jae uicuatía upurumbitavi vae reta re cuarãi:

‘Cua reta chepiu iyuru peño’ —jei Tumpa—.

‘Èrei ipia pe chepiu'ã etei.

<sup>7</sup>Chemiadora-raangaiño.

Che jucuarãi'ã aporoyocui’ —jei Tumpa.

Jucuarãi uicuatía Isaías —jei Jesús—. <sup>8</sup>Echa'ã pe reta piyapo'ã Tumpa iporoyocui, èrei piyapo cavi yandetenondegua reta iporomböe. Piyoe yapepo reta jare vaso reta, jare jeta cua nunga piyapo —jei.

<sup>9</sup>Jare Jesús jei chupe reta:

—Tumpa iporoyocui pemombo co, piyapo vaerã yandetenondegua reta iporoyocui. <sup>10</sup>Moisés jei cuarãi: ‘Ipiu nderu jare ndesi.’ Jare jei vi cuarãi: ‘Jei icavi mbae vae tu ani ichi coti vae uyeyucacata co.’ Jucuarãi jei Moisés —jei chupe reta—. <sup>11</sup>Èrei pe reta pere cuarãi: ‘Penti cuimbae ipuere jei tu ani ichi pe umeeta tõi chupe ombori vaerã vae Corbán co.’ Jucuarãi pere —jei—. (Corbán uipota jei: “Ame ma Tumpa pe”). <sup>12</sup>Jayave pe reta pemaño'ã ma jese ombori vaerã tu jare ichi —jei—. <sup>13</sup>Jare jeta cua nunga piyapo. Jucuarãi pe reta pemombo Tumpa iporoyocui piyugüi piyapo vaerã yandetenondegua reta iporoyocui. Jare pemboe vi pesambiai reta uyapo vaerã yandetenondegua reta iporoyocui —jei Jesús chupe reta.

<sup>14</sup>Jare Jesús ueni umbati opaete joco pe ñugüinoi vae reta.

—Piyapisaca cua re opaete pe reta, picuaa cavi vaerã —jei chupe reta—. <sup>15</sup>Ipotave mbae peu vae oo perie pe. Jáeramo umingüia'ã pepia. Jocua piyapo vae jare pere vae umingüia pepia —jei—. <sup>16</sup>Uipota uyandu vae tuyapisaca cua ñee re —jei chupe reta.

<sup>17</sup>Jare Jesús ueya yati vae reta yave, uique jo pe. Jayave jemimboe reta upirandu chupe umijaanga reve jei vae re. <sup>18</sup>Jayave Jesús jei chupe reta:

—¿Pe retave pa picuaa cavi'ã? Picuaa cavi cua: Ipotave mbae peu vae umingüia'ã pepia. <sup>19</sup>Echa'ã oo'ã pepia pe. Oo perie pe jare pemombo. Jucuarãi uyeyapo opaete tembú pe —jei chupe reta.

<sup>20</sup>Jare Jesús jei:

—Jocua piyapo vae jare pere vae umingüia pepia. <sup>21</sup>Echa'ã pepia güi oẽ opaete icavi mbae vae: pepia pe piyemingueta icavi mbae vae, piyuvanga menda re, piyapo aguasa, pepuruyuca, <sup>22</sup>pemonda, pipota ñru vae reta imbaembae, piyapo icavi mbae vae, pepurumbitavi, pembiquere, peacataã, icavi mbae vae pere perapicha coti, piyembicate jare pico iyaracuaa mbae vae reta rami —jei—. <sup>23</sup>Opaete cua icavi mbae vae oẽ pepia güi. Jare cua reta umingüia pepia —jei chupe reta.

### **Cuña sirofenicia pegua ipurugüirovia** (Mt 15.21-28)

<sup>24</sup>Jayave Jesús oo ye joco güi Tiro jare Sidón iyipi rupi. Jare uique yave penti tenta pe, uipota'ã tẽi quiave uicuaa vaerã jae joco pe oĩ vae. Ërei uicuaañoi joco pegua reta. <sup>25</sup>Jare penti cuña aña oya imembi cuña re vae uyandu Jesús regua, jare ou uyeatica jae jovai. <sup>26</sup>Jae co penti sirofenicia griega pe uyemingueta vae. Jae uyerure Jesús pe umbisiri vaerã aña imembi güi. <sup>27</sup>Ërei Jesús jei chupe:

—Tiangapii rani sambiaï reta. Icavi'ã yaequi vaerã tembú sambiaï reta güi, ñamee vaerã yimba-rai reta pe —jei.

<sup>28</sup>—Añete tẽi co, carai —jei cuña Jesús pe—. Ërei yimba-rai mesa igüi pe ñugüinoi vae reta jou tembú usururucue sambiaï reta uiti vae —jei.

<sup>29</sup>Jayave Jesús jei chupe:

—Cua ndere vae jeco pegua ndepuere ndeo. Aña usiri ma nemembi güi —jei.

<sup>30</sup>Jayave cuña oo uvãe jenta pe yave, uecha imembi jupa pe oĩ. Aña usiri ma chugüi.

### **Jesús umbigüera cuimbae iupaupa jare iyapisa mbae vae**

<sup>31</sup>Jayave Jesús ou Tiro iyipi rupigua güi, jare uasa Sidón jare Decápolis rupi, jare ou uvãe i guasu Galilea pe oĩ vae pe. <sup>32</sup>Jare amocue vae güeru chupe penti cuimbae iupaupa jare iyapisa mbae vae. Güeru vae reta uyerure Jesús pe oñono vaerã ipo jese. <sup>33</sup>Jayave Jesús güiraa cuimbae yati vae reta ipite güi. Oñono ipoãca cuimbae iyapisa pe. Jayave undivi, jare uyaviqui cuimbae icü chugüi. <sup>34</sup>Jayave umae ara coti, jare iañeequi, jare jei:

—¡Efata! (Cua uipota jei: “¡Iyepea!”)

<sup>35</sup>Jayave cuimbae uyandu ma, jare icü omi cavi, jare uyemingueta cavi ma.

<sup>36</sup>Jayave Jesús oyocui reta agüiye vaerã umimbeu quía pe. Ërei yepe tẽi oyocui ye ye, jeseve jae reta umimbeuñoi ñru vae reta pe. <sup>37</sup>Jae reta ipiacañi ete, jare jei:

—Opaete mbaembae uyapo vae icavi ete co. Umbigüera iyapisa mbae vae reta uyandu vaerã, jare umbigüera vi upa reta uyemingueta vaerã.

### Cuatro mil ucaru vae reta

(Mt 15.32-39)

**8** <sup>1</sup>Penti ara jeta uyembati yave, mbaeti ma mbae güinoi reta jou vaerã. Jayave Jesús ueni jemimboe reta.

<sup>2</sup>—Aiparareco cua yati vae reta —jei—. Echa'ã mbapi ara ma ñugüinoi che ndive, jare mbaeti ma mbae güinoi jou vaerã —jei jemimboe reta pe—. <sup>3</sup>Amondo yave jenta coti ucaru mbae reve, ipituta co reta tape rupi. Echa'ã amocue yugüeru mbiri güi —jei chupe reta.

<sup>4</sup>—¿Quirãita pa yandepuere ñamee mbiyape chupe reta cua mbaeti quiave ico vae pe? —jei jemimboe reta Jesús pe.

<sup>5</sup>Jayave Jesús upirandu chupe reta:

—¿Mbovi pa mbiyape penoi?

—Ime nonoi siete —jei reta chupe.

<sup>6</sup>Jayave Jesús oyocui yati vae reta uguapi vaerã ivi pe. Jayave uipisi jocua siete mbiyape, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerã yati vae reta pe. Jayave jucuarãi uyapo reta. <sup>7</sup>Jare güinoi vi mbovi pira michi vae reta. Cua re vi Jesús umee yasurupai Tumpa pe, jare jei jemimboe reta pe cua vi umee vaerã yati vae reta pe. <sup>8</sup>Opareve ucaru, jare iyangapii reta. Jayave Jesús jemimboe reta umbati tembü üñepisãacue jembire vae, jare umitinee siete canasta. <sup>9</sup>Jare joco pe ñugüinoi vae reta uyepapa cuatro mil rupi. Jayave Jesús omondo ye yati vae reta. <sup>10</sup>Jayave jae jare jemimboe reta uyupi chalana pe, jare yugüüraa ivi Dalmanuta jee vae pe.

### Fariseo reta uipota uecha miacañi

(Mt 16.1-4; Lc 11.29; 12.54-56)

<sup>11</sup>Jayave yugüeru fariseo reta, jare umbipi uyeaca Jesús ndive.

—Echaca oreve miacañi ara güi —jei reta chupe.

Jae reta uipota uicuaa uyapota ra miacañi chupe reta. <sup>12</sup>Jayave Jesús iañeequi.

—¿Maera pa añave yugüireco vae reta uipota aechaca vaerã chupe reta miacañi? —jei—. Añete che jae peve, ndarau uyeechaca miacañi cua reta pe —jei chupe reta.

<sup>13</sup>Jayave Jesús ueya reta, jare uyupi ye chalana pe oo i guasu jovaicho pe.

### Fariseo reta ilevadura

(Mt 16.5-12)

<sup>14</sup>Jare Jesús jemimboe reta ñacañi güeru vaerã mbiyape. Pentiño mbiyape güinoi chalana pe. <sup>15</sup>Jare Jesús jei chupe reta:

—Piñemoa ngatu fariseo reta jare Herodes ilevadura güi.

<sup>16</sup>Jayave jemimboe reta jei uyupe:

—Cua jei, yaru'ã mbiyape ramo.

<sup>17</sup>Jesús uicuaa chugüi mbae jei reta vae, jare jei chupe reta:

—¿Maera pa piyemingueta mbiyape peru mbae vae re? ¿Ndeño pa picuaa cavi? ¿Tanta mbate pa co pepia? —jei—. <sup>18</sup>Peresa jare peapisa penoi. ¿Peecha'ã pa jare piyandu'ã pa? ¿Pemandua'ã pa? —jei—. <sup>19</sup>Cue yave apisãa pandepo mbiyape, ucaru vaerã cinco mil vae reta. Tembú jembirecue pembati yave, ¿mbovi canasta pa pemitinee? —jei.

—Numitinee doce —jei reta chupe.

<sup>20</sup>—Jare siete mbiyape apisãa vi, ucaru vaerã cuatro mil vae reta. Tembú jembirecue pembati yave, ¿mbovi canasta pa pemitinee? —jei Jesús.

—Numitinee siete —jei reta chupe.

<sup>21</sup>Jayave Jesús jei chupe reta:

—¿Ndeño pa picuaa cavi?

### **Jesús umbigüera jesa mbae vae Betsaida pe**

<sup>22</sup>Jare yugüiraa uvãe Betsaida pe. Jayave amocue vae güeru Jesús pe cuimbae jesa mbae vae, jare jae reta uyerure chupe oñono vaerã ipo jese.

<sup>23</sup>Jayave Jesús uipoco güiraa cuimbae jesa mbae vae tenta guasu güi.

Jayave undivi cuimbae jesa re, jare oñono ipo jese.

—¿Ndepuere pa mbae ndeecha? —jei chupe.

<sup>24</sup>Cuimbae umae.

—Cuimbae reta aecha —jei Jesús pe—. Ërei ivira reta echa cheve. Ërei aecha uguata ñugüinoi —jei.

<sup>25</sup>Jayave Jesús oñono ye ipo jesa re, uecha cavi vaerã. Jayave ramo uecha cavi opaete mbaembae. <sup>26</sup>Jayave Jesús oyocui:

—Agüiye ecua cua tenta guasu rupi. Jare agüiye emimbeu quía pe ave jacoropi —jei chupe.

Jayave omondo jenta pe.

### **Pedro jei Jesús co jae Cristo, Tumpa ombou vae**

*(Mt 16.13-20; Lc 9.18-21)*

<sup>27</sup>Coiño tenta guasu Cesarea Filipo güi ñugüinoi amocue tenta guasurai reta. Jocoti yugüiraa Jesús jare jemimboe reta. Jare tape rupi Jesús upirandu jemimboe reta pe:

—¿Quía pa co che ñru vae reta pe?

<sup>28</sup>Jae reta umimbeu chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae penti Tumpa ñnee aracae umimbeu vae —jei reta.

<sup>29</sup>Jayave Jesús upirandu chupe reta:

—Jare ¿quía pa co che peve?

Jayave Pedro jei chupe:

—Nde co jae Cristo, Tumpa ombou vae.

<sup>30</sup>Jayave Jesús oyocui reta agüiye vaerã umimbeu quía pe.

**Jesús umimbeu umanota co**

*(Mt 16.21-28; Lc 9.22-27)*

<sup>31</sup>Jayave Jesús umimbeu chupe reta:

—Che cuimbaerã ayeyapo vae jetata co aiporara. Jare tenta guasu pegua reta itenondegua reta, sacerdote reta itenondegua reta, jare mboroyocui re oporomboe vae reta chererirota jare cheyucacata. Èrei mbapi ara rupi aicove yeta ayu umanocue vae reta ipite güi —jei chupe reta.

<sup>32</sup>Cua umimbeu cavi chupe reta. Jayave Pedro güiraa Jesús ñru reta ipite güi, jare umbipi umbieta chupe. <sup>33</sup>Èrei Jesús uyerova umae ñru jemimboe reta coti, jare uñeengata Pedro pe.

—Esiri chegüi, Satanás —jei chupe—. Echa'ã nde ndiyemingueta neñ ivi pegua reta uyemingueta rami, ndiyemingueta'ã Tumpa uyemingueta rami —jei.

<sup>34</sup>Jare Jesús ueni jemimboe reta jare ñru joco pe ñugüinoi vae reta. Jayave jei chupe reta:

—Ime yave quía uipota oo cherupíe vae, tiñacañi iyugüi, tovoi icurusu, jare too cherupíe —jei—. <sup>35</sup>Uipota uñuvatú jecove vae ndarau ipuere.

Èrei jocua umeeta jecove chereco pegua jare Tumpa ñnee icavi vae jeco pegua vae uñuvatuta co —jei—. <sup>36</sup>¿Mbae ra umínganata quía, umíngana yave opaete ivi pegua, èrei ipuere'ã yave uñuvatú jecove? <sup>37</sup>¿Mbovi ra umbiepita quía ogua ye vaerã jecove? —jei—. <sup>38</sup>¿Ivi pegua añave yugüireco vae reta güirovia'ã Tumpa jare uyapo icavi mbae vae. Ime yave quía imara cheré jare chiñee re cua reta ipite pe vae, che cuimbaerã ayeyapo vae chemarata vi jese, ayu ye yave cheRu imbaepuere reve ángel uñeñono tee Tumpa peguarã vae reta ndive —jei chupe reta.

**9** <sup>1</sup>Jesús jei chupe reta: —Añete che jae peve, ndei amocue cua pe ñugüinoi vae umano mbove, uechata reta Tumpa iporoyocua mbaepuere pegua.

**Jesús uyembiambie**

*(Mt 17.1-13; Lc 9.28-36)*

<sup>2</sup>Seis ara ma uasa yave, Jesús güiraa Pedro, Jacobo jare Juan ñru reta ipite güi penti ivitu guasu ivate vae re, jare joco pe uyembiambie jae reta jovai. <sup>3</sup>Jemimonde umbipi uvera jare tĩ asi. Mbaeti penti ave umbaeputua vae ipuere umitĩ asi jucuarãi. <sup>4</sup>Jare uyecuaa chupe reta Elías jare Moisés uyemingueta ñugüinoi Jesús ndive. <sup>5</sup>Jayave Pedro jei Jesús pe:

—Oporomboe vae, icavi co ñaĩ vaerã cua pe. Nduyapota mbapi guarasía ñanaroqui pegua, penti nembraerã, penti Moisés peguarã jare penti Elías peguarã —jei.

- <sup>6</sup>Echa'ã Jesús jemimboe reta uquiye ete, jare Pedro uicuaa'ã mbae jei vaerã.  
<sup>7</sup>Jayave ou amapĩtu umiguarasĩa reta, jare amapĩtu güi uyendu ñee jei:  
 —Cua co jae cheRai auu ete vae. Piyapisaca jese —jei.  
<sup>8</sup>Jare aramoño umae reta yave, uecha'ã ma quía jae reta ndive, jaño Jesús.  
<sup>9</sup>Jare ivitu guasu güi ugüeyi yugüeru rambueve, Jesús oyocui reta:  
 —Agüiye pemimbeu quía pe cua peeche vae, ndei che cuimberã ayeyapo vae aicove ye ayu umanocue vae reta ipite güi mbove —jei chupe reta.  
<sup>10</sup>Jáeramo umimbeu'ã quía pe, ãrei upirandu reta uyupe:  
 —¿Mbae pa uipota jei cua umimbeu yandevae? ¿Quirãita pa icove ye ou umanocue vae reta ipite güi? —jei reta.  
<sup>11</sup>Jayave jae reta upirandu Jesús pe:  
 —¿Maera pa jei mboroyocui re oporombocue vae reta Elías rani co outa?  
<sup>12</sup>—Añete Elías rani co outa —jei Jesús chupe reta—, jare opaete uyapicatuta. Jare ¿mbae ra uyecuatía oĩ Tumpa ñee pe che cuimberã ayeyapo vae re? Uyecuatía oĩ che jetata aiporara jare ĩru vae reta chererĩrota —jei—. <sup>13</sup>Èrei che jae peve, Elías ou ma co, jare amocue vae uyapo chupe jae reta uipota vae, Tumpa ñee pe uyecuatía oĩ rami —jei chupe reta.

**Jesús umbigüera cunumi añã oya jese vae**

(Mt 17.14-21; Lc 9.37-43)

- <sup>14</sup>Jare yugüeru uvãe yave ĩru jemimboe reta ñugüinoi vae pe, uecha jeta yati ñugüinoi iyipi rupi, jare mboroyocui re oporombocue vae reta uyeaca ñugüinoi jae reta ndive. <sup>15</sup>Jayave opaete joco pe ñugüinoi vae reta uecha Jesús, jare ipiacañi reta. Jayave osi yugüeru reta icoti, jare umbisaluda reta. <sup>16</sup>Jayave Jesús upirandu chupe reta:  
 —¿Mbae re pa piyeaca peĩ jae reta ndive?  
<sup>17</sup>Jayave penti cuimbae yati vae reta ipite pe oĩ vae jei chupe:  
 —Oporombocue vae, aru ndeve cherai. Añã oya jese jare umbuupa —jei—. <sup>18</sup>Jare que rupi oĩ vae pe añã oya jese yave, joco pe umbĩriri, jare cunumi iyuru tiriyai, jã umbiquirĩriu jare jete opa uñemĩtanta —jei—. Ayerure tẽi ma nderemimboe reta pe umbisiri vaerã añã chugüi, ãrei ipuere'ã reta —jei cuimbae Jesús pe.  
<sup>19</sup>Jayave Jesús jei chupe reta:  
 —Pe reta cua ivi pe pico vae pepurugüirovia'ã. ¿Quirãĩ regua ra apĩtata pe reta ndive? ¿Quirãĩ regua ra arupĩata peve? Peru cheve cua pe jocua cunumi —jei.  
<sup>20</sup>Jayave güeru chupe, jare añã uecha yave Jesús, jupivoiño umbĩriri tanta jocua cunumi jare oa ivi re. Uyapayere, jare iyuru tiriyai. <sup>21</sup>Jayave Jesús upirandu tu pe:  
 —Quirãĩ yave ma pa uyeyapo chupe cua?  
 —Michi güiye uyeyapo chupe —jei tu—. <sup>22</sup>Jare jeta vese ma uiti tata pe jare i pe, uyuca vaerã tẽi. Èrei nde ndepuere yave mbae ndiyapo chupe, oreparrareco jare orembori —jei chupe.

<sup>23</sup>Jayave Jesús jei chupe:

—¿Ndepuere pa ndepurugüirovia? Upurugüirovia vae ipuere uyapo opaete mbaembae —jei.

<sup>24</sup>Jayave cunumi tu iñeēāta reve jei:

—Ndugüirovia. Apurugüirovia'ā yave, chembori apurugüirovia vaerā —jei.

<sup>25</sup>Jare Jesús uecha yave jeta vae uyembati joco pe, uñeengata aña pe.

—Aña upurumbuupa jare upurumbiapisa mbae vae, che ndoyocui ndesiri vaerā cua cunumi güi, jare agüiye etei ma eya ye jese —jei aña pe.

<sup>26</sup>Jare aña jāse ma yave, umbiriri tanta cunumi, jare usiri chugüi. Jare cunumi umano echa upita. Jare jeta joco pe ñugüinoi vae reta jei tēi:

—Umano ma.

<sup>27</sup>Ērei Jesús uipisi cunumi ipo pe, jare umupūa. Jare cunumi uyemboi.

<sup>28</sup>Jare Jesús uique yave penti o pe, jemimboe reta upirandu chupe, jae retaño jae ndive ñugüinoi yave:

—¿Maera pa ore orepuere'ā numbisiri aña?

<sup>29</sup>—Ndarau pepuere pembisiri cua nunga aña, jaeño piyerure yave Tumpa pe piyecuaçu reve tembú güi —jei Jesús chupe reta.

### **Jesús umimbeu ye umanota co**

*(Mt 17.22-23; Lc 9.44-45)*

<sup>30</sup>Jesús jare jemimboe reta yugüiraa yave joco güi, uasa Galilea rupi. Jare Jesús uipota'ā quía uicuaa vaerā. <sup>31</sup>Echa'ā ombœe güinoi jemimboe reta.

—Che cuimbaerā ayeyapo vae penti vae chemeeta ĩru vae reta pe. Jae reta cheyucata —jei chupe reta—. Ērei amano ma yave, mbapĩ ara rupi aicove yeta ayu umanocue vae reta ipite güi —jei.

<sup>32</sup>Ērei jae reta uicuaa cavi'ā mbae re ra Jesús umingueta vae, jare uipiũu reta upirandu vaerā chupe jese.

### **¿Quía ra tenondegua ĩru reta güi vae?**

*(Mt 18.1-5; Lc 9.46-48)*

<sup>33</sup>Jayave yugüiraa uvãe Capernaum pe. Jare jenta pe oĩ yave, Jesús upirandu jemimboe reta pe:

—¿Mbae re pa piyemingueta peyu tape rupi?

<sup>34</sup>Ērei jae reta iquĩño. Echa'ā tape rupi jae reta uyemingueta yugüeru quía ra tenondegua ĩru reta güi vae. <sup>35</sup>Jayave Jesús uguapĩ, jare ueni jocua doce jemimboe reta. Jayave jei chupe reta:

—Ime yave quía uipota tenondeguarā ico vae, tuñemimichi opaete vae güi, jare tuyeyocui opaete ĩru reta pe —jei.

<sup>36</sup>Jayave ueni penti sambiaĩ, jare oñono jae reta ipite pe. Jayave uicuãva sambiaĩ, jae jei chupe reta:

<sup>37</sup>—Ime yave quía uyapo icavi vae cua nunga sambiaí pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei.

**Oyovaicho'ã yande ndive vae yanembori co**

*(Mt 10.42; Lc 9.49-50)*

<sup>38</sup>Jayave Juan jei Jesús pe:

—Oporomboe vae, nduecha penti cuimbae nderee pe umbisiri añã reta oya jese vae reta güi, jare ndoe chupe agüiye ma uyapo vaerã. Echa'ã jae ñaneiru'ã co —jei.

<sup>39</sup>—Agüiye pere chupe jucuarã —jei Jesús chupe—. Echa'ã cheree pe miacañi uyapo vae ndarau jupivoiño jei icavi mbae vae checoti —jei—.

<sup>40</sup>Echa'ã oyovaicho'ã yande ndive vae yanembori co —jei—. <sup>41</sup>Aramoi quía umeeta peve penti vaso i cheree pe vae. Jucuarã uyapo yave cheré perovia ramo, añete che jae peve, ambijecoviata co chupe —jei—.

**Mbaeyoa uyapoca vae**

*(Mt 18.6-9; Lc 17.1-2)*

<sup>42</sup>Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tēi co ñru vae reta uñapiti vaerã iyayu re penti ita tuicha vae umbaesõ pipe vae, jare omombo vaerã i guasu pe —jei chupe reta—. <sup>43</sup>Ndepo jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae neno vaerã ndepo jovaicho mbae reve, tata guasu opa mbae vae pe mocui ndepo reve ndeo vaerã tēi güi —jei—. <sup>44</sup>Echa'ã tata guasu pe taso ndarau umano, jare tata ndarau ove —jei—. <sup>45</sup>Jae ramiño vi ndepi jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae neno vaerã ndepi jovaicho mbae reve, tata guasu opa mbae vae pe mocui ndepi reve Tumpa nemondo vaerã tēi güi —jei—. <sup>46</sup>Tata guasu pe taso ndarau umano, jare tata ndarau ove —jei—. <sup>47</sup>Jae ramiño vi nderesa jovaicho uyapoca yave mbaeyoa ndeve, eequi ndiyugüi. Icavi co ndico vaerã Tumpa iporoyocua pe nderesa jovaicho mbae reve, tata guasu pe mocui nderesa reve Tumpa nemondo vaerã tēi güi —jei—. <sup>48</sup>Tata guasu pe taso ndarau umano, jare tata ndarau ove —jei ye chupe reta—. <sup>49</sup>Echa'ã tata uñeñocata opaete re, yuqui uñeñocata tembú pe rami. Yuqui uñeñocata vi opaete maemimba Tumpa pe uyeyuca vae re —jei—. <sup>50</sup>Yuqui icavi co yau vaerã. Èrei jembochi'ã ma yave, ¿quirãita ra jembochi ye? —jei—. Piyapo yuqui uyapo rami, jare pico cavi pãve —jei chupe reta.

**Umenda vae uyemombo vae reta**

*(Mt 19.1-10; Lc 16.18)*

**10** <sup>1</sup>Jayave Jesús oo joco güi Judea pe Jordán jovaicho pe. Joco pe jeta uyembati ye jae õi vae pe. Jayave Jesús ombõe reta, jecoño mai uyapo rami.



2 Jayave fariseo reta yugüeru Jesús oĩ vae pe. Jae reta uipota tẽi uyavica chupe. Jáeramo upirandu reta chupe:

—¿Jupi pa cuimbae omombo vaerã jembireco?

3—¿Mbae pa peocui Moisés? —jei Jesús chupe reta.

4—Moisés umaño cuimbae re uicuatía vaerã tupapire jembireco omombo vaerã —jei reta chupe.

5—Moisés uicuatía cua mboroyocui pepiatanta ramo —jei Jesús—. 6 Ërei Tumpa uyapo ramo yave, uyapo cuimbae jare cuña —jei—. 7 Jáeramo cuimbae usirita tu jare ichi güi, jare oota ico vaerã jembireco ndive —jei—. 8 Jare mocui vae uyeyapota penti ramiño. Jáeramo mbaeti ma mocui rami. Yugüireco penti ramiño —jei—. 9 Jáeramo agüiye quía tumbisiri Tumpa umĩru vae reta —jei chupe reta.

10 Jare o pe ñugüinoi yave, jemimboe reta upirandu ye Jesús pe cua re. 11 Jayave Jesús jei chupe reta:

—Cuimbae omombo jembireco jare umenda ĩru cuña ndive yave, uyuvanga menda re jembireco omombo vae coti. 12 Jare cuña usiri ime güi jare umenda ĩru cuimbae ndive yave, uyuvanga vi menda re —jei.

### **Jesús uyerure Tumpa pe sambiaĩ reta re**

*(Mt 19.13-15; Lc 18.15-17)*

13 Jare amocue vae güeru Jesús oĩ vae pe sambiaĩ reta, Jesús oñono vaerã ipo jese reta. Ërei jemimboe reta uñeengata güeru vae reta pe.

14 Jesús cua uecha yave, pochi jemimboe reta pe, jare jei chupe reta:

—Pemaño sambiaĩ reta re yugüeru vaerã checoti. Agüiye piyopia. Echa'ã cua nunga uyeyocui Tumpa pe iporoyocua pe —jei—. 15 Añete che jae peve, pipota'ã yave Tumpa pe piyeyocui vaerã penti sambiaĩ uipota rami, ndarau pico Tumpa iporoyocua pe —jei.

16 Jayave Jesús uicuãva sambiaĩ reta, jare oñono ipo jese reta, jare uyerure Tumpa pe jese reta.

### **Cuimbae icocatu vae**

*(Mt 19.16-30; Lc 18.18-30)*

17 Jare Jesús joco güi oo yave, penti cuimbae osi ou icoti. Uyeatica Jesús jovai.

—Oporomboe vae, nde ndepiacavi co —jei Jesús pe—. ¿Mbae pa ayapota anoi vaerã tecove opa mbae vae? —jei.

18—¿Maera pa ndere cheve chepiacavi vae co? —jei Jesús chupe—. Mbaeti quía ipiacavi, jaño co Tumpa —jei—. 19 Nde ndicuaa co mboroyocui reta: 'Agüiye iyuvanga menda re. Agüiye epuruyuca. Agüiye nemonda. Agüiye ndapu ĩru vae re. Agüiye epurumbitavi. Ipiu nderu jare ndesi' —jei chupe.

20—Oporomboe vae, ayavi'ã penti ave cua mboroyocui reta chemichi güiye —jei cuimbae chupe.

21 Jesús umae jese uau reve.

—Ime mbae uata ndiyapo vaerã —jei chupe—. Ecuamee opaete mbaembae nenoivae corepoti re, jare emee ndecorepoti iparavete vae reta pe, jare ndicocatuta ara pe. Jayave evoi ndecurusu, jare eyu cherupíe —jei.

<sup>22</sup> Ërei cua uyandu yave, cuimbae oo ipiatiti reve. Echa'ã jeta mbaembae güinoi.

<sup>23</sup> Jayave Jesús umae iyipi rupi, jare jei jemimboe reta pe:

—Yavai ete co icocatu vae reta uique vaerã Tumpa iporoyocua pe.

<sup>24</sup> Jemimboe reta ipiacañi Jesús jei vae re. Ërei Jesús jei ye:

—Cherivi reta, yavai ete co icocatu vae reta uique vaerã Tumpa iporoyocua pe. Echa'ã jei tēi ipia pe: 'Icavita co cheve. Echa'ã jeta mbaembae anoi' — jei, jei Jesús—. <sup>25</sup> Yavai ete icocatu vae uique vaerã Tumpa iporoyocua pe, maemimba camello jee vae yuu jesacua rupi uasa vaerã güi —jei.

<sup>26</sup> Jayave jae reta ipiacañi ete, jare upirandu uyupe:

—Jucuarãi yave, ¿quía pa ipuere uyembiasaca?

<sup>27</sup> Jesús umae jese reta jare jei:

—Ivi pegua reta ipuere'ã uyembiasa. Ërei Tumpa ipuere umbiasa reta. Echa'ã Tumpa ipuere uyapo opaete mbaembae —jei chupe reta.

<sup>28</sup> Jayave Pedro jei Jesús pe:

—Mase, ore opaete mbaembae ndueya, ndoyu vaerã nderupíe.

<sup>29</sup> —Añete che jae peve —jei Jesús—, ime yave quía ueya jenta, ani tiquei reta, ani tivi reta, ani jindi reta, ani tu, ani ichi, ani jembireco, ani isambiai reta, ani iivi reta chereco pegua jare Tumpa iñee icavi vae jeco pegua vae, <sup>30</sup> cien rupi jecoviata co chupe ivi pe ico rambueve. Jecoviata jenta reta, tiquei reta, tivi reta, jindi reta, ichi reta, isambiai reta jare iivi reta —jei—. Ërei ñru vae reta uyapota icavi mbae vae chupe. Ërei taicue rupi Tumpa umeeta chupe tecove opa mbae vae —jei—. <sup>31</sup> Ërei Tumpa umbitaicuenta uyembutuicha vae reta, jare umitenondeta uñemimichi vae reta —jei chupe reta.

### Jesús umimbeu ye umanota co

(Mt 20.17-19; Lc 18.31-34)

<sup>32</sup> Jesús jare jae ndive ñugüinoi vae reta yugüiraa tape Jerusalén coti oo vae rupi, jare Jesús tenonde oo. Jare jaicue rupi yugüiraa vae reta ipiacañi jare uquiye. Jayave Jesús ueni ye jocua doce jemimboe reta ñru reta ipite güi, jare umbipi umimbeu chupe reta mbae uyeyapota oñ chupe vae.

<sup>33</sup> —Mase, yaa co ñai Jerusalén pe —jei chupe reta—. Jare che cuimbaerã ayeyapo vae penti vae chemeeta sacerdote reta itenondegua reta jare mboroyocui re oporomboe vae reta pe. Jae reta jeita amano vaerã, jare chemeeta judío mbae vae reta pe —jei—. <sup>34</sup> Jae reta cheyoyaita, chenupata chicote pe, undivita cheré, jare cheyucata. Ërei mbapi ara rupi aicove yeta ayu umanocue vae reta ipite güi —jei chupe reta.

**Jacobo jare Juan uyerure vae**  
(Mt 20.20-28)

35 Cua jaicue rupi Zebedeo tai reta Jacobo jare Juan jee vae yugüeru Jesús coti jare jei chupe:

—Oporomböe vae, nduipota ndiyapo vaerã oreve nduyerureta ndeve jese vae.

36—¿Mbae pa pipota ayapo vaerã peve? —jei Jesús chupe reta.

37—Ndiyembutuichaca yave, emaeño oreré nduguapi vaerã ndeyipi pe, penti ndeacata coti jare ñru ndeaso coti —jei reta chupe.

38—Picuaa'ã mbae re piyerure vae —jei Jesús—. ¿Pepuereta pa piporara che aiporarata vae rami? ¿Pepuereta pa piyembibautizaca che ayembibautizacata vae rami? —jei.

39—Orepuereta co —jei reta.

—Añete pe reta piporarata che aiporarata vae rami, jare pe reta piyembibautizacata che ayembibautizacata vae rami —jei Jesús—. 40 Ërei chepuere'ã jae peve peguapi vaerã cheyipi pe, penti cheacata coti jare ñru cheaso coti. Echa'ã Tumpa umicuatiro ma joco pe uguapita vae reta peguarã —jei chupe reta.

41 Jare ñru diez Jesús jemimboe reta cua uyandu yave, pochi reta Jacobo jare Juan pe. 42 Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güiñoi vae reta jei ñru reta pe mbae uyapo vaerã —jei—. 43 Ërei pe reta agüiye piyapo jucuarã —jei—. Ime yave penti pepite pe oĩ vae uipota mbaepuere güiñoi vae, tuyeyocui ñru reta pe. 44 Jare ime yave penti pepite pe oĩ vae uipota tenondeguarã ico vae, tuyeyocui ñru reta pe —jei—. 45 Echa'ã che cuimbaerã ayeyapo vae ayu ayeyocui vaerã ñru vae reta pe. Ayu'ã ñru vae reta uyeyocui cheve vaerã. Ayu amano vaerã, jeta vae aepi vaerã —jei chupe reta.

**Bartimeo jesa mbae vae ucuera**  
(Mt 20.29-34; Lc 18.35-43)

46 Jayave yugüiraa uvãe tenta guasu Jericó pe. Jare Jesús oo ye Jericó güi jemimboe reta jare jeta vae reta ndive. Jare Timeo tai Bartimeo jee vae uguapi uyerure oĩ mbae re tape jembei pe. Bartimeo co jae jesa mbae vae. 47 Jare uicuaa Jesús Nazaret pegua uasa oo oĩ yave, ñneeãta reve jei:

—Cheparareco, Jesús. Nde co jae David ñnemoñaeta reta pegua —jei.

48 Jeta joco pe ñugüiñoi vae reta ñneengata chupe. Uipota tẽi umiquĩ. Ërei jae jeiete ñneeãta reve jei:

—David ñnemoñaeta reta pegua, cheparareco.

49 Jayave Jesús uyemboi.

—Peeni —jei.

Jayave ueni reta jesa mbae vae.

—Ñnemiatangãtu. Epũa. Nereni ma oĩ —jei reta chupe.

<sup>50</sup>Jayave jesa mbae vae ueya iyasoya, jare upña voi oo Jesús coti.

<sup>51</sup>Jesús upirandu chupe:

—¿Mbae pa ndipota ayapo vaerã ndeve?

—Tamae, oporomboe vae —jei jesa mbae vae.

<sup>52</sup>Jayave Jesús jei chupe:

—Ndepuere ndeo. Ndecuera ma, nderovia cheré ramo —jei.

Jupivoiño ipuere umae, jare oo Jesús jaicue tape rupi.

### Jesús uique Jerusalén pe

(Mt 21.1-11; Lc 19.28-40; Jn 12.12-19)

**11** <sup>1</sup>Jare coiño ma Jerusalén güi ñugüinoi yave, yugüiraa uvãe tenta guasu-rai reta Betfagé jare Betania iyipi pe, ivitu guasu Olivos jovai. Jayave Jesús oyocui mocui jemimboe reta:

<sup>2</sup>—Pecua pea tenta guasu-rai yanderovai oĩ vae pe —jei chupe reta—. Peo pevãe rupive, pevãeta penti mburica tairusu vae uñeñapĩti oĩ. Ndei ave etei quía opo jese. Piyora jare peru —jei—. <sup>3</sup>Jare ime yave quía jei peve vae: ‘¿Maera pa cua piyapo?’ pere chupe: ‘YandeYa uipota uiporu, ãrei imambae güeruruca yeta cua pe’ —pere, jei chupe reta.

<sup>4</sup>Jayave Jesús jemimboe reta yugüiraa, jare uvãe mburica tairusu vae. Uñeñapĩti oĩ tape pe penti onque jovai. Jayave jae reta oyora. <sup>5</sup>Jare amocue joco pe ñugüinoi vae jei Jesús jemimboe reta pe:

—¿Maera pa piyora peĩ mburica?

<sup>6</sup>Jesús jemimboe reta jei chupe reta Jesús oyocui reta vae. Jayave joco pe ñugüinoi vae reta umaẽño güiraa vaerã. <sup>7</sup>Jayave güeru mburica tairusu vae Jesús oĩ vae pe. Jayave Jesús jemimboe reta oñono iyasoya mburica icupe re, jare Jesús opo jese. <sup>8</sup>Jare jeta vae uipiso iyasoya tape rupi mburica jenonde, jare ñru vae reta uyasia ñanaroqui jare oñono tape rupi. <sup>9</sup>Jare Jesús jenonde yugüiraa vae reta jare jaicue rupi yugüiraa vae reta iñeẽãta reve jei:

—¡Icavi co! Tuyembĩadoraca yandeYa jee re ou vae. <sup>10</sup>Oporoyocuita yandetenondegua David jee vae oporoyocui rami. Tuyembĩadoraca. Tei reta ‘icavi co’ ara pe —jei reta.

<sup>11</sup>Jare Jesús oo uvãe Jerusalén pe, jare uique Tumpa jo pe. Joco pe umae opaete mbaembae re. Jare caaru ma yave, ou ye Betania pe jocua doce jemimboe reta ndive.

### Iva ía mbae vae

(Mt 21.18-19)

<sup>12</sup>Piãreve pe yugüiraa ye Betania güi, jare Jesús iyembaĩ. <sup>13</sup>Jare mbĩri güi uecha penti íva joqui reve, jare oo umae jese ime ra ía. Ërei uecha ía'ã, jaẽño joqui. Echa'ã ndei uvãe íva ía vaerã. <sup>14</sup>Jayave Jesús jei íva pe: —Ndarau etei ma ndeía.

Jare jemimboe reta uyandu.

### Jesús Tumpa jo pe uyapo vae

(Mt 21.12-17; Lc 19.45-48; Jn 2.13-22)

<sup>15</sup>Jare yugüiraa uvãe Jerusalén pe. Jayave Jesús uique Tumpa jo pe, jare umbipi omoë joco güi umaemee vae reta jare mbae ogua vae reta, jare umbiyapara corepoti uipepica vae reta imesa reta jare picasu reta umee vae reta jenda reta. <sup>16</sup>Jare umaño'ã quía re jivita reve uguata vaerã Tumpa jo rupi. <sup>17</sup>Jare jei joco pe ñugüinoi vae reta pe:

—Tumpa iñee pe uyecuatía oĩ cuarãi: ‘Chero uyembijeeta o opaete ivi pegua reta ipuere uyerure Tumpa pe pipe vaerã.’ Jucuarãi uyecuatía oĩ. Ërei pe reta piyapo ma imonda vae reta iñemia rami —jei chupe reta.

<sup>18</sup>Jayave sacerdote reta itenondegua reta jare mboroyocui re oporomboe vae reta cua uyandu yave, ueca quirãi ipuere uyucaca vaerã Jesús. Echa'ã jae reta uquiye chugüi, opaete vae ipiacañi iporomboe re ramo. <sup>19</sup>Jare pĩtuipi yave, Jesús ou ye Jerusalén güi.

### Iva yipi ma

(Mt 21.20-22)

<sup>20</sup>Piareve pe neimbove yave uasa yugüiraa ye yave, uecha iva yipi ma iyipi güive. <sup>21</sup>Jayave Pedro imandúa jese, jare jei Jesús pe:

—¡Emae, oporomboe vae! Iva pe ndere iata'ã ma vae yipi ma —jei.

<sup>22</sup>Jesús jei jemimboe reta pe:

—Perovia Tumpa. <sup>23</sup>Añete che jae peve, yae yave cua ivitu guasu pe: ‘Ecu iyemombo i guasu pe’, jare yae'ã yave yandepia pe: ‘Ndarau ndipo uyeyapo’, ãrei yarovia yave yae vae uyeyapota, uyeyapota co yandeve —jei chupe reta—. <sup>24</sup>Jáeramo che jae peve, ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei—. <sup>25</sup>Jare piyerure peĩ Tumpa pe yave, pembiasa ñru icavi mbae vae uyapo pecoti vae pe, peRu ara pe oĩ vae umbiasa vaerã vi peve pemaeyoa reta. <sup>26</sup>Ërei pembiasa'ã yave ñru icavi mbae vae uyapo pecoti vae pe, peRu ara pe oĩ vae ndarau vi umbiasa peve pemaeyoa reta —jei.

### Jesús imbaepuere

(Mt 21.23-27; Lc 20.1-8)

<sup>27</sup>Jare yugüiraa uvãe ye Jerusalén pe. Jare Jesús uguata rambueve Tumpa jo rupi, yugüeru jae oĩ vae pe sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta. <sup>28</sup>Jae reta upirandu chupe:

—¿Mbae nunga mbaepuere pa nenoĩ cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

<sup>29</sup>Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerã —jei—. <sup>30</sup> ¿Quía pa ombou Juan upurumbibautiza vaerã? ¿Tumpa pa ombou? aní ¿ivi pegua reta pa ombou? Pemimbeu cheve —jei chupe reta.

<sup>31</sup> Jayave jae reta jei uyupe:

—Yae yave: ‘Tumpa co ombou’, jae jeita yandeve: ‘Jucuarãi yave, ¿maera pa perovia’ã?’ <sup>32</sup> Ani ¿yaeta pa: ‘Ivi pegua reta co ombou?’ —jei reta.

Èrei jae reta uquiye tenta guasu pegua reta güi. Echa’ã opaete vae güirovia Juan co jae añetete penti Tumpa iñee umimbeu vae. <sup>33</sup> Jáeramo jei reta Jesús pe:

—Nduicuaa’ã.

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei Jesús chupe reta.

### Co iporúa icavi mbae vae reta

(Mt 21.33-46; Lc 20.9-19)

**12** <sup>1</sup> Jayave Jesús umbipi imiari chupe reta umijaanga reve.

—Ico penti cuimbae icorã uiquése vae, jare oñoti pipe jeta uva —jei—. Jayave oyoo ivi, jare uyapo uva uitami pipe vaerã. Uyapo vi penti chapapa, umae vaerã ivate güi opaete co re. Jayave uiporuca ico iru vae reta pe, jae reta uyandareco vaerã jese. Jayave co iya oo mbiri ambie ivi pe —jei—.

<sup>2</sup> Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerã tēi uva chupe reta, iya güinoi vaerã imbaerã. <sup>3</sup> Èrei jae reta uipisi uinupa co iya jembiocui, jare omondo ye. Umee’ã etei chupe güiraa vaerã —jei—.

<sup>4</sup> Jayave co iya ombou ye tēi iru jembiocui. Èrei co iporúa reta uyapi ita pe umbipere iñãca rupi, jare uyapo reta icavi mbae vae chupe. Jayave omondo ye —jei—.

<sup>5</sup> Jayave co iya ombou ye tēi iru jembiocui. Èrei co iporúa reta uyuca cua. Jare jucuarãiñoi uyapo reta jeta iru co iya jembiocui reta pe. Jae reta uinupa amocue vae, jare uyuca iru vae reta —jei Jesús—.

<sup>6</sup> Co iya güinoi jaño penti tai uau ete vae. Taicue ete ombou cua tai co iporúa reta pe. Co iya jei tēi: ‘Aramoi jae reta uipiuta cherai’ —jei, jei chupe reta—.

<sup>7</sup> Èrei co iporúa reta jei uyupe: ‘Cua co jae iyarã vae. Yauca, jare yande yaicota co iyarã’ —jei reta, jei—.

<sup>8</sup> Jayave jae reta uipisi co iya tai uyuca omombo co güi —jei—.

<sup>9</sup> ¿Mbae ra uyapota co iya? —jei—. Outa, opa uyuca vaerã jocua co iporúa reta, jare uiporucata ico ambie vae reta pe —jei Jesús—.

<sup>10</sup> ¿Pemingueta’ã pa cua Tumpa iñee pe uyecuatía oĩ vae? —jei—. Outa, opa uyuca vaerã jocua co iporúa reta, jare uiporucata ico ambie vae reta pe —jei Jesús—.

<sup>11</sup> Ita tenta iyapoa reta omombo vae uyeyapo ma ita tenondegua vae.

<sup>12</sup> YandeYa uyapo cua.

Yaecha ma, jare yandepiacañi jese.’

Jucuarãi uyecuatía oĩ —jei chupe reta.

<sup>12</sup> Jayave jocua uyapisaca jese vae reta uipota tēi uipisi Jesús. Echa’ã uicuaa catu cua umijaanga reve jei vae uicuaaca quirãi jae reta teco güinoi. Èrei uquiye tenta guasu pegua reta güi. Jáeramo ueyaño, jare yugüiraa.

### ¿Jupi pa yambiepi vaerã César pe?

(Mt 22.15-22; Lc 20.20-26)

<sup>13</sup>Jayave jae reta ombou amocue fariseo reta jare herodiano reta, uyavica vaerã tẽi chupe jae uyemingueta yave. <sup>14</sup>Jae reta yugüeru uvãe yave, jei Jesús pe:

—Oporomboe vae, nduicuaa nde ndere vae añete co. Nde netae oyovaque opaete pãve re. Nembutuicha'ã penti ave ñru vae güi. Nde ndeporomboe cavi quirãi Tumpa uipota yaico vaerã vae re —jei reta—. César yandeocui yambiepi vaerã chupe corepoti pe. ¿Jupi pa yambiepi vaerã chupe? ani ¿jupi'ã pa? ¿Yambiepita pa chupe? ani ¿yambiepita'ã pa chupe? —jei reta Jesús pe.

<sup>15</sup>Ërei Jesús uicuaa jae reta uipota tẽi co umbitavi, jare jei chupe reta: —¿Maera pa pipota piyavica cheve? Peru cheve penti corepoti taecha —jei.

<sup>16</sup>Jae reta güeru chupe. Jayave jae upirandu chupe reta:

—¿Quía jova ñã pa cua? ¿Quía jee pa cua uyecuatía oĩ vae? —jei.

—Cua César imbae co —jei reta.

<sup>17</sup>—Pemeé César pe César pegua, jare pemeé Tumpa pe Tumpa pegua —jei Jesús chupe reta.

Jare jae reta ipiacañi jese.

### ¿Icove yeta pa umanocue vae reta?

(Mt 22.23-33; Lc 20.27-40)

<sup>18</sup>Jayave yugüeru vi Jesús oĩ vae pe amocue saduceo reta. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

<sup>19</sup>—Oporomboe vae, Moisés uicuatía ueya yandevé cuarã: 'Penti tiquei vae umano yave, jembirecocue mbaeti imembi chupe yave, cuimbae amiri tivi tumenda jocua cuña ndive. Jayave cuña imembi yave, cuimbae tumbijee sambiai tiquei amiri jee pe.' Jucuarãi uicuatía Moisés —jei reta chupe—. <sup>20</sup>Ico penti cuimbae seis tivi reta güinoi vae. Cua cuimbae umenda, jare umano umimembi mbae reve —jei reta—. <sup>21</sup>Cuimbae amiri jaicue rupigua umenda jembirecocue ndive, ãrei umano vi umimembi mbae reve. Jae ramiño vi uyeyapo jaicue rupigua ye pe. <sup>22</sup>Opaete siete reve umenda jocua cuña ndive, jare opaete siete reve umano umimembi mbae reve. Taicue rupi cuña umano vi —jei reta—. <sup>23</sup>Jayave umanocue vae reta icove ye yave, ¿quía nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

<sup>24</sup>—Pe reta piyavi co —jei Jesús chupe reta—. Echa'ã picuaa'ã Tumpa ñnee uyecuatía oĩ vae jare Tumpa imbaepuere —jei—. <sup>25</sup>Echa'ã umanocue vae reta icove ye yave, cuimbae reta jare cuña reta ndarau umenda. Yugüirecota

ángel ara pe ñugüinoi vae reta yugüireco rami —jei—. <sup>26</sup>Tamimbeu peve umanocue vae reta regua. Icove yeta co. ¿Pemingueta'ã pa Moisés uicuatía vae? —jei—. Uyecuatía oĩ jocua yai regua, jare quirã Tumpa jei Moisés pe jocua yai jendi vae ipite güi: ‘Che co Abraham, Isaac jare Jacob iTumpa’ —jei, jei chupe reta—. <sup>27</sup>Tumpa mbaeti co umanocue vae reta iTumpa. Jae co tecove güinoi vae reta iTumpa. Tuicha co piyavi —jei.

### Mboroyocui tenondegua vae

(Mt 22.34-40)

<sup>28</sup>Ou vi Jesús oĩ vae pe penti mboroyocui re oporomboe vae. Uyandu uyeaca reta, jare uicuaa Jesús umimbeu cavi co chupe reta. Jayave jae upirandu Jesús pe: —¿Mbae nunga mboroyocui pa co jae tenondegua vae? —jei.

<sup>29</sup>Jesús jei chupe:

—Mboroyocui tenondegua vae co cua: ‘Israel pegua, iyapisaca. YandeYa Tumpa, jaeño co Tumpa. <sup>30</sup>Eau ndeYa Tumpa opaete ndepia reve, opaete nderecove reve, opaete ndepiyeminguetã reve jare opaete nepirãta reve.’ Cua co jae mboroyocui tenondegua vae —jei chupe—. <sup>31</sup>Jare jaicue rupigua co cua: ‘Eau nderapicha nde ndiyerau rami.’ Mbaeti ñru mboroyocui tenondegua cua reta güi vae —jei.

<sup>32</sup>Jayave mboroyocui re oporomboe vae jei Jesús pe:

—Añete co, oporomboe vae. Icavi ndere Tumpa pentiño co jare mbaeti ye ñru. <sup>33</sup>Jare yaau yave Tumpa opaete yandepia reve, opaete yanderecove reve, opaete yandepiyeminguetã reve jare opaete ñanepirãta reve, jare yaau yave yanderapicha yande yayerau rami, jocua icavi opaete maemimba Tumpa peguarã ñamee vae reta güi —jei.

<sup>34</sup>Jare Jesús uyandu yave jae jei jupi cavi vae, jei chupe:

—Jeta'ã uata ndiyeyocui vaerã Tumpa pe iporoyocua pe.

Jare mbaeti ma quía uipota upirandu chupe mbae re.

### ¿Quía ññemoñaã reta pegua pa co Cristo?

(Mt 22.41-46; Lc 20.41-44)

<sup>35</sup>Jare Jesús oporomboe oĩ Tumpa jo pe.

—¿Maera pa jei mboroyocui re oporomboe vae reta Cristo co jae David ññemoñaã reta pegua? —jei—. <sup>36</sup>Echa'ã David etei jei Espiritu Santo rupi cuarã: ‘YandeYa jei cheYa pe:

Eguapi cheyipi pe cheacata coti,  
nderovaicho reta opa amiamiri regua.’

Jucuarã jei David aracae —jei Jesús—. <sup>37</sup>¿Quirã pa ipuere ico David ññemoñaã reta peguarã? Echa'ã David etei jei chupe: ‘CheYa’ —jei Jesús chupe reta.

Jare jeta vae uyapisaca ñugüinoi Jesús re uyerovia reve.



**Jesús umbijeco mboroyocui re oporombocoe vae reta**

(Mt 23.1-36; Lc 11.37-54; 20.45-47)

<sup>38</sup>Jare Jesús oporombocoe yave, jei chupe reta:

—Piñemoa ngatu mboroyocui re oporombocoe vae reta güi —jei—. Jae reta jecuaño uipota uguata jemimonde pucu vae reve, jare jecuaño uipota ñru vae reta pe uyembisaludaca vaerã calle reta rupi —jei—.

<sup>39</sup>Yugüiraa yave tupao pe jare pareta pe, jecuaño uipota uguapi tenda tenondegua vae reta pe —jei—. <sup>40</sup>Jare upïro reta cuña ime umano vae reta güi opaete imbaembae, jare pucu uyerure Tumpa pe upurumbitavi vaerã —jei—. Jae reta uiporara eteta co —jei chupe reta.

**Cuña ime umano vae umee corepoti Tumpa pe**

(Lc 21.1-4)

<sup>41</sup>Penti ara Jesús uguapi oï corepoti jiru jovai Tumpa jo pe, jare uecha quirãi jeta yugüeru vae reta oñono corepoti pipe. Iocatu vae reta oñono jeta corepoti.

<sup>42</sup>Jare ou vi penti cuña ime umano vae iparavete vae. Jae oñono mocui riare. Jocua jeta'ã co jepi. <sup>43</sup>Jare Jesús ueni jemimboe reta jare jei chupe reta:

—Añete che jae peve, cua cuña ime umano vae iparavete vae uyapo jeta opaete ñru oñono vae reta güi —jei—. <sup>44</sup>Echa'ã opaete ñru reta güeru oñono jeta güinoi vae güi. Ërei cua cuña, yepe tõi iparavete, oñono opaete güinoi vae. Jocua co jembú jepirã tõi vae —jei chupe reta.

**Tumpa jo uyeitita**

(Mt 24.1-2; Lc 21.5-6)

**13** <sup>1</sup>Jesús oẽ yave Tumpa jo güi, penti jemimboe jei chupe: —Mase, oporombocoe vae, icavi cua ita reta jare o reta.

<sup>2</sup>—¿Nemae pa neï cua o tuicha vae reta re? —jei Jesús chupe—. Ndarau upita penti ave ita ñru ita írambo. Opaete uyeitita co —jei.

**Mbaesusere reta uyeyapota vae**

(Mt 24.3-28; Lc 21.7-24; 17.22-24)

<sup>3</sup>Jare Jesús uguapi oï rambueve ivitu guasu Olivos re Tumpa jo jovai, Pedro, Jacobo, Juan jare Andrés upirandu chupe, jare retaño jae ndive ñugüinoi yave:

<sup>4</sup>—Emimbeu oreve, ¿quirãi yave pa cua uyeyapota? Jare opaete cua uyeyapota ma yave, ¿quirãita pa nduicuaa? —jei reta chupe.

<sup>5</sup>Jayave Jesús jei chupe reta:

—Piñemoa ngatu agüiye vaerã petavi. <sup>6</sup>Echa'ã yugüeruta jeta cheree pe uyembijeeta vae reta. Jae reta jeita: 'Che co jae Cristo.' Jare umbitavita jeta vae reta —jei—. <sup>7</sup>Imeta co ñerãro reta coiño pegüi. Imeta vi ñerãro reta mbiri pegüi. Piyandu yave cua reta regua, agüiye pequiye. Cua susere reta uyeyapota co. Ërei cua susere reta ndei ave co opa vaerã —jei Jesús—. <sup>8</sup>Penti ivi pegua

reta uñerãrota ambie ivi pegua reta ndive, jare mburuvicha reta uñerãrota ñru mburuvicha reta ndive. Jare ivi tanta ucãtata jeta que rupi. Jare imeta caruai reta jare tecorai reta. Ërei cua susere reta uyembipi ramo co oĩ —jei chupe reta—.

<sup>9</sup>Piñemoa ngatu. Echa'ã ñru vae reta pereraata mburuvicha reta ñugüinoi vae pe, uñeapo vaerã peré. Jare penupata judío reta itupao reta pe. Jare pereraata mburuvicha guasu reta jovai chereco pegua, chemimbeu vaerã chupe reta —jei—. <sup>10</sup>Jare Tumpa ñnee icavi vae jerãcuata co rani opaete ivi pegua reta pe —jei—. <sup>11</sup>Jare ñru vae reta pereraa yave pemee vaerã mburuvicha reta pe, agüiye piyemipia'ã mbae pereta vae re —jei—. Pemee yave, Tumpa uicuaacata peve mbae pere vaerã. Jocuano pere. Echa'ã Espíritu Santo pemborita piyemingueta vaerã, pe retaiño'ã co piyeminguetata —jei—. <sup>12</sup>Tiquei umeeta tiví, uyucaca vaerã. Jare tu umeeta isambiai. Jare sambiai reta oyovaichota tu jare ichi ndive, jare uyucacata reta. <sup>13</sup>Jare piñemitarëicata opaete vae pe chereco pegua. Ërei jösata oo uvãe iyapi pe vae uyembiasacata co —jei chupe reta—.

<sup>14</sup>Jare peeçhata icavi mbae vae opaete urucumegua vae uyemboi oĩ oita'ã tẽi vae pe. Tumpa ñnee aracae umimbeu vae Daniel jei uyecuaata co. (Umingueta vae tuicuaa) —jei—. Jayave Judea pe ñugüinoi vae reta tosi ivitu guasu coti —jei—. <sup>15</sup>Jare o cupe re oĩ vae ugüeyi yave, agüiye tuique jo pe güiraa vaerã imbaembae. <sup>16</sup>Jare ico pe oĩ vae agüiye tou ye jenta pe güiraa vaerã iyasoya —jei—. <sup>17</sup>Jare ipurúa vae reta jare umicambu vae reta uiporarata jocua ara reta pe —jei Jesús chupe reta—. <sup>18</sup>Piyerure Tumpa pe cuarãi: 'Agüiye emaeño tuyeyapo roi ma yave.' <sup>19</sup>Echa'ã jocua ara reta pe ivi pegua reta uiporara eteta. Jucuarãl'ã uiporara reta Tumpa ivi uyapo güive, jare ndarau ye jucuarãi uiporara reta —jei—. <sup>20</sup>Jare yandeYa uipota'ã yave opa vaerã jocua ara reta, mbaetita tẽi quía ipuere ico. Ërei Tumpa uiparavo vae reta jeco pegua opata jocua ara reta —jei chupe reta—. <sup>21</sup>Aramoi jocua ara reta pe quía jeita peve: 'Mase, co oĩ Cristo', ani jeita: 'Mase, pee oĩ Cristo.' Jucuarãi jei yave, agüiye perovia —jei—. <sup>22</sup>Amocue upurumbitavi vae reta jeita: 'Che co jae Cristo', jare ñru upurumbitavi vae reta jeita: 'Che co jae penti Tumpa ñnee umimbeu vae.' Jare jae reta uyapota miacañi reta, umbitavi vaerã tẽi Tumpa uiparavo vae reta —jei—. <sup>23</sup>Piñemoa ngatu. Amimbeu ma peve opaete, ndei uyeyapo mbove —jei chupe reta—.

### **Cuimbaerã uyeyapo vae ou yeta**

*(Mt 24.29-44; Lc 21.25-36)*

<sup>24</sup>Jayave opa uiporara reta jocua ara reta pe yave, guarasi uñemipñtumimbita, jare yasi ndarau ma jembipe. <sup>25</sup>Yasitata reta oata ara güi, jare opaete ara re mbaepuere güinoi vae reta ucãtata —jei—. <sup>26</sup>Jayave ivi pegua reta cherechata ayu amapñtu reve. Che cuimbaerã ayeyapo vae anoita mbaepuere tuicha vae, jare ayembiadoracata opaete vae pe —jei—. <sup>27</sup>Jayave amondota ángel reta güeru vaerã aiparavo vae reta opaete ivi rupi güi —jei—.

<sup>28</sup>Yandepuere yamijaanga iva. Piyemboe jese —jei—. Joqui yave, picuaa uyaro ma co ama oqui vaerã —jei Jesús—. <sup>29</sup>Jae ramiño vi pe

reta peeche yave cua mbaembae uyeyapo ñugüinoi vae, picuaata che coïño ma co aĩ —jei—. <sup>30</sup>Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei chupe reta—. <sup>31</sup>Ara jare ivi opata, ãrei chiñee ndarau opa —jei—.

<sup>32</sup>Ërei mbaeti quía uicuaa mbae ara pe ani mbae ora pe yepe cua uyeyapota, jaëño cheRu. Ángel ara pe ñugüinoi vae reta uicuaa'ã. Che co jae Tumpa Tai. Ërei che ave aicuaa'ã —jei—. <sup>33</sup>Jecuaëño peãro, jare piyerure Tumpa pe. Echa'ã picuaa'ã quirãi yave ra uyeyapota —jei—. <sup>34</sup>Yamijaanga penti cuimbae oo ambie ivi pe vae. Oota ma jenta güi yave, umee mbaepuere jembiocui reta pe, jare oyocui penti penti uyapo vaerã iparaviqui, jare oyocui vi taraquëra jãroa uãro cavi vaerã —jei—. <sup>35</sup>Picuaa'ã quirãi yave ra tenta iya ou yeta uvãe. Aramoi outa uvãe pïtu ave ma yave, ani piare catu yave, ani uru cuimbae ñee yave, ani neimbove yave —jei—. Jáeramo peãro peĩ, <sup>36</sup>agüiye vaerã, aramoiño ou uvãe yave, pepocou peque peĩ —jei—. <sup>37</sup>Jare cua jae peve vae jae vi opaete vae pe: Peãro peĩ —jei chupe reta.

### Jovaicho reta uyemingueta uyucaca vaerã Jesús

(Mt 26.1-5; Lc 22.1-2; Jn 11.45-53)

**14** <sup>1</sup>Mocui araño ma uata pascua uyapo reta vaerã. Jocua ara pe judío reta jou mbiyape ovu mbae vae. Jare sacerdote reta itenondegua reta jare mboroyocui re oporomböe vae reta ueca ñugüinoi quirãi ipuere uipisi tavi rupi Jesús, uyucaca vaerã. <sup>2</sup>Ërei jei reta:

—Agüiye yaipisi pascua ara rupi, agüiye vaerã tenta guasu pegua reta uyapo tecorai.

### Cuña upiyere mbae ipiche cavi vae Jesús re

(Mt 26.6-13; Jn 12.1-8)

<sup>3</sup>Jare Jesús ucaru oĩ rambueve Betania pe Simón ipire ocuise vae jenta pe, uique penti cuña. Jae güeru iru-rai ita alabastro jee vae pegua. Cua iru-rai tinee mbae ipiche cavi vae nardo jee vae pe. Cua nardo jepi ete. Cuña oyoca iru-rai, jare upiyere nardo Jesús iñãca re. <sup>4</sup>Jayave amocue joco pe ñugüinoi vae pochì jare jei uyupe:

—¿Maera pa umicañitei? <sup>5</sup>Umee yave corepoti re, güinoita tēi trescientos ara mbaraviqui jepi pegua umee vaerã iparavete vae reta pe —jei reta.

Jayave iñera reta jese.

<sup>6</sup>Ërei Jesús jei chupe reta:

—Pemaëño jese. ¿Maera pa pemambeco? Icavi vae co uyapo cheve —jei—.

<sup>7</sup>Echa'ã yugüirecoñotai co iparavete vae reta pe reta ndive, jare pipota yave, pepuereta pembali. Ërei che ndarau aicoño pe reta ndive —jei—. <sup>8</sup>Cua cuña uyapo ipuere vae. Chembipiche cavi ma, ndei añeñotica mbove —jei—.

<sup>9</sup>Añete che jae peve, opaete ivi rupi Tumpa iñee icavi vae jerãcua vae rupi, cua uyapo vae vi jerãcuata, ïru vae reta imandúa vaerã jese —jei chupe reta.

**Judas umeeta Jesús**  
(Mt 26.14-16; Lc 22.3-6)

<sup>10</sup>Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüinoi vae pe, umee vaerã Jesús chupe reta. <sup>11</sup>Cua uicuaa reta yave, uyerovia reta, jare jei Judas pe umeeta co chupe corepoti. Jayave Judas umbipi ueca quirã ipuere umee vaerã Jesús chupe reta.

**Jesús ucaru jemimboe reta ndive**  
(Mt 26.17-29; Lc 22.7-23; Jn 13.21-30; 1 Cor 11.23-26)

<sup>12</sup>Pascua ara pe judío reta uyuca ovecha. Jocua ara umbipi jou mbiyape ovu mbae vae. Jayave Jesús jemimboe reta jei chupe:

—¿Quiape pa ndipota nduyapicatu vaerã, tembü pascua pegua ndeu vaerã?

<sup>13</sup>Jayave Jesús oyocui mocui jemimboe reta:

—Pecua tenta guasu pe —jei chupe reta—. Peovãitita joco pe penti cuimbae i güiraa iru pe vae. Pecua jaicue —jei—. <sup>14</sup>Jare uique yave tenta pe, pere tenta iya pe: ‘Oporombae vae jei: ¿Quiape pa ime oĩ o, joco pe jau vaerã tembü pascua pegua cheremimboe reta ndive’ —jei, pere chupe, jei Jesús—. <sup>15</sup>Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapicatu yandave —jei chupe reta.

<sup>16</sup>Jare Jesús jemimboe reta yugüiraa uvãe yave tenta guasu pe, uvãe opaete Jesús jei chupe reta vae rami. Jare uyapo reta tembü pascua pegua jou reta vaerã.

<sup>17</sup>Jare pĩtu ma yave, Jesús oo jocua doce jemimboe reta ndive. <sup>18</sup>Jare mesa pe uguapĩ ucaru ñugüinoi rambueve, Jesús jei chupe reta:

—Añete che jae peve, penti pepite pe oĩ vae chemeeta cherovaicho reta pe. Jae co penti ucaru oĩ che ndive vae —jei.

<sup>19</sup>Jayave jae reta ipiatiti, jare upirandu Jesús pe penti penti rupi: —¿Che pa co jae?

<sup>20</sup>—Pe reta co jae doce cheremimboe reta —jei Jesús chupe reta—. Penti pepite pe oĩ vae co jae. Mbiyape umãqui oĩ che ndive plato pe vae co jae —jei—. <sup>21</sup>Che cuimbaerã ayeyapo vae aañotai amano vaerã, Tumpa ñnee pe uyecuatía oĩ cheregua rami. Èrei jocua cuimbae chemeeta vae uiporarata co. Icavi tẽi mona jocua cuimbae mbaeti ico yave —jei.

<sup>22</sup>Jare jae reta ucaru ñugüinoi rambueve, Jesús uipisi mbiyape, jare umee yasurupai Tumpa pe. Jayave upisãa mbiyape jare umee chupe reta. —Peu —jei chupe reta—. Cua co jae cherete —jei.

<sup>23</sup>Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe. Jare opareve jou copa güi. <sup>24</sup>Jesús jei chupe reta:

—Cua co jae cherugüi. Cherugüi uyepiyereta, Tumpa jei piau ye vae uyeyapo vaerã, jare jeta vae reta uyembiasaca vaerã —jei Jesús—.

<sup>25</sup>Añete che jae peve, ndarau ma jau uva ticuecue, Tumpa iporoyocua pe uva ticuecue ipiau vae jau regua —jei chupe reta.

**Pedro uicuacuta Jesús**  
(Mt 26.30-35; Lc 22.31-34; Jn 13.36-38)

<sup>26</sup>Jare opa yave ucanta reta Tumpa pe, oẽ reta yugüiraa ivitu guasu Olivos coti. <sup>27</sup>Jayave Jesús jei chupe reta:

—Opaete pe reta chereyata cua pïtu. Echa'ã Tumpa ñnee pe uyecuatía oĩ cuarãi: 'Ayucata ovecha reta iyandarecoa, jare ovecha reta opata uñemiai.' Jucuarãi uyecuatía oĩ —jei chupe reta—. <sup>28</sup>Ërei aicove ye ayu yave umanocue vae reta ipite güi, aata perenonde Galilea pe —jei.

<sup>29</sup>Jayave Pedro jei Jesús pe:

—Yepe tẽi opaete ñru reta tandereya, ãrei che ndarau ndueya.

<sup>30</sup>—Añete che jae ndeve —jei Jesús chupe—, cua pïtu etei, ndei mocui vese uru cuimbae uñee mbove, mbapi vese ma checuacuta —jei.

<sup>31</sup>Ërei Pedro jeiete jei:

—Yepe tẽi tamano nde ndive, ãrei ndarai nducuaçu.

Jare jucuarãi vi jei opaete Jesús jemimboe reta.

**Jesús uyerure Getsemaní pe**  
(Mt 26.36-46; Lc 22.39-46)

<sup>32</sup>Jayave yugüiraa uvãe reta Getsemaní pe.

—Peguapi cua pe, che aa ayerure Tumpa pe rambueve —jei Jesús jemimboe reta pe.

<sup>33</sup>Jayave güiraa Pedro, Jacobo jare Juan, jare umbipi ipiatiti jare uiporara.

<sup>34</sup>—Tuicha chepiatiti, jare amano pota echa. Pepita cua pe, jare agüiye peque —jei jocua mbapi jemimboe reta pe.

<sup>35</sup>Jayave Jesús usiri catu chugüi reta, jare uyeatica ivi re. Uyerure Tumpa pe, Tumpa uipota yave, umbiasa vaerã chugüi jocua uyeyapota chupe vae.

<sup>36</sup>—CheRu, cheRu, opaete mbae ndepuere ndiyapo. Embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

<sup>37</sup>Jayave Jesús ou jemimboe reta ñugüinoi vae pe, jare uecha oque ñugüinoi. Jayave jei Simón Pedro pe:

—Simón, ¿ndeque pa? ¿Ndepuere'ã pa ndeque mbae neĩ penti ora yepe? —jei chupe.

<sup>38</sup>Jei vi jemimboe reta pe:

—Agüiye peque. Piyerure Tumpa pe, agüiye vaerã peyoa. Pepia pe peratangātu co, ãrei perete iyaquí co —jei.

<sup>39</sup>Jayave Jesús usiri ye uyerure Tumpa pe tenonde uyerure vae rami.

<sup>40</sup>Jayave ou ye jemimboe reta ñugüinoi vae pe, jare uecha oque ye ñugüinoi. Echa'ã jae reta jopei ete ma. Jare uicuaa'ã mbae jei vaerã Jesús pe. <sup>41</sup>Jayave Jesús usiri ye mbapia re, jare ou ye yave, jei chupe reta:

—Peque jare peputuño ma. Jocuño ma. Ora uvãe ma. Che cuimbaerã ayeyapo vae penti vae chemeeta cuimbae jeco pochì vae reta pe —jei—. <sup>42</sup>Pepũa. Yaaño ma. Mase, chemeeta vae coiño ma ou —jei chupe reta.

### Uipisi reta Jesus

(Mt 26.47-56; Lc 22.47-53; Jn 18.2-11)

<sup>43</sup>Jare uyemingueta oĩ rambueve, ou Judas - jae co jocua doce vae güi penti. Jeta vae yugüeru jae ndive iquisepucu reve jare iivira reve reve. Sacerdote reta itenondegua reta, mboroyocui re oporomböe vae reta, jare tenta guasu pegua reta itenondegua reta ombou Jesús pe cua reta. <sup>44</sup>Jare umeeta vae umimbeu ma ñru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi, jare peraa. Agüiye tosi —jei.

<sup>45</sup>Judas ou uvãe yave, ou voi Jesús oĩ vae pe.

—Oporomböe vae, oporomböe vae —jei chupe.

Jayave uyurupite. <sup>46</sup>Jayave uipisi reta Jesús. <sup>47</sup>Jare penti cuimbae joco pe oĩ vae uequi iquisepucu jiru güi, sacerdote tenondegua jembicui re uiporu, jare uyasía inambi chugüi. <sup>48</sup>Jayave Jesús jei yugüeru vae reta pe:

—¿Maera pa peru quisepucu reta jare ivira reta chepisi vaerã, imonda vae pipisi vae rami? <sup>49</sup>Opa ara aico pe reta ndive Tumpa jo pe. Joco pe aporomböe, jare chepisi'ã. Ërei piyapo cua, Tumpa ñnee uyecuatía oĩ vae uyeyapo vaerã —jei.

<sup>50</sup>Jayave opaete jemimboe reta ueya Jesús, jare opa osi.

### Cunumi osi vae

<sup>51</sup>Jare penti cunumi uñepëgua penti asoya pe vae oo Jesús jaicue rupi. Jare amocue joco pe ñugüiñoi vae reta uipisi tõi. <sup>52</sup>Ërei jae ueya iyasoya, jare nani etei oẽ osi.

### Jesús uyemboi jovaicho reta jovai

(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup>Jayave güiraa reta Jesús sacerdote tenondegua jenta pe. Jare joco pe uyembati opaete sacerdote reta itenondegua reta, tenta guasu pegua reta itenondegua reta, jare mboroyocui re oporomböe vae reta. <sup>54</sup>Jare Pedro oo vi Jesús jaicue. Ërei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembicui reta ndive uyepëe ñugüiñoi tataipi pe. <sup>55</sup>Jare sacerdote reta itenondegua reta jare opaete ñru mburuvicha reta ueca quía uñeapo vaerã Jesús re, uyucaca vaerã. Ërei uvãe'ã reta teco jese. <sup>56</sup>Yepe tõi jeta vae iyapu reve uñeapo jese, Ërei jei reta tõi vae oyovaque'ã. <sup>57</sup>Jare amocue upña uñeapo iyapu reve jese vae jei:

<sup>58</sup>—Ore nduyandu jei: 'Ambusururuta Tumpa jo cuimbae reta uyapo vae, jare mbapi ara pe che ayapota ñru Tumpa jo cuimbae reta uyapota'ã vae' —jei, jei reta.

<sup>59</sup>Ërei yepe tõi jucuarãi jei reta, Ërei jei reta tõi vae oyovaque'ã. <sup>60</sup>Jayave sacerdote tenondegua upña uyemboi yatì vae reta ipite pe, jare upirandu Jesús pe:

—¿Maera pa niñee nemoẽ'ã? ¿Mbae re pa cua reta uñeapo nderé? —jei.  
 61 Ërei Jesús quiĩño. Jei'ã mbae ave. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? —jei.

62—Jae co che —jei Jesús chupe—. Jare che cuimbaerã ayeyapo vae cherechata co aguapĩ aĩ Tumpa mbaepuere güinoi vae iyipĩ pe iyacata coti. Cherechata vi ayu amapĩtu reve —jei.

63 Jayave sacerdote tenondegua cua uyandu yave, pochi ramo omondo jemimondei, jare jei:

—¿Maera ma pa yaeca yeta ñru vae reta uñeapo vaerã jese? 64 Piyandu ma icavi mbae vae jei Tumpa coti —jei—. ¿Mbae pa pere añave? —jei.

Jayave opaete reve jei reta:

—Icavi'ã co. Icavi co yayucaca vaerã —jei reta.

65 Jare amocue vae umbipĩ undivĩ jese, jare uesañoa, jare ocua jese. Jare jei Jesús pe:

—Emimbeu oreve quía ra ocua oĩ nderé.

Jare sacerdote tenondegua jembiocui reta ocua vi jese.

### Pedro uicuacu Jesús

(Mt 26.69-75; Lc 22.56-62; Jn 18.15-18, 25-29)

66 Jare Pedro oca pe oĩ rambueve, ou penti cuñatai sacerdote tenondegua pe uyeyocui vae. 67 Jare uecha yave Pedro uyeppee oĩ, omondo umaee jese.

—Nde vi co jae Jesús Nazaret pegua ñru —jei chupe.

68 Jayave Pedro uicuacu Jesús.

—Aicuaa'ã jocua cuimbae, jare aicuaa'ã mbae ndere vae —jei Pedro chupe. Jayave Pedro oo onque tuicha vae coti. Jare uru cuimbae uñee.

69 Jayave cuñatai uecha ye, jare imiari jese joco pe ñugüinoi vae reta pe:

—Cua cuimbae co jae penti Jesús ñru —jei.

70 Ërei Pedro uicuacu ye. Jare ndei ima mbove joco pe ñugüinoi vae reta jei ye Pedro pe:

—Añete nde co jae penti Jesús ñru. Echa'ã nde vi co jae penti Galilea pegua. Nde ndiyemingueta jae reta uyemingueta vae rami —jei reta chupe.

71 Jayave Pedro jei Tumpa jee re:

—Tumpa tuiporaraca cheve cua jae vae añetete'ã yave. Aicuaa'ã jocua cuimbae piyemingueta peĩ jese vae.

72 Jayave uru cuimbae uñee ma mocui vese. Jare Pedro imandúa Jesús jei chupe vae re: “Ndei mocui vese uru cuimbae uñee mbove, mbapĩ vese ma checuacuta.” Jare cua re ipia pe uyemingueta yave, umbipĩ uyao.

**Jesús uyemboi Pilato jovai***(Mt 27.1-2, 11-14; Lc 23.1-5; Jn 18.28-38)*

**15** <sup>1</sup>Jayave cõe rupive sacerdote reta itenondegua reta, tenta guasu pegua reta itenondegua reta, mboroyocui re oporombœ vae reta, jare opaete ïru mburuvicha reta uyembati uyemingueta ñugüinoi reta uyupii. Jayave uipocua Jesús jare güiraa Pilato pe umee. <sup>2</sup>Jayave Pilato upirandu Jesús pe: —¿Nde pa co jae judío reta juvicha guasu? —Nde ndere rami jae co che —jei Jesús chupe. <sup>3</sup>Jayave sacerdote reta itenondegua reta ñeapo Jesús re jeta mbaembæ re. <sup>4</sup>Jayave Pilato upirandu ye Jesús pe: —¿Maera pa ñínee nemoë'ã? Mase, jeta mbaembæ re ñeapo reta nderé —jei. <sup>5</sup>Ërei Jesús jei'ã mbae ave chupe. Jáeramo Pilato ipiacañi jese.

**Pilato jei Jesús umanota co***(Mt 27.15-31; Lc 23.13-25; Jn 18.38-19.16)*

<sup>6</sup>Jare pascua ara rupi Pilato oyoracañoi penti pereso tenta guasu pegua reta uipota vae. <sup>7</sup>Jare peresoriru pe ñugüinoi amocue upuruyuca vae reta. Cua reta upuruyuca, mburuvicha reta ndive uñerãro yave. Pentí jee co Barrabás. <sup>8</sup>Jare jeta vae yugüeru uyerure Pilato pe uyapo vaerã chupe reta opa año uyapo rami. <sup>9</sup>Jayave Pilato jei chupe reta: —¿Pipota pa ayoraca vaerã peve judío reta juvicha guasu? <sup>10</sup>Echa'ã jae uicuaa sacerdote reta itenondegua reta umee Jesús chupe ñacatãa jese ramo. <sup>11</sup>Ërei sacerdote reta itenondegua reta omboembœ yatí vae reta: —Piyerure Pilato pe oyoraca vaerã peve Barrabás. Agüiye toyoraca Jesús —jei reta. Jayave jucuarãi uyerure reta Pilato pe. <sup>12</sup>Jayave Pilato upirandu chupe reta: —Barrabás ayoraca yave, ¿mbæ pa pipota ayapo vaerã cua cuimbae judío reta juvicha guasu pere chupe vae pe? <sup>13</sup>Jayave jae reta ñíneeãta reve jei: —Icutuca curusu re. <sup>14</sup>Ërei Pilato upirandu chupe reta: —¿Mbae icavi mbae vae pa uyapo? Ërei jae reta jeiete ñíneeãta reve jei: —Icutuca curusu re. <sup>15</sup>Jayave Pilato oyoraca chupe reta Barrabás, uipota umbiyerovia reta ramo. Jare Pilato uinupaca yave Jesús chicote pe, umee sundaro reta pe, uicutu vaerã curusu re. <sup>16</sup>Jayave sundaro reta güiraa Jesús juvicha joca palacio pe, jare ueni opaete ïru sundaro reta. <sup>17</sup>Jayave sundaro reta omondeca Jesús pe temimonde pãta vae, jare oñope yurãti catuui vae, jare umbapúa oñono Jesús ññãca re. <sup>18</sup>Jayave umbipi umbiadora-raanga reta.



—¡Viva, judío reta juvicha guasu! —jei reta.

<sup>19</sup>Jare uiporu reta ñãca re ivira. Jare undivi reta jese, jare uyeatica reta jae jovai umbiadora-raanga vaerã. <sup>20</sup>Jare opa oyoyai reta yave, sundaro reta omboi chugüi temimonde pïta vae, jare omondeca ye chupe jae jemimondei. Jayave güiraa reta mburuvicha guasu joca güi, uicutu vaerã curusu re.

### Jesús uyecutuca curusu re

(Mt 27.32-44; Lc 23.26-43; Jn 19.17-27)

<sup>21</sup>Penti cuimbae Simón jee vae tenta guasu Cirene pegua, Alejandro jare Rufu tu, ou uvãe tenta guasu coti. Jacoropi uasa oo oï yave, sundaro reta güiraa chupe Jesús icurusu. <sup>22</sup>Jare sundaro reta güiraa Jesús Gólgota jee vae pe. (Cua uipota jei: “Ácacuerenda”.) <sup>23</sup>Jayave umee reta Jesús pe vino uyea mirra ndive vae. Ërei Jesús jou'ã. <sup>24</sup>Jayave sundaro reta uicutu curusu re. Jayave uyuguari reta Jesús jemimonde re, uicuaa vaerã mbae nunga penti penti güiraa iyupe vaerã. <sup>25</sup>Jare neimbove yave nueve pe, uicutu reta Jesús curusu re. <sup>26</sup>Jare oñono reta curusu re Jesús ñãca iárambo uyecuatía mbae umbijeco jesequa vae: “Judío reta juvicha guasu.” <sup>27</sup>Jare sundaro reta uicutu vi curusu re mocui imonda vae reta, jare oñono penti Jesús iyacata coti jare ñru iyaso coti. <sup>28</sup>Jare uyeyapo ma Tumpa ñnee uyecuatía oï vae: “Ñru vae reta jei tēi jae vi co penti icavi mbae vae.” <sup>29</sup>Jare uasa vae reta uñeácambivava reve jei icavi mbae vae Jesús pe.

—Aa! —jei reta—. Nde ndere nembusururuta co Tumpa jo jare ndiyapo yeta mbapí ara pe. <sup>30</sup>Iyerepí añave, jare egüeyi curusu güi —jei reta.

<sup>31</sup>Jae ramiño vi sacerdote reta itenondegua reta jare mboroyocui re oporomboe vae reta imiari uyupe yave, oyoyai reta.

—Jae uepí ñru vae reta —jei reta—. Ërei ipuere'ã jae uyerepí. <sup>32</sup>Jae co Cristo, Tumpa ombou vae yave, jae co Israel pegua reta juvicha guasu yave, tugüeyi añave curusu güi, yaecha vaerã, jare yarovia vaerã —jei reta.

Jare Jesús ndive uyecutu ñugüinoi vae reta vi jei icavi mbae vae chupe.

### Jesús umano

(Mt 27.45-56; Lc 23.44-49; Jn 19.28-30)

<sup>33</sup>Jare guarasi ara mbite güive mbapí ora rupi uñemipitumimbi opaete ivi pe. <sup>34</sup>Jayave mbapí ora ma caaru yave, Jesús ñneeäta reve jei:

—Eloi, Eloi, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

<sup>35</sup>Amocue joco pe ñugüinoi vae uyandu jare jei tēi:

—Mase, Elías ueni.

<sup>36</sup>Jare penti vae osi oo umãqui esponja vinagre pe, jare oñono ivira re, jare omondo Jesús iyuru coti.

—Peãro —jei—. Yaecha ou Elías umbigüeyi vaerã —jei.

<sup>37</sup>Jayave Jesús tanta usapicai, jare umano. <sup>38</sup>Jayave Tumpa jo umbiyao vae osoro mbite rupi ivate güi ivi coti. <sup>39</sup>Jare sundaro reta juvicha Jesús jovai uyemboi oĩ vae uecha yave quirãi usapicai jare umano, jei:

—Añeteñoi yepe, cua cuimbae co jae Tumpa Tai.

<sup>40</sup>Jare amocue cuña reta umae ñugüinoi mbiri güi. Cua reta ipite pe ñugüinoi María Magdalena, Salomé jare María. Cua María imembi reta co jae Jacobo tairusu vae jare José. <sup>41</sup>Jesús Galilea pe icose yave, cua cuña reta yugüiraa jae ndive uyeyocui vaerã chupe. Jare jeta ñru cuña yugüeru jae ndive Jerusalén pe vae reta joco pe ñugüinoi vi.

**José oñono Jesús jetecue teögüeriru pe**  
(Mt 27.57-61; Lc 23.50-56; Jn 19.38-42)

<sup>42</sup>Jocua ara opaete judío reta uyeyapicatu ñugüinoi piareve peguarã. Echa'ã piareve pe co mbutuu ara. Jáeramo guarasi uique ma yave, <sup>43</sup>penti cuimbae tenta guasu Arimatea pegua José jee vae uñemiatangātu oo Pilato pe, jare uyerure chupe Jesús jetecue re. José co jae penti mburuvicha. Opaete tenta guasu pegua reta uipiũ cua José. Jae uãro ico Tumpa iporoyocua. <sup>44</sup>Jare Pilato ipiacañi Jesús umano ma vae re. Jayave ueni sundaro reta juvicha, jare upirandu chupe quirãi yave ra umano Jesús. <sup>45</sup>Jare sundaro reta juvicha umimbeu chupe. Jayave Pilato jei José pe:

—Ndepuere nderaa Jesús jetecue.

<sup>46</sup>Jayave José ogua nieso. Jare umbigüeyi ma yave Jesús jetecue, oñoma nieso pe. Jayave oñono penti teögüeriru itape uyeyoo vae pe, jare umbiyapayere ita tuicha vae teögüeriru jonque re. <sup>47</sup>Jare María Magdalena jare José ichi María jee vae uecha quiape oñono Jesús jetecue.

**Jesús icove ye**  
(Mt 28.1-10; Lc 24.1-12; Jn 20.1-10)

**16** <sup>1</sup>Mbutuu ara uasa ma yave, María Magdalena, Jacobo ichi María jee vae jare Salomé ogua mbae ipiche cavi vae, jare yugüiraa uipichi vaerã Jesús jetecue re. <sup>2</sup>Jare neimbove asi domingo ara pe cua cuña reta yugüiraa teögüeriru coti. <sup>3</sup>Jare jei reta uyupe:

—¿Quía ra umbisirita yandevé ita tuicha vae teögüeriru jonque güi?

<sup>4</sup>Èrei umae reta yave, uecha ita uyembisiri ma teögüeriru jonque güi. Jocua ita tuicha co. <sup>5</sup>Jare uique reta yave teögüeriru pe, uecha penti cunumi uguapi oĩ iyacata coti. Jemimonde pucu jare tĩ. Jare ipiacañi reta jese. <sup>6</sup>Èrei cunumi jei chupe reta:

—Agüiye pepiacañi. Peeca co peĩ Jesús Nazaret pegua uyecutuca curusu re vae. Jae icove ye ma ou umanocue vae reta ipite güi. Mbaeti ma cua pe oĩ. Mase, pemae jendacue re —jei—. <sup>7</sup>Pecua pere jemimboe reta pe jare Pedro pe: ‘Jae oota perenonde Galilea pe. Joco pe peechata, jae jei peve vae rami’ —pere chupe reta, jei.

<sup>8</sup>Jayave cuña reta oẽ teõgüeriru güi, jare tanta osi yugüiraa. Uquiye ramo umbipi uriri. Jare jei'ã mbae ave quía pe.

**María Magdalena uecha Jesús**  
(*Jn 20.11-18*)

<sup>9</sup>Jesús icove ye ou umanocue vae reta ipite güi neimbove asi domingo ara pe. Jayave uyeechaca tenonde ete María Magdalena pe. Tenonde yave Jesús umbisiri siete año reta cua cuña güi. <sup>10</sup>María oo umimbeu Jesús ndive yugüirecose vae reta pe. Jae reta ipiatiti ramo uyao ñugüinoi. <sup>11</sup>María jei chupe reta:

—Jesús icove ye ma oĩ. Aecha ma —jei chupe reta.  
Ërei uyandu yave, güirovia'ã reta.

**Mocui jemimboe reta uecha Jesús**  
(*Lc 24.13-35*)

<sup>12</sup>Cua jaicue rupi Jesús uyeechaca mocui jemimboe reta pe, jae reta yugüiraa rambueve tape rupi tenta mbae vae coti. Ambie vae echa Jesús chupe reta. <sup>13</sup>Jae reta yugüeru ye tenta guasu pe umimbeu ñru reta pe. Ërei jeseve güirovia'ã reta.

**Jesús oyocui jocua once jemimboe reta**  
(*Mt 28.16-20; Lc 24.36-49; Jn 20.19-23*)

<sup>14</sup>Cua jaicue rupi Jesús uyeechaca jocua once jemimboe reta pe etei, jae reta ucaru ñugüinoi rambueve, jare uñeengata chupe reta, upurugüirovia'ã jare ipiatanta ramo. Echa'ã ñru vae reta uecha Jesús, icove ye yave ou umanocue vae reta ipite güi, jare umimbeu tẽi jemimboe reta pe. Ërei jae reta güirovia'ã. <sup>15</sup>Jayave Jesús jei chupe reta:

—Pecua opaete ivi rupi. Pemimbeu Tumpa ñnee icavi vae opaete ivi pegua reta pe —jei—. <sup>16</sup>Jocua güiroviata jare uyembibautizacata vae uyembiasacata. Ërei jocua güirovia'ã vae ucañiteita co —jei—. <sup>17</sup>Jare ñru vae reta uechata güirovia vae reta uyapo ñugüinoi cua nunga miacañi reta. Cheree re jae reta umbisirita año reta oya jese vae reta güi. Uyeminguetata ambie ñee pe. <sup>18</sup>Uipisita mboi reta. Jou yave imbayachi vae, ndarau mbae uyeyapo chupe reta. Oñonota ipo imbaerasi vae reta re umbigüera vaerã —jei chupe reta.

**Jesús oo ara pe**  
(*Lc 24.50-53*)

<sup>19</sup>Jayave yandeYa opa uyemingueta yave jae reta ndive, oo ara pe, jare uguapi Tumpa iyipi pe iyacata coti. <sup>20</sup>Jare jemimboe reta yugüiraa umimbeu Tumpa ñnee opaete que rupi. Jare yandeYa ombori, jare uicuaaca ñru vae reta pe jemimboe reta jei vae añete vae miacañi reta uyapo vae rupi. Jaeño ma.

# EL SANTO EVANGELIO SEGUN SAN LUCAS

---

## Lucas uicuatía Teófilo pe

**1** <sup>1</sup>Jeta vae umimbeu ma uicuatía reve opaete yandepite pe uyeyapo vae regua. <sup>2</sup>Jocua uyeyapo vae iyipi güive uecha vae reta jucuarái umimbeu yandeve. Echa'ã jae reta umimbeu Tumpa iñee ñru vae reta pe. <sup>3</sup>Jáeramo icavi echa cheve che vi aicuatía vaerã ndeve, mburuvicha Teófilo, amimbeu vaerã ndeve quirái opaete uyeyapo. Echa'ã che aicuaa cavi opaete iyipi güive uyeyapo vae. <sup>4</sup>Aicuatía añ ndeve cua, ndicuaa vaerã añete co jocua ndiyemboe jese vae.

## Juan oata vae regua

<sup>5</sup>Herodes ico yave ivi Judea pegua reta juvicha guasurã, ico vi penti sacerdote Zacarías jee vae. Jae co sacerdote penti ati Abías jee vae pegua. Zacarías jembireco co jae Aarón inemoñaeta reta pegua jare jee co Elisabet. <sup>6</sup>Zacarías jare jembireco uyapo jupi vae jare jucuarái umbiyerovia Tumpa. Echa'ã jecuaeño uyapo yandeYa iporoyocui reta. Mbaeti quía ipuere umbijeco reta mbae re. <sup>7</sup>Ñrei mbaeti co Zacarías isambiai. Echa'ã Elisabet imembi mbae vae co. Jare Zacarías jare Elisabet ucuacuaa ete ma.

<sup>8</sup>Penti ara penti ati Abías jee vae pegua sacerdote reta uparaviqui ñgüiinoi Tumpa jo pe. Jáeramo Zacarías uyapo oñ iparaviqui joco pe. <sup>9</sup>Jare jocua ara Zacarías iparaviqui co uique vaerã yandeYa jo japipe pe etei uapi vaerã mbae ipiche cavi vae. Echa'ã jecuaeño uyapo jucuarái sacerdote reta. <sup>10</sup>Jare jeta Israel pegua reta yatí ma uyerure ñgüiinoi Tumpa jo oca pe, Zacarías mbae ipiche cavi vae uapi oñ rambueve. <sup>11</sup>Jare uyecuaa Zacarías pe penti ángel yandeYa pe uyeyocui vae. Ángel uyemboi oñ mbae ipiche cavi vae imesa iyacata coti. <sup>12</sup>Jare Zacarías uecha yave ángel, ipiacañi jare uquiye vi. <sup>13</sup>Ñrei ángel jei chupe:

—Agüiye equiye, Zacarías. Tumpa uyandu ma ndiyerure, jare nembireco Elisabet imembita ndeve cuimbae. Jare nembijeeta Juan —jei—. <sup>14</sup>Jare nde ndiyeroviata co tuicha. Jare jeta vi uyeroviata jae oa vae regua —jei ángel

Zacarías pe—. <sup>15</sup>Echa'ã yandeYa umbutuichacata co. Jae ndarau etei ucau. Jare tineeta Espíritu Santo pe ichi güi oa güive —jei chupe—. <sup>16</sup>Jare umbiyerovata yandeYa Tumpa coti jeta Israel pegua reta —jei—. <sup>17</sup>Jae oota yandeYa jenonde uauca vaerã tu reta pe isambiai reta jare Tumpa jei vae uyapo'ã vae reta uyeyapo vaerã iyaracuaa vae retarã jare jupi vae retarã. Jucuarãi uyapota, Israel pegua reta uãro vaerã yandeYa. Jae icota Elías icose vae rami jare güinoita mbaepuere Elías güinoise vae rami —jei ángel Zacarías pe.

<sup>18</sup>Jayave Zacarías jei ángel pe:

—¿Quirãita pa aicuaa añetete ra cua nde ndere cheve vae? Echa'ã che acuacuaa ete ma jare chembireco ucuacuaa ete ma vi —jei.

<sup>19</sup>Jayave ángel jei ye Zacarías pe:

—Che co jae Gabriel. Che ayeyocui Tumpa pe. Tumpa chembou chemiari vaerã ndeve jare amimbeu vaerã ndeve cua ñee icavi vae —jei chupe—. <sup>20</sup>Mase, niñeeta'ã ndepita cua amimbeu ndeve vae uyeyapo regua. Echa'ã nderovia'ã che jae ndeve vae. Ërei che jae ndeve vae uyeyapota co ara ou uyeyapo vaerã yave —jei.

<sup>21</sup>Jare Israel pegua reta uãro ñugüinoi Zacarías oẽ vaerã Tumpa jo güi, jare ipiacañi reta quirãi Zacarías upita ima Tumpa jo japipe pe. <sup>22</sup>Jare Zacarías oẽ yave, ipuere'ã omoẽ iñee chupe reta. Jáeramo jae reta uicuaa Zacarías uecha mbae Tumpa jo pe oĩ rambueve. Echa'ã jae umupüa ipo chupe reta. Ërei ipuere'ã etei mbae jei chupe reta.

<sup>23</sup>Jare opa ma yave Zacarías iparaviqui Tumpa jo pe, oo ye jenta pe.

<sup>24</sup>Jare mbovi ara rupi Zacarías jembireco Elisabet ipurúa. Jayave Elisabet uñemi pandepo yasi jenta pe. Echa'ã jae jei:

<sup>25</sup>—Cuarãi yandeYa uyapo cheve. Ima ma chemara ñru vae reta güi chemembĩ'ã etei ramo. Ërei añave yandeYa chembori agüiye vaerã chemara chugüi reta —jei.

### Jesús oata vae regua

<sup>26</sup>Jare Elisabet seis yasi ma ipurúa yave, Tumpa ombou ángel Gabriel tenta guasu Nazaret ivi Galilea pegua pe <sup>27</sup>María ipi. María co jae penti cuñatai güireco'ã etei cuimbae vae. Ërei jae jei ma umenda vaerã José ndive. José co jae penti David iñemoñaeta reta pegua. <sup>28</sup>Jare ángel uique María oĩ vae pe jare jei chupe:

—Iyerovia. YandeYa ipiacavi ndeve. YandeYa oĩ nde ndive. YandeYa nemivendise ete ñru cuña reta güi —jei.

<sup>29</sup>María cua uyandu yave, ipiacañi. Echa'ã uicuaa'ã mbae ra uipota jei ángel jei chupe vae. <sup>30</sup>Jayave ángel jei chupe:

—Agüiye equiye, María. Echa'ã Tumpa ipiacavi ndeve —jei—. <sup>31</sup>Mase, ndepuruata co jare nemembita. Jare nembijeeta nemembĩ Jesús —jei María pe—. <sup>32</sup>Jae güinoita mbaepuere tuicha vae, jare jeeta co Tumpa Tai. Jare yandeYa Tumpa uyapota Israel pegua reta juvicha guasurã itenondegua

David rami —jei—. <sup>33</sup>Jare jae icota Jacob ñnemoñaeta reta juvicha guasurã jaeño mai pegua. Jare jae iporoyocuia ndarau opa —jei ángel chupe.

<sup>34</sup>Jayave María jei ángel pe:

—¿Quirãita pa uyeyapo cua? Echa'ã ndei areco cuimbae —jei.

<sup>35</sup>Jayave ángel jei María pe:

—Espíritu Santo outa ndeve. Tumpa imbaepuere rupi cua uyeyapota ndeve. Jáeramo nemembi oata iyoa mbae reve jare jeeta co Tumpa Tai —jei—. <sup>36</sup>Mase, nerentarã Elisabet ipurúa vi, yepe tẽi ucuacuaa ete ma. Seis yasi ma ipurúa oĩ, yepe tẽi ñru vae reta umbijee 'Imembi mbae vae' —jei—. <sup>37</sup>Echa'ã Tumpa ipuere uyapo opaete —jei chupe.

<sup>38</sup>Jayave María jei ángel pe:

—Mase, che co jae yandeYa pe ayeyocui vae. Tome tuyeyapo cheve nde ndere cheve vae rami —jei.

Jayave ángel oo ye María oĩ vae güi.

### María opou Elisabet pe

<sup>39</sup>Jayave mbovi ara rupi María oẽ oo voi jenta güi penti tenta guasu ivitu reta re Judea pegua pe. <sup>40</sup>Jare oo uvãe Zacarías jenta pe, jare umbisaluda Elisabet.

<sup>41</sup>Jare Elisabet uyandu yave María jei chupe vae, Elisabet imembi omi rai jie pe. Jare Elisabet tinee Espíritu Santo pe. <sup>42</sup>Jayave Elisabet ñneeãta reve jei:

—Tumpa nemivendise ete ñru cuña reta güi. Jare umivendiseta nemembi —jei—. <sup>43</sup>Jare yepe tẽi nde co jae cheYa ichirã, ñrei nde ndeyu ndepou chepi.

Chepiacañi cua re —jei—. <sup>44</sup>Mase, nde nembipi chemingqueta rupive, chemembi omi rai cherie pe uyerovia ramo —jei Elisabet María pe—. <sup>45</sup>Nde nderovia yandeYa uyapota co jae jei ndeve uyapota vae. Jáeramo jae nemivendise ma —jei.

<sup>46</sup>Jayave María jei:

“Ambiadora yandeYa.

<sup>47</sup>Ayerovia Tumpa re.

Jae co chembiãsa vae.

<sup>48</sup>Yepe tẽi che cheparavete, ñrei jae cheparareco.

Mase, añave güive opaete vae jeita Tumpa chemivendise co.

<sup>49</sup>Echa'ã Tumpa imbaepuere tuicha co.

Jae uyapo icavi vae cheve imbaepuere pe.

Jae co iyoa mbae vae jee vae.

<sup>50</sup>Jare Tumpa uiparareco opaete uipiũ Tumpa vae reta.

<sup>51</sup>Uicuaaca quirãi imbaepuere tuicha co.

Opa umiai uyembicate vae reta.

<sup>52</sup>Jae uequi imbaepuere mburuvicha reta güi,

jare umbutuichaca uñemimichi vae reta.

<sup>53</sup>Umingapii iyembai vae reta tembũ icavi vae pe.

Ñrei umee'ã co mbae icocatu vae reta pe.

<sup>54</sup>Ombori Israel pegua uyeyocui chupe vae reta.

Echa'ã imandúa quirãì jei uipararecota co.

55 Echa'ã jucuarãì jei yandetenondegua reta pe - jae reta co Abraham jare ñemoñaã reta.

Echa'ã jei chupe reta uipararecota co jaeño mai pegua” —jei María.

56 Jare María upita Elisabet ipi mbapì yasi pegua. Jayave ramo oo ye jenta pe.

### Juan oa vae regua

57 Jare ara ou uvãe yave Elisabet imembi vaerã, oa imembi cuimbae.

58 Jare jerãcua Elisabet jentaigua reta jare jentarã reta pe quirãì yandeYa uiparareco Elisabet. Jare jae reta uyerovia Elisabet ndive.

59 Jare sambiaì ocho ara ma güinoi yave, jentarã reta yugüeru umicircuncidaca vaerã. Jare jae reta uipota oñono jese tu jee Zacarías.

60 Ërei sambiaì ichi jei chupe reta:

—Jucuarãì'ã co. Yambijeeta co Juan.

61 Ërei jae reta jei chupe:

—Mbaeti etei co nerentarã jocua tee güinoi vae.

62 Jayave jae reta ñãca omomi Zacarías pe upirandu vaerã chupe mbae nunga tee ra uipota oñono tai re. 63 Jayave Zacarías uechaca chupe reta jae uipota mbae uicuatía jese vae. Jayave uicuatía cuarãì: “Jee co Juan.” Jare opaete joco pe ñugüinoi vae reta ipiacañi. 64 Jayave jupivoi Zacarías ipuere omoë ye ñee. Jare imiari chupe reta umbiadora reve Tumpa. 65 Jare opaete Zacarías jentaigua reta ipiacañi cua re. Jare opaete cua uyeyapo vae jerãcua opaete ivitu Judea pegua reta rupi. 66 Jare opaete uyandu vae reta ipia pe uyemingueta cua uyeyapo vae re jare jei reta iyupe:

—¿Mbae nunga sambiaì ra co aipo cua? Echa'ã yandeYa imbaepuere oï jae ndive.

### Zacarías umimbeu Tumpa ñee

67 Jayave Zacarías - jae co Juan tu - tinee Espíritu Santo pe jare umimbeu Tumpa ñee. Echa'ã jae jei:

68 “Tuyembidoraca yandeYa Tumpa.

Yande co jae Israel pegua reta.

Echa'ã Tumpa ipiacavi yandeve ramo, yanderepi ma.

69 Jae ombou yandeve jembiocui David ñemoñaã reta pegua yanembiasa vaerã imbaepuere tuicha vae pe.

70 Jucuarãì Tumpa jei iyipi güive Tumpa ñee umimbeu vae reta rupi. Jae reta uñeño tee Tumpa peguarã.

71 Tumpa yanembiasata yanderovaicho reta güi.

Jae yanembiasata opaete ñanemitarëi vae reta güi. 72-73 Tumpa uiparareco Abraham jare ñru yandetenondegua reta.

Echa'ã Tumpa etei uyemingueta Abraham ndive, jare añave imandúa ma jocua jei uyapota vae re.

- 74 Jáeramo umeeta yandeve yayeyocui vaerã chupe yaquiye mbae reve. Echa'ã jae yanderepita yanderovaicho reta güi” —jei Zacarías—.
- 75 “Tumpa ñaneño teeta iyupeguarã jare yayapota jupi vae, jare jae icota yande ndive cua ivi pe yaico rambueve.
- 76 Jare ñru vae reta uyemingueta nderé yave, jeita: ‘Jae co penti Tumpa ñee umimbeu vae.’ Echa'ã nde, cherai, ndeota yandeYa jenonde ndiyapicatu vaerã japerã.
- 77 Nemimbeuta yandeYa imbae reta pe quirã Tumpa umbiasata chupe reta imbaeyoa reta jare jucuarã uyembiasacata.
- 78 Cuarã Tumpa uyapota, yandeparareco ramo. Jare ipuruparareco jeco pegua ombouta yanembiasa vaerã, opa ara rupi ombou guarasi yanembori vaerã rami.
- 79 Jae yanemborita guarasi jembipe yanembori rami. Echa'ã guarasi umee yandeve tembipe agüiye vaerã yaico pītumimbi pe. Jae yanemborita agüiye vaerã yaquiye mano güi. Jae yanemborita yaico vaerã yandepiacatu reve” —jei Zacarías.
- 80 Jare sambiaí ucuacuaa, jare uñemiatangātu Tumpa coti. Jare ico ñana rupi uyecuaa Israel pegua reta pe regua.

### Jesús oa vae regua

(Mt 1.18-25)

**2** <sup>1</sup>Juan ichi güi oa yave, romano reta juvicha guasu Augusto César jee vae oyocui opaete vae uyepapaca vaerã. <sup>2</sup>Jaeramo opaete vae uyepapaca Cirenio ico ivi Siria pegua reta juvicha guasurã yave. <sup>3</sup>Jare opaete vae yugüiraa itenondegua jenta guasu pe uyepapaca vaerã.

<sup>4</sup>Jare José vi oo Nazaret Galilea pegua güi tenta guasu Belén Judea pegua pe. Echa'ã jae co David ñemoñaá reta pegua, jare David jenta guasu co jae Belén. <sup>5</sup>Jáeramo José oo Belén pe uyepapaca vaerã, jare güiraa jembireco María. Jare María ipurúa ma. <sup>6</sup>Jare Belén pe ñugüinoi rambueve, ara ou uvãe María imembi oa vaerã. <sup>7</sup>Jare María imembiripi cuimbae oa. Jayave María oñoma penti ñomaa pe jare umbiyapacua penti maemimba icaruariru pe. Echa'ã mbaeti co José jare María jendarã tenta pe.

### Ángel reta jare ovecha iyandarecoa reta

<sup>8</sup>Jare jocua pītū amocue ovecha iyandarecoa reta uyandareco ñugüinoi iovecha reta re ñana rupi coiño tenta guasu Belén güi. <sup>9</sup>Jare uyecuaa chupe reta penti ángel yandeYa pe uyeyocui vae, jare jembipe jae reta ñugüinoi vae pe. Echa'ã yandeYa imbaepuere uyecuaa chupe reta. Jare jae reta uquiye ete. <sup>10</sup>Jayave ángel jei chupe reta:

—Agüiye pequiye. Mase, amimbeuta peve ñee icavi vae tuicha rupi piyerovia vaerã. Cua ñee opaete vae peguarã co —jei—. <sup>11</sup>Echa'ã cua pītū oa upurumbiasa vae David jenta guasu pe. Jae co yandeYa Cristo, Tumpa ombou



vae —jei ángel chupe reta—. <sup>12</sup>Jare cuarái picuaata: Pevãeta sambiai uñeñoma oĩ penti ñomaa pe jare uyapacua oĩ penti maemimba icaruariru pe —jei.

<sup>13</sup>Jare jupivoi uyecuaa jocua ángel ndive jeta ete ángel reta. Opaete vae umbiadora Tumpa. Echa'ã jei reta:

<sup>14</sup>“Tuyembioraca Tumpa ara pe oĩ vae, jare ivi pegua reta Tumpa ipiacavi chupe reta vae tipiacatu” —jei.

<sup>15</sup>Jare ángel reta yugüiraa ye yave chugüi reta ara pe, ovecha iyandarecoa reta jei uyupe:

—Yaa Belén pe yaecha vaerã cua uyeyapo vae. Echa'ã yandeYa uicuaaca yandave —jei reta.

<sup>16</sup>Jayave javoi pegua yugüiraa joco pe, jare uvãe María jare José jare sambiai. Jocua sambiai uyapacua oĩ maemimba icaruariru pe. <sup>17</sup>Jare uecha ma yave, yugüiraa ye umimbeu ñru vae reta pe ángel jei chupe reta jocua sambiai re vae. <sup>18</sup>Jare opaete uyandu vae reta ipiacañi ovecha iyandarecoa reta umimbeu chupe reta vae re. <sup>19</sup>Ërei María imandúa opaete cua re jare ipia pe uyemingueta cavi jese. <sup>20</sup>Jare ovecha iyandarecoa reta yugüiraa ye Belén güi. Umbiadora reta Tumpa jare umee yasurupai chupe opaete uyandu jare uecha vae re. Echa'ã jae reta uecha ma sambiai ángel jei chupe reta rami.

### Güiraa reta Jesús Tumpa jo pe

<sup>21</sup>Jare sambiai ocho ara ma güinoi yave, tu jare ichi umicircuncidaca jare umbijee Jesús. Echa'ã ángel umimbeu María pe jucuarái umbijee vaerã ndei María ipurúa mbove.

<sup>22</sup>Jare ara ou uvãe María oo vaerã yandeYa jo pe uyeyoeca vaerã yandeYa coti. Echa'ã jucuarái uyecuatía oĩ Moisés iporoyocui pe cuña imembi vae uyapo vaerã. Jayave tu jare ichi güiraa Jesús tenta guasu Jerusalén pe yandeYa jo pe oñonoca tee vaerã Tumpa peguarã. <sup>23</sup>Echa'ã yandeYa iporoyocui pe uyecuatía oĩ cuarái: “Cuña imembiripi cuimbae oa yave, sambiai uñeñono teeta yandeYa peguarã.” Jucuarái uyecuatía oĩ. <sup>24</sup>Jáeramo Jesús tu jare ichi uyucaca umee vaerã yandeYa pe mocui güira tórtola jee vae ani mocui picasu tairusu vae. Echa'ã jucuarái jei uyapo vaerã mboroyocui yandeYa umee chupe reta vae pe.

<sup>25</sup>Jare jocua ara penti cuimbae Jerusalén pegua Simeón jee vae oĩ Tumpa jo pe. Simeón jecuaeño uyapo jupi vae jare umbiadora Tumpa. Jae uãro oĩ omborita Israel pegua reta vae ou vaerã. Jare jae tinee Espíritu Santo pe.

<sup>26</sup>Jare Espíritu Santo uicuaaca ma Simeón pe quirái ndarau umano ndei uecha Cristo yandeYa ombouta vae mbove. <sup>27</sup>Jare jocua ara Espíritu Santo uicuaaca ma Simeón pe oo vaerã uique Tumpa jo pe. Jare Jesús tu jare ichi güiraa Jesús uruique Tumpa jo pe uyapo vaerã mboroyocui jei vae rupi.

<sup>28</sup>Jayave Simeón ovoi Jesús jare umbiadora Tumpa. Jae jei:

<sup>29</sup>“CheYa, jecuaeño ayeyocui ndeve.

Añave ndepuere nemaño cheré amano vaerã chepiacatu reve.

Echa'ã cuarái nde ndere cheve uyeyapota co.

<sup>30</sup>Aecha ma upurumbiasa vae nde nembou vae.

<sup>31</sup>Nde ndiparavo opaete vae peguarã.

<sup>32</sup>Jae co penti tembipe rami.

Ime tembipe yave, yaecha cavi mbaembae.

Jae ramiño vi jae ndecuaaca cavita judío mbae vae reta pe.

Jare Israel pegua reta uyepiucata jae jeco pegua.

Echa'ã Israel pegua reta nembae reta co” —jei Simeón.

<sup>33</sup>Jare José jare Jesús ichi ipiacañi Simeón jei Jesús re vae re. <sup>34</sup>Jare Simeón jei Tumpa tumivendise José jare María. Jayave jei María pe:

—Mase, Tumpa uiparavo ma cua nemembi. Jae uicuaacata Israel pegua reta pe quía co jae. Ërei jeta Israel pegua reta güirírota jare jeta vae güiroviata jese —jei—. <sup>35</sup>Echa'ã uyecuaata opaete vae ipia pe oĩ vae. Jare nde etei ndepiatiti eteta jese —jei Simeón María pe.

<sup>36</sup>Jare ico vi penti cuña Ana jee vae. Jae co Fanuel tayi. Jocua Fanuel co jae penti ati Aser jee vae pegua. Ana co jae Tumpa iñee umimbeu vae. Ucuacuaa ete ma. Jaeño siete año ico ime ndive. <sup>37</sup>Echa'ã jayave ime umano chugüi. Ana güinoi ma ochenta y cuatro año. Jecuaño ico Tumpa jo pe jare uyeyocui Tumpa pe. Echa'ã uyecuacu tembú güi jare uyerure Tumpa pe ara rupi jare pĩtu rupi. <sup>38</sup>Jae ou uvãe José jare María jare Jesús ñugüinoi vae pe. Jayave jae vi umee yasurupai yandeYa pe, jare imiari Jesús re opaete Jerusalén pegua uãro ñugüinoi Cristo ou uepi vaerã vae reta pe.

### Yugüiraa ye Nazaret pe

<sup>39</sup>Jare José jare María uyapo yandeYa jo pe opaete yandeYa iporoyocui jei uyapo vaerã vae. Jayave yugüiraa ye Galilea pe jae jenta guasu Nazaret pe. <sup>40</sup>Jare sambiaí ucuacuaa jare jatangātu. Iyaracuaa catu vi. Jare Tumpa ipiacavi oĩ jae ndive.

### Jesús Tumpa jo pe

<sup>41</sup>Jare opa año Jesús tu jare ichi yugüiraa Jerusalén pe pascua ara pe.

<sup>42</sup>Jare Jesús doce año ma güinoi yave, oo jae reta jupíe pascua peguarã, jae reta jecoño mai uyapo vae rami. <sup>43</sup>Jare uasa ma yave pascua, Jesús tu jare ichi oẽ Jerusalén güi yugüeru ye vaerã jenta pe. Ërei Jesús upita Jerusalén pe tu jare ichi uicuaa mbae reve. <sup>44</sup>Echa'ã jae reta jei tẽi Jesús ou co oĩ iguataĩru reta jupíe. Ërei caaru ma yave, ueca reta tẽi jentarã reta jare ĩru uicuaa vae reta ñugüinoi vae rupi. <sup>45</sup>Ërei uvãe'ã chupe. Jayave Jesús tu jare ichi yugüiraa ye Jerusalén pe ueca vaerã. <sup>46</sup>Jare mbapi ara ma uasa yave, uvãe reta chupe Tumpa jo pe. Jesús uguapi oĩ mboroyocui re oporombœ vae reta ipite pe. Uyapisaca oĩ jese reta jare upirandu chupe reta mbaembae re. <sup>47</sup>Jare opaete vae ipiacañi. Echa'ã Jesús uicuaa cavi opaete iporombœ jare ipuere umimbeu cavi chupe reta jae reta upirandu chupe mbae re yave. <sup>48</sup>Jare Jesús tu jare ichi uecha yave, jae reta vi ipiacañi. Jayave ichi jei Jesús pe:

—Chemembi, ¿maera pa ndiyapo cuarãi oreve? Mase, nderu jare che ndueca tõi opaete que rupi orepiatiti reve —jei.

<sup>49</sup>Jayave Jesús jei chupe reta:

—¿Maera pa chereca opaete que rupi? Icavi co apita vaerã cua pe ayapo vaerã cheRu iparaviqui. ¿Picuaa'ã pa cua? —jei chupe reta.

<sup>50</sup>Èrei jae reta uicuaa'ã mbae uipota jei jocua Jesús jei chupe reta vae. <sup>51</sup>Jayave Jesús ou ye Nazaret pe jae reta jupíe, jare jecuaño uyapo jae reta jei vae. Jare Jesús ichi imandúa opaete uyeyapo vae re. <sup>52</sup>Jare Jesús jecuaño ucuacuaa oo õi. Jare iyaracuaa catu. Jecuaño umbiyerovia Tumpa jare ñru vae reta vi.

### Juan upurumbibautiza vae umimbeu Tumpa ñnee

(Mt 3.1-12; Mr 1.1-8; Jn 1.19-28)

**3** <sup>1-2</sup>Jare Tiberio César quince año ma romano reta juvicha guasurã ico yave, Tumpa ombou ñnee Juan pe. Juan co jae Zacarías tai, jare ico ñana pe. Jocua ara reta pe Poncio Pilato ico Judea pegua reta juvicha guasurã, jare Herodes ico Galilea pegua reta juvicha guasurã, jare Herodes tivi Felipe jee vae ico ivi Iturea pegua reta jare ivi Traconite pegua reta juvicha guasurã, jare Lisantias ico ivi Abilinia pegua reta juvicha guasurã. Jare Anás jare Caifás yugüireco Israel pegua reta isacerdote tenondegua retarã. <sup>3</sup>Jayave Juan uguata ico opaete iäca Jordán iyipi rupi. Jare umimbeu opaete vae pe ueya vaerã iyemingueta icavi mbae vae ipia pe õi vae jare uyembibautizaca vaerã, Tumpa umbiasa vaerã chupe reta imbaeyoa reta. <sup>4</sup>Isafas co jae penti Tumpa ñnee aracae umimbeu vae. Jae uicuatía cuarãi:

“Jae ñneeäta reve jeita ñana rupi:

‘Piyapicatu yandeYa japerã.

Pemisimi tape’ —jeita—.

<sup>5</sup>‘Opaete jugua reta uñemitineeta ivi pe.

Jare opaete ivitu reta uyeyapota ñuu rami.

Jare tape ipãri vae reta uñemisimicata.

Jare tape quipe quipe vae reta ipecavita.

<sup>6</sup>Jare opaete vae uicuaata quirãi Tumpa ipuere upurumbiasa.’ ”

Jucuarãi uicuatía Isafas.

<sup>7</sup>Jare jeta vae yugüeru Juan õi vae pe uyembibautizaca vaerã. Jayave Juan jei chupe reta:

—Pe reta co jae mboi reta rami. ¿Quía pa umimbeu peve piyero vaerã Tumpa coti agüiye vaerã Tumpa uiporaraca peve? —jei—. <sup>8</sup>Piyapo icavi vae, jucuarãi picuaaca vaerã añetete peeya co piyemingueta icavi mbae vae pepia pe õi vae. Agüiye pere piyupe pepia pe: ‘Yandetenondegua co jae Abraham.’ Echa'ã che jae peve cua: Tumpa ipuere uyapo cua ita reta güi Abraham ñemoña retarã —jei Juan chupe reta—. <sup>9</sup>Yamiñaanga penti temiti. Temiti ía icavi'ã yave, iya uyasía japo reve jare uapi. Jae ramiño vi piyapo'ã yave icavi vae, Tumpa uiporaracata peve —jei.

<sup>10</sup>Jayave joco pe ñugüinoi vae reta upirandu Juan pe:

—¿Mbae pa nduyapota?

<sup>11</sup>Jayave Juan jei chupe reta:

—Ime yave quía mocui temimonde güinoi vae, tumee penti mbaeti temimonde güinoi vae pe. Jare ime yave quía jeta tembú güinoi vae, tumee mbaeti tembú güinoi vae pe —jei.

<sup>12</sup>Yugüeru vi Juan oĩ vae pe mburuvicha peguarã ocovara vae reta uyembibautizaca vaerã. Jae reta upirandu Juan pe:

—Oporomboe vae, ¿mbae pa nduyapota?

<sup>13</sup>Jayave Juan jei chupe reta:

—Agüiye ma pembiasa pecovara mburuvicha reta peocui vae güi.

<sup>14</sup>Sundaro reta vi upirandu Juan pe:

—¿Mbae pa nduyapota?

Jayave Juan jei chupe reta:

—Agüiye pemumburu ñru vae reta jare agüiye peapu ñru vae reta re. Jare agüiye jecuaño pipota jeta peruvicha reta umbiepi peve vae güi.

<sup>15</sup>Opaete vae uãro ñugüinoi Cristo ou vaerã, jare ipia pe uyemingueta quirã aramoi Juan co jae Cristo. <sup>16</sup>Jáeramo Juan jei chupe reta:

—Che pumbibautiza i pe. Ërei outa ipuere ete chegüi vae. Jupi'ã co che ayora vaerã ipipasa ichã. Jae pembibautizata Espiritu Santo pe jare tata pe —jei—. <sup>17</sup>Jae co trigo uipoo vae rami. Echa'ã trigo uipoo vae umbiveve trigo uequi vaerã iti. Jayave uñuvatu trigo jiru pe. Ërei uapi iti tata pe. Tata Cristo uiporuta vae opa mbae vae co —jei.

<sup>18</sup>Jare Juan jeta jei chupe reta umimbeu vaerã chupe reta ñee icavi vae. <sup>19</sup>Jare mburuvicha guasu Herodes umenda tivi Felipe jembireco Herodías jee vae ndive jare uyapo jeta mbae icavi mbae vae. Jare Juan ñeengueta Herodes pe opaete icavi mbae vae uyapo vae re. <sup>20</sup>Jayave Herodes uyapo ye icavi mbae vae. Echa'ã oñonoca Juan peresoriru pe.

### **Juan umbibautiza Jesús**

*(Mt 3.13-17; Mr 1.9-11)*

<sup>21</sup>Ërei ndei Juan uñeñonoca peresoriru pe mbove, penti ara Jesús ou Juan oĩ vae pe. Jare Juan ñru vae reta umbibautiza yave, umbibautiza vi Jesús. Jare Jesús uyerure Tumpa pe rambueve, ara uyepea. <sup>22</sup>Jare uyecuaa Espiritu Santo ugüeyi Jesús re picasu rami. Jayave uyendu ñee ara güi jei:

—Nde co jae cheRai nduau ete vae. Chembiyerovia ete —jei.

### **Jesús itenondegua reta**

*(Mt 1.1-17)*

<sup>23</sup>Jare Jesús güinoi ma treinta año rupi. Ñru vae reta ipia pe uyemingueta tẽi jae co José tai ete. José co jae Elí tai. <sup>24</sup>Elí co jae Matat tai. Matat co jae Leví tai. Leví co jae Melqui tai. Melqui co jae Jana tai. Jana co jae José tai. <sup>25</sup>José co

jae Matatías tai. Matatías co jae Amós tai. Amós co jae Nahum tai. Nahum co jae Esli tai. Esli co jae Nagai tai. <sup>26</sup>Nagai co jae Maat tai. Maat co jae Matatías tai. Matatías co jae Semei tai. Semei co jae José tai. José co jae Judá tai. <sup>27</sup>Judá co jae Joana tai. Joana co jae Resa tai. Resa co jae Zorobabel tai. Zorobabel co jae Salatiel tai. Salatiel co jae Neri tai. <sup>28</sup>Neri co jae Melqui tai. Melqui co jae Adi tai. Adi co jae Cosam tai. Cosam co jae Elmodam tai. Elmodam co jae Er tai. <sup>29</sup>Er co jae Josué tai. Josué co jae Eliezer tai. Eliezer co jae Jorim tai. Jorim co jae Matat tai. <sup>30</sup>Matat co jae Leví tai. Leví co jae Simeón tai. Simeón co jae Judá tai. Judá co jae José tai. José co jae Jonán tai. Jonán co jae Eliaquim tai. <sup>31</sup>Eliaquim co jae Melea tai. Melea co jae Mainán tai. Mainán co jae Matata tai. Matata co jae Natán tai. <sup>32</sup>Natán co jae David tai. David co jae Isaí tai. Isaí co jae Obed tai. Obed co jae Booz tai. Booz co jae Salmón tai. Salmón co jae Naasón tai. <sup>33</sup>Naasón co jae Aminadab tai. Aminadab co jae Aram tai. Aram co jae Esrom tai. Esrom co jae Fares tai. Fares co jae Judá tai. <sup>34</sup>Judá co jae Jacob tai. Jacob co jae Isaac tai. Isaac co jae Abraham tai. Abraham co jae Taré tai. Taré co jae Nacor tai. <sup>35</sup>Nacor co jae Serug tai. Serug co jae Ragau tai. Ragau co jae Peleg tai. Peleg co jae Heber tai. Heber co jae Sala tai. <sup>36</sup>Sala co jae Cainán tai. Cainán co jae Arfaxad tai. Arfaxad co jae Sem tai. Sem co jae Noé tai. Noé co jae Lamec tai. <sup>37</sup>Lamec co jae Matusalén tai. Matusalén co jae Enoc tai. Enoc co jae Jared tai. Jared co jae Mahalaleel tai. Mahalaleel co jae Cainán tai. <sup>38</sup>Cainán co jae Enós tai. Enós co jae Set tai. Set co jae Adán tai. Adán co jae Tumpa tai.

### Aña guasu umingueta Jesús uyavica vaerã tẽi chupe

(Mt 4.1-11; Mr 1.12-13)

**4** <sup>1</sup>Jare Jesús ou ye Jordán güi. Jae tinee Espíritu Santo pe. Jayave Espíritu Santo güiraa Jesús ñana pe. <sup>2</sup>Jare Jesús upita ñana pe cuarenta ara, jare aña guasu umingueta uyavica vaerã tẽi chupe. Jare jocua ara reta pe Jesús jou'ã mbae ave. Jáeramo jocua ara reta opa ma yave, iyembaí. <sup>3</sup>Jayave aña guasu jei Jesús pe:

—Nde co jae Tumpa Tai yave, ere cua ita pe uyeypapo vaerã mbiyaperã.

<sup>4</sup>Èrei Jesús jei chupe:

—Tumpa ñnee pe uyecuatía oĩ cuarãi: 'Icavi co ivi pegua reta jou vaerã mbiyape güinoi vaerã tecove. Èrei icavi ete co uyapisaca vaerã Tumpa ñnee re jare uyapo vaerã jei vae güinoi vaerã tecove opa mbae vae.' Jucuarãi uyecuatía oĩ —jei.

<sup>5</sup>Jayave aña guasu güiraa Jesús penti ivitu guasu ivate vae re jare uechaca chupe penti jeia pe opaete mburuvicha guasu reta iporoyocua ivi pe ñugüinoi vae reta. <sup>6</sup>Jayave aña guasu jei Jesús pe:

—Tamee ndeve mbaepuere ndiyeyapo vaerã opaete cua juvicha guasurã, opaete vae nembiadora vaerã. Echa'ã cua mbaepuere uñemee co cheve jare chepuere amee aipota amee chupe vae pe —jei—. <sup>7</sup>Nde ndiyeatica yave chembiadora vaerã, tamee ndeve nembraerã —jei.

<sup>8</sup>Jayave Jesús jei chupe:

—Esiri chegüi, Satanás. Echa'ã Tumpa iñee pe uyecuatía oĩ cuarãi: ‘Che co jae ndeYa Tumpa. Chembiadora. Jaeño cheve iyeyocui.’ Jucuarãi uyecuatía oĩ —jei.

<sup>9</sup>Jayave aña guasu güiraa Jesús Jerusalén pe jare umbuyupi Tumpa jo iyapite re. Jayave jei chupe:

—Nde co jae Tumpa Tai yave, ea cua güi. <sup>10</sup>Echa'ã Tumpa iñee pe uyecuatía oĩ cuarãi:

‘Tumpa oyocuita ángel reta uyandareco vaerã nderé.

<sup>11</sup>Ipo pe ndepisi ndeocota reta, agüiye vaerã ndepi uyererocua ita re.’ Jucuarãi uyecuatía oĩ —jei aña guasu chupe.

<sup>12</sup>Jayave Jesús jei chupe:

—Tumpa iñee pe uyecuatía oĩ cuarãi: ‘Che co jae ndeYa Tumpa. Agüiye mbae iyapo ndicuaa vaerã tuicha ra chepiaguasu.’ Jucuarãi uyecuatía oĩ —jei.

<sup>13</sup>Jare aña guasu opa ma umingueta yave uyavica vaerã tẽi chupe, usiri chugüi michi pegua.

### **Jesús umbipi iparaviqui**

*(Mt 4.12-17; Mr 1.14-15)*

<sup>14</sup>Jayave Jesús ou ye Galilea pe. Jare güinoi mbaepuere Espíritu Santo umee chupe vae. Jare jerãcua jese opaete jocua ivi rupi. <sup>15</sup>Jare jae oporombœ judío reta itupao reta pe jare opaete vae umbiadora.

### **Jesús Nazaret pe**

*(Mt 13.53-58; Mr 6.1-6)*

<sup>16</sup>Jayave ou ye Nazaret pe - joco pe jae ucuacuaa. Jayave mbutuu ara pe uique judío reta itupao pe uyapoñoi rami, jare uyemboi Tumpa iñee umingueta vaerã. <sup>17</sup>Jare uñemee Jesús pe penti libro. Jocua libro pe oĩ Tumpa iñee araca umimbeu vae Isaías uicuatía vae. Jayave Jesús uipea libro jare uvãe umingueta vaerã. Jayave umingueta cuarãi:

<sup>18</sup>“YandeYa iEspíritu ime che ndive oĩ.

Jae cheparavo amimbeu vaerã ñee icavi vae iparavete vae reta pe.

Jae chembou ambipiãcatu vaerã ipiatiti vae reta.

Chembou vi amimbeu vaerã pereso reta pe ipuere ma uyeyora, jare amimbeu vaerã jesa mbae vae reta pe uma vaerã.

Chembou vi ayora vaerã uiporara vae reta uiporaraca chupe vae reta imbaepuere güi.

<sup>19</sup>Chembou vi amimbeu vaerã yandeYa ipiacavita opaete vae pe.” Jucuarãi umingueta. <sup>20</sup>Jayave Jesús uyuquenda ye libro jare umee ye libro iyandarecoa pe. Jayave uguapi ye. Jare opaete tupao pe ñugüinoi vae reta uma ngatu Jesús re. <sup>21</sup>Jayave Jesús jei chupe reta:

—Cua ara cua uyecuatía oĩ vae uyeyapo ma perovaque.

<sup>22</sup>Jare opaete joco pe ñugüinoi vae reta uyemingueta cavi jese. Echa'ã ipiacañi iñee icavi ete vae re. Jae reta jei:

—¿Jae'ã yera cua José tai?

<sup>23</sup>Jayave Jesús jei chupe reta:

—Pereta co cheve jocua yamijaanga reve yae vae: ‘Nde co jae penti upurupiano vae. Jáeramo ñepiano. Echa'ã jerãcua oreve quirãi mbaembae ndiyapo Capernaum pe. Jáeramo iyapo vi cua pe ndeivi pe’ —pereta, jei—. <sup>24</sup>Añete che jae peve, ime yave quía Tumpa ñee umimbeu jentaigua reta pe vae, jae reta güirovia'ã —jei—. <sup>25</sup>Añete che jae peve, jeta cuña ime umano vae reta yugüireco Israel pe Elías ico rambueve. Mbapi año jare seis yasi oqui'ã jare caruai opaete que rupi —jei—. <sup>26</sup>Ërei Tumpa omondo'ã Elías penti cuña ime umano vae Israel pegua pe. Jaeño omondo penti cuña ime umano vae tenta guasu Sarepta Sidón pegua vae pe —jei Jesús chupe reta—. <sup>27</sup>Jae ramiño vi jeta ipire ocui vae reta yugüireco Israel pe Tumpa ñee aracae umimbeu vae Eliseo ico rambueve. Ërei Tumpa omondo'ã Eliseo umbigüera vaerã penti ipire ocui vae Israel pegua. Jaeño omondo umbigüera vaerã Naamán, jare Naamán co jae Siria pegua —jei.

<sup>28</sup>Cua uyandu reta yave, opaete tupao pe ñugüinoi vae reta pochi ete Jesús pe. <sup>29</sup>Jayave jae reta upüa jare güiraa Jesús tenta guasu güi ivitu iyapite re omombo vaerã tēi ivi coti joco güi. Jocua tenta guasu oī ivitu guasu re. <sup>30</sup>Ërei Jesús uasa jae reta ipite rupi jare oo chugüi reta.

### Cuimbae aña oya jese vae

(Mr 1.21-28)

<sup>31</sup>Jayave Jesús oo tenta guasu Capernaum Galilea pegua pe. Joco pe Jesús oporomboe opaete mbutuu ara pe. <sup>32</sup>Jare uyapisaca jese vae reta ipiacañi iporomboe re. Echa'ã omboe reta mbaepuere güinoi vae rami. <sup>33</sup>Jare uique oo tupao pe cuimbae aña oya jese vae. Jae ñeeãta reve jei:

<sup>34</sup>—¿Maera pa ndeyu oremambeco, Jesús Nazaret pegua? ¿Ndeyu pa oremicãñitei vaerã? Che nducuaa. Nde co jae Tumpa Tai —jei.

<sup>35</sup>Jayave Jesús uñeengata chupe.

—¡Nequüi! ¡Esiri chugüi! —jei.

Jayave opaete vae jovaque aña uiti ivi re cuimbae jare usiri chugüi. Ueya caviño. <sup>36</sup>Jare opaete uecha vae reta ipiacañi, jare upirandu uyupe: —¿Mbae nunga ñee pa cua? Echa'ã mbaepuere pe oyocui aña reta usiri vaerã oya jese vae reta güi, jare jae reta uyapo oyocui vae —jei reta.

<sup>37</sup>Jare jerãcua jesequa opaete jocua ivi rupi.

### Jesús umbigüera Simón jaicho

(Mt 8.14-15; Mr 1.29-31)

<sup>38</sup>Jare Jesús tupao güi oē ye yave, uique Simón jenta pe. Jare Simón jaicho tanta jacu oī. Ìru joco pe ñugüinoi vae reta uyerure Jesús pe umbigüera vaerã. <sup>39</sup>Jayave Jesús oo cuña oī vae pe, jare jei jacu upita vaerã chugüi. Jayave jacu upita chugüi. Jayave jupivoiño cuña upüa jare umee mbae jou reta vaerã.

**Jesús umbigüera imbaerasi vae reta**

*(Mt 8.16-17; Mr 1.32-34)*

<sup>40</sup>Jare guarasi uique ma yave, opaete jentarã imbaerasi vae güinoi vae reta güeru imbaerasi vae reta Jesús oĩ vae pe. Jare Jesús oñono ipo penti penti re jare umbigüera reta. <sup>41</sup>Jare aña reta usiri oya jese vae reta güi. Usapıcai reta jare jei:

—Nde co jae Tumpa Tai.

Ërei Jesús ñeengata chupe reta. Umaeño'ã aña reta re uyemingueta vaerã. Echa'ã jae reta uicuaa jae co Cristo, Tumpa ombou vae.

**Jesús oo Galilea rupi umimbeu Tumpa ñnee**

*(Mr 1.35-39)*

<sup>42</sup>Piareve pe Jesús oẽ tenta guasu güi oo quĩ ngatu vae pe. Jayave tenta guasu pegua reta yugüüraa ueca. Jare yugüüraa uvãe yave jae oĩ vae pe, uyerure tẽi chupe agüiye vaerã oo chugüi reta. <sup>43</sup>Ërei Jesús jei chupe reta:

—Icavi co aa vaerã ñru tenta guasu-rai reta pe amimbeu vaerã joco pe vi ñee icavi vae Tumpa iporoyocua regua. Echa'ã cuarã Tumpa chembou —jei.

<sup>44</sup>Jare oo opaete ivi Galilea rupi, jare umimbeu Tumpa ñnee judío reta itupaopao rupi.

**Uipisi reta jeta ete pira**

*(Mt 4.18-22; Mr 1.16-20)*

**5** <sup>1</sup>Jare penti ara Jesús uyemboi rambueve i guasu Genesaret jee vae jembei pe, jeta vae yugüeru jae oĩ vae pe uyapisaca vaerã Tumpa ñnee re. <sup>2</sup>Jare Jesús uecha mocui chalana i jembei pe. Iya reta pira uipisi vae reta co. Cua iya reta ueya joco pe, pisa reta oyo rambueve. <sup>3</sup>Jayave Jesús uyupi penti chalana pe, jare uyerure Simón pe uruique vaerã chalana i pe. Echa'ã Simón imbae co jocua chalana. Jayave Jesús uguapi chalana pe jare joco güi omboe joco pe ñugüinoi vae reta.

<sup>4</sup>Jare opa ma uyemingueta yave, Jesús jei Simón pe:

—Ecu a i tipı vae pe pemombo pepısa reta pipısi vaerã pira.

<sup>5</sup>Jayave Simón jei Jesús pe:

—CheYa, orecõe ma nduparaviqui tẽi. Nduipisi'ã mbae ave. Ërei tamombo pisa reta nde ndere cheve ramo —jei.

<sup>6</sup>Jare jucuarã uyapo reta ma yave, jeta ete pira reta uique pısa pe. Jare pısa uyembıpi osoro. <sup>7</sup>Jayave uyepueru reta ñru ñru chalana pe ñugüinoi vae reta pe yugüeru vaerã ombori. Jayave jae reta yugüeru jare umıtınee reta mocui reve chalana. Jare mocui reve poi ete jare usacambu pota echa.

<sup>8</sup>Jare Simón Pedro cua uecha yave, uyeatica Jesús jovai jare jei chupe:

—Esiri chegüi, cheYa. Echa'ã che co jae penti cuimbae iyoa vae —jei.



<sup>9</sup>Echa'ã Pedro jare opaete jae ndive ñugüinoi vae reta ipiacañi jeta ete pira uipisi vae re. <sup>10</sup>Jae ramiño vi Simón iiru reta Jacobo jare Juan jee vae ipiacañi jese. Jacobo jare Juan Zebedeo tai reta co. Jayave Jesús jei Simón pe:

—Agüiye equiye. Che nduyapota iiru vae reta nderu vaerã cheve cua ara güive —jei.

<sup>11</sup>Jayave jae reta güeru ichalana reta i jembei pe. Jayave ueya reta opaete, yugüiraa vaerã Jesús jupíe.

### **Jesús umbigüera cuimbae ipire ocui vae**

*(Mt 8.1-4; Mr 1.40-45)*

<sup>12</sup>Jare Jesús oo uvãe yave penti tenta guasu pe, joco pe oĩ penti cuimbae ipire ocui vae. Cuimbae uecha Jesús yave, uyeatica jae jovai jare uyerure chupe.

—CheYa —jei—, ndipota yave, ndepuere chembigüera.

<sup>13</sup>Jayave Jesús oñono ipo jese.

—Aipota. Ecuera —jei chupe.

Jare jupivoiño cuimbae ucuera imbaerasi güi. Ocui'ã ma ipire. <sup>14</sup>Jayave Jesús oyocui:

—Agüiye emimbeu quía pe. Ecu a iyeechaca sacerdote pe, jare emee ofrenda Moisés peocui ramí, tenta guasu pegua reta uicuaa vaerã ndecuera ma co —jei.

<sup>15</sup>Ërei jeta vae uyandu Jesús uyapo vae regua. Jayave jeta vae uyembati jae oĩ vae pe uyapisaca vaerã jese jare jae umbigüera vaerã imbaerasi vae reta. <sup>16</sup>Ërei Jesús oo chugüi reta ñuu coti uyerure vaerã Tumpa pe.

### **Jesús umbigüera cuimbae ipuere mbae omi vae**

*(Mt 9.1-8; Mr 2.1-12)*

<sup>17</sup>Jare penti ara Jesús oporomboe oĩ, jare amocue fariseo reta jare mboroyocui re oporomboe vae reta uguapí ñugüinoi jacoropi. Jae reta yugüeru Jerusalén jare opaete tenta guasu Galilea jare Judea pegua reta güi. Jare Jesús güinoi Tumpa imbaepuere umbigüera vaerã imbaerasi vae reta.

<sup>18</sup>Jayave amocue yugüeru vae reta güeru penti cuimbae imbaerasi vae jupa reve. Cua cuimbae ipuere mbae omi vae. Güeru vae reta uipota tēi uruique imbaerasi vae o pe, oñono vaerã Jesús jovai. <sup>19</sup>Ërei ipuere'ã uruique Jesús oĩ vae pe, uyembiape'ã ye ñugüinoi reta ramo. Jáeramo uruyupi o iárambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve opaete vae ipite pe Jesús jovai. <sup>20</sup>Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Nembaeyoa reta uyembai ma, cheriví.

<sup>21</sup>Jayave mboroyocui re oporomboe vae reta jare fariseo reta ipia pe uyemingueta: “¿Quía pa co jae cuarái jei vaerã? Jei icavi mbae vae Tumpa coti. Tumpaño co ipuere umbiasa quía pe imbaeyoa reta.” <sup>22</sup>Ërei Jesús uicuaa jae reta ipiyemingueta, jare jei chupe reta:

—¿Maera pa pepia pe piyemingueta jucuarãi? <sup>23</sup>Chepuere jae cua cuimbae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epüa eguata.’ ¿Mbae nunga pa yavai jae vaerã? —jei Jesús chupe reta—. <sup>24</sup>Ërei aipota picuaa vaerã cua: Che cuimbaerã ayeyapo vae chepuere ambiasa quía pe imbaeyoa reta cua ivi pe aĩ rambueve —jei.

Jayave jei cuimbae ipuere mbae omi vae pe:

—Che jae ndeve: Epüa evoi nderupa, jare ecua nerenta pe —jei.

<sup>25</sup>Jayave jupivoi cuimbae upüa, jare ovoi jupa, jare oë oo jenta coti opaete joco pe ñugüinoi vae reta jovaque. Jare oo rambueve, umbiadora Tumpa. <sup>26</sup>Jae ramiño vi opaete joco pe ñugüinoi vae reta umbiadora Tumpa. Echa'ã opareve ipiacañi jare uquiye. Jei reta:

—Cua añave yaecha vae ñanemipiacañi.

### Jesús ueni Leví

(Mt 9.9-13; Mr 2.13-17)

<sup>27</sup>Jayave Jesús oë jare uecha mburuvicha peguarã ocovara vae Leví jee vae uguapi oĩ mburuvicha peguarã ocovara ñugüinoi vae pe, jare jei chupe: —Eyu cherupíe.

<sup>28</sup>Jayave Leví upüa, jare oo jae jupíe. Ueya opaete imbaembae joco pe.

<sup>29</sup>Jare Leví uyapo para guasu jae jenta pe Jesús peguarã. Jare joco pe jeta mburuvicha peguarã ocovara vae reta jare ñru vae reta ucaru vi ñugüinoi Jesús jare ñru reta ndive. <sup>30</sup>Ërei mboroyocui re oporomboe vae reta jare fariseo reta ñneenguru Jesús jemimboe reta pe. Jei reta:

—¿Maera pa pecaru mburuvicha peguarã ocovara vae reta jare teco icavi mbae vae uyapo vae reta ndive?

<sup>31</sup>Jayave Jesús jei chupe reta:

—Icove catu vae reta ueca'ã upurupiano vae. Imbaerasi vae retaño ueca —jei—. <sup>32</sup>Che ayu aeca vaerã iyoa vae reta ueya vaerã iyemingueta icavi mbae vae ipia pe oĩ vae. Ayu'ã aeca vaerã jupi vae reta —jei.

### Maera Jesús jemimboe reta uyecuacu'ã tembú güi

(Mt 9.14-17; Mr 2.18-22)

<sup>33</sup>Jare amocue vae yugüeru Jesús oĩ vae pe jare jei chupe:

—Juan jemimboe reta jeta vese uyecuacu tembú güi uyerure reve Tumpa pe. Jae ramiño vi uyapo jucuarãi fariseo reta jemimboe reta. Ërei nderemimboe reta ucaruñoi —jei reta.

<sup>34</sup>Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembú güi, umendata vae jae reta ndive oĩ rambueve —jei—. <sup>35</sup>Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembú güi —jei.

<sup>36</sup>Jayave imiari chupe reta umijaanga reve.

—Icavi'ã yamboya vaerã temimonde indechi vae maemboya ipiau vae pe. Echa'ã jucuarã yayapo yave, maemboya ipiau vae umiãta temimonde indechi vae, jare temimonde jeiete osoro —jei—. <sup>37</sup>Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarã yayapo yave, vino ipiau vae omondo jiru, jare vino uyepiyere, jare jiru icavi'ã ma —jei—. <sup>38</sup>Jáeramo yambiru vino ipiau vae jiru ipiau vae pe —jei—. <sup>39</sup>Jare ime yave quía vino indechi vae jou vae, uipota'ã jupivoi jou vino ipiau vae. Echa'ã jae jei vino indechi vae icavi ete vino ipiau vae güi —jei.

### Jesús jemimboe reta uipoo trigo mbutuu ara pe

(Mt 12.1-8; Mr 2.23-28)

**6** <sup>1</sup>Mbutuu ara pe Jesús oo co rupi jemimboe reta ndive. Jare jemimboe reta uipoo trigo. Jayave uipoqiti uequi vaerã ipire, trigo jou vaerã. <sup>2</sup>Jare amocue fariseo reta jei chupe reta:

—¿Maera pa piyapo piyapota'ã tẽi mbutuu ara pe vae?

<sup>3</sup>Jayave Jesús jei fariseo reta pe:

—¿Pemingueta'ã pa David uyapocue vae regua, jae jare jae ndive ñugüinoi vae reta iyembaí yave? —jei—. <sup>4</sup>David uique Tumpa jo pe jare jou mbiyape Tumpa jo pe uñeño tee vae reta, jare umee vi jae ndive ñugüinoi vae reta pe. Agüiyeta tẽi co quía jou jocua mbiyape, jaño sacerdote reta —jei.

<sup>5</sup>Jayave Jesús jei chupe reta:

—Che cuimbaerã ayeyapo vae chepuere jae mbae icavi uyeyapo vaerã mbutuu ara pe.

### Cuimbae ipo jovaicho tãpa vae

(Mt 12.9-14; Mr 3.1-6)

<sup>6</sup>Jare ñru mbutuu ara pe Jesús uique judío reta itupao pe jare oporombocue. Jare joco pe oĩ penti cuimbae ipo iyacata tãpa vae. <sup>7</sup>Jare mboroyocui re oporombocue vae reta jare fariseo reta umae ngatu Jesús re, uecha vaerã umbigüerata ra quía mbutuu ara pe. Echa'ã uipota tẽi umbijeco vaerã. <sup>8</sup>Ñrei Jesús uicuaa jae reta ipiyemingueta, jare jei cuimbae ipo jovaicho tãpa vae pe:

—Epüa eyu iyemboi cua reta jovai.

Jayave cuimbae upüa uyemboi joco pe ñugüinoi vae reta ipite pe.

<sup>9</sup>Jayave Jesús jei chupe reta:

—Tapirandu peve cua: ¿Mbae pa jei mboroyocui? ¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca vaerã mbutuu ara pe? —jei.

<sup>10</sup>Jayave umae opaete iyipi rupi ñugüinoi vae reta re, jare jei cuimbae pe:

—Eupi ndepo.

Jayave cuimbae ipo uupi, jare ucuera voi.

<sup>11</sup>Jayave mboroyocui re oporombocue vae reta jare fariseo reta pochi ete Jesús pe jare uyemboembocue mbae ra uyapota Jesús pe.

**Jesús uiparavo doce jemimondo retarã**

*(Mt 10.1-4; Mr 3.13-19)*

<sup>12</sup>Jayave penti pĩtu Jesús oo ivitu guasu re uyerure vaerã Tumpa pe, jare icõe joco pe uyerure Tumpa pe. <sup>13</sup>Jare cõe ma yave, ueni jemimboe reta. Jayave uiparavo doce umbijee temimondo reta vae: <sup>14</sup>Simón (Jesús umbijee Pedro), jare Simón tivi Andrés jee vae, jare Jacobo jare Juan, jare Felipe, Bartolomé, <sup>15</sup>Mateo, Tomás, Alfeo tai Jacobo jee vae, Simón (jae co Zelote pe ueni vae), <sup>16</sup>Jacobo tivi Judas jee vae, jare Judas Iscariote (cua cuimbae umee Jesús jovaicho reta pe).

**Jesús omboe jeta vae**

*(Mt 4.23-25)*

<sup>17</sup>Jayave Jesús ugüeyi ye ivitu guasu güi ñuu pe jae reta ndive. Jare joco pe ñugüinoi jeta Jesús jemimboe reta jare jeta Judea pegua reta jare Jerusalén pegua reta jare tenta guasu Tiro jare Sidón iyipi rupigua reta. Tiro jare Sidón coiño co ñugüinoi i guasu güi. Opaete vae yugüeru uyapisaca vaerã Jesús re, jare Jesús umbigüera vaerã imbaerasi vae reta. <sup>18</sup>Jesús umbigüera vi aña oya jese vae reta. <sup>19</sup>Jare opaete vae uipota uyaviqui Jesús. Echa'ã jae güinoi mbaepuere umbigüera vaerã opaete imbaerasi vae reta.

**Uyerovia vae reta**

*(Mt 5.1-12)*

<sup>20</sup>Jayave Jesús umae jemimboe reta re jare jei:

—Tuyerovia iparavete vae reta. Echa'ã Tumpa umeeta chupe reta yugüireco vaerã iporoyocua pe —jei—. <sup>21</sup>Tuyerovia añave iyembai vae reta. Echa'ã Tumpa jeta umeeta chupe reta. Tuyerovia añave uyao vae reta. Echa'ã upucata reta —jei—. <sup>22</sup>Ëru vae reta pemitarëita jare ndarau uipota yugüireco peĩrurã. Jae reta jeita icavi mbae vae peve jare uyemĩnguetata peägüe pe. Cuarãi uyapota reta peve, pe reta perovia cheré ramo. Che co jae cuimbaerã uyeyapo vae. Ërei piyerovia —jei Jesús—. <sup>23</sup>Jocua ara ou uvãe yave, piyerovia. Echa'ã Tumpa güinoi ara pe mbae icavi ete vae pembaerã. Echa'ã jucuarãi uyapota reta peve vae itenondegua reta uyapo cua nunga icavi mbae vae Tumpa iñee aracae umimbeu vae reta pe —jei—. <sup>24</sup>Ërei icocatu vae reta uiporarata co. Echa'ã jae reta uyerovia ma jeta corepoti güinoi vae re —jei Jesús chupe reta—. <sup>25</sup>Jare jeta güinoi vae reta uiporarata co. Echa'ã iyembaĩta reta. Añave upuca reta. Ërei ipiatĩtita reta jare uyaota reta —jei—. <sup>26</sup>Jare opaete vae jei icavi vae jese vae reta uiporarata co. Echa'ã jucuarãiño vi uyapo itenondegua reta upurumbĩtavi vae reta pe. Jocua upurumbĩtavi vae reta jei iyapu reve: ‘Che co jae Tumpa iñee umimbeu vae’ —jei Jesús—.

### Peau perovaicho reta

(Mt 5.38-48; 7.12)

<sup>27</sup> Ërei che jae pe reta piyapisaca cheré vae pe cua: Peau perovaicho reta, jare piyapo icavi vae pemitarēi vae reta pe —jei—. <sup>28</sup> Ìru vae reta uyepipeyu peré yave jare icavi mbae vae jei peve yave, piyerure Tumpa pe jae umivendise reta vaerã —jei—. <sup>29</sup> Ime yave quía ocua nderovaique re vae, erova ipuere vaerã ocua ye jovaicho re. Jare ime yave quía ndeasoya upĩro ndegüi vae, emaeño jese upĩro vaerã ndegüi ndecamisa vi —jei—. <sup>30</sup> Ime yave quía uyerure ndeve mbae re vae, emee chupe. Jare ime yave quía nembraembae upĩro ndegüi vae, agüiye inñemiacatēi chupe —jei—. <sup>31</sup> Piyapo ñru vae reta pe pipota ñru vae reta uyapo vaerã peve vae rami —jei chupe reta—.

<sup>32</sup> Echa'ã peau yave perau vae retaño, jocua mbaeti co mbae icavi vae. Echa'ã iyoa vae reta uyapo vi jucuarãi —jei—. <sup>33</sup> Jare piyapo yave icavi vae icavi vae uyapo peve vae reta peño, jocua mbaeti co mbae icavi vae. Echa'ã iyoa vae reta uyapo vi jucuarãi —jei—. <sup>34</sup> Jare piporuca yave mbae ñru vae pe jae umee ye peve vaerãño, jocua mbaeti co mbae icavi vae. Echa'ã iyoa vae reta uiporuca mbaembae ñru vae pe jocua ñru vae umbijecovia ye chupe vaerã —jei—. <sup>35</sup> Ërei peau perovaicho reta, jare piyapo icavi vae chupe reta. Piporuca mbae ñru vae pe jare agüiye peãro umbijecovia ye peve vaerã. Jucuarãi piyapo yave, Tumpa umeeta peve mbae icavi ete vae jare peapota tai retarã. Echa'ã Tumpa ipiacavi umee'ã yasurupai chupe vae reta pe jare icavi mbae vae uyapo vae reta pe —jei—. <sup>36</sup> Piparareco ñru vae reta, peRu uiparareco rami —jei—.

### Iñera ñru vae re

(Mt 7.1-5)

<sup>37</sup> Agüiye piñera ñru vae re, agüiye vaerã ñru vae iñera peré. Agüiye pembijeco ñru vae mbae re, agüiye vaerã ñru vae pembijeco mbae re. Pembiasa ñru vae pe, ñru vae umbiasa vaerã peve —jei—. <sup>38</sup> Pemee mbaembae ñru vae reta pe, jare ñru vae reta umeeta mbaembae peve. Jae reta umeeta peve jeta ete ñru vae reta pe pemee vae güi. Echa'ã icavi vae piyapo yave ñru vae reta pe, ñru vae reta uyapota icavi vae peve. Ërei icavi mbae vae piyapo yave ñru vae reta pe, ñru vae reta uyapota icavi mbae vae peve —jei—.

<sup>39</sup> Jayave Jesús jei chupe reta umijaanga reve:

—Penti jesa mbae vae ipuere'ã etei uechaca tape ñru jesa mbae vae pe. Jucuarãi uyapo yave, mocui reve uasavita ivicua pe —jei—. <sup>40</sup> Penti uyemboe oĩ vae uicuaa ete'ã oporomboe vae uicuaa vae rami. Ërei opaete re uyemboe yave, uicuaata oporomboe vae uicuaa rami —jei—.

<sup>41</sup> Agüiye emae iti michi vae neĩru jesa pe oĩ vae re, ime yave nenoĩ iti tuicha vae nderesa pe —jei—. <sup>42</sup> Ndarau ndepuere ndere neĩru pe: 'Cherivi, taequi nderesa güi jocua iti michi vae.' Echa'ã nde nenoĩ iti tuicha vae nderesa pe.

Nde co jae upurumbitavi vae. Eequi rani iti tuicha vae nderesa güi. Jayave nemea cavita ndepuere vaerã ndeequi iti michi vae neĩru jesa güi —jei—.

### Ía icavi vae jare ía icavi mbae vae

(Mt 7.17-20; 12.33-35)

<sup>43</sup>Penti temiti icavi vae umee'ã ía icavi mbae vae. Jae ramiño vi penti temiti icavi mbae vae umee'ã ía icavi vae —jei—. <sup>44</sup>Echa'ã yaicuaa penti temiti icavi co, ía icavi yave. Yaequi'ã iva penti yai jãti vae güi. Jae ramiño vi yaequi'ã uva penti yai jãti vae güi —jei—. <sup>45</sup>Quía nunga jecocavi vae güinoi icavi vae ipia pe. Jáeramo jei icavi vae. Jae ramiño vi quía nunga jecopochi vae güinoi icavi mbae vae ipia pe. Jáeramo jei icavi mbae vae. Echa'ã penti penti uyemingueta ipia pe güinoi vae rupi —jei—.

### Tenta iguapica

(Mt 7.24-27)

<sup>46</sup>¿Maera pa pere cheve: 'OreYa, oreYa'? Echa'ã piyapo'ã che jae peve piyapo vaerã vae —jei—. <sup>47</sup>Ime yave quía ou cheve uyapisaca vaerã cheré vae, jae uyapo yave che jae chupe uyapo vaerã vae, tamijaanga peve mbae rami co jae —jei—. <sup>48</sup>Jae co penti cuimbae jentarã uyapo vae rami. Oyoo quipe oñono vaerã tenta iguapicarã itape re. Jare tenta uyeyapo ma yave, tuicha oqui jare jeta ete i usiri tenta iyipi rupi. Ërei tenta omi'ã etei. Echa'ã iyapoa oñono itape re —jei—. <sup>49</sup>Ërei ime yave quía uyapisaca cheré vae, uyapo'ã yave che jae chupe uyapo vaerã vae, jae co ïru cuimbae jentarã uyapo vae rami. Ërei jae oyoo'ã oñono vaerã tenta iguapicarã itape re. Oñono jentarã ïvi iaramboño. Jayave tuicha oqui jare jeta ete i usiri tenta iyipi rupi jare opa umbiyapara. Opa uyembai jocua tenta —jei—.

### Jesús umbigüera sundaro reta juvicha jembiocui

(Mt 8.5-13)

**7** <sup>1</sup>Jare opa ma imiari yave uyapisaca jese vae reta pe, Jesús oo Capernaum pe. <sup>2</sup>Jare jocua tenta guasu pe ico penti sundaro reta juvicha jembiocui. Cua cuimbae imbaerasi. Umano pota echa. Jare sundaro reta juvicha uau cua jembiocui. <sup>3</sup>Jare sundaro reta juvicha uyandu Jesús regua. Jáeramo omondo Jesús oĩ vae pe amocue judío reta itenondegua reta, jae reta uyerure vaerã Jesús pe oo vaerã umbigüera sundaro reta juvicha jembiocui. <sup>4</sup>Jare yugüeru uvãe yave Jesús oĩ vae pe, uyerure chupe cua re. Jei reta chupe:

—Cua mburuvicha ipiacavi co. Jáeramo icavi co nde ndiyapo vaerã cua chupe. <sup>5</sup>Echa'ã jae yanderau jare uyapo yandevé penti tupao —jei reta. <sup>6-7</sup>Jayave Jesús oo jae reta jupíe. Jare yugüiraa ma uvãe yave coiño mburuvicha jenta güi, mburuvicha ombou amocue ïru reta uñeovãiti vaerã Jesús ndive. Jae reta jei chupe:

—Mburuvicha jei: 'Agüiye iyemambeco, cheYa, ndeyu vaerã cherenta pe. Echa'ã mbae'ã co che. Jáeramo aa'ã noovãiti. Ndepuere ndere joco

güiño cherembicui ucuera vaerã, jare ucuerata co' —jei, jei reta chupe—. <sup>8</sup>Echa'ã ime mburuvicha mbaepuere güinoi cheré vae reta. Jae ramiño vi che anoi mbaepuere sundaro reta re. Che jae penti sundaro pe: Ecuá, jare jae oo. Jae ramiño vi che jae ñru sundaro pe: Eyu, jare jae ou. Jae ramiño vi che jae cherembicui pe: Iyapo cua, jare jae uyapo' —jei, jei reta.

<sup>9</sup>Jare Jesús cua uyandu yave, ipiacañi sundaro reta juvicha re. Jayave uyerova jare jei jeta vae yugüiraa jaicue vae pe:

—Che jae peve, avã'e'ã cua nunga mburugüirovia tuicha vae Israel pegua reta ipite pe.

<sup>10</sup>Jayave sundaro reta juvicha ombou vae reta yugüiraa ye sundaro reta juvicha jenta pe, jare uecha ucuera ma co uyeyocui vae imbaerasi ico vae.

### **Jesús umbijecove ye cuña ime umano vae imembi cuimbae**

<sup>11</sup>Jayave piareve pe Jesús oo tenta guasu Naín pe. Jare jeta jemimboe reta jare ñru vae reta yugüiraa jae jupíe. <sup>12</sup>Jare oo ma uvãe yave coiño tenta guasu jonque güi, umano vae güeru vae reta yugüeru tenta guasu güi. Umano vae penti cuimbae co jare ichi penti cuña ime umano vae co. Umano vae jocua cuña imembi jae vaefío co. Jare jeta tenta guasu pegua reta yugüeru jocua cuña jupíe. <sup>13</sup>Jare yandeYa uecha yave cuña, uiparareco jare jei chupe:

—Agüiye iyao.

<sup>14</sup>Jayave Jesús oo uyaviqui umano vae jiru. Jare ovoi güeru vae reta uyemboi. Jayave Jesús jei tairusu vae pe:

—Che jae ndeve: Epüa.

<sup>15</sup>Jayave umano vae uguapi jare umbipi uyemingueta. Jayave Jesús umee ye ichi pe. <sup>16</sup>Jayave opaete vae uquiye. Umbiadora reta Tumpa. Jei reta:

—Penti Tumpa iñee umimbeu vae ipuere ete vae ou ma yandepite pe. Tumpa ombou yandeve yanderau ramo. Echa'ã yande co jae imbae reta —jei reta.

<sup>17</sup>Jare Jesús uyapo vae jerãcua opaete Judea rupi jare opaete Judea iyipi rupigua rupi.

### **Juan ombou jemimboe reta Jesús oĩ vae pe**

*(Mt 11. 2-19)*

<sup>18</sup>Jare Juan jemimboe reta umimbeu Juan pe opaete cua regua. <sup>19</sup>Jayave Juan ueni mocui jemimboe reta jare ombou yandeYa oĩ vae pe jei vaerã chupe: —¿Nde pa co jae Cristo outa vae? ani ¿nuãrota pa ñru vae ou vaerã?

<sup>20</sup>Jayave jocua cuimbae reta yugüeru uvãe Jesús oĩ vae pe jare jei chupe: —Juan upurumbibautizase vae orembou ndeve. Jae jei: '¿Nde pa co jae Cristo outa vae? ani ¿nuãrota pa ñru vae ou vaerã?' —jei, jei reta.

<sup>21</sup>Jayave jocua ora pe etei Jesús umbigüera jeta imbaerasi vae reta jare umbisiri aña reta oya jese vae reta güi. Jae ramiño vi umbigüera jeta jesa mbae vae reta, jae reta umae vaerã. <sup>22</sup>Jayave Jesús jei Juan ombou chupe vae reta pe:

—Pecua ye pemimbeu Juan pe peecha jare piyandu vae. Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umano vae reta icove ye ma. Iparavete vae reta uyapisaca ñee icavi vae re —jei—. <sup>23</sup>Jare Tumpa umivendiseta jecuae güirovia cheré vae reta —jei chupe reta.

<sup>24</sup>Jare yugüiraa ye yave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quía re pa co peo ñana pe pemae? Jae ipiräta mbae vae'ä co tacuaräsi omi ivitu uipeyu yave vae rami —jei—. <sup>25</sup>¿Quía re pa co peo pemae? Jae omonde'ä temimonde ipöra vae. Mase, temimonde ipöra vae omonde vae reta yugüireco mburuvicha guasu reta jenta pe jare icavi ete yugüireco —jei—. <sup>26</sup>¿Peo ra pemae vaerä penti Tumpa ñee umimbeu vae re? Añete che jae peve, Tumpa umee chupe uyapo vaerä jeta ete ñru Tumpa ñee umimbeu vae reta uyapo vae güi —jei—. <sup>27</sup>Tumpa ñee pe uyecuatía oĩ jese cuaräi:

‘Mase’ —jei Tumpa—, ‘che amondota chiñee güiraata vae nderenonde, uyapicatu vaerä nderaperä.’

Jucuaräi uyecuatía oĩ —jei chupe reta—. <sup>28</sup>Che jae peve, Tumpa umee Juan upurumbibautizase vae pe uyapo vaerä jeta ete ñru Tumpa ñee umimbeu vae reta uyapo vae güi. Ërei taicuegua vae Tumpa iporoyocua pegua uyembutuichaca eteta Juan güi —jei—. <sup>29</sup>Jare mburuvicha peguarä ocovara vae reta jare opaete uyapisaca Juan re vae reta uicuaaca Tumpa jupi co. Echa'ä Juan umbibautiza reta —jei—. <sup>30</sup>Ërei fariseo reta jare mboroyocui re oporomboe vae reta uyapo'ä Tumpa jei uyapo vaerä vae. Echa'ä uyembibautizaca'ä Juan pe —jei.

<sup>31</sup>Jayave Jesús jei chupe reta:

—Tamimbeu peve mbae ndive amboyovaque añave yugüireco vae reta. Tamimbeu peve mbae rami co jae reta —jei—. <sup>32</sup>Jae reta co sambiai plaza pe uguapi ñugüinoi vae reta rami. Jae reta jei uyupe cuaräi: ‘Nduyemimbi ma peve, ërei pe reta pepirae'ä. Orepiatiti perovaque, ërei pe reta piyao'ä.’ Jucuaräi jei —jei—. <sup>33</sup>Echa'ä Juan upurumbibautizase vae ou, jare jae uyecuacu tembú jare vino güi. Jáeramo pe reta pere aña oya co Juan re —jei—. <sup>34</sup>Che cuimbaerä ayeyapo vae ayu, jare che ayecuacu'ä tembú jare vino güi. Jáeramo pe reta pere: ‘Mase, jae jou jeta tembú jare vino. Jae co mburuvicha peguarä ocovara vae reta jare teco icavi mbae vae uyapo vae reta iamigo’ —pere, jei—. <sup>35</sup>Ërei opaete iyaracuaa vae reta uicuaaca aracuaa icavi co —jei.

### Jesús Simón jenta pe

<sup>36</sup>Jare penti fariseo uparea Jesús pe oo vaerä ucaru jae ndive. Jayave Jesús oo fariseo jenta pe jare uguapi ucaru vaerä. <sup>37</sup>Jare penti cuña aguasa rupi ico vae jocua tenta guasu pegua uicuaa Jesús ucaru co oĩ fariseo jenta pe, jare güeru mbae ipiche cavi vae jiru ita alabastro jee vae pegua pe. <sup>38</sup>Jayave cuña



uyemboi Jesús icupe coti jare uyao. Jare umbipi umãqui Jesús ipi jesai pe. Jayave cuña umitini Jesús ipi ía pe jare uyurupite vi ipi. Jayave uipichi mbae ipiche cavi vae ipi re. <sup>39</sup>Jare fariseo Jesús pe uparea vae cua uecha yave, jei iyupe ipia pe: “Cua cuimbae penti Tumpa ñee umimbeu vae yave, uicuaata tẽi quía co cua cuña jare mbae nunga cuña co jae. Echa'ã iyoa vae co” —jei.

<sup>40</sup>Jayave Jesús jei fariseo pe:

—Simón, aipota mbae jae ndeve.

—Ere cheve, oporombocoe vae —jei Jesús pe.

<sup>41</sup>Jayave Jesús jei chupe:

—Mocui cuimbae ipía ñru cuimbae pe. Penti cuimbae ipía chupe quinientos ara mbaraviqui jepi pegua, jare ñru cuimbae ipía chupe cincuenta ara mbaraviqui jepi pegua —jei—. <sup>42</sup>Ñrei mocui reve mbaeti güireco corepoti ipía umbiepi vaerã. Jayave upurumbipía vae opa umicañi mocui reve pe ipía —jei—. Emimbeu cheve, upurumbipía vae cua uyapo ramo, cua mocui vae güi ¿quía nunga pa uau eteta upurumbipía vae? —jei.

<sup>43</sup>Jayave Simón jei Jesús pe:

—Che chepia pe ayemingueta jocua cuimbae jeta ipía opa umicañi chupe vae. Jayave Jesús jei chupe:

—Jaecavi ndere.

<sup>44</sup>Jayave Jesús uyerova cuña coti jare jei Simón pe:

—Mase, emae cua cuña re. Che aique nerenta pe yave, neme'eã cheve i ayoe vaerã chepi. Ñrei jae umãqui ma chepi jesai pe jare umitini ía pe —jei—.

<sup>45</sup>Nde cheyurupite'ã. Ñrei cua cuña aique güive uyurupite chepi —jei—. <sup>46</sup>Nde niñono'ã aceite cheãca re. Ñrei cua cuña uipichi mbae ipiche cavi vae chepi re —jei—. <sup>47</sup>Jáeramo che jae ndeve, yepe tẽi jeta cua cuña imbaeyoa reta, ñrei ambiasa chupe. Echa'ã jae cherau ete. Ñrei ime yave quía michiño ñru vae umbiasa chupe vae, jae michiño vi uau jocua ñru vae —jei.

<sup>48</sup>Jayave Jesús jei cuña pe:

—Ambiasa ma ndeve nembraeyoa reta.

<sup>49</sup>Jayave Jesús ndive ucaru ñugüinoi vae reta jei iyupe ipia pe: “¿Quía ra co cua? ¿Quirãita ra ipuere umbiasa quía pe imbaeyoa reta?”

<sup>50</sup>Ñrei Jesús jei cuña pe:

—Ndiyembiasaca ma nderovia cheré ramo. Ecuã ndepiacatu reve —jei.

### Cuña ombori Jesús vae reta

**8** <sup>1</sup>Jare cua jaicue rupi Jesús oo opaete tenta guasu reta jare tenta guasu-rai reta rupi, jare umimbeu ñee icavi vae Tumpa iporoyocua regua. Jare jocua doce vae yugüüraa jae jupíe. <sup>2-3</sup>Jare jeta cuña reta yugüüraa vi jae jupíe jare ombori Jesús jare jemimboe reta. Mbaembae uata Jesús jare jemimboe reta pe yave, jocua cuña reta ogua chupe reta. Tenonde yave amocue jocua cuña reta imbaerasi jare ñaã reta oya amocue vae re. Ñrei Jesús umbigüera. Penti cuña jee co María

Magdalena. Jesús umbisiri siete aña reta chugüi. Ìru jee co Juana. Jae co Chuza jembireco. Chuza co jae mburuvicha guasu Herodes jembiocui. Ìru jee co Susana.

**Jesús umijaanga umaeti vae**

*(Mt 13.1-9; Mr 4.1-9)*

4Jare jeta vae yugüeru opaete tenta guasu reta güi uyembati Jesús oĩ vae pe. Jayave Jesús jei chupe reta umijaanga reve:

5—Penti cuimbae oo umaeti vaerã. Umaeti yave, umiai temiti, jare amocue oa tape rupi. Jayave ìru vae reta upïro temiti re jare güira reta jou vi —jei—. 6Ìru temiti oa mbovïño ivi itape iárambo oĩ vae pe. Èrei oẽ rupive, ipiru, jocua ivi ñãqui ngatu'ã ramo —jei—. 7Ìru temiti oa ñanapite pe. Ñana ucuacuaa yave, opa uyuca temiti —jei—. 8Ìru temiti oa ivicavi pe. Cua oẽ jare ucuacuaa jare jeta ete ía —jei.

Jare cua jei ma chupe reta yave, ñíneeãta reve jei:

—Uipota uyandu vae tuyapisaca cua ñee re.

**Maera Jesús oporomboe umijaanga reve**

*(Mt 13.10-17; Mr 4.10-12)*

9Jayave Jesús jemimboe reta upirandu Jesús pe:

—¿Mbae pa uipota jei cua nemijaanga reve ndere vae?

10Jayave Jesús jei chupe reta:

—Amimbeu ma peve Tumpa iporoyocua regua. Cua uyecuaa'ã ìru vae reta pe. Jáeramo amboe ìru vae reta amijaanga reve. Cua ayapo agüiye vaerã uicuaa cavi, yepe tẽi uecha, jare agüiye vaerã uicuaa, yepe tẽi uyandu —jei—.

**Umaeti vae uyemijaanga jese vae**

*(Mt 13.18-23; Mr 4.13-20)*

11Cua amijaanga reve che jae peve vae uipota jei cua: Temiti uyemijaanga

Tumpa ñee re —jei—. 12Jocua temiti tape rupi oa vae uyemijaanga amocue

Tumpa ñee uyandu vae re. Jayave ou aña guasu chupe reta jare umiacañi

Tumpa ñee güi, agüiye vaerã güirovia Tumpa uyembiasaca vaerã —jei—.

13Jae ramiño vi jocua temiti uñeñoti mbovïño ivi itape iárambo oĩ vae pe vae

uyemijaanga ìru vae reta Tumpa ñee uyandu vae re. Jae reta uyandu rupive,

güirovia uyerovia reve. Èrei cua reta jocua temiti japo quipe'ã vae rami co.

Echa'ã michi peguaño güirovia ñee. Èrei mbaesuseru uyeyapo chupe yave,

uipota'ã ma uyapisaca reta Tumpa ñee re —jei—. 14Jae ramiño vi jocua temiti

uñeñoti ñanapite pe vae uyemijaanga ìru vae reta Tumpa ñee uyandu vae re.

Èrei umbipi uyemipia'ã ivi pe mbaembae uyeyapo vae re jare corepoti uipota

güinoi vaerã vae re jare yerovia ivi pegua re. Jáeramo jae reta jocua temiti ia'ã

vae rami co —jei—. 15Èrei jocua temiti uñeñoti ivicavi pe vae uyemijaanga

ìru vae reta Tumpa ñee uyandu vae re. Cua reta uyapisaca cavi Tumpa ñee re

ipiacavi reve, jare uyapo Tumpa ñee jei uyapo vaerã vae. Jáeramo jae reta jocua

temiti ía cavi vae rami co. Jae reta uyapo icavi vae ipiaguasu reve —jei Jesús—.

**Uñeñomi vae uyeechacañotai co**  
(*Mr 4.21-25*)

<sup>16</sup>Mechero yamiendi yave, ndarau ñañono yapepo uyembovapo oĩ vae igüi pe, ani güirapembi igüi pe. Ñañono co mechero jenda pe, o pe uique vae reta güinoi vaerã tembipe —jei—. <sup>17</sup>Ime yave mbae uñeñomi vae, uyeechacañotai co. Jae ramiño vi ime yave mbae uyeyasoi vae, uyecuaañotai co —jei—. <sup>18</sup>Pepia pe piyemingueta cavi piyandu vae re. Echa'ã güinoi vae pe uñemñiruta, jare mbaeti güinoi vae güi mbovi ete güinoi echa vae uyeequita —jei.

**Jesús ichi jare tivi reta**  
(*Mt 12.46-50; Mr 3.31-35*)

<sup>19</sup>Jayave Jesús ichi jare tivi reta yugüeru uvãe Jesús oĩ vae pe. Ërei ipuere'ã oya Jesús re jeta joco pe ñugüinoi vae reta jeco pegua. <sup>20</sup>Jayave amocue vae jei Jesús pe:

—Ndesi jare nderivi reta oca pe ñugüinoi. Ndereca ñugüinoi —jei reta chupe.

<sup>21</sup>Jayave Jesús jei chupe reta:

—Cua reta uyapisaca Tumpa iñee re jare uyapo jei vae. Cua nunga reta co jae chesi jare cherivi reta —jei.

**Jesús umiquĩ i guasu**  
(*Mt 8.23-27; Mr 4.35-41*)

<sup>22</sup>Jare penti ara Jesús uyupi chalana pe jemimboe reta ndive. Jayave Jesús jei chupe reta:

—Yaa i guasu jovaicho pe.

Jayave umbipi uasa i guasu. <sup>23</sup>Ërei uasa ñugüinoi rambueve, Jesús oque oĩ. Jare ou ivitu tanta uyepeyu, jare i uyembiaparoaroa uique chalana pe, jare umitinee seri ma. Jae reta ipia pe uyemingueta umanota co. <sup>24</sup>Jayave omomba reta Jesús, jare jei chupe:

—¡Oporomboe vae, oporomboe vae! Ñamanota ma.

Jayave Jesús upüa, jare uñeengata ivitu jare i guasu pe. Jare jupivoiño upita ivitu, jare opaete quĩ ngatu. <sup>25</sup>Jayave Jesús jei chupe reta:

—¿Maera pa pepurugüirovia'ã?

Jare jae reta uquiye jare ipiacañi, jare jei uyupe:

—¿Mbae nunga cuimbae pa cua? Echa'ã jae oyocui ivitu jare i guasu, jare jae reta uyapo oyocui vae —jei reta.

**Cuimbae Gadara pegua ña reta oya jese vae**  
(*Mt 8.28-34; Mr 5.1-20*)

<sup>26</sup>Jayave yugüiraa Galilea güi uvãe i guasu jovaicho pe, gadareno reta iivi pe. <sup>27</sup>Jesús ugüeyi ma chalana güi yave, ou oovãiti penti cuimbae jocua tenta guasu pegua. İma ma ña reta oya jese. Nani ico. Ico'ã etei

tenta rupi. Teõgüerirurenda rupiño ma ico. <sup>28</sup>Cua cuimbae uecha Jesús yave, usapicai jare uyeatica Jesús jovai. Jayave iñeeãta reve jei:

—¿Maera pa ndeyu chemambeco, Jesús? Nde co jae Tumpa ara pe oĩ vae Tai. Ayerure ndeve agüiye iporaraca cheve —jei.

<sup>29</sup>Echa'ã Jesús oyocui ma aña usiri vaerã cuimbae güi. Ima ma uyembiiya jese. Jare ñru vae reta uipocua tẽi ipo jare ipi cadena pe. Ërei jae opa omondoo cadena reta. Jare jecuaño oo ñana coti aña omondo ramo. <sup>30</sup>Jare Jesús upirandu chupe:

—¿Mbae pa nderee?

—Cheree co jae jeta vae —jei.

Echa'ã jeta aña reta oya jese. <sup>31</sup>Jayave aña reta uyerure Jesús pe agüiye vaerã oyocui reta yugüiraa vaerã umanocue vae reta ipi. <sup>32</sup>Jare joco pe jeta cuchi reta ucaru ñugüinoi ivitu guasu re. Jayave aña reta uyerure Jesús pe umaño vaerã jese reta oya vaerã cuchi reta re. Jayave Jesús umaño jese reta. <sup>33</sup>Jayave aña reta usiri cuimbae güi, jare oya cuchi reta re. Jayave cuchi reta tanta osi ivia rupi oa i guasu pe, jare joco pe opa ipitupa reta.

<sup>34</sup>Jare cuchi iyandarecoa reta cua uecha yave, osi yugüiraa tenta guasu pe umimbeu joco pegua reta jare icoti'ã rupigua reta pe cua uyeyapo vae regua.

<sup>35</sup>Jayave uyandu vae reta yugüeru, uecha vaerã mbae uyeyapo vae. Jare yugüeru uvãe yave Jesús oĩ vae pe, uecha cuimbae aña reta oyase jese vae uguapi oĩ Jesús jovai. Uecha uyemonde ma jare iyaracuaaño ma oĩ. Jare opaete yugüeru vae reta uquiye. <sup>36</sup>Jare jocua tenonde yave uecha vae reta umimbeu ñru reta pe quirãi uyeyapo cuimbae aña reta oyase jese vae pe jae ucuera vaerã. <sup>37</sup>Jayave opaete gadareno reta umiñera Jesús oo ye vaerã jae reta iivi güi.

Echa'ã uquiye ete reta. Jayave Jesús uyupi ye chalana pe yugüiraa ye vaerã chugüi reta. <sup>38</sup>Jare cuimbae aña reta oyase jese vae uyerure Jesús pe umaño vaerã jese oo vaerã jae jupíe. Ërei Jesús umaño'ã jese. Jei chupe:

<sup>39</sup>—Ecu nerenta pe emimbeu ñru vae reta pe mbae icavi vae Tumpa uyapo ndeve vae.

Jayave cuimbae oo, jare umimbeu ñru vae reta pe opaete tenta guasu rupi mbae icavi vae Jesús uyapo chupe vae.

### **Jairo tayi jare cuña Jesús jemimonde uyaviqui vae**

*(Mt 9.18-26; Mr 5.21-43)*

<sup>40</sup>Jare Jesús oo uvãe yave i guasu jovaicho pe, joco pe ñugüinoi vae reta umae jese uyerovia reve. Echa'ã uãro ñugüinoi. <sup>41</sup>Jayave ou penti cuimbae Jairo jee vae. Jae co judío reta itupao re uyandareco vae. Jae uyeatica Jesús jovai, jare uyerure chupe oo vaerã jae jenta pe. <sup>42</sup>Echa'ã jae güinoi pentiño tayi doce año rupi güinoi vae. Umano pota echa ma. Jayave Jesús oo jae jupíe. Jare jeta yugüiraa Jesús jupíe, jare oyopi reta. <sup>43</sup>Jare jae reta ipite pe oo penti cuña doce año ma uiporara tugüiguasu vae. Cuña opaete ma icorepoti umee iyugüi upurupiano vae reta pe. Ërei penti ave ipuere'ã

umbigüera. <sup>44</sup>Jayave cuña oya Jesús re icupe coti, jare uyaviqui jemimonde jembei. Jare jupivoi jugüiguasu upita chugüi. <sup>45</sup>Jayave Jesús jei:

—¿Quía pa cheremimonde uyaviqui?

Opaete vae jei uyaviqui'ã co jemimonde. Jare Pedro jei Jesús pe:

—Oporomboe vae, jeta ete ñugüinoi cua pe jare ndeopi reta co. ¿Maera pa ndere: 'Quía pa cheremimonde uyaviqui?' —jei.

<sup>46</sup>Ërei Jesús jei:

—Quía nunga vae uyaviqui co cheremimonde. Echa'ã aicuaa ambigüera ma co chembaepuere pe quía —jei.

<sup>47</sup>Jayave cuña uicuaa ipuere'ã ma uñemi Jesús güi. Jayave ou icoti uriri reve jare uyeatica Jesús jovai. Jayave umimbeu chupe opaete vae jovaque maera uyaviqui jemimonde jare quiräi jupivoi ucuera. <sup>48</sup>Jayave Jesús jei chupe:

—Ndecuera ma, cherindi, nderovia cheré ramo. Ecu ndepiacatu reve —jei.

<sup>49</sup>Jare Jesús uyemingueta oĩ rambueve, penti vae ou uvãe tupao re uyandareco vae jenta güi.

—Umano ma nderayi —jei—. Agüiye ma emambeco oporomboe vae —jei.

<sup>50</sup>Ërei Jesús cua uyandu yave, jei tupao re uyandareco vae pe:

—Agüiye ndepiatiti. Epurugüiroviaño. Ucuera co —jei.

<sup>51</sup>Jare oo uvãe yave tenta pe, Jesús umaño'a ñru reta re uique vaerã jae ndive, jaño Pedro, Jacobo jare Juan, jare cuñatai tu jare ichi. <sup>52</sup>Jare opaete joco pe ñugüinoi vae reta uyao jare jãse ñugüinoi. Jayave Jesús jei chupe reta:

—Agüiye piyao. Umano'a co. Oqueño co oĩ —jei.

<sup>53</sup>Ërei jae reta oyoyai. Echa'ã uicuaa reta umano co. <sup>54</sup>Jayave Jesús uipisi cuñatai ipo pe.

—¡Cuñatai, epüa! —jei.

<sup>55</sup>Jayave cuñatai icove ye, jare jupivoi upüa. Jayave Jesús oyocui umingarü vaerã cuñatai. <sup>56</sup>Jare cuñatai tu jare ichi ipiacañi. Ërei Jesús oyocui reta agüiye vaerã umimbeu quía pe ave mbae uyeyapo vae.

### Jesús omondo jocua doce jemimboe reta

(Mt 10.5-15; Mr 6.7-13)

**9** <sup>1</sup>Penti ara Jesús opa umbati jocua doce jemimboe reta, jare umee chupe reta mbaepuere umbisiri vaerã aña reta oya jese vae reta güi jare umbigüera vaerã imbaerasi vae reta. <sup>2</sup>Jayave omondo reta umimbeu vaerã Tumpa iporoyocua jare umbigüera vaerã imbaerasi vae reta. <sup>3</sup>Jare jei chupe reta:

—Agüiye mbae peraa. Agüiye peraa pepopoca. Agüiye peraa peurupucu, perembiurã jare corepoti. Jare agüiye peraa mocui camisa —jei—. <sup>4</sup>Peo pevãe yave penti tenta pe, joco pe peĩ jocua tenta guasu güi peo ye regua —jei—. <sup>5</sup>Jare ime yave penti tenta guasu pegua reta uipota'ã pepita vaerã joco pe vae, peo joco güi yave, pemitimo ivicuii pepi güi, uicuaa vaerã jae reta co teco güinoi —jei.

<sup>6</sup>Jayave jae reta yugüiraa tenta guasu-rai reta rupi. Umimbeu reta ñru vae reta pe ñee icavi vae jare opaete uguata vae rupi umbigüera imbaerasi vae reta.

**Juan imano**

*(Mt 14.1-12; Mr 6.14-29)*

<sup>7</sup>Jare mburuvicha guasu Herodes uyandu opaete Jesús uyapo vae regua. Jayave ipiacañi. Echa'ã amocue vae jei:

—Juan icove ye ma ou umanocue vae reta ipite güi.

<sup>8</sup>Jare ñru vae reta jei:

—Jae co Elías ou ye vae.

Jare ñru vae reta jei:

—Jae co penti Tumpa ñnee aracae umimbeu vae icove ye ma ou umanocue vae reta ipite güi vae. <sup>9</sup>Ñrei Herodes jei:

—Añácasiaca co Juan. Ñrei ¿quía ra co cua? Echa'ã ayandu ma jeta jesegua —jei.

Jáeramo Herodes uipota uecha Jesús.

**Jesús umingarü cinco mil cuimbae reta**

*(Mt 14.13-21; Mr 6.30-44; Jn 6.1-14)*

<sup>10</sup>Jare Jesús jemimondo reta yugüeru ye Jesús oĩ vae pe, jare umimbeu Jesús pe opaete uyapo vae regua. Jayave Jesús güiraa reta quiñ ngatu vae pe coiño tenta guasu Betsaida güi. <sup>11</sup>Ñrei jeta vae uicuaa yave, yugüiraa jaicue. Jare Jesús umbiresive cavi jare imiari chupe reta Tumpa iporoyocua re jare umbigüera imbaerasi vae reta.

<sup>12</sup>Caaru ma yave, jocua doce vae yugüeru Jesús oĩ vae pe jare jei chupe: —Emondo cua jeta vae tenta tenta rupi, joco pe ucaru vaerã jare oque vaerã. Echa'ã mbaeti tenta cua rupi —jei reta.

<sup>13</sup>Ñrei Jesús jei chupe reta:

—Pe reta pemee tucaru.

—Jaeño ime nonoi pandepo mbiyape jare mocui pira —jei reta—.

¿Ndoota pa ndogua opaete cua reta jembiurã?

<sup>14</sup>Echa'ã cuimbae retaño uyepapa cinco mil rupi.

Jayave Jesús jei jemimboe reta pe:

—Tuyembatĩmbati cincuenta rupi tuguapi.

<sup>15</sup>Jayave jucuarãi uyapo reta. Jei reta opaete joco pe ñugüinoi vae reta pe uguapi vaerã. <sup>16</sup>Jayave Jesús uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisãa mbiyape jare pira, jare umee jemimboe reta pe, jae reta umee vaerã opaete joco pe uguapi ñugüinoi vae reta pe. <sup>17</sup>Opareve ucaru, jare iyangapii reta. Jayave Jesús jemimboe reta umbati tembú uñepisãacue jembire vae, jare umitĩnee doce canasta.

**Pedro jei Jesús co jae Cristo, Tumpa ombou vae**

*(Mt 16.13-20; Mr 8.27-30)*

<sup>18</sup>Penti ara Jesús oo jeta vae ipite güi uyerure vaerã Tumpa pe. Jare jemimboe reta joco pe ñugüinoi jae ndive. Jayave Jesús upirandu chupe reta:

—¿Quía pa co che ñru vae reta pe? —jei.

<sup>19</sup>Jae reta jei chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae penti Tumpa ñnee araca umimbeu vae icove ye ma ou umanocue vae reta ipite güi vae —jei reta.

<sup>20</sup>Jayave Jesús upirandu chupe reta:

—Jare ¿quía pa co che peve? —jei.

Jayave Pedro jei chupe:

—Nde co jae Cristo, Tumpa ombou vae —jei.

**Jesús umimbeu umanota co**

*(Mt 16.20-28; Mr 8.30-9.1)*

<sup>21</sup>Jayave Jesús oyocui ete reta agüiye vaerã umimbeu quía pe.

<sup>22</sup>Jayave Jesús jei chupe reta:

—Che cuimbaerã ayeyapo vae aiporara eteta. Jare judío reta itenondegua reta jare sacerdote reta itenondegua reta jare mboroyocui re oporombocue vae reta ndarau uipota aico vaerã juvicha guasurã, jare cheyucacata. Ërei mbapi ara rupi aicove yeta ayu umanocue vae reta ipite güi —jei.

<sup>23</sup>Jayave Jesús jei opaete vae pe:

—Ime yave quía uipota oo cherupíe vae, tiñacañi iyugüi, tovoi icurusu opa ara, jare too cherupíe —jei—. <sup>24</sup>Uipota uñuvatu jecove vae ndarau ipuere. Ërei jocua umeeta jecove chereco pegua vae uñuvatuta co —jei—.

<sup>25</sup>¿Mbae ra uminganata quía, umingana yave opaete ivi pegua, ërei ipuere'ã yave uñuvatu jecove? —jei—. <sup>26</sup>Ime yave quía imara cheré jare chiñee re vae, che cuimbaerã ayeyapo vae chemarata vi jese, ayu ye yave ayembutuichaca vaerã chembaepuere reve, cheRu imbaepuere reve, jare ángel uñeñono tee Tumpa peguarã vae reta imbaepuere reve —jei—.

<sup>27</sup>Ërei añete che jae peve, ndei amocue cua pe ñugüinoi vae umano mbove, uechata reta Tumpa iporoyocua —jei Jesús.

**Jesús uyembiambie**

*(Mt 17.1-8; Mr 9.2-8)*

<sup>28</sup>Jare ocho ara rupi cua jei rendave pe, Jesús güiraa Pedro, Juan jare Jacobo ñru vae reta ipite güi, jare uyupi penti ivitu guasu re uyerure vaerã Tumpa pe.

<sup>29</sup>Jare Jesús uyerure Tumpa pe rambueve, jova uyembiambie jare jemimonde tĩ asi jare uvera. <sup>30</sup>Jare mocui cuimbae uyemingueta ñugüinoi Jesús ndive. Jae reta co Moisés jare Elías. <sup>31</sup>Mocui reve uyecuaa tembipe ipõra ete vae re jare

uyemingueta reta Jesús imano re, quirãí umanota co Jerusalén pe. <sup>32</sup>Ërei Pedro jare jae ndive ñugüinoi vae jopei jare oque. Ërei usareco ye, jare uecha Jesús ipõra ete, jare uecha vi jocua mocui cuimbae Jesús ndive ñugüinoi vae reta.

<sup>33</sup>Jare Moisés jare Elías yugüiraa yeta ma yave, Pedro jei Jesús pe:

—Oporomboe vae, icavi co ñaĩ vaerã cua pe. Turuyapo mbapi guarasĩa ñanaroqui pegua, penti nembraerã, penti Moisés peguarã jare penti Elías peguarã —jei.

Echa'ã Pedro uicuaa'ã mbae jei vae.

<sup>34</sup>Jare Pedro cua jei rambueve, ou amapĩtu umiguarasĩa reta. Jare jae reta uquiye amapĩtu umiguarasĩa yave. <sup>35</sup>Jayave uyendu ñee amapĩtu güi jei:

—Cua co jae cheRai aau ete vae. Piyapisaca jese —jei.

<sup>36</sup>Jare ñee opa ma yave, jae reta uecha'ã quía joco pe, jaeño Jesús. Jare jocua ara reta pe jae reta umimbeu'ã quía pe ave mbaembae uecha vae.

### **Jesús umbigüera cunumi aña oya jese vae**

*(Mt 17.14-21; Mr 9.14-29)*

<sup>37</sup>Jare piareve pe ivitu guasu güi ugüeyi reta yave, jeta vae yugüeru uñeovãiti jae reta ndive. <sup>38</sup>Jayave penti cuimbae yati vae reta ipite pe oĩ vae jei Jesús pe:

—Oporomboe vae, ayerure ndeve nemaie vaerã cherai re. Jae co cherai jae vaieño. <sup>39</sup>Aramoiño penti aña oya jese jare umbisapicai. Jayave umbiriri ete jare cunumi iyuru tiriyai. Jayave uyembipere. Jecuaieño uyapo jucuarãi chupe —jei—. <sup>40</sup>Ayerure tẽi ma nderemimboe reta pe umbisiri vaerã aña chugüi, ãrei ipuere'ã reta —jei.

<sup>41</sup>Jayave Jesús jei joco pe ñugüinoi vae reta pe:

—Yavai ete pe reta cua ivi pe pico vae pepurugüirovia vaerã. ¿Quirãí regua ra apitata pe reta ndive? ¿Quirãí regua ra arupiatã peve? —jei.

Jayave jei cunumi tu pe:

—Eru nderai cua pe.

<sup>42</sup>Jare cunumi ou rambueve, aña uipiaca jare umbiriri ete. Jayave Jesús uñeengata aña pe. Jayave umbigüera cunumi jare umee ye tu pe. <sup>43</sup>Jare opaete joco pe ñugüinoi vae reta ipiacañi Tumpa imbaepuere tuicha vae re. Ërei ipiacañi rambueve opaete Jesús uyapo vae re, Jesús jei jemimboe reta pe:

### **Jesús umimbeu ye umanota co**

*(Mt 17.22-23; Mr 9.30-32)*

<sup>44</sup>—Piyapisaca cavi cua jae peve vae re. Echa'ã che cuimbaerã ayeyapo vae penti vae chemeeta cherovaicho reta pe —jei.

<sup>45</sup>Ërei jae reta uicuaa cavi'ã mbae Jesús jei chupe reta vae. Yavai chupe reta uicuaa vaerã, jare uipiu reta upirandu vaerã chupe jese.



**Tenondegua vae**  
(Mt 18.1-5; Mr 9.33-37)

46 Jayave jae reta umbipì uyemingueta quía ra tenondegua ñru reta güi vae. 47 Jare Jesús uicuaa chugüi reta ipiyemingueta. Jayave ueni penti sambiai jare oñono iyipì pe. 48 Jayave jei jemimboe reta pe:

—Ime yave quía uyapo icavi vae cua nunga sambiai pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe. Echa'ã pepite pe oĩ vae ñnemimichi vae icota tenondeguarã —jei.

**Oyovaicho'ã yande ndive vae yanembori co**  
(Mr 9.38-40)

49 Jayave Juan jei Jesús pe:

—Oporomböe vae, nduecha penti cuimbae nderee pe umbisiri añã reta oya jese vae reta güi, jare ndoe chupe agüiye ma uyapo vaerã. Echa'ã jae ñaneñru'ã co —jei.

50—Agüiye pere chupe jucuarãi —jei Jesús chupe—. Echa'ã oyovaicho'ã yande ndive vae yanembori co —jei.

**Jesús ñneengata Jacobo jare Juan pe**

51 Jare outa ma uvãe Jesús oo ye vaerã ara pe. Jáeramo iquirëi ete oo Jerusalén pe. 52 Jayave omondo amocue jemimboe reta jenonde. Jae reta yugüiraa penti tenta guasu-rai ñvi Samaria pegua pe uyapicatu vaerã Jesús peguarã. 53 Ërei joco pegua reta uipota'ã Jesús upita vaerã joco pe. Echa'ã uicuaa reta jae oo Jerusalén coti. 54 Jare Jesús jemimboe reta Jacobo jare Juan cua uicuaa yave, jei reta Jesús pe:

—OreYa, ¿ndipota pa ore ndoyocui tata ou vaerã ara güi opa vaerã uapì cua tenta guasu-rai pegua reta Elías uyapo rami?

55 Ërei Jesús uyerova icoti jare ñneengata chupe reta. Jei chupe reta: —Agüiye pere jucuarãi. 56 Echa'ã che cuimbaerã ayeyapo vae ayu apurumbiasa vaerã. Ayu'ã apurumicañitei vaerã —jei.

Jayave yugüiraa ñru tenta guasu-rai coti.

**Uipota oo Jesús jupíe vae**  
(Mt 8.19-22)

57 Jare tape rupi uguata reta rambueve, penti cuimbae jei Jesús pe: —Taa nderupíe opaete que rupi ndeo vae rupi.

58 Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerã ayeyapo vae mbaeti cherenta —jei.

59 Jare Jesús jei ñru cuimbae pe:

—Eyu cherupíe.

Ërei cuimbae jei:

—Emaeño rani cheré aa vaerã aico cheru re umano regua.

<sup>60</sup>Jayave Jesús jei chupe:

—Tecove opa mbae vae güinoi mbae vae reta toñoti umano vae reta. Ërei nde ecua emimbeu Tumpa iporoyocua —jei.

<sup>61</sup>Jayave ñru cuimbae jei Jesús pe:

—Taa nderupíe, cheYa. Ërei emaeño rani cheré aa vaerã cherenta pe amimbeu vaerã chupe reta jáema co aa —jei.

<sup>62</sup>Ërei Jesús jei chupe:

—Tamijaanga umbiara vae. Umbiara vae umae yave jaicue coti, ndarau simi oo. Jae ramiño vi che amimbaraviqui yave quía, uyapo caviã yave iparaviqui, ndarau icavi ico vaerã Tumpa iporoyocua pe —jei.

### Jesús omondo setenta vae reta

**10** <sup>1</sup>Cua jaicue rupi yandeYa uiparavo ñru setenta cuimbae reta jare omondo jenonde mocui mocui rupi opaete tenta guasu reta jae oota joco pe vae pe. <sup>2</sup>Jare jei chupe reta:

—Jeta ete co yaaviro vaerã. Ërei mbovi ete co umbaeviro vae reta. Jáeramo pe reta piyerure yandeYa pe omondo vaerã uparaviqui vae reta umbaeviro reta vaerã —jei—. <sup>3</sup>Pecua. Mase, pomondo icavi mbae vae uyapo vae reta ipite rupi. Pe reta ovecha-rai reta rami co. Jae reta yaguapita reta rami co —jei Jesús chupe reta—.

<sup>4</sup>Agüiye peraa corepoti, jare urupucu, jare pepipasa. Jare agüiye pemiariño quía perovãiti yave tape rupi —jei—. <sup>5</sup>Jare pique yave penti tenta pe, pere rani: ‘Tipiacatu cua tenta pegua reta’ —pere, jei—.

<sup>6</sup>Jare ime yave quía jocua tenta pe mbiacatu uipota vae, jae ipiacatuta co. Uipota'ã yave, ndarau ipiacatu —jei—.

<sup>7</sup>Jare pepita jocua tenta pe etei. Peu ipotave umee peu vaerã vae. Echa'ã icavi co ñru vae reta umbiepi vaerã uparaviqui vae pe. Agüiye coti cotiño pepita —jei—.

<sup>8</sup>Jare penti tenta guasu pe peo pevãe yave, joco pegua reta pembiresive cavi yave, peu ipotave umee peu vaerã vae —jei chupe reta—.

<sup>9</sup>Pembigüera imbaerasi vae joco pe ñugüinoi vae reta. Jare pere chupe reta: ‘Tumpa iporoyocua coiño ma peve’ —pere, jei—.

<sup>10</sup>Ërei peo yave penti tenta guasu pe, joco pegua reta uipota'ã yave pepita vaerã joco pe, peguata calle rupi jare pere joco pegua reta pe: <sup>11</sup>Numitimo orepi güi ivicui, cua tenta guasu pegua reta picuaa vaerã pe reta co teco penoi. Ërei turumimbeu peve cua: Tumpa iporoyocua coiño ma peve’ —pere, jei—.

<sup>12</sup>Ërei che jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma pegua reta güi —jei—.

### Tenta guasu pegua uiporarata vae reta

(Mt 11.20-24)

<sup>13</sup>Corazín pegua reta uiporarata co. Betsaida pegua reta uiporarata co. Echa'ã jeta miacañi reta ayapo ipite pe chembaepuere pe. Jucuarãi mona ayapo yave Tiro jare Sidón pe, joco pegua reta ueyata tẽi aracae ma iyemingueta icavi mbae vae ipia pe oĩ vae. Omondeta tẽi temimonde jaimbe vae jare oñonota

têi tanimbu iñãca re uicuaaca vaerã ipiatiti co —jei—. <sup>14</sup>Ërei Tumpa upuruãa yave, Corazín jare Betsaida pegua reta tanta uiporarata Tiro jare Sidón pegua reta güi —jei—. <sup>15</sup>Jare Capernaum pegua reta ipia pe uyemingueta têi icavi co yugüireco vaerã Tumpa ndive. Ërei Tumpa omondota reta yugüireco vaerã cañitei pe —jei—. <sup>16</sup>Uyapisaca peré vae uyapisaca co cheré. Ërei pererño vae chererño co. Jare chererño vae güirño chembou vae —jei.

### Setenta vae reta yugüeru ye

<sup>17</sup>Jare jocua setenta vae reta yugüeru ye yave Jesús oĩ vae pe, uyerovia jare jei Jesús pe:

—OreYa, nderee re nonoi mbaepuere ãña reta re.

<sup>18</sup>Jayave Jesús jei chupe reta:

—Che aecha Satanás oa ara güi ama vera vae rami. <sup>19</sup>Mase, amee ma peve mbaepuere pepuere vaerã pepño mboi re jare chumicarape re, jare penoi vaerã mbaepuere tovaicho re, yepe têi jae güinoi vi mbaepuere. Ipuereta'ã mbae uyapo peve —jei—. <sup>20</sup>Ërei agüiye piyerovia mbaepuere ãña reta re penoi vae re. Ërei piyerovia peree uyecuatía ma oĩ ara pe vae re —jei.

### Jesús uyerovia

(Mt 11.25-27; 13.16-17)

<sup>21</sup>Jocua ora pe etei Jesús uyerovia jare jei:

—Amee yasurupai ndeve, cheRu, quirãi nde nemaño'ã cua ivi pegua iyaracuaa vae reta re uicuaa vaerã cua mbaembae, ãrei ndicuaaca sambiai rami vae reta pe. Icavi co, cheRu. Echa'ã icavi co ndeve ndiyapo vaerã jucuarãi. Nde co jae ara pegua reta jare ivi pegua reta iYa —jei.

<sup>22</sup>Jayave jei vi:

—CheRu umee ma cheve opaete. Mbaeti quía uicuaa cavi cheregua, jaño cheRu. Jae ramiño vi mbaeti quía uicuaa cavi cheRu regua, jaño che jare che aicuaaca chupe vae reta —jei.

<sup>23</sup>Jayave uyerova umae jemimboe reta re jare jei chupe retaño:

—Tumpa pemivendise ma. Echa'ã umaño peré peeche vaerã jeta mbaembae —jei—. <sup>24</sup>Che jae peve, jeta Tumpa iñee aracae umimbeu vae reta jare mburuvicha guasu reta uipota têi uecha pe reta peeche ma vae, ãrei uecha'ã. Jae ramiño vi jae reta uipota têi uyandu pe reta piyandu ma vae, ãrei uyandu'ã —jei.

### Samaria pegua ipiacavi vae

<sup>25</sup>Penti ara penti mboroyocui re oporomboe vae uyemboi Jesús jovai jare jei chupe:

—Oporomboe vae, ¿mbae pa ayapota anoi vaerã tecove opa mbae vae? Uipota têi uyavica Jesús pe.

<sup>26</sup>Jayave Jesús jei chupe:

—¿Mbae pa uyecuatía oĩ mboroyocui pe? ¿Mbae pa nemingüeta joco pe? —jei.

<sup>27</sup>Jayave jei Jesús pe:

—Uyecuatía oĩ cuarãi: ‘Eau ndeYa Tumpa opaete ndepia reve, jare opaete nderecove reve, jare opaete nepirãta reve jare opaete ndepiayemingueta reve. Jae ramiño vi eau nderapicha nde ndiyerau rami.’ Jucuarãi uyecuatía oĩ —jei.

<sup>28</sup>Jayave Jesús jei chupe:

—Icavi co ndere. Cuarãi iyapo jare nenoita tecove opa mbae vae —jei.

<sup>29</sup>Mboroyocui re oporomboe vae uipota uicuaaca jupi co jae. Jáeramo upirandu Jesús pe:

—¿Quía pa co jae cherapicha?

<sup>30</sup>Jayave Jesús jei chupe:

—Penti cuimbae oo Jerusalén güi tenta guasu Jericó coti. Jare aramoño imonda vae reta uipisi. Jae reta omboi jemimonde chugüi jare umbipere. Uyuca rai rai ueya reta tape rupi —jei—. <sup>31</sup>Jare aramoño ou penti sacerdote jocua tape rupi. Jare uecha yave cuimbae ipere vae, uipota'ã etei oya jese. Mbiri rupiño uasa chugüi —jei—. <sup>32</sup>Jae ramiño vi ou penti levita jocua tape rupi. Jare uecha yave cuimbae ipere vae, uipota'ã etei oya jese. Mbiri rupiño vi uasa chugüi —jei—. <sup>33</sup>Èrei penti Samaria pegua ou jocua tape rupi, jare ou uvãe cuimbae ipere vae oĩ vae pe. Jare Samaria pegua uecha yave, uiparareco —jei—. <sup>34</sup>Jayave oya jese jare uequi moa uipiano vaerã chugüi ipere vae jare umbiyasoï ipere. Jayave uupi imburica re jare güiraa penti tenta pe, jare joco pe uyandareco jese —jei—. <sup>35</sup>Jare piareve pe Samaria pegua oota ma joco güi yave, uequi corepoti mocui ara mbaraviqui jepi pegua jare umee tenta iya pe. Jei chupe: ‘Iyandareco mi jese. Jare jeta ete cua güi ndiyemingasta yave, ambiepita ndeve ayu ye yave’ —jei, jei—.

<sup>36</sup>Añave tapirandu ndeve: ¿Quía nunga pa co jae jocua imonda vae reta uipisi vae japicha añetete vae? Echa'ã mbapi cuimbae uasa jocatoropi —jei.

<sup>37</sup>Jare mboroyocui re oporomboe vae jei Jesús pe:

—Jocua uiparareco vae.

Jayave Jesús jei chupe:

—Ecuá iyapo jae uyapo vae rami.

### **Jesús opou Marta jare María ipi**

<sup>38</sup>Jesús jare jemimboe reta jecuae yugüiraa Jerusalén coti. Jayave yugüiraa uvãe penti tenta guasu-rai pe. Joco pe penti cuña Marta jee vae umbiresive cavi jenta pe Jesús. <sup>39</sup>Jare Marta ipiqui co jee María. Jare María uguapi yandeYa iyipi pe uyapisaca vaerã jese. <sup>40</sup>Èrei Marta uyemipia'ã tembiurã uyapo oĩ vae re. Jayave ou Jesús oĩ vae pe jare jei chupe:

—CheYa, chepiqui chembori'ã. Jáeramo cheño ayapo aĩ tembiurã. ¿Icavi ra ndeve uyapo vaerã cuarãi? Iyocui chembori vaerã —jei.

<sup>41</sup>Jayave yandeYa jei chupe:

—Marta, Marta, ndiyemipia'ã jeta mbaembae re. <sup>42</sup>Èrei yaipota'ã jeta mbaembae. Cua María uiparavo icavi vae ndegüi. Ndarau quía ipuere uequi chugüi —jei.

### Jesús oporomboe yerure re

(Mt 6.9-15; 7.7-11)

**11** <sup>1</sup>Jare penti ara Jesús uyerure oĩ Tumpa pe. Jare opa ma yave, penti jemimboe jei chupe:

—CheYa, oremboe nduyerure vaerã Tumpa pe Juan vi omboe jemimboe reta rami.

<sup>2</sup>Jayave Jesús jei chupe reta:

—Piyerure Tumpa pe yave, pere cuarái:

‘OreRu ara pe neĩ vae, tuyembiaadoraca nderee.

Tou ndeporoyocuia.

Tuyeyapo nde ndere vae cua ivi pe ara pe uyeyapo oĩ rami.

<sup>3</sup>E mee oreve opa ara orerembiurã.

<sup>4</sup>Embiasa oreve orembaeyoa reta, ore numbiasa ipotave iyoa orecoti vae pe rami.

Jare agüiye emañño añña guasu re uyapoca vaerã oreve mbaeyoa.

Orerepi añña guasu güi’ —pere, jei.

<sup>5</sup>Jayave jei vi chupe reta:

—Yamijaanga penti cuimbae jare iamigo. Cuimbae oo yave iamigo jenta pe piare mbite rupi uyerure vaerã chupe mbae re, aramoi jeita chupe:

‘Cheamigo, iporuca cheve mbapi mbiyape. <sup>6</sup>Echa'ã penti cheamigo ou uvãe chepi, jare mbaeti mbae anoi amee jou vaerã.’ Aramoi jucuarãita jei —jei—.

<sup>7</sup>Jare aramoi iamigo ombouta chupe ñnee japipe güi: ‘Agüiye chemambeco. Echa'ã uyeyuquenda ma oĩ cheronque, jare che jare opaete chesambiai reta nduyapacua ma noĩ ndoque vaerã. Chepuere'ã ma apüa amee vaerã ndeve.’

Aramoi jucuarãita jei —jei—. <sup>8</sup>Che jae peve, yepe tõi uipota'ã upüa, jocua cuimbae co jae iamigo ramo, ñrei jocua cuimbae jecuañño ueni oĩ yave, upüata co umee vaerã chupe opaete uipota vae —jei—.

<sup>9</sup>Jare che jae peve, piyerure Tumpa pe mbae re, jare Tumpa umeeta peve. Peeca, jare pevãeta. Pembopu onque, jare uyepeata peve —jei—.

<sup>10</sup>Echa'ã uyerure yave quía Tumpa pe mbae re, Tumpa umeeta chupe. Jare ueca yave quía mbae, uvãeta. Jare ombopu yave quía onque, uyepeata chupe —jei—.

<sup>11</sup>Nde nenoĩ yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe. Jae ramiño vi nderai uyerure yave ndeve pira re, ndarau nemee chupe penti mboi pira ipepica pe —jei—.

<sup>12</sup>Jae ramiño vi nderai uyerure yave ndeve ururupía re, ndarau nemee chupe penti chumicarape ururupía ipepica pe —jei—.

<sup>13</sup>Yepe tõi pe reta jecuañño piyapo icavi mbae vae, ñrei pemee co mbaembae icavi vae pesambiai reta pe. Jáeramo peRu ara pe oĩ vae iquirëi ete umee Espiritu Santo uyerure chupe jese vae reta pe —jei.

**Jei reta icavi mbae vae Espíritu Santo coti**

*(Mt 12.22-30; Mr 3.20-27)*

<sup>14</sup>Penti ara Jesús umbisiri ña penti cuimbae iupa vae güi. Jare ña usiri ma chugüi yave, cuimbae uyemingüeta. Jare jeta vae joco pe ñugüinoi vae ipiacañi. <sup>15</sup>Ērei amocue vae jei:

—Ña guasu Beelzebú imbaepuere pe umbisiri ña reta oya jese vae reta güi.

<sup>16</sup>Jare ñru vae reta uipota uicuaa mbae ra Jesús ipuere uyapo. Jáeramo jei reta Jesús pe uyeyapo vaerã mbae ara re jae reta uicuaa vaerã quía co jae. <sup>17</sup>Ērei Jesús uicuaa ipiyemingüeta, jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramiño vi penti tenta pegua reta oyovaicho uyupii yave, opata co jocua tenta —jei—. <sup>18</sup>Jae ramiño vi Satanás pochi iyupe yave, opata co iporoyocua. Echa'ã pe reta pere che ambisiri ña reta oya jese vae reta güi ña guasu Beelzebú imbaepuere pe —jei Jesús chupe reta—. <sup>19</sup>Ērei che ambisiri yave ña reta oya jese vae reta güi Beelzebú imbaepuere pe, ¿quía imbaepuere pe ra umbisiri ña reta oya jese vae reta güi perentarã reta? Pepuere pepirandu chupe reta jese —jei—. <sup>20</sup>Ērei che ambisiri ña reta oya jese vae reta güi Tumpa imbaepuere pe. Jáeramo pepuere picuaa ou ma co uvãe peve Tumpa iporoyocua —jei—.

<sup>21</sup>Penti cuimbae ipirãta vae mboca güinoi vae uyandareco yave jenta re, ipuere'ã quía upĩro chugüi imbaembae —jei—. <sup>22</sup>Ērei ou yave ñru cuimbae ipirãta ete chugüi vae uñerãro vaerã jae ndive, umiamirita co jare upĩrota chugüi imboca güirovia catu tẽi uyerepi vaerã pipe vae. Jae ramiño vi upĩrota chugüi imbaembae umbiyao vaerã umee iĩru reta pe —jei—.

<sup>23</sup>Ime yave quía uipota'ã ico cheĩrurã vae, oyovaicho co che ndive. Jae ramiño vi ime yave quía chembori'ã vae, uyapo co icavi mbae vae checoti —jei chupe reta—.

**Ña usiri jare ou ye vae**

*(Mt 12.43-45)*

<sup>24</sup>Penti ña usiri ma yave oya jese vae güi, uguata ñana rupi ueca quiape ico vaerã. Ērei ipuere'ã yave uvãe quiape ico vaerã, jei iyupe: 'Taa ye jocua chero ayu chugüi vae pe' —jei, jei—. <sup>25</sup>Echa'ã yandepuere yamijaanga penti o jocua cuimbae ña usiri ma chugüi vae re. Ña ou ye uvãe yave jocua o pe, uecha o iya utupei ma jare opa oñono cavi —jei—. <sup>26</sup>Jayave oo ye ña güeru siete ña icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerã. Tenonde yave, penti ña oya jese yave, jocua cuimbae uiporara. Ērei taicue rupi ocho ma ña reta oya jese. Jáeramo tanta uiporara —jei.

**Tumpa umivendiseta vae reta**

<sup>27</sup>Jare Jesús cua mbaembae re imiari yave, penti cuña joco pe ñugüinoi vae reta ipite pe oĩ vae ñneeãta reve jei:

—Tumpa tumivendise ndesi. Echa'ã nde ndea co chugüi jare jae nemicambu —jei.

<sup>28</sup> Ërei Jesús jei:

—Añete co. Ërei Tumpa umivendiseta opaete uyapisaca ñee re vae reta, uyapo yave jae jei vae —jei.

### **Uipota reta uecha miacañi**

*(Mt 12.38-42; Mr 8.12)*

<sup>29</sup> Jare jeta vae yugüeru Jesús oĩ vae pe. Jayave Jesús jei chupe reta:

—Añave yugüireco vae reta icavi mbae vae uyapo vae reta co. Jae reta uipota ayapo vaerã mbae aicuaaca vaerã chupe reta quía co che. Ërei jaño uyeyapota mbae Jonás pe uyeyapo vae rami, jae reta uicuaa vaerã quía co che —jei—.

<sup>30</sup> Echa'ã Jonás pe uyeyapo vae uicuaaca Nínive pegua reta pe Jonás jei chupe reta vae añete vae co. Jae ramiño vi uyeyapota cheve vae uicuaacata añave yugüireco vae reta pe quía co che. Che co jae cuimbaerã uyeyapo vae —jei—.

<sup>31</sup> Tumpa upuruãa yave, jocua cuña mburuvicha guasu ico sur coti vae upüata umbijeco vaerã añave yugüireco vae reta. Echa'ã jae ou mbiri ete güi uyapisaca vaerã Salomón iyaracuaa catu vae re. Ërei che chearacuaa catu ete Salomón güi —jei—. <sup>32</sup> Tumpa upuruãa yave, Nínive pegua reta upüata umbijeco vaerã añave yugüireco vae reta. Echa'ã jae reta ueya iyemingueta icavi mbae vae ipia pe oĩ vae, Jonás umimbeu chupe reta yave Tumpa ñee. Ërei chembaepuere tuicha ete co Jonás imbaepuere güi —jei—.

### **Mechero yamiendi yave**

*(Mt 5.14-16; 6.22-23)*

<sup>33</sup> Mechero yamiendi yave, ndarau ñañomi. Ndarau ñañono yapepo uyembovapo oĩ vae igüi pe. Ñañono co mechero jenda pe, o pe uique vae reta güinoi vaerã tembipe —jei—. <sup>34</sup> Tembipe uique yanderete pe yanderesa rupi. Icavi yave nderesa, nderete tineeta tembipe pe. Ërei icavi'ã yave nderesa, nderete tineeta pītumimbi pe —jei—. <sup>35</sup> Jáeramo ñemoa ngatu agüiye vaerã nderete tineeta pītumimbi pe. Echa'ã tineeta tēi tembipe pe —jei—. <sup>36</sup> Nderete tineeta yave tembipe pe, ndarau ico joco pe pītumimbi. Opaete tineeta tembipe pe, penti tembipe tuicha vae nembiesape vae rami —jei.

### **Jesús umbijeco fariseo reta jare boroyocui re oporomboc vae reta**

*(Mt 23.1-36; Mr 12.28-40; Lc 20.45-47)*

<sup>37</sup> Jare jucuarãi imiari ma yave Jesús, penti fariseo uparea chupe ucaru vaerã jae ndive. Jayave Jesús oo fariseo jenta pe jare uguapĩ ucaru vaerã.

<sup>38</sup> Jare fariseo cua uecha yave, ipiacañi jese. Echa'ã Jesús uyepoe'ã ndei ucaru mbove. <sup>39</sup> Jayave yandeYa jei:

—Pe reta co jae fariseo reta. Pe reta co jae taza jare plato icupe rupiño uyeyoe vae rami. Ërei pepia iquia co. Echa'ã pipota ĩru vae reta

imbaembae jare piyapo icavi mbae vae —jei—. <sup>40</sup>Pe reta co jae iyaracuaa mbae vae reta. Echa'ã Tumpa uyapo opaete yandepuere yaecha vae. Ērei uyapo vi opaete yandepuere mbae yaecha vae —jei—. <sup>41</sup>Pemee pequirēi reve mbaembae iparavete vae reta pe. Cua piyapo yave, picuaacata ĩru vae reta pe iquia mbae co pepia —jei—.

<sup>42</sup>Pe reta co jae fariseo reta. Piporarata co. Echa'ã pemee Tumpa pe diezmo temiti reta penoi vae güi. Ērei piyapo'ã jupi piyapo vaerã vae, jare peau'ã Tumpa. Icavi co pemee vaerã Tumpa pe jocua nunga diezmo. Ērei piyapota tēi jupi co piyapo vaerã vae, jare peauta tēi Tumpa —jei—. <sup>43</sup>Pe reta co jae fariseo reta. Piporarata co. Echa'ã pipota peguapi tenda tenondegua vae reta pe tupao pe, jare pipota ĩru vae reta pe piyembisaludaca vaerã calle reta rupi —jei—. <sup>44</sup>Pe reta co jae mboroyocui re oporombocoe vae reta jare fariseo reta. Piporarata co. Echa'ã pepurumbitaviñoi. Pe reta co jae teōgüeriru reta quía uecha'ã vae rami. Yepe tēi ĩru vae reta upĩro jese reta, uicuaa'ã joco pe ñügüinoi vae —jei.

<sup>45</sup>Jayave penti mboroyocui re oporombocoe vae jei Jesús pe:  
—Cua añave ndere vae rupi ndere vi icavi mbae vae oreve.

<sup>46</sup>Jayave Jesús jei:

—Pe reta co jae mboroyocui re oporombocoe vae reta. Pe reta vi piporarata co. Echa'ã pe reta pere ĩru vae reta pe uyapo vaerã yavai uyapo vaerã vae. Yamijaanga penti tivita. Pe reta pere ĩru vae reta pe ovoi vaerã penti tivita poi ete vae. Ērei pe reta pembori'ã etei ovoi vaerã. Pe reta piyaviqui'ã etei tivita —jei—. <sup>47</sup>Piporarata co. Echa'ã pe reta piyapo Tumpa ĩnee aracae umimbeu vae reta iteōgüeriru reta. Jare petenondegua reta uyuca reta —jei—. <sup>48</sup>Jucuarãi picuaaca petenondegua reta uyapo vae icaviño co peve. Echa'ã jae reta uyuca reta, jare pe reta piyapo iteōgüeriru reta —jei chupe reta—. <sup>49</sup>Jucuarãiño vi Tumpa iyaracuaa catu vae jei: 'Amondota peve chiñee umimbeu vae reta jare cheremimondo reta, jare pe reta piyucata amocue vae jare piyapota icavi mbae vae ĩru reta pe' —jei, jei—. <sup>50</sup>Jare pe reta añave pico vae penoita teco opaete Tumpa ĩnee umimbeu vae reta ivi uyeyapo güive uyeyucaca vae imano re —jei—. <sup>51</sup>Tenonde voi Abel uyeyucaca, jare taicue rupi Zacarías uyeyucaca. Echa'ã Zacarías umano maemimba uyeyucacue uñemeearenda jare Tumpa jo ipäu pe. Añete che jae peve, cua reta jare opaete ĩru vae reta imano re pe reta añave pico vae piyembijecota —jei—.

<sup>52</sup>Pe reta co jae mboroyocui re oporombocoe vae reta. Piporarata co. Echa'ã pemboe'ã ĩru vae reta uicuaa vaerã Tumpa. Pe reta etei picuaa'ã Tumpa. ĩru vae reta uipota tēi uicuaa Tumpa, ěrei pe reta piyopia agüiye vaerã uicuaa —jei.

<sup>53</sup>Jare jucuarãi jei ma yave chupe reta, mboroyocui re oporombocoe vae reta jare fariseo reta pochi ete chupe, jare umbipi upirandu chupe jeta mbaembae re. <sup>54</sup>Jecuaeño jae reta uyapisaca cavi jese. Echa'ã uipota tēi uyandu jei mbae ipuere umbijeco jese vae.



### Piñemoa ngatu fariseo reta güi

**12** <sup>1</sup>Jare jeta ete uyembati Jesús oĩ vae pe, jare uñemiañamiaña. Jayave Jesús jei jemimboe reta pe rani:

—Piñemoa ngatu fariseo reta güi. Echa'ã jae reta upurumbitavi vae reta co. Jare tavi ipuere uñemiai levadura rami —jei—. <sup>2</sup>Ime yave mbae uyeyasoí vae, uyeechacañotai co. Jae ramiño vi ime yave mbae uñeñomi vae, uyecuaañotai co —jei—. <sup>3</sup>Jáeramo pītumimbi pe pere vae uyenduta tembipe pe, jare perenta japipe pe pere viari vae jerācuata opaete vae uyandu vaerā —jei—.

### Pequiye Tumpa güi

(Mt 10.26-31)

<sup>4</sup>Jare che jae peve, cherivi reta, agüiye pequiye upuruyuca vae reta güi. Echa'ã upuruyuca yave, mbaeti ye mbae icavi mbae vae ipuere uyapo peve —jei—. <sup>5</sup>Ērei tamimbeu peve quía güi pequiye vaerā. Icavi co pequiye vaerā Tumpa güi. Echa'ã jae güinoi mbaepuere upuruyuca vaerā jare oporomondo vaerā cañitei pe. Añete che jae peve, pequiye chugüi —jei—.

<sup>6</sup>Picuaa co quirāi umaemee vae reta umee pandepo güira-rai mbovi ete corepoti re. Ērei Tumpa ñacañi'ã penti yepe güira-rai güi —jei—. <sup>7</sup>Tumpa uicuaa mbovi pea penoi peāca re vae. Jáeramo agüiye pequiye. Echa'ã Tumpa perau ete jeta güira-rai reta güi —jei—.

### Īru vae reta jovaque uyecuaaca vae

(Mt 10.32-33; 12.32; 10.19-20)

<sup>8</sup>Jae ramiño vi che jae peve cua: Ime yave quía ĩru vae reta jovaque jei yave: 'Che co jae Jesús jemimboe', che cuimbaerā ayeyapo vae jaeta ángel Tumpa pe uyeyocui vae reta jovaque: 'Cua co jae cheremimboe' —jaeta, jei Jesús—. <sup>9</sup>Ērei ime yave quía ĩru vae reta jovaque checuacu vae, che vi aicuacuta ángel Tumpa pe uyeyocui vae reta jovaque —jei—.

<sup>10</sup>Jare ime yave quía jei icavi mbae vae che cuimbaerā ayeyapo vae coti vae, Tumpa umbiasata chupe. Ērei ime yave quía jei icavi mbae vae Espiritu Santo coti vae, Tumpa ndarau etei umbiasa chupe —jei Jesús chupe reta—.

<sup>11</sup>Jare ĩru vae reta pereraa yave pemee vaerā tupao reta pe jare mburuvicha reta pe jare ĩru vae reta mbaepuere güinoi vae pe, agüiye piyemipia'ã mbae pereta chupe reta vae re —jei—. <sup>12</sup>Echa'ã Espiritu Santo uicuaacata peve jocua ora pe etei mbae pere vaerā —jei—.

### Cuimbae icocatu vae iyaracuaa mbae vae

<sup>13</sup>Jayave penti cuimbae jeta vae ipite pe oĩ vae jei Jesús pe: —Oporomboe vae, ere cheriquei pe umbiyao vaerā cheve oreru ueya vae. <sup>14</sup>Jayave Jesús jei chupe:

—Cuimbae, che chepuere!ã co ayapicatu jocua nunga. Ndarau ambiyao peve nderu ueya vae —jei.

<sup>15</sup>Jayave Jesús jei opaete vae pe:

—Piñemoa ngatu agüiye vaerã pipota ñru vae reta imbaembae. Echa!ã ndarau yaico cavi jeta mbaembae ñanoi vae ramoño —jei.

<sup>16</sup>Jayave jei chupe reta umijaanga reve:

—Penti cuimbae icocatu vae iavati yagüiye cavi. <sup>17</sup>Jare cuimbae jei iyupe ipia pe: ‘¿Mbae ra ayapota? Mbaeti ma cheavati jendarã’ —jei, jei—. <sup>18</sup>Jayave jei iyupe ipia pe: ‘Aicuaa ma. Ambaita cheavatío reta jare ambutuicha eteta cheavatío reta, jare joco pe añuvatuta opaete cheavati jare opaete uyeaviro vae’ —jei, jei—. <sup>19</sup>Jayave che jaeta cherecove pe cuarãi: ‘Cherecove, jeta ete ma mbaeviro niñuvatu. Uepitita jeta año pegua. Eputuu, ecaru, ecau jare iyerovia.’ Cuarãi jaeta —jei, jei—. <sup>20</sup>Ërei Tumpa jei jocua cuimbae pe: ‘Nde co jae iyaracuaa mbae vae. Echa!ã cua pïtu aequita nderecove ndegüi. Jare jayave ¿quía ra güinoita opaete jocua mbaembae niñuvatu ndiyupeguarã vae?’ —jei, jei.

<sup>21</sup>Jayave Jesús jei chupe reta:

—Ime yave quía jeta mbaembae uñuvatu iyupeguarã vae, ãrei icocatu!ã yave Tumpa coti, uyeyapota chupe jocua cuimbae icocatu vae pe uyeyapo rami —jei.

### Agüiye piyemipia!ã mbaembae re

(Mt 6.25-34)

<sup>22</sup>Jayave Jesús jei jemimboe reta pe:

—Jáeramo che jae peve, agüiye piyemipia!ã perembiurã vae re. Jae ramiño vi agüiye piyemipia!ã peremimonderã vae re —jei—. <sup>23</sup>Ndarau pepuere pico cavi jecuaeño piyemipia!ã yave perembiurã vae re, jare peremimonderã vae re —jei—. <sup>24</sup>Pemae güira reta re. Echa!ã jae reta umaeti!ã jare umbaeviro!ã vi. Mbaeti vi güinoi avatío uñuvatu vaerã iavati. Ërei Tumpa umingararu reta. Jare Tumpa perau ete güira reta güi —jei—. <sup>25</sup>Aramoi piyemipia!ã pipota tãi pepucu ramo. Ërei ndarau etei pepuere piyembicuacuaa pepucu ete vaerã —jei Jesús chupe reta—. <sup>26</sup>Mbaeti etei mbae pepuere piyapo cua re. Ërei cua yavai!ã co Tumpa pe. Jáeramo agüiye piyemipia!ã ñru mbaembae re —jei—. <sup>27</sup>Pemae mbaepoti reta re, quirãi ucuacuaa reta. Uparaviqui!ã reta. Umaepova!ã reta vi. Ërei che jae peve, mbaepoti reta ipõra ete Salomón jemimonde ipõra vae güi. <sup>28</sup>Tumpa omopõra ñana, yepe tãi penti ara ñana oï co pe jare piareve pe ocai. Jáeramo Tumpa umeeta co peve peremimonderã. Michi ete co pepurugüirovia —jei—. <sup>29</sup>Agüiye piyemipia!ã perembiurã vae re, jare agüiye piyemipia!ã ñru mbaembae re —jei—. <sup>30</sup>Echa!ã opaete ivi pegua reta uyemipia!ã cua mbaembae re. Ërei peRu uicuaa icavi co penoi vaerã cua mbaembae —jei—. <sup>31</sup>Ërei icavi co pipota ete vaerã Tumpa iporoyocua, jare Tumpa umeeta peve opaete cua mbaembae —jei—.

### Mbaembae ara pegua

(Mt 6.19-21)

<sup>32</sup>Agüiye pequiye, yepe tēi pe reta mbovi ete co. Echa'ã Tumpa umeeta co pe reta pico vaerã iporoyocua pe —jei—. <sup>33</sup>Pemee corepoti re pembaembae, jare pemee corepoti uata chupe vae reta pe. Cuarãi piyapo yave, penoita mbaembae ara pegua. Jae co peurupucu ara pe penoita vae rami. Jocua nunga urupucu ndarau etei indechi jare jocua mbaembae icavi vae peurupucu ara pegua pe penoi vae ndarau ucañi. Echa'ã imonda vae ndarau oya jese jare cupii ndarau urucumegua —jei—. <sup>34</sup>Echa'ã piñuvatu yave mbaembae icavi vae piyupeguarã ivi pe, jecuaño pepia pe piyeminguetata ivi pegua re. Ërei piñuvatu yave mbaembae icavi vae piyupeguarã ara pe, jecuaño pepia pe piyeminguetata ara pegua re —jei—.

### Uyeyocui vae jecuaño uãro vae

<sup>35-36</sup>Yamijaanga peré uyeyocui vae reta. Uyeyocui vae reta ipatrón oo umenda vaerã yave, uyeyocui vae reta uãro ñugüinoi ipatrón ou ye regua. Uãro reta jare jecuaño jendi imechero reta. Jare ipatrón ou ye uvãe yave ombopu onque, jupivoi jembicui reta uipea onque ipatrón ipuere vaerã uique jenta pe —jei—. <sup>37</sup>Uyeyocui vae reta jecuaño uãro ñugüinoi yave ipatrón ou ye uvãe yave, uyeroviata reta. Añete che jae peve, ipatrón uyembicuata toalla pe, jare jeita jembicui reta pe uguapi vaerã mesa pe, jare ipatrón etei umingaruta jembicui reta —jei Jesús—. <sup>38</sup>Aramoi ipatrón ou yeta uvãe pïtu ma yave ani piare mbïte rupi. Ërei jae uecha yave jembicui reta uãro ñugüinoi, jae reta uyeroviata co —jei—. <sup>39</sup>Aipota picuaa vaerã cua: Penti tenta iya uicuaa yave mbae ora pe outa uvãe imonda vae oñomi vaerã imbaembae, uñemicuatïrota tēi jare ndarau tēi umaño imonda vae re güiraa vaerã imbaembae chugüi —jei—. <sup>40</sup>Jae ramiño vi pe reta peãro, agüiye vaerã che cuimbaerã ayeyapo vae ayu ye avãe piyandarecolã peï yave —jei chupe reta.

### Uyeyocui vae uyapo'ã ipatrón jei vae

(Mt 24.45-51)

<sup>41</sup>Jayave Pedro jei Jesús pe:

—CheYa, cua ndere ma nemijaanga reve. ¿Oreve peguarãño pa co cua? ani ¿opaete vae peguarã pa? —jei.

<sup>42</sup>Jayave yandeYa jei:

—Penti uyeyocui vae iyaracuaa vae uyapo ipatrón jei chupe uyapo vaerã vae. Jare ipatrón umee chupe ico vaerã ñru jembicui reta juvicharã, jare umee vaerã chupe reta jembuurã opa ara —jei—. <sup>43</sup>Ipatrón ou ye uvãe yave jenta pe, uecha yave jocua jembicui uyapo oï iparaviqui, jocua jembicui uyeroviata co —jei chupe reta—. <sup>44</sup>Añete che jae peve, ipatrón umeeta chupe uyandareco vaerã opaete imbaembae re —jei Jesús—. <sup>45</sup>Ërei aramoi uyeyocui vae jei iyupe ipia pe: 'Chepatrón ndarau ou ye imambae.' Jare umbipi uinupa ñru uyeyocui

vae reta - cuimbae reta jare cuñatai reta - jare ucaru jare ucau jare usavipo — jei—. <sup>46</sup>Jayave penti ara ipatrón ou yeta uvãe jembiocui uyandareco'ã oĩ yave. Jocua ora pe etei ipatrón uipocouta. Jayave ipatrón uiporaraca eteta chupe jare omondota ico vaerã ipatrón iporoyocui uyapo mbae vae reta ndive —jei—. <sup>47</sup>Ipatrón uiporaraca eteta. Echa'ã uyeyocui vae uicuaa tẽi ipatrón iporoyocui, ãrei uyapo'ã —jei chupe reta—. <sup>48</sup>Ërei ime yave uyeyocui vae uicuaa'ã ipatrón iporoyocui vae, yepe tẽi uiporarata co uyapo'ã ipatrón iporoyocui ramo, ãrei ipatrón ndarau uiporaraca ete chupe. Echa'ã ipatrón uicuaaca yave jembiocui pe iporoyocui, icavi co jembiocui uyapo vaerã uicuaa vae rupi —jei—.

**Ayu uyembiyao vaerã uyugüi ivi pegua reta**  
(Mt 10.34-36)

<sup>49</sup>Che ayu cua ivi pe tata ambiyepota vaerã, jare chequirẽi ete opa cheparaviqui ayapo —jei—. <sup>50</sup>Che aiporara eteta co jare yavai eteta cheve opa uyeyapo regua —jei—. <sup>51</sup>¿Pepia pe piyemingueta pa che ayu amee vaerã mbiacatu ivi pegua reta pe? Che jae peve, jucuarãi'ã co. Che ayu uyembiyao vaerã uyugüi ivi pegua reta —jei chupe reta—. <sup>52</sup>Echa'ã añave güive yugüireco yave pandepo penti tenta pe, uyembiyaota co uyugüi reta. Mbapi oyovaichota mocui ndive, jare mocui oyovaichota mbapi ndive —jei—. <sup>53</sup>Tu oyovaichota tai ndive, jare tai oyovaichota tu ndive. Ichi oyovaichota imembi cuña ndive, jare imembi cuña oyovaichota ichi ndive. Imesi oyovaichota imembi-tati ndive, jare imembi-tati oyovaichota imesi ndive —jei.

**Picuaa'ã etei mbae añave uyeyapo oĩ vae**  
(Mt 16.1-4; Mr 8.11-13)

<sup>54</sup>Jare Jesús jei yati vae reta pe:

—Peecha yave amapĩtu uyeyapo oĩ guarasi uique vae coti, jupivoi pere: 'Oquita co.' Jare jucuarãi uyeyapo —jei—. <sup>55</sup>Jae ramiño vi tanta ivitu yave, pere: 'Aracuta co.' Jare jucuarãi uyeyapo —jei—. <sup>56</sup>Pe reta co jae upurumbitavi vae reta. Echa'ã ara jare ivi re pemae yave, picuaa mbae uyeyapota vae. Ërei picuaa'ã etei mbae añave uyeyapo oĩ vae —jei chupe reta—.

**Iyeyapicatu nderovaicho ndive**  
(Mt 5.25-26)

<sup>57</sup>¿Maera pa peatẽi picuaa mbae jupi piyapo vaerã vae? —jei—. <sup>58</sup>Ndeo yave uipota uñeapo nderé mbae re vae ndive mburuvicha pe, tape rupi peo rambueve iyeyapicatu jae ndive, agüiye vaerã jae uñeapo nderé mburuvicha pe. Echa'ã mburuvicha nemondota peresoriru iyandarecoa pe, jare peresoriru iyandarecoa neñonota peresoriru pe —jei—. <sup>59</sup>Che jae ndeve, ndarau etei neẽ peresoriru güi ndei opaete ndepía nembiepi mbove —jei.

**Peeya piyemingueta icavi mbae vae pepia pe oĩ vae**

**13** <sup>1</sup>Jare amocue joco pe ñugüinoi vae reta umimbeu Jesús pe quirãi Pilato uyucaca amocue Galilea pegua reta, jae reta maemimba uyeyucacue reta umee Tumpa pe ñugüinoi rambueve. <sup>2</sup>Jayave Jesús jei chupe reta:

—Aramoi pe reta pepia pe piyemingueta jucuarãi uyeyapo jocua Galilea pegua reta pe, jae reta iyoa ete opaete ñru Galilea pegua reta güi ramo.

<sup>3</sup>Che jae peve, jucuarãi'ã co. Jare peeya'ã yave piyemingueta icavi mbae vae pepia pe oĩ vae, pe reta pecañiteita vi —jei—. <sup>4</sup>Jare jocua torre Siloé pe oĩse vae usururu jocua dieciocho vae re jare uyuca reta. Aramoi pe reta pepia pe piyemingueta jocua dieciocho vae iyoa ete opaete ñru Jerusalén pegua reta güi —jei—. <sup>5</sup>Che jae peve, jucuarãi'ã co. Jare peeya'ã yave piyemingueta icavi mbae vae pepia pe oĩ vae, pe reta pecañiteita vi —jei.

**Íva ía mbae vae**

<sup>6</sup>Jayave Jesús jei chupe reta umijaanga reve:

—Penti cuimbae güinoi ico pe penti íva. Oo tẽi ueca íva ía. Uvãe'ã chupe —jei—. <sup>7</sup>Jayave jei ico pe uparaviqui chupe vae pe: 'Mase, mbapi año ma ayu tẽi aeca cua íva ía jare avãe'ã chupe. Iyasia. Ñañotita tẽi ñru temiti jendacue pe' —jei, jei—.

<sup>8</sup>Jayave co pe uparaviqui vae jei co iya pe: 'Patrón, emañño tupita ye penti año pegua. Tayoo rani iyipi rupi jare tañono vacarepoti iyipi rupi' —jei, jei—. <sup>9</sup>Jayave ía yave, icavita co. Ërei ia'ã yave, ndepuereta ndiyasiaca' —jei, jei.

**Jesús umbigüera cuña mbutuu ara pe**

<sup>10</sup>Jare Jesús oporombœ oĩ penti judío reta itupao pe mbutuu ara pe.

<sup>11</sup>Jare uecha joco pe penti cuña dieciocho año ma imbaerasi vae. Jecuaño ipe ete. Ipuere'ã etei uyemboi cavi. <sup>12</sup>Jare Jesús uecha ma yave, jei chupe:

—Eyu checoti, cuña. Ndecuera ma co nembraerasi güi —jei.

<sup>13</sup>Jayave Jesús oñono ipo cuña ññãca re. Jare jupivoi cuña ipuere uyemboi cavi jare umbipi umbiadora Tumpa.

<sup>14</sup>Jayave tupao re uyandareco vae pochi cua re. Echa'ã Jesús umbigüera cuña mbutuu ara pe. Jáeramo tupao re uyandareco vae jei joco pe ñugüinoi vae reta pe:

—Icavi co yaparaviqui vaerã seis ara. Peyu jocua seis ara pecuera vaerã. Agüiye peyu pecuera vaerã mbutuu ara pe —jei.

<sup>15</sup>Ërei yandeYa jei chupe:

—Pe reta co jae upurumbitavi vae reta. Pe reta piyora pegüeye jare pemburica jenda güi mbutuu ara pe peraa vaerã pembiu —jei—. <sup>16</sup>Mase, cua cuña Abraham ññemoñaeta reta pegua co. Ërei Satanás dieciocho año ma umimbaerasi. ¿Icavi'ã pa che ambigüera vaerã cua mbaerasi güi mbutuu ara pe? —jei.

<sup>17</sup>Jare cua Jesús jei ma yave, opaete Jesús jovaicho reta imara. Echa'ã opaete joco pe ñugüinoi vae reta uyerovia opaete icavi ete vae Jesús uyapo vae re.

**Mostaza jáicue**  
(Mt 13.31-32; Mr 4.30-32)

<sup>18</sup>Jayave Jesús jei:

—¿Mbae ra ipuere uyemijaanga Tumpa iporoyocua re? ¿Mbae ra amijaangata jese? <sup>19</sup>Yandepuere yamijaanga jese penti mostaza jáicue — jei—. Uñeñoti yave, ucuacuaa jare uyeyapo ivira tuicha vae. Jare güira reta yugüeru uyapo jaitirã jese —jei.

**Levadura**  
(Mt 13.33)

<sup>20</sup>Jayave jei chupe reta:

—¿Mbae ra amijaangata Tumpa iporoyocua re? <sup>21</sup>Yandepuere yamijaanga jese levadura —jei—. Cuña umbiyea levadura jeta catu harina ndive, levadura uñemiai vaerã opaete masa rupi —jei.

**Onque ipi-rai vae**  
(Mt 7.13-14, 21-23)

<sup>22</sup>Jare Jesús uguata opaete tenta guasu reta jare tenta guasu-rai reta rupi, jare oporomoe joco pe. Jare jecuaño oo Jerusalén coti. <sup>23</sup>Jayave penti vae upirandu Jesús pe:

—CheYa, ¿ime pa mbovi catu uyembiasacata vae?

Jayave Jesús jei joco pe ñugüinoi vae reta pe:

<sup>24</sup>—Piñemimirãta pique vaerã onque ipi-rai vae rupi. Echa'ã che jae peve, jeta vae uipota tēita uique, ērei ndarau ipuere —jei—. <sup>25</sup>Echa'ã tenta iya uyequenda ma yave onque, pe reta pepitata oca pe. Jayave pemboputa tēi onque jare pereta tēi: 'OreYa, ipea onque oreve.' Ērei jae jeita peve: 'Che pucuaa'ã' —jeita, jei—. <sup>26</sup>Jayave pereta: 'Nducaru nderovaque, jare nde ndeporomoe orecale reta rupi' —pereta, jei—. <sup>27</sup>Ērei jae jeita peve: 'Che jae peve, che pucuaa'ã. Pe reta co jae icavi mbae vae uyapo vae reta. Pesiri chegüi' —jeita peve, jei—. <sup>28</sup>Jayave piyaota jare perãi pembiquirirũta. Echa'ã peechata Abraham jare Isaac jare Jacob jare opaete Tumpa iñee aracae umimbeu vae reta Tumpa iporoyocua pe ñugüinoi. Ērei pe reta oca pe pēita —jei—. <sup>29</sup>Yugüeruta reta opaete que rupi rupi güi, jare uguapita reta Tumpa iporoyocua pe —jei—. <sup>30</sup>Ērei pemandúa cua re: Amocue añave uñemimichi vae uyembitenondecata co, jare amocue añave uyembutuicha vae uyembitaicuecata co —jei.

**Jesús ipiatiti Jerusalén pegua reta re**  
(Mt 23.37-39)

<sup>31</sup>Jocua ara yugüeru Jesús oĩ vae pe amocue fariseo reta. Jae reta jei Jesús pe: —Ecuacua güi. Echa'ã Herodes uipota ndeyucaca.

<sup>32</sup>Jayave Jesús jei chupe reta:

—Herodes co jae penti aguara rami. Pecua ipi jare pemimbeu chupe quirãi jecuae ambisirita aña reta oya jese vae reta güi jare ambigüerata imbaerasi vae reta añave jare curiye. Jare cõeramo opata co cheparaviquí —jei—. <sup>33</sup>Añete co, icavi co jecuaño aa Jerusalén coti añave jare curiye jare cõeramo. Echa'ã Jerusalén peño judío reta uyuca Tumpa ñee umimbeu vae reta —jei—.

<sup>34</sup>Jerusalén pegua reta, pe reta piyuca Tumpa ñee aracae umimbeu vae reta. Pe reta piyapi ita pe piyuca Tumpa ombou peve vae reta. Jeta vese ma chequirẽi tẽi pumbati, uru umbati imembi reta ipepo igüi pe rami, ãrei pe reta pipota'ã —jei—. <sup>35</sup>Mase, Tumpa usirita ma pegüi. Che jae peve, ndarau ma cherecha pere regua: ‘Tuyembia doraca yandeYa jee re ou vae’ —jei.

### Cuimbae opaete jete iruru vae

**14** <sup>1</sup>Jare penti mbutuu ara pe Jesús oo uique penti fariseo reta itenondegua jenta pe ucaru vaerã jae ndive. Jare fariseo reta umae ñügüinoi Jesús re. <sup>2</sup>Jare Jesús uecha joco pe penti cuimbae opaete jete iruru vae. <sup>3</sup>Jayave Jesús upirandu mboroyocui re oporomböe vae reta jare fariseo reta pe:

—¿Jei pa mboroyocui yandepuere yambigüera vaerã quía mbutuu ara pe?

<sup>4</sup>Ërei jae reta quíño. Jayave Jesús oñoño ipo cuimbae imbaerasi vae re jare umbigüera. Jayave jei chupe oo vaerã. <sup>5</sup>Jayave Jesús jei joco pe ñügüinoi vae reta pe:

—Pemburica ani pegüeye uasavi yave penti ivicua pe mbutuu ara pe, jupivoi peo penoẽ joco güi —jei.

<sup>6</sup>Jare joco pe ñügüinoi vae reta ipuere'ã mbae jei Jesús pe cua regua.

### Agüiye eguapi tenda tenondegua vae pe

<sup>7</sup>Jayave Jesús uecha quirãi opaete tenta iya uparea chupe vae reta uiparavo tenda icavi vae. Jayave jei chupe reta umijaanga reve:

<sup>8</sup>—Penti cuimbae uparea ndeve yave menda vae pe, agüiye eguapi tenda tenondegua vae pe. Echa'ã aramoi tenta iya uparea vi ñru uipi ete ndegüi vae pe —jei—. <sup>9</sup>Jayave tenta iya güeruta jocua ñru vae ndeguapi vae pe jare jeita ndeve: ‘Emee cua cuimbae pe nerenda.’ Jayave nde nemarata co ndeo ndeguapi tenda taicuegua vae pe —jei—. <sup>10</sup>Ërei tenta iya uparea ndeve yave, ecua eguapi tenda taicuegua vae pe. Echa'ã ou yave tenta iya, aramoi jeita ndeve: ‘Cheamigo, ecua eguapi penti tenda tenondegua vae pe.’ Jucuarãi ndiyepiucata opaete yugüeru ucaru vaerã vae reta jovaque —jei—. <sup>11</sup>Echa'ã ime yave quía uyembutuicha vae, uñemimichicata co. Jare ime yave quía uñemimichi vae, uyembutuichacata co —jei.

<sup>12</sup>Jayave Jesús jei tenta iya pe:

—Ndipota yave ndepurumíngaru, agüiye eparea neamigo reta jare nerentarã reta jare nerentaigua icocatu vae reta pe. Echa'ã chupe reta ndeparea yave, jae reta upareata ndeve nde ndeparea chupe reta ramo —jei—. <sup>13</sup>Ërei ndipota yave ndepurumíngaru, eparea iparavete vae reta

jare ipo chutu vae reta jare icõcho vae reta jare jesa mbae vae reta pe —jei—. <sup>14</sup>Jucuarãi ndiyapo yave, Tumpa nemivendiseta. Echa'ã jae reta ndarau ipuere nemingarú. Ērei Tumpa umbijecoviata ndeve jupí vae reta icove ye yave yugüeru umanocue vae reta ipite güi —jei.

**Cuimbae jeta vae pe uparea ucaru vaerã vae**

*(Mt 22.1-10)*

<sup>15</sup>Jare penti jae ndive uguapi oĩ mesa pe vae cua uyandu yave, jei Jesús pe: —Tumpa iporoyocua pe ucaruta vae uyemivendiseta co.

<sup>16</sup>Jayave Jesús jei chupe:

—Penti cuimbae uyapoca jeta tembú jare uparea jeta vae pe ucaru vaerã. <sup>17</sup>Tembú oyi ma yave, omondo jembiocui jei vaerã uparea chupe vae reta pe: ‘Peyu. Echa'ã opaete uñeño ma mesa pe’ —jei, jei—.

<sup>18</sup>Ērei penti penti jei uyeyocui vae pe ipuere'ã oo ucaru vaerã. Penti vae jei chupe: ‘Agua ma checorã jare icavi co aa vaerã amae jese. Jáeramo chepuere'ã aa. Ere ndepatrón pe chembiasa vaerã’ —jei, jei—. <sup>19</sup>Jare ĩru vae jei chupe: ‘Agua ma diez güeye. Aata amboporova reta. Jáeramo chepuere'ã aa. Ere ndepatrón pe chembiasa vaerã’ —jei, jei—. <sup>20</sup>Jare ĩru vae jei chupe: ‘Amenda ramo ete. Jáeramo chepuere'ã aa’ —jei, jei—.

<sup>21</sup>Jayave uyeyocui vae ou ye ipatrón pe jare umimbeu chupe opaete cua regua. Jayave ipatrón pochí reve jei jembiocui pe: ‘Ecuá voi opaete calle rupi jare eru cua pe iparavete vae reta jare ipo chutu vae reta jare icõcho vae reta jare jesa mbae vae reta’ —jei, jei—. <sup>22</sup>Uyapo ma yave jucuarãi, uyeyocui vae jei ipatrón pe: ‘Patrón, ayapo ma ndeporoyocui, jare imeño ĩru vae reta jendarã’ —jei, jei—. <sup>23</sup>Jayave ipatrón jei jembiocui pe: ‘Ecuá ye opaete tape rupi jare ere nevãe chupe vae reta pe yugüeru vaerã, tinee vaerã cherenta’ —jei, jei—. <sup>24</sup>‘Echa'ã che jae peve, mbaeti penti ave jocua tenonde voi apareá chupe vae ucaruta cherenta pe’ —jei, jei.

**Yavai co oĩ oo vaerã Cristo jupíe**

*(Mt 10.37-38)*

<sup>25</sup>Jare jeta vae uyembati Jesús oĩ vae pe. Jayave Jesús umaé jese reta jare jei chupe reta:

<sup>26</sup>—Ime yave quía uipota oo cherupíe vae, cherau ete'ã yave tu jare ichi jare jembireco jare isambiai reta jare jentarã reta güi, jare uyeráu ete yave chegüi, ndarau ipuere ico cheremimboerã —jei—. <sup>27</sup>Jare ime yave quía ovo'ã icurusu oo vaerã cherupíe vae, ndarau ipuere ico cheremimboerã —jei—. <sup>28</sup>Penti cuimbae iquirëi yave uyapo torre, uguapita rani uipapa vaerã mbovi ra jepita, uicuaa vaerã icorepoti uepitita ra opa uyapo vaerã —jei chupe reta—. <sup>29</sup>Echa'ã uyapo'ã yave jucuarãi, aramoi oñonota torre iguapicarã, ěrei ndarau uepiti icorepoti opa uyapo vaerã. Jáeramo opaete uecha vae reta oyoyaita jocua cuimbae —jei—. <sup>30</sup>Echa'ã jeita reta: ‘Jocua cuimbae umbipi tēi uyapo torre, ěrei ipuere'ã opa



uyapo' —jeita, jei—. <sup>31</sup>Jae ramiño vi penti mburuvicha guasu iquirēi yave oo uñerāro ĩru mburuvicha guasu ndive, uguapita rani ipia pe uyemingueta cavi vaerā jese, uicuaa vaerā jocua diez mil isundaro reta ipuereta ra umiamiri jocua veinte mil sundaro reta jovaicho güinoi vae —jei—. <sup>32</sup>Echa'ā ipia pe uyemingueta yave isundaro reta ndarau umiamiri jovaicho isundaro reta, mbiri jovaicho güi oĩ rambueve, omondota amocue vae reta uyerure vaerā chupe agüiye vaerā uñerāro jae ndive —jei—. <sup>33</sup>Jae ramiño vi ime yave quía pepite pe opaete imbaembae ueya'ā vae, ndarau ipuere ico cheremimboerā —jei chupe reta—.

### **Yuqui jembochi mbae vae**

(Mt 5.13; Mr 9.50)

<sup>34</sup>Yuqui icavi co yau vaerā. Ĕrei jembochi'ā ma yave, ¿quirāita ra jembochi ye? —jei—. <sup>35</sup>Icavi'ā ma mbaerā. Icavi'ā yepe ivi peguarā. Yamomboño. Uipota uyandu vae tuyapisaca cua re —jei.

### **Ovecha ucañi vae**

(Mt 18.10-14)

**15** <sup>1</sup>Jayave uyembati Jesús oĩ vae pe jeta mburuvicha peguarā ocovara vae reta jare teco icavi mbae vae uyapo vae reta. <sup>2</sup>Jayave fariseo reta jare mboroyocui re oporombocoe vae reta ĩneenguru jese. Jae reta jei:  
—Cua cuimbae uñemiĩru teco icavi mbae vae uyapo vae reta ndive, jare ucaru jae reta ndive.

<sup>3</sup>Jayave Jesús jei chupe reta umijaanga reve:

<sup>4</sup>—Penti cuimbae güinoi yave cien ovecha, umicañi yave penti, ueya ĩru noventa y nueve ñana pe jare oo ueca ucañi vae uvāe chupe regua —jei—.

<sup>5</sup>Jare uvāe ma chupe yave, ovoĩ güeru ye iyatii re uyerovia reve —jei—.

<sup>6</sup>Jare ou ye uvāe yave jenta pe, umbati opaete iamigo reta jare jentaigua reta, jare jei chupe reta: 'Piyerovia che ndive. Avāe ye ma cheovecha ucañi vae' —jei, jei—. <sup>7</sup>Che jae peve, jae ramiño vi ara pegua reta uyerovia eteta iyoa vae ueya yave iyemingueta icavi mbae vae ipia pe oĩ vae. Jucuarāita'ā uyerovia noventa y nueve 'jupi co che' jei vae reta re. Echa'ā jae reta jei tēi: 'Mbaeti anoi yemingueta icavi mbae vae chepia pe' —jei reta, jei—.

### **Corepoti ucañi vae**

<sup>8</sup>Jae ramiño vi penti cuña güinoi yave diez corepoti, umicañi yave penti, umiendi mechero jare utupeĩ opaete tenta rupi. Ueca cavi uvāe chupe regua —jei—. <sup>9</sup>Jare uvāe ma chupe yave, umbati opaete iamiga reta jare jentaigua reta, jare jei chupe reta: 'Piyerovia che ndive. Avāe ye ma corepoti amicañi vae' —jei, jei—. <sup>10</sup>Che jae peve, jae ramiño vi ángel Tumpa pe uyeyocui vae reta uyerovia ete iyoa vae ueya yave iyemingueta icavi mbae vae ipia pe oĩ vae —jei.

### Tai ucañi vae

11 Jayave Jesús jei chupe reta:

—Penti cuimbae güinoi mocui tai. 12 Jare tai taicuegua vae jei tu pe: ‘Cheru, emee cheve añave voi mbaembae nde nemano ma yave anoita vae’ —jei, jei—. Jayave tu umbiyao imbaembae umee tai reta pe —jei—. 13 Jayave mbovi ara rupi tai taicuegua vae umbati umee opaete imbaembae jare oo mbiri ambie ivi pe. Joco pe uyapo jeta pareta jare jucuarai opa umingasta iyugüi opaete icorepoti —jei—. 14 Jare opa icorepoti umingasta yave, ou caruai tuicha vae jocua ivi pe, jare cuimbae mbaeti ma mbae güinoi jou vaerã —jei—. 15 Jayave oo uyerure penti patrón pe umee vaerã chupe mbaraviqui. Jayave jocua patrón omondo jenta pe umingaru vaerã cuchi reta —jei—. 16 Jare cuimbae uipota tẽi uyemingapii ivope cuchi reta jou vae pipe. Jare mbaeti quia umee chupe jou vaerã —jei—. 17 Jare cuimbae uicuaa ma quirai uyapo iyaracuaa mbae vae uyapo vae rami. Jayave jei iyupe ipia pe: ‘Cheru umimbaraviqui vae reta jeta güinoi jou vaerã. Ërei che amanota ma ai yembai pipe’ —jei, jei—. 18 Taa ye cua güi cheru pe jare tae chupe: ‘Cheru, cheyoa ma Tumpa coti jare ndecoti vi. 19 Jupi’ã ma aico vaerã nderairã. Emee cheve mbaraviqui iru nemimbaraviqui vae reta pe neme rami’ —jaeta, jei, jei—. 20 Jayave uñatima ye tu jenta coti.

Ërei mbiri catu oi rambueve, tu uecha jare uiparareco. Jayave tu osi oovaiti tai, jare uicuava jare uyurupite —jei—. 21 Jayave tai jei tu pe: ‘Cheru, cheyoa ma Tumpa coti jare ndecoti vi. Jupi’ã ma aico vaerã nderairã’ —jei, jei—. 22 Ërei tu jei jembiocui reta pe: ‘Peru voi temimonde icavi vae pemondecu chupe. Jae ramiño vi piñono moãcaregua ipoãca re jare mbiapasa ipi re’ —jei, jei—. 23 Jare peru cua pe vaca tairusu vae amingüira vae piyuca. Yacaru jare yayerovia’ —jei, jei—. 24 Echa’ã tenonde yave cua cherai penti umanocue vae rami co cheve, ãrei añave icove ye ma cheve. Tenonde yave ucañi chegüi, ãrei añave avãe ye ma chupe’ —jei, jei—. Jare umbipi reta uyembiyerovia —jei—.

25 Jare tai tenondegua vae uparaviqui oi co pe. Jare ou ye oi yave coiño ma tenta güi, uyandu uyemimbi ñugüinoi tenta pe —jei—. 26 Jayave ueni penti tu jembiocui jare upirandu chupe mbae ra co jocua uyandu vae —jei—. 27 Jayave uyeyocui vae jei chupe: ‘Nderivi ou ye ma, jare nderu uyucaca vaca tairusu vae umingüira vae, tai ou ye icavi uvãe ramo’ —jei, jei—. 28 Jayave tai tenondegua vae pochi jare uique’ã tenta pe. Jayave tu oẽ tenta güi jare jei tai pe uique vaerã —jei—. 29 Jayave tai tenondegua vae jei tu pe: ‘Mase, jeta año ma ayeyocui ndeve. Jecuaño ayapo ndeporoyocui. Ërei nemeel’ã etei cheve capura-rai yepe, apareta vaerã cheamigo reta pe nducaru vaerã’ —jei, jei—. 30 Jare cua nderai ico cuña aguasa rupi ico vae reta ndive jare jucuarai umingasta opaete nde neme chupe vae. Ërei jae ou ye uvãe rupive, ndiyucaca chupe vaca tairusu vae nemingüira vae’ —jei, jei—. 31 Jayave tu jei tai tenondegua vae pe: ‘Cherai, jecuaño nde ndico che ndive, jare opaete chembae nembae co’ —jei, jei—. 32 Icavi co yayerovia vaerã. Echa’ã

tenonde yave cua nderiví penti umanocue vae rami co cheve, ãrei añave icove ye ma cheve. Tenonde yave ucañi chegüi, ãrei añave avãe ye ma chupe' —jei, jei.

### Uyeyocui vae ipatrón imbaembae opa umingasta vae

**16** <sup>1</sup>Jare Jesús jei jemimboe reta pe: —Ico penti patrón icocatu vae jare ime güireco jembiocui. Jerãcua patrón pe quirãi jembiocui opa umingasta imbaembae —jei—. <sup>2</sup>Jayave jocua patrón ueni jembiocui jare jei chupe: '¿Mbae pa co cua nererãcua cheve vae? Emimbeu cheve mbae ndiyapo opaete chembaembae ndive vae. Echa'ã nomoëta co' —jei, jei—. <sup>3</sup>Jayave uyeyocui vae jei iyupe ipia pe: '¿Mbae ra ayapota? Echa'ã chepatrón chemoëta. Chepuere'ã ayoo ivi corepoti amingana vaerã. Chepuere'ã vi ayerure ñru vae reta pe mbaembae re. Echa'ã chemarata co' —jei, jei—. <sup>4</sup>Aicuaa ma mbae ayapota vae. Cuarãi ayapo yave, chepatrón chemoë ma yave, ñru vae reta uyandarecota cheré' —jei, jei—. <sup>5</sup>Jayave omondo umimbeu vaerã opaete ipatrón pe mbae re ipía vae reta yugüeru vaerã ipi. Jayave upirandu tenonde ou vae pe: '¿Mbovi pa ndepía chepatrón pe?' —jei, jei—. <sup>6</sup>'Cien lata aceite' —jei, jei—. Jayave uyeyocui vae jei chupe: 'Co oĩ ndetupapire. Eguapi voi jare icuatía cincuenta lata' —jei, jei—. <sup>7</sup>Jayave upirandu ñru vae pe: '¿Mbovi pa ndepía chepatrón pe?' —jei, jei—. 'Cien arroba trigo' —jei, jei—. Jayave uyeyocui vae jei chupe: 'Co oĩ ndetupapire. Icuatía ochenta arroba' —jei, jei—. <sup>8</sup>Jare patrón icocatu vae jei jembiocui jupi mbae vae uyapo vae pe: 'Icavi ete ndiyapo ndiyupe. Ndearacuaa co' —jei, jei—. Echa'ã cua ivi pegua reta iyaracuaa ete corepoti re Tumpa pe uyeyocui vae reta güi —jei—.

<sup>9</sup>Che pumbiaracuaa piporu vaerã pecorepoti pembali vaerã ñru vae reta. Jayave jae reta uyeyapota peamigo retarã. Echa'ã pemaño yave, opata peeya pecorepoti. Ñrei ara pe peamigo reta pembiresiveta jare joco pe picota jaeño mai pegua —jei Jesús chupe reta—. <sup>10</sup>Ime yave quía yandepuere yarovia catu mbae michi vae re vae, yandepuere vi yarovia catu mbae tuicha vae re. Jae ramiño vi ime yave quía upurumbitavi mbae michi vae re vae, upurumbitavi vi mbae tuicha vae re —jei—. <sup>11</sup>Jáeramo Tumpa ipuere'ã yave pererovia catu corepoti re, ndarau vi pererovia catu mbaembae icavi vae ara pegua re —jei—. <sup>12</sup>Jare ime yave quía yandepuere'ã yarovia catu ñru vae icorepoti re vae, ndarau ñamee chupe corepoti güinoi vaerã iyupeguarã —jei—.

<sup>13</sup>Penti uyeyocui vae uipota yave uyeyocui mocui patrón pe, umitarëita penti patrón jare uauta ñru vae, ani uparaviqui cavita penti patrón pe jare güirñota ñru vae. Pepuere'ã piyeyocui Tumpa pe corepoti peau reve —jei.

<sup>14</sup>Jare fariseo reta cua uyandu yave, oyoyai Jesús. Echa'ã jae reta uipota ete corepoti. <sup>15</sup>Jayave Jesús jei chupe reta:

—Pe reta piyembujupi ñru vae reta jovaque. Ñrei Tumpa uicuaa pepia pe oĩ vae. Jare yepe tẽi ñru vae reta pepiu, ãrei Tumpa uicuaa piyapo vae icavi mbae co —jei—.

### Mboroyocui jare Tumpa iporoyocua

<sup>16</sup>Ndei Juan ou mbove, Tumpa umimbeu yandeve yayapo vaerã mboroyocui jare Tumpa ñee aracae umimbeu vae reta jei vae. Ërei Juan umbipi umimbeu ñee icavi vae Tumpa iporoyocua regua, jare opaete vae uipota uique Tumpa iporoyocua pe —jei—. <sup>17</sup>Ara jare ivi opata. Ërei yandepuere'ã etei yambai mboroyocui —jei—.

#### Omombo jembireco vae

(Mt 19.1-10; Mr 10.1-12)

<sup>18</sup>Ime yave quía omombo jembireco vae, güireco yave ñru vae jembirecorã, uyuvanga menda re. Jare ime yave quía uyemombo ma vae güireco vae, jae vi uyuvanga menda re —jei—.

#### Cuimbae icocatu vae jare Lázaro

<sup>19</sup>Ico penti cuimbae icocatu vae. Jecuaeño uyemonde icavi ete jare opa ara rupi uyapoca tembíu icavi vae —jei—. <sup>20</sup>Jare ico vi ñru cuimbae Lázaro jee vae. Jae co iparavete vae. Lázaro ituyu yepai ico. Opa ara rupi uguapi cuimbae icocatu vae jonque jovai —jei—. <sup>21</sup>Lázaro uipota jou tembíu usururucue cuimbae icocatu vae imesa güi oa vae. Jare yimba reta yugüeru uere Lázaro ituyu —jei—. <sup>22</sup>Jare penti ara jocua cuimbae iparavete vae umano, jare ángel reta güiraa ara pe Abraham oĩ vae pe. Jae ramiño vi cuimbae icocatu vae umano jare uñeñotica —jei—. <sup>23</sup>Jare cañitei pe cuimbae icocatuse vae uiporara ete oĩ. Jayave jovaiva jare uecha Abraham mbiri oĩ chugüi. Uecha vi Lázaro Abraham ndive —jei—. <sup>24</sup>Jayave ñeeãta reve jei: 'Cheru Abraham, cheparareco. Embou Lázaro oñono vaerã ipoãca i pe umãqui vaerã checü. Echa'ã aiporara ete aĩ cua tata pe' —jei, jei—. <sup>25</sup>Ërei Abraham jei chupe: 'Cherai, nemandúa quirãi nde ndico ivi pe yave, nde nenoise mbaembae icavi vae. Jae ramiño vi Lázaro ico ivi pe yave, mbaembae icavi mbae vae uyeyapo chupe. Ërei añave jae ipiacatu oĩ jare nde ndiporara nei' —jei, jei—. <sup>26</sup>Jae ramiño vi ime oĩ mbae ñanepãu pe yandepuere'ã yaasa vae. Jáeramo nduipota yave ndoo pepi, ndarau orepuere. Jae ramiño vi pipota yave peyu orepí, ndarau pepuere' —jei, jei—. <sup>27</sup>Jayave cuimbae icocatuse vae jei Abraham pe: 'Cua jeco pegua ayerure ndeve, cheru, nemondo vaerã Lázaro cheru jenta pe' —jei, jei—. <sup>28</sup>'Echa'ã che ime anoi pandepo cherivi reta. Emondo umimbeu vaerã chupe reta, agüiye vaerã jae reta vi yugüeru cua jasi catu noĩ vae pe' —jei, jei—. <sup>29</sup>Jayave Abraham jei chupe: 'Ime güinoi Moisés iporoyocui jare Tumpa ñee aracae umimbeu vae reta uicuatía vae. Tumingueta reta jocua' —jei, jei—. <sup>30</sup>Jayave cuimbae icocatuse vae jei Abraham pe: 'Ndarau umingueta reta, cheru Abraham. Ërei uyecuaa yave chupe reta umanocue vae, ueyata reta iyemingueta icavi mbae vae ipia pe oĩ vae' —jei, jei—. <sup>31</sup>Jayave Abraham jei chupe: 'Uipota'ã yave uyapisaca Moisés iporoyocui jare Tumpa ñee

aracae umimbeu vae reta uicuatía vae re, ndarau uyapo Tumpa jei uyapo vaerã vae yepe tẽi quía icove ye oo chupe reta umanocue vae reta ipite güi' —jei, jei.

### Mbaeyoa uyapoca vae

(Mt 18.6-7, 21-22; Mr 9.42)

**17** <sup>1</sup>Jayave Jesús jei jemimboe reta pe: —Jecuaeño yugüirecota upurumbiavai vae reta. Ërei upurumbiavai vae reta uiporarata co —jei—. <sup>2</sup>Icavita tẽi co ñru vae reta uñapĩti vaerã iyayu re penti ita tuicha vae umbaesõ pipe vae, jare omombo vaerã i guasu pe, agüiye vaerã uyapoca tẽi mbaeyoa penti cheré güirovia vae pe —jei—. <sup>3</sup>Piñemoa ngatu. Nderivi uyapo yave icavi mbae vae ndeve, embiaracuaa. Jare jae ipiatiti yave jeco re, embiasa chupe —jei—. <sup>4</sup>Jare uyapo yave icavi mbae vae ndeve siete vese penti ara pe, jare jei yave ndeve siete vese jocua ara pe: 'Ndarau ma ayavi ndecoti', embiasa chupe —jei.

### Mburugüirovia re

<sup>5</sup>Jayave yandeYa jemimondo reta jei chupe: —Emimbeu oreve quirãi orepurugüirovia ipuere uñemĩru.

<sup>6</sup>Jayave yandeYa jei chupe reta:

—Aramoi pepurugüirovia michi ete penti mostaza jãicue michi-rai vae rami. Ërei jocua nunga mburugüirovia penoi yave, pepuereta pere cua ivira sicómoro jee vae pe: 'Ecuã cua güi epita i guasu pe', jare ivira uyapota pere vae —jei—.

### Uyeyocui vae uyapo vae

<sup>7</sup>Aramoi penti uyeyocui vae oo co pe umbiara vaerã ani umingarũ vaerã maemimba reta. Iparaviqui opa ma uyapo yave, ou ye ipatrõn jenta pe. Ërei ipatrõn jei'ã etei chupe: 'Eyu eguapi cua mesa pe ecaru.' Jucuarãi'ã jei chupe —jei—. <sup>8</sup>Echa'ã ipatrõn jei chupe: 'Ecuã rani emboyi mbae jau vaerã. Jayave javoi pegua eru cheve cherembiurã. Jare che opa ma acarũ yave, ndepuereta ndecaru' —jei, jei—. <sup>9</sup>Jare ipatrõn umee'ã etei yasurupai jembiocui pe jembiocui uyapo jei vae ramo —jei—. <sup>10</sup>Jae ramiño vi pe reta piyapo ma yave opaete Tumpa jei peve piyapo vaerã vae, pere piyupe: 'Ayapo'ã mbae ayembutuichaca vaerã cheYa pe. Echa'ã jaeño ayapo jupi ayapo vaerã vae.' Jucuarãi pere —jei.

### Diez cuimbae ipire ocui vae reta

<sup>11</sup>Jare Jesús ooñoi Jerusalén coti. Jayave oo uvãe Samaria jare Galilea ipãu pe. <sup>12</sup>Jare oo penti tenta guasu-rai pe uvãe, jare joco pe yugüeru Jesús coti diez cuimbae ipire ocui vae reta. Ërei jae reta upita mbiri catu Jesús güi. <sup>13</sup>Jayave jae reta iñeeãta reve jei Jesús pe:

—Jesús, oporomboe vae, oreparareco.

<sup>14</sup>Jare Jesús uecha reta yave, jei chupe reta:

—Pecua sacerdote reta pe, jae reta umae vaerã peré —jei.

Jare yugüiraa rambueve, aramoño ocui'ã ma ipire. <sup>15</sup>Jare penti cuimbae ou ye ñru cuimbae reta ipite güi jare ñneeãta reve jei:

—Tumpa tuyembiadoraca.

Echa'ã uicuaa ucuera ma co imbaerasi güi. <sup>16</sup>Jayave uyeatica Jesús jovai jare umee yasurupai chupe. Jae co Samaria pegua. <sup>17</sup>Jayave Jesús jei:

—Ambigüera diez cuimbae reta. Ërei nueve yugüeru'ã ye —jei—.

<sup>18</sup>Cua pentiño ou ye umbiadora vaerã Tumpa. Jare cua judio'ã co —jei.

<sup>19</sup>Jayave jei cuimbae pe:

—Epüa iyemboi jare ecua nerenta pe. Ndecuera ma, nderovia cheré ramo —jei.

### **Tumpa iporoyocua outa co**

*(Mt 24.23-28, 36-41)*

<sup>20</sup>Jare fariseo reta upirandu Jesús pe quirãi yave ra uyecuaata Tumpa iporoyocua. Jayave Jesús jei chupe reta:

—Tumpa iporoyocua ndarau uyecuaa pe reta pesareco jese vae rupi —jei—. <sup>21</sup>Jae ramiño vi ndarau quã jei: 'Mase, co oĩ', ani: 'Mase, pee oĩ.' Echa'ã Tumpa iporoyocua ime ma pepite pe oĩ —jei.

<sup>22</sup>Jayave Jesús jei jemimboe reta pe:

—Outa ara reta pipota vaerã tõi cherecha - che cuimbaerã ayeyapo vae - penti ara yepe, ãrei ndarau cherecha —jei—. <sup>23</sup>Jayave ñru vae reta jeita peve: 'Mase, co oĩ', ani: 'Mase, pee oĩ.' Ërei agüiye pecua jae reta ndive —jei—. <sup>24</sup>Tamijaanga ama uvera vae. Ama uvera vae uyecuaa opaete ara re. Jae ramiño vi che cuimbaerã ayeyapo vae ayecuaata opaete vae pe ayu ye yave —jei—. <sup>25</sup>Ërei aiporara eteta rani jare añave yugüireco vae reta ndarau uipota aico vaerã juvicha guasurã —jei—. <sup>26</sup>Picuaa co quirãi ivi pegua reta uyapo icavi mbae vae Noé ico rambueve. Jae ramiño vi uyapota reta icavi mbae vae che cuimbaerã ayeyapo vae ayu ye yave —jei—. <sup>27</sup>Echa'ã Noé ico rambueve, ivi pegua reta ucaruñoi jare ucauñoi yugüireco, jecuaeño cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerã.

Ërei penti ara Noé uique jocua chalana guasu pe. Jayave ou iporu guasu jare opa uyuca reta —jei—. <sup>28</sup>Jae ramiño vi Lot ico rambueve, Sodoma pegua reta ucaruñoi jare ucauñoi jare jecuaeño ogua mbaembae jare umee mbaembae, jare jecuaeño umaeti jare uyapo jenta retarã —jei—. <sup>29</sup>Ërei jocua ara Lot oẽ Sodoma güi yave, Tumpa ombou tata jare azufre jare opa uyuca Sodoma pegua reta —jei—. <sup>30</sup>Jucuarãita vi uyeyapo che cuimbaerã ayeyapo vae ayecuaa yave —jei—.

<sup>31</sup>Jocua ara ime yave penti cuimbae o cupe re oĩ vae, o cupe güi ugüeyi yave, agüiye tuique jo pe güiraa vaerã imbaembae. Jae ramiño vi ime yave penti cuimbae co pe oĩ vae, agüiye tou ye jenta pe —jei Jesús chupe reta—. <sup>32</sup>Pemandúa Lot jembireco pe uyeyapo vae re —jei—. <sup>33</sup>Uipota uñuvatu jecove vae ndarau ipuere uñuvatu. Ërei jocua umeeta jecove vae uñuvatuta co —jei—. <sup>34</sup>Che jae peve, jocua pĩtu mocui vae uyapacuata ñgüiñoi jupa

pe. Tumpa güiracata penti vae jare ñru vae upitata jupa pe —jei—. <sup>35</sup>Jae ramiño vi mocui cuña umbaesota ñugüinoi. Tumpa güiracata penti cuña jare ñru cuña upitata —jei—. <sup>36</sup>Jae ramiño vi mocui cuimbae ñugüinoita co pe. Tumpa güiracata penti cuimbae jare ñru cuimbae upitata co pe —jei.

<sup>37</sup>Jayave Jesús jemimboe reta upirandu chupe:

—OreYa, ¿quiape pa uyeyapota cua?

Jayave Jesús jei chupe reta:

—Umano vae jetecue oĩ vae pe uyematita uruvi reta.

### Cuña ime umano vae jare mburuvicha upuruãa vae

**18** <sup>1</sup>Jare penti ara Jesús imiari ye jemimboe reta pe umijaanga reve. Uipota uicuaaca chupe reta quirãi icavi co jecuaeño uyerure vaerã Tumpa pe jare agüiye vaerã icueri chugüi. <sup>2</sup>Jáeramo jei chupe reta:

—Ico penti tenta guasu pe penti mburuvicha upuruãa vae. Uquiye'ã Tumpa güi jare güiriro ñru vae reta —jei—. <sup>3</sup>Jae ramiño vi ico jocua tenta guasu pe penti cuña ime umano vae. Penti ara cuña ime umano vae oo mburuvicha upuruãa vae pe jare jei chupe: ‘Cherepi cherovaicho güi’ —jei, jei—. <sup>4</sup>Mburuvicha upuruãa vae uyapo'ã mbae uepi vaerã cuña. Èrei mbovi ara rupi jei iyupe ipia pe: ‘Yepe tõi aquiye'ã Tumpa güi jare ariro ñru vae reta, <sup>5</sup>èrei cua cuña ime umano vae chemambeco ramo, aepita co. Echa'ã aepi'ã yave, jecuaeño outa chepi jare ndarau umaeño aputuu’ —jei, jei.

<sup>6</sup>Jayave yandeYa jei:

—Jucuarãi co jei jocua mburuvicha upuruãa vae jupi mbae vae uyapo vae. <sup>7</sup>Èrei Tumpa jupi co. Jáeramo uepita co uiparavo vae ara rupi jare pĩtu rupi uyerure chupe vae reta, yepe tõi aramoi ndarau uepi voi —jei—. <sup>8</sup>Che jae peve, imambae Tumpa uepita reta. Èrei che cuimbaerã ayeyapo vae ayu ye yave ivi pe, ¿imeta ra ñugüinoi upurugüirovia vae reta? —jei.

### Fariseo jare mburuvicha peguarã ocovara vae

<sup>9</sup>Jare Jesús oĩ vae pe ñugüinoi amocue uyembujupi ipiyemingueta pe vae. Jae reta güiriro ñru vae reta. Jare Jesús jei chupe reta umijaanga reve:

<sup>10</sup>—Mocui cuimbae yugüiraa Tumpa jo pe uyerure vaerã Tumpa pe. Penti co fariseo jare ñru vae mburuvicha peguarã ocovara vae co —jei—. <sup>11</sup>Fariseo uyemboi jare uyerure iyupe ipia pe cuarãi: ‘Tumpa, amee yasurupai ndeve. Echa'ã che aico'ã ñru cuimbae reta yugüireco rami. Che apurumbitavi'ã apiro vaerã quía güi imbaembae. Ayapo'ã jupi mbae vae. Ayuvanga'ã menda re. Ayapo'ã vi jocua mburuvicha peguarã ocovara vae uyapo rami’ —jei, jei—. <sup>12</sup>Che ayecuacu tembú güi mocui vese semana pe, jare amee ndeve diezmo opaete anoi vae güi’ —jei, jei—. <sup>13</sup>Jare mburuvicha peguarã ocovara vae uyemboi oĩ mbiri catu fariseo güi, jare uipotã'ã jovaiva. Jaeño ocua iyee ipitía re jare jei: ‘Tumpa, cheparareco. Echa'ã che cheyoa vae co’ —jei, jei—. <sup>14</sup>Che jae peve, Tumpa umbiasa mburuvicha peguarã ocovara vae pe

imbaeyoa reta, jare jae oo ye jenta pe. Ërei umbiasa'ã fariseo pe imbaeyoa reta. Echa'ã ime yave quía uyembutuicha vae, uñemimichicata co. Jare ime yave quía uñemimichi vae, uyembutuichacata co —jei.

**Jesús uyerure Tumpa pe sambiai reta re**  
(Mt 19.13-15; Mr 10.13-16)

<sup>15</sup>Jare amocue vae güeru Jesús oĩ vae pe sambiai reta, Jesús oñono vaerã ipo jese reta. Ërei Jesús jemimboe reta uecha reta yave, uñeengata güeru vae reta pe. <sup>16</sup>Ërei Jesús ueni sambiai reta jare jei:

—Pemaño sambiai reta re yugüeru vaerã checoti. Agüiye piyopia. Echa'ã cua nunga uyeyocui Tumpa pe iporoyocua pe —jei—. <sup>17</sup>Añete che jae peve, pipota'ã yave Tumpa pe piyeyocui vaerã penti sambiai uipota rami, ndarau pico Tumpa iporoyocua pe —jei.

**Mburuvicha icocatu vae**  
(Mt 19.16-30; Mr 10.17-31)

<sup>18</sup>Jare penti mburuvicha jei Jesús pe:

—Oporomboc vae, nde ndepiacavi co. ¿Mbae pa ayapota anoi vaerã tecove opa mbae vae? —jei.

<sup>19</sup>Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaeño co Tumpa —jei—. <sup>20</sup>Nde ndicuaa co mboroyocui reta: 'Agüiye iyuvanga menda re. Agüiye epuruyuca. Agüiye nemonda. Agüiye ndapu ñru vae re. Ipiu nderu jare ndesi?' —jei Jesús chupe.

<sup>21</sup>—Ayavi'ã penti ave cua mboroyocui reta chemichi güiye —jei.

<sup>22</sup>Jare Jesús cua uyandu yave, jei chupe:

—Ime mbae uata ndiyapo vaerã. Eme opae mbaembae neni vae corepoti re, jare eme ndecorepoti iparavete vae reta pe, jare ndicocatuta ara pe. Jayave eyu cherupíe —jei.

<sup>23</sup>Ërei mburuvicha cua uyandu yave, tuicha ipiatiti. Echa'ã icocatu ete co.

<sup>24</sup>Jare Jesús uecha yave mburuvicha ipiatiti upita, jei:

—Yavai ete co icocatu vae reta uique vaerã Tumpa iporoyocua pe.

<sup>25</sup>Yavai ete icocatu vae uique vaerã Tumpa iporoyocua pe, maemimba camello jee vae yuu jesacua rupi uasa vaerã güi —jei.

<sup>26</sup>Jayave cua uyandu vae reta jei:

—Jucuarãi yave, ¿quía pa ipuere uyembiasaca?

<sup>27</sup>Jayave Jesús jei chupe reta:

—Ivi pegua reta ipuere'ã uyembiasa. Ërei Tumpa ipuere umbiasa reta —jei.

<sup>28</sup>Jayave Pedro jei Jesús pe:

—Mase, ore opae mbaembae ndueya, ndoyu vaerã nderupíe.

<sup>29</sup>—Añete che jae peve —jei Jesús—, ime yave quía ueya jenta, ani tu, ani ichi, ani tiquei reta, ani tivi reta, ani jembireco, ani isambiai reta



Tumpa iporoyocuia jeco pegua vae, <sup>30</sup>jeta ete jecoviata co chupe ivi pe ico rambueve, jare taicue rupi Tumpa umeeta chupe tecove opa mbae vae —jei.

### Jesús umimbeu ye umanota co

(Mt 20.17-19; Mr 10.32-34)

<sup>31</sup>Jayave Jesús ueni jocua doce jemimboe reta, jare jei chupe reta: —Mase, yaa co ñaĩ Jerusalén pe, jare opaete Tumpa ñnee aracae umimbeu vae reta uicuatiaque cuimbaerã uyeyapo vae regua uyeyapota co cheve —jei—. <sup>32</sup>Echa'ã ñru vae reta chemeeta judío mbae vae reta pe. Jare jae reta cheyoyaita, uyapota icavi mbae vae cheve, jare undivita cheré —jei—. <sup>33</sup>Jayave chenupata chicote pe jare cheyucata. Ërei mbapi ara rupi aicove yeta ayu umanocue vae reta ipite güi —jei.

<sup>34</sup>Ërei Jesús jemimboe reta uicuaa'ã mbae ra uipota jei cua Jesús jei chupe reta vae. Yavai ete chupe reta uicuaa vaerã mbae jei vae.

### Cuimbae jesa mbae vae

(Mt 20.29-34; Mr 10.46-52)

<sup>35</sup>Jare Jesús coiño ma ou Jericó güi yave, penti cuimbae jesa mbae vae uguapi uyerure oĩ mbae re tape jembei pe. <sup>36</sup>Jae uyandu jeta vae uasa ñugüinoi jacoropi, jare upirandu mbae ra uyeyapo oĩ. <sup>37</sup>Jayave uasa vae reta umimbeu chupe Jesús Nazaret pegua uasa oĩ. <sup>38</sup>Jayave jesa mbae vae ñneeãta reve jei:

—Cheparareco, Jesús. Nde co jae David ñnemoñaeta reta pegua —jei.

<sup>39</sup>Jeta joco pe ñugüinoi vae reta uñeengata chupe. Uipota tẽi umiquĩ. Ërei jesa mbae vae jeiete ñneeãta reve jei:

—Nde co jae David ñnemoñaeta reta pegua. Cheparareco —jei.

<sup>40</sup>Jayave Jesús uyemboi, jare jei joco pe ñugüinoi vae reta pe güeru vaerã jesa mbae vae. Jare jesa mbae vae ou yave Jesús oĩ vae pe, Jesús upirandu chupe:

<sup>41</sup>—¿Mbae pa ndipota ayapo vaerã ndeve?

—Tamae, cheYa —jei.

<sup>42</sup>Jayave Jesús jei chupe:

—Emae. Ndecuera ma, nderovia cheré ramo —jei.

<sup>43</sup>Jare jupivoi ipuere uma, jare oo Jesús jaicue umbiadora reve Tumpa. Jare opaete joco pe ñugüinoi vae reta vi cua uecha yave, umbiadora Tumpa.

### Jesús jare Zaqueo

**19** <sup>1</sup>Jare Jesús uique Jericó pe jare oo ye joco güi. <sup>2</sup>Jare ico joco pe penti cuimbae Zaqueo jee vae. Jae co mburuvicha peguarã ocovara vae reta itenondegua jare jae co icocatu vae. <sup>3</sup>Jare Zaqueo uipota tẽi uecha Jesús. Ërei ipuere'ã uecha. Echa'ã jeta vae ñugüinoi Jesús uasa vae rupi, jare Zaqueo ipucu'ã co. <sup>4</sup>Jáeramo Zaqueo osi oo penti ivira

sicómoro jee vae tape jembei pe oĩ vae pe, jare uyupi jese uecha vaerã Jesús. Echa'ã Jesús uasata oĩ jocoropi. <sup>5</sup>Jare Jesús oo uvãe yave ivira oĩ vae pe, jovaiva umae jare uecha Zaqueo. Jayave jei chupe:

—Egüeyi, Zaqueo. Echa'ã añave aipota apou ndepi —jei.

<sup>6</sup>Jayave Zaqueo ugüeyi voi, jare güiraa Jesús jenta pe uyerovia reve.

<sup>7</sup>Jare opaete ñru vae reta cua uecha yave, ñeenguru reve jei reta:

—Jae oo opou penti cuimbae iyoa vae pe.

<sup>8</sup>Ñrei Zaqueo uyemboi yandeYa jovai jare jei chupe:

—Mase, cheYa, ameeta chembaembae mbite rupi iparavete vae reta pe.

Jare ime yave quía güi apĩro mbae chugüi vae, irundi ye ambijecoviata chupe —jei.

<sup>9</sup>Jayave Jesús jei chupe:

—Cua ara yembiasa ou cua tenta pegua reta pe. Echa'ã nde vi co jae Abraham ñeñoñaeta reta pegua —jei—. <sup>10</sup>Echa'ã che cuimbaerã ayeyapo vae ayu aeca vaerã jare ambiasa vaerã ucañi Tumpa güi vae reta —jei.

### Diez corepoti jare uyeyocui vae reta

(Mt 25.14-30)

<sup>11</sup>Jare Jesús ndive ñugüiñoi vae reta cua uyandu ma yave, Jesús imiari ye chupe reta umijaanga reve. Echa'ã oo ma uvãe coiño Jerusalén güi, jare jae ndive ñugüiñoi vae reta ipia pe uyemingueta tẽi imambae ete co uyecuaata Tumpa iporoyocua. <sup>12</sup>Jáeramo Jesús jei chupe reta:

—Penti mburuvicha oota iivi güi ambie ivi mbiri oĩ vae pe uyeyapo vaerã iivi pegua reta juvicha guasurã. Jare taicue rupi ou yeta —jei—.

<sup>13</sup>Jare ndei oo mbove, ueni diez jembiocui reta jare umee penti penti pe corepoti jepi ete vae, jare jei chupe reta: 'Piporu cua corepoti ayu ye regua' —jei, jei—. <sup>14</sup>Ñrei mburuvicha jentaigua reta umitarẽi mburuvicha, jare mburuvicha oo ma yave ambie ivi pe, jae reta omondo jei vaerã: 'Nduipota'ã jocua cuimbae ico vaerã oreruvicha guasurã' —jei reta, jei—.

<sup>15</sup>Ñrei mburuvicha uyeyapo jentaigua reta juvicha guasurã. Jayave ou ye uvãe iivi pe jare ueni jembiocui corepoti umee chupe vae reta uyembati vaerã, jae uicuaa vaerã mbovi ra penti penti umingana —jei—. <sup>16</sup>Penti jembiocui jei chupe: 'Patrón, amimbaraviqui corepoti neme cheve vae, jare añave anoi diez corepoti' —jei, jei—. <sup>17</sup>Jayave ipatrón jei jocua jembiocui pe: 'Ícavi ndiyapo. Nde co jae cherembiocui icavi vae. Cua amee ndeve vae mboviño. Ñrei nemimbaraviqui cavi. Jáeramo che toroñoño diez tenta guasu pegua reta juvicharã' —jei, jei—. <sup>18</sup>Jayave ñru jembiocui jei chupe: 'Patrón, amimbaraviqui corepoti neme cheve vae, jare añave anoi pandepo corepoti' —jei, jei—. <sup>19</sup>Jayave ipatrón jei jocua jembiocui pe: 'Ícavi ndiyapo. Che toroñoño pandepo tenta guasu pegua reta juvicharã' —jei, jei—. <sup>20</sup>Jayave ñru jembiocui jei chupe: 'Mase, patrón, co oĩ corepoti neme cheve vae. Ayapicua añuvatu ndeve' —jei, jei—. <sup>21</sup>'Echa'ã aquíye ndegüi ndepiapochi ramo. Nde nepĩro mbaembae ñru vae reta güi jare ndeaviro ñru vae reta oñoti vae'

—jei, jei—. <sup>22</sup>Jayave ipatrón jei jocua jembiocui pe: ‘Nde ndere vae rupi etei che nuãata co. Nde co jae cherembiocui icavi mbae vae. Ndicuaa chepiapochi co jare quirãï apïro mbaembae ïru vae reta güi jare quirãï aaviro ïru vae reta oñoti vae’ —jei, jei—. <sup>23</sup>¿Maera pa nderaa’ã checorepoti banco pe? Echa’ã jucuarãï ndiyapo yave, ayu ye yave nemeeta tãï co cheve corepoti amee ndeve vae jare mbovi ye banco pegua reta umãiruta tãï jae ndive vae’ —jei, jei—. <sup>24</sup>Jayave ipatrón jei ïru jembiocui joco pe ñugüinoi vae reta pe: ‘Pepïro chugüi jocua corepoti jare pemee jocua diez corepoti güinoi vae pe’ —jei, jei—. <sup>25</sup>Ërei jae reta jei ipatrón pe: ‘Patrón, jae güinoi ma diez corepoti.’ <sup>26</sup>‘Añete co’ —jei ipatrón chupe reta, jei—. ‘Ërei che jae peve, güinoi vae pe uñemãiruta, jare mbaeti güinoi vae güi mbovi ete güinoi vae uyeequita’ —jei, jei—. <sup>27</sup>‘Ërei peru cua pe jocua cherovaicho reta. Jae reta uipota’ã che aico vaerã juvicha guasurã. Piyuca cherovaque’ —jei, jei.

### Jesús oo Jerusalén pe

(Mt 21.1-11; Mr 11.1-11; Jn 12.12-19)

<sup>28</sup>Jare Jesús cua jei ma chupe reta yave, uguata ye ïru vae reta jenonde oo Jerusalén coti. <sup>29</sup>Jare yugüiraa uvãe coiño tenta guasu-rai reta Betfagé jare Betania güi. Joco pe oï ivitu guasu Olivos. Jayave Jesús oyocui mocui jemimboe reta.

<sup>30</sup>—Pecua pea tenta guasu-rai yanderovai oï vae pe —jei chupe reta—. Peo pevãe rupive, pevãeta penti mburica tairusu vae uñeñapiti oï. Ndei ave etei quía opo jese. Piyora jare peru —jei—. <sup>31</sup>Jare ime yave quía jei peve vae: ‘¿Maera pa piyora?’ pere chupe cuarãï: ‘YandeYa uipota uiporu’ —pere, jei.

<sup>32</sup>Jayave Jesús omondo vae reta yugüiraa, jare uvãe mburica tairusu vae Jesús umimbeu chupe reta rami. <sup>33</sup>Jare oyora ñugüinoi yave, mburica iya reta upirandu chupe reta:

—¿Maera pa piyora peï mburica?

<sup>34</sup>—YandeYa uipota uiporu —jei reta.

<sup>35</sup>Jayave güeru reta mburica tairusu vae Jesús oï vae pe. Jayave Jesús jemimboe reta oñono iyasoya mburica icupe re, jare Jesús opo jese. <sup>36</sup>Jare Jesús oo rambueve Jerusalén coti, joco pe ñugüinoi vae reta uipiso iyasoya tape rupi mburica jenonde.

<sup>37</sup>Jare umbipi reta ugüeyi ivitu guasu Olivos güi. Coiño ma yugüeru Jerusalén güi. Jayave opaete Jesús jemimboe reta umbipi uyerovia. Umbiadora reta Tumpa ñneeãta reve opaete miacañi uecha Jesús uyapo vae reta re. <sup>38</sup>Jare jei reta:

—Tuyembiaadoraca yandeRuvicha Guasurã yandeYa jee re ou vae.

Mbiacatu toï ara pe. Ara pegua reta tumbiadora Tumpa —jei reta.

<sup>39</sup>Jare amocue fariseo reta jeta vae ipite pe ñugüinoi vae jei Jesús pe:

—Oporomboe vae, ñneengata nderemimboe reta pe.

<sup>40</sup>Ërei Jesús jei chupe reta:

—Che jae peve, cua reta quíi yave, jupivoiño ita reta uyeminguetata ñneeãta reve —jei.

<sup>41</sup>Jare Jesús coïño ma Jerusalén güi ou uvãe yave, umae Jerusalén re jare umbipi uyao. <sup>42</sup>Jare jei:

—Ndicuaa'ã quirã ra ndepuere neno mbiacatu. Cua ara reta pe ndicuaata tã co. Ërei añave ndarau ndicuaa —jei—. <sup>43</sup>Outa ma uvãe nderovaicho reta nequẽse vaerã jare ndarau umaefio ndepite pe yugüireco vae reta re oẽ vaerã ndegüi —jei—. <sup>44</sup>Jare jae reta opata nembusururu jare uyucata opaete ndepite pe yugüireco vae reta. Ndarau ueya reta penti ita ïru ita iárambo, ndicuaa'ã Tumpa umeeta tã mbiacatu ndeve ramo —jei.

### Jesús Tumpa jo pe uyapo vae

(Mt 21.12-17; Mr 11.15-19; Jn 2.13-22)

<sup>45</sup>Jayave Jesús uique Tumpa jo pe, jare umbipi omoẽ joco güi umaemee vae reta jare mbae ogua vae reta. <sup>46</sup>Jare jei chupe reta:

—Tumpa ñee pe uyecuatía oĩ cuarã: ‘Chero co jae piyure cheve pipe vae.’ Jucuarã uyecuatía oĩ. Ërei pe reta piyapo ma imonda vae reta ñemía rami —jei.

<sup>47</sup>Jayave Jesús oporomböe Tumpa jo pe opa ara rupi. Ërei sacerdote reta itenondegua reta jare mboroyocui re oporomböe vae reta jare tenta guasu pegua reta itenondegua reta ueca quirã ipuere uyucaca vaerã Jesús. <sup>48</sup>Ërei uicuaa'ã reta quirãita ra uyucaca. Echa'ã opaete tenta guasu pegua reta uipota ete uyapisaca Jesús re.

### Jesús imbaepuere

(Mt 21.23-27; Mr 11.27-33)

**20** <sup>1</sup>Jare penti ara Jesús oporomböe oĩ Tumpa jo pe, jare umimbeu joco pe ñugüinoi vae reta pe ñee icavi vae. Jayave yugüeru vi joco pe sacerdote reta itenondegua reta jare mboroyocui re oporomböe vae reta jare tenta guasu pegua reta itenondegua reta. <sup>2</sup>Jayave jae reta jei Jesús pe:

—Emimbeu oreve, ¿mbae nunga mbaepuere pa neno cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

<sup>3</sup>Jayave Jesús jei chupe reta:

—Che vi tapirandu peve mbae re. Yaecha pepuere pemimbeu cheve —jei—. <sup>4</sup>¿Quía pa ombou Juan upurumbibautiza vaerã? ¿Tumpa pa ombou? ani ¿ivi pegua reta pa ombou? —jei.

<sup>5</sup>Jayave jae reta jei uyupe:

—Yae yave: ‘Tumpa co ombou’, jae jeita yandev: ‘Jucuarã yave, ¿maera pa perovia'ã?’ <sup>6</sup>Ërei yae yave: ‘Ivi pegua reta co ombou’, opaete tenta guasu pegua reta yandepita ita pe yandeyuca. Echa'ã jae reta güirovia Juan co jae penti Tumpa ñee umimbeu vae —jei reta.

<sup>7</sup>Jáeramo jei reta Jesús pe:

—Nduicuaa'ã quía ra ombou Juan.

<sup>8</sup>Jayave Jesús jei chupe reta:

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei.

**Co iporúa icavi mbae vae reta**

(Mt 21.33-44; Mr 12.1-11)

<sup>9</sup>Jayave Jesús umbipi imiari joco pe ñugüinoi vae reta pe umijaanga reve. —Penti cuimbae oñoti jeta uva ico pe. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe upita vaerã ima pegua —jei—. <sup>10</sup>Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerã tẽi uva chupe reta, iya güinoi vaerã imbaerã. Ërei co iporúa reta uinupa co iya jembiocui, jare omondo ye. Umee'ã etei chupe güiraa vaerã —jei—. <sup>11</sup>Jayave co iya ombou ye tẽi ñru jembiocui. Ërei co iporúa reta uinupa jare uyapo icavi mbae vae chupe, jare omondo ye. Umee'ã etei chupe güiraa vaerã —jei—. <sup>12</sup>Jayave co iya ombou ye tẽi ñru jembiocui. Ërei co iporúa reta umbipere, jare omondo ye —jei—. <sup>13</sup>Jayave co iya jei iyupe: '¿Mbae ra ayapota? Amondota cherai aau ete vae. Aramoi jae reta uipiuta cherai?' —jei, jei—. <sup>14</sup>Ërei co iporúa reta uecha yave co iya tai, jei reta uyupe: 'Cua co jae iyarã vae. Yaa yayuca, jare yande yaicota co iyarã' —jei reta, jei—. <sup>15</sup>Jayave jae reta omombo co güi, jare uyuca.

Jáeramo ¿mbae ra uyapota co iya jocua co iporúa reta pe? —jei—. <sup>16</sup>Outa, opa uyuca vaerã jocua co iporúa reta, jare uiporucata ico ambie vae reta pe —jei.

Jayave cua uyandu vae reta jei:

—Tumpa mona jei agüiye uyeyapo.

<sup>17</sup>Jayave Jesús umae jese reta jare jei:

—¿Mbae ra uipota jei cua Tumpa iñee pe uyecuatía oĩ vae?

'Ita tenta iyapoa reta omombo vae uyeyapo ma ita tenondegua vae.'

<sup>18</sup>Ime yave quía jocua ita re uyepiaca vae, uñemopẽta co. Jare ime yave quía jocua ita oa jese vae, opata umbiperasoraso —jei.

<sup>19</sup>Jayave jupivoi sacerdote reta itenondegua reta jare mboroyocui re oporomboe vae reta uipota tẽi uipisi Jesús. Echa'ã uicuaa cua Jesús umijaanga reve jei vae uicuaaca quirãi jae reta teco güinoi. Ërei uquiye tenta guasu pegua reta güi.

**¿Jupi pa yambiepi vaerã César pe?**

(Mt 22.15-22; Mr 12.13-17)

<sup>20</sup>Jare jecuaeño jae reta umae Jesús re. Jare omondo vi ñru vae reta uipiãro vaerã Jesús. Cua reta uipota tẽi umbitavi Jesús, Jesús ipia pe uyemingueta vaerã tẽi jae reta jupi co. Ërei jae reta uipota tẽi umbijeco mbae jei vae re, uñeapo vaerã jese mburuvicha pe. <sup>21</sup>Jayave jae reta jei Jesús pe:

—Oporomboe vae, nduicuaa nde ndere vae jare ndeporomboe jese vae añete co. Nde nembutuicha'ã penti ave ñru vae güi. Nde ndeporomboe cavi quirãi

Tumpa uipota yaico vaerã vae re —jei reta—. <sup>22</sup>César yandecui yambiepi vaerã chupe corepoti pe. ¿Jupi pa yambiepi vaerã chupe? ani ¿jupi'ã pa? —jei reta.

<sup>23</sup>Èrei Jesús uicuaa jae reta uipota tẽi co umbitavi, jare jei chupe reta: —¿Maera pa pipota piyavica cheve? <sup>24</sup>Peru cheve penti corepoti taecha —jei—. ¿Quía jova íã pa cua? ¿Quía jee pa cua uyecuatía oĩ vae? —jei.

—Cua César imbae co —jei reta.

<sup>25</sup>Jayave Jesús jei chupe reta:

—Pemece César pe César pegua, jare pemee Tumpa pe Tumpa pegua —jei.

<sup>26</sup>Jare jae reta ipuerẽã umbijeco Jesús mbae jei vae re tenta guasu pegua reta jovaque. Ipiacañi cua jei vae re, jare jei'ã ye mbae ave chupe.

### ¿Icove yeta pa umanocue vae reta?

(Mt 22.23-33; Mr 12.18-27)

<sup>27</sup>Jayave yugüeru Jesús oĩ vae pe amocue saduceo reta. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

<sup>28</sup>—Oporombocue vae, Moisés uicuatía ueya yandevẽ cuarã: 'Penti tiquei vae umano yave, jembirecocue mbaeti imembi chupe yave, cuimbae amiri tivĩ tumenda jocua cuña ndive. Jayave cuña imembi yave, cuimbae tumbijee sambiaĩ tiquei amiri jee pe.' Jucuarã uicuatía Moisés —jei reta—. <sup>29</sup>Ico penti cuimbae seis tivĩ reta güinoi vae. Cua cuimbae umenda, jare umano umimembi mbae reve. <sup>30</sup>Cuimbae amiri jaicue rupigua umenda jembirecocue ndive, èrei umano vi umimembi mbae reve. <sup>31</sup>Jayave jaicue rupigua ye umenda cuña ndive, jare umano vi umimembi mbae reve. Opaete siete reve umenda jocua cuña ndive, jare opaete siete reve umano umimembi mbae reve —jei reta—. <sup>32</sup>Taicue rupi cuña umano vi. <sup>33</sup>Jayave umanocue vae reta icove ye yave, ¿quía nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

<sup>34</sup>Jayave Jesús jei chupe reta:

—Cua ivi pe yugüireco rambueveño cuimbae reta umenda cuña reta ndive jare cuña reta umenda cuimbae reta ndive. <sup>35</sup>Èrei icavita co Tumpa pe umbijecove ye vaerã amocue vae güeru umanocue vae reta ipite güi. Jae reta yugüireco yeta co, èrei cuimbae reta ndarau umenda cuña reta ndive jare cuña reta ndarau umenda cuimbae reta ndive icove reta ye yave —jei—. <sup>36</sup>Jae ramiño vi ndarau umano ye. Echa'ã yugüirecota ángel reta yugüireco rami. Yugüirecota Tumpa tai retará. Echa'ã Tumpa umbijecove yeta güeru umanocue vae reta ipite güi —jei—. <sup>37</sup>Tamimbeu peve umanocue vae reta regua. Icove yeta co. Moisés uicuaaca cua uicuatía yave jocua yai jendi vae regua. Echa'ã Moisés umimbeu quirã yandeYa Tumpa jei: 'Che co jae Abraham, Isaac jare Jacob iTumpa.' Cua umimbeu Moisés —jei—. <sup>38</sup>Echa'ã Tumpa mbaeti co umanocue vae reta iTumpa. Jae co tecove güinoi vae reta iTumpa. Yepe tẽi ñamano, yanderecove imeño oĩ —jei.

<sup>39</sup>Jayave amocue mboroyocui re oporombocue vae reta jei Jesús pe:

—Oporombocue vae, icavi ndere.

<sup>40</sup>Jare jocua güive uquiye reta upirandu vaerã chupe mbae re.

**¿Quía ñemoñaá reta pegua pa co Cristo?**

*(Mt 22.41-46; Mr 12.35-37)*

<sup>41</sup>Jayave Jesús upirandu joco pe ñugüinoi vae reta pe:  
—¿Maera pa jei mboroyocui re oporomboe vae reta Cristo co jae David ñemonaa reta pegua? <sup>42</sup>Echa'ã David etei jei Salmo reta pe cuarãi:

‘YandeYa Tumpa jei cheYa pe:

Eguapí cheyipí pe cheacata cotí,

<sup>43</sup>nderovaicho reta opa amiamiri regua’ —jei Tumpa.  
Jucuarãi jei David —jei—. <sup>44</sup>¿Maera pa jei reta Cristo co jae David ñemoñaá reta pegua? Echa'ã David etei jei chupe: ‘CheYa’ —jei.

**Jesús umbijeco mboroyocui re oporomboe vae reta**

*(Mt 23.1-36; Mr 12.38-40; Lc 11.37-54)*

<sup>45</sup>Jayave Jesús jei jemimboe reta pe opaete joco pe ñugüinoi vae reta jovaque:  
<sup>46</sup>—Piñemoa ngatu mboroyocui re oporomboe vae reta güi. Jae reta jecuaeño uipota uguata jemimonde pucu vae reve, jare uipota ñru vae reta pe uyembisaludaca vaerã calle reta rupi. Jare yugüiraa yave tupao pe jare para pe, jecuaeño uipota uguapí tenda tenondegua vae reta pe —jei—. <sup>47</sup>Jae reta upĩro cuña ime umano vae reta güi opaete imbaembae, jare pucu uyerure Tumpa pe upurumbítavi vaerã. Jae reta uiporara eteta co —jei.

**Cuña ime umano vae umee corepoti Tumpa pe**

*(Mr 12.41-44)*

**21** <sup>1</sup>Jare Jesús Tumpa jo pe oĩ yave, uecha icocatu vae reta oñono icorepoti corepoti jĩru pe. <sup>2</sup>Jare uecha vi penti cuña ime umano vae iparavete vae oñono mocui riaré corepoti jĩru pe. <sup>3</sup>Jayave Jesús jei:  
—Añete che jae peve, cua cuña ime umano vae iparavete vae uyapo jeta ete opaete ñru oñono vae reta güi. <sup>4</sup>Echa'ã opaete ñru reta güeru oñono mboví jeta güinoi vae güi. Èrei cua cuña, yepe tẽi iparavete, oñono opaete güinoi vae. Jocua co jembú jepirã tẽi vae —jei chupe reta.

**Tumpa jo uyeitita**

*(Mt 24.1-2; Mr 13.1-2)*

<sup>5</sup>Jare amocue vae uyemingueta ñugüinoi Tumpa jo re. Jei reta icavi ete co ita reta jare mbaembae tenta guasu pegua reta güeru omopõra vaerã vae. Jayave Jesús jei:

<sup>6</sup>—Outa co uvãe ara cua o reta añave peechea vae uyeiti vaerã. Ndarau upita penti ave ita ñru ita iárambo —jei.

**Mbaesusere reta uyeyapota vae***(Mt 24.3-28; Mr 13.3-23)*

<sup>7</sup>Jayave Jesús jemimboe reta upirandu chupe:

—Oporomboe vae, ¿quirái yave pa cua uyeyapota? Jare opaete cua uyeyapota ma yave, ¿quiráita pa nduicuaa? —jei reta.

<sup>8</sup>Jayave Jesús jei chupe reta:

—Piñemoa ngatu agüiye vaerã petavi. Echa'ã yugüeruta jeta cheree pe uyembijeeta vae reta. Jae reta jeita: 'Che co jae Cristo. Outa co uvãe jocua ara reta' —jeita, jei—. Ërei agüiye piñemïru jae reta ndive —jei—. <sup>9</sup>Imeta co ñerãro reta jare tecorai reta. Ërei piyandu yave cua reta regua, agüiye pequiye. Cua susere reta uyeyapoñotai co. Ërei cua susere reta ndei ave co opa vaerã —jei—.

<sup>10</sup>Penti ivi pegua reta uñerãrota ambie ivi pegua reta ndive, jare mburuvicha reta uñerãrota ñru mburuvicha reta ndive. <sup>11</sup>Jare ivi tanta ucãtata jeta que rupi. Jare imeta caruai reta jare mbaerasi reta jeta vae uyucata vae. Jare mbaembae ara re uyecuaata vae upuruminguïyeta co —jei—. <sup>12</sup>Ërei ndei cua uyeyapo mbove, ñru vae reta pepisita jare uyapota icavi mbae vae peve. Jae reta pereraata itupao reta pe jare peñonota peresorïru pe, jare pereraata mburuvicha guasu reta jovai chereco pegua —jei—. <sup>13</sup>Ërei jucuarái uyapo reta peve yave, pepuereta pemimbeu cheregua —jei—. <sup>14</sup>Agüiye piyemïpia'ã cua re jare agüiye pepia pe piyemingueta mbae ra pereta vae —jei—. <sup>15</sup>Echa'ã che aicuaacata peve mbae pere vaerã, jare che pumbiaracuaata agüiye vaerã perovaicho reta uicuaa mbae ra ipuere jei peve —jei—. <sup>16</sup>Jare peru jare pesi, jare periquei reta jare perivi reta, jare perentarã reta jare peamigo reta pemeeta perovaicho reta pe, jare amocue pe reta piyeyucacata co —jei—. <sup>17</sup>Jare piñemitarëcata opaete vae pe chereco pegua. <sup>18</sup>Ërei ndarau penti ave pea ucañi —jei—. <sup>19</sup>Jare perõsa peo pevãe iyapi pe yave, piyembiasacata co —jei—.

<sup>20</sup>Jare peecha jeta sundaro reta Jerusalén oñova yave, picuaata ou ma co uvãe Jerusalén uyembai vaerã —jei—. <sup>21</sup>Jayave Judea pe ñugüinoi vae reta tosi ivitu guasu coti. Jare Jerusalén pe ñugüinoi vae reta toë tosi joco güi. Jare jocua coiño Jerusalén güi ñugüinoi vae reta agüiye tuyugüïraa Jerusalén pe —jei—. <sup>22</sup>Echa'ã jocua ara reta pe ivi pegua reta uiporara eteta, jare opaete Tumpa ñnee pe uyecuatía oï vae uyeyapota co —jei chupe reta—. <sup>23</sup>Jare ipurúa vae reta jare umicambu vae reta uiporara eteta jocua ara reta pe. Echa'ã cua ivi pegua reta uiporara eteta. Echa'ã Tumpa uiporaracata co chupe reta —jei—. <sup>24</sup>Jare jeta cua ivi pegua reta uyeyucacata quisepecu pe. Jare jovaicho reta güiraata jeta cua ivi pegua reta ambie ivi reta pe. Jare judío mbae vae reta yugüirecota Jerusalén pe judío mbae vae reta iara reta opa regua —jei Jesús chupe reta—.



### Cuimbaerã uyeyapo vae ou yeta

(Mt 24.29-44; Mr 13.24-37)

<sup>25</sup>Jayave ivi pegua reta uechata mbae uyecuaa oĩ guarasi jare yasi jare yasitata reta re. Jare opaete ivi pegua reta uiporarata jare ndarau uicuaa mbae uyapo vaerã. Jare i guasu reta jiapu eteta —jei—. <sup>26</sup>Jare ivi pegua reta uquiye eteta. Uquiye eteta mbae ivi pe uyeyapo oĩ vae güi. Jare ara re mbaepuere güinoi vae reta ucātata —jei—. <sup>27</sup>Jayave ivi pegua reta cherechata ayu amapĩtu reve. Che cuimbaerã ayeyapo vae anoita mbaepuere tuicha vae, jare ayembiadoracata opaete vae pe —jei—. <sup>28</sup>Jare opaete cua mbaembae umbipi uyeyapo yave, piñemiatangātu. Echa'ã imambae Tumpa perezpita —jei chupe reta.

<sup>29</sup>Jayave Jesús jei chupe reta umijaanga reve:

—Tamijaanga iva jare opaete ivira reta. <sup>30</sup>Uyembipi joqui yave, picuaa uyaro ma co ama oqui vaerã —jei—. <sup>31</sup>Jae ramiño vi pe reta peeche yave cua mbaembae uyeyapo ñugüinoi vae, picuaata coiño ma co ou Tumpa iporoyocua —jei Jesús chupe reta—.

<sup>32</sup>Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei—. <sup>33</sup>Ara jare ivi opata, ãrei chínee ndarau opa —jei—.

<sup>34</sup>Piñemoa ngatu, agüiye vaerã pecau jare pesavipo, jare agüiye vaerã piyemipia'ã mbaembae ivi pegua re. Echa'ã jucuarã piyapo yave, outa uvãe jocua ara peãro mbae pei reve —jei chupe reta—. <sup>35</sup>Echa'ã jocua ara uipocouta opaete ivi pegua reta ñuai oporomboa rami —jei—. <sup>36</sup>Jáeramo piñemoa ngatu, jare jecuaeño piyerure Tumpa pe icavi vaerã chupe perezpita vaerã opaete cua uyeyapota vae güi jare piyemboi vaerã cherovai. Che co jae cuimbaerã uyeyapo vae —jei.

<sup>37</sup>Jare opa ara rupi Jesús oporomboe oĩ Tumpa jo pe. Ërei caaru ma yave oo joco güi upita ivitu guasu Olivos re. <sup>38</sup>Jare opaete tenta guasu pegua reta yugüeru neimbove asi Tumpa jo pe uyapisaca vaerã Jesús re.

### Uipota reta uyucaca Jesús

(Mt 26.1-5, 14-16; Mr 14.1-2, 10-11; Jn 11.45-53)

**22** <sup>1</sup>Jare pascua uyaro ma oĩ. Jocua ara pe judío reta jou mbiyape ovu mbae vae. <sup>2</sup>Jayave sacerdote reta itenondegua reta jare mboroyocui re oporomboe vae reta ueca ñugüinoi quirã ipuere uyucaca Jesús. Ërei uquiye tenta guasu pegua reta güi.

<sup>3</sup>Jayave Satanás etei oya Judas Iscariote re - Judas co jae jocua doce vae güi penti. <sup>4</sup>Jayave Judas oo sacerdote reta itenondegua reta jare Tumpa jo re uyandareco vae reta ñugüinoi vae pe uyemingueta vaerã jae reta ndive quirã ra ipuere umee Jesús chupe reta. <sup>5</sup>Jayave jae reta uyerovia, jare jei Judas pe umeeta co chupe corepoti. <sup>6</sup>Jayave Judas jei chupe reta umeeta co Jesús chupe reta. Jayave umbipi ueca quirã ipuere umee Jesús chupe reta tenta guasu pegua reta mbaeti Jesús ndive ñugüinoi yave.

**Jesús ucaru jemimboe reta ndive**

(Mt 26.17-29; Mr 14.12-25; Jn 13.21-30; 1 Cor 11.23-26)

7 Jare ou uvãe pascua. Jocua ara judío reta jecuaeño uyuca ovecha jare umbipi jou mbiyape ovu mbae vae. 8 Jayave Jesús jei Pedro jare Juan pe: —Pecua piyapícatu yau vaerã tembú pascua pegua.

9 Jayave jei reta chupe:

—¿Quiape pa ndipota nduyapícatu vaerã?

10—Mase, peo pevãe yave tenta guasu pe, peovãitita penti cuimbae i güiraa iru pe vae —jei—. Pecua jaicue. Jae uiqueta penti tenta pe. Pique vi pe reta —jei—. 11 Jayave pere tenta iya pe: ‘Oporomboe vae jei: ¿Quiape pa ime oĩ o, joco pe jau vaerã tembú pascua pegua cheremimboe reta ndive’ —jei, pere chupe, jei Jesús—. 12 Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapícatu yandeve —jei.

13 Jayave Pedro jare Juan yugüiraa jare uvãe Jesús jei chupe reta rami. Jare uyapo reta tembiu pascua pegua Jesús jare jemimboe reta jou vaerã. 14 Jare ora ou ma uvãe yave, Jesús uguapi mesa pe jocua doce jemimondo reta ndive. 15 Jayave jei chupe reta:

—Chequirẽi ete jau cua tembú pascua pegua pe reta ndive, ndei amano mbove. 16 Che jae peve, ndarau ye jau, opaete cua uyemijaanga jese vae Tumpa iporoyocua pe uyeyapo regua —jei.

17 Jayave Jesús uipísi copa, jare umee yasurupai Tumpa pe. Jayave jei: —Opaete pe reta peu cua vino. 18 Che jae peve, ndarau ye jau vino, Tumpa iporoyocua ou regua —jei.

19 Jayave Jesús uipísi mbiyape, jare umee yasurupai Tumpa pe. Jayave upisãa mbiyape jare umee chupe reta.

—Cua co jae cherete —jei—. Añemeeta amano vaerã peré. Peu cua cheré pemandúa vaerã —jei.

20 Jae ramiño vi uipísi copa, opa ma ucaru reta yave, jare jei:

—Cua vino co jae Tumpa jei piau ye vae cherugüi pe ayapota vae. Cherugüi uyepiyereta peré —jei—.

21 Ërei yandepite pe uguapi oĩ cherovaicho reta pe chemeeta vae —jei—. 22 Añete co, che cuimberã ayeyapo vae amanota. Cua Tumpa jei vae co. Ërei jocua cuimbae chemeeta vae uiporarata co —jei.

23 Jayave jemimboe reta umbipi upirandu uyupe quía ra uyapota chupe jucuarãi.

**¿Quía pa icota tenondeguarã vae?**

24 Jare Jesús jemimboe reta umbipi uyemingueta uyupe quía ra icota tenondeguarã vae. 25 Jayave Jesús jei chupe reta:

—Ivi pegua reta juvicha guasu reta oyocui reta. Jare jae reta uipota írú vae reta jei icavi vae jesegua —jei—. 26 Ërei pepite pe icavi'ã jucuarãi

piyapo vaerã. Ime yave quía pepite pe uipota ico vaerã tenondeguarã vae, tuyeyapo penti tairusu vae ñru vae reta pe uyeyocui vae rami —jei—.

<sup>27</sup>Mesa pe uguapí ucaru vaerã vae co tenondegua tembíu güeru vae güi. Ërei che aico pepite pe ayeyocui peve vaerã —jei—.

<sup>28</sup>Pe reta jecuaño pepita che ndive opaete cua aiporara rambueve —jei—.

<sup>29</sup>Jare che puparavo ma pico vaerã Tumpa iporoyocua pe, cheRu cheparavo rami —jei chupe reta—. <sup>30</sup>Jáeramo pecaruta chemesa pe cheporoyocua pe. Jae ramiño vi penoita mbaepuere peña vaerã jocua doce atí Israel pegua reta —jei—.

### **Pedro uicuacuta Jesús**

*(Mt 26.31-35; Mr 14.27-31; Jn 13.36-38)*

<sup>31</sup>Simón, Simón, mase, Satanás uipota tēi güinoi mbaepuere peré, trigo yambiveve vae rami —jei—. <sup>32</sup>Ërei che ayerure Tumpa pe nderé jecuaño nenoí vaerã mburugüirovia. Jare ndiyerova ye yave Tumpa coti, embori nderivi reta ipirãta vaerã ipurugüirovia re —jei—.

<sup>33</sup>Jayave Pedro jei Jesús pe:

—CheYa, apitata co nde ndive, peresoriru pe neñono reta yave. Ndarau ndueya, yepe tēi aramoí ñru vae reta cheyuca—jei.

<sup>34</sup>—Che jae ndeve, Pedro —jei Jesús—, ndei uru cuimbae ñnee mbove, mbapi vese ma checuacuta —jei—.

### **Añave peraa mbaembae**

<sup>35</sup>Jayave Jesús jei jemimboe reta pe:

—Che pomondo yave chiñee peraa vaerã, amimbeu peve agüiye vaerã peraa corepoti, jare peurupucu, jare pepipasa. ¿Uata pa mbae peve? —jei. —Uata'ã —jei reta.

<sup>36</sup>Jayave jei chupe reta:

—Ërei añave tamimbeu peve cua: Corepoti penoi yave, peraa. Jae ramiño vi peurupucu penoi yave, peraa. Jare mbaeti yave penoi quisepecu, pemee peremimonde pegua vaerã quisepecu —jei—. <sup>37</sup>Echa'ã che jae peve, uyeyapota co cheve Tumpa ñnee pe uyecuatía oí vae. Echa'ã uyecuatía oí cuarãí: 'Ñru vae reta jei tēi jae vi co penti icavi mbae vae.' Jucuarãí uyecuatía oí. Jare opaete cheré uyecuatía oí vae uyeyapota co cheve —jei—.

<sup>38</sup>Jayave jae reta jei chupe:

—Mase, oreYa, ime nonoi mocui quisepecu.

—Icaviño ma co —jei chupe reta.

### **Jesús uyerure Getsemaní pe**

*(Mt 26.36-46; Mr 14.32-42)*

<sup>39</sup>Jayave Jesús oē o güi oo vaerã ivitu guasu Olivos pe jae jecoño mai rami. Jare jemimboe reta vi yugüiraa jae ndive. <sup>40</sup>Jare oo uvãe yave upita vae pe, Jesús jei jemimboe reta pe:

—Piyerure Tumpa pe agüiye vaerã peyoa.

<sup>41</sup>Jayave Jesús usiri catu chugüi reta, jare uyeatica uyerure Tumpa pe.

<sup>42</sup>—CheRu —jei—, nde ndipota yave, embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

<sup>43</sup>Jayave uyecuaa Jesús pe penti ángel ara güi ou vae umimirãta vaerã.

<sup>44</sup>Jesús uiporara ete oĩ, jare jeiete uyerure Tumpa pe. Jeta ipireipo oĩ. Tugüi rami utiqui ivi pe.

<sup>45</sup>Jare Tumpa pe uyerure ma yave, upãa ye jare ou ye jemimboe reta ñugüinoi vae pe. Uecha oque ñugüinoi ipiatiti güi. <sup>46</sup>Jayave Jesús jei chupe reta:

—¿Maera pa peque peĩ? Pepãa piyerure Tumpa pe, agüiye vaerã peyoa —jei.

### Uipisi reta Jesús

(Mt 26.47-56; Mr 14.43-50; Jn 18.2-11)

<sup>47</sup>Jare uyemingueta oĩ rambueve, uyecuaa jeta vae. Jare Judas - jae co jocua doce vae güi penti - ou jocua jeta vae jenonde. Jayave ou uvãe Jesús oĩ vae pe, jare uyurupite. <sup>48</sup>Jayave Jesús jei chupe:

—Judas, ¿penti yurupite rupi pa chemee cua reta pe?

<sup>49</sup>Jare Jesús jemimboe reta uyemboi ñugüinoi Jesús iyipi pe. Jare uicuaa mbae uyeyapota vae ramo, jei Jesús pe:

—OreYa, ¿nduiporuta pa quisepecu jese reta? <sup>50</sup>Jayave penti Jesús jemimboe uiporu iquisepecu sacerdote tenondegua jembiocui inambi re, jare uyasía inambi chugüi. <sup>51</sup>Jayave Jesús jei:

—Pemaño cheré ayapo vaerã cua.

Jayave uyaviqui cuimbae inambi jendacue, jare cuimbae ucuera.

<sup>52</sup>Yugüeru vi joco pe sacerdote reta itenondegua reta jare Tumpa jo re uyandareco vae reta jare tenta guasu pegua reta itenondegua reta. Jare Jesús jei chupe reta:

—¿Maera pa peru quisepecu reta jare ivira reta chepisi vaerã, imonda vae pipisi vae rami? <sup>53</sup>Opa ara aico pe reta ndive Tumpa jo pe, ërei chepisi!ã. Ërei ora uvãe ma chepisi vaerã. Cuarã piyapo peĩ Satanás imbaepuere pe —jei.

### Pedro uicuacu Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup>Jayave uipisi reta Jesús jare güiraa sacerdote tenondegua jenta pe. Jare Pedro oo jae reta jaicue, ërei mbiriño oo chugüi. <sup>55</sup>Jayave joco pe ñugüinoi vae reta uyapo tata sacerdote tenondegua joca pe jare uguapi joco pe. Jare Pedro vi uguapi joco pe jae reta ipite pe. <sup>56</sup>Ërei penti cuñatai uecha Pedro uguapi oĩ tataipi pe. Umae ngatu jese. Jayave jei:

—Cua cuimbae vi icose jocua ñru cuimbae ndive.

<sup>57</sup>Jayave Pedro uicuacu Jesús.

—Aicuaa!ã jocua cuimbae —jei Pedro cuñatai pe.

<sup>58</sup>Ndei ima mbove penti cuimbae vi uecha Pedro jare jei chupe:

—Nde co jae iïru vi.

—Che'ã co —jei Pedro cuimbae pe.

<sup>59</sup>Jare penti ora rupi ma uasa yave, ïru cuimbae jeiete jei:

—Añete co, cua cuimbae icose jocua ïru cuimbae ndive. Echa'ã Galilea pegua co —jei. <sup>60</sup>—Aicuaa'ã mbae ndere vae —jei Pedro cuimbae pe.

Jare uyemingueta rupive, uru cuimbae uñee. <sup>61</sup>Jayave yandeYa uyerova jare umae Pedro re. Jayave Pedro imandúa yandeYa jei chupe vae re: 'Ndei uru cuimbae uñee mbove, mbapî vese ma checuacuta.'

<sup>62</sup>Jayave Pedro oë joco güi, jare tanta ipiatiti reve uyao.

### Uyapo reta icavi mbae vae Jesús pe

(Mt 26.67-68; Mr 14.65)

<sup>63</sup>Jare cuimbae uyandareco ñugüinoi Jesús re vae reta oyoyai jare uinupa.

<sup>64</sup>Jayave jae reta uesañoma Jesús jare ocua jova re. Jayave jei reta chupe:

—Emimbeu oreve quía ra ocua nderé.

<sup>65</sup>Jare jeta icavi mbae vae jei reta chupe.

### Jesús mburuvicha reta jovai

(Mt 26.59-66; Mr 14.55-64; Jn 18.19-24)

<sup>66</sup>Jare cõe ma yave, tenta guasu pegua reta itenondegua reta jare sacerdote reta itenondegua reta jare mboroyocui re oporombœ vae reta uyembati. Jayave güeruruca reta Jesús. Jayave jei reta chupe:

<sup>67</sup>—¿Nde pa co jae Cristo, Tumpa ombou vae? Emimbeu oreve.

—Che amimbeu yave peve, ndarau chererovia —jei Jesús—. <sup>68</sup>Jare che apirandu yave peve mbae re, ndarau pemimbeu cheve, jare ndarau cheyora —jei—. <sup>69</sup>Erei che cuimbaerã ayeyapo vae aguapita curi Tumpa mbaepuere güinoi vae iyipî pe iyacata coti —jei.

<sup>70</sup>Jayave opaete jae reta upirandu chupe:

—¿Nde pa co jae Tumpa Tai?

—Pe reta pere rami jae co che —jei Jesús chupe reta.

<sup>71</sup>Jayave jae reta jei:

—¿Maera pa yaeca ye ïru vae reta uñeapo vaerã jese? Echa'ã yande etei yayandu mbae jei vae —jei reta.

### Jesús Pilato jovai

(Mt 27.1-2, 11-14; Mr 15.1-5; Jn 18.28-38)

**23** <sup>1</sup>Jayave opaete jae reta upña jare güiraa Jesús Pilato pe. <sup>2</sup>Jare umbipî reta uñeapo Jesús re. Jei reta:

—Cua cuimbae umimbeu tenta guasu pegua reta pe uyapo vaerã icavi mbae vae. Echa'ã jei chupe reta agüiye vaerã umbiepî corepoti César peguarã. Jare jei jae co mburuvicha guasu Cristo jee vae —jei reta.

<sup>3</sup>Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

<sup>4</sup>Jayave Pilato jei sacerdote reta itenondegua reta jare tenta guasu pegua reta pe:

—Avãe'ã teco cua cuimbae re. <sup>5</sup>Jayave jae reta jeiete jei:

—Omboepochi tenta guasu pegua reta. Oporombœ opaete Judea rupi. Umbipi Galilea pe jare añave ou uvãe cua pe oporombœ oĩ —jei reta.

### Jesús Herodes jovai

<sup>6</sup>Pilato uyandu yave jei reta vae, upirandu penti Galilea pegua ra jocua cuimbae. <sup>7</sup>Jayave umimbeu reta Pilato pe Galilea pegua co Jesús. Jayave Pilato güiraaca Jesús Herodes pe. Echa'ã Herodes co jae Galilea pegua reta juvicha guasu. Jare jocua ara reta pe Herodes opou oĩ Jerusalén pe. <sup>8</sup>Jare Herodes uecha Jesús yave, uyerovia ete, ima ma uipota uecha ramo. Echa'ã uyandu ma jeta Jesús regua, jare uipota uecha Jesús uyapo penti miacañi. <sup>9</sup>Jayave Herodes upirandu Jesús pe jeta mbaembæ re, ãrei Jesús jei'ã mbae ave chupe. <sup>10</sup>Jare sacerdote reta itenondegua reta jare mboroyocui re oporombœ vae reta uyemboi Herodes jovai jare iñeeãta reve uñeapo Jesús re. <sup>11</sup>Jare Herodes jare isundaro reta güiriro jare oyoyai Jesús. Jayave omondeca chupe temimonde ipõra vae. Jayave Herodes güiraaca ye Pilato pe. <sup>12</sup>Jare jocua ara etei Pilato jare Herodes uyeyapicatu ye. Echa'ã tenonde yave uñemitarëi.

### Pilato jei Jesús umanota co

(Mt 27.15-26; Mr 15.6-15; Jn 18.39-19.6)

<sup>13</sup>Jayave Pilato umbatica sacerdote reta itenondegua reta jare tenta guasu pegua reta itenondegua reta ndive. <sup>14</sup>Jare jei chupe reta:

—Pe reta peru cua cuimbae cheve jare pere cheve omboepochi co tenta guasu pegua reta. Mase, che apirandu chupe jocua re perovaque, jare avãe'ã etei teco jocua pe reta piñeapo cheve jese vae re —jei—. <sup>15</sup>Jae ramiño vi Herodes uvãe'ã teco cua cuimbae re. Echa'ã che pomondo Herodes pe. Mase, mbaeti mbae teco uyapo umano vaerã —jei Pilato chupe reta—. <sup>16</sup>Jáeramo ainupacañota jare ayoraca yeta —jei.

<sup>17</sup>Echa'ã opa año tenta guasu pegua reta uyerure chupe oyoraca vaerã penti pereso pascua ara rupi, jare Pilato oyoracañoi penti pereso.

<sup>18</sup>Jayave opaete vae iñeeãta reve jei:

—Iyucaca cua cuimbae. Iyoraca oreve Barrabás —jei reta.

<sup>19</sup>(Tenonde yave Barrabás upuruyuca Jerusalén pe, mburuvicha reta ndive uñerãro yave. Jáeramo umiingue peresoriru pe.)

<sup>20</sup>Ërei Pilato uipota tãe oyoraca Jesús. Jáeramo jei ye chupe reta. <sup>21</sup>Ërei iñeeãta reve jei reta:

—Icutuca curusu re. Icutuca curusu re.

<sup>22</sup>Jayave Pilato upirandu ye chupe reta:

—¿Mbae pa uyapo? Avãe'ã mbae icavi mbae vae jese umano vaerã. Jáeramo ainupacañota jare ayoraca yeta —jei.

<sup>23</sup> Ërei jeiete inñeãta reve jei reta uicutuca vaerã Jesús curusu re. Jare sacerdote reta itenondegua reta jare ñru joco pe ñugüinoi vae reta inñe umiquirëi Pilato. <sup>24</sup> Jayave Pilato jei uyeyapo vaerã Jesús pe jae reta uipota vae. <sup>25</sup> Jayave oyoraca chupe reta tenonde yave mburuvicha reta ndive uñerãro yave upuruyuca ramo peresoriru pe umiingue vae, jae reta uipota rami. Ërei umee Jesús chupe reta uyeyapo vaerã chupe jae reta uipota vae.

### Jesús uyecutuca curusu re

(Mt 27.32-44; Mr 15.21-32; Jn 19.17-27)

<sup>26</sup> Jayave güiraa reta Jesús joco güi. Jare penti cuimbae Simón jee vae tenta guasu Cirene pegua, ou uvãe tenta guasu coti. Jacoropi uasa oĩ yave, sundaro reta uipisi Simón jare güiraaca chupe Jesús icurusu. Jayave Simón güiraa curusu Jesús jaicue. <sup>27</sup> Jare yugüiraa vi Jesús jaicue jeta vae. Jare jae reta ipite pe yugüiraa cuña reta. Jae reta uapĩro yugüiraa Jesús. <sup>28</sup> Ërei Jesús uyerova umae jese reta jare jei chupe reta:

—Jerusalén pegua cuña reta, agüiye piyao cheré. Piyao piyee jare pemembi reta re —jei—. <sup>29</sup> Mase, outa uvãe ara reta jei reta vaerã: ‘Uyerovia co imembi mbae vae. Uyerovia co umicambu mbae etei vae’ —jeita, jei—. <sup>30</sup> Jayave umbipita tẽi jei ivitu guasu pe: ‘Piyapara oreárambo. Oreaso?’ —jeita, jei—. <sup>31</sup> Uyapo reta icavi mbae vae cheve yave, ¿mbae ra uyapota peve? —jei.

<sup>32</sup> Jare sundaro reta güiraa vi Jesús ndive mocui cuimbae icavi mbae vae uyapo vae uyuca vaerã. <sup>33</sup> Jare yugüiraa uvãe Æcacienda jee vae pe. Jayave joco pe sundaro reta uicutu curusu re Jesús jare cuimbae reta icavi mbae vae uyapo vae. Oñono reta penti Jesús iyacata coti jare ñru iyaso coti. <sup>34</sup> Jayave Jesús jei:

—CheRu, embiasa chupe reta. Uicuaa'ã mbae uyapo ñugüinoi vae —jei.

Jayave sundaro reta uyuguari Jesús jemimonde re, uicuaa vaerã mbae nunga penti penti güiraa iyupe vaerã. <sup>35</sup> Jare tenta guasu pegua reta uyemboi ñugüinoi jacoropi umae Jesús re. Jare tenta guasu pegua reta itenondegua joco pe ñugüinoi vae reta oyoyai Jesús. Jei reta:

—Jae uepi ñru vae reta. Añave tuyerepi, jae co Cristo yave, jae co Tumpa uiparavo vae yave —jei reta.

<sup>36</sup> Jare sundaro reta vi oyoyai Jesús. Oya reta jese jare umee vinagre chupe. <sup>37</sup> Jare jei reta:

—Nde co jae judío reta juvicha guasu yave, iyerepi.

<sup>38</sup> Jare oñono reta curusu re Jesús inñaca iárambo uyecuatía jesegua vae: “Cua co jae judío reta juvicha guasu.” Uyecuatía oĩ griego inñe pe jare latín pe jare hebreo inñe pe.

<sup>39</sup> Jare penti cuimbae icavi mbae vae uyapo vae uyecutuca vae uñeengata Jesús pe.

—Nde co jae Cristo, Tumpa ombou vae yave, iyerepi jare orerepi vi —jei.

<sup>40</sup>Ërei ñru cuimbae ñeengata chupe.

—¿Ndequiy'e'ã pa Tumpa güi? Echa'ã nde vi nemanu neñ cua ñru vae rami —jei—. <sup>41</sup>Jare jupi co yande ñamano vaerã. Echa'ã yande ñamanota ñã icavi mbae vae yayapo vae jeco pegua. Ërei cua cuimbae uyapo'ã mbae icavi mbae vae —jei.

<sup>42</sup>Jayave jei Jesús pe:

—Jesús, nemandúa cheré ndeporoyocua pe neñ yave.

<sup>43</sup>Jayave Jesús jei chupe:

—Añete che jae ndeve, cua ara neita che ndive ara pe —jei.

### **Jesús umano**

*(Mt 27.45-56; Mr 15.33-41; Jn 19.18-30)*

<sup>44</sup>Jare guarasi ara mbite güive mbapi ora rupi ñnemipitumimbi opaete ivi pe. <sup>45</sup>Guarasi jembipe'ã etei. Jayave Tumpa jo umbiyao vae osoro mbite rupi. <sup>46</sup>Jayave Jesús tanta usapicai. Jayave jei:

—CheRu, amee ndeve cherecove.

Jare cua jei ma yave, umano.

<sup>47</sup>Jare cien sundaro vae juvicha joco pe oñ vae uecha mbae uyeyapo vae. Jayave umbiadora Tumpa jare jei:

—Añetete co, cua cuimbae co jae jupi vae.

<sup>48</sup>Jare opaete joco pe yati vae reta vi uecha mbae uyeyapo vae jare ocua iyee ipitía re. Jayave opaete vae yugüiraa ye jenta jenta pe. <sup>49</sup>Jare opaete Jesús uicuaa vae reta jare cuña Jesús ndive Galilea güi yugüeru vae reta uyemboi ñugüinoi mbiri curusu güi. Umae ñugüinoi mbae uyeyapo vae re.

### **José oñono Jesús jetecue teögüeriru pe**

*(Mt 27.57-61; Mr 15.42-47; Jn 19.38-42)*

<sup>50</sup>Jare joco pe oñ vi penti cuimbae José jee vae. Jae co penti mburuvicha. Ipiacavi jare jupi. <sup>51</sup>(Jae uipota'ã tẽi ñru mburuvicha reta uyapo vaerã icavi mbae vae Jesús pe.) Jae co tenta guasu Arimatea pegua. (Arimatea Judea pegua co.) José vi uãro ico Tumpa iporoyocua. <sup>52</sup>Cua cuimbae oo Pilato pe, jare uyerure chupe Jesús jetecue re. <sup>53</sup>Jayave umbigüeyi Jesús jetecue, jare oñoma nieso pe. Jayave oñono penti teögüeriru itape uyeyoo vae pe, ndei quía ñeñono pipe vae pe. <sup>54</sup>Jocua ara opaete judío reta uyeyapicatu ñugüinoi piareve peguarã. Echa'ã piareve pe co mbutuu ara.

<sup>55</sup>Jare cuña Jesús ndive Galilea güi yugüeru vae reta, yugüiraa José jaicue jare uecha teögüeriru jare quirã José oñono pipe Jesús jetecue vae. <sup>56</sup>Jayave yugüiraa ye jenta jenta pe jare uyapicatu mbaembae ipiche cavi vae. Jayave uputuu reta mbutuu ara pe. Echa'ã jucuarã uyecuatía oñ mboroyocui pe.



**Jesús icove ye**

*(Mt 28.1-10; Mr 16.1-8; Jn 20.1-10)*

**24** <sup>1</sup>Jare neimbove asi domingo ara peaña reta yugüiraa ye teögüeriru coti. Güiraa reta mbaembae ipiche cavi vae uyapicatu ma vae. <sup>2</sup>Jare uecha ita tuicha vae uyembisiri ma teögüeriru jonque güi. <sup>3</sup>Jayave uique reta teögüeriru pe, ãrei uvãe'ã yandeYa Jesús jetecue joco pe. <sup>4</sup>Ipiacañi ete reta cua re, ãrei aramoño uyecuaa uyemboi ñugüinoi iyipi pe mocui cuimbae. Jocua mocui cuimbae jemimonde uvera oĩ. <sup>5</sup>Jáeramoaña reta uquiye jare ipe cuimbae reta jovai. Jayave cuimbae reta jei chupe reta: —¿Maera pa peeca peĩ icove ye vae umanocue vae reta ipite pe? <sup>6</sup>Mbaeti ma cua pe oĩ. Jae icove ye ou umanocue vae reta ipite güi. Pemandúa jae icose pe ndive Galilea pe yave jei peve vae re —jei reta—. <sup>7</sup>Echa'ã jae jei peve: 'Chemeeta cuimbae icavi mbae vae uyapo vae reta pe. Jae reta checututa curusu re. ãrei che cuimbaerã ayeyapo vae aicove yeta ayu umanocue vae reta ipite güi mbapi' ara rupi' —jei, jei reta. <sup>8</sup>Jayave jae reta imandúa Jesús jei chupe reta vae re. <sup>9</sup>Jayave yugüeru ye teögüeriru güi jare umimbeu opaete uyeyapo vae jocua once vae jare opaete ñru vae reta pe. <sup>10</sup>Jocuaaña reta co jae María Magdalena, jare Juana, jare Jacobo ichi María jee vae, jare ñruaña jae reta jupíe yugüiraa vae reta. Cua reta umimbeu Jesús jemimondo reta pe mbae uyeyapo vae. <sup>11</sup>ãrei iyapu echa reta Jesús jemimondo reta pe. Güirovia'ã reta. <sup>12</sup>Jayave Pedro osi oo teögüeriru coti. Jare joco pe oo uvãe yave, ipe umae vaerã teögüeriru japipe pe, jare uecha nieso reta joco pe oĩ. Jayave ou ye joco güi. Ipiacañi uyeyapo vae re.

**Jesús jare mocui jemimboe reta**

*(Mr 16.12-13)*

<sup>13</sup>Jare jocua ara etei mocui Jesús jemimboe reta yugüiraa tape rupi Jerusalén güi tenta guasu-rai Emaús coti. Emaús oĩ mocui legua Jerusalén güi. <sup>14</sup>Jare tape rupi yugüiraa rambueve, imiari uyupe opaete uyeyapo vae re. <sup>15</sup>Jare aramoño uyemingueta ñugüinoi rambueve, Jesús uyecuaa chupe reta jare oo jae reta jupíe. <sup>16</sup>ãrei jae reta uicuaa'ã Jesús. Echa'ã Jesús ndei uipota uyecuaaca chupe reta. <sup>17</sup>Jayave Jesús upirandu chupe reta: —¿Mbae re pa pemiari piyupe peguata rambueve? ¿Maera pa pepiatiti? —jei. <sup>18</sup>Jare penti Cleofas jee vae upirandu Jesús pe: —¿Ndicua'ã pa Jerusalén pe? ¿Ndicuaa'ã pa cua ara reta pe opaete uyeyapo vae? —jei. <sup>19</sup>—¿Mbae pa? —jei chupe reta. —Jesús Nazaret pegua pe uyeyapo vae —jei reta chupe—. Jae co penti Tumpa ñnee umimbeu vae. Uyapo jeta mbae icavi vae mbaepuere reve, jare icavi oporomboe. Uyeyocui cavi Tumpa pe jare opaete tenta

guasu pegua reta umbiadora —jei reta Jesús pe—. <sup>20</sup>Ērei sacerdote reta itenondegua reta jare oretenondegua reta umee mburuvicha guasu pe, jae uyucaca vaerã. Jare uicutuca reta curusu re —jei reta—. <sup>21</sup>Ērei ore ndugüirovia tēi jae uepita Israel pegua reta. Jare cua ara mbapĩ ara ma opaete cua uyeyapo vae güi —jei reta—. <sup>22</sup>Ērei amocue cuña ore ndive uyeyocuisse Jesús pe vae reta iyēi neimbove yugüiraa teögüeriru pe, jare yugüeru ye yave, oremipiacañi ete. <sup>23</sup>Echa'ã jae reta uvãe'ã Jesús jetecue, jare yugüeru ye yave, jei oreve quirãi uecha ángel reta joco pe jare quirãi ángel reta jei Jesús icove ye ma oĩ —jei reta—. <sup>24</sup>Jayave amocue ore ndive ñugüinoi vae yugüiraa vi teögüeriru pe, jare yugüeru ye yave, umimbeu oreve mbaeti joco pe oĩ Jesús jetecue cuña reta jei oreve rami —jei reta.

<sup>25</sup>Jayave Jesús jei chupe reta:

—Pe reta co jae iyaracuaa mbae vae reta rami. Yavai co oĩ peve perovia vaerã opaete Tumpa iñee aracae umimbeu vae reta uicuatiaque vae —jei—. <sup>26</sup>Picuaata tēi ma jae reta uicutafã co quirãi Cristo, Tumpa ombou vae, uiporarañotai rani co jare quirãi jocua jaicue rupi uyembiadoracata co —jei.

<sup>27</sup>Jayave Jesús umimbeu chupe reta jeta Moisés jare Tumpa iñee aracae umimbeu vae reta uicuatiaque vae güi, jare umimbeu cavi chupe reta quirãi opaete jocua uyecuatfã oĩ vae imiari Cristo re.

<sup>28</sup>Jare yugüiraa ma uvãe coiño Emaús güi. Echa'ã jocua mocui vae upitata joco pe. Jare Jesús uasata tēi oo cuti. <sup>29</sup>Ērei jae reta jei chupe:

—Epita ore ndive. Echa'ã caaru ma. Pítuta co ndeve —jei reta.

Jayave Jesús upita jae reta jenta pe. <sup>30</sup>Jare uguapi rambueve mesa pe ucaru vaerã, Jesús uipisi mbiyape jare umee yasurupai Tumpa pe. Jayave upisãa umee chupe reta. <sup>31</sup>Jayave ramo uicuaa reta Jesús. Echa'ã Jesús umaño ma jese reta uicuaa vaerã. Jayave jupivoiño Jesús ucañi chugüi reta. <sup>32</sup>Jayave jei reta uyupe:

—Añete co, jae yanembiyerovia ete, tape rupi imiari yandevē rambueve. Echa'ã uicuaaca yandevē Tumpa iñee uyecuatfã oĩ vae —jei reta. <sup>33</sup>Jayave jocua ora pe etei jae reta upãa mesa güi jare yugüiraa ye Jerusalén pe. Joco pe uvãe jocua once vae yati ĩru vae reta ndive.

<sup>34</sup>—Añete co, yandeYa icove ye ma ou umanocue vae reta ipite güi — jei yati vae reta—. Echa'ã uyecuaa co Simón pe.

<sup>35</sup>Jayave jocua mocui vae vi umimbeu yati vae reta pe mbae tape rupi uyeyapo vae jare quirãi Jesús uyecuaaca chupe reta mbiyape upisãa yave.

**Jesús uyecuaa jemimboe reta pe**  
(Mt 28.16-29; Mr 16.14-18; Jn 20.19-23)

<sup>36</sup>Jare uyemingueta ñugüinoi rambueve, Jesús etei uyecuaa uyemboi oĩ ipite pe, jare jei chupe reta:

—Mbiacatu toĩ pe ndive.

<sup>37</sup>Ērei jae reta uquiye ete. Ipia pe uyemingueta tēi jocua co Jesús iãcue. <sup>38</sup>Ērei Jesús jei chupe reta:

—¿Maera pa pequiye? ¿Maera pa pepia pe piyemingueta jucuarãi? —  
 jei—. <sup>39</sup>Pemae chepo jare chepi re. Che co jae. Pepuere cheaviqui picuaa  
 vaerã jae co che. Echa'ã penti vae iãcue güinoi'ã soo jare maecãgüe. Ērei  
 pepuere peecha che ime co anoi soo jare maecãgüe —jei.

<sup>40</sup>Jare cua jei ma yave, uechaca chupe reta ipo jare ipi. <sup>41</sup>Jae reta  
 ipiacañi, jare uyerovia ete ramo ndei ipuere güirovia ete. Jayave Jesús  
 upirandu chupe reta:

—¿Ime pa penoi cua pe mbae jau vaerã?

<sup>42</sup>Jayave umee reta chupe pira oyicue iperaso jare mbovi ei. <sup>43</sup>Jare  
 Jesús uipisi jou jae reta jovaque. <sup>44</sup>Jayave jei chupe reta:

—¿Pemandua'ã pa pe reta ndive aico rambueve che jae peve vae re?  
 Echa'ã Moisés iporoyocui jare Tumpa iñee aracae umimbeu vae reta  
 uicuatiacue vae jare Salmo reta chemimbeu. Jare amimbeu peve quirã  
 opaete cua chemimbeu vae uyeyapota co —jei.

<sup>45</sup>Jayave umee chupe reta uicuaa cavi vaerã Tumpa iñee uyecuatía oĩ  
 vae. <sup>46</sup>Jayave jei chupe reta:

—Cuarãi uyecuatía oĩ quirãi Cristo, Tumpa ombou vae, uiporarañotai  
 co jare icove yeta co ou umanocue vae reta ipite güi mbapi ara rupi, <sup>47</sup>jare  
 quirãi jerãcuata ñru vae reta pe Cristo jee re ueya vaerã iyemingueta icavi  
 mbae vae ipia pe oĩ vae Tumpa umbiasa vaerã chupe reta imbaeyoa reta.  
 Jerãcuata rani Jerusalén pe. Jayave joco güi jerãcuata opaete ivi pegua  
 reta pe —jei—. <sup>48</sup>Jare pe reta pemimbeuta opaete cua regua —jei—.

<sup>49</sup>Mase, abouta peve cheRu jei umeeta co peve vae. Ērei pepita tenta  
 guasu Jerusalén pe mbaepuere güinoi vae ara güi ou peve regua —jei.

### Jesús oo ara pe

(Mr 16.19-20)

<sup>50</sup>Jayave Jesús güiraa reta Betania pe. Jayave uupi ipo ara coti jare  
 umivendise reta. <sup>51</sup>Jare umivendise oĩ rambueve, oo chugüi reta ara coti.  
<sup>52</sup>Jayave jae reta umbiadora. Jayave yugüiraa ye Jerusalén pe uyerovia  
 reve. <sup>53</sup>Jare jecuaeño yugüiraa Tumpa jo pe umbiadora reve Tumpa. Amén.

# EL SANTO EVANGELIO SEGUN SAN JUAN

---

## Ñee uyeyapo cuimbaerã

**1** <sup>1</sup>Ndei mbae uyeyapo mbove, ico Ñee. Jare Ñee ico Tumpa ndive. Jae co Tumpa etei. <sup>2</sup>Ñee ico Tumpa ndive ndei mbae uyeyapo mbove. <sup>3</sup>Jae uyapo opaete. Opaete uyeyapo vae jae etei uyapo. <sup>4</sup>Jae umee tecove opaete pe, jare cua tecove rupi jae uyecuaa ivi pegua reta pe mbaembae uyecuaa tembipe rupi rami. <sup>5</sup>Jae co tembipe rami. Tembipe jecuaeño jembipe pĩtumimbi pe, jare pĩtumimbi ipuere'ã etei ombove. <sup>6-7</sup>Ico penti cuimbae Juan jee vae. Tumpa ombou cua cuimbae umimbeu vaerã tembipe regua, ñru vae reta upurugüirovia vaerã uyandu yave. <sup>8</sup>Jae jae'ã co jocua tembipe. Jaeño ou umimbeu vaerã jocua tembipe re.

<sup>9</sup>Tembipe etei ou ma cua ivi pe. Jae uyecuaa opaete vae pe. <sup>10</sup>Jae ico cua ivi pe, jare jae uyapo cua ivi. Ërei ivi pegua reta uicuaa'ã. <sup>11</sup>Ou ivi pe, ãrei ivi pegua reta umbiresive'ã. <sup>12</sup>Ërei amocue vae umbiresive. Güirovia jese. Jáeramo jae umee cua reta pe Tumpa tai retarã jare tayi retarã yugüireco vaerã. <sup>13</sup>Tumpa etei umee cua reta pe tecove. Cua tecove ou'ã co ichi rupi. Güinoi'ã cua tecove tu jei vae rupi.

<sup>14</sup>Jocua Ñee uyeyapo cuimbaerã. Ou cua ivi pe ico vaerã yande ndive. Jare ore nduecha yembutuicha ara pegua co jae. Jaeño Tumpa Tai jae vaeño cua yembutuicha güinoi vae. Jae ipiacavi ete jare opaete jei vae añete co. <sup>15</sup>Echa'ã Juan umimbeu ñru vae reta pe:

—Cua co jae chemiari jese vae —jei chupe reta—. Che jae ma peve: ‘Cheraicue rupi outa vae ipuere ete chegüi. Echa'ã jae ico ndei aico mbove’ —jei.

<sup>16</sup>Jocua Ñee ipiacavi ete. Jáeramo jecuaeño uyapo icavi vae yandev. <sup>17</sup>Tumpa umimbeu mboroyocui Moisés rupi. Ërei Jesucristo rupi Tumpa umimbeu ipiacavi co jare yanemboe añete vae re. <sup>18</sup>Mbaeti etei quía uecha Tumpa. Ërei Tumpa Tai jae vaeño uicuaaca yandev. Tumpa uau Tai.

**Juan upurumbibautiza vae umimbeu vae**

(Mt 3.1-12; Mr 1.1-8; Lc 3.1-20)

<sup>19</sup>Penti ara yugüiraa uvãe Juan oĩ vae pe sacerdote reta jare levita reta. Judío reta Jerusalén pegua omondo cua reta chupe. Jae reta jei Juan pe:

—¿Quía pa co nde?

<sup>20</sup>Juan umimbeu cavi. Iyapu'ã chupe reta.

—Che jae'ã co Cristo jee vae —jei chupe reta.

<sup>21</sup>Jayave upirandu reta ye chupe:

—Nde jae'ã yave, ¿nde pa co jae Elías jee vae?

Juan jei:

—Che'ã co jae.

Jei reta chupe:

—¿Nde pa co jocua Tumpa ñee umimbeu vae?

—Che'ã co jae —jei Juan chupe reta.

<sup>22</sup>Jayave upirandu reta ye chupe:

—¿Quía pa co nde? Echa'ã nduipota numimbeu orembou vae reta pe.

¿Mbae pa ndere ndiyupe? —jei reta Juan pe.

<sup>23</sup>Jayave Juan jei:

—Che co jae penti ñee umimbeu vae. Chiñeeãta ñana pe: 'Piyapícatu yandeYa japerã.' Jucuarãi che jae —jei Juan—. Echa'ã jucuarãi jei Isafas aracae Tumpa ñee umimbeu vae —jei. <sup>24</sup>Cua Juan oĩ vae pe yugüiraa vae reta fariseo reta co. <sup>25</sup>Upirandu reta Juan pe:

—Nde jae'ã yave Cristo ani Elías ani jocua Tumpa ñee umimbeu vae, ¿maera pa ndepurumbibautiza? <sup>26-27</sup>—Che apurumbibautiza i pe —jei Juan—. Ërei picuaa'ã, ime pepite pe jocua cheraicue rupi outa vae. Jupi'ã co che amboi vaerã ipipasa —jei chupe reta.

<sup>28</sup>Opaete cua uyeyapo Betábara pe iãca Jordán jee vae jovaicho pe. Echa'ã joco pe upurumbibautiza Juan.

**Tumpa ombou vae**

<sup>29</sup>Piareve pe Juan uecha Jesús ou icoti jare jei:

—Mase, pee oĩ Tumpa ombou vae. Jae co ovecha rami. Ou güiraa vaerã opaete ivi pegua reta imbaeyoa —jei—. <sup>30</sup>Cua co jae chemiari jese vae. Che jae ma peve: 'Cheraicue rupi outa vae ipuere ete chegüi. Echa'ã jae ico ndei aico mbove.' Cua co jae —jei Juan—. <sup>31</sup>Che aicuaa'ã. Ërei ayu apurumbibautiza i pe jae uyecuaa vaerã Israel pegua reta pe —jei chupe reta.

<sup>32</sup>Juan umimbeu vi chupe reta:

—Aecha Espíritu Santo ugüeyi ara güi picasu rami jare ou upita jese —jei—. <sup>33</sup>Che aicuaa'ã. Ërei chembou apurumbibautiza vaerã i pe vae jei cheve: 'Ndechata Espíritu Santo ugüeyi ou upita penti cuimbae re. Jocua

cuimbae upurumbibautizata Espiritu Santo pe' —jei, jei Juan—. <sup>34</sup>Jocua aecha ma jare amimbeu peve cua co jae Tumpa Tai —jei.

### Jesús jemimboe tenondegua vae reta

<sup>35</sup>Piareve pe Juan uyemboi ye oĩ joco pe mocui jemimboe ndive.

<sup>36</sup>Jayave ou Jesús uasa jocatoripi. Juan umae ngatu jese.

—Mase, pee oĩ Tumpa ombou vae. Jae co ovecha rami —jei.

<sup>37</sup>Jocua mocui jemimboe uyandu jare yugüiraa Jesús jaicue. <sup>38</sup>Jesús uyerova yave, uecha yugüeru icoti.

—¿Mbae pa peeca? —jei chupe reta.

—¿Quíape pa ndico, Rabí? —jei reta. (Rabí uipota jei: “Oporomboe vae”).

<sup>39</sup>—Peyu peecha —jei Jesús.

Jayave yugüiraa Jesús ico vae pe uecha, jare upita jocua ara jae ndive. Echa'ã caaru catu ma. <sup>40</sup>Mocui cuimbae co jocua Jesús jaicue yugüiraa vae. Echa'ã yugüiraa jaicue uyandu yave Juan jei chupe reta vae. Penti cuimbae jee co Andrés. Jae co Simón Pedro tiví. <sup>41</sup>Andrés oo rani uvãe tiquei Simón pe jare jei chupe:

—Nuvãe ma Mesías. (Cua uipota jei hebreo ñnee pe: “Cristo, Tumpa ombou vae”). <sup>42</sup>Jayave Andrés güeru Simón Jesús oĩ vae pe. Jesús umae ngatu Simón re jare jei:

—Nde co jae Simón. Nde co jae Jonás tai. Turumbijee Cefas. (Cua uipota jei: “Pedro”).

### Jesús ueni Felipe jare Natanael

<sup>43-44</sup>Piareve pe Jesús uipota oo Galilea pe. Jare uvãe Felipe Betsaida pegua. Andrés jare Pedro Betsaida pegua vi. Jesús jei Felipe pe:

—Eyu cherupíe.

<sup>45</sup>Jayave Felipe oo uvãe Natanael pe jare jei chupe:

—Nuvãe ma Moisés mboroyocui pe imiari jese vae. Aracae Tumpa ñnee umimbeu vae reta vi imiari jese —jei—. Jae co Jesús Nazaret pegua. Jae co José tai —jei chupe.

<sup>46</sup>—¿Ime pa mbae icavi vae Nazaret pegua? —jei Natanael.

—Yaa eecha —jei Felipe.

<sup>47</sup>Jesús uecha Natanael ou icoti jare jei:

—Mase, co ou penti Israel pegua añetete vae. Jecuaeño uyapo añete vae rupi —jei.

<sup>48</sup>Natanael upirandu Jesús pe:

—¿Quirãí pa checuaa?

Jesús jei chupe:

—Ndei Felipe nereni mbove, che nduecha iva igüi pe.

<sup>49</sup>—Nde co jae Tumpa Tai, Oporomboe vae —jei Natanael—. Nde co jae Israel pegua reta juvicha guasu —jei.

<sup>50</sup>Jesús jei chupe:

—Amimbeu ndeve che nduecha iva igüi pe. ¿Cua jeco pegua ra ndepurugüirovia ma? —jei—. Ndeechata mbaembae ndepurugüirovia ete vaerã —jei—. <sup>51</sup>Añete che jae ndeve, ndeechata ara uyepea oĩ, jare ndeechata vi ángel Tumpa pe uyeyocui vae reta uyupi ñugüinoi jare ugüeyi ñugüinoi che aĩ vae pe. Che co jae cuimbaerã uyeyapo vae —jei Jesús.

### Penti menda Caná pegua

**2** <sup>1</sup>Mbapi ara rupi penti cuimbae umenda cuñatai ndive Caná Galilea pegua pe, jare Jesús ichi joco pe oĩ. <sup>2</sup>Jare uparea reta vi Jesús jare jemimboe reta pe. <sup>3</sup>Vino opa ma yave, Jesús ichi jei Jesús pe:

—Opa ma vino.

<sup>4</sup>—Cuña, ¿maera pa ndere cheve cua? —jei Jesús—. Ndei uvã cheparaviqui ayapo vaerã —jei.

<sup>5</sup>Jayave Jesús ichi jei joco pe uyeyocui vae reta pe:

—Piyapo umimbeuta peve vae.

<sup>6</sup>Joco pe ñugüinoi seis ñru guasu ita pegua. Judío reta uiporu jocua nunga ñru guasu mbaembae oyoe vaerã Tumpa coti jecoño mai uyapo rami. Penti penti ñru guasu ipuere tinee pandepo ñru i pe. <sup>7</sup>Jesús jei tembiocui reta pe:

—Pemitinee cavi ñru guasu reta i pe.

Jayave jae reta umitinee cavi. <sup>8</sup>Jesús jei chupe reta:

—Añave piñoẽ peraa peruvicha pe.

Jayave jucuarãi uyapo reta. <sup>9</sup>Uyeyocui vae reta juvicha jou jocua i vinorã uyeyapo vae. Jae uicuaa'ã quía güi ra ou jocua jou vae, ñrei jembiocui reta uicuaa catu quía güi co oñoẽ. Jayave mburuvicha ueni cuimbae umenda vae.

<sup>10</sup>—Opaete ñru vae reta umee vino icavi vae mboupa reta pe. Jayave jeta vino jou yave ramo umee chupe reta vino icavi nunga mbae vae —jei chupe—. Ñrei nde añave ramo nemee vino icavi ete vae —jei.

<sup>11</sup>Jesús cua uyapo Caná Galilea pegua pe. Cuarãi Jesús umbipi uicuaaca jemimboe reta pe jae imbaepuere tuicha ete co. Jare cua uyapo vae jeco pegua jemimboe reta güirovia jese.

<sup>12</sup>Cua jaicue rupi Jesús oo Capernaúm pe. Yugüiraa vi jae jupíe ichi jare tivi reta jare jemimboe reta. Jare upita reta joco pe mbovi ara.

### Jesús Tumpa jo pe uyapo vae

(Mt 21.12.-13; Mr 11.15-18; Lc 19.45-46)

<sup>13</sup>Jare coiño ma ou judío reta pascua iara. Jayave Jesús oo Jerusalén pe. <sup>14</sup>Jare Tumpa jo pe uecha umaemee vae reta. Umee ñugüinoi güeye reta jare ovecha reta jare picasu reta. Uecha vi corepoti uipepica vae reta uguapi ñugüinoi joco pe. <sup>15</sup>Jayave Jesús uyapo chicote jare omoẽ umaemee vae reta jare ovecha reta jare güeye reta Tumpa jo güi. Jayave upiyere corepoti uipepica vae reta icorepoti jare umbiyapara imesa reta. <sup>16</sup>Jare jei picasu umee vae reta pe:

—Peraa cua güi cua reta. Agüiye pemee mbaembae cheRu jo pe —jei.

<sup>17</sup>Jayave jemimboe reta imandúa quirãí ime Tumpa iñee pe uyecuatía oĩ cuarãí: “Aipota ete Tumpa jo uyepiucua vaerã. Cheragüiro jese. Jáeramo cua jeco pegua írú vae reta uyapota icavi mbae vae cheve.” Jucuarãí uyecuatía oĩ.

<sup>18</sup>Jayave judío reta upirandu Jesús pe:

—¿Mbae nunga miacañi pa ndeechacata oreve nduicuaa vaerã ime ra nenoí mbaepuere cua mbaraviqui ndiyapo vae ndiyapo vaerã?

<sup>19</sup>Jesús jei chupe reta:

—Pembusururu yave cua Tumpa jo, che amupúa yeta co mbapi ara pe.

<sup>20</sup>—Uparaviqui reta cuarenta y seis año uyapo vaerã cua Tumpa jo — jei judío reta—. ¿Nemupúa yeta ra nde mbapi ara pe? —jei.

<sup>21</sup>Èrei Jesús uyemingueta chupe reta jete re. Echa'ã jete co jae Tumpa jo. <sup>22</sup>Jáeramo Jesús icove ye yave ou umanocue vae reta ipite güi, jemimboe reta imandúa cua jei vae re. Jayave güirovia aracae Tumpa iñee pe uyecuatía oĩ vae jare jocua Jesús jei chupe reta vae.

### Jesús uicuaa opaete vae

<sup>23</sup>Jesús upita Jerusalén pe pascua iara pe. Joco pe oĩ rambueve, jeta vae güirovia jese uecha yave jocua miacañi reta uyapo vae. <sup>24</sup>Èrei Jesús güirovia'a añetete cua reta ipurugüirovia. Echa'ã uicuaa cavi opaete ivi pegua reta. <sup>25</sup>Jae ueca'ã quía umimbeu vaerã chupe ivi pegua reta regua. Echa'ã jae uicuaa cavi ivi pegua reta ipia pe oĩ vae.

### Jesús jare Nicodemo

**3** <sup>1</sup>Ico penti fariseo Nicodemo jee vae. Jae co judío reta juvicha. <sup>2</sup>Cua cuimbae ou Jesús oĩ vae pe pítu yave jare jei chupe:

—Oporombocue vae, nduicuaa co Tumpa nembou ndeporombocue vaerã. Echa'ã mbaeti quía ipuere uyapo jocua nunga miacañi ndiyapo vae Tumpa oĩ'ã yave jae ndive —jei.

<sup>3</sup>—Añete che jae ndeve —jei Jesús Nicodemo pe—, ime yave quía uipota ico Tumpa iporoyocua pe vae, güinoita rani co tecove ipiau vae —jei.

<sup>4</sup>—¿Quirãita pa co yandepuere tecove ipiau vae ñanoi yanendechi ma yave? —jei Nicodemo—. Yandepuere'ã etei yaique ye yandesí jie pe yaa ye vaerã —jei.

<sup>5</sup>Jesús jei chupe:

—Añete che jae ndeve, ime yave quía uipota ico Tumpa iporoyocua pe vae, güinoita rani co tecove ipiau vae i jare Espíritu Santo rupi —jei—. <sup>6</sup>Yaa yave yandesí güi, ñanoi tecove ivi peguarãño. Èrei Espíritu Santo umee yandevete tecove Espíritu pegua —jei—. <sup>7</sup>Amimbeu ma ndeve quirãí penoita rani co tecove ipiau vae. Agüiye nepiacañi cua re —jei chupe—. <sup>8</sup>Ivitu uyepuyu ipotave rupi güi jare ndiyandu jiapu. Èrei ndicuaa'ã queti güi ra ou jare queti ra oo. Jucuarãí co oĩ Espíritu Santo umee tecove chupe vae —jei Jesús.

<sup>9</sup>Nicodemo upirandu Jesús pe:



—¿Quirãita pa co uyeyapo cua?

<sup>10</sup>Jesús upirandu Nicodemo pe:

—¿Ndicuaa'ã pa cua? Echa'ã nde co jae Israel pegua reta ombœ vae —jei—.

<sup>11</sup>Añete che jae ndeve, nduyemingueta nduicuaa vae re jare numimbeu nduecha vae. Ërei perovia'ã numimbeu peve vae —jei—. <sup>12</sup>Amimbeu ma peve mbaembæ uyeyapo ivi pe vae, ãrei chererovia'ã. ¿Quirãita pa pepuere chererovia mbaembæ uyeyapo ara pe vae amimbeu peve yave? —jei Jesús Nicodemo pe—. <sup>13-14</sup>Mbaeti quã ye uyupi oo ara pe, jaño che ara güi agüeyi ayu vae. Che co jae cuimbaerã uyeyapo vae ara pe oĩ vae —jei chupe—. Moisés aracæ uupi jocua mboi ivira re, ñana pe ico yave. Jucuarã vi ñru vae reta chereupita co, <sup>15</sup>ipotave güirovia cheré vae güinoi vaerã tecove opa mbae vae. Ndarau oo cañitei pe —jei.

### Tumpa uau ete ivi pegua reta

<sup>16</sup>Echa'ã Tumpa uau ete ivi pegua reta. Jáeramo umee Tai jae vaño, ipotave güirovia jese vae güinoi vaerã tecove opa mbae vae. Ndarau oo cañitei pe. <sup>17</sup>Tumpa ombou Tai ivi pe, ivi pegua reta uyembiasaca vaerã jae jeco pegua. Tai ou'ã uãa vaerã ivi pegua reta.

<sup>18</sup>Güirovia Tumpa Tai re vae reta ndarau ma uñeãaca. Ërei ñru vae reta uñeãaca ma co. Echa'ã Tumpa Tai jae vaño umimbeu ma quã co jae. Ërei jae reta güirovia'ã. <sup>19</sup>Tembipe ou ma ivi pe, ãrei ivi pegua reta uipota ete ico pĩtumimbi pe. Uipota'a ico tembipe pe. Echa'ã uyapo reta icavi mbae vae. Jáeramo uñeãaca reta ma co. <sup>20</sup>Ipotave icavi mbae vae uyapo vae umitarẽi tembipe. Ou'ã tembipe oĩ vae pe agüiye vaerã ñru vae reta uicuaa mbae uyapo vae. <sup>21</sup>Ërei añete pegua rupi ico vae ou tembipe oĩ vae pe, ñru vae reta uicuaa vaerã mbaraviqui uyapo vae uyapo co Tumpa jei vae rupi.

### Umendata vae iamigo

<sup>22</sup>Cua jaicue rupi Jesús jare jemimboe reta yugüiraa ivi Judea jee vae pe. Joco pe upita Jesús jae reta ndive jare upurumbibautizaca oĩ. <sup>23</sup>Juan vi upurumbibautiza oĩ Enón pe. Enón coiño oĩ Salim güi. Echa'ã joco pe jeta i oĩ. Jare amocue vae yugüeru jare Juan umbibautiza reta. <sup>24</sup>Echa'ã Juan ndei uyereraaca peresoriru pe.

<sup>25</sup>Jayave Juan jemimboe reta uyeaca ñugüinoi judío reta ndive quirãi ipuere uyeyoe cavi Tumpa peguarã vae re. <sup>26</sup>Jayave yugüeru Juan oĩ vae pe jare jei chupe:

—Oporombœ vae, nde nemimbeu ma oreve Jordán jovaicho pe nde ndive icose vae regua. Mase, jae upurumbibautiza oĩ, jare opaete vae yugüiraa ñugüinoi jae oĩ vae pe —jei reta Juan pe.

<sup>27</sup>Jayave Juan jei chupe reta:

—Tumpa umee yandevae vaño yandepuere ñanoi. <sup>28</sup>Che jae ma peve: 'Che jae'ã co Cristo. Jaño Tumpa che rani chembou chugüi.' Pe reta etei picuaa cuarã co che jae peve —jei chupe reta—. <sup>29</sup>Jae co penti cuimbae umendata

vae rami. Che co umendata vae iamigo rami. Echa'ã umendata vae iamigo upita umendata vae ndive jare uyapisaca jese jare uyerovia ñínee uyandu yave. Jucuarãño vi co che ayerovia ete —jei—, <sup>30</sup>Echa'ã jeta vae yugüiraata jae oĩ vae pe, ãrei mbovño ma co yugüeruta che añ vae pe —jei Juan chupe reta.

### Ara güi ou vae

<sup>31</sup>Ara güi ou vae ipuere opaete ñru vae reta güi. Ivi pegua reta ivi peguaño co jare uyemingueta mbaembae ivi pe oĩ vae re. Ara güi ou vae ipuere opaete ñru vae reta güi. <sup>32</sup>Jae umimbeu uecha jare uyandu vae, ãrei mbaeti quía güirovia jae umimbeu vae. <sup>33</sup>Jae umimbeu vae güirovia vae uicuaaca ñru vae reta pe güirovia co Tumpa ñínee añete co. <sup>34</sup>Echa'ã jocua Tumpa ombou vae umimbeu Tumpa ñínee, jare Tumpa umee chupe Espiritu Santo opaete imbaepuere reve. <sup>35</sup>Tu uau Tai jare oñono opaete mbaembae ipo pe. <sup>36</sup>Tumpa Tai re güirovia vae güinoi ma tecove opa mbae vae. Tumpa Tai re güirovia mbae vae ndarau güinoi tecove. Tumpa uiporaracata chupe.

### Jesús jare cuña Samaria pegua

**4** <sup>1</sup>YandeYa Jesús uyandu jerãcua ma co fariseo reta pe cuarãi: “Jesús uyapo oĩ jare umbĩbautiza oĩ jeta jemimboe retarã Juan güi.” Jucuarãi jerãcua. <sup>2</sup>Ñrei Jesús etei upurumbĩbautiza'ã. Jemimboe retaño upurumbĩbautiza ñugüinoi. <sup>3</sup>Jayave cua uicuaa yave, Jesús oẽ Judea güi oo ye Galilea pe. <sup>4</sup>Jare oo Samaria rupi. Echa'ã tape uasa jacoropi. <sup>5</sup>Jayave oo uvãe tenta guasu Sicar jee vae pe. Jocua tenta guasu Samaria pegua co, jare coiño oĩ ivi Jacob aracaee umee tai José pe vae güi. <sup>6</sup>Jocua ivi pe oĩ penti icua. Jocua icua jee Jacob iicua. Jayave Jesús uguapi icua iyipi pe. Echa'ã mbiri ma uguata, jare icandi. Jare doce pota rupi ma. <sup>7</sup>Jayave ou uvãe penti cuña Samaria pegua i güinoẽ vaerã. Jare Jesús jei chupe: —Emee tau i.

<sup>8</sup>Echa'ã Jesús jemimboe reta yugüiraa tenta guasu pe jembiurã ogua vaerã. <sup>9</sup>Jayave cuña Samaria pegua jei Jesús pe:

—Nde co jae penti judío jare che co jae penti Samaria pegua. ¿Maera pa nde ndere cheve: ‘Emee tau i?’ —jei.

(Echa'ã judío reta uyemingueta'ã Samaria pegua reta ndive.) <sup>10</sup>Jayave Jesús jei cuña pe:

—Che jae ma ndeve: ‘Emee tau i.’ Ndicuaa yave Tumpa uipota umee ndeve vae jare ndicuaa yave quía co che, ndiyerureta tẽi co cheve jare che ameeta tẽi co ndeve i tecove güinoi vae —jei Jesús.

<sup>11</sup>—Carai —jei cuña Jesús pe—, nde mbaeti mbae neno i nenoẽ pipe vaerã, jare cua i quipe oĩ. ¿Quía güi pa nderuta jocua i tecove güinoi vae? —jei—. <sup>12</sup>¿Tuicha ete pa nembraepuere yandetenondegua Jacob imbaepuere güi? Echa'ã Jacob umee yandeve cua i. Jae etei jare tai reta jare jĩmba reta jou cua güi —jei cuña.

<sup>13</sup>Jesús jei chupe:

—Ipotave cua i jou vae iúe yeta co. <sup>14</sup>Ērei ipotave i che ameeta jou vae ndarau ye iúe —jei—. Echa'ã jocua i che ameeta chupe vae uyeyapota ipia pe penti icua i oẽ vae rami. Jecuaẽño umeeta chupe tecove opa mbae vae —jei.

<sup>15</sup>—Carai —jei cuña—, emee cheve cua i, agüiye ye vaerã cheúe jare agüiye ye vaerã ayu cua pe i anoẽ vaerã —jei.

<sup>16</sup>Jayave Jesús jei chupe:

—Ecu eeni neme peyu cua pe.

<sup>17</sup>—Mbaeti cheme —jei cuña.

—Añete co ndere: ‘Mbaeti cheme’ —jei Jesús cuña pe—. <sup>18</sup>Echa'ã neno ma pandepo neme, jare jocua cuimbae añave neno vae jae'ã co neme. Añete co ndere —jei.

<sup>19</sup>—Carai —jei cuña—, añave aicuaa nde co jae penti Tumpa iñee umimbeu vae —jei—. <sup>20</sup>Yandetenondegua reta umbiadora Tumpa cua ivitu guasu re. Ērei pe reta pere Jerusalén pe oĩ Tumpa jo, jare joco peño ĩru vae reta vi umbiadorata tẽi Tumpa —jei cuña.

<sup>21</sup>—Chererovia, cuña —jei Jesús—. Outa ma ara agüiye vaerã pemiadora cheRu cua ivitu guasu reño ani Jerusalén peño —jei—.

<sup>22</sup>Pe reta pemaemiadora yave, picuaa cavi'ã mbae pemiadora vae. Ore numaemiadora yave, nduicuaa cavi co mbae numiadora vae. Echa'ã ĩru vae reta uyembiasacata judío reta rupi —jei—. <sup>23</sup>Ērei outa ma ara - ou ma co - añetete Tumpa umbiadora vae umbiadora vaerã Espiritu Santo rupi. Umbiadorata añete vae rupi —jei—. Echa'ã cheRu ueca cua nunga jae reta umbiadora vaerã —jei—. <sup>24</sup>Tumpa co jae Espiritu. Umbiadora vae reta tumbiadora Espiritu Santo rupi jare añete vae rupi —jei Jesús.

<sup>25</sup>Jayave cuña jei Jesús pe:

—Aicuaa Tumpa ombou vae outa co - jae co Cristo jee vae - jare jae ou yave, umimbeuta yandev opaete mbaembae regua —jei.

<sup>26</sup>—Jae co che ayemingueta añ nde ndive vae —jei Jesús.

<sup>27</sup>Cua jei oĩ yave, Jesús jemimboe reta yugüeru uvãe. Ipiacañi Jesús uyemingueta oĩ cuña ndive vae re. Ērei penti ave jei'ã chupe: “¿Mbae pa ndipota?” ani “¿Maera pa ndiyemingueta jae ndive?” <sup>28</sup>Jayave cuña ueya ĩiru joco pe jare oo uvãe tenta guasu pe. Jei cuimbae tenta guasu pegua reta pe:

<sup>29</sup>—Pecua peeche cuimbae opaete ayapocue umimbeu cheve vae. ¿Jae'ã ra co Cristo, Tumpa ombou vae? —jei.

<sup>30</sup>Jayave cuimbae reta oẽ tenta guasu güi yugüeru Jesús coti.

<sup>31</sup>Cuña oo ma yave, Jesús jemimboe reta jei chupe:

—Oporomboe vae, ecaru.

<sup>32</sup>—Ime anoi cherembiurã pe reta picuaa mbae vae —jei Jesús chupe reta.

<sup>33</sup>Jayave jemimboe reta jei uyupe:

—¿Güeru ma ra quía mbae jou vaerã?

<sup>34</sup>—Che ayapo chembou vae uipota ayapo vaerã vae, jare opaete iparaviqui ayapo —jei Jesús—. Cua co jae cherembiurã rami —jei—. <sup>35</sup>Pe reta pere: ‘Īrundi

yasi rupi oïta ma co mbaeviro.' Èrei che jae peve: Mase, pemae co reta re. Joco pe oï vae yagüiye ma co. Uvãe ma mbaeviro —jei Jesús—. <sup>36</sup>Jare tecove opa mbae vae uñemee chupe vae uyeaviro vae rami co. Jare temiti iya umbiepi umbaeviro vae pe, umaeti vae jare umbaeviro vae uyerovia pãve vaerã —jei—. <sup>37</sup>Jucuarãi añete co cua: 'Penti vae umaeti jare ñru vae umbaeviro' —jei—. <sup>38</sup>Che pomondo peaviro vaerã peparaviqui'ã jese vae. Ñru vae reta uparaviqui jese, jare pe reta peaviro jae reta iparaviqui vae —jei Jesús chupe reta.

<sup>39</sup>Jare jeta jocua tenta guasu pegua reta - Samaria pegua reta co - güirovia Jesús re cuña umimbeu chupe reta vae jeco pegua. Echa'ã cuña jei ma chupe reta: "Opaete ayapocue umimbeu cheve." <sup>40</sup>Jayave Samaria pegua reta yugüeru uvãe yave Jesús oï vae pe, jei chupe:

—Ecuá orerenta pe epita ore ndive.

Jayave Jesús oo upita joco pe mocui ara. <sup>41</sup>Jare jeta ñru vae reta upurugüirovia Jesús etei jei chupe reta vae jeco pegua. <sup>42</sup>Jayave jei reta cuña pe:

—Tenonde yave ndupurugüirovia nde ndere oreve vae jeco pegua. Èrei añave ndupurugüirovia ore etei nduyandu ramo, jare añave nduicuaa cua co jae ivi pegua reta umbiasa vae Cristo jee vae —jei reta.

### Jesús umbigüera mburuvicha tai

<sup>43</sup>Mocui ara rupi Jesús oo joco güi Galilea coti. <sup>44</sup>Echa'ã Jesús etei jei penti Tumpa ñnee umimbeu vae jentaigua reta uipiu'ã. <sup>45</sup>Jayave Jesús oo uvãe yave Galilea pe, joco pegua reta umbiresive cavi. Echa'ã uecha reta ma opaete Jesús uyapo Jerusalén pe pascua pe vae. Echa'ã jae reta yugüiraa vi joco pe. <sup>46</sup>Jayave Jesús oo uvãe Caná Galilea pegua pe. Joco pe tenonde yave uyapo i vinorã. Jare ico Capernaum pe penti mburuvicha. Cua cuimbae tai imbaerasi oï. <sup>47</sup>Jare uicuaa yave Jesús ou ma co Judea güi uvãe Galilea pe, ou uvãe Jesús oï vae pe jare uyerure chupe tai re.

—Ecuá cherenta pe embigüera cherai —jei—. Echa'ã umanota ma oï.

<sup>48</sup>—Aechaca'ã peve yave miacañi reta, ndarau perovia cheré —jei Jesús chupe.

<sup>49</sup>—Carai —jei mburuvicha—, ecua cherenta pe agüiye vaerã cherai umano.

<sup>50</sup>—Ecuá yeño —jei Jesús chupe—. Nderai icove catu ye ma oï —jei.

Jayave mburuvicha güirovia Jesús jei chupe vae jare oo ye jenta coti.

<sup>51</sup>Jare oo rambueve jenta coti, jembiocui reta yugüeru oovãiti jare jei chupe:

—Icove catu ye ma oï nderai.

<sup>52</sup>Jayave mburuvicha upirandu chupe reta:

—¿Mbae ora pe pa umbipi ucuera?

—Caarumo una rupi jacu upita chugüi —jei reta chupe.

<sup>53</sup>Jare cunumi tu uicuaa jocua ora pe etei co Jesús jei chupe: "Nderai icove catu ye ma oï." Jayave upurugüirovia jae jare opaete jenta pegua reta.

<sup>54</sup>Cua miacañi uyapo Jesús uicuaaca vaerã quía co jae, ou yave Judea güi Galilea pe. Mocui ma co cua miacañi.

### Cuimbae ipuere mbae uguata vae

**5** <sup>1</sup>Cua jaicue rupi judío reta uyapo ñugüinoi fiesta, jare Jesús oo Jerusalén pe. <sup>2</sup>Jare ime Jerusalén pe ovecha reta uñemeea jonque iyipi pe penti estanque tipi vae hebreo iñee pe Betesda jee vae. Ime cua i iyipi rupi pandepo o-rai. <sup>3</sup>O-rai japipe pe uyapacua ñugüinoi jeta imbaerasi vae reta. Joco pe ñugüinoi jesa mbae vae reta, ipuere mbae uguata vae reta, jare ipuere mbae omi vae reta. Opaete cua reta uãro ñugüinoi i omi vaerã. <sup>4</sup>Echa'ã amo amo pe ugüeyi penti ángel omomi vaerã i. Jare i omi ma yave, jocua imbaerasi vae tenonde voi uique i pe vae ucuera ipotave imbaerasi güi. <sup>5</sup>Jare imbaerasi vae reta ipite pe oĩ penti cuimbae treinta y ocho año ma ipuere mbae uguata vae. <sup>6</sup>Jesús uecha cuimbae uyapacua oĩ joco pe, jare uicuaa ima ete ma imbaerasi. Jayave upirandu chupe:

—¿Ndipota pa ndecuera?

<sup>7</sup>—Carai —jei cuimbae—, mbaeti quía cheñono vaerã i pe i omi yave. Che aa rambueve, ñru vae uique i pe tenonde chegüi —jei.

<sup>8</sup>Jayave Jesús jei chupe:

—Epüa evoi nderupa jare uguata.

<sup>9</sup>Jayave cuimbae ucuera voi, jare ovoi jupa uguata. Jare jocua ara mbutuu ara co. <sup>10</sup>Jayave judío reta jei cuimbae ucuera ma vae pe:

—Cua ara mbutuu ara co. Jupi'ã ndevoi vaerã nderupa mbutuu ara pe —jei reta.

<sup>11</sup>Cuimbae jei chupe reta:

—Cuimbae chembigüera vae jei cheve: ‘Evoi nderupa jare uguata’ —jei cheve, jei.

<sup>12</sup>Jayave upirandu reta chupe:

—¿Quía pa jae ‘Evoi nderupa jare uguata’ jei ndeve vae?

<sup>13</sup>Èrei ucuera vae - tenonde yave ipuere mbae uguata vae - uicuaa'ã. Echa'ã jeta vae joco pe ñugüinoi jare Jesús oo ma joco güi. <sup>14</sup>Ndei ima mbove Jesús oovãiti cuimbae Tumpa jo pe.

—Ndecuera ma co. Jáeramo agüiye ye iyapo icavi mbae vae. Echa'ã ndiyapo ye yave, mbae icavi mbae ete vae uyeyapota ndeve —jei.

<sup>15</sup>Jayave cuimbae oo umimbeu judío reta pe Jesús co jae umbigüera ma vae. <sup>16</sup>Jare Jesús uyapo ma amocue cua nunga miacañi mbutuu ara pe. Cua jeco pegua judío reta uipota uyapo icavi mbae vae chupe. Uipota vi uyuca. <sup>17</sup>Èrei Jesús jei chupe reta:

—CheRu jecuaeño uparaviqui, jare che vi aparaviqui.

<sup>18</sup>Cua jeco pegua judío reta uipota uyuca Jesús. Echa'ã Jesús uyapo mbutuu ara pe jae reta jei jupi'ã uyeyapo vaerã vae, jare Jesús uyemingueta yave, jei: “Tumpa etei co cheRu”, jare cua uipota jei jae co Tumpa etei.

### Tumpa Tai imbaepuere

<sup>19</sup>Jayave Jesús jei chupe reta:

—Añete che jae peve, che co jae Tumpa Tai. Cheiño chepuere'ã mbae ayapo. Ayapo jocua aecha cheRu uyapo oĩ vaeño. CheRu uyapo oĩ vae che ayapo vi —jei—. <sup>20</sup>Echa'ã cheRu cherau jare uicuaaca ma cheve opaete iparaviqui. Jare uicuaacata vi cheve mbaraviqui tuicha ete cua reta güi vae, pepiacañi ete vaerã jese —jei Jesús chupe reta—. <sup>21</sup>CheRu umee tecove umanocue vae reta pe. Jae ramiño vi che amee tecove amocue vae reta pe. Amee aipota vae pe —jei—. <sup>22</sup>CheRu ndarau uãa ivi pegua reta. Echa'ã umañota cheré aãa vaerã —jei—. <sup>23</sup>Jucuarãi opaete vae chepiuta uipiu cheRu rami. Chepiu'ã vae uipiu'ã vi cheRu. Echa'ã jae co chembou —jei—.

<sup>24</sup>Añete che jae peve, chiñee piyandu yave jare chembou vae perovia yave, penoi ma tecove opa mbae vae. Ndarau ma piñeãaca. Peasa ma co mano güi tecove opa mbae vae pe. <sup>25</sup>Añete che jae peve, outa ma ara - jáema ou - umanocue vae reta uyandu vaerã chiñee - che co jae Tumpa Tai - jare uyandu vae reta icove yeta co —jei Jesús chupe reta—. <sup>26</sup>Echa'ã cheRu ipuere umee tecove. Jae ramiño vi umañota cheré amee vaerã tecove —jei—. <sup>27</sup>Jare cheRu umee cheve mbaepuere aãa vaerã ivi pegua reta che ayeyapo cuimbaerã ramo —jei—. <sup>28</sup>Agüiye pepiacañi cua re. Echa'ã outa ma ara opaete umanocue uñeñoti oĩ vae reta uyandu vaerã chiñee —jei—. <sup>29</sup>Icavi vae uyapo vae reta icove yeta ou tecove opa mbae vae güinoi vaerã, jare icavi mbae vae uyapo vae reta icove yeta ou uñeãaca vaerã —jei Jesús chupe reta—.

### Cristo regua umimbeu vae reta

<sup>30</sup>Cheiño chepuere'ã mbae ayapo. Che apuruãa cheRu umimbeu cheve vae rupi. Jáeramo apuruãa jupi vae rupi. Echa'ã ayapo'ã jae vae rupiño. Ayapo chembou vae jei vae rupi —jei—. <sup>31</sup>Cheiño chemiari peve chiyee yave, pe reta peroviata'ã jocua jae vae. <sup>32</sup>Ime ñru chemimbeu vae, jare aicuaa jae jei peve cheré vae añete co —jei—. <sup>33</sup>Echa'ã pe reta pemondo cuimbae reta Juan re uyapisaca vaerã, jare jae jei cheré vae añete co —jei—. <sup>34</sup>Che aeca'ã quãa chemimbeu vaerã, ãrei cua che jae peve piyembiasaca vaerã —jei Jesús—. <sup>35</sup>Juan co jae penti mechero rami. Echa'ã mechero jendi jare umee yandeve tembipe. Ìma ngatu rupi icavi echa peve piyerovia vaerã tembipe Juan umee peve vae re —jei—. <sup>36</sup>Cua mbaraviqui ayapo vae reta chemimbeu ete Juan chemimbeu vae güi. CheRu uipota opa ayapo vaerã cua mbaraviqui reta, jare cua ayapo vae rupi aicuaaca ñru vae reta pe cheRu co chembou vae —jei—. <sup>37</sup>CheRu chembou jare jae etei chemimbeu. Piyandu'ãi cheRu ñnee jare peecha'ãi —jei—. <sup>38</sup>Piyapo'ã cheRu jei peve piyapo vaerã vae. Echa'ã jae chembou, ãrei chererovia'ã —jei—. <sup>39</sup>Jecuaño pemingüeta Tumpa ñnee pe uyecuatía oĩ vae. Echa'ã pepia pe piyemingüeta joco pe pevãe quirãi pepuere penoi tecove opa mbae vae. Jare Tumpa ñnee pe

uyecuatía oĩ vae che co chemimbeu —jei Jesús chupe reta—. <sup>40</sup>Ërei pipota'ã perovia cheré tecove opa mbae vae amee vaerã peve —jei—.

<sup>41</sup>Che ayeco'ã yembutuicha ivi pegua reta umee vae re. <sup>42</sup>Echa'ã aicuaa pe reta peau'ã Tumpa pepia pe —jei—. <sup>43</sup>Che ayu cheRu chembou ramo, ërei pe reta chembiresive'ã. Ìru vae ou yave jei vae rupi, pembiresiveta co —jei—. <sup>44</sup>Pepuere'ã etei pepurugüirovia. Echa'ã jecuaeño peeca ìru vae reta pembutuicha vaerã, ërei peeca'ã yembutuicha Tumpa uipota tẽi penoi vaerã vae. Tumpa co jae pentiño —jei Jesús—. <sup>45</sup>Agüiye pepia pe piyemingueta che ayu pumbijeco vaerã cheRu jovai. Echa'ã Moisés uicuatía vae co pembijeco, yepe tẽi pe reta pere: 'Ore nduyapo Moisés uicuatía vae rupi. Jáeramo icavita oreve.' Jucuarãi pere tẽi —jei—. <sup>46</sup>Echa'ã Moisés uicuatía vae perovia yave, chereroviata tẽi co. Echa'ã Moisés uicuatía vae che co chemimbeu —jei—. <sup>47</sup>Ërei perovia'ã Moisés uicuatía vae ramo, ndarau vi perovia chiñee —jei Jesús chupe reta.

### Jesús umingaru cinco mil cuimbae reta

(Mt 14.13-21; Mr 6.30-44; Lc 9.10-17)

**6** <sup>1</sup>Cua jaicue rupi Jesús oo uvãe ì guasu Galilea jovaicho pe. Jocua ì guasu jee vi Tiberias. <sup>2</sup>Jare tenonde yave Jesús umbigüera amocue imbaerasi vae reta, jare jeta vae uecha ma miacañi Jesús uyapo vae reta. Jáeramo añave cua reta yugüiraa Jesús jaicue. <sup>3</sup>Jayave Jesús oo uyupi ivitu guasu re jare uguapì joco pe jemimboe reta ndive. <sup>4</sup>Jare coiño ma ou judfo reta ifiesta pascua jee vae. <sup>5</sup>Jare Jesús umae yave, uecha jeta vae yugüeru icoti. Jayave upirandu Felipe pe:

—¿Quiape pa yandepuereta yagua mbiyape cua reta jou vaerã —jei.

<sup>6</sup>Jare cua Jesús jei uicuaa vaerã mbae ra jeita Felipe. Echa'ã Jesús uicuaa ma mbae uyapota vae. <sup>7</sup>Felipe jei chupe:

—Doscientos ara mbaraviqui jepi pegua mbiyape ndarau uepiti cua reta jou vaerã, penti penti mboviño jou yave.

<sup>8</sup>Penti Jesús jemimboe Andrés jee vae - jae co Simón Pedro tivi - jei Jesús pe:

<sup>9</sup>—Ime cua pe oĩ penti cunumi pandepo mbiyape jare mocui pira güinoi vae. Ërei jocua mbovi co cua jeta vae reta jou vaerã —jei.

<sup>10</sup>—Pemimbeu chupe reta uguapì vaerã —jei Jesús.

Jare jeta capiichape oĩ joco pe. Jayave uguapì reta. Jare cuimbae reta cinco mil rupi ñugüinoi. <sup>11</sup>Jayave Jesús uipisi jocua mbiyape jare umee yasurupai Tumpa pe. Jayave umee mbiyape jemimboe reta pe, jare jemimboe reta umee uguapì vae reta pe. Jae ramiño vi umee pira chupe reta. Jare opaete vae jou jare iyangapii. <sup>12</sup>Jayave iyangapii reta ma yave, Jesús jei jemimboe reta pe:

—Pembati tembú uñepisãacue jembire vae, agüiye vaerã mbae uyemombo —jei.

<sup>13</sup>Echa'ã jocua pandepo mbiyape güi jembire mbiyape uñepisãacue jare uyeeya joco pe, opa ma ucaru reta yave. Jayave Jesús jemimboe

reta umbati jare umitinee doce canasta. <sup>14</sup>Jare joco pe ñugüinoi vae reta uecha ma yave cua miacañi Jesús uyapo vae, jei reta:

—Cua cuimbae jocua Tumpa iñee umimbeu vae etei co. Echa'ã Tumpa iñee pe uyecuatía oĩ outa co ivi pe —jei reta.

<sup>15</sup>Jare Jesús uicuaa yugüeruta uipisi uyapo vaerã juvicha guasurã, yepe tẽi jae uipota'ã. Jayave oo chugüi reta ivitu guasu re. Jaeño oo.

**Jesús uguata i iárambo**  
(Mt 14.22-27; Mr 6.45-52)

<sup>16</sup>Jare pĩtu ave ma yave, Jesús jemimboe reta ugüeyi yugüiraa i guasu pe. <sup>17</sup>Joco pe uyupi chalana pe jare umbipi uasa i guasu rupi Capernaum coti. Pĩtumimbi ma oĩ, jare Jesús ndei ou ye jae reta ñugüinoi vae pe.

<sup>18</sup>Jayave tanta uyepeyu ivitu jare i uyembiapararoa. <sup>19</sup>Uruguata reta ma yave chalana penti legua rupi ndipo, uecha Jesús uguata ou i iárambo jare ou coiño ma chalana güi. Jayave uquiye reta. <sup>20</sup>Èrei Jesús jei chupe reta:

—Che co. Agüiye pequiye —jei.

<sup>21</sup>Jayave uyerovia reve jae reta umbuyupi Jesús chalana pe, jare jupivoiño chalana oo uvãe ivi pe uipota yugüiraa uvãe vae pe.

**Ueca reta Jesús**

<sup>22</sup>Piareve pe jeta vae reta jecuaeño upita i guasu jovaicho pe. Uecha pentiño chalana joco pe oĩ ndei Jesús jemimboe reta yugüiraa pipe mbove. Jare uicuaa Jesús oo'ã chalana pe jemimboe reta ndive. <sup>23</sup>Èrei ñru chalana reta tenta guasu Tiberias güi yugüeru vae upita coiño tenonde yave ucaru reta vae güi. Echa'ã joco pe jae reta jou mbiyape yandeYa umee yave yasurupai Tumpa pe. <sup>24</sup>Uicuaa reta ma Jesús jare jemimboe reta mbaeti joco pe ñugüinoi. Jayave uyupi reta jocua chalana reta pe jare yugüiraa Capernaum coti, Jesús ueca vaerã.

**Mbiyape tecove umeeta vae**

<sup>25</sup>Ï guasu uasa reta ma yave, uvãe Jesús jare jei reta chupe:

—Oporomboe vae, ¿quirã i yave pa ndeyu cua pe?

<sup>26</sup>Jayave Jesús jei chupe reta:

—Añete che jae peve, pe reta chereca jocua mbiyape pemiangapi ramoño, chereca'ã jocua miacañi pe aipota aicuaaca peve ramo —jei—. <sup>27</sup>Agüiye peparaviqui perembiurã imata'ã ico peve vae reño. Èrei peparaviqui perembiurã ameeta peve vae re. Che ayeyapo cuimbaerã vae ameeta peve perembiurã opata'ã vae. Echa'ã penoita tecove opa mbae vae. Echa'ã cheRu Tumpa uicuaaca ma peve chepuere ayapo jucuarã i —jei Jesús chupe reta.

<sup>28</sup>Jayave upirandu reta Jesús pe:

—¿Mbae pa nduyapota? ¿Quirã i pa orepuere nduyapo mbaraviqui Tumpa uipota nduyapo vaerã vae? —jei reta.

<sup>29</sup>Jayave Jesús jei:



—Perovia cheré. Cua co mbaraviqui Tumpa uipota piyapo vaerã vae. Echa'ã jae chembou —jei.

<sup>30</sup>Jayave jei reta chupe:

—¿Mbae nunga miacañi pa ndiyapota, nduecha vaerã jare ndugüirovia vaerã nderé? ¿Mbae nunga mbaraviqui pa ndiyapota nde? —jei reta—.

<sup>31</sup>Yandetenondegua reta jou maná ñana pe. Echa'ã Tumpa iñee pe uyecuatía oĩ: 'Umee chupe reta jembuurã ara güi jou reta vaerã' —jei reta chupe.

<sup>32</sup>—Añete che jae peve —jei Jesús—, Moisés umee'ã co jembuurã ara güi ou vae. Añave cheRu umeeta peve perembuurã añetete vae ara güi ou vae —jei—. <sup>33</sup>Echa'ã tembú Tumpa añave umeeta vae jocua co jae ara güi ou vae. Jae umeeta tecove ivi pegua reta pe —jei.

<sup>34</sup>—Carai —jei reta—, jecuaño emee oreve cua nunga orerembuurã.

<sup>35</sup>—Che co jae jocua tembú tecove umeeta vae —jei Jesús—. Ipotave cheré güirovia vae ndarau iyembaí, jare ipotave cheré güirovia vae ndarau iúe —jei—. <sup>36</sup>Erei che jae ma peve cuarãi: Perovia'ã, yepe tẽi cherecha ma. <sup>37</sup>Opaete cheRu umee cheve vae reta güiroviata co cheré —jei—, jare ipotave cheré güirovia vae ndarau amombo. <sup>38</sup>Echa'ã agüeyi ayu ara güi ayapo vaerã chembou vae jei vae. Ayu'ã che jae vaeño ayapo vaerã —jei Jesús—.

<sup>39</sup>Ndarau amicañi penti ave opaete cheRu umee ma cheve vae reta güi. Echa'ã ambijecove yeta aru umanocue vae reta ipite güi ara taicuegua vae pe. Cua uipota chembou vae —jei—. <sup>40</sup>Ipotave cherecha vae güinoita tecove opa mbae vae cheré güirovia yave, jare che ambijecove yeta aru umanocue vae reta ipite güi ara taicuegua vae pe. Cua uipota cheRu —jei Jesús.

<sup>41</sup>Jayave judío reta iñeenguru Jesús re. Echa'ã Jesús jei ma: "Che co jae tembú ara güi ou vae." <sup>42</sup>Jare judío reta jei:

—Cua co jae Jesús. Jae co José tai. Yaicuaa catu co tu jare ichi. ¿Quirãi pa ipuere jei: 'Agüeyi ayu ara güi'? —jei reta.

<sup>43</sup>Jayave Jesús jei chupe reta:

—Agüiye piñeenguru checoti. <sup>44</sup>CheRu chembou —jei—. CheRu güiroviaca cheré vaeño ipuere güirovia cheré. Jare che ambijecove yeta aru umanocue vae reta ipite güi ara taicuegua vae pe —jei chupe reta—. <sup>45</sup>Tumpa iñee aracaé umimbeu vae uicuatía cuarãi: 'Jare Tumpa omboeta opaete vae.' Jucuarãi uicuatía —jei—. Ipotave uyapisaca Tumpa re jare uyemboe Tumpa jei chupe vae re vae outa checoti —jei—.

<sup>46</sup>Mbaeti quía uecha cheRu, jaño che ayu Tumpa güi vae. Che aecha ma co cheRu —jei Jesús—. <sup>47</sup>Añete che jae peve, cheré güirovia vae güinoi tecove opa mbae vae. <sup>48</sup>Che co jae jocua tembú tecove umee vae —jei—. <sup>49</sup>Petenondegua reta jou jocua maná ñana pe jare umano reta. <sup>50</sup>Che co jae tembú ara güi ou vae. Cua tembú jou vae ndarau umano —jei—. <sup>51</sup>Che co jae tembú tecove umee vae. Che agüeyi ayu ara güi. Ipotave cua tembú jou vae güinoita tecove opa mbae vae —jei Jesús chupe reta—. Jare jocua tembú ameeta vae cherete co. Ameeta cherete ivi pegua reta güinoi vaerã tecove —jei.

<sup>52</sup>Jayave judío reta uyeaca uyupii.

—¿Quirãita ra ipuere cua cuimbae umee yandeve jete yau vaerã? —jei reta.

<sup>53</sup>—Añete che jae peve —jei Jesús chupe reta—, peu'ã yave cherete jare cherugüi, ndarau tecove opa mbae vae penoi. Che co jae cuimbaerã uyeyapo vae —jei—. <sup>54</sup>Cherete jare cherugüi jou vae güinoi tecove opa mbae vae, jare ambijecove yeta aru umanocue vae reta ipite güi ara taicuegua vae pe —jei—. <sup>55</sup>Echa'ã cherete jare cherugüi tembú añetete vae co —jei Jesús—. <sup>56</sup>Cherete jare cherugüi jou vae ico che ndive jare che aico jae ndive —jei—. <sup>57</sup>CheRu güinoi tecove opa mbae vae jare jae chembou, jare che anoi tecove opa mbae vae cheRu güi. Jae ramiño vi jocua cherete jou vae güinoita tecove opa mbae vae chegüi —jei chupe reta—. <sup>58</sup>Che co jae tembú ara güi ou vae. Cua tembú jae'ã co jocua tembú petenondegua reta jou vae rami. Echa'ã jae reta umano. Ërei ipotave cua tembú jou vae güinoita tecove opa mbae vae —jei.

<sup>59</sup>Jucuarã jei Jesús judío reta itupao pe, Capernaum pe oporomböe oĩ yave.

### Ñee reta tecove opa mbae vae pegua

<sup>60</sup>Cua uyandu reta yave, jeta Jesús jemimboe reta jei uyupe:

—Icavi'ã co cua jei vae. Agüiye yayapisaca cua nunga ñee re —jei reta.

<sup>61</sup>Jesús uicuaa jemimboe reta ñeenguru co icoti. Jayave jei chupe reta:

—¿Maera pa piñeenguru checoti cua re? <sup>62</sup>¿Mbae pa piyapota cherecha yave ayupi aa tenonde aico vae pe? Che co jae cuimbaerã uyeyapo vae —jei—. <sup>63</sup>Jaeño Espíritu Santo ipuere umee tecove opa mbae vae. Yanderete ipuere'ã umee yandeve cua nunga tecove. Cua amimbeu ma peve vae ivi pegua'ã co. Jae co tecove opa mbae vae pegua —jei Jesús—. <sup>64</sup>Ërei amocue pe reta perovia'ã cheré —jei.

Echa'ã Jesús uicuaa iyipi güiive quía reta güirovia'ã jese jare quía umeeta jovaicho reta pe. <sup>65</sup>Jayave jei chupe reta:

—Jáeramo amimbeu ma peve quirã cheRu güiroviaca cheré vaenö ipuere güirovia cheré —jei.

<sup>66</sup>Cua jaicue rupi jeta jemimboe reta uñatima ye Jesús güi, jare uguata'ã ma jae ndive. <sup>67</sup>Jayave Jesús upirandu jocua doce vae reta pe:

—¿Peota pa chegüi pe reta vi?

<sup>68</sup>—¿Quía re pa ndoota, oreYa? —jei Simón Pedro chupe—. Nde co nemimbeu oreve tecove opa mbae vae regua. <sup>69</sup>Jare ndugüirovia ma nderé jare nduicuaa ma nde co jae Tumpa oñono tee iyupeguarã vae —jei.

<sup>70</sup>Jayave Jesús jei:

—Che puparavo. Pe co jae doce vae reta. Ërei ime penti pepite pe oĩ vae uyeyocui aña guasu pe —jei.

<sup>71</sup>Cuarã uyemingueta Judas re. Judas co jae Simón Iscariote tai. Echa'ã Jesús uiparavo doce jare jae reta güi penti co jae Judas. Judas umeeta Jesús jovaicho reta pe.

### Jesús tiví reta güirovia'ã jese

- 7** <sup>1</sup>Cua jaicue rupi Jesús oo tenta guasu Galilea pegua reta pe. Oo'ã Judea pe. Echa'ã judío reta uipota uyuca. <sup>2</sup>Jare outa ma uvãe judío reta ifiesta Tabernáculos jee vae iara reta. <sup>3</sup>Jayave Jesús tiví reta jei chupe: —Ecuá cua güi Judea pe, nderemimboe reta uecha vaerã mbaraviqui ndiyapo vae. <sup>4</sup>Echa'ã ime yave quía uipota ñru vae reta uicuaa cavi vaerã jesequa vae, uyapo viari'ã iparaviqui. Ndiyapo co cua mbaraviqui. Jáeramo iyapo opaete vae jovaque —jei reta chupe.
- <sup>5</sup>Echa'ã tiví reta vi güirovia'ã jese. <sup>6</sup>Jayave Jesús jei chupe reta: —Ndei uvãe jucuarã ayapo vaerã, ãrei pe reta pepuere peo pequirẽi vae rupi —jei—. <sup>7</sup>Ívi pegua reta ipuere'ã pemitarẽi, ãrei ivi pegua reta chemitarẽi. Echa'ã che amimbeu chupe reta icavi mbae vae co jae uyapo reta vae —jei Jesús—. <sup>8</sup>Pe reta pecua fiesta pe. Che ndei rani aa cua fiesta pe. Echa'ã ndei uvãe che aa joco pe vaerã —jei.
- <sup>9</sup>Jucuarãi jei chupe reta Jesús, jare upita Galilea pe.

### Fiesta Tabernáculos jee vae

- <sup>10</sup>Cua jaicue rupi tiví reta yugüiraa ma yave fiesta pe, Jesús oo vi. Oo'ã jeta vae jupíe agüiye vaerã uecha reta. <sup>11</sup>Jare judío reta ueca ñugüinoi Jesús fiesta pe. —¿Quíape pa ime oí? —jei reta.
- <sup>12</sup>Jare joco pe ñugüinoi vae reta uyeaca uyupii Jesús re. Amocue vae jei: —Cuimbae jecocavi vae co jae. Ñru vae reta jei: —Jecocavi'ã co. Upurumbitavi vae co.
- <sup>13</sup>Ñrei opaete vae uquiye judío reta güi. Jáeramo uyemingueta viariño reta.
- <sup>14</sup>Fiesta mbite ma yave, Jesús oo Tumpa jo pe umbipi oporomboc.
- <sup>15</sup>Jare judío reta ipiacañi. —¿Quirãi ra cua cuimbae jeta uicuaa mbaembae re uyemboe mbae reve? —jei reta.
- <sup>16</sup>Jayave Jesús jei chupe reta: —Cheporomboc chembaeño'ã co. Jae co chembou vae iporomboc —jei—. <sup>17</sup>Ipotave Tumpa jei vae uipota uyapo vae uicuaata cheporomboc Tumpa iporomboc co. Uicuaata chiñeeiño'ã co —jei—. <sup>18</sup>Ipotave vae jae ñnee reño oporomboc yave, jae uipota ñru vae reta pe uyembutuichaca vaerãño. Ñrei quía ueca umbutuicha vaerã ombou vae, jae oporomboc añete vae re. Iyapu'ã co —jei Jesús—.
- <sup>19</sup>Moisés umee peve mboroyocui. Ñrei mbaeti penti ave pe reta piyapo mboroyocui pe uyecuatía oí vae rupi —jei—. ¿Maera pa pipota cheyuca? —jei chupe reta.
- <sup>20</sup>Jayave judío reta jei: —Aña oya ma nderé. ¿Quía pa uipota ndeyuca? —jei reta.

21—Ayapo ma penti mbaraviqui —jei Jesús—, jare opaete pe reta pepiacañi jese. 22 Moisés umimbeu peve piñemicircuncidaca vaerã. Ërei uyembipi'ã Moisés umimbeu yave. Echa'ã Moisés itenondegua reta uyapo jucuarãi. Jare pe reta pepurumicircuncidaca mbutuu ara pe —jei—. 23 Che ambigüiera ma penti cuimbae mbutuu ara pe. Opaete jete ucuera cavi ma. ¿Maera pa pepochi cheve cua jeco pegua? Echa'ã pe reta pepurumicircuncidaca mbutuu ara pe mboroyocui Moisés umimbeu peve vae pipota'ã piyavi ramo —jei Jesús—. 24 Agüiye pepuruãa peecha vae rupiño. Pepuruãa cavi jupi vae rupi —jei.

### ¿Jae pa co Cristo?

25 Jáeramo amocue Jerusalén pegua reta jei:

—¿Jae'ã ra cua judío reta uipota uyuca vae? 26 Mase, co oĩ cua pe, jare uyemingueta oĩ opaete vae pe. Ërei mbaeti quía mbae jei chupe. Aramoi yanderuvicha reta uicuaa ma jae co Cristo, Tumpa ombou vae —jei reta—. 27 Ërei yaicuaa queti güi ou cua cuimbae. Echa'ã Cristo uyecuaa yave, ndarau quía uicuaa queti güi ou —jei reta.

28 Jáeramo Jesús oporombœe oĩ rambueve Tumpa jo pe, iñeeãta reve jei:

—Pe reta checuaa co, jare picuaa co queti güi ayu vae. Ërei ayu'ã che aipota ayu rupiño. Echa'ã chembou vae imiari añete vae re, jare pe reta picuaa'ã chembou vae —jei—. 29 Ërei che aicuaa. Echa'ã ayu jae oĩ vae güi. Jae chembou —jei.

30 Jáeramo judío reta uipota tẽi uipisi. Ërei uipisi'ã quía. Echa'ã ndei uvãe uyepisi vaerã. 31 Jare jeta joco pe ñugüinoi vae güirovia jese. Echa'ã jei reta: —Cristo ou yave, ¿uyapota ra jeta ete miacañi cua cuimbae uyapo vae güi?

### Fariseo reta ombou jembiocui reta uipisi vaerã Jesús

32 Jare fariseo reta uyandu jeta vae iñeenguru ñugüinoi Jesús re.

Jayave sacerdote reta itenondegua reta jare fariseo reta ombou jembiocui reta uipisi vaerã Jesús. 33 Jayave Jesús jei:

—Aĩta pe reta ndive michi peguaño. Jayave aata chembou vae pe.

34 Cherecata co, ãrei ndarau chevãe. Ndarau peo che aĩta vae pe —jei.

35 Jayave judío reta jei uyupe:

—¿Queti ra oota cua cuimbae agüiye vaerã ñavãe chupe? Oota ndipo judío reta judío mbae vae reta ipite rupi uñemiai vae pe. Omboeta ndipo judío mbae vae reta. 36 ¿Mbae ra uipota jei, jei yave cuarãi: ‘Cherecata co, ãrei ndarau chevãe. Ndarau peo che aĩta vae pe?’ —jei reta.

### I tecove umee vae

37 Jocua ara fiesta opata ma yave icavi ete opaete ñru fiesta iara güi.

Jayave Jesús uyemboi jare iñeeãta reve jei:

—Ime yave quía iúe vae, tou checoti i tou —jei—. 38 Cheré güirovia vae güi usirita jeta i tecove umee vae. Jucuarãi Tumpa iñee pe uyecuatía oĩ —jei.

<sup>39</sup>Jucuarãi uyemingueta Jesús Espíritu Santo re. Uipota jei umeeta Espíritu Santo güirovia jese vae reta pe. Echa'ã ndei umee Espíritu Santo. Echa'ã Jesús ndei oo ye ara pe.

#### Yati vae reta uyeaca uyupii

<sup>40</sup>Cua uyandu yave, amocue joco pe ñugüinoi vae jei:

—Cua cuimbae jocua Tumpa iñee umimbeu vae etei co.

<sup>41</sup>Ïru vae reta jei:

—Cua cuimbae Cristo, Tumpa ombou vae co.

Ërei amocue vae jei:

—¿Galilea pegua ra Cristo? <sup>42</sup>Echa'ã Tumpa iñee pe uyecuatía oĩ Cristo co jae David iñemoñaá reta pegua jare Belén pegua co. Echa'ã David joco pegua vi co —jei reta.

<sup>43</sup>Jesús jei chupe reta vae jeco pegua, joco pe ñugüinoi vae reta uyeaca uyupii. <sup>44</sup>Jare amocue vae uipota tēi uipisi Jesús, ěrei uipisi'ã quía.

#### Mbaeti etei quía uyemingueta jucuarãi

<sup>45</sup>Jayave uyeyocui vae sacerdote reta itenondegua reta jare fariseo reta ombou vae reta yugüiraa ye jucuarãiño chupe reta. Jayave sacerdote reta itenondegua reta jare fariseo reta jei jembiocui reta pe:

—¿Maera pa peru'ã?

<sup>46</sup>Jembiocui reta jei:

—Echa'ã mbaeti etei quía uyemingueta jocua cuimbae uyemingueta rami.

<sup>47</sup>Jayave fariseo reta jei:

—¿Piyembítavica ma pa pe reta vi? <sup>48</sup>¿Güirovia ma ra jese mburuvicha reta jare fariseo reta? Güirovia'ã penti ave —jei reta—. <sup>49</sup>Ërei cua jeta vae uicuaa'ã mboroyocui pe uyecuatía oĩ vae. Tumpa uiporacata co chupe reta —jei reta.

<sup>50</sup>Jayave penti jae reta ipite pe oĩ vae jei ïru reta pe - jae co Nicodemo jee vae - tenonde yave jae oo opou Jesús pe pïtu yave:

<sup>51</sup>—Mboroyocui pe uyecuatía oĩ vae rupi yandepuere'ã ñaãã ipotave vae ndei yayapisaca jese mbove. Echa'ã yayapisaca jese yave, yaicuaa mbae uyapo vae —jei.

<sup>52</sup>Ïru reta jei chupe:

—¿Nde vi ra Galilea pegua? Ndeeca yave, ndicuaata mbaeti co penti ave Tumpa iñee umimbeu vae Galilea pegua —jei reta.

#### Cuña menda re uyuvanga vae

<sup>53</sup>Jayave opaete vae yugüiraa ye jenta jenta pe.

**8** <sup>1</sup>Ërei Jesús oo ivïtu guasu Olivos jee vae pe. <sup>2</sup>Piareve pe neimbove asi Jesús oo ye Tumpa jo pe. Jayave jeta vae yugüeru jae oĩ vae pe, jare jae uguapi ombocue reta oĩ. <sup>3</sup>Jayave mboroyocui re oporombocue vae reta jare fariseo reta güeru penti cuña. Uipocou reta cuña menda re uyuvanga oĩ yave. Jayave oñono reta joco pe ñugüinoi vae reta ipite pe.

4—Oporomboe vae —jei reta Jesús pe—, cua cuña nduipocou menda re uyuvanga oĩ yave. 5Mboroyocui pe Moisés yandeocui yayuca vaerã cua nunga cuña reta ita pe. ¿Mbae pa ndere nde cua re? —jei reta.

6Cua jei reta uicuaa vaerã mbae ra jeita Jesús. Echa'a uipota umbijeco. Jayave Jesús ipe jare uicuatía mbae ivi re ipoãca pe. 7Jecuaecuae upirandu reta chupe cua re. Jayave Jesús uyemboi jare jei chupe reta: —Mbaeti mbaeyoa güinoi pepite pe vae rani tuyapi ita pe.

8Jayave ipe ye jare uicuatía ye mbae ivi re ipoãca pe. 9Ërei cua uyandu reta yave, ipia umbijeco jeco re jare yugüiraa joco güi penti penti rupi. Tenonde yugüiraa indechi vae reta. Jayave opaete vae yugüiraa. Jaëño Jesús upita joco pe cuña jae jovai uyemboi oi vae ndive. 10Jayave Jesús uyemboi ye umaë jese, jare jei:

—¿Jama pa jocua cuimbae reta, cuña? ¿Mbaeti ma pa quía nembijeco?

11—Mbaeti quía, carai —jei cuña chupe.

Jayave Jesús jei:

—Che numbijeco'a vi. Ecuá, agüiye ye iyapo jocua mbaeyoa —jei.

### Jesús co penti tembipe rami

12Cua jaicue rupi Jesús jei yatí vae reta pe:

—Che co jae penti tembipe rami. Ayu co ivi pegua reta uecha cavi vaerã. Ico che ndive vae ndarau uguata p̄tumimbi pe. Echa'a güinoita tecove ipuere vaerã uecha cavi —jei.

13Jayave fariseo reta jei Jesús pe:

—Nemimbeu oreve vae ndarau ndugüirovia. Echa'ã nde nemiari ndiyee —jei reta.

14—Amimbeu ma peve vae pepuere perovia, yepe t̄i chemiari peve chiyee —jei Jesús—. Echa'a che aicuaa co queti güi ayu jare queti aa vae. Ërei pe reta picuaa'ã queti güi ayu jare queti aa vae. 15Pe reta pepuruã opaete ivi pegua reta upuruã rami. Che aãa'ã quía —jei—. 16Ërei apuruã yave, apuruã añete vae rupi. Echa'ã cheRu chembou. Jare che jare cheRu nupuruã - cheiño'ã co —jei—. 17Peporoyocui pe uyecuatía oĩ cuarãi: 'Mocui jei vae oyovaque yave, peroviata co.' Jucuarãi uyecuatía oĩ —jei—. 18Chemiari peve chiyee jare cheRu chemimbeu peve - jae co chembou —jei.

19Jayave judío reta jei:

—¿Quiape pa oĩ ndeRu?

—Pe reta checuaa'ã jare picuaa'ã cheRu —jei Jesús chupe reta —. Checuaa yave mona, cheRu picuaata t̄i co vi —jei.

20Cua jei Jesús Tumpa jo pe corepoti Tumpa pegua j̄ru reta ñugüinoi vae pe. Echa'ã joco pe oporomboe. Ërei uipisi'ã quía. Echa'ã ndei uvãe uyepisi vaerã.

**Pe reta ndarau pepuere peo che aata vae pe**

<sup>21</sup>Jare Jesús jei ye chupe reta:

—Aata ma cua güi. Pe reta cherecata co, ãrei pemanota pembaeyoa uyembai mbae reve. Pe reta ndarau pepuere peo che aata vae pe —jei.

<sup>22</sup>—¿Uyeyucata ra? —jei judío reta—. Echa'ã jei ma: 'Pe reta ndarau pepuere peo che aata vae pe.'

<sup>23</sup>Jayave Jesús jei:

—Pe reta ivi pegua co, ãrei che ara pegua co. Pe reta ivi pegua co, ãrei che ivi pegua'ã co. <sup>24</sup>Amimbeu ma peve pemanota pembaeyoa uyembai mbae reve. Echa'ã pemanota co pembaeyoa uyembai mbae reve, perovia'ã yave che co jae vae —jei.

<sup>25</sup>Jayave jei reta Jesús pe:

—¿Quía pa co nde?

—Jocua tenonde güive amimbeu ma peve vae —jei Jesús—. <sup>26</sup>Jeta mbaembae re chepuere chemiari peré jare jeta mbae re chepuere puãa. ãrei chembou vae imiari añete vae re, jare amimbeu ivi pegua reta pe chembou vae umimbeu cheve vae —jei.

<sup>27</sup>Jae reta uicuaa'ã Jesús imiari chupe reta Tu ara pe oĩ vae regua.

<sup>28</sup>Jayave Jesús jei:

—Pe reta chereupi ma curusu re yave - che ayeyapo cuimbaerã vae - picuaata che co jae. Ayapo'ã mbae che aipota ayapo rupiño. CheRu umimbeu cheve vae rupiño chemiari —jei—. <sup>29</sup>Jare chembou vae ico che ndive.

Chereya'ã cheiño aico vaerã. Echa'ã jecuaeño ayapo jae uipota vae rupi —jei.

<sup>30</sup>Jare Jesús imiari yave, jeta vae güirovia jese.

**Añete vae peyorata co**

<sup>31</sup>Jayave Jesús jei jocua judío güirovia jese vae reta pe:

—Jecuaeño piyapo yave che jae peve piyapo vaerã vae, picota co cheremimboe retarã añetete vae. <sup>32</sup>Jare picuaata añete vae, jare añete vae peyorata co —jei.

<sup>33</sup>Judío reta jei chupe:

—Abraham iñemoñaeta reta co ore. Mbaeti etei nduyeyocui quía pe.

¿Maera pa ndere nduyeyorata co? —jei reta.

<sup>34</sup>—Añete che jae peve —jei Jesús—, iyoa vae uyeyocui oĩ mbaeyoa pe.

<sup>35</sup>Uyeyocui vae ipuere'ã ico ete tenta pe. ãrei tenta iya tai jecuaeño ico tenta pe —jei—. <sup>36</sup>Che co jae Tumpa Tai. Che poyora yave mbaeyoa güi, añetete piyeyora ma co —jei—. <sup>37</sup>Che aicuaa Abraham iñemoñaeta reta co pe reta. ãrei pipota cheyuca, pipota'ã piyapo che jae peve piyapo vaerã vae ramo —jei—. <sup>38</sup>Chemiari peve cheRu ndive aico yave aecha vae re, jare pe reta piyapo peru umimbeu peve piyapo vaerã vae rupi —jei Jesús.

### Aña guasu co jae peru

<sup>39</sup>—Abraham co jae oreru —jei reta.

—Pe reta Abraham tai reta añetete vae yave mona —jei Jesús—, piyapota tēi co Abraham uyapo vae rami. <sup>40</sup>Ērei añave pipota cheyuca, yepe tēi amimbeu ma peve añete vae. Jae co Tumpa umimbeu cheve vae. Guarāi'ã uyapo Abraham —jei—. <sup>41</sup>Pe reta piyapo peĩ peru iparaviqui —jei Jesús chupe reta.

—Oremiñemoña'ã co aguasa pe oreru reta —jei reta—. Tumpaño co jae oreRu.

<sup>42</sup>Jayave Jesús jei chupe reta:

—Tumpa co jae peRu yave mona, pe reta cherauta tēi co. Echa'ã che ayu Tumpa güi. Che Tumpa pegua co. Che aipota ramoño'ã co ayu. Jae co chembou —jei—. <sup>43</sup>¿Maera pa picuaa'ã amimbeu peve vae? Pipota'ã piyapisaca chiñee re. Jáeramo picuaa'ã —jei Jesús—. <sup>44</sup>Aña guasu co jae peru, jare pe reta pipota piyapo peru uipota vae rupi. Peru jecuaño upuruyuca ico, jare uyapo'ã etei añete vae rupi. Echa'ã añetete vae pegua'ã co. Jae co aña guasu. Jáeramo jecuaño iyapu. Echa'ã jae co iyapu vae jare omboe ivi pegua reta iyapu vaerã —jei—. <sup>45</sup>Ērei pe reta chererovia'ã, añete vae amimbeu peve ramo —jei—. <sup>46</sup>Mbaeti penti yepe pepuere pere cheve: 'Ndeyoa co.' Echa'ã che amimbeu peve añete vae. ¿Maera pa chererovia'ã? —jei—. <sup>47</sup>Tumpa tai reta uyapisaca Tumpa iñee re. Pe reta Tumpa tai reta'ã co. Jáeramo piyapisaca'ã jese —jei.

### Cristo icono mai

<sup>48</sup>Jayave judío reta jei:

—Ndoe ma nde co jae penti Samaria pegua, jare aña oya ma nderé. Añete co cua ndoe vae —jei reta.

<sup>49</sup>—Oya'ã co cheré aña —jei Jesús—. Che aipiu aĩ cheRu, ěrei pe reta chererĩro. <sup>50</sup>Ērei aipota'ã ivi pegua reta chembutuicha vaerã. Ime co quía uipota chembutuichaca vae. Jae upuruãata co —jei Jesús—. <sup>51</sup>Añete che jae peve, uyapo che jae chupe uyapo vaerã vae ndarau umano —jei.

<sup>52</sup>Jayave judío reta jei Jesús pe:

—Añave nduicuaa ma aña oya co nderé. Abraham jare Tumpa iñee aracae umimbeu vae reta umano. Ērei nde ndere: 'Uyapo che jae chupe uyapo vaerã vae ndarau umano.' <sup>53</sup>¿Tuicha ete pa nembraepuere yandetenondegua Abraham imbaepuere güi? Echa'ã Abraham umano. Jae ramiño vi Tumpa iñee aracae umimbeu vae reta umano. ¿Quía pa co nde? ¿Mbae pa ndere ndiyee? —jei reta Jesús pe.

<sup>54</sup>—Ayembutuicha'ã co —jei Jesús—. Echa'ã jucuarāi ayapo yave, jocua nunga yembutuicha mbae'ã co. Ērei cheRu chembutuichaca, jare pe reta pere Tumpa co jae peRu —jei—. <sup>55</sup>Ērei pe reta picuaa'ã Tumpa. Che aicuaa co. Che jae yave: 'Aicuaa'ã', cheaputa tēi co pe reta peapu rami. Ērei aicuaa co, jare ayapo jei cheve ayapo vaerã vae —jei—. <sup>56</sup>Petenondegua Abraham uyerovia cherechata ramo. Cherecha co jare uyerovia —jei.



<sup>57</sup>Jayave judío reta jei chupe:

—Nde ndei nenoí cincuenta año. ¿Quirāi pa ndepuere ndere ndeecha co Abraham? —jei reta.

<sup>58</sup>—Añete che jae peve —jei Jesús—, ndei Abraham ico mbove, che imeño mai aico —jei.

<sup>59</sup>Jayave judío reta omonoo ita reta uyapi vaerā tēi Jesús. Ērei Jesús uasa jae reta ipite rupi oẽ Tumpa jo güi, jare jae reta uecha'ã ma.

### Jesús umbigüera jesa mbae vae

**9** <sup>1</sup>Jare Jesús uasa oo yave, uecha penti cuimbae jesa mbae vae. Cua cuimbae jucuarāi ico ichi güi oa güive. <sup>2</sup>Jayave Jesús jemimboe reta upirandu Jesús pe:

—Oporomböe vae, ¿quía pa iyoa, ichi güi oa yave jesa mbae vaerā? ¿Iyoa pa jae etei? ¿Iyoa pa tu jare ichi? —jei reta.

<sup>3</sup>—Jae imbaeyoa jeco pegua'ã co jare tu jare ichi imbaeyoa jeco pegua'ã co cuarāi oĩ —jei Jesús—. Cuarāi oĩ Tumpa imbaepuere uyecuaa vaerā ucuera yave —jei—. <sup>4</sup>Icavi co ayapo vaerā ara rupi chembou vae iparaviqui. Echa'ã ara rupi ñanoi tembipe. Ērei outa pĩtu, jare pĩtu yave mbaeti quía ipuere uparaviqui —jei—. <sup>5</sup>Cua ivi pe aico rambueve, che co jae penti tembipe rami. Ayu co ivi pegua reta uecha cavi vaerā —jei.

<sup>6</sup>Cua jei ma yave, undivi ivi re jare jocua güi uyapo tuñuu. Jayave oñono tuñuu cuimbae jesa re. <sup>7</sup>Jayave jei chupe:

—Ecuá iyoe nderesa i Siloé pe.

(Cua Siloé uipota jei: “Uyemondo”.) Jayave cuimbae oo oyoe jesa jare ou ye yave, umae ma. <sup>8</sup>Jayave cuimbae jenta iyipi rupigua reta jare ĩru vae reta tenonde uecha uyerure oĩ corepoti re vae jei:

—¿Jae'ã ra cua uguapi uyerure corepoti re vae?

<sup>9</sup>Amocue vae jei:

—Jae co.

Īru vae reta jei:

—Jae'ã co. Ērei jae echa ete vae co.

Ērei cuimbae jei:

—Che co jae.

<sup>10</sup>Jayave jei reta chupe:

—¿Quirāi pa añave ndepuere nemea?

<sup>11</sup>—Jocua cuimbae Jesús jee vae uyapo tuñuu oñono cheresa re —jei cuimbae chupe reta—. Jayave jei cheve: ‘Ecuá Siloé pe iyoe nderesa’ —jei cheve, jei—. Jáeramo aa ayoe cheresa, jare amae ma —jei.

<sup>12</sup>—¿Quiape pa ime oĩ? —jei reta.

—Aicuaa'ã —jei cuimbae chupe reta.

### Fariseo reta upirandu cuimbae ucuera vae pe

<sup>13</sup>Jayave jae reta güiraa fariseo ñugüinoi vae pe cuimbae tenonde yave jesa mbae ico vae. <sup>14</sup>Jare jocua ara mbutuu ara co. Echa'ã jocua ara Jesús uyapo tuñuu umimae vaerã cuimbae. <sup>15</sup>Jayave fariseo reta vi upirandu cuimbae pe quirãi ra ipuere umae.

—Oñono tuñuu cheresa re —jei cuimbae—. Jayave ayoe cheresa, jare amae voi —jei.

<sup>16</sup>Amocue fariseo reta jei:

—Tumpa pegua'ã co cua cuimbae. Echa'ã uyapo mbutuu ara pe mboroyocui pe jei agüiye yayapo vaerã vae.

Ërei ñru fariseo reta jei:

—¿Quirãi ra ipuere cuimbae iyoa vae uyapo cua nunga miacañi?

Jare uyeaca reta uyupii. <sup>17</sup>Jayave jei reta ye cuimbae tenonde yave jesa mbae ico vae pe:

—¿Mbae pa ndere nde jocua nemimae vae re?

—Jae co penti Tumpa ñnee umimbeu vae —jei chupe reta.

<sup>18</sup>Judío reta güirovia'ã cua cuimbae tenonde yave jesa mbae ico vae co. Güirovia'ã vi jaeramo co umae. Jáeramo uenica cuimbae umae ma vae tu jare ichi. <sup>19</sup>Jayave upirandu reta tu jare ichi pe:

—¿Jae pa co cua nderai jesa mbae co oa pere chupe vae? ¿Quirãi pa añave umae?

<sup>20</sup>—Aicuaa jae co cherai jesa mbae oa ichi güi vae —jei chupe reta—. <sup>21</sup>Ërei nduicuaa'ã quirãi ra añave umae. Nduicuaa'ã vi quía ra umimae. Pepirandu chupe. Echa'ã ucuacuaa ma co jae. Jae etei ipuere umimbeu peve —jei.

<sup>22</sup>Jucuarãi jei cuimbae tu jare ichi, uquiye judío reta güi ramo. Echa'ã judío reta jei ma uyupe: “Jocua Jesús co jae Cristo jei vae tuyemombo yandetupao güi.” <sup>23</sup>Jáeramo tu jare ichi jei: “Ucuacuaa ma co jae. Pepirandu chupe.”

<sup>24</sup>Jayave judío reta ueni ye cuimbae tenonde yave jesa mbae ico vae.

—Emimbeu cavi oreve Tumpa jovaque —jei reta chupe—. Echa'ã nduicuaa cua cuimbae iyoa vae co.

<sup>25</sup>—Aicuaa'ã iyoa vae ra jae —jei cuimbae—. Ërei cua co aicuaa: Tenonde yave cheresa mbae aico vae co, añave amae.

<sup>26</sup>Jayave upirandu reta ye chupe:

—¿Mbae pa uyapo ndeve? ¿Quirãi pa nemimae?

<sup>27</sup>—Amimbeu ma peve —jei cuimbae—, ãrei pipota'ã piyapisaca cheré. ¿Maera pa pipota piyandu ye? ¿Pipota pa pe reta vi piyeyapo jemimboe retarã? —jei.

<sup>28</sup>Jayave judío reta uñeengata cuimbae pe.

—Nde co jae jemimboe —jei reta—. Ore co jae Moisés jemimboe reta. <sup>29</sup>Ore nduicuaa Tumpa umingueta co Moisés. Ërei nduicuaa'ã quía pegua ra cua cuimbae —jei reta.

<sup>30</sup>—Cua co penti miacañi —jei cuimbae—. Pe reta picuaa'ã quía pegua ra. Ërei jae chemimae. <sup>31</sup>Yaicuaa Tumpa uyapisaca'ã iyoa vae reta re. Ërei ime yave quía umbiadora Tumpa jare uyapo Tumpa jei vae, Tumpa uyapisaca jese —jei—. <sup>32</sup>Ivi uyeyapo güive mbaeti etei quía ipuere umimae jesa mbae oa ichi güi vae —jei—. <sup>33</sup>Tumpa pegua'ã yave cua cuimbae, ipuereta'ã tēi mbae uyapo —jei.

<sup>34</sup>Jayave judío reta jei chupe:

—Nde ndea ndesi güi ndeyoa reve. Mbaeti mbae re ndepuere oremboe —jei reta.

Jayave omombo reta cuimbae.

### Tumpa coti jesa mbae vae reta

<sup>35</sup>Jare Jesús uicuaa yave judío reta omombo ma cuimbae, oo ueca. Jare oovãiti yave, jei chupe:

—¿Nderovia pa cuimbaerã uyeyapo vae re?

<sup>36</sup>—¿Quía pa co jae, carai? —jei Jesús pe—. Emimbeu cheve, arovia vaerã jese.

<sup>37</sup>—Ndeecha ma —jei Jesús chupe—. Che ayemingueta aĩ nde ndive vae co jae.

<sup>38</sup>—CheYa, arovia ma —jei cuimbae.

Jayave cuimbae uyeatica Jesús jovai jare umbiadora. <sup>39</sup>Jayave Jesús jei: —Ayu ivi pe ambiyao vaerã uyugüi ivi pegua reta. Ayu ipuere mbae umae vae reta umae vaerã, jare ipuere umae vae reta agüiye vaerã umae —jei.

<sup>40</sup>Amocue fariseo reta joco pe ñugüinoi vae uyandu cua, jare upirandu chupe:

—¿Ore vi pa co jae umae mbae vae reta?

<sup>41</sup>—Pema'eã yave, mbaetita tēi teco penoi —jei Jesús—. Ërei pere ma: 'Numae.' Jáeramo teco imeño penoi —jei.

### Jesús umijaanga ovecha-rocai

**10** <sup>1</sup>—Añete che jae peve —jei Jesús—, imonda vae uique'ã onque rupi ovecha-rocai pe. Uique icoti'ã rupi. Echa'ã uipota oñomi güiraa ambie vae iovecha reta —jei—. <sup>2</sup>Ërei ovecha iyandarecoa uique onque rupi —jei—. <sup>3</sup>Jare ovecha iyandarecoa uipota uique yave, onque jãroa uipea chupe. Jare ovecha reta uyandu iyandarecoa iñee. Echa'ã iyandarecoa ueni ovecha reta jee rupi jare güiraa ovecha-rocai güi —jei—. <sup>4</sup>Jare güiraa yave opaete imbae reta ovecha-rocai güi, jae oo tenonde jare ovecha reta yugüiraa jaicue. Echa'ã uicuaa iñee —jei—. <sup>5</sup>Ndarau yugüiraa cuimbae uicuaa mbae vae jaicue. Osita chugüi. Echa'ã uicuaa'ã iñee —jei.

<sup>6</sup>Cua ñee umijaanga vae pe Jesús omboe reta tēi, ërei jae reta uicuaa'ã mbae re ra umijaanga cua jei chupe reta vae.

### Jesús co jae ovecha reta iyandarecoa icavi vae rami

7 Jayave Jesús jei:

—Añete che jae peve, che co jae ovecha-rocai jonque rami. 8 Amocue vae yugüeru ndei ayu mbove. Ērei ovecha reta uyapo'ã jocua reta jei vae. Echa'ã jocua reta imonda vae reta co. Jae reta uipota güiraa ambie vae iovecha reta — jei—. 9 Che co jae onque rami. Che rupi ovecha-rocai pe uique vae uyembiasacata co. Uiqueta jare oëta jare uvãeta mbae jou vaerã —jei Jesús—. 10 Imonda vae ou güiraa vaerã ambie vae iovecha reta. Ou uyuca vaerã ovecha reta. Che ayu ivi pegua reta güinoi vaerã tecove opa mbae vae, jare jocua tecove güinoi yave tuicha uyeroviata —jei—. 11 Che co jae ovecha reta iyandarecoa icavi vae rami. Echa'ã ovecha reta iyandarecoa icavi vae umano ovecha reta uepi vaerã —jei—. 12 Jepi re ovecha reta re uyandareco vae uecha yave yaguapïta ou, ueya ovecha reta jare osi. Echa'ã jae'a co ovecha reta iyandarecoa añetete vae, jare ovecha reta imbae'ã. Jayave yaguapïta ou uipisi amocue ovecha reta, jare ñru ovecha reta opa uñemiai. 13 Jocua cuimbae osi jepi reño uyandareco ovecha reta re ramo. Echa'ã ipiatiti'ã ovecha reta uiporara yave —jei—.

14 Che co jae ovecha reta iyandarecoa icavi vae rami. Aicuaa cheovecha reta jare cheovecha reta checuaa —jei Jesús—. 15 Jucuarãi cheRu checuaa jare che aicuaa cheRu. Jare che amanota ovecha reta aepi vaerã —jei—. 16 Jare ime anoi ñru ovecha reta. Jae reta cua pegua'ã co. Jae reta aruta vi. Jae reta uyapisacata chiñee re. Jayave imeta penti ati jare penti ovecha reta iyandarecoa —jei—.

17 CheRu cherau amanota ramo. Amanota co, cherecove anoi ye vaerã —jei—. 18 Mbaeti quía ipuere uequi chegiüi cherecove. Amanota aipota ramo. Chepuere amee cherecove amano vaerã, jare chepuere anoi ye. Cuarãi cheocui cheRu —jei—.

19 Jesús cua jei ramo, judío reta uyeaca ye uyupii. 20 Jeta jae reta jei:

—Aña oya ma jese. Uicuaa'ã ma mbae jei. ¿Maera pa piyapisaca jese?

21 Ñru vae reta jei:

—Mbaeti quía aña oya jese vae ipuere uyemingueta jucuarãi. Ipuere'ã etei aña umimae jesa mbae vae reta —jei reta.

### Judío reta güiriro Jesús

22 Roi ma Jerusalén pe, jare judío reta uyapo ñugüinoi fiesta imandúa vaerã Tumpa jo uyepü ye yave. 23 Jare Jesús uguata Tumpa jo pe oca Salomón jee vae rupi. 24 Jayave judío reta uyembati Jesús iyipi rupi jare jei: —¿Quirãi yave pa nemimbeu cavita oreve, agüiye vaerã orembopa? Nde co jae Cristo yave, emimbeu cavi oreve —jei reta.

25 —Amimbeu ma peve —jei Jesús—, ěrei perovia'ã chiñee. CheRu chembou cua mbaraviqui ayapo vaerã, jare cua mbaraviqui uicuaaca quía co che —jei—. 26 Amimbeu ma peve pe reta cheovecha'ã co. Jáeramo perovia'ã cheré. 27 Cheovecha reta uyapisaca chiñee re. Aicuaa cheovecha reta, jare jae reta yugüiraa cheraicue rupi —jei—. 28 Jare amee chupe reta

tecove opa mbae vae, jare ndarau etei oo cañitei pe. Mbaeti quía ipuere upĩro chegüi —jei—. <sup>29</sup>CheRu umee ma cheve cua reta, jare cheRu imbaepuere tuicha ete opaete vae imbaepuere güi. Jare mbaeti quía ipuere upĩro cheRu güi —jei—. <sup>30</sup>Che jare cheRu pentiño co —jei.

<sup>31</sup>Jayave judío reta omonoo ye ita reta uyapi vaerã tẽi Jesús. <sup>32</sup>Jayave Jesús jei chupe reta:

—Aechaca ma peve jeta mbaraviqui icavi vae. Cua ayapo cheRu imbaepuere rupi. ¿Mbae nunga mbaraviqui jeco pegua pa pipota cheapi ita pe? —jei.

<sup>33</sup>—Penti mbaraviqui icavi vae jeco pegua'ã —jei judío reta chupe—. Nde ndere icavi mbae vae Tumpa coti. Jocua jeco pegua nduyapita ita pe. Echa'ã nde co jae penti cuimbaeño, ãrei ndere ndiyupe nde co jae Tumpa vae —jei reta.

<sup>34</sup>Jayave Jesús jei chupe reta:

—Mboroyocui penoi vae pe uyecuatía oĩ quirãi Tumpa jei cuarãi: 'Pe reta co jae tumpa reta.' Jucuarãi jei. <sup>35</sup>Echa'ã Tumpa iñee ou chupe reta vae pe, jae etei umbijee tumpa reta. Jare Tumpa iñee pe uyecuatía oĩ vae jecuaeño co añete. <sup>36</sup>Jáeramo ¿maera pa pere cheve: 'Nde ndere icavi mbae vae Tumpa coti', che jae vae jeco pegua? Echa'ã che jae: 'Che co jae Tumpa Tai.' Echa'ã Tumpa cheñono tee cua mbaraviqui ayapo vaerã, jare jae chembou cua ivi pe —jei—. <sup>37</sup>Ayapo'ã yave mona cheRu iparaviqui, agüiyeta tẽi chererovia. <sup>38</sup>Ërei ayapo co cheRu iparaviqui. Jáeramo yepe tẽi chererovia'ã, perovia mbaraviqui ayapo vae cheRu pegua co, picuaa vaerã cheRu ico che ndive jare che aico cheRu ndive —jei.

<sup>39</sup>Jayave judío reta uipota ye tẽi uipisi Jesús, ãrei jae oo chugüi reta.

<sup>40</sup>Jare Jesús oo ye i Jordán jovaicho pe tenonde yave Juan upurumbibautiza oĩ vae pe, jare joco pe upita. <sup>41</sup>Jare jeta vae reta yugüeru jae oĩ vae pe jare jei:

—Juan uyapo'ã penti ave miacañi. Ërei opaete Juan jei cua cuimbae re vae añete co —jei reta.

<sup>42</sup>Jare jeta vae güirovia Jesús re joco pe.

### Lázaro imano

**11** <sup>1</sup>Penti cuimbae Lázaro jee vae imbaerasi oĩ. Jae jare María jare Marta - jae co María tiñe - Betania pegua reta co. <sup>2</sup>Jocua María upiyere mbae ipiche cavi vae yandeYa re jare umitini ipi ía pipe. Jocua Lázaro imbaerasi oĩ vae María iquivi co. <sup>3</sup>Jare Lázaro jindi reta omondo umimbeu vaerã Jesús pe:

—OreYa, imbaerasi oĩ cua ndeau vae.

<sup>4</sup>Jesús cua uicuaa yave, jei:

—Cua imbaerasi ou chupe ñru vae reta umbiadora vaerã Tumpa. Ou'ã jae umano vaerã. Echa'ã che co jae Tumpa Tai, jare ñru vae reta chembiadorata cua mbaerasi jeco pegua —jei.

<sup>5</sup>Jesús uau Marta jare ipiqui jare Lázaro. <sup>6</sup>Ërei uicuaa ma yave Lázaro imbaerasi oĩ, upitaño mocui ara joco pe. <sup>7</sup>Cua jaicue rupi jei jemimboe reta pe:

—Yaa ye ma Judea pe.

8—Oporomboe vae —jei reta—, ndei co ima judío reta uipota tēi ndeapi ita pe joco pe. Jáeramo ¿maera pa ndeo yeta?

9—Ime doce ora güinoi ara —jei Jesús—. Ara rupi uguata vae ndarau ipi güirocua. Echa'ã güinoi tembipe cua ivi pegua —jei—. 10 Ñerei p̄tu yave uguata vae ipi güirocua. Echa'ã güinoi'ã tembipe.

11 Jucuarãi jei Jesús. Jayave jei:

—Ñaneamigo Lázaro oque ma oĩ. Ñerei che aata amomba —jei.

12 Jemimboe reta jei:

—OreYa, oque oĩ yave, ucuera yeta co.

13 Ñerei Jesús jucuarãi jei yave, uipota jei umano ma. Jae reta ipia pe uyemingueta tēi uipota jei uputuño oque oĩ. 14 Jayave Jesús umimbeu cavi chupe reta:

—Lázaro umano ma. 15 Jare ayerovia joco pe aĩ'ã vae re. Cua icavita co peve. Echa'ã peroviata co. Yaa ma icoti —jei.

16 Jayave Tomás - jae co Choguaquiri pe uyembijee vae - jei ĩru Jesús jemimboe reta pe:

—Yaa vi yande, ñamano vaerã jae ndive.

### Jesús co jae tecove umee vae

17 Jare Jesús ou uvãe yave, amocue vae umimbeu chupe irundi ara ma co Lázaro oĩ teögüeriru pe. 18 Betania coiño oĩ Jerusalén güi. Uepiti penti legua seri rupi. 19 Jare jeta judío reta yugüeru ma Marta jare María ipi umbipiäcatu vaerã iquivi amiri re. 20 Jare Marta uicuaa yave Jesús ou co uvãe, oo oovãiti. Ñerei María upita tenta pe. 21 Jayave Marta jei Jesús pe:

—CheYa, nde mona cua pe neĩ yave, umanota'ã tēi chequivi. 22 Jare añave aicuaa ipotave mbae ndiyerure Tumpa pe jese vae Tumpa umeeta co ndeve —jei.

23—Ndequivi icove yeta co ou umanocue vae reta ipite güi —jei Jesús chupe.

24—Aicuaa icove yeta co ou umanocue vae reta ipite güi ara taicuegua vae pe —jei Marta—. Echa'ã jocua ara ĩru vae reta vi icove yeta yugüeru umanocue vae reta ipite güi —jei.

25—Che co amee tecove umanocue vae reta pe jare aru ye ĩru umanocue vae reta ipite güi —jei Jesús—. Cheré güirovia vae, yepe tēi umano oĩ, icove yeta co. 26 Jare opaete icove oĩ vae cheré güirovia vae ndarau etei umano. ¿Nderovia pa cua? —jei.

27—Arovia, cheYa —jei Marta—. Añave arovia nde co jae Cristo. Nde co jae Tumpa Tai. Echa'ã Tumpa ñnee pe uyecuatía oĩ outa co Tumpa Tai ivi pe —jei.

### Jesús uyao

28 Marta cua jei ma yave, oo ueni María - jae co Marta ipiqui. Jayave güiraa ĩru vae reta ipite güi jare jei chupe:

—Oporomboe vae cua pe oĩ jare uipota ndeo vaerã jae oĩ vae pe.

<sup>29</sup>María cua uyandu yave, imambae upña oo Jesús oĩ vae pe. <sup>30</sup>Marta oovãiti vae peño upita Jesús. Echa'ã ndei uique tenta guasu-rai pe. <sup>31</sup>Tenta pe judío uyemingueta ñugüinoi María ndive umbipiacatu vaerã vae reta uecha María imambae upña oo tenta güi. Jayave yugüiraa María jaicue. Echa'ã ipia pe uyemingueta tẽi jae oo teõgüeriru oĩ vae pe uyao vaerã joco pe.

<sup>32</sup>Jayave María oo uvãe Jesús oĩ vae pe. Uecha rupive oo uyeatica jae jovai jare jei:

—CheYa, nde mona cua pe neĩ yave, umanota'ã tẽi chequivi.

<sup>33</sup>Jesús uecha yave María jare judío María ndive yugüeru vae reta uyao ñugüinoi, iañeequi jare tuicha ipiatiti. <sup>34</sup>Jayave upirandu:

—¿Quíape pa piñono?

—Eyu eecha, carai —jei reta chupe.

<sup>35</sup>Jayave Jesús uyao. <sup>36</sup>Jare judío reta jei:

—Mase, uau ete co.

<sup>37</sup>Èrei amocue vae jei:

—¿Ipuere'ã ra uyapo mbae cua cuimbae agüiye vaerã umano tẽi Lázaro? Echa'ã umimae cuimbae jesa mbae vae.

#### Lázaro icove ye

<sup>38</sup>Jesús iañeequi ye. Jayave oo teõgüeriru oĩ vae pe. Jocua teõgüeriru penti itape uyeyoo vae co jare ita tuicha vae oĩ teõgüeriru jonque re. <sup>39</sup>Jayave Jesús jei:

—Pembisiri ita joco güi.

Marta - jae co cuimbae amiri jindi - jei chupe:

—CheYa, ine ma co. Echa'ã irundi ara ma oĩ umano güiye —jei.

<sup>40</sup>Jesús jei chupe:

—Amimbeu ma ndeve nderovia yave ndeechata mbae ayapota ñru vae reta umbiadora vaerã Tumpa.

<sup>41</sup>Jayave umbisiri reta ita teõgüeriru jonque güi. Jayave Jesús umae ara coti jare jei:

—CheRu, amee yasurupai ndeve nde ndiyandu cheve vae re. <sup>42</sup>Aicuaa jecuaeño ndiyandu cheve, èrei jae cuarai cua cheyipi rupi ñugüinoi vae reta jeco pegua, jae reta güirovia vaerã nde co chembou vae —jei.

<sup>43</sup>Jayave iñeeãta.

—Lázaro, eẽ joco güi —jei.

<sup>44</sup>Jare cuimbae amiri oẽ. Ipo jare ipi uyeyocua tarapo pe, jare jova uñenoma nieso pe. Jayave Jesús jei:

—Piyora iyocuaa. Pemaño tuguata —jei.

#### Uyemboemboe reta uyucaca vaerã Jesús

(Mt 26.1-5; Mr 14.1-2; Lc 22.1-2)

<sup>45</sup>Jare jeta judío yugüeru opou María ipi vae reta uecha Jesús uyapo vae jare güirovia jese. <sup>46</sup>Èrei amocue vae yugüiraa fariseo reta pe

umimbeu Jesús uyapo vae. <sup>47</sup>Jayave sacerdote reta itenondegua reta jare fariseo reta umbati opaete mburuvicha reta.

—¿Mbae pa yayapota? —jei reta—. Cua cuimbae jecuaeño uyapo jeta miacañi reta. <sup>48</sup>Ñamaeño yave cuarãi uyapo vaerã, opaete vae reta güiroviata jese. Jayave romano reta yugüeruta umbusururu Tumpa jo jare uyucata opaete ñanerentaigua reta —jei reta.

<sup>49</sup>Ërei penti ipite pe oĩ vae - Caifás jee vae - jae co sacerdote tenondegua jocua año - jei:

—Picuaa'ã etei mbae. <sup>50</sup>Pepia pe piyemingueta cavi'ã. Echa'ã icavita co yandeve penti cuimbae umano vaerã opaete vae reta ipepica pe. Echa'ã jucuarãi'ã yave, aramoi opaete vae reta umanota —jei.

<sup>51</sup>Jare cua umimbeu chupe reta ndei uyeyapo mbove. Umimbeu'ã jaeiño. Echa'ã jae sacerdote tenondegua co jocua año. Umimbeu Jesús umanota opaete judío reta ipepica pe. <sup>52</sup>Umanota umbati vaerã opaete Tumpa tai uñemiai vae reta - umanota'ã judío reta reño. <sup>53</sup>Jáeramo jocua ara güive uyemboemboe quirãi uyucaca vaerã Jesús.

<sup>54</sup>Jáeramo Jesús upita'ã ma Judea pe, agüiye vaerã judío reta uecha. Oo joco güi penti tenta guasu Efraín jee vae pe. Jocua tenta guasu coiño oĩ ñana güi. Jare joco pe Jesús upita jemimboe reta ndive.

<sup>55</sup>Jare coiño ma ou judío reta ifiesta pascua jee vae, jare jeta judío reta yugüiraa Jerusalén pe joco güi ndei pascua iara ou uvãe mbove. Echa'ã uipota uyeyoe Tumpa coti fiesta peguarã. <sup>56</sup>Jayave ueca ñugüinoi Jesús, jare Tumpa jo pe ñugüinoi rambueve jei uyupe:

—¿Mbae pa pepia pe piyemingueta? ¿Ndarau ra ou cua fiesta pe? —jei reta.

<sup>57</sup>Echa'ã sacerdote reta itenondegua reta jare fariseo reta oyocui ma opaete vae cuarãi: “Ime yave quía uicuaa quiape Jesús ime oĩ vae, tumimbeu oreve orepuere nduipisi vaerã.”

### María upiyere mbae ipiche cavi vae Jesús ipi re

(Mt 26.6-13; Mr 14.3-9)

**12** <sup>1</sup>Seis araño ma uata pascua uvãe vaerã. Jayave Jesús oo ye Betania pe. Echa'ã joco pe ico Lázaro tenonde yave umano vae Jesús umbijecove ye güeru umanocue vae reta ipite güi vae. <sup>2</sup>Pitu ma yave Lázaro jenta pegua reta uyapo Jesús jou vaerã. Marta güeru tembú, jare Lázaro uguapi ucaru mesa pe Jesús ndive. <sup>3</sup>Jayave María güeru penti libra mbae ipiche cavi vae nardo jee vae jepi ete vae jare upiyere Jesús ipi re. Jayave umitini ipi ía pipe. Jare opaete o ipiche cavi. <sup>4</sup>Jayave penti Jesús jemimboe Judas Iscariote jee vae - jae co Simón tai - jae co umeeta Jesús jovaicho reta pe vae - jei:

<sup>5</sup>—¿Maera pa umee'ã cua mbae ipiche cavi vae trescientos ara mbaraviqui jepi pegua pe? Echa'ã ipuereta tẽi co umee corepoti iparavete vae reta pe —jei.



<sup>6</sup>Ërei jae ipiatiti'ã iparavete vae reta re. Echa'ã jucuarãi jei imonda ramo. Echa'ã jae güinoi corepoti ñru vae reta umee chupe reta vae jiru, jare jecuaño uequi viari chugüi corepoti iyupeguarã. <sup>7</sup>Jayave Jesús jei: —Emaño jese. Penti ara añeñoticata co. Jocua ara peguarã uñuvatu cua mbae ipiche cavi vae —jei—. <sup>8</sup>Iparavete vae reta yugüirecoñotai co pe reta ndive. Ërei che ndarau aicoño pe reta ndive —jei.

### Uyemingueta reta uyucaca vaerã Lázaro

<sup>9</sup>Jare jeta judío reta uicuaa Jesús joco pe oĩ. Jáeramo yugüeru. Jare yugüeru'ã Jesús joco pe oĩ ramoño. Ërei yugüeru vi umae vaerã Lázaro re. Echa'ã Jesús umbijecove ye Lázaro güeru umanocue vae reta ipite güi. <sup>10</sup>Jayave sacerdote reta itenondegua reta uyemingueta vi quirãi uyucaca vaerã Lázaro. <sup>11</sup>Echa'ã Lázaro jeco pegua jeta judío reta yugüiraa chugüi reta. Echa'ã güirovia ma Jesús re.

### Jesús uique Jerusalén pe (Mt 21.1-11; Mr 11.1-11; Lc 19.28-40)

<sup>12</sup>Piareve pe jeta ete pascua pe yugüeru ma vae uicuaa Jesús outa ma co Jerusalén pe. <sup>13</sup>Jayave uequi reta carandai joqui yugüiraa oovãiti vaerã Jesús. —¡Cavi co! —jei reta—. Tuyembiaadoraca yandeYa jee re ou vae. Tuyembiaadoraca Israel pegua reta juvicha guasu —jei reta.

<sup>14</sup>Jare Jesús uvãe penti mburica tairusu vae, jare opo jese. Echa'ã Tumpa ñnee pe uyecuatía oĩ cuarãi:

<sup>15</sup>Agüiye pequiye, Jerusalén pegua reta.

Mase, co ou ma peruvicha guasu.

Opo ou mburica tairusu vae re. Jucuarãi uyecuatía oĩ.

<sup>16</sup>Jocua ara Jesús jemimboe reta uicuaa cavi'ã cua regua. Ërei Jesús oo ye ma ara pe yave, imandúa reta cua re. Echa'ã jucuarãi Tumpa ñnee pe uyecuatía oĩ jese, jare jucuarãi uyeyapo chupe.

<sup>17</sup>Jare amocue joco pe ñugüinoi vae jei:

—Ore noĩ Jesús ndive, jae umbijecove ye yave Lázaro güeru umanocue vae reta ipite güi jare oyocui oẽ vaerã teögüeriru güi —jei reta.

<sup>18</sup>Jáeramo jeta vae yugüiraa oovãiti Jesús. Echa'ã uicuaa ma uyapo cua miacañi. <sup>19</sup>Jayave fariseo reta jei uyupe:

—Mase, mbaeti mbae yandepuere yayapo. Echa'ã opaete que rupi rupigua reta yugüiraa umae vaerã jese.

### Griego reta ueca Jesús

<sup>20</sup>Jare amocue griego reta yugüeru ma pascua pe ñru vae reta ndive umbiaadora vaerã Tumpa. <sup>21</sup>Jae reta yugüeru Felipe Betsaida pegua pe - jocua Betsaida Galilea pegua co - jare jei chupe:

—Carai, nduipota nduecha Jesús.

<sup>22</sup>Jayave Felipe oo umimbeu Andrés pe. Jayave mocui reve yugüiraa umimbeu Jesús pe. <sup>23</sup>Jayave Jesús jei:

—Ara uvãe ma che ayeyapo cuimbaerã vae ayembiadoraca vaerã.

<sup>24</sup>Añete che jae peve, penti trigo jãicue uñeñoti'ã yave, jaeño upita. Ërei uñeñoti yave, jeta uñemoña —jei—. <sup>25</sup>Uyerau vae ndarau uyembiasaca. Ërei uyerau'ã cua ivi pe vae uyembiasacata co. Güinoita tecove opa mbae vae —jei—. <sup>26</sup>Uyeyocui cheve vae too cherupíe. Cherembiocui oíta che aíta vae pe. Jare cheRu umbutuichacata uyeyocui cheve vae —jei Jesús—.

### Jesús umimbeu umanota co

<sup>27</sup>Tuicha chepiatiti aĩ. Ërei chepuere'ã jae: 'CheRu, cherepi cua ora pe uyeyapota cheve vae güi.' Echa'ã uvãe ma cua ora cua uyeyapo cheve vaerã —jei—. <sup>28</sup>CheRu, iyapo cheve ivi pegua reta nembiadora vaerã —jei.

Jayave ñee uyendu ara güi:

—Ayapo ma mbaembae nde rupi ivi pegua reta chembiadora vaerã, jare cuarã ayapo yeta co.

<sup>29</sup>Jeta joco pe ñugüinoi vae reta uyandu ñee jare jei ara co jiapu. Ìru reta jei:

—Penti ángel ombou ñnee chupe.

<sup>30</sup>Jayave Jesús jei:

—Cua ñee uyendu pereco pegua - chereco pegua'ã co. <sup>31</sup>Uñeãa ma ivi pegua reta, jare jae reta juvicha uyemombota co —jei—. <sup>32</sup>Jare Ìru vae reta chereupi curusu re yave ivi güi, arurucata opaete ivi pegua reta checoti —jei.

<sup>33</sup>Cua jei Jesús uicuaaca vaerã chupe reta quirãita co umano. <sup>34</sup>Jayave jae reta jei Jesús pe:

—Mboroyocui pe uyecuatía oĩ vae umimbeu oreve Cristo imeñoi ico. ¿Mbae pa uipota jei jocua nde ndere vae? Echa'ã nde ndere Ìru vae reta uupita ivi güi cuimbaerã uyeyapo vae. ¿Quía pa co jae cuimbaerã uyeyapo vae? —jei reta.

<sup>35</sup>—Tembipe imeño ico pe reta ndive —jei Jesús—. Ërei ndarau ima upita pe reta ndive. Peguata tembipe ico pe reta ndive rambueve, agüiye vaerã pĩtu peve. Echa'ã pĩtumimbi pe uguata vae uicuaa'ã queti oo —jei—. <sup>36</sup>Tembipe pe reta ndive ico rambueve, perovia tembipe re, pe reta peĩ vaerã tembipe rami —jei chupe reta.

Cua jei ma yave, Jesús oo chugüi reta, jare ipuere'ã ma uvãe chupe.

### Judío reta güirovia'ã

<sup>37</sup>Ërei yepe tẽi Jesús uyapo jeta miacañi reta jae reta jovaque uicuaaca vaerã tẽi chupe reta quía co jae, ãrei jae reta güirovia'ã jese, <sup>38</sup>uyeyapo vaerã Isaías uicuatía vae - Isaías co jae Tumpa ñnee aracae umimbeu vae. Echa'ã Isaías uicuatía cuarã:

“CheYa, ¿quía pa güirovia numimbeu vae?

¿Quía nunga vae pe pa ndicuaaca nembraepuere?”

Jucuarãi uicuatía Isaías aracae. <sup>39</sup>Jáeramo jae reta ipuere'ã güirovia. Echa'ã Isaías uicuatía vi cuarãi:

<sup>40</sup>“Tumpa uyapo reta jesa mbae vae reta rami jare umipiatanta, agüiye vaerã uecha cavi reta, jare agüiye vaerã uicuaa cavi reta, jare agüiye vaerã uyerova icoti.

Echa'ã uyerova yave Tumpa coti, Tumpa umbaita tõi imbaeyoa reta.” Jucuarãi uicuatía Isaías. <sup>41</sup>Isaías cua jei, uecha yave yembutuicha ara pegua. Jáeramo imiari jucuarãi jese.

<sup>42</sup>Ërei amocue mburuvicha reta güirovia Jesús re. Ërei uipota'ã jei jae co Cristo fariseo reta jeco pegua. Echa'ã jucuarãi jei yave, fariseo reta omombota tõi co judío reta itupao güi. <sup>43</sup>Echa'ã jae reta uipota ete japicha reta pe uyembutuichaca vaerã Tumpa umbutuichaca vaerã tõi güi.

### Jesús ñnee reta uãata ivi pegua reta

<sup>44</sup>Jayave Jesús ñneeãta reve jei:

—Cheré güirovia vae chereño'ã güirovia. Güirovia chembou vae re —jei—.

<sup>45</sup>Cherecha vae uecha vi chembou vae —jei—. <sup>46</sup>Ayu ivi pe amee vaerã tembipe ivi pegua reta pe, agüiye vaerã cheré güirovia vae upita pítumimbi pe —jei—.

<sup>47</sup>Chínee re uyapisaca vae uyapo'ã yave che jae vae rupi, che aãa'ã. Echa'ã che ayu ambiasa vaerã ivi pegua reta. Ayu'ã aãa vaerã —jei Jesús—. <sup>48</sup>Jocua güirovia'ã cheré jare uyapo'ã che jae chupe uyapo vaerã vae uñeãata co. Echa'ã ara taicuegua vae pe cua che jae vae uãata —jei chupe reta—. <sup>49</sup>Echa'ã cheporomboe chembaeño'ã co. Cheru chembou, jare jae cheocui mbae jae vaerã, jare quirã chemiari vaerã —jei—. <sup>50</sup>Jare aicuaa cheRu cheocui vae tecove opa mbae vae pegua co. Jáeramo che jae peve cheRu jei cheve vae —jei.

### Jesús oyoe jemimboe reta ipi

**13** <sup>1</sup>Uyaro ma pascua iara. Jare Jesús uicuaa ara uvãe ma ueya vaerã cua ivi oo ye vaerã Tu pe. Imeño uau imbae cua ivi pe ñugüinoi vae reta, jare añave uicuaacata quirãi uau ete. <sup>2-4</sup>Judas Iscariote - jae co Simón tai - ipia pe uyemingueta ma umee vaerã Jesús jovaicho reta pe. Echa'ã jucuarãi uipota aña guasu Judas ipia pe uyemingueta vaerã. Jare Jesús uicuaa cavi ma Tu oñono opaete mbaembae ipo pe. Uicuaa vi ou co Tumpa güi jare oo yeta co Tumpa pe. Jare pïtu yave Jesús jare jemimboe reta ucaru ñugüinoi yave, Jesús upïa mesa güi, omboi iyasoya iarambogua, jare oñoma icúa penti toalla pe. <sup>5</sup>Jayave oñono i penti ia pe jare umbipi oyoe jemimboe reta ipi, jare oyoe ma yave, umitini toalla icúa re oï vae pipe. <sup>6</sup>Jare oo uvãe yave Simón Pedro oï vae pe, Pedro jei chupe: —CheYa, ¿nequirëi pa ndiyoe chepi?

<sup>7</sup>—Cua ayapo aï vae ndicuaa cavi'ã añave —jei Jesús—, ërei ndicuaa cavita co taicue rupi.

<sup>8</sup>—Ndarau etei ndiyoe chepi —jei Pedro.

—Jucuarãi yave, nde cheĩru'ã co —jei Jesús chupe.

<sup>9</sup>Jayave Simón Pedro jei:

—CheYa, iyoe chepo jare cheãca vi - agüiye iyoe chepiño.

<sup>10</sup>—Uyau ma vae uyau yeta'ã ma —jei Jesús—. Ipiño ma oyoeta. Echa'ã opaete jete iquia mbae ma. Jare pe reta pequia mbae ma. Ërei opaete'ã co pe reta —jei.

<sup>11</sup>Echa'ã Jesús uicuaa quía umeeta jovaicho reta pe. Jáeramo jei: “Ërei opaete'ã co pe reta.”

<sup>12</sup>Jayave opa yave ipi reta oyoe, uyemonde ye Jesús jare oo uguapi jenda pe. Jayave upirandu chupe reta:

—¿Picuaa cavi pa ayapo ma peve vae? <sup>13</sup>Pe reta pere cheve: ‘Oporombœ vae’, jare pere vi: ‘OreYa.’ Añete co cua pere vae. Echa'ã aporombœ jare che co jae peYa —jei chupe reta—. <sup>14</sup>Ërei yepe tẽi che pomboe jare che co jae peYa, Ërei ayoe ma pepi reta. Jáeramo icavi co pe reta piyoe vaerã pepi piyugüi —jei—. <sup>15</sup>Echa'ã che cua ayapo aicuaaca vaerã peve, pe reta vi piyapo vaerã che ayapo peve vae rami —jei—. <sup>16</sup>Añete che jae peve, penti uyeyocui vae imbaepuere tuicha'a ete ipatrón imbaepuere rami. Jae ramiño vi penti temimondo imbaepuere tuicha'ã ete omondo vae imbaepuere rami —jei—. <sup>17</sup>Cua picuaa cavi. Piyapo yave, Tumpa uyapota icavi vae peve —jei Jesús chupe reta—.

<sup>18</sup>Opaete pe reta re'ã ayemingueta aĩ. Che aicuaa quía aiparavo vae reta. Ërei Tumpa iñee pe uyecuatía oĩ vae uyeyapota co. Echa'ã uyecuatía oĩ cuarãi: ‘Jocua ucaru che ndive vae chemeeta.’ Jucuarãi uyecuatía oĩ —jei—. <sup>19</sup>Cua amimbeu peve añave ndei uyeyapo mbove, cua uyeyapo yave perovia vaerã quía co che —jei. <sup>20</sup>Añete che jae peve, cheremimondo pe uyapo icavi vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei.

### Jesús umimbeu Judas umeeta

(Mt 26.20-25; Mr 14.17-21; Lc 22.21-23)

<sup>21</sup>Cua jei ma yave, Jesús tuicha ipiatiti jare jei:

—Añete che jae peve, penti pepite pe oĩ vae chemeeta cherovaicho reta pe.

<sup>22</sup>Jayave Jesús jemimboe reta umae iyee reta. Uicuaa'ã quía re ra uyemingueta. <sup>23</sup>Penti jemimboe - jae co Jesús uau vae - ucaru oĩ Jesús iyipi pe. <sup>24</sup>Jayave Simón Pedro omomi iñãca jocua ĩru temimboe uecha vaerã, jare jae upirandu vaerã Jesús pe quía regua ra uyemingueta.

<sup>25</sup>Jayave jocua temimboe Jesús iyipi pe ucaru oĩ vae upirandu Jesús pe: —¿Quía pa co jae, cheYa?

<sup>26</sup>—Ameeta chupe mbiyape —jei Jesús—, tembú pe amãqui ma yave. Jocua co jae —jei.

Jayave tembú pe umãqui ma yave, uequi umee Judas Iscariote pe - jae co Simón tai. <sup>27</sup>Jayave Judas jou ma yave, Satanás oya jese. Jayave Jesús jei Judas pe:

—Iyapo voi jocua ndiyapota vae.

<sup>28</sup>Ĕrei mbaeti quía mesa pe oĩ vae uicuaa maera Jesús jei jucuarãi Judas pe. <sup>29</sup>Amocue vae ipia pe uyemingueta tẽi Jesús jei chupe vae uipota jei: “Ecuá egua yaipota fiesta peguarã vae”, ani: “Ecuá emee mbae iparavete vae reta pe.” Echa'ã Judas güinoi corepoti jiru. <sup>30</sup>Jayave opa yave jou mbiyape, Judas oẽ oo. Jare pĩtu ma co.

### Mboroyocui ipiau vae

<sup>31</sup>Jayave oẽ ma yave Judas, Jesús jei:

—Che ayeyapo cuimbaerã. Añave ivi pegua reta chembiadorata. Jare umbiadorata vi Tumpa chereco pegua —jei—. <sup>32</sup>Ivi pegua reta umbiadorata Tumpa chereco pegua. Jáeramo Tumpa etei chembiadoracata ivi pegua reta pe. Añave voi chembiadoracata —jei—. <sup>33</sup>Cherivi reta, michi peguaño ma apitata pe reta ndive. Jayave chereca tẽita, ĩrei pe reta ndarau pepuere peo che aata vae pe. Echa'ã cuarãi amimbeu judío reta pe, jare añave amimbeu vi peve —jei—. <sup>34</sup>Ameë peve penti mboroyocui ipiau vae. Piyerau. Piyerau che puau rami —jei Jesús chupe reta—. <sup>35</sup>Piyerau yave, opaete ivi pegua reta uicuaata pe reta cheremimboe reta co —jei.

### Jesús umimbeu Pedro uicuacuta co

(Mt 26.30-35; Mr 14.26-31; Lc 22.31-34)

<sup>36</sup>Simón Pedro jei Jesús pe:

—CheYa, ¿queti pa ndeota?

—Ndarau añave ndepuere ndeo che aata vae pe —jei Jesús—. Ĕrei taicue rupi ndeota co —jei.

<sup>37</sup>Pedro jei:

—CheYa, ¿maera pa chepuere'ã aa nde ndive añave? Che tamano ndepepica pe —jei.

<sup>38</sup>—Nde ndere nemanota chepepica pe —jei Jesús—. Añete che jae ndeve, ndei uru cuimbae uñee mbove, mbapi vese ma checuacuta —jei—.

### Jesús co jae tape Tumpa pe oo vae

**14** <sup>1</sup>Agüiye pepiatiti. Perovia Tumpa re. Perovia vi cheré —jei—. <sup>2</sup>CheRu jenta pe ime jeta o. Jucuarãi'ã yave, amimbeuta tẽi co peve. Aata ayapicatu perendarã —jei Jesús chupe reta—. <sup>3</sup>Jare aa ma yave ayapicatu perendarã, ayu yeta puraa vaerã, pe reta vi pico vaerã che aicota vae pe —jei—. <sup>4</sup>Jare pe reta picuaa tape que rupi aata —jei.

<sup>5</sup>Jayave Tomás jei:

—OreYa, ore nduicuaa'ã queti ndeota vae. ¿Quirãita ra nduicuaa tape?

<sup>6</sup>—Che co jae tape —jei Jesús—. Che co jae añetete uyemingueta vae. Che co jae tecove opa mbae vae umee vae. Mbaeti quía ipuere uñemiiru cheRu ndive jaeño che rupi —jei—. <sup>7</sup>Checuaa cavi yave mona, picuaata tẽi co cheRu vi. Ĕrei añave güive picuaa co. Echa'ã peeche ma —jei.

<sup>8</sup>Felipe jei chupe:

—OreYa, eechaca oreve ndeRu. Jocuano nduipota.

<sup>9</sup>—Ima ma aico pe reta ndive, Felipe —jei Jesús—. ¿Ndei pa co checuua cavi? Cherecha vae uecha ma co cheRu. ¿Maera pa ndere: ‘Eechaca oreve ndeRu?’ —jei—. <sup>10</sup>¿Perovia'ã pa che aico cheRu ndive jare cheRu ico che ndive vae? Ñee amimbeu peve vae chembaeño'ã co. Echa'ã cheRu ico che ndive, jare jae uyapo mbaraviqui reta —jei Jesús—. <sup>11</sup>Perovia cua che jae peve vae: Che aico cheRu ndive, jare cheRu ico che ndive. Cua perovia'ã yave, chererovia mbaraviqui ayapo vae reta jeco pegua —jei—. <sup>12</sup>Añete che jae peve, cheré güirovia vae uyapota mbaraviqui reta che ayapo ma vae reta rami. Jare iparaviqui reta tuicha eteta cheparaviqui reta güi, che aata cheRu pe ramo —jei—. <sup>13</sup>Pepuereta piyerure ipotave mbae re cheree re, jare che ayapota peve, cheRu uyembadoraca vaerã che ayapota vae rupi —jei—. <sup>14</sup>Piyerure yave ipotave mbae re cheree re, ayapota co peve —jei Jesús chupe reta—.

### Espíritu Santo outa

<sup>15</sup>Cherau yave, piyapo cheporoyocui reta —jei—. <sup>16</sup>Jare che ayerureta cheRu pe jae ombou vaerã peve ñru vae. Jae jecuaeño icota pe reta ndive pembiñacatu vaerã. Jae co Espíritu Santo —jei—. <sup>17</sup>Jae imiarita añete vae re. Upurugüirovia mbae vae reta ndarau ipuere umbiresive Espíritu Santo. Echa'ã upurugüirovia mbae vae reta uecha'ã jare uicuaa'ã. Ërei pe reta picuaa. Echa'ã jae ico pe reta ndive jare icota pepia pe —jei—. <sup>18</sup>Che aa ma yave, ndarau pueya jentarã mbae vae reta rami. Echa'ã che ayu yeta co —jei—. <sup>19</sup>Michi peguaño ma ivi pegua reta cherechata. Ndarau ma cherecha ye. Ërei pe reta cherecha yeta. Che jecuaeño aico ramo, pe reta picota vi —jei chupe reta—. <sup>20</sup>Jocua ara picuaata co che aico cheRu ndive, jare pe reta pico che ndive vae, jare che aico pepia pe —jei—. <sup>21</sup>Ime yave quía uyapisaca cheporoyocui reta re uyapo vaerã vae, jae co cherau. Jare cheRu uauta cherau vae, jare che aauta, jare aicuaacata chupe quía co che —jei.

<sup>22</sup>Jayave Judas - jae'ã co Judas Iscariote - jei chupe:

—OreYa, ¿quirãita pa ndicuaaca oreve quía co nde, ndicuaaca'ã yave upurugüirovia mbae vae reta pe?

<sup>23</sup>—Cherau vae uyapota che jae chupe uyapo vaerã vae —jei Jesús—. Jare cheRu uauta. Jare ndoyuta nduico vaerã jae ndive —jei—. <sup>24</sup>Cherau'ã vae uyapo'ã che jae chupe uyapo vaerã vae. Jare chiñee piyandu vae chembaeño'ã co. Echa'ã cua ñee cheRu ñee co. Jae co chembou —jei—. <sup>25</sup>Cua mbaembae re chemiari ma peve, aico pe ndive rambueve. <sup>26</sup>Ërei jocua pembiñacatuta vae pemboeta opaete mbae re. CheRu ombouta peve cheree re. Jae co Espíritu Santo. Jae pemimanduata opaete che jae peve vae re —jei—. <sup>27</sup>Mbiñacatu aeya pe ndive. Mbiñacatu che anoi vae amee peve. Ivi pegua reta ipuere'ã umee peve che amee peve vae nunga mbiñacatu. Agüiye

pepiatiti. Agüiye pequiye —jei—. <sup>28</sup>Piyandu ma quirāi che jae: ‘Aata ma jare ayu yeta peve.’ Cherau yave mona, piyeroviata tēi. Echa'ā aata cheRu pe, jare cheRu imbaepuere tuicha ete chembaepuere güi —jei—. <sup>29</sup>Amimbeu ma peve ndei uyeyapo mbove, perovia vaerā uyeyapo yave —jei—. <sup>30</sup>Ndarau ma ima chemiari peve. Echa'ā ivi pegua reta juvicha imambae outa uvāe cheve. Ërei ndarau ipuere cheré —jei—. <sup>31</sup>Ërei ayapota cheRu iporoyocui, ivi pegua reta uicuaa vaerā che aau cheRu. Pepūa, yaa ma cua güi —jei chupe reta—.

### Jesús co jae uva iyipi añetete vae rami

**15** <sup>1</sup>Che co jae uva iyipi añetete vae rami, jare cheRu co jae uva iyipi iyandarecoa rami —jei—. <sup>2</sup>Opaete jāca ía mbae vae reta cheRu uyasiata. Jare opaete jāca ía vae reta jae uitiota, jeta ía vaerā —jei—. <sup>3</sup>Pe reta piyeyoeca ma ñee amimbeu peve vae pe —jei—. <sup>4</sup>Pico cheré perovia reve, jare che aicota pepia pe. Penti jāca uyeasia yave uva iyipi güi, ndarau ipuere ía. Echa'ā jāca jaeño ipuere'ā ía. Jae ramiño vi pe reta pico'ā yave cheré perovia reve, ndarau pepuere piyapo icavi vae Tumpa peguarā —jei—. <sup>5</sup>Che co jae uva iyipi rami, jare pe reta co jae jāca reta rami. Jocua ico cheré güirovia reve vae uyapota jeta icavi vae Tumpa peguarā. Echa'ā che aico ipia pe. Ërei che aico'ā yave pepia pe, pepuereta'ā mbae piyapo Tumpa peguarā —jei—. <sup>6</sup>Jocua ico'ā cheré güirovia reve vae uyemombota penti jāca uyeasia vae uyemombo yipi vaerā vae rami. Jare jāca yipi vae reta uyembatica jare uyemondoca tata pe ocai vaerā —jei—. <sup>7</sup>Pico yave cheré perovia reve, jare piyapo yave che jae peve piyapo vaerā vae, pepuereta piyerure pipota vae re jare penoita co —jei—. <sup>8</sup>Piyapo yave jeta icavi vae cheRu peguarā, ivi pegua reta umbiadorata cheRu. Jare cuarāi picuaacata pe reta co cheremimboe reta —jei—. <sup>9</sup>CheRu cherau. Jae ramiño vi che puau. Jecuaeño piyeyocui cheve, che puau ramo —jei—. <sup>10</sup>Piyapo yave cheporoyocui reta, che jecuaeño puauta. Echa'ā cuarāi che ayapo cheRu iporoyocui reta, jare jecuaeño jae cherau —jei Jesús chupe reta—. <sup>11</sup>Cuarāi chemiari ma peve piyerovia vaerā che ayerovia rami. Cuarāi ayapo tuicha ete piyerovia vaerā —jei—. <sup>12</sup>Cua co jae cheporoyocui: Piyerau che puau rami. <sup>13</sup>Ime yave quía iquirēi umano uepi vaerā iamigo reta vae, ipuruau tuicha ete co ñru mburuau güi —jei—. <sup>14</sup>Pe reta co jae cheamigo reta, piyapo yave che jae peve piyapo vaerā vae —jei—. <sup>15</sup>Che jae'ā ma peve pe reta co cherembiocui reta. Echa'ā uyeyocui vae uicuaa'ā mbae ra uyapo ipatrón. Ërei che jae ma peve pe reta co jae cheamigo reta. Echa'ā opaete cheRu umimbeu cheve vae aicuaaca ma co peve —jei chupe reta—. <sup>16</sup>Pe reta cheparavo'ā. Che co puparavo. Jare amee ma peve mbaepuere peo vaerā piyapo icavi vae Tumpa peguarā, jare jecuae jucuarāi piyapo vaerā. Cua ayapo cheRu umee vaerā peve ipotave piyerureta chupe jese cheree re vae —jei—. <sup>17</sup>Cua co poyocui: Piyerau —jei—.

### Upurugüirovia mbae vae reta umitarëi Jesús jare imbae reta

<sup>18</sup>Piñemitarëica upurugüirovia mbae vae reta pe yave, pemandúa quirãi jae reta che rani co chemitarëi —jei—. <sup>19</sup>Pico yave mona upurugüirovia mbae vae reta yugüireco rami, upurugüirovia mbae vae reta perauta tõi. Ërei che puparavo ma upurugüirovia mbae vae reta ipite güi. Jáeramo pico'ã ma upurugüirovia mbae vae reta yugüireco rami. Jáeramo piñemitarëica upurugüirovia mbae vae reta pe —jei—. <sup>20</sup>Pemandúa cua che jae peve vae re: 'Penti uyeyocui vae imbaepuere tuicha'ã ete ipatrón imbaepuere rami.' Echa'ã upurugüirovia mbae vae reta uyapo yave icavi mbae vae cheve, uyapota vi icavi mbae vae peve. Uyapo reta yave che jae chupe uyapo vaerã vae, uyapota vi pe reta pere chupe uyapo vaerã vae —jei—. <sup>21</sup>Ërei upurugüirovia mbae vae reta uyapota peve opaete cua mbaembae cheré perovia ramo. Echa'ã jae reta uicuaa'ã chembou vae —jei—.

<sup>22</sup>Ayu'ã yave mona chemiari vaerã chupe reta, ndarau tõi teco güinoi. Ërei añave opaete vae ipuere uicuaa jae reta co teco güinoi —jei—. <sup>23</sup>Chemitarëi vae umitarëi vi cheRu —jei—. <sup>24</sup>Ayapo'ã yave mona ipite pe mbaraviqui mbaeti quía ye uyapo vae reta, ndarau tõi teco güinoi. Ërei jae reta cherecha ma - jae co cheRu uecha rami - jare oremitarëi —jei—. <sup>25</sup>Cua uyapo reta uyeyapo vaerã mboroyocui pe uyecuatía oĩ vae. Echa'ã uyecuatía oĩ cuarãi: 'Jae reta chemitarëi mbaeti mbae icavi mbae vae ayapo chupe reta reve.' Jucuarãi uyecuatía oĩ —jei—. <sup>26</sup>Ërei ambouta peve cheRu ico vae güi pembipiãcatuta vae - jae co Espíritu Santo añete vae re imiarita vae. Jae ou yave, chemimbeuta co —jei—. <sup>27</sup>Jare pe reta vi chemimbeuta. Echa'ã tenonde güive pico che ndive —jei—.

**16** <sup>1</sup>Opaete cua che jae ma peve agüiye vaerã piyero va Tumpa güi —jei—. <sup>2</sup>Piyemombocata co judío reta itupao reta güi. Añete co, outa ma ara piyeyucaca vaerã. Jare jocua reta peyucata vae ipia pe uyemingueta tẽita uyeyocui co oĩ Tumpa pe —jei—. <sup>3</sup>Jae reta uicuaa'ã cheRu jare checuaa'ã vi. Jáeramo jucuarãi uyapota —jei chupe reta—. <sup>4</sup>Ërei cua che jae ma peve, pemandúa vaerã cuarãi amimbeu peve vae re jucuarãi uyapo reta yave —jei—.

### Espíritu Santo uyapo vae

Amimbeu'ã peve cua tenonde güive. Echa'ã che aico pe ndive. <sup>5</sup>Ërei aata chembou vae pe. Jare penti ave añave pepirandu'ã cheve: '¿Queti pa ndeota?' —jei—. <sup>6</sup>Ërei cua che jae peve vae jeco pegua pepiatiti. <sup>7</sup>Ërei amimbeu peve añete vae. Icavita co peve che aa vaerã. Echa'ã che aa'ã yave, ndarau ou peve pembipiãcatuta vae. Ërei aa yave, ambouta peve. <sup>8-11</sup>Jare jae ou yave, uicuaacata ivi pegua reta pe jae reta uyapo co mbaeyoa. Echa'ã güirovia'ã cheré. Uicuaacata jupi vae. Echa'ã aata cheRu oĩ vae pe jare pe reta ndarau ye ma cherecha. Uicuaacata Tumpa uãata ivi pegua reta. Echa'ã uãa ma ivi pegua reta juvicha —jei—.



<sup>12</sup>Ime jeta aipota tẽi jae peve vae, ãrei ndeiño pepuere picuaa cavi —jei—. <sup>13</sup>Ërei Espírítu Santo añete vae re imiarita vae ou ma yave, umimbeuta peve añete vae. Echa'a ñee umimbeuta peve vae ndarau imbaeño. Imiarita Tumpa umimbeu chupe vae re, jare umimbeuta peve uyeyapota vae —jei—. <sup>14</sup>Jae chembiadoracata co. Echa'a jae pemboeta che pomboe rami —jei Jesús chupe reta—. <sup>15</sup>Opaete cheRu imbae chembae vi co. Jáeramo che jae cuarãi: 'Jae pemboeta che pomboe rami' —jei—.

### Ipiatiti vae uyeroviata co

<sup>16</sup>Michi peguaño ma pe reta cherechata. Ërei imambae cherecha yeta. Echa'a aata cheRu pe —jei chupe reta.

<sup>17</sup>Amocue jemimboe reta jei uyupe:

—¿Mbae pa uipota jei cua jei yandevae vae? Echa'a jei: 'Michi peguaño ma pe reta cherechata. Ërei imambae cherecha yeta.' Jare jei vi: 'Echa'a aata cheRu pe.' <sup>18</sup>¿Mbae pa uipota jei: 'Michi peguaño ma'? Yaicuaa'a mbae ra uipota jei —jei reta.

<sup>19</sup>Jesús uicuaa jae reta uipota tẽi upirandu chupe cua re. Jáeramo jei chupe reta:

—Che jae peve cuarãi: 'Michi peguaño ma pe reta cherechata. Ërei imambae cherecha yeta.' Jare pepirandu peĩ piyupe mbae ra uipota jei cua che jae peve vae —jei—. <sup>20</sup>Añete che jae peve, piyaota jare pepiatitita, ãrei upurugiïrovia mbae vae reta uyeroviata. Pepiatitita co, ãrei jaicue rupi piyeroviata co —jei—. <sup>21</sup>Penti cuña imembi oata ma oĩ yave, cuña ipiatiti jasi chupe ramo. Ërei imembi oa ma yave, imandua'a ma jasi chupe vae re. Echa'a uyerovia imembi oa ma ramo —jei—. <sup>22</sup>Jae ramiño vi pe reta pepiatiti añave, ãrei puecha yeta, jare piyeroviata, jare ndarau quía ipuere pembipiatiti ye —jei—.

<sup>23</sup>Jocua ara ndarau pepirandu cheve mbae re. Añete che jae peve, ipotave piyureta cheRu pe jese vae cheRu umeeta peve cheree re —jei—. <sup>24</sup>Ndeiño peeca mbae cheree re. Piyure Tumpa pe mbaembae re, jare cheRu umeeta co peve tuicha ete piyerovia vaerã —jei—.

### Che chepuere ete ivi pegua reta güi

<sup>25</sup>Cua amimbeu ma peve amijaanga reve. Ërei outa ma ara reta amimbeu cavi vaerã peve cheRu regua. Ndarau ye ma amimbeu peve amijaanga reve —jei—. <sup>26</sup>Jocua ara reta pe piyureta mbaembae re cheree re. Jare che jae'a peve ayerureta cheRu pe jae uyapo vaerã piyure jese vae —jei—. <sup>27</sup>Echa'a cheRu etei perau, pe reta cherau jare perovia che ayu cheRu güi ramo —jei—. <sup>28</sup>Ayu co cheRu güi cua ivi pe. Aa yeta ma cua ivi güi cheRu pe —jei chupe reta.

<sup>29</sup>Jesús jemimboe reta jei chupe:

—Añave nemimbeu cavi ma oreve nemijaanga mbae reve. <sup>30</sup>Añave nduicuaa nde nducuaa co opaete vae, jare ndeeca'ã quía umimbeu vaerã ndeve mbae re. Cua jeco pegua ndugüirovia nde ndeyu co Tumpa güi —jei reta.

<sup>31</sup>Jesús jei chupe reta:

—Pe reta pere perovia ma. <sup>32</sup>Ërei outa ma ara - ou ma co - pe reta piñemiai vaerã. Chereyata jare penti penti peota perenta pe. Cheño apitata. Ërei ndarau cheño aico. Echa'ã cheRu ico che ndive —jei—. <sup>33</sup>Cua che jae ma peve pepiacatu vaerã cheré perovia ramo. Cua ivi pe pico rambueve, piporarata co. Ërei agüiye pepiatiti. Echa'ã che chepuere ete ivi pegua reta güi —jei.

### Jesús uyerure Tumpa pe jemimboe reta re

**17** <sup>1</sup>Cua jei ma yave, Jesús umae ara coti jare jei:

—CheRu, ara uvãe ma. Che co jae ndeRai. Chembidoraca, chepuere vaerã numbiadoraca vi —jei—. <sup>2</sup>Echa'ã nde cheapo ma opaete vae iYarã, amee vaerã tecove opa mbae vae opaete nde neme cheve vae reta pe —jei—. <sup>3</sup>Ime yave quía yandecuaa vae, jae güinoi tecove opa mbae vae. Nde co jae pentiño Tumpa añetete vae. Che co jae Jesucristo. Nde chembou —jei—.

<sup>4</sup>Che numbiadoraca cua ivi pe. Echa'ã opa ma ayapo mbaraviqui nde neme cheve ayapo vaerã vae —jei—. <sup>5</sup>Ndei ivi uyeyapo mbove aico nde ndive yave ayembidoraca co. Jae ramiño vi añave chembidoraca ye nderovai —jei—. <sup>6</sup>Nde neme ma cheve cua cuimbae reta upurugüirovia mbae vae reta ipite güi. Che amimbeu ma nderegua cua reta pe. Jae reta nembae co jare nde neme ma cheve. Jae reta uyapo nde ndere chupe reta uyapo vaerã vae —jei—. <sup>7</sup>Jae reta uicuaa opaete nde neme cheve vae ou co ndegüi. <sup>8</sup>Echa'ã che amee ma chupe reta ñee nde neme cheve vae, jare jae reta güirovia niñee. Uicuaa cavi che ayu co ndegüi. Güirovia ma nde co chembou —jei—.

<sup>9</sup>Ayerure ndeve jese reta. Ayerure'ã upurugüirovia mbae vae reta re. Ayerure ndeve nde neme cheve vae reta re. Echa'ã jae reta nembae co —jei—. <sup>10</sup>Opaete chembae nembae co, jare nembae chembae co. Jare che ayembidoraca ma jae reta jeco pegua —jei—. <sup>11</sup>Jare ndarau ma aico cua ivi pe. Ërei jae reta upitañota cua ivi pe. Che aata ma ndepi. CheRu, nde co jae jupi vae. Cua reta neme ma cheve. Embori nembraepuere pe, agüiye vaerã uyerova ndegüi, jare yugüireco vaerã penti ramiño. Echa'ã jucuarãi yande yaico penti ramiño —jei—. <sup>12</sup>Che aico jae reta ndive rambueve, che ambori nembraepuere pe cua neme cheve vae reta, agüiye vaerã uyerova ndegüi. Pentiño oota cañitei pe, niñee pe uyecuatía oĩ vae uyeyapo vaerã. Ërei ambori ñru reta, agüiye vaerã yugüiraa cañitei pe —jei—.

<sup>13</sup>Ërei aata ma ndepi. Cuarã chemiari chupe reta ivi pe aico rambueve, jae reta uyerovia ete vaerã che ayerovia rami —jei—. <sup>14</sup>Ame ma chupe reta niñee, jare uñemitarëica upurugüirovia mbae vae reta pe. Che aico'ã

upurugüirovia mbae vae reta yugüireco rami. Jae ramiño vi jae reta yugüireco'ã upurugüirovia mbae vae reta yugüireco rami —jei—. <sup>15</sup>Ayerure'ã ndeve nde nderaa vaerã cua ivi güi. Ayerure ndeve nemborí vaerã, agüiye vaerã icavi mbae vae iya uniamiri —jei—. <sup>16</sup>Che aico'ã upurugüirovia mbae vae reta yugüireco rami. Jae ramiño vi jae reta yugüireco'ã upurugüirovia mbae vae reta yugüireco rami. <sup>17</sup>Iñono tee reta ndiyupeguarã añete vae rupi. Niñee co jae añete vae —jei Jesús—. <sup>18</sup>Nde chembou ivi pe. Jae ramiño vi che amondo cua reta opaete ivi rupi —jei—. <sup>19</sup>Cua reta jeco pegua añeñono tee ma ndeve peguarã, jae reta vi uñeñono tee vaerã ndeve peguarã añete vae rupi —jei—.

<sup>20</sup>Jare ayerure ndeve cheré güiroviata vae re. Echa'ã güiroviata cua reta iñee rupi. Cua reta reño'ã ayerure ndeve —jei—. <sup>21</sup>Ayerure ndeve opaete jae reta yugüireco vaerã penti ramiño. Nde ndico che ndive, cheRu, jare che aico nde ndive. Jae ramiño vi ayerure ndeve cua reta yugüireco vaerã yanderé güirovia reve, ivi pegua reta güirovia vaerã nde co chembou vae —jei—. <sup>22</sup>Nde ndepiacavi ndeechaca cheve vae, che vi aechaca chupe reta, jae reta yugüireco vaerã penti ramiño. Echa'ã jucuarãi yande yaico penti ramiño —jei Jesús—. <sup>23</sup>Nde ndicota che ndive jare che aicota ipia pe, añetete yugüireco vaerã penti ramiño, ivi pegua reta uicuaa vaerã nde co chembou jare nde ndeau co cua reta nde cherau rami —jei—.

<sup>24</sup>CheRu, aipota cua nemeche cheve vae reta vi yugüireco vaerã che aicota vae pe, uecha vaerã ndepiacavi cheve vae. Echa'ã ndei ivi uyeyapo mbove nde cherauño mai —jei—. <sup>25</sup>CheRu, nde co jae jupi vae. Upurugüirovia mbae vae reta ndecuaa'ã. Ërei che co nducuaa, jare cua reta uicuaa nde co chembou vae —jei—. <sup>26</sup>Che numimbeu ma chupe reta jare numimbeu yeta, jae reta tuau ñru vae reta nde cherau rami, jare che aico vaerã ipia pe —jei—.

### Uipisi reta Jesús

(Mt 26.47-56; Mr 14.43-50; Lc 22.47-53)

**18** <sup>1</sup>Jesús cua jei ma yave, uasa jemimboe reta ndive iãca Cedrón jee vae jovaicho pe oo uvãe temiti reta ñugüinoi vae pe. Joco pe uique Jesús jare jemimboe reta. <sup>2</sup>Jare Judas - jae co umee jovaicho reta pe vae - uicuaa jocua temiti reta jenda. Echa'ã joco pe uyembatiñoi yepi Jesús jemimboe reta ndive. <sup>3</sup>Jayave Judas oo sacerdote reta itenondegua reta jare fariseo reta ñugüinoi vae pe, jare jae reta omondo amocue sundaro reta jare jembiocui reta temiti reta ñugüinoi vae coti Judas jupíe. Güiraa reta mechero jare ivira jare quisepecu reta. <sup>4</sup>Jayave Jesús oo jae reta ñugüinoi vae coti jare jei:

—¿Quía pa peeca?

Echa'ã jae uicuaa ma mbae uyeyapota chupe vae.

<sup>5</sup>—Jesús Nazaret pegua —jei reta.

—Che co jae —jei Jesús.

Jare Judas - jae co umee jovaicho reta pe vae - uyemboi oĩ joco pe jae reta ndive. <sup>6</sup>Jesús jei yave chupe reta: “Che co jae”, jae reta opa usiri jaicue coti jare oa reta ivi re. <sup>7</sup>Jayave Jesús upirandu ye chupe reta:

—¿Quía pa peeca?

Jei reta ye:

—Jesús Nazaret pegua.

<sup>8</sup>—Amimbeu ma peve che co jae —jei Jesús—. Pe reta che chereca. Jáeramo pemaño cua che ndive ñugüinoi vae reta re yugüiraa ye vaerã —jei.

<sup>9</sup>Cua jei uyeyapo vaerã tenonde yave jei vae: “Amicañi'ã penti ave nde nemeche vae reta güi.” Jucuarãi jei ma. <sup>10</sup>Jare Simón Pedro güinoi penti quisepecu. Jayave uequi jiru güi jare uiporu sacerdote tenondegua jembiocui inambi iyacata cotigua re, jare uyasía inambi chugüi. (Jocua uyeyocui vae jee co Malco.) <sup>11</sup>Jayave Jesús jei Pedro pe:

—Iñono ye ndequisepecu jiru pe. Aiporarañotai co. Echa'ã cheRu uipota aiporara vaerã —jei.

### Jesús Anás jovai

(Mt 26.57-58; Mr 14.53-54; Lc 22.54)

<sup>12</sup>Jayave sundaro reta jovicha ndive jare judío reta itenondegua reta jembiocui reta uipisi Jesús uñapíti. <sup>13</sup>Jayave güiraa Jesús Anás pe rani - jae co Caifás jembireco tu - Caifás co jae sacerdote tenondegua jocua año. <sup>14</sup>Tenonde yave cua Caifás umimbeu judío reta pe icavita co chupe reta penti cuimbae umano vaerã opaete vae reta ipepica pe.

### Pedro Anás joca pe

(Mt 26.69-70; Mr 14.66-68; Lc 22.55-57)

<sup>15</sup>Jare Simón Pedro jare ñru temimboe yugüiraa Jesús jaicue. Jare cua ñru temimboe uique sacerdote tenondegua joca pe Jesús uique yave. Echa'ã sacerdote tenondegua uicuaa cua temimboe. <sup>16</sup>Èrei Pedro uique'ã japipe pe. Upita uyemboi oĩ onque tuicha vae iyipi pe. Jayave ñru temimboe sacerdote tenondegua uicuaa vae oẽ umingueta cuñatai onque uãro vae pe jare uruique Pedro. <sup>17</sup>Jayave cuñatai onque uãro vae jei Pedro pe:

—¿Jae'ã pa co nde penti jocua cuimbae jemimboe?

—Jae'ã co che —jei Pedro.

<sup>18</sup>Jare sacerdote tenondegua jembiocui reta jare judío reta itenondegua reta jembiocui reta uyapo ma tata jare uyemboi reta tata iyipi rupi uyepee vaerã. Echa'ã roi co. Pedro vi upita joco pe uyemboi oĩ jae reta ndive uyepee vaerã.

### Anás upirandu Jesús pe

(Mt 26.59-66; Mr 14.55-64; Lc 22.66-71)

<sup>19</sup>Jayave sacerdote tenondegua upirandu Jesús pe jemimboe reta re jare iporomboe re. <sup>20</sup>Jayave Jesús jei chupe:

—Che ayemingueta co opaete vae jovaque. Jecuaño aporomboe judío reta itupao reta pe jare Tumpa jo pe. Echa'ã joco pe jecuaño uyembati judío reta. Ayemingueta viari'ã etei —jei—. <sup>21</sup>¿Maera pa ndepirandu

cheve? Epirandu uyapisaca cheré vae reta pe che jae chupe reta vae re. Jae reta uicuaa che jae vae —jei.

<sup>22</sup>Cua jei ma yave Jesús, penti judío reta itenondegua reta jembicui joco pe oĩ vae ocua Jesús jova re.

—¿Maera pa jucuarãi ndiyemingueta sacerdote tenondegua pe? —jei.

<sup>23</sup>—Icavi'ã ayemingueta yave, emimbeu mbae ra icavi'ã —jei Jesús—. Ërei icavi ayemingueta. ¿Maera pa ndecua cheré? —jei.

<sup>24</sup>Jayave Anás omondo Jesús iyocuaa reve Caifás pe - jae vi co sacerdote tenondegua.

### **Pedro uicuacu Jesús**

*(Mt 26.71-75; Mr 14.69-72; Lc 22.58-62)*

<sup>25</sup>Jare Simón Pedro uyemboi uyepee oĩ. Ìru vae reta jei chupe:

—¿Jae'ã pa co nde penti jemimboe?

Pedro uicuacu. Jei:

—Jae'ã co che.

<sup>26</sup>Penti sacerdote tenondegua jembicui - jae co jocua cuimbae Pedro uyasia inambi chugüi vae jentarã - jei Pedro pe:

—Che nduecha co temiti reta ñugüinoi vae pe jae ndive.

<sup>27</sup>Pedro jei ye:

—Jae'ã co che.

Jare cua jei ma yave, uru cuimbae uñee.

### **Jesús Pilato jovai**

*(Mt 27.1-2, 11-14; Mr 15.1-5; Lc 23.1-5)*

<sup>28</sup>Jayave güiraa reta Jesús Caifás jenta güi palacio pe. Neimbove asi. Jae reta uique'ã palacio japipe pe. Echa'ã uique yave joco pe jocua ara, iporomboe umimbeu chupe reta uyemingueta tẽi co, jare ndarau tẽi ipuere jou tembú pascua pegua. <sup>29</sup>Jayave Pilato oẽ chupe reta.

—¿Mbae re pa pembijeco cua cuimbae? —jei chupe reta.

<sup>30</sup>—Cua cuimbae jecocavi yave mona, ndarau tẽi numee ndeve —jei reta.

<sup>31</sup>—Pe reta etei peraa peãa vaerã peporoyocui rupi —jei Pilato.

—Romano reta umaño'ã oreré nduyuca vaerã quía —jei reta.

<sup>32</sup>Jucuarãi jei reta, uyeyapo vaerã Jesús jei ma uyeyapota chupe vae. Echa'ã Jesús umimbeu ma quirãita co umano. <sup>33</sup>Jayave Pilato uique ye palacio pe jare ueni Jesús.

—¿Nde pa co jae judío reta juvicha guasu? —jei.

<sup>34</sup>—¿Ndeño pa ndiyemingueta jucuarãi, ani Ìru vae reta pa umimbeu ndeve cheregua? —jei Jesús.

<sup>35</sup>—Che penti judio'ã co —jei Pilato—. Nerentaigua reta jare sacerdote reta itenondegua reta nemee cheve. ¿Mbae pa ndiyapo? —jei.

<sup>36</sup>—Che co jae penti mburuvicha guasu —jei Jesús—, ãrei che jae'ã co mburuvicha guasu ivi pegua reta rami. Che jocua reta rami yave mona, cherembicui reta uñerãrota tãi co, agũiyee vaerã añemee judío reta pe. ãrei che jae'ã co mburuvicha guasu ivi pegua reta rami —jei Jesús.

<sup>37</sup>Jayave Pilato jei chupe:

—¿Nde pa co jae penti mburuvicha guasu?

—Nde ndere rami che co jae penti mburuvicha guasu —jei Jesús—. Cuarã ayeyapo cuimbaerã. Cuarã ayu ivi pe. Ayu amimbeu vaerã añete vae. Opaete añete vae güirovia vae reta uyapisaca chiñee re —jei.

<sup>38</sup>Jayave Pilato upirandu chupe:

—¿Mbae pa jocua añete vae?

### Pilato jei Jesús umanota co

(Mt 27.15-31; Mr 15.6-20; Lc 23.13-25)

Jare cua jei ma yave, Pilato oẽ ye judío reta jovai jare jei chupe reta:

—Avãe'ã etei teco jese. <sup>39</sup>ãrei pe reta jecuaeño pipota ayora vaerã peve penti pereso pascua pe. ¿Pipota pa ayora vaerã peve cua judío reta juvicha guasu? —jei chupe reta.

<sup>40</sup>Jae reta iñeeãta reve jei:

—Agũiyee iyora jocua cuimbae. Iyora oreve Barrabás —jei reta. Jocua Barrabás co jae imonda vae.

**19** <sup>1</sup>Jayave Pilato güiraaca Jesús uinupaca chicote pe. <sup>2</sup>Jare sundaro reta oñope yurãti catui vae jare umbapúa oñoño Jesús iñãca re. Jare omondeca reta Jesús pe temimonde pãta vae. <sup>3</sup>Jayave jei reta chupe:

—¡Viva, judío reta juvicha guasu!

Jayave ocua reta jese ipo pe.

<sup>4</sup>Jayave Pilato oẽ ye, jare jei judío reta pe:

—Mase, aruta peve picuaa vaerã avãe'ã co teco jese.

<sup>5</sup>Jayave Jesús oẽ. Güinoi jocua yurãti catui vae iñãca re jare omonde temimonde pãta vae. Jayave Pilato jei chupe reta:

—Mase, co oĩ cua cuimbae.

<sup>6</sup>Sacerdote reta itenondegua reta jare jembicui reta uecha yave Jesús, iñeeãta reve jei:

—¡Icutuca curusu re, icutuca curusu re!

Jayave Pilato jei chupe reta:

—Pe reta etei peraa picutuca curusu re. Echa'ã che avãe'ã etei teco jese —jei.

<sup>7</sup>Judío reta jei Pilato pe:

—Ore nonoi penti mboroyocui, jare jocua mboroyocui rupi umanota co. Echa'ã jei jae co Tumpa Tai —jei reta.

<sup>8</sup>Cua uyandu yave, Pilato uquiye ete. <sup>9</sup>Jayave uique ye palacio pe jare upirandu Jesús pe:

—¿Quía pegua pa nde?

Ërei Jesús jei'ã mbae ave chupe. <sup>10</sup> Jayave Pilato jei chupe:

—¿Maera pa niñee nemoë'ã cheve? Che anoi mbaepuere nducutuca vaerã curusu re. Anoi vi mbaepuere ndoyora vaerã. ¿Ndicuaa'ã pa cua? —jei.

<sup>11</sup>—Tumpa umaëño'ã nderé yave, ndarau tēi ndepuere cheré —jei Jesús—. Jáeramo chemee ndeve vae iyoa ete ma co.

<sup>12</sup>Cua uyandu ma yave, Pilato uipota tēi oyora Jesús. Ërei judío reta iñeeãta reve jei:

—Cua cuimbae ndiyora yave, nde ndiyeyocui'ã ma co César pe. Echa'ã ipotave jei jae co mburuvicha guasu vae oyovaicho ma César ndive —jei reta.

<sup>13</sup>Pilato cua uyandu yave, güiñoë Jesús jare uguapí Empedrado jee vae pe. (Cua co jee Gabata hebreo iñee pe.) Echa'ã joco pe jecuaëño uãa teco güinoi vae reta. <sup>14</sup>Jare jocua ara judío reta uyeyapicatu ñugüinoi pascua peguarã, jare ara mbite seri ma. Jayave Pilato jei judío reta pe:

—Co oĩ peruvicha guasu.

<sup>15</sup>Jayave jae reta iñeeãta reve jei:

—¿Eraaca cua güi, eraaca cua güi, icutuca curusu re!

Pilato upirandu chupe reta:

—¿Aicutucata pa peruvicha guasu?

Jayave sacerdote reta itenondegua reta jei:

—Jaeño César oreruvicha guasu.

<sup>16</sup>Jayave Pilato umee Jesús chupe reta uicutuca vaerã curusu re. Jayave jae reta uipisí Jesús güiraa.

**Jesús uyecutuca curusu re jare umano**  
(Mt 27.32-44; Mr 15.21-32; Lc 23.26-43)

<sup>17</sup>Jayave Jesús oë jare ovoí güiraa icurusu. Jayave sundaro reta güiraa Jesús Acacuerenda jee vae pe. (Cua co jee Gólgota hebreo iñee pe.)

<sup>18</sup>Joco pe uicutu reta Jesús curusu re. Uicutu reta vi ñru mocui cuimbae reta jare oñono penti Jesús iyacata coti jare ñru iyaso coti. Jesús oĩ mbite pe. <sup>19</sup>Jare Pilato uicutatía curusu re oñonoca vaerã. Cuarãi uyecuatía oĩ:

“Jesús Nazaret pegua, judío reta juvicha guasu.” <sup>20</sup>Jare jeta judío reta umingueta cua uyecuatía oĩ vae. Echa'ã Jesús uyecutuca vae coiño oĩ tenta guasu güi. Jare uyecuatía oĩ hebreo iñee pe jare griego iñee pe jare latín pe. <sup>21</sup>Jayave judío reta isacerdote reta itenondegua reta jei Pilato pe:

—Agüiyeta tēi co ndicuatía: ‘Judío reta juvicha guasu.’ Ndicuatiata tēi co: ‘Cua cuimbae jei: Che co jae judío reta juvicha guasu’ —jei reta.

<sup>22</sup>—Cua aicutatía vae aicutatía ma co —jei Pilato.

<sup>23</sup>Jare sundaro reta uicutu ma yave Jesús, irundi reve uyembüya Jesús jemimonde re umbiyao ma yave. Ërei jemimonde pucu vae uyembiviví'ã. Ueyepo penti güiño. Cua vi sundaro reta uequi chugüi. <sup>24</sup>Jayave sundaro reta jei uyupe:

—Agüiye yamondoro. Yayuguari jese, yaicuaa vaerã quía güiraata vae —jei reta.

Cuarãi uyeyapo Tumpa ñnee pe uyecuatía oĩ vae. Echa'ã uyecuatía oĩ cuarãi: “Uyuguari reta cheremimonde re, uicuaa vaerã mbae nunga penti penti güiraa iyupe vaerã.” Jucuarãi uyecuatía oĩ, jare jucuarãi uyapo sundaro reta.

<sup>25</sup>Jare uyemboi ñugüinoi Jesús icurusu iyipi pe Jesús ichi, jare ichi ipiqui, jare María - jae co Cleofas jembireco - jare María Magdalena.

<sup>26</sup>Jesús uecha ichi jare jemimboe jae uau vae uyemboi ñugüinoi coño chugüi. Jare jei ichi pe:

—Chesi, joco oĩ nemembrã.

<sup>27</sup>Cua jaicue rupi jei jemimboe pe:

—Joco oĩ ndesirã.

Jáeramo jocua ora güive jocua jemimboe güiraa jenta pe Jesús ichi.

### Jesús umano

(Mt 27.45-56; Mr 15.33-41; Lc 23.44-49)

<sup>28</sup>Cua jaicue rupi Jesús jei:

—Cheúe.

Cuarãi uyeyapo ma Tumpa ñnee pe uyecuatía oĩ vae. Echa'ã Jesús uicuaa opaete iparaviqui opa ma. <sup>29</sup>Jare joco pe oĩ vinagre penti yapepo pe. Jayave umãqui reta esponja vinagre pe. Jayave oñono reta ivira re jare omondo Jesús iyuru pe. <sup>30</sup>Jare Jesús jou ma yave vinagre, jei:

—Opa ma ayapo Tumpa jei vae.

Jayave ññacatindi jare umano.

### Jesús iyique uyecutu

<sup>31</sup>Jare jocua ara judío reta uyeyapicatu ñugüinoi pascua peguarã. Jáeramo uyerure reta Pilato pe omopëca vaerã curusu re ñugüinoi vae reta itimaca jare güiraaca vaerã joco güi. Echa'ã uipota'ã jetecue reta upita vaerã curusu reta re jocua mbutuu ara pe. Echa'ã jocua mbutuu ara uyepiu reta. <sup>32</sup>Jáeramo sundaro reta yugüiraa omopë penti cuimbae Jesús ndive curusu re uyecutu oĩ vae itimaca. Jayave omopë ñru cuimbae itimaca. <sup>33</sup>Ërei yugüiraa yave Jesús pe, uecha umano ma. Jáeramo omopë'ã itimaca. <sup>34</sup>Ërei penti sundaro uicutu Jesús iyique pe, jare oë voi tugüi jare i. <sup>35</sup>Jare uecha vae umimbeu cua, pe reta vi perovia vaerã. Jare cua umimbeu vae añete co. Echa'ã jae uicuaa cavi umimbeu vae añete co. <sup>36</sup>Echa'ã opaete cua uyeyapo Tumpa ñnee pe uyecuatía oĩ vae uyeyapo vaerã. Echa'ã uyecuatía oĩ cuarãi: “Ndarau icãgüe ave opë.” <sup>37</sup>Jare: “Umaeta reta jocua uicutu vae re.” Jucuarãi uyecuatía oĩ.

### Oñoti reta Jesús jetecue

(Mt 27.57-61; Mr 15.42-47; Lc 23.50-56)

<sup>38</sup>Cua jaicue rupi José Arimatea pegua uyerure Pilato pe güiraa vaerã Jesús jetecue. Cua José co jae penti Jesús jemimboe, ñrei uyecuaaca'ã. Echa'ã uquiye



judío reta güi. Jayave Pilato jei chupe ipuere güiraa Jesús jetecue. <sup>39</sup>Nicodemo ou vi - jae co tenonde yave oo pĩtu yave Jesús pe vae. Jae güeru mirra jare áloes uyeacue vae. Uepiti treinta kilo rupi. <sup>40</sup>Jayave umbigüeyi reta Jesús jetecue, jare oñoma mbae ipiche cavi vae reta reve nieso pe. Echa'ã jucuarãño mai uyapo judío reta, jetecue oñoti yave. <sup>41</sup>Jare Jesús uyecutuca vae pe oĩ penti temiti reta ñugüinoi vae, jare jocua ipite pe oĩ penti teögüeriru ipiau vae - ndei quía uñeñoño pipe vae pe. <sup>42</sup>Jocua ara judío reta uyeyapicatu ñugüinoi pascua peguarã. Jáeramo oñono reta Jesús jetecue jocua teögüeriru pe. Echa'ã coño oĩ.

### Jesús icove ye

(Mt 28.1-10; Mr 16.1-8; Lc 24.1-12)

**20** <sup>1</sup>Jare ndei cõe cavi mbove domingo ara pe María Magdalena ou teögüeriru pe, jare uecha ita uyembisiri ma teögüeriru güi. <sup>2</sup>Jayave osi oo Simón Pedro jare ñru temimboe Jesús uau vae ñugüinoi vae pe, jare jei chupe reta:

—Güiraa reta ma yandeYa teögüeriru güi, jare nduicuaa'ã quiape ra oñono reta.

<sup>3</sup>Jayave Pedro jare ñru temimboe oẽ pãve jare yugüiraa teögüeriru coti. <sup>4</sup>Mocui reve osi pãve yugüiraa, ãrei ñru temimboe ññacua ete Pedro güi, jare oo uvãe teögüeriru pe Pedro jenonde. <sup>5</sup>Jayave ipe umae vaerã japipe coti, jare uecha nieso reta joco pe oĩ, ãrei uique'ã. <sup>6</sup>Jayave Simón Pedro oo uvãe jaicue rupi, jare uique teögüeriru pe. Jare uecha nieso reta joco pe oĩ. <sup>7</sup>Uecha vi nieso Jesús ññaca re tenonde yave uñeñoño vae uñeñoñaoma oĩ tee ñru nieso reta güi. <sup>8</sup>Jayave jocua ñru temimboe vi - jae Pedro jenonde oo uvãe vae - uique teögüeriru pe, jare uecha yave, upurugüirovia. <sup>9</sup>Echa'ã ndei uicuaa cavi reta Tumpa ññee pe uyecuatía oĩ vae quirãi Jesús icove yeta ou umanocue vae reta ipite güi. <sup>10</sup>Jayave temimboe reta yugüiraa ye jenta pe.

### Jesús uyecuaa María Magdalena pe

(Mr 16.9-11)

<sup>11</sup>Ñrei María uyemboi oĩ teögüeriru iyipi pe. Uyao oĩ. Jare uyao oĩ rambueve, ipe umae vaerã teögüeriru japipe coti. <sup>12</sup>Jare uecha mocui ángel reta uguapi ñugüinoi Jesús jetecue uñeñoño vae pe. Jemimonde tĩ asi co. Pentí uguapi oĩ Jesús ññaca jendacue coti jare ñru uguapi oĩ Jesús ipita jendacue coti. <sup>13</sup>Ángel reta jei María pe:

—¿Maera pa ndiyao?

—Güiraa reta ma cheYa, jare aicuaa'ã quiape ra oñono reta —jei María.

<sup>14</sup>Cua jei ma yave, María uyerova jare uecha Jesús uyemboi oĩ joco pe. Ñrei uicuaa'ã jae co Jesús vae. <sup>15</sup>Jayave Jesús jei chupe:

—Cuña, ¿maera pa ndiyao? ¿Quía pa ndeeca?

María ipia pe uyemingueta tẽi jae co temiti reta iyandarecoa. Jáeramo jei chupe:

—Carai, nde nderaa yave, emimbeu cheve quiape niñono, jare che araata.

<sup>16</sup>—¡María! —jei Jesús chupe.

María uyerova ye icoti jare jei chupe:

—Raboni. (Cua uipota jei: “Oporomboe vae”.)

<sup>17</sup>Jayave Jesús jei chupe:

—Agüiye chepisi. Echa'ã ndei ayupi cheRu pe. Ërei ecua emimbeu cherivi reta pe che jae cuarãi: ‘Aata ma cheRu pe - jae co peRu vi. Jae co cheTumpa - jae co peTumpa vi’ —jei.

<sup>18</sup>Jayave María Magdalena oo umimbeu Jesús jemimboe reta pe.

—Aecha ma yandeYa —jei.

Jayave umimbeu chupe reta Jesús jei chupe vae.

### **Jesús uyecuaa jemimboe reta pe**

(Mt 28.16-20; Mr 16.14-18; Lc 24.36-49)

<sup>19</sup>Jare jocua pĩtu - domingo ara pe - Jesús jemimboe reta uyembati jare uyuquenda jonque reta. Echa'ã jae reta uquiye judío reta güi. Jayave ou Jesús uyemboi ipite pe jare jei chupe reta:

—Pepiacatu.

<sup>20</sup>Cua jei ma yave, Jesús uechaca chupe reta ipo jare iyique. Jayave Jesús jemimboe reta uyerovia. Echa'ã uecha ma iYa. <sup>21</sup>Jayave Jesús jei ye chupe reta:

—Pepiacatu. CheRu chembou. Jae ramiño vi che pomondo —jei.

<sup>22</sup>Jare cua jei ma yave, iputüé omoë icoti reta jare jei:

—Ameë ma peve Espíritu Santo. <sup>23</sup>Pembiasa yave ipotave vae pe imbaeyoa, imbaeyoa uyembaita co. Jare pembiasa'ã yave ipotave vae pe imbaeyoa, imbaeyoa ndarau uyembai —jei.

### **Tomás güirovia'ã Jesús regua**

<sup>24</sup>Jare jocua doce jemimboe reta güi penti Tomás jee vae - jae co Choguaquiri pe uyembijee vae - oĩ'ã joco pe ĩru reta ndive Jesús ou yave.

<sup>25</sup>Jare ĩru Jesús jemimboe reta jei Tomás pe:

—Nduecha ma yandeYa.

Ërei Tomás jei:

—Aecha'ã yave uyecuturendacue ipo re jare añoño'ã yave chepoãca uyecuturendacue pe jare añoño'ã yave chepo iyique pe, ndarau arovia.

<sup>26</sup>Ocho ara uasa ma yave, temimboe reta ñugüinoi ye jocua o pe. Tomás joco pe oĩ vi. Yepe tēi onque reta uyeyuquenda ñugüinoi, ěrei Jesús ou uyemboi ipite pe jare jei:

—Pepiacatu.

<sup>27</sup>Jayave jei Tomás pe:

—Emaë chepo re. Iñono cua pe nepoãca. Eupi ndepo iñono cheyique pe. Agüiye ma ico ndepurugüirovia mbae reve. Mburugüirovia reve ma ico —jei.

<sup>28</sup>—Nde co jae cheYa jare cheTumpa —jei Tomás.

<sup>29</sup>Jayave Jesús jei:

—Ndepurugüirovia ma cherecha ramo. Tuicha uyeroviata jocua cherecha mbae reve upurugüiroviata vae reta —jei.

### Maera uyecuatía oĩ cua ñee reta

<sup>30</sup>Jare Jesús uyapo jemimboe reta jovaque jeta ñru miacañi reta uicuaaca vaerã quía co jae, yepe tẽi uyecuatia'ã oĩ cua pe. <sup>31</sup>Ërei aicuatía cua pe uyecuatía oĩ vae, perovia vaerã Jesús co jae Cristo - jae co Tumpa Tai - jare penoi vaerã tecove opa mbae vae cua perovia yave.

### Jesús uyecuaa siete jemimboe reta pe

**21** <sup>1</sup>Cua jaicue rupi Jesús uyecuaa ye jemimboe reta pe i Tiberias jee vae iyipi pe. Uyecuaa chupe reta cuarãi: <sup>2</sup>Simón Pedro jare Tomás - jae co Choguaquiri pe uyembijee vae - jare Natanael Caná pegua - jocua Caná Galilea pegua co - jare Zebedeo tai reta jare mocui ñru temimboe reta uyembati. <sup>3</sup>Jayave Simón Pedro jei ñru reta pe:

—Aata pira aipisi vaerã.

—Ore ndoota vi nde ndive —jei reta.

Jayave yugüiraa uyupi chalana pe. Ërei jocua pĩtu uipisi'ã mbae ave.

<sup>4</sup>Jare cõeta ma yave Jesús uyemboi oĩ i jembei pe. Ërei temimboe reta uicuaa'ã jae co Jesús. <sup>5</sup>Jayave Jesús jei chupe reta:

—Cherivi reta, ¿pipisi ma pa mbae?

—Nduipisi'ã mbae ave —jei reta chupe.

<sup>6</sup>—Pemombo pepisa chalana iyacata coti jare pipisita pira reta —jei Jesús.

Jayave jucuarãi uyapo reta, jare ipuere'ã ma umiãta pisa i güi jeta ete pira omboa ramo. <sup>7</sup>Jayave jocua temimboe Jesús uau vae jei Pedro pe:

—Jae co yandeYa.

Simón Pedro uyandu yave jocua cuimbae co jae iYa, uyemonde jare ugüeyi voi i pe. Echa'ã omboi jemimonde uparaviqui cavi vaerã. <sup>8</sup>Jare ñru reta yugüeru chalana pe. Jae reta umiãta pisa pira reve. Echa'ã coiño ñugüinoi i jembei güi - cien metro rupi. <sup>9</sup>Jare yugüeru oẽ i güi yave, uecha tata tatãpi reve joco pe. Uecha vi pira tatãpi iárambo jare mbiyape vi. <sup>10</sup>Jayave Jesús jei chupe reta:

—Peru mbovi pira pipisi vae.

<sup>11</sup>Jayave Simón Pedro uyupi ye chalana pe jare umiãta pisa i güi. Pisa tinee pira tuichacue vae pe - güinoi ciento cincuenta y tres. Ërei yepe tẽi jeta ete, ãrei omondoro'ã pisa. <sup>12</sup>Jayave Jesús jei chupe reta:

—Peyu rani pecaru.

Jare penti ave jemimboe iquirẽi'ã upirandu chupe: “¿Quía pa co nde?” Echa'ã uicuaa jae co iYa. <sup>13</sup>Jayave Jesús oo uipisi mbiyape umee chupe reta. Jae ramiño vi umee chupe reta pira. <sup>14</sup>Jare mbapi vese ma cua re Jesús uyecuaa jemimboe reta pe icove ye güiive ou umanocue vae reta ipite güi.

### Emingaru cheovecha reta

<sup>15</sup>Ucaru reta ma yave, Jesús jei Simón Pedro pe:

—Simón, Jonás tai, ¿cherau ete pa cua reta güi?

—Nduau, cheYa —jei Pedro—. Ndicuaa che nduau co.

—Emingaru cheovecha-rai reta —jei Jesús chupe.

<sup>16</sup>Jesús jei ye chupe:

—Simón, Jonás tai, ¿cherau pa?

—Nduau, cheYa —jei ye Pedro—. Ndicuaa che nduau co.

—Iyandareco cheovecha reta re —jei Jesús.

<sup>17</sup>Jesús jei ye chupe mbapi vecea re:

—Simón, Jonás tai, ¿cherau pa?

Pedro ipiatiti. Echa'ã mbapi vese ma Jesús jei chupe: “¿Cherau pa?”

Jayave jei ye:

—CheYa, nde ndicuaa opaete. Nde ndicuaa che nduau co.

—Emingaru cheovecha reta —jei Jesús chupe—. <sup>18</sup>Añete che jae ndeve, nde ndetairusu yave, ndiyemonde jare ndeguata ndipota ndeo vae rupi. Èrei nendechi ma yave, ndeupita ndeyiva jare ñru vae omondacata ndeve jare ndereraata ndipota'ã ndeo vae pe —jei.

<sup>19</sup>Cua jei Jesús umimbeu vaerã quirãita co umano Pedro. Jare Pedro umano yave, Tumpa uyembadoracata imano rupi. Jayave Jesús jei Pedro pe:

—Eyu che ndive.

### Temimboe Jesús uau vae

<sup>20</sup>Pedro uyerova yave, uecha jocua temimboe Jesús uau vae ou jaicue. Jocua temimboe co jae tenonde yave ucaru ñugüinoi yave ucaru oĩ Jesús iyipi pe jare: “¿Quía pa nemeeta, CheYa?” jei chupe vae. <sup>21</sup>Jare Pedro uecha yave jocua temimboe, upirandu Jesús pe:

—¿Mbae pa uyeyapota chupe, cheYa?

<sup>22</sup>Jesús jei chupe:

—Che aipota yave jae ico vaerã che ayu ye regua, jocua mbae'ã co ndeve. Nde eyu che ndive —jei.

<sup>23</sup>Jare opaete upurugüirovia vae reta uicuaa cua Jesús jei vae, jare ipia pe uyemingueta tõi cua uipota jei jocua jemimboe ndarau umano. Èrei Jesús jei'ã ndarau umano. Jaeño jei: “Che aipota yave jae ico vaerã che ayu ye regua, jocua mbae'ã co ndeve.”

<sup>24</sup>Che co jae jocua Jesús jemimboe, jare che amimbeu añete co cua pe uyecuatía oĩ vae. Echa'ã che aicuatía cua. Jare opaete nduicuaa cua amimbeu vae añete co.

<sup>25</sup>Jare ime ye jeta mbaembae Jesús uyapo vae. Opaete cua mbaembae regua uyecuatía oĩ yave penti penti rupi, uatata opaete tupapire jendarã cua ivi pe. Amén.

# LOS HECHOS

## DE LOS APÓSTOLES

---

### Espíritu Santo outa

**1** <sup>1</sup>Teófilo, tenonde aicutafía ndeve vae pe amimbeu ndeve opaete Jesús uyapo vae jare jocua oporomboe jese vae. <sup>2</sup>Ndei oo ye ara pe mbove, umee mboroyocui reta Espiritu Santo rupi jemimondo uiparavo vae reta pe. <sup>3</sup>Jesús imano rendave pe, uyecuaa chupe reta. Jae reta uicuaa catu jae icove ye co jeta mbaembae uyapo jovaque vae jeco pegua. Jesús uyecuaa chupe reta cuarenta ara, jare umingueta reta Tumpa iporoyocua re.

<sup>4</sup>Jae reta uyembati yave, Jesús oyocui agüiye vaerã yugüiraa tenta guasu Jerusalén güi. Oyocui uãro vaerã yandeRu umeeta chupe reta vae. Jesús jei chupe reta:

—Jocua re chemiari ma peve. <sup>5</sup>Juan upurumbibautiza i pe, ãrei pe reta piyembibautizacata Espiritu Santo pe mbovi ara rupi —jei.

### Jesús oo ye ara pe

<sup>6</sup>Jayave yati vae reta upirandu Jesús pe: —OreYa, ¿nemañota pa Israel pegua reta re uyeyapo vaerã mburuvicha retarã cua ara reta rupi?

<sup>7</sup>—Ndarau picuaa jocua ara regua —jei Jesús—. Jaeño cheRu jeita jocua re —jei—. <sup>8</sup>Ërei pe reta penoita Espiritu Santo imbaepuere, ou yave peve, jare pe reta chemimbeuta Jerusalén pe, opaete Judea rupi, Samaria rupi jare opaete ivi rupi —jei chupe reta.

<sup>9</sup>Jare Jesús opa imiari chupe reta yave, oo ivate, jae reta umae jese rambueve. Jayave amapĩtu umbiyasoi Jesús, jare uecha'ã ma reta. <sup>10</sup>Jare umae ngatu ñugüinoi rambueve ara coti, Jesús oo rambueve, mocui cuimbae uyecuaa jae reta iyipi pe. Cua cuimbae reta jemimonde tĩ asi.

<sup>11</sup>Cua reta jei chupe reta:

—Cuimbae Galilea pegua reta, ¿maera pa piyemboi pemaie peĩ ara coti? Jesús oo ma pegüi ara pe. Ërei jae etei ou yeta jucuarãi ete, peecha oo rami —jei reta.

### Uiparavo reta ĩru vae Judas ipepica pe

<sup>12</sup>Jayave temimondo reta yugüeru ye Jerusalén pe ivitu guasu Olivos jee vae güi. Jocuá ivitu guasu coiño oĩ Jerusalén güi. Judío reta iporoyocui umaño uguata vaerã joco pe Jerusalén güi mbutuu ara pe. <sup>13</sup>Yugüeru uvãe yave, uique reta penti tenta pe, jare uyupi o ivate vae pe. Joco pe yugüireco Pedro, Jacobo, Juan, Andrés, Felipe, Tomás, Bartolomé, Mateo, Alfeo tai Jacobo jee vae, Simón Zelote jare Jacobo tivi Judas jee vae. <sup>14</sup>Opaete cua reta, jare Jesús ichi María jare ĩru cuña reta, jare Jesús tivi reta jecuae uyerure penti ramiño.

<sup>15</sup>Upurugüirovia vae joco pe ñugüinoi vae reta ciento veinte rupi. Jare penti ara Pedro uyemboi ipite pe jare jei:

<sup>16</sup>—Cherivi reta, jupi co uyeyapo vaerã David aracae uicuatía Judas re vae. Espíritu Santo etei cua umimbeu yandevé David rupi. Judas güiraa cuimbae reta Jesús oĩ vae pe uipisica vaerã —jei—. <sup>17</sup>Jae icose yande ndive, jare uyeparavo co uyapo vaerã cua mbaraviqui —jei—. <sup>18</sup>Jae uipisi corepoti icavi mbae vae uyapo vae re. Jayave corepoti pe ogua penti ivi. Joco pe oa ivate güi, jare jie osoro, jare opaete ichuri uyecuavo —jei Pedro—. <sup>19</sup>Cua jerãcua opaete Jerusalén pegua reta pe. Jáeramo jocua ivi jee Acéldama jae reta ñee pe —jei—. (Acéldama uipota jei: “Īvi tugüi jepicue”.) <sup>20</sup>Echa'ã uyecuátía oĩ Tumpa ñee pe Salmo reta pe cuarãi:

‘Tuyeyapo ivi ipo mbae ico vae,  
jare agüiye quía tuico pıpe.’

Jare:

‘Īru vae tuyapo chugüi iparaviqui.’

Jucuarãi uyecuátía oĩ —jei chupe reta—. <sup>21-22</sup>Ime cua pe ñugüinoi cua cuimbae reta. Jae reta yugüireco yande ndive, yandeYa Jesús ico yande ndive rambueve. Echa'ã yugüireco yande ndive Juan umbibautiza Jesús güive Jesús yandepite güi oo regua —jei Pedro—. Jáeramo icavi co cua cuimbae reta güi penti yaiparavo vaerã. Jae umimbeuta ĩru vae reta pe yande ndive Jesús icove ye co ou umanocue vae reta ipite güi —jei chupe reta. <sup>23</sup>Jayave uiparavo reta mocui cuimbae. Pentı jee co José Barsabás - jae co uyembıjee Justo pe vae. Īru cuimbae jee co Matías. <sup>24</sup>Jayave uyerure reta Tumpa pe cuarãi:

—OreYa, nde ndicuaa opaete vae ipia. Eechaca oreve quía nunga ra ndiparavo ma cua mocui cuimbae güi, <sup>25</sup>jae ombori vaerã cua mbaraviqui pe, jare ico vaerã nderemimondorã. Judas opia cua mbaraviqui güi, icavi mbae vae uyapo ramo, jare oo ma jendarã jae uiparavo vae pe —jei reta Tumpa pe.

<sup>26</sup>Jayave uyuguari reta jee re, uicuaa vaerã quía nunga ra Tumpa uiparavo ma. Jare uiparavo Matías, jare jae uyeyapo Jesús jemimondorã ĩru once reta ndive.

### Espíritu Santo ou

**2** <sup>1</sup>Pentecostés ara pe opaete upurugüirovia vae reta penti ramiño uyembati. <sup>2</sup>Jare aramoño ou ara güi jiapu vae penti ivitu tanta uyepeyu vae rami. Tanta jiapu uguapi ñugüinoi vae pe. <sup>3</sup>Jayave uyecuaa chupe reta tataendi rami. Cua uyecuaa penti penti iyapite re. <sup>4</sup>Jayave opaete joco pe ñugüinoi vae reta tinee Espíritu Santo pe, jare umbipi uyemingueta reta ambie vae ñnee Espíritu Santo umee chupe reta uyemingueta vaerã vae pe.

<sup>5</sup>Jare jocua ara reta pe yugüireco Jerusalén pe jeta judío ambiembie ivi güi yugüeru vae reta. Cua reta umbiadora Tumpa. <sup>6</sup>Jare cua jiapu vae uyendu yave, uyembati jeta vae, jare opaete vae ipiacañi. Echa'ã upurugüirovia vae reta uyemingueta ñugüinoi, jare penti penti yati vae reta uyandu ñnee pe jei vae. <sup>7</sup>Ipiacañi reve jei reta:

—¿Mase, Galilea pegua reta co opaete cua uyemingueta vae reta! <sup>8</sup>¿Quirã ra yayandu uyemingueta ñaniñee ñanemichi güive yayemingueta pipe vae pe? —jei reta—. <sup>9</sup>Yande co jae Parto pegua, Medo, Elam, Mesopotamia, Judea, Capadocia, Ponto, Asia, <sup>10-11</sup>Frigia, Panfilia jare Egipto pegua, jare Africa pegua Cirene iyipi pe yaico vae, jare romano reta cua pe yaico vae, Creta jare Arabia pegua. Yande co jae judío reta jare judiorã yayeyapo vae reta. Opaete yayandu ñaniñee pe uyemingueta ñugüinoi miacañi Tumpa uyapo vae re —jei reta.

<sup>12</sup>Jare opaete yati vae reta ipiacañi jare jei uyupe:

—¿Mbae ra co cua?

<sup>13</sup>Íru vae reta oyoyai.

—Usavipo ñugüinoi —jei reta.

### Pedro umimbeu yati vae reta pe

<sup>14</sup>Jayave Pedro uyemboi jocua íru once Jesús jemimondo reta ndive, jare jei yati vae reta pe ñneeãta reve:

—Cuimbae Judea pegua reta, jare opaete pico Jerusalén pe vae. Cua regua pipota picuaa yave, piyapisaca chiñee re —jei—. <sup>15</sup>Pe reta pepia pe piyemingueta tēi cua reta usavipo ñugüinoi. Ërei jucuarã'ã co. Echa'ã neimboveño co —jei—.

<sup>16</sup>Tumpa ñnee aracae umimbeu vae Joel imiari cua re. Jae jei cuarã:

<sup>17</sup>'Jare ara taicuegua reta pe'—jei Tumpa— 'ameeta cheEspíritu opaete vae pe.

Jare perai reta jare perayi reta umimbeuta chiñee.

Jare cunumi reta jare indechi vae reta upauta.

<sup>18</sup>Jare jocua ara reta pe ameeta cheEspíritu cuimbae reta jare cuña reta uyeyocui cheve vae pe,

jare umimbeuta reta chiñee.

<sup>19</sup>Jare tambou miacañi reta ara re jare ivi pe.

Imeta tugüi, tata jare tatãti.

<sup>20</sup>Guarasi unemipitumimbata, jare yasi uyeyapota tugüi rami, ndei peYa ivãe ara ou mbove.

Jocua ara opaete vae ipiacañita co.

<sup>21</sup> Jare opaete uyerureta pe'Ya pe ombori vaerã vae reta uyembiasacata co' —jei. Jucuarãi jei Joel —jei Pedro chupe reta.

<sup>22</sup> Pedro jei vi chupe reta:

—Cuimbae Israel pegua reta, piyapisaca cua re. Tumpa uyapoca pepite pe miacañi reta Jesús Nazaret pegua pe. Jucuarãi Tumpa uechaca peve Jesús añete vae co. Cua picuaa catu co pe reta —jei—. <sup>23</sup> Cua Jesús uñemee umano vaerã, Tumpa jei vae uyeyapo vaerã. Tumpa uicuaa opaete ndei uyeyapo mbove. Ërei pe reta pipisi picutuca curusu re cuimbae jeco pochi vae reta pe piyucaca —jei—. <sup>24</sup> Ërei Tumpa oyora mano yandepisi pipe vae güi, jare umbijecove ye güeru umanocue vae reta ipite güi. Echa'ã mano ipuere'ã etei oyopia Jesús —jei Pedro—. <sup>25</sup> Echa'ã David jei Jesús re cuarãi:

'Aecha cheYa jecuaeño cherovai.

Cheacata pe oĩ ramo, ndarau aquiye.

<sup>26</sup> Jáeramo ayerovia chepia pe,  
jare chemiari ayecou reve.

Aicota co aãro reve.

<sup>27</sup> Echa'ã ndeeyata'ã cherecove umanocue vae reta ñugüinoi vae pe.  
Che co jae jupi vae.

Nemañota'ã cheretecue re icumegua vaerã.

<sup>28</sup> Ndicuaaca cheve quirãi aico vaerã ayerovia reve,  
jare ayerovia eteta vi nde ndive aĩ yave.'

Jucuarãi jei David —jei chupe reta—.

<sup>29</sup> Cherivi reta, chepuere chemiari peve yandetenondegua David re. Jae umano jare uñeñotica, jare iñeñoticarenda imeño oĩ yande ndive —jei Pedro—. <sup>30</sup> Ërei Tumpa jei jee re David pe umbiguapita co David iguapia pe David iñemoñaã reta güi penti oporoyocui vaerã. Jocua co jae Cristo, Tumpa ombou vae. Opaete cua David uicuaa. Echa'ã David Tumpa iñee aracae umimbeu vae ico ramo, <sup>31</sup> uicuaa ndei uyeyapo mbove, jare imiari Cristo icove yeta ou umanocue vae reta ipite güi vae re. Echa'ã jei Cristo re uyeyata'ã co jecove umanocue vae reta ñugüinoi vae pe, jare icumeguata'ã co jetecue —jei—. <sup>32</sup> Tumpa umbijecove ye cua Jesús güeru umanocue vae reta ipite güi, jare ore opareve cua numimbeu iru vae reta pe —jei—. <sup>33</sup> Tumpa güiraa ma ara pe imbaepuere pe, jare umee chupe jocua jei umeeta chupe Espíritu Santo vae. Jáeramo Jesús etei ombou cua peecha jare piyandu vae —jei Pedro chupe reta—. <sup>34</sup> Echa'ã David uyupi'ã ara pe. Ërei jae etei jei cuarãi:

'YandeYa jei cheYa pe:

Eguapi cheyipi pe cheacata coti,

<sup>35</sup> nderovaicho reta opa amiamiri regua' —jei.

Jucuarãi jei David —jei Pedro chupe reta—.

<sup>36</sup> Pe reta co jae Israel pegua reta. Jáeramo picuaa catu cua. Pe reta picutuca Jesús, ãrei Tumpa uyapo ma yandeYarã - jae co Cristo —jei Pedro.



<sup>37</sup>Cua uyandu reta yave, tuicha rupi ipiatiti reta, jare upirandu Pedro jare ĩru Jesús jemimondo reta pe:

—Oreriquei reta, ¿mbae pa nduyapota?

<sup>38</sup>Jayave Pedro jei chupe reta:

—Peeya piyemingueta icavi mbae vae pepia pe oĩ vae, jare piyembibautizaca Jesucristo jee re, Tumpa umbiasa vaerã peve pemaeyoa reta. Jare jae umeeta peve Espíritu Santo —jei—. <sup>39</sup>Echa'ã cua Tumpa jei umeeta vae co jae pemaerã, perai reta peguarã, opaete mbiri ñugüinoi vae reta peguarã jare opaete yandeYa Tumpa uenita vae reta peguarã —jei.

<sup>40</sup>Jare Pedro umbiaracuaa jeta ye ye. Jei chupe reta:

—Añave yugüireco vae reta icavi mbae vae uyapo. Piyembiasaca pe reta cua reta güi —jei.

<sup>41</sup>Jayave Pedro jei vae güirovia vae reta uyembibautizaca, jare jocua ara tres mil rupi unẽmĩru upurugüirovia vae reta ndive. <sup>42</sup>Jare jecuae upurugüirovia vae reta uyemboe Jesús jemimondo reta iporomboe re, jare opaete penti ramiño ñugüinoi. Jecuae uyembati, umbiyao tembú uyupe, jare uyerure Tumpa pe.

### Upurugüirovia vae reta uyapo vae

<sup>43</sup>Jare opaete tenta guasu pegua reta ipiacañi, jare Jesús jemimondo reta uyapo jeta miacañi reta. <sup>44</sup>Jare opaete upurugüirovia vae reta uyembati, jare opaete imbaembae reta penti ramiño co. <sup>45</sup>Jare umee imbaembae reta, jare umbiyao jepicue mbaeti mbae güinoi vae reta pe. <sup>46</sup>Jare opa ara yugüiraa pãve uyembati Tumpa jo pe. Jare tenta tenta rupi umbiyao tembú uyupe jare ucaru pãve reta uyerovia jare ipiacatu reve. <sup>47</sup>Jae reta umbiadora Tumpa, jare opaete tenta guasu pegua reta umae cavi jese reta. Jare opa ara yandeYa umĩru jae reta ndive uyembiasaca vae reta.

### Uguata mbae vae ucuera

**3** <sup>1</sup>Pedro jare Juan yugüiraa pãve Tumpa jo pe, Tumpa pe uyerure vaerã, mbapi ora ma caaru yave. <sup>2</sup>Jare ĩru vae reta güeru opa ara rupi penti cuimbae ipuere mbae uguata vae oñono Tumpa jo jonque pe. Cua onque jee co ipõra vae. Cuimbae ichi güi oa güive ipuere'ã etei uguata. Jocua onque pe cuimbae uyerure corepoti re Tumpa jo pe uique vae reta pe. <sup>3</sup>Cuimbae uecha Pedro jare Juan ndei uique Tumpa jo pe mbove, jare uyerure corepoti re chupe reta. <sup>4</sup>Jayave Pedro jare Juan umae ngatu jese, jare Pedro jei: —Emae oreré.

<sup>5</sup>Jayave cuimbae umae ngatu jese reta, umeeta echa mbae chupe ramo. <sup>6</sup>Ërei Pedro jei:

—Mbaeti anoi corepoti jare oro. Ërei anoi vae tamee ndeve. Jesucristo Nazaret pegua jee re epũa jare uguata —jei chupe.

<sup>7</sup>Jayave Pedro uipisi cuimbae ipo iyacata pe umupũa. Jare jupivoiño ipirãta cuimbae ipi jare ipiñúa. <sup>8</sup>Jare cuimbae uyemboi voi. Jayave uguata jare uique jae

reta ndive Tumpa jo pe. Uguata jare upiririquiriqui oo, jare umbiadora Tumpa.  
 9Jare opaete tenta guasu pegua reta uecha uguata jare umbiadora Tumpa.  
 10Uicuaa reta jae co uguapise Tumpa jo jonque ipõra vae pe uyerure corepoti re vae. Jare ipiacañi reta. Uquiye reta vi cua uyeyapo cuimbae pe vae re.

### Pedro umimbeu yati vae reta pe oca Salomón jee vae pe

11Cuimbae ucuera ma vae uyepisi Pedro jare Juan re. Jare opaete tenta guasu pegua reta osi uyembati ipiacañi reve jae reta ñugüinoi vae pe oca Salomón jee vae pe. 12Jayave Pedro uecha yave, jei tenta guasu pegua reta pe:

—Cuimbae Israel pegua reta, ¿maera pa pepiacañi cua re? ¿Maera pa pemaee ngatu oreré? ¿Pepia pe piyemingueta pa oreiño nduyapo uguata vaerã cua cuimbae orembaepuere rupi ani jupi vae nduyapo ramo? Jucuarãi'ã co —jei—. 13Abraham, Isaac, Jacob jare yandetenondegua reta iTumpa umbiadoraca ma Jesús - jae co Tumpa Tai. Cua Jesús pe reta pemee, jare perñero Pilato jovai. Echa'ã Pilato jei tẽi oyoraca vaerã —jei—. 14Ñerei pe reta perñero cua Jesús - jae co iyoa mbae vae jare jupi vae - jare piyerure Pilato pe oyoraca vaerã peve penti upuruyuca vae —jei Pedro—. 15Jare piyucaca jocua tecove umee yandevae vae. Jae co Tumpa umbijecove ye güeru umanocue vae reta ipite güi. Jocua co ore numimbeu nduico —jei—. 16Mburugüirovia Jesús jee re vae jeco pegua, jae jee umbigüera cua cuimbae pe reta peecha jare picuaa vae. Añete co, jocua mburugüirovia Jesús umee vae umbigüera cavi ete cua cuimbae opaete pe reta perovaque —jei chupe reta—.

17Añave, cherivi reta, aicuaa peruvicha reta jare pe reta vi piyapo cua icavi mbae vae, picuaa'ã ramo —jei—. 18Ñerei jucuarãi uyapo Tumpa, opaete iñee aracae umimbeu vae reta jei rami. Echa'ã jei reta Cristo uiporarañotai co —jei—. 19Jayave peeya piyemingueta icavi mbae vae pepia pe oĩ vae jare piyeroa Tumpa coti, pemaeyoa reta uyembai vaerã, jare ou vaerã yandeYa güi ara mbiacatu pegua reta, 20jare Tumpa ombou ye vaerã Jesucristo tenonde yave jerãcua peve vae —jei—. 21Jae upitata ara pe opaete mbaembae uyeyapicatu cavi regua. Jocua mbaembae re Tumpa imiari oñono tee iñee umimbeu vaerã vae reta rupi aracae güive —jei Pedro chupe reta—. 22Echa'ã Moisés jei yandetenondegua reta pe: 'YandeYa Tumpa ombouta peve iñee umimbeuta vae perivi reta ipite güi, chembou rami. Piyapisacata jese opaete jeita peve vae re. 23Jare ime yave quía uyapisacata'ã jocua Tumpa iñee umimbeuta vae re vae, Tumpa omombota co ñru vae reta ipite güi?' —jei, jei Pedro—.

24Jare jucuarãi vi jei opaete Tumpa iñee aracae umimbeu vae reta Samuel güive. Opaete penti rami umierãcua cua ara reta —jei—. 25Pe reta co jae Tumpa iñee aracae umimbeu vae reta iñemoñaeta, jare petenondegua reta pe Tumpa jei vae uyeyapota peve. Echa'ã Tumpa jei Abraham pe: 'Ñiñemoñaeta rupi ayapota co icavi vae opaete ivi pegua reta pe' —jei, jei Pedro—. 26Tumpa umbijecove ye Tai güeru umanocue vae reta ipite güi,

jare ombou ma peve tenonde ete, uyapo vaerã icavi vae peve, penti penti piyero va vaerã Tumpa coti pereco icavi mbae vae güi —jei Pedro chupe reta.

### Pedro jare Juan mburuvicha reta jovai

**4** <sup>1</sup>Pedro jare Juan imiari ñugüinoi rambueve tenta guasu pegua reta pe, yugüeru sacerdote reta, Tumpa jo iyandarecoa reta juvicha jare saduceo reta. <sup>2</sup>Jae reta pochi Jesús jemimondo reta pe. Echa'ã Jesús jemimondo reta omboe tenta guasu pegua reta, jare umimbeu chupe reta Jesús icove ye co ou umanocue vae reta ipite güi. <sup>3</sup>Jayave jae reta uipisi Pedro jare Juan, jare oñono peresoriru pe piareve regua. Echa'ã caaru ma co. <sup>4</sup>Ërei jeta ete Tumpa ññee uyandu vae reta güirovia. Cuimbae reta güirovia vae cinco mil rupi.

<sup>5</sup>Piareve pe uyembati Jerusalén pe mburuvicha reta, tenta guasu pegua reta itenondegua reta, mboroyocui re oporomboe vae reta, <sup>6</sup>Anás - jae co sacerdote tenondegua - Caifás, Juan, Alejandro jare opaete sacerdote tenondegua jentarã reta. <sup>7</sup>Jayave güeruruca Pedro jare Juan jae reta ipite pe, jare upirandu chupe reta:

—¿Mbae nunga mbaepuere pe pa piyapo cua? Jare ¿quía jee re pa piyapo?

<sup>8</sup>Jayave Pedro tinee Espíritu Santo pe, jare jei chupe reta:

—Mburuvicha tenta guasu pegua reta jare tenondegua Israel pegua reta, <sup>9</sup>añave pepirandu pei oreve cua icavi vae uyeyapo vae re. Pipota picuaa quirã ra cua cuimbae ucuera ma imbaerasi güi —jei Pedro—. <sup>10</sup>Picuaa catu opaete pe reta, jare tuicuaa opaete Israel pegua reta, Jesucristo Nazaret pegua jee re ucuera ma cua cuimbae perovaque oĩ vae. Pe reta picutuca curusu re cua Jesucristo, ãrei Tumpa umbijecove ye güeru umanocue vae reta ipite güi —jei—. <sup>11</sup>Cua Jesús pe reta perĩro, tenta ita pegua iyapoa reta penti ita güirĩro rami. Ërei jae uyeyapo ma ita uñeñono tenonde tentarã vae rami —jei—. <sup>12</sup>Jare mbaeti ye quía re yandepuere yayembiasaca. Echa'ã uñemeẽã ivi pegua reta pe ñru tee, jese uyembiasaca vaerã —jei chupe reta.

<sup>13</sup>Jayave yati vae reta uecha quirã Pedro jare Juan uquiye mbae reve imiari, yepe tẽi mocui reve jeta'ã uyemboe. Jáeramo ipiacañi reta jese. Jare uicuaa Jesús ndive yugüirecose vae. <sup>14</sup>Ërei uecha reta yave cuimbae ucuera vae uyemboi oĩ jae reta ndive, ipuere'ã jei mbae Jesús jemimondo reta coti. <sup>15</sup>Jayave oyocui Pedro jare Juan oẽ rani vaerã ipite güi. Jayave uyemingueta reta.

<sup>16</sup>—¿Mbae ra yayapota cua cuimbae reta pe? Echa'ã opaete Jerusalén pegua reta uicuaa penti miacañi tuicha vae uyapo reta co, jare yande yandepuere'ã yaicuacu —jei reta—. <sup>17</sup>Jayave yayocui cua reta agüiye vaerã añave güiive imiari quía pe cua cuimbae jee re, agüiye vaerã ñru vae reta uicuaa —jei reta.

<sup>18</sup>Jayave ueni Pedro jare Juan, jare oyocui:

—Agüiye ye pemiari ani peporomboe Jesús jee re.

<sup>19</sup>Ërei Pedro jare Juan jei chupe reta:

—¿Mbae ra Tumpa uipota nduyapo vaerã? Nduyapo yave peporoyocui, ndarau nduyapo Tumpa iporoyocui. ¿Mbae nunga mboroyocui ra

nduyapota? Pe reta pemimbeu oreve. <sup>20</sup>Echa'ã ore numimbeuñotai co nduecha jare nduyandu vae —jei reta.

<sup>21</sup>Jayave yati vae reta uminguiye tẽi omondo Pedro jare Juan. Uinupaca'ã, tenta guasu pegua reta güi uquiye ramo. Echa'ã opaete tenta guasu pegua reta umbiadora Tumpa jocua uyeyapo vae jeco pegua. <sup>22</sup>Echa'ã cuimbae miacañi pe ucuera vae cuarenta año uasa ma güinoi.

### Upurugüirovia vae reta uyerure Tumpa pe umiatangãtu vaerã

<sup>23</sup>Jare Pedro jare Juan omoẽ ma yave, yugüiraa iiru reta pe, jare umimbeu chupe reta opaete sacerdote reta itenondegua reta jare tenta guasu pegua reta itenondegua reta jei chupe reta vae. <sup>24</sup>Jae reta cua uyandu yave, uyerure Tumpa pe:

—OreYa Tumpa, nde co jae ara, ivi, i guasu jare opaete mbaembae ñugüinoi pipe vae iyapoa —jei reta—. <sup>25</sup>Nde ndere nderembicui David jee vae rupi cuarãi: '¿Maera pa pochi judío mbae vae reta?

¿Maera pa ivi pegua reta ipia pe uyemingueta uyapo vaerã icavi mbae vae?

<sup>26</sup>Mburuvicha guasu ivi pegua reta

jare ivi pegua reta itenondegua reta uyembati penti rami yandeYa jare Cristo jovaicho retarã.'

Jucuarãi nde ndere David rupi —jei reta—.

<sup>27</sup>Añete co, Herodes, Poncio Pilato, judío mbae vae reta jare Israel pegua reta uyembati cua tenta guasu pe Jesús jovaicho retarã. Jesús co jae ndeRai. Jae co jupi vae nde ndiparavo vae —jei reta—. <sup>28</sup>Uyembati reta uyapo vaerã nde ndiyapoca vae. Aracae güive nde ndipota uyapo reta vaerã —jei reta Tumpa pe—. <sup>29</sup>Añave, oreYa, ndicuaa oreminguiye tẽi vae reta jei vae. Jáeramo orembori numimbeu vaerã niñee nduquiye mbae reve. Echa'ã ore co nderembicui. <sup>30</sup>Jare eechaca nembraepuere ndepurumbigüera vaerã, jare iyapo vi miacañi reta Jesús jee re. Jae co ndeRai jupi vae —jei reta.

<sup>31</sup>Jare opa uyerure yave, yati ñugüinoi vae pe ivicãta vae echa. Jare opaete jae reta tinee Espíritu Santo pe, jare imiari Tumpa iñee re uquiye mbae reve.

### Upurugüirovia vae reta uyembori

<sup>32</sup>Jare opaete upurugüirovia vae reta penti ramiño ñugüinoi.

Mbaeti penti ave jei imbaembae re: "Jocua co chembae." Echa'ã opaete imbaembae reta penti ramiño. <sup>33</sup>Jare mbaepuere tuicha vae reve Jesús jemimondo reta umimbeu yandeYa Jesús icove ye co ou umanocue vae reta ipite güi. Jare opaete jae reta ipiacavi ete. <sup>34</sup>Mbaeti penti ave mbae uata chupe vae jae reta ipite pe. Echa'ã opaete ivi reta jare tenta reta güinoi vae reta umee, jare güeru jepicue, <sup>35</sup>jare oñono Jesús jemimondo reta jovai. Jayave umbiyao reta uata chupe vae reta pe. <sup>36-37</sup>Jare penti levita ivi Chipre pegua José jee vae güinoi vi penti ivi. Jesús jemimondo

reta umbijee cua cuimbae Bernabé. (Cua tee uipota jei: “Upurumbipiacatu vae”). Jae umee iivi jare güeru jepicue oñono Jesús jemimondo reta jovai.

### Ananías jare Safira

**5** <sup>1</sup>Èrei ñru cuimbae Ananías jee vae jembireco Safira jee vae ndive umee penti iivi. <sup>2</sup>Jayave Ananías uñuvatu iyupe mbovi ivi jepicue güi jembireco uicuaa reve, jare güeru mboviño oñono Jesús jemimondo reta jovai. <sup>3</sup>Jayave Pedro jei chupe:

—Ananías, ¿maera pa nemaño Satanás re umitinee vaerã ndepia icavi mbae vae pe? Niñuvatu ndiyupe mbovi ndeivi jepicue güi. Ndapu ma co Espiritu Santo pe —jei—. <sup>4</sup>Ndei neme ndeivi mbove, nembae co. Jare neme ma yave, jepicue vi nembae co. ¿Maera pa ndepia pe ndiyemingueta icavi mbae vae ndiyapo vaerã? Ndapu'ã co cuimbae reta peño. Ndapu Tumpa pe etei —jei Pedro Ananías pe.

<sup>5</sup>Cua uyandu yave, Ananías oa ivi re, jare umano. Jare opaete cua regua uicuaa vae reta uquiye ete. <sup>6</sup>Jayave upña cuimbae tairusu vae reta, jare oñoma umanocue, jare güiraa oñoti.

<sup>7</sup>Mbapí ora ma uasa yave, uique jembireco. Jae uicuaa'ã mbae uyeyapo vae. <sup>8</sup>Jayave Pedro upirandu chupe:

—Emimbeu cheve, ¿peme pa peivi cuarã pe?

Cuña jei chupe:

—Añete, jucuarã pe co —jei.

<sup>9</sup>—¿Maera pa pe reta piyemboemboe pemiavai vaerã yandeYa iEspiritu? —jei Pedro chupe—. Co onque pe ma yugüeru neme iñotia reta. Jae reta ndereraata vi —jei.

<sup>10</sup>Jare jupivoiño Safira oa Pedro jovai, jare umano. Uique ma yave cuimbae tairusu vae reta, uecha umano ma. Jayave güiraa oñoti imecue iyipi pe. <sup>11</sup>Jare upurugüirovia vae reta jare opaete cua mbaembae regua uicuaa vae reta uquiye ete.

### Jeta miacañi reta

<sup>12</sup>Jare uyeyapo jeta miacañi reta tenta guasu pegua reta ipite pe Jesús jemimondo reta rupi. Jare opaete upurugüirovia vae reta uyembati oca Salomón jee vae pe. <sup>13</sup>Jare opaete ñru vae reta uquiye uyembati vaerã jae reta ndive. Èrei tenta guasu pegua reta uipi. <sup>14</sup>Jare jecuaño jeta ñru cuimbae reta jare cuña reta güirovia yandeYa re. <sup>15</sup>Jare tenta guasu pegua reta güiraa imbaerasi vae reta oñono calle reta rupi jupa reve. Cua uyapo reta Pedro iguarasía yepe oĩ vaerã amocue vae re, jae uasa oo oĩ yave. <sup>16</sup>Jare jeta vae yugüeru Jerusalén pe ñru tenta guasu coiño Jerusalén güi ñugüinoi vae reta güi, jare güeru imbaerasi vae reta jare aña oya jese vae reta. Jare opareve ucuera.

### Mburuvicha reta uyapo icavi mbae vae Pedro jare Juan pe

<sup>17</sup>Jayave sacerdote tenondegua jare opaete saduceo jae ndive ñugüinoi vae reta ñacatãa Jesús jemimondo reta re. <sup>18</sup>Jáeramo uipisi reta, jare oñono peresoriru tenta guasu pegua pe. <sup>19</sup>Ërei pïtu yave penti ángel yandeYa pe uyeyocui vae uipea peresoriru jonque reta. Jayave güiraa Pedro jare Juan oca pe, jare jei chupe reta:

<sup>20</sup>—Pecua piyemboi Tumpa jo pe pemimbeu tenta guasu pegua reta pe cua tecove ipiau vae regua.

<sup>21</sup>Cua uyandu yave, Pedro jare Juan uique Tumpa jo pe neimbove asi jare oporomboe.

Cua uyeyapo rambueve, sacerdote tenondegua jare jae ndive ñugüinoi vae reta ueni opaete mburuvicha reta jare tenondegua Israel pegua reta. Jayave jae reta omondo sacerdote tenondegua jembiocui reta peresoriru pe, jae reta güeru vaerã tēi Jesús jemimondo reta. <sup>22</sup>Ërei uyeyocui vae reta yugüiraa uvãe yave, uvãe'ã Jesús jemimondo reta peresoriru pe. Jayave yugüeru ye yave, jei reta yati vae reta pe:

<sup>23</sup>—Nduecha peresoriru jonque reta uyeyuquenda cavi oĩ, jare jãroa reta uyemboi ñugüinoi onque reta rupi. Ërei nduipea yave, nuvãe'ã quía japipe pe —jei reta.

<sup>24</sup>Cua uyandu yave, sacerdote tenondegua, Tumpa jo iyandarecoa reta juvicha jare sacerdote reta itenondegua reta ipiacañi. Jare uicuaa'ã mbae ra uyeyapota. <sup>25</sup>Jayave ou penti vae, jare jei chupe reta:

—Cuimbae piñono peresoriru pe vae reta ime Tumpa jo pe ñugüinoi, jare ombœ ñugüinoi tenta guasu pegua reta —jei.

<sup>26</sup>Jayave Tumpa jo iyandarecoa reta juvicha oo sacerdote tenondegua jembiocui reta ndive, jare güeru cavi Jesús jemimondo reta uinupa mbae reve. Echa'ã uquiye reta tenta guasu pegua reta güi. Ipia pe uyemingueta aramoi uyapita reta ita pe. <sup>27</sup>Jare güeru yave, oñono mburuvicha reta jovai. Jayave sacerdote tenondegua jei Jesús jemimondo reta pe:

<sup>28</sup>—Poyocui tēi ma agüiye ye vaerã peporomboe jocua cuimbae jee re. Echa'ã pemimbeu ma opaete Jerusalén pegua reta pe cua moromboe. Jare pipota pemboya jocua cuimbae imano oreré —jei reta.

<sup>29</sup>Jayave Pedro jare ñru Jesús jemimondo reta jei chupe reta:

—Icavi ete co nduyapo vaerã Tumpa iporoyocui, cuimbae reta iporoyocui güi. <sup>30</sup>Yandetenondegua reta iTumpa umbijecove ye Jesús güeru umanocue vae reta ipite güi. Pe reta picutuca curusu re cua Jesús piyucaca — jei—. <sup>31</sup>Imbaepuere pe Tumpa uyapo ma cua Jesús tenondegua vae jare upurumbiasa vae, Israel pegua reta ueya vaerã iyemingueta icavi mbae vae ipia pe oĩ vae, jare Tumpa umbiasa vaerã chupe reta imbaeyoa reta. <sup>32</sup>Jare ore numimbeu ñru vae reta pe cua, jare Espíritu Santo vi umimbeu. Echa'ã Tumpa umee Espíritu Santo jei vae uyapo vae reta pe —jei reta.

<sup>33</sup>Cua uyandu yave, yati vae reta pochì chupe reta, jare uipota tēi uyuca. <sup>34</sup>Ērei upūa penti fariseo Gamaliel jee vae yati vae reta ipite pe. Jae co penti mboroyocui re oporombœ vae, jare opaete tenta guasu pegua reta uipiu. Jae oyocui omondo reta rani vaerã michi pegua Jesús jemimondo reta oca pe. <sup>35</sup>Jayave jae jei yati vae reta pe:

—Cuimbae Israel pegua reta, pepia pe piyemingueta cavi mbae piyapota cua cuimbae reta pe vae re. <sup>36</sup>Echa'ã caramboe yave uyecuaa Teudas jee vae, jare uyereroviaca ĩru vae reta pe. Jare jeta cuimbae reta, aramoi cuatrocientos, uyembati jae ndive. Ērei jae uyeyucaca, jare opaete jae ndive ñugüinoi vae reta opa uñemiai, jare ipuere'ã ma mbae uyapo. <sup>37</sup>Jaicue rupi, mburuvicha reta upurupapa ñugüinoi yave, uyecuaa Galilea pegua Judas jee vae. Jae umbati jeta tenta guasu pegua reta. Ērei jae vi umano, jare opaete jae ndive ñugüinoi vae reta opa uñemiai —jei Gamaliel chupe reta—. <sup>38</sup>Jáeramo añave che jae peve cua: Agüiye ma piyapo mbae cua cuimbae reta pe, jare pemaño ma jese reta. Echa'ã imbaepuere peño yave jucuarãi imiari reta jare cua mbaembae uyapo reta, ndarau mbae uyapo reta —jei—. <sup>39</sup>Ērei cua Tumpa güi ou yave, ndarau pepuere pembai. Echa'ã aramoi piyovaichota Tumpa ndive —jei chupe reta.

<sup>40</sup>Jare cua Gamaliel jei vae icavi chupe reta. Jayave ueni reta Jesús jemimondo reta, jare uinupa. Jayave oyocui reta agüiye vaerã ma imiari ye Jesús jee re, jare omondo. <sup>41</sup>Jayave Jesús jemimondo reta oē yati vae reta ñugüinoi vae güi. Uyerovia reta, Jesús umaño uiporara reta ramo. Echa'ã uñereriroca reta, Jesús re güirovia ramo. <sup>42</sup>Jare opa ara jecuae oporombœ reta Tumpa jo pe jare tenta reta rupi. Umimbeu ĩru vae reta pe Jesucristo regua.

### Siete cuimbae reta uyeparavoca

**6** <sup>1</sup>Jocua ara reta pe ĩru vae reta upurugüirovia jare uñemĩru ñugüinoi upurugüirovia vae reta ndive yave, griego pe uyemingueta vae reta ñeenguru hebreo pe uyemingueta vae reta coti. Echa'ã uyandareco'ã reta ime umano vae reta griego ñee pe uyemingueta vae re, opa ara rupi mbae uñemee yave. <sup>2</sup>Jayave jocua doce Jesús jemimondo reta umbati upurugüirovia vae reta, jare jei chupe reta:

—Icavi ore ndoo numimbeu vaerã Tumpa ñee, cua reta numingararu vaerãve. <sup>3</sup>Jáeramo piparavo pepite güi, orerivi reta, siete cuimbae jerãcua cavi jese vae reta, tinee Espíritu Santo pe jare iyaracuaa catu vae reta. Jae reta uyapota yandave cua mbaraviquí —jei reta—. <sup>4</sup>Ērei ore jecuae nduyerureta Tumpa pe jare numimbeuta Tumpa ñee —jei reta.

<sup>5</sup>Cua jei vae icavi opareve pe, jare uiparavo reta Esteban - jae co penti cuimbae upurugüirovia cavi jare tinee Espíritu Santo pe vae - Felipe, Prócoro, Nicanor, Timón, Parmenas jare Nicolás - jae co tenta guasu Antioquía pegua judiorã uyeyapo vae. <sup>6</sup>Jayave güeru reta cua uiparavo vae reta Jesús jemimondo reta jovai. Jayave Jesús jemimondo reta uyerure Tumpa pe, jare oñoño ipo jese reta.

7Jare Tumpa iñee jecuae uñemiai. Jeta vae upurugüirovia Jerusalén pe jare uñemüru upurugüirovia vae reta ndive, jare jeta sacerdote reta vi upurugüirovia.

### Uipisi reta Esteban

8Jare Esteban ipiacavi ete, jare mbaepuere reve uyapo miacañi tuicha vae reta tenta guasu pegua reta ipite pe. 9Jare yugüeru amocue cuimbae judío reta itupao pegua reta uyeaca Esteban ndive. Jocua judío reta itupao jee Esclavos Libertados. Cua tupao pegua reta yugüeru tenta guasu reta Cirene jare Alejandría, jare ivi reta Cilicia jare Asia güi. 10Ërei jae reta ipuere'ã umiamiri Esteban. Echa'ã Esteban imiari iyaracuaa catu reve Espíritu Santo rupi. 11Jayave jae reta omboemboe ñru cuimbae reta iyapu vaerã Esteban re.

—Nduyandu jei ñee icavi mbae vae Moisés jare Tumpa coti —jei reta.

12Jucuarãi jae reta umbiarasica tenta guasu pegua reta, tenta guasu pegua reta itenondegua reta, jare mboroyocui re oporombocue vae reta. Jayave cua reta yugüeru uipisi Esteban, jare güiraa mburuvicha reta uyembati vae pe.

13Joco pe jae reta güeru iyapu reve uñeapo jese vae reta. Cua reta jei:

—Cua cuimbae jecuaeñoi jei ñee icavi mbae vae Tumpa jo re jare mboroyocui re. 14Echa'ã nduyandu jei jocua Jesús Nazaret pegua umbaita cua Tumpa jo, jare ueyacata yandevé morombocue Moisés umee yandevé vae reta —jei reta.

15Jayave opaete joco pe uguapí ñugüinoi vae reta umaé ngatu Esteban re, jare jova penti ángel jova echa chupe reta.

### Esteban imiari

**7** 1Jayave sacerdote tenondegua upirandu Esteban pe:  
—¿Añete pa jucuarãi?

2Jayave Esteban jei joco pe ñugüinoi vae reta pe:

—Cheriquei reta, tenta guasu pegua reta itenondegua reta, piyapisaca cheré.

Tumpa yembiadora pegua uyecuaa yandetenondegua Abraham pe, Mesopotamia pe ico yave, ndei oo ico Harán pe mbove —jei—. 3Jare jei chupe: 'Ecuá ndeivi güi jare eeya nerentarã reta, jare ecua jocua ivi aechacata ndeve vae pe' —jei, jei—.

4Jayave Abraham oo Caldeo reta iivi güi, jare ico Harán pe. Jare tu umano yave, Tumpa ombou joco güi cua ivi añave pico pipe vae pe —jei—. 5Ërei Tumpa umee'ã Abraham pe iivirã cua pe, umee'ã ipi jendarã yepe. Ërei jei umeeta co chupe jare inemoñaá reta pe iivirã, yepe tẽi Abraham ndei tai —jei chupe reta—. 6Jare Tumpa umimbeu chupe: 'Niñemoñaá reta yugüirecota ñru vae reta iivi pe, jare jocua ivi pegua reta uyapota jembicocui retarã, jare uyapota icavi mbae vae chupe reta cuatrocientos año pegua. 7Ërei che aiporaracata jocua ivi pegua uyapota jembicocui retarã vae reta pe, jare taicue rupi niñemoñaá reta oẽta joco güi, jare uyeyocuita cheve cua ivi pe' —jei, jei Esteban—. 8Jare Tumpa jei Abraham pe jae jare opaete inemoñaá cuimbae reta uñemicircuncidaca vaerã, imandúa reta vaerã Tumpa jei vae uyapota co. Jáeramo Abraham tai Isaac oa ma yave, Abraham



umircuncida, Isaac ocho ara ma güinoi yave. Jae ramiño vi Isaac umircuncida tai Jacob, jare Jacob umircuncida jocua doce tai yandetenondegua reta —jei—.

<sup>9</sup>Jocua yandetenondegua reta umitarēi José, jare umee corepoti re, José Egipto pe uyeyocui vaerā. Ērei Tumpa ico José ndive, <sup>10</sup>jare uepi opaete susere reta güi. Jare mburuvicha guasu Egipto pegua Faraón uicuaa Tumpa umee José pe ipiacavi jare iyaracuaa catu vaerā. Jáeramo Faraón uyapo mburuvicharā, jare José oyocui opaete Egipto pegua reta jare Faraón jentarā reta —jei—.

<sup>11</sup>Ērei caruai ou opaete Egipto jare Canaán pe, jare opaete vae uiporara. Jare jocua yandetenondegua reta uvāe'ā mbae ave jou vaerā —jei—. <sup>12</sup>Ērei Jacob uicuaa ime tembú Egipto pe yave, omondo jocua yandetenondegua reta joco pe. Jaeramo etei jae reta yugüiraa Egipto pe. <sup>13</sup>Jare Jacob omondo reta ye yave, José uyecuaaca tiquei reta pe, jare Faraón uicuaa José jentarā reta —jei—. <sup>14</sup>Jayave José ombou umimbeu tu pe yugüiraa vaerā ipi jae jare opaete jentarā reta. Opaete rupi ñugüinoi setenta y cinco —jei—.

<sup>15</sup>Jáeramo Jacob oo Egipto pe. Jare joco pe jae jare jocua yandetenondegua reta umano. <sup>16</sup>Taicue rupi inemoñaeta reta güeru jetecue reta Siquem pe, jare joco pe oñoti reta teögüerenda Abraham oguacue pe. Echa'ā Abraham umbiepi Hamor tai reta pe corepoti pe, Siquem pe oñi yave —jei Esteban—.

<sup>17</sup>Ērei coiño ma ou yave Tumpa uyapo vaerā Abraham pe jei vae, yandetenondegua reta jeta uñemoña Egipto pe. <sup>18</sup>Jayave ñru cuimbae uyeyapo Egipto pegua reta juvicha guasurā. Ērei uicuaa'ā José —jei—. <sup>19</sup>Cua mburuvicha guasu iyaracuaa catu uyapo vaerā icavi mbae vae yandetenondegua reta pe. Jei chupe reta uicuaaca vaerā tai reta oa yave, uyucaca vaerā chugüi —jei—. <sup>20</sup>Jocua ara reta pe oa Moisés. Tumpa uau Moisés. Jare mbapi yasi Moisés ico tu jenta pe. <sup>21</sup>Jare uyecuaa yave, Faraón tayi uepi, jare umbicuacuaa imembi rami —jei—. <sup>22</sup>Jare Moisés uyemboe opaete aracuaa Egipto pegua re, jare uyemingueta cavi jare jatangātu —jei Esteban chupe reta—.

<sup>23</sup>Jare Moisés cuarenta año güinoi yave, uipota uecha quirāi ra yugüireco Israel pegua reta - jae reta co jae jentaigua reta. <sup>24</sup>Jare uecha penti Egipto pegua icavi mbae vae uyapo oñi penti Israel pegua pe. Jayave uinupa uyuca Egipto pegua, jare jucuarāi uepi uiporara vae —jei—. <sup>25</sup>Moisés ipia pe uyemingueta tēi jentaigua reta uicuaata co Tumpa uepita jae rupi, ērei uicuaa'ā reta —jei Esteban—. <sup>26</sup>Piareve pe uecha mocui jentaigua reta uñerāro ñugüinoi, jare uipota tēi uyapicatu cavi reta. Jáeramo jei chupe reta: 'Cuimbae reta, pe reta penti tentaigua vae co. ¿Maera pa icavi mbae vae piyapo piyupe?' —jei, jei Esteban—. <sup>27</sup>Ērei jocua cuimbae icavi mbae vae uyapo ñru pe vae umiaña Moisés, jare jei chupe: '¿Quía pa neñono oreruvicharā, orerāa vaerā?' <sup>28</sup>¿Ndipota pa cheyuca Egipto pegua caarumo ndiyuca rami?' —jei, jei Esteban—. <sup>29</sup>Cua uyandu yave, Moisés osi, jare ico ivi ambie Madián jee vae pe. Joco pe uñemoña mocui tai —jei—.

<sup>30</sup>Cuarenta año ma uasa yave, ñana pe coiño ivitu guasu Sinaí jee vae güi oñi yave, penti ángel uyecuaa Moisés pe penti yai jendi oñi vae pe —jei—.

<sup>31</sup> Moisés uecha yave, ipiacañi. Ërei oya jese yave, umae vaerã jese coi güi, uyandu yandeYa ñnee jei: <sup>32</sup> ‘Che co jae ndetenondegua reta - jae co Abraham, Isaac jare Jacob - iTumpa’ —jei, jei—. Jayave Moisés uriri uquiye ramo, jare uipiu umae vaerã jese. <sup>33</sup> Jayave yandeYa jei chupe: ‘Emboi ndepipasa. Echa'ã ndiyemboi co neĩ Tumpa jupi vae jovai. <sup>34</sup> Che añetete aecha quirãi uiporara reta aiparavo vae reta Egipto pe, jare ayandu iyao. Jáeramo agüeyi aepi vaerã. Añave eyu toromondo Egipto pe’ —jei, jei Esteban—.

<sup>35</sup> Cua Moisés co jae Israel pegua reta güiriro vae. Echa'ã jae reta jei chupe: ‘¿Quía pa neñono oreruvicharã, orerãa vaerã?’ —jei reta, jei—. Tumpa omondoca cua Moisés ángel yai jendi vae pe uyecuaa chupe vae pe. Omondoca ico vaerã jae reta juvicharã jare uepi reta vaerã. <sup>36</sup> Moisés güinoë reta güeru, jare uyapo miacañi reta Egipto pe, I Guasu Pita jee vae pe, jare cuarenta año ñana rupi yugüireco rambueve —jei—. <sup>37</sup> Moisés jei Israel pegua reta pe: ‘YandeYa Tumpa ombouta peve ñnee umimbeuta vae perivi reta ipite güi, chembou rami. Piyapisacata jese’ —jei, jei Esteban—. <sup>38</sup> Ángel umingueta Moisés ivitu guasu Sinaí pe, ñana pe uyembati yave Moisés jare yandetenondegua reta. Tumpa umee Moisés pe ñnee tecove pegua, jae umimbeu vaerã yandeve —jei—.

<sup>39</sup> Ërei yandetenondegua reta uipota'ã uyapo Moisés jei vae, jare güiriro reta. Jae reta ipia pe uyemingueta tēi yugüiraa ye vaerã Egipto pe. <sup>40</sup> Jare jei reta Aarón pe: ‘Tyapo ñanetumpa retarã yugüiraa vaerã yanderenonde. Echa'ã yaicuaa'ã mbae ra uyeyapo cua Moisés Egipto güi yandereru vae pe’ —jei reta, jei—. <sup>41</sup> Jayave uyapo reta penti vaca tairusu vae-raanga, jare uyuca reta maemimba umee vaerã jocua itumpa-raanga pe. Uyerovia reta jocua ipo pe uyapo vae re. <sup>42</sup> Jáeramo Tumpa uyerova chugüi reta, jare umaño umbiadora reta vaerã opaete ara regua reta. Echa'ã Tumpa ñnee aracaie umimbeu vae reta itupapire pe uyecuatía oĩ cuarãi:

‘¿Cheve ra pemee maemimba piyuca vae cuarenta año ñana pe pico rambueve, Israel pegua reta?’

<sup>43</sup> Jucuarãi'ã co. Pevoi peraa tumpa-raanga Moloc jee vae ico pipe vae, jare petumpa-raanga Renfán jee vae iyasitata-raanga.

Jae reta jaanga piyapo pemiadora vaerã.

Jáeramo che pomondota Babilonia cuti.’

Jucuarãi uyecuatía oĩ —jei Esteban chupe reta—.

<sup>44</sup> Yandetenondegua reta güirecose o Tumpa uyemingueta chupe reta pipe vae ñana pe. Echa'ã Tumpa oyocui Moisés jocua tupao uyapo vaerã jae uechaca chupe rami etei. <sup>45</sup> Jocua tupao uñemee yandetenondegua reta pe, jare jae reta Josué ndive güeru, cua ivi judío mbae vae reta güi upiro yave. Echa'ã Tumpa omombo reta yandetenondegua reta güi. Jare David ico mburuvicha guasurã yave, imeño cua pe oĩ jocua tupao —jei—. <sup>46</sup> Tumpa umae cavi David re, jare David uyerure Tumpa pe umaño vaerã uyapo Tumpa jo. Echa'ã itenondegua Jacob umbiadora co Tumpa. <sup>47</sup> Ërei Salomón uyapo Tumpa jo, <sup>48</sup> yepe teĩ Tumpa ara pe ico vae ico'ã yambidorarenda yande yayapo vae reta pe. Echa'ã Tumpa ñnee aracaie umimbeu vae jei cuarãi:

49 'Ara co jae cheguapirenda,  
jare ivi co jae chepi jenda' —jei Tumpa—.  
'¿Mbae nunga o ra piyapota cheve?  
¿Quiape ra aputuuta?

50 Chepo pe co ayapo opaete cua mbaembae' —jei.  
Jucuarãi jei Tumpa ñee aracae umimbeu vae —jei Esteban chupe reta—.

51 Pe reta pepiatanta. Pipota'ã piyeyocui Tumpa pe, jare pipota'ã ave piyapisaca jese. Jecuae piyovaicho Espiritu Santo ndive. Petenondegua reta uyapo rami, jucuarãi vi piyapo pe reta —jei—. 52 Petenondegua reta uyapo icavi mbae vae opaete Tumpa ñee aracae umimbeu vae reta pe. Amocue Tumpa ñee aracae umimbeu vae reta jei jocua jupi vae outa co. Petenondegua reta uyuca reta. Jare añave pe reta vi pemee piyucaca jocua jupi vae —jei—. 53 Echa'ã Tumpa umeeca peve iporoyocui ángel reta pe, ãrei piyapo'ã —jei Esteban.

### Esteban imano

54 Jare yati vae reta cua uyandu ma yave, pochi, jare umbiquiririu jã Esteban jei vae jeco pegua. 55 Ërei Esteban tinee Espiritu Santo pe, jare umae ngatu ara coti, jare uecha Tumpa iyembidorarenda jare Jesús Tumpa iyacata coti. 56 Jayave Esteban jei:

—¡Mase! Aecha ara uyepea oĩ, jare aecha vi cuimbaerã uyeyapo vae uyemboi oĩ Tumpa iyacata coti.

57 Jayave jae reta usapicai tanta, jare iyapisa oyopia. Jayave penti rami uepeña reta Esteban uipisi. 58 Jare güiraa ma yave tenta guasu güi ñana coti, uyapi reta ita pe. Jare jocua iyapu reve ñeapo jese vae reta omboi iyasoya, jare oñono penti cuimbae tairusu Saulo jee vae jovai. 59 Jare uyapi reta rambueve, Esteban uyerure:

—CheYa Jesús, eraa cherecove.

60 Jayave uyeatica, jare ñeeãta reve jei:

—CheYa, agüiye tuioporara reta cua mbaeyoa jeco pegua.

Jare cua jei yave, umano.

### Saulo uyapo icavi mbae vae upurugüirovia vae reta pe

**8** 1 Jare Esteban imano icavi Saulo pe. Jare jocua ara upurugüirovia vae Jerusalén pe ñugüinoi vae reta jovaicho reta umbipi uiporaraca chupe reta. Jare Jesús jemimondo retaño upita Jerusalén pe. Opaete ñru upurugüirovia vae reta ñemiai ivi reta Judea jare Samaria rupi. 2 Jare amocue cuimbae umbiadora Tumpa vae reta oñoti Esteban, jare ipiatiti reta jese. 3 Ërei Saulo uiporaraca upurugüirovia vae reta pe. Echa'ã oo tenta tenta rupi, jare umbitiriri güiraa cuimbae reta jare cuña reta oñono peresoriru pe.

### Felipe umimbeu ñee icavi vae Samaria pe

4 Jayave jocua upurugüirovia vae ñemiai vae reta umimbeu ñee icavi vae yugüiraa vae rupi. 5 Felipe oo tenta guasu Samaria pe, jare umimbeu

tenta guasu pegua reta pe Cristo regua. <sup>6</sup>Jare tenta guasu pegua reta uyandu yave, penti rami uyapisaca cavi Felipe umimbeu chupe reta vae re. Uecha vi miacañi uyapo vae reta. <sup>7</sup>Echa'ã añã reta usiri usapicai reve oya jese vae reta güi. Jare jeta ipuere mbae omi vae reta jare jeta uguata mbae vae reta ucuera. <sup>8</sup>Jare jocua tenta guasu pegua reta uyerovia.

<sup>9</sup>Jare joco pe ico penti cuimbae Simón jee vae. Cua cuimbae ipaye vae co, jare umipiacañi umbitavi Samaria pegua reta mbaembae uyapo vae pe. Jáeramo uyereroviaca catu. <sup>10</sup>Jare opaete sambiai reta jare ucuacuaa vae reta uyapisaca cavi jese, jare jei reta:

—Cua cuimbae güinoi Tumpa imbaepuere tuicha vae.

<sup>11</sup>Jáeramo opaete vae uyapisaca cavi jese. Echa'ã jae ipaye vae ramo, ima ma uyapo mbaembae umipiacañi reta vaerã. <sup>12</sup>Ërei Felipe umimbeu tenta guasu pegua reta pe ñee icavi vae. Imiari chupe reta Tumpa iporoyocua re jare Jesucristo re. Jayave cuimbae reta jare cuña reta güirovia jare uyembibautizaca. <sup>13</sup>Jare Simón vi güirovia, jare uyembibautizaca güive upita Felipe ndive. Jare uecha yave miacañi tuicha vae uyeyapo vae reta, ipiacañi.

<sup>14</sup>Jare Jesús jemimondo Jerusalén pe ñugüinoi vae reta uicuaa yave quirãi Samaria pegua reta güirovia ma Tumpa ñnee, omondo reta Pedro jare Juan. <sup>15</sup>Jare jae reta yugüiraa uvãe yave Samaria pe, uyerure upurugüirovia vae reta re, Espíritu Santo ou vaerã chupe reta. <sup>16</sup>Echa'ã ndeiño ou Espíritu Santo chupe reta. Jaeño uyembibautizaca Jesús jee re. <sup>17</sup>Jayave Pedro jare Juan oñono ipo jese reta, jare Espíritu Santo ou chupe reta.

<sup>18</sup>Jare Simón uecha Espíritu Santo ou, Jesús jemimondo reta ipo oñono jese reta yave. Jayave uipota tẽi umee corepoti chupe reta <sup>19</sup>jare jei:

—Cheve vi pemee cua mbaepuere, ou vaerã ipotave vae pe Espíritu Santo, che añono chepo jese yave.

<sup>20</sup>Ërei Pedro jei chupe:

—Nde necañiteita co ndecorepoti reve. Echa'ã ndepia pe ndiyemingueta tẽi ndepuere ndegua corepoti pe mbae Tumpa umee vae —jei—. <sup>21</sup>Nde ndepuere'ã nenoï cua nunga mbaepuere. Echa'ã ndepia jupi'ã Tumpa coti. <sup>22</sup>Eeya cua icavi mbae vae, jare iyerure Tumpa pe. Aramoi umbiasata ndeve cua ndepia pe ndiyemingueta vae re. <sup>23</sup>Echa'ã aicuaa nde niñemiro, jare mbaeyoa jeco pegua ndepuere'ã ndiyapo icavi vae —jei.

<sup>24</sup>Jayave Simón jei chupe reta:

—Piyerure cheré yandeYa pe, agüiye vaerã cua pere cheve vae uyeyapo cheve.

<sup>25</sup>Jayave Pedro jare Juan umimbeu yave Tumpa ñnee ñru vae reta pe, yugüiraa ye Jerusalén pe. Jare yugüiraa rambueve, umimbeu ñee icavi vae jeta ñru Samaria pegua tenta guasu-rai reta rupi.

### Felipe jare Etiopía pegua

<sup>26</sup>Jayave penti ángel yandeYa pe uyeyocui vae jei Felipe pe:

—Epũa ecua sur coti tape Jerusalén güi oo Gaza coti vae rupi.

Cua tape uasa ñana rupi. <sup>27</sup>Jayave Felipe upña oo. Jare penti eunuco ivi Etiopía pegua oo ye jenta coti Jerusalén güi. Echa'ã ou Jerusalén pe umbiadora vaerã Tumpa. Cua eunuco co jae penti mburuvicha. Jae uyandareco ico Candace icorepoti jare ñru imbaembae icavi vae re. Candace co jae Etiopía pegua reta juvicha guasu. <sup>28</sup>Jare eunuco oo ye yave jenta coti, uguapi icarro pe umingueta oo Isaías uicuatiacue vae. Isaías co jae penti Tumpa ñnee aracae umimbeu vae. <sup>29</sup>Jare Espíritu Santo jei Felipe pe:

—Ecuã ñnemĩru pea carro pe oo oĩ vae ndive.

<sup>30</sup>Jayave Felipe osi oo carro coti, jare uyandu cuimbae umingueta Tumpa ñnee Isaías uicuatiacue vae. Jayave upirandu chupe:

—¿Ndicuaa pa nemingueta neĩ vae?

<sup>31</sup>Jare eunuco jei Felipe pe:

—¿Quirãita pa aicuaa, mbaeti yave quía umimbeu cheve?

Jare umiñera Felipe uyupi vaerã icarro pe uguapi jae ndive.

<sup>32</sup>Jare Tumpa ñnee umingueta vae pe uyecuatía oĩ cuarãi:

“Penti ovecha rami uyereraaca umano vaerã.

Jare jae quĩño, penti ovecha-rai jocua uñapi vae jovai oĩ vae quĩño oĩ rami.

<sup>33</sup>Uñereriroca yave, uãa vae reta uyapo'ã jupi vae chupe.

¿Quía ra ipuere umierãcua jentaigua reta regua?

Echa'ã jecove ucañi ivi güi.”

Jucuarãi uyecuatía oĩ.

<sup>34</sup>Jare eunuco jei Felipe pe:

—Aipota nemimbeu vaerã cheve quía re ra jei cua Tumpa ñnee umimbeu vae. ¿Jei pa iyee ani ñru vae re? —jei.

<sup>35</sup>Jayave Felipe umbipi cua Tumpa ñnee uyecuatía oĩ vae güi umimbeu chupe ñee icavi vae Jesús regua. <sup>36</sup>Jare tape rupi yugüiraa rambueve, yugüiraa uvãe i jenda pe, jare eunuco jei:

—Co oĩ i. ¿Ime pa mbae ayapo vaerã ndei ayembibautizaca mbove?

<sup>37</sup>—Ndepurugüirovia yave opaete ndepia pe, ndepuere ndiyembibautizaca —jei Felipe chupe.

—Arovia Jesucristo co jae Tumpa Tai —jei eunuco Felipe pe.

<sup>38</sup>Jayave eunuco umbiyemboica carro, jare mocui reve ugüeyi i pe. Jayave Felipe umbibautiza eunuco. <sup>39</sup>Jare oẽ reta i güi yave, yandeYa iEspíritu güiraa joco güi Felipe. Jare eunuco uecha'ã ye ma. Jayave uyerovia reve oo ye jenta coti.

<sup>40</sup>Jare Felipe uyecuaa tenta guasu Azoto pe. Jare joco güi oo tenta guasu Cesarea pe. Jare oo rambueve, umimbeu ñee icavi vae opaete tenta guasu reta rupi.

**Saulo güirovia Jesús re**  
(Hch 22.6-16; 26.12-18)

**9** <sup>1</sup>Jare Saulo umumburu uyuca vaerã yandeYa re güirovia vae reta, jare oo sacerdote tenondegua pe. <sup>2</sup>Jare uyerure sacerdote tenondegua pe umee vaerã chupe tupapire, ipuere vaerã oo judío reta itupao tenta guasu

Damasco pegua reta pe, jare uvãe yave joco pe cuimbae reta jare cuña reta Jesús re güirovia vae, ipuere vaerã uipisi güeru Jerusalén pe. <sup>3</sup>Jare coiño ma Damasco güi oo yave, aramoño jembipe Saulo re penti tembipe tuicha vae ara güi. <sup>4</sup>Jayave Saulo oa ivi re, jare uyandu ñee jei chupe:

—Saulo, Saulo, ¿maera pa ndiyapo icavi mbae vae cheve?

<sup>5</sup>Jayave Saulo upirandu:

—¿Quía pa co nde, cheYa?

Jayave ñee jei chupe:

—Che co jae Jesús. Nde ndiyapo icavi mbae vae cheve. Nde co jae penti güeye ivira jacuarovi vae re upatara vae rami. Jáeramo ndiporara neĩ.

<sup>6</sup>Saulo uriri uquiye ramo.

—CheYa, ¿mbae pa ndipota ayapo vaerã? —jei.

—Epüa ecua tenta guasu pe, jare amimbeucata ndeve mbae ndiyapota vae —jei yandeYa Saulo pe.

<sup>7</sup>Jare cuimbae Saulo jupíe yugüiraa vae reta uyemboi quíño ñugüinoi ipiacañi güi. Echa'ã uyandu ñee, ërei uecha'ã quiave. <sup>8</sup>Jayave Saulo upüa ivi güi, jare umae tõi, ërei ipuere'ã uecha quía. Jare jae jupíe yugüiraa vae reta uipoco, jare güiraa Damasco pe. <sup>9</sup>Jare Saulo joco pe oi mbapi ara umae mbae reve, jare ucaru'ã jare i jou'ã.

<sup>10</sup>Jare ico Damasco pe penti upurugüirovia vae Ananías jee vae. YandeYa jei chupe ique pe:

—Ananías.

Jare jae jei:

—CheYa, co aĩ.

<sup>11</sup>Jayave yandeYa jei chupe:

—Epüa ecua calle Simi jee vae pe, jare eeca Judas jenta pe penti Tarso pegua. Jae jee co Saulo. Echa'ã jae uyerure oĩ —jei—. <sup>12</sup>Jare jae uecha ma ique pe penti cuimbae Ananías jee vae uique jare oñono ipo jese, umae ye vaerã —jei Tumpa chupe.

<sup>13</sup>Ërei Ananías jei:

—CheYa, jeta vae umimbeu cheve cua cuimbae regua, quirã jeta icavi mbae vae uyapo Jerusalén pe nderé güirovia vae reta pe. <sup>14</sup>Jare cua pe jae ime güinoi mbaepuere sacerdote reta itenondegua reta güi, uipisi vaerã opaete nderé güirovia vae reta —jei.

<sup>15</sup>—Ecuano —jei yandeYa chupe—. Echa'ã che aiparavo ma cherembiporurã, oo vaerã umimbeu cheregua judío mbae vae reta pe, mburuvicha reta pe jare Israel pegua reta pe. <sup>16</sup>Echa'ã che aicuaacata chupe quirã uiporara eteta chereco pegua —jei.

<sup>17</sup>Jayave Ananías oo uique tenta pe. Jare oñono ipo Saulo re jare jei chupe:

—Cherivi Saulo, yandeYa Jesús uyecuaa ndeve, ndeyu tape rupi rambueve. Jae chembou netae ye vaerã, jare netinee vaerã Espíritu Santo pe —jei.

18Jare Jupivoiño mbae uyeequi Saulo jesa güi yanderesapĩra uyeequi rami, jare Saulo umae cavi. Jayave upũa uyembibautizaca. 19Jayave ucaru jare ipirãta ye ma. Jare upita mbovi ara upurugüirovia vae Damasco pe yugüireco vae reta ndive.

### Saulo uñemiñee Damasco pe

20Jayave Saulo umbipi umimbeu Jesús regua judío reta itupao reta pe. Jei chupe reta Jesús co jae Tumpa Tai. 21Jare opaete uyandu vae reta ipiacañi, jare jei:

—¿Jae'ã ra cua Jerusalén pe cua Jesús re güirovia vae reta uiporaraca vae? Jare ou vi cua pe uipisi vaerã cua nunga reta güiraa sacerdote reta itenondegua reta pe —jehi reta.

22Ërei Saulo uñemiatangãtu, jare umiamiri judío Damasco pegua reta. Echa'ã uicuaaca chupe reta Jesús co jae Cristo.

### Judío reta uipota tẽi uipisi Saulo

23Jare ima ma uasa yave, judío reta uyemboemboe uyuca vaerã Saulo. 24Ërei cua jerãcua Saulo pe. Jae reta uãro tenta guasu jonque pe ara rupi jare pĩtu rupi, uyuca vaerã tẽi. 25Ërei upurugüirovia vae reta güiraa Saulo pĩtu yave umbiasa tenta guasu iquesemba ita pegua vae iãrambo rupi umbigüeyi canasta guasu pe.

### Saulo Jerusalén pe

26Jare Saulo oo uvãe yave Jerusalén pe, uipota tẽi uñemĩru upurugüirovia vae reta ndive. Ërei opaete jae reta uyepiu chugüi. Echa'ã güirovia'ã reta jae Jesús re güirovia ma co. 27Ërei Bernabé güiraa Saulo Jesús jemimondo reta pe, jare umimbeu chupe reta quirãi Saulo uecha yandeYa tape rupi, jare quirãi yandeYa umingueta vae. Jei vi chupe reta quirãi Saulo umimbeu uquiye mbae reve Damasco pe Jesús regua. 28Jayave Saulo uñemĩru upurugüirovia vae reta ndive Jerusalén pe. Jecuaeño oẽ Jerusalén güi jare uique ye. 29Jare umimbeu uquiye mbae reve yandeYa regua. Jare uyeaca vi griego pe uyemingueta vae reta ndive. Jáeramo jae reta uipota uyuca. 30Jare upurugüirovia vae reta cua uicuaa yave, güiraa reta Saulo Cesarea pe, jare joco güi omondo tenta guasu Tarso coti.

31Jayave umambeco'ã ma quía upurugüirovia vae reta, jare jae reta uñemimĩrãta opaete Judea rupi, Galilea rupi jare Samaria rupi. Jare yugüireco reta uipiu cavi reve yandeYa, jare Espĩritu Santo umbipiacatu. Jare jecuaeño ĩru vae reta uñemĩru jae reta ndive.

### Eneas ucuera

32Jare Pedro oo opou yave opaete upurugüirovia vae reta ñugüinoi vae rupi, oo uvãe tenta guasu Lida pegua reta pe. 33Joco pe uvãe penti cuimbae Eneas jee vae ocho año ma ico jupa pe vae. Echa'ã ipuere mbae omi vae. 34Jare Pedro jei chupe: —Eneas, Jesucristo nembigüera ma. Epũa ipiso nderupa —jehi.

Jare jupivoiño jae upña. <sup>35</sup>Jare opaete Lida pegua reta jare tenta tenta ñuu Sarón pegua reta uecha cua cuimbae, jare uyerova reta yandeYa coti.

### Dorcas umano jare icove ye

<sup>36</sup>Jare ico tenta guasu Jope pe penti cuña upurugüirovia vae Tabita jee vae. (Cua tee uipota jei ambie ñee pe: Dorcas.) Cua cuña uyapo jeta icavi vae, jare umeei jeta mbae iparavete vae reta pe. <sup>37</sup>Jayave imbaerasi, jare umano. Jare ñru vae reta opa umbiyau yave, oñono penti o ivate vae pe. <sup>38</sup>Jare Lida coiño oñ Jope güi. Jare upurugüirovia vae Jope pegua reta uicuaa ma yave Pedro oñ Lida pe, omondo icoti mocui cuimbae reta jei vaerã chupe:

—Ecuá Jope pe imambae.

<sup>39</sup>Jayave Pedro upña ou jae reta jupíe. Jare ou uvãe yave, ñru vae reta güiraa o ivate vae pe. Joco pe opaete ime umano vae reta yati uyao ñugüinoi, jare uechaca Pedro pe temimonde Dorcas jae reta ndive ico yave uyapocue vae reta. <sup>40</sup>Jayave Pedro omoẽ opaete joco pe ñugüinoi vae reta. Jayave uyeatica jare uyerure Tumpa pe. Jayave uyerova umaẽ teögüe re jare jei:

—Tabita, epña.

Jayave cuña umaẽ, jare uecha Pedro yave, upña uguapí. <sup>41</sup>Jayave Pedro uipisi ipo pe, jare umupña. Jayave ueni upurugüirovia vae reta jare ime umano vae reta, jare uechaca chupe reta icove ye ma co. <sup>42</sup>Jare cua jerãcua opaete Jope pegua reta pe. Jare jeta vae güirovia yandeYa re. <sup>43</sup>Jare Pedro upita ñma Jope pe. Ico penti guacapi umipita vae Simón jee vae jenta pe.

### Pedro jare Cornelio

**10** <sup>1</sup>Ico Cesarea pe penti cuimbae Cornelio jee vae. Jae co sundaro reta juvicha penti ati Italiana jee vae pegua. <sup>2</sup>Jae jare opaete jenta pegua reta umbiadora Tumpa, jare jae umeei jeta mbae iparavete vae reta pe, jare jecuaeñoi uyerure Tumpa pe. <sup>3</sup>Cua cuimbae uecha cavi ique pe penti ángel Tumpa pe uyeyocui vae uique jae oñ vae pe mbapí ora ma caaru yave. Ángel jei chupe:

—Cornelio.

<sup>4</sup>Cornelio uquiye reve umaẽ ngatu ángel re jare upirandu:

—¿Mbae pa, cheYa?

Jare ángel jei chupe:

—Tumpa imandúa ndiyerure reta jare mbae nemei vae reta re. <sup>5</sup>Añave emondo cuimbae reta Jope pe, güeru vaerã penti cuimbae Simón jee vae. Jae uyembíjee Pedro pe —jei—. <sup>6</sup>Jae ico penti guacapi umipita vae Simón ipi. Simón jenta oñ i guasu jembei pe —jei.

<sup>7</sup>Ángel uyemingueta jae ndive vae oo ma yave, Cornelio ueni mocui jembiocui reta jare penti sundaro umbiadora Tumpa vae. Cua sundaro vi uyeyocui Cornelio pe. <sup>8</sup>Jare opa umimbeu cavi chupe reta yave, omondo Jope coti.

<sup>9</sup>Piareve pe guarasi ara mbíteta ma yave, jae reta yugüiraa tape rupi coiño ma Jope güi rambueve, Pedro uyupi tenta írambo, uyerure vaerã Tumpa pe.



<sup>10</sup>Jare iyembai, jare uipota ucaru. Ērei ĩru vae reta omboyi ñugüinoi rambueve jembuiurã, Pedro oque. <sup>11</sup>Jare ique pe uecha ara uyepea jare penti nieso tuicha vae rami vae ugüeyi ou icoti. Cua uyembigüeyi uyepisi reve irundi jembei reta pe. <sup>12</sup>Cua nieso japipe pe ñugüinoi ipotave maemimba uguata vae reta jare opoñi vae reta, jare ipotave güira reta. <sup>13</sup>Jare ou Pedro pe penti ñee:

—Pedro, epüa iyuca jeu.

<sup>14</sup>Ērei Pedro jei:

—Ndarau, cheYa. Jau'ã etei co mboroyocui jei agüiye vaerã jau vae. Icavi'ã co —jei.

<sup>15</sup>Jayave ñee jei chupe:

—Tumpa umee ndeu vaerã vae, agüiye erĩro.

<sup>16</sup>Cua mbapi vese ma uyeyapo yave, nieso rami vae uyereraa ye ara pe. <sup>17</sup>Jare Pedro ipiacañi reve ipia pe uyemingueta oĩ rambueve mbae re ra uyemijaanga cua ique pe uecha vae, cuimbae Cornelio ombou vae reta upirandu yugüeru Simón jenta re, jare yugüeru ma uvãe onque pe. <sup>18</sup>Jare jae reta ueni upirandu joco pe ra ico Simón uyembijee Pedro pe vae. <sup>19</sup>Jare Pedro ipia pe uyemingueta oĩ rambueve jocua ique pe uecha vae re, Espíritu Santo jei chupe:

—Mase, mbapi cuimbae reta ndereca. <sup>20</sup>Epüa egüeyi ecua jae reta jupíe neatẽi mbae reve. Echa'ã che co ambou —jei.

<sup>21</sup>Jayave Pedro ugüeyi cuimbae Cornelio ombou vae reta ñugüinoi vae pe, jare jei chupe reta:

—Che co jae pe reta peeca vae. ¿Maera pa peyu chereca?

<sup>22</sup>Jayave cuimbae reta jei Pedro pe:

—Ime penti cuimbae Cornelio jee vae. Jae co cuimbae jupi vae. Umbiadora co Tumpa. Jae co sundaro reta juvicha opaete judío reta uyemingueta cavi jese vae. Penti ángel Tumpa pe uyeyocui vae jei chupe ndereruca vaerã jenta pe, jae uyapisaca vaerã nemimbeuta chupe vae re —jei reta.

<sup>23</sup>Jayave Pedro uruique cuimbae reta, jare umimbíta joco pe. Jayave piareve pe Pedro upüa oo jae reta jupíe. Jare amocue upurugüirovia vae Jope pegua reta yugüiraa jae jupíe.

<sup>24</sup>Jare piareve pe yugüiraa uvãe Cesarea pe. Jare Cornelio umbati ma jentarã reta jare ĩru reta, jare uãro oĩ Pedro. <sup>25</sup>Jare Pedro uiqueta ma yave tenta pe, Cornelio oo oovãiti jare uyeatica Pedro jovai umbiadora vaerã. <sup>26</sup>Ērei Pedro jei chupe:

—Epüa. Che cuimbaeño vi co.

Jare umupüa. <sup>27</sup>Jare uyemingueta jae ndive rambueve, Pedro uique tenta pe, jare uecha jeta vae yati ñugüinoi joco pe. <sup>28</sup>Jayave Pedro jei chupe reta:

—Pe reta picuaa cavi co quirã penti judío ipuere'ã uñemiĩru penti judío mbae vae ndive, jare quirã ipuere'ã opou ipi. Ērei Tumpa uechaca cheve quirã icavi'ã aeni vaerã penti vae yepe iquia vae, yepe tẽi uyapo'ã mboroyocui. <sup>29</sup>Jáeramo pe reta cherenica yave, ayu cheatẽi mbae reve. Añave tapirandu peve, ¿maera pa cherenica? —jei Pedro.

<sup>30</sup>Jayave Cornelio jei chupe:

—Irundi ara ma uasa cuarãi yave ayerure añ ayecuacu reve tembú güi cua cherenta pe. Jare aramoño mbapi ora ma caaru yave aecha penti cuimbae uyemboi oĩ cherovai. Jemimonde jembipe —jei—. <sup>31</sup>Jae jei cheve: Cornelio, ndiyerure uyendu ma, jare Tumpa imandúa ma mbae nemei vae reta re. <sup>32</sup>Emondo quía Jope pe, jare eruruca Simón uyembijee Pedro pe vae. Jae ico penti guacapi umipíta vae Simón ipi. Simón jenta oĩ ì guasu jembei pe. Ou yave, jae neminguetata —jei cheve, jei—. <sup>33</sup>Jáeramo jupivoño amondo ndecotì, jare yasurupai ndeyu vae re. Añave ore co noĩ opaete cua pe Tumpa jovaque, nduyandu vaerã opaete Tumpa ndeocui vae re —jei.

<sup>34</sup>Jayave Pedro jei chupe reta:

—Añetete aicuaa ma quirãi Tumpa uau'ã penti vaño ìru vae güi. <sup>35</sup>Echa'ã jocua umbiadora jare jupi vae uyapo vae ipotave ivi pegua icavi co Tumpa pe —jei—. <sup>36</sup>Tumpa ombou ñee icavi vae Israel pegua reta pe. Jae umimbeu chupe reta ime mbiacatu Jesucristo re. Jesucristo co jae opaete vae iYa —jei Pedro—. <sup>37-38</sup>Juan umimbeu uyapisaca jese vae reta pe uyembibautizaca vaerã. Cua jaicue rupi Jesús Nazaret pegua jerãcua Galilea pe jare opaete Judea rupi. Jerãcua quirãi Tumpa umee chupe Espíritu Santo jare mbaepuere, jare quirãi jae oo opaete que rupi uyapo icavi vae, jare quirãi umbigüera opaete aña guasu uiporaraca chupe vae reta. Echa'ã Tumpa ico jae ndive. Opaete cua pe reta picuaa co —jei—. <sup>39</sup>Jare ore numimbeu ìru vae reta pe opaete Jesús uyapo Judea rupi jare Jerusalén pe vae. Jayave judío reta uicutuca curusu re uyucaca —jei Pedro chupe reta—. <sup>40</sup>Èrei Tumpa umbijecove ye güeru umanocue vae reta ipite güi mbapì ara umano rendave pe, jare umbiyecuaa. <sup>41</sup>Umbiyecuaa'ã opaete vae pe, jaeño oreve. Echa'ã tenonde ma Tumpa oreparavo numimbeu vaerã ìru vae reta pe. Ore nducaru jare ì ndou jae ndive, icove ye yave ou umanocue vae reta ipite güi —jei—. <sup>42</sup>Jare jae oreocui numimbeu vaerã ìru vae reta pe quirãi Tumpa uiparavo uãa vaerã icove vae reta jare umanocue vae reta —jei Pedro—. <sup>43</sup>Cua regua co umimbeu opaete Tumpa ñee aracae umimbeu vae reta. Echa'ã jae reta jei Tumpa umbiasata opaete jese güirovia vae reta pe imbaeyoa reta jae jeco pegua —jei.

### **Espíritu Santo ou judío mbae vae reta pe**

<sup>44</sup>Jare Pedro imiari oĩ rambueve, Espíritu Santo ou opaete cua ñee uyandu vae reta pe. <sup>45</sup>Jare judío upurugüirovia vae Pedro jupíe yugüeru vae reta ipiacañi quirãi judío mbae vae reta pe vi uñemee Espíritu Santo vae re. <sup>46</sup>Echa'ã jae reta uyandu uyemingueta reta ambie vae ñee pe. Jare uyandu vi umbiadora Tumpa. <sup>47</sup>Jayave Pedro jei:

—¿Quía pa umbiavaita agüiye vaerã uyembibautizaca cua reta? Echa'ã Espíritu Santo ou ma chupe reta, yandave ou rami —jei.

<sup>48</sup>Jayave Pedro oyocui uyembibautizaca vaerã yandeYa Jesús jee re. Jayave joco pegua reta umiñera Pedro upita vaerã jae reta ndive mbovi ara pegua.

### Pedro umimbeu upurugüirovia vae Jerusalén pegua reta pe

**11** <sup>1</sup>Jayave Jesús jemimondo reta jare ĩru upurugüirovia vae Judea rupi ñugüinoi vae reta uicuaa quirāi judío mbae vae reta vi güirovia Tumpa ñnee. <sup>2</sup>Jayave Pedro oo ye uvāe yave Jerusalén pe, judío upurugüirovia vae reta uñeengata chupe. <sup>3</sup>Jae reta jei:

—¿Maera pa ndique judío mbae vae reta jenta pe? ¿Maera pa ndecaru jae reta ndive? —jei reta.

<sup>4</sup>Jayave Pedro iyipi güive umbipi umimbeu cavi chupe reta opaete uyeyapo vae. Jae jei chupe reta:

<sup>5</sup>—Che ayerure aĩ yave tenta guasu Jope pe, cheque pe aecha penti nieso tuicha vae rami vae ugüeyi ou checoti. Cua uyembigüeyi ara güi uyepisi reve irundi jembei reta pe ou uvāe cheve —jei—. <sup>6</sup>Amae ngatu jese yave, aecha maemimba uguata vae reta, amocue pochi vae jare amocue pochi mbae vae, jare maemimba opoñi vae reta, jare güira reta. <sup>7</sup>Jare ayandu vi penti ñee jei cheve: ‘Pedro, epúa iyuca jEU’ —jei, jei Pedro—. <sup>8</sup>Ērei che jae: ‘Ndarau, cheYa. Jau!ā etei co mboroyocui jei agüiye vaerā jau vae. Icavi!ā co’ —jae chupe, jei—. <sup>9</sup>Ērei ñee ou ara güi vae jei cheve: ‘Tumpa umee ndeu vaerā vae, agüiye eriro’ —jei cheve, jei—. <sup>10</sup>Jare cua mbapi vese ma uyeyapo yave, opaete uyereraa ye ara pe. <sup>11</sup>Jare jupivoiño yugüeru uvāe che aico vae pe mbapi cuimbae Cesarea güi Cornelio ombou vae reta —jei Pedro—. <sup>12</sup>Jare Espiritu Santo jei cheve aa vaerā jae reta jupíe cheatēi mbae reve. Jare cua seis upurugüirovia vae reta vi yugüiraa cherupíe, jare nduique jocua cuimbae jenta pe —jei. <sup>13</sup>Jare jocua cuimbae umimbeu oreve quirāi uecha penti ángel uyemboi oĩ jae jo pe, jare quirāi ángel jei chupe: ‘Emondo cuimbae reta Jope pe eruruca penti cuimbae Simón jee vae. Jae uyembijee Pedro pe’ —jei chupe, jei—. <sup>14</sup>Jae umimbeuta ndeve ñee, nde jare opaete nerenta pegua reta piyembiasaca vaerā —jei chupe, jei—. <sup>15</sup>Jayave che ambipi amingueta reta yave, Espiritu Santo ou chupe reta, yandeve tenonde yave ou rami. <sup>16</sup>Jayave chemandúa yandeYa jei yandeve vae re. Echa!ā jei: ‘Juan upurumbibautiza i pe. Ērei pe reta piyembibautizacata Espiritu Santo pe’ —jei yandeYa, jei—. <sup>17</sup>Tumpa umee chupe reta Espiritu Santo yande yarovia yandeYa Jesucristo re vae pe umee vae. Jáeramo che chepuere!ā etei ambiavai Tumpa uyapo vae —jei.

<sup>18</sup>Jayave cua Pedro jei chupe reta vae uyandu yave, jae reta ipuere!ā ma mbae jei. Umbiadoraño Tumpa, jare jei reta:

—Tumpa umaeño vi judío mbae vae reta re ueya vaerā iyemingüeta icavi mbae vae ipia pe oĩ vae, güinoi vaerā tecove opa mbae vae.

### Upurugüirovia vae reta Antioquía pe

<sup>19</sup>Jare Esteban uyuca yave, jovaicho reta uiporaraca upurugüirovia vae reta pe. Jare upurugüirovia vae reta opa uñemiai, jare yugüiraa uvāe ivi Fenicia, Chipre jare Antioquía pe. Jare jae reta umimbeu judío reta peño Tumpa ñnee. <sup>20</sup>Ērei jae reta ipite pe ñugüinoi amocue cuimbae Chipre jare Cirene pegua.

Cua reta yugüiraa uvãe yave Antioquía pe, umingueta judío mbae vae reta pe vi, jare umimbeu chupe reta ñee icavi vae yandeYa Jesús regua. <sup>21</sup>Jare yandeYa ombori, jare jeta vae güirovia jare uyerova yandeYa coti.

<sup>22</sup>Jare cua jerãcua upurugüirovia vae Jerusalén pe ñugüinoi vae reta pe. Jayave jae reta omondo Bernabé Antioquía pe. <sup>23</sup>Jare jae oo uvãe yave, uecha jocua uyeyapo Tumpa ipiacavi jeco pegua vae, jare uyerovia. Jayave jei chupe reta jecuaño uguata cavi vaerã yandeYa ndive ipirãta reve ipia pe. <sup>24</sup>Echa'ã Bernabé co jae cuimbae ipiacavi vae. Jae upurugüirovia cavi, jare tinee Espíritu Santo pe. Jare jeta vae güirovia yandeYa re jare uñemĩru upurugüirovia vae reta ndive.

<sup>25</sup>Cua jaicue rupi Bernabé oo Tarso pe, ueca vaerã Saulo. Jare uvãe chupe yave, güeru Antioquía pe. <sup>26</sup>Jare joco pe uñemĩru reta penti año upurugüirovia vae reta ndive, jare omboe jeta vae. Jare Antioquía pe jaeramo etei ĩru vae reta umbipi jei upurugüirovia vae reta re:

—Cua reta co jae cristiano reta.

<sup>27</sup>Jare jocua ara reta pe amocue Tumpa ñnee umimbeu vae reta yugüeru Jerusalén güi Antioquía pe. <sup>28</sup>Penti jee co Agabo. Jae upúa uyemboi, jare jei Espíritu Santo rupi imeta co caruai tuicha vae opaete ivi rupi. Cua uyeyapo Claudio mburuvicha guasurã ico yave. <sup>29</sup>Jayave penti penti upurugüirovia vae reta iquirẽi omondo ime güinoi vae güi, ombori vaerã upurugüirovia vae Judea rupi ñugüinoi vae reta. <sup>30</sup>Jare jucuarãi uyapo reta. Jare jae reta omondo upurugüirovia vae reta itenondegua reta pe Bernabé jare Saulo ndive.

### Herodes uyucaca Jacobo, jare oñonoca Pedro peresoriru pe

**12** <sup>1</sup>Jocua ara reta pe mburuvicha guasu Herodes uipisica amocue upurugüirovia vae reta, uyapo vaerã icavi mbae vae chupe reta. <sup>2</sup>Jare uyucaca quise pe Jacobo - jae co Juan tiquei. <sup>3</sup>Jare Herodes uicuaa yave cua uyapo vae icavi judío reta pe, uipisica Pedro vi. Jocua ara reta pe judío reta jou ñugüinoi mbiyape ovu mbae vae. <sup>4</sup>Jare uipisica ma yave, oñonoca peresoriru pe. Umee irundi ati sundaro reta pe uyandareco jese vaerã. Penti penti ati güinoi irundi sundaro. Herodes uipota tẽi güinoẽca Pedro tenta guasu pegua reta jovai pascua uasa ma yave. <sup>5</sup>Jayave sundaro reta uyandareco Pedro re peresoriru pe. Ērei upurugüirovia vae reta icueri mbae reve uyerure Tumpa pe jese.

### Pedro oẽ peresoriru güi

<sup>6</sup>Piareve pe ma Herodes güinoẽcata tẽi yave, jocua pĩtu etei Pedro oque oĩ mocui sundaro ipãu pe, jare uñeapĩti oĩ mocui cadena pe. Jare sundaro reta peresoriru jonque uãro ñugüinoi. <sup>7</sup>Jare aramoiño penti ángel yandeYa pe uyeyocui vae uyecuaa, jare penti tembipe uesape peresoriru pe. Jayave ángel uñatai Pedro iyique pe umbisareco vaerã, jare jei chupe:

—Epúa voi.

Jare cadena reta uyera ipapi güi. <sup>8</sup>Jayave ángel jei chupe:

—Iyemonde jare emonde vi ndepipasa.

Jare Pedro jucuarãi uyapo. Jayave ángel jei chupe:

—Iñeñoma ndeasoya pe, jare eyu cheraiçue. <sup>9</sup>Jayave Pedro oẽ oo ángel jaicue rupi. Jae uicuaa'ã añete ra ángel uyapo vae. Ipiã pe uyemingueta tẽi opaete cua uecha oĩ ique pe vae. <sup>10</sup>Uasa ma yave mocui sundaro peresoriru uãro vae, yugüiraa uvãe onque fierro calle coti oo vae pe. Cua onque jaei uyepea chupe reta. Jare oẽ reta ma yave, uguata reta penti calle rupi. Jayave aramoño ángel oo Pedro güi ueya. <sup>11</sup>Jayave ramo Pedro uicuaa cua uyeyapo vae añete co, jare jei iyupe:

—Añave aicuaa cheYa co ombou ángel jare cherepica Herodes güi jare opaete judío reta uipota uyapo cheve vae güi.

<sup>12</sup>Cua re ipiã pe uyemingueta rambueve, oo uvãe María jenta pe. María co jae Juan Marcos ichi. Joco pe jeta vae yati uyerure ñugüinoi Tumpa pe. <sup>13</sup>Pedro ombopu onque, jare oẽ tenta güi penti cuñatai Rode jee vae uyapisaca vaerã. <sup>14</sup>Cua cuñatai uicuaa Pedro iñee, ãrei uyerovia güi uipea'ã onque. Osi uique tenta pe, jare umimbeu ñru reta pe Pedro co oĩ onque pe. <sup>15</sup>Ërei jae reta jei chupe:

—Nembiquere co.

Ërei jae jeiete jei añete co. Jayave jae reta jei:

—Ñangel uyandarecose jese vae co.

<sup>16</sup>Ërei Pedro jecuae ombopu onque. Jare jae reta uipea yave, uecha jae co, jare ipiacañi. <sup>17</sup>Ërei Pedro umupüa ipo umiquüi reta vaerã, jare umimbeu chupe reta quirãi yandeYa güinoẽ peresoriru güi. Jare jei chupe reta:

—Picuaaca cua Jacobo jare ñru upurugüirovia vae reta pe.

Jayave oẽ oo joco güi icoti'ã.

<sup>18</sup>Jare cõe rupive sundaro reta uyemipia'ã ete. Echa'ã uicuaa'ã mbae ra uyeyapo Pedro pe. <sup>19</sup>Jare Herodes uecaca tẽi yave, Pedro uñevãe'ã. Jayave Herodes upirandu sundaro reta pe jese. Jayave oyocui sundaro reta uyeyucaca vaerã. Jayave Herodes oo Judea güi Cesarea pe, jare upita joco pe.

### Herodes umano

<sup>20</sup>Jare Herodes pochì ico Tiro pegua reta jare Sidón pegua reta coti. Jayave jae reta penti rami yugüeru ipi, jare uñemñiru reta penti mburuvicha guasu jembicui tenondegua vae Blasto jee vae ndive. Jae reta jei chupe agüiye vaerã mburuvicha guasu pochì chupe reta. Echa'ã jae reta güeru jemburã mburuvicha guasu Herodes iivi güi. <sup>21</sup>Jare Herodes uiparavo penti ara imiari vaerã chupe reta. Jayave jocua ara Herodes uyemonde cavi, jare uguapì mburuvicha upuruãa vae pe, jare imiari chupe reta. <sup>22</sup>Jare jae reta iñeeãta reve jei:

—Tumpa iñee co, cuimbae iñee'ã co.

<sup>23</sup>Jare jupivoiño penti ángel yandeYa pe uyeyocui vae umimbaerasi Herodes taso pe. Echa'ã Herodes umbiadora'ã Tumpa. Jáeramo umano.

<sup>24</sup>Ërei Tumpa iñee uñemiai, jare jeta vae upurugüirovia.

<sup>25</sup>Jare Bernabé jare Saulo yugüeru ye Jerusalén güi, iparaviqui joco pe uyapo ma yave. Jare güeru jae reta jupíe Juan Marcos.

### Bernabé jare Saulo yugüiraa umimbeu ñee icavi vae

**13** <sup>1</sup>Jare yugüireco upurugüirovia vae Antioquía pe ñugüinoi vae reta ipite pe amocue Tumpa ñee umimbeu vae reta jare Tumpa ñee re oporomboc vae reta. Jae reta co Bernabé, Simón Niger, Lucio Cirene pegua, mburuvicha guasu Herodes jentarã Manaén jee vae jare Saulo. <sup>2</sup>Cua reta uyeyocui yandeYa pe jare uyecuacu tembú güi rambueve, Espíritu Santo jei chupe reta:

—Pemondo Bernabé jare Saulo uyapo vaerã mbaraviqui che aiparavo ma chupeguarã vae.

<sup>3</sup>Jare uyecuacu reta tembú güi, jare uyerure reta Tumpa pe. Jayave ñru reta oñono ipo jese reta jare omondo.

### Umimbeu reta ñee icavi vae Chipre pegua reta pe

<sup>4</sup>Jayave Saulo jare Bernabé uyemondoca Espíritu Santo pe, jare yugüiraa tenta guasu Seleucia pe, jare joco güi uasa i guasu rupi ivi Chipre pe. <sup>5</sup>Jare yugüiraa uvãe yave tenta guasu Salamina pe, umimbeu reta Tumpa ñee judío reta itupao reta pe. Jare Juan oo jae reta ndive ombori vaerã. <sup>6</sup>Jare opaete Chipre umbapi yave, yugüiraa uvãe tenta guasu Pafos pe, jare joco pe uñevãe penti judío Barjesús jee vae ndive. Jae co penti ipaye vae, jare jei jae co penti Tumpa ñee umimbeu vae. Cua jei upurumbitavi vaerã. <sup>7</sup>Cua cuimbae oĩ mburuvicha Sergio Paulo jee vae ndive. Cua mburuvicha iyaracuaa catu co. Jae ueni Bernabé jare Saulo, jare uipota uyapisaca Tumpa ñee re. <sup>8</sup>Èrei Elimas (cua tee uipota jei: “Ipaye vae”) umbiavai, agüiye vaerã tẽi mburuvicha upurugüirovia. <sup>9</sup>Èrei Saulo (uyembijee vi Pablo pe vae) tinee Espíritu Santo pe, jare umae ngatu Elimas re <sup>10</sup>jare jei chupe:

—Nde co jae añã guasu tai upurumbitavi vae. Nde ndiyapo icavi mbae vae, jare ndipota'ã ñru vae reta uyapo vaerã jupi vae. Jecuaeño ndeporoyopia yandeYa jape icavi vae güi. <sup>11</sup>Mase, añave yandeYa tombou ipo nderé, nderesa mbae ndico vaerã. Ndarau ndeecha guarasi mbovi ara pegua —jei.

Jare jupivoiño Elimas ipuere'ã mbae uecha, pĩtumimbi oĩ yave rami, jare coti coti uyerova ueca tẽi quía uipoco güiraa vaerã. <sup>12</sup>Jayave mburuvicha cua uyeyapo vae uecha yave, güirovia Tumpa ñee. Echa'ã ipiacañi yandeYa iporomboc re.

### Pablo jare Bernabé Antioquía Pisidia pegua pe

<sup>13</sup>Jayave Pablo jare jae ndive ñugüinoi vae reta yugüiraa Pafos güi, jare uasa i guasu rupi tenta guasu Perge ivi Panfilia pegua pe. Èrei Juan ueya reta oo ye Jerusalén coti. <sup>14</sup>Jayave jae reta yugüiraa Perge güi tenta guasu Antioquía Pisidia pegua coti. Jare joco pe yugüiraa uvãe yave, uique reta judío reta itupao pe mbutuu ara pe, jare uguapĩ reta. <sup>15</sup>Jare ñru vae reta opa umingueta yave mboroyocui güi jare Tumpa ñee araca umimbeu vae reta uicuatiacue güi, tupao pegua reta itenondegua reta omondo jei chupe reta:

—Orerivi reta, ime yave ñee penoi orembiaracuaa vaerã, pepuere piyemingueta.

<sup>16</sup>Jayave Pablo upña, jare umupña ipo umiquiñi reta vaerã. Jayave jei chupe reta:

—Cuimbae Israel pegua reta jare opaete pe reta Tumpa re pipiu vae, piyapisaca cheré. <sup>17</sup>Israel pegua reta iTumpa uiparavo yandetenondegua reta, jare umbutuichaca Egipto pe yugüireco rambueve. Ërei Egipto jae reta iivi'ã co. Jare Tumpa imbaepuere tuicha vae pe güinoõ joco güi —jei—. <sup>18</sup>Jare cuarenta año urupia chupe reta ñana rupi. <sup>19</sup>Jare opa umbai yave Canaán güi siete ivi ambiembie vae pegua reta, umee cua reta iivicue Israel pegua reta pe iivirã —jei—. <sup>20</sup>Cua jaicue rupi cuatrocientos cincuenta año rupi Tumpa umee chupe reta mburuvicha reta uãa vaerã Samuel oĩ regua. Samuel co jae Tumpa iñee aracae umimbeu vae —jei—. <sup>21</sup>Jayave jae reta uyerure mburuvicha guasare. Jayave Tumpa umee chupe reta Cis tai Saúl jee vae cuarenta año pegua. Jae co penti cuimbae Benjamín iñemoña pegua. <sup>22</sup>Jare Tumpa cua cuimbae omombo yave, umee chupe reta David juvicha guasurã. Jare Tumpa jei David re: 'Che aicuaa Isaf tai David. Jae co penti cuimbae chembiyerovia vae. Jae uyapota opaete che aipota vae' —jei, jei Pablo—. <sup>23</sup>Cua David iñemoña reta güi Tumpa umee Jesús. Jae co Israel pegua reta umbiasa vae. Jucuarãi Tumpa uyapo ma aracae jei vae —jei—. <sup>24</sup>Ndeí Jesús ou mbove, Juan umimbeu opaete Israel pegua reta pe ueya vaerã iyemingueta icavi mbae vae ipia pe oĩ vae, jare uyembibautizaca vaerã. <sup>25</sup>Jare Juan opata ma umimbeu chupe reta yave, jei: 'Pe reta pepia pe piyemingueta tẽi che co jae. Ërei jucuarãi'ã. Co ou cheraicue ñru vae. Jupi'ã co che amboi vaerã ipipasa' —jei, jei—.

<sup>26</sup>Cheriquei reta, pe reta co jae Abraham iñemoña reta jare ñru vae reta pe reta Tumpa re pipiu vae co. Tumpa ombou peve cua ñee piyembiasaca vaerã. <sup>27</sup>Echa'ã Jerusalén pegua reta jare juvicha reta uicuaa'ã quã ra co jae Jesús. Uicuaa'ã vi Tumpa iñee aracae umimbeu vae reta uicuatiaque opa mbutuu ara pe jae reta umingueta tẽi vae. Jáeramo jae reta jei Jesús uyeyucaca vaerã, jare jucuarãi uyeyapo uyecuatía oĩ jese vae —jei Pablo—. <sup>28</sup>Jare yepe tẽi uvãe'ã teco Jesús re uyucaca reta vaerã, ãrei uyerure Pilato pe uyucaca vaerã. <sup>29</sup>Jare jae reta opa ma uyapo chupe yave opaete jese uyecuatía oĩ vae, umbigüeyica reta curusu güi, jare oñonoca teögüeriru pe —jei—. <sup>30</sup>Ërei Tumpa umbijecove ye güeru umanocue vae reta ipite güi. <sup>31</sup>Jare jeta ara uyecuaa jae jupie yugüiraa Galilea güi Jerusalén pe vae reta pe. Jae reta añave umimbeu ñru vae reta pe —jei Pablo chupe reta—. <sup>32-33</sup>Jare ore vi numimbeu peve ñee icavi vae, quirãi Tumpa jei yandetenondegua reta pe vae Tumpa etei uyapo ma yandevẽ. Echa'ã umbijecove ye Jesús güeru umanocue vae reta ipite güi. Uyecuatía oĩ Salmo mocui pe cuarãi: 'Nde co jae cheRai. Cua ara che co jae ndeRu.' Jucuarãi uyecuatía oĩ. <sup>34</sup>Tumpa umbijecove ye güeru umanocue vae reta ipite güi, agüiye vaerã etei jetecue icumegua. Jare cua re jei: 'Tamee ndeve bendición reta David pe jae ameeta chupe vae' —jei Tumpa, jei—. <sup>35</sup>Jáeramo jei ñru Salmo pe: 'Che co jae jupi vae. Nemaẽnota'ã cheretecue re icumegua vaerã' —jei, jei—. <sup>36</sup>Echa'ã David opa uyeyocui yave opaete jentaigua reta pe Tumpa uipota vae rupi, umano, jare uñeñotica itenondegua reta ñugüiñoi



vae pe, jare jetecue icumegua —jei—. <sup>37</sup>Ërei jocua Tumpa umbijecove ye güieru umanocue vae reta ipite güi vae jetecue icumegua'ã etei —jei—. <sup>38</sup>Jáeramo, cheriquei reta, picuaa cavi cua ore numimbeu iru vae reta pe vae. Tumpa umbiasata peve pembaeyoa reta cua Jesús rupi. <sup>39</sup>Jare opaete güirovia jese vae reta uyembujupica ma. Echa'ã yandepuere'ã yayembujupica Moisés iporoyocui re —jei—. <sup>40</sup>Jáeramo piñemoa ngatu, agüiye vaerã uyeyapo peve Tumpa iñee araca umimbeu vae reta jei vae. Echa'ã jei reta cuarã:

<sup>41</sup> 'Mase, upurugüirũro vae reta, pepiacañi jare pecañitei' —jei Tumpa—. 'Echa'ã che ayapota penti mbaraviqui pico rambueve.

Pe reta ndarau perovia, yepe tẽi quã umimbeuta peve' —jei.

Jucuarãi jei reta —jei.

<sup>42</sup>Jare oẽ reta yave judío reta itupao güi, judío mbae vae reta umiñera umimbeu vaerã chupe reta cua ñee mbutuu ara outa vae pe. <sup>43</sup>Jare tupao pe yati vae reta opa yugüiraa yave, jeta judío reta jare judiorã uyeyapo vae umbiadora Tumpa vae reta yugüiraa Pablo jare Bernabé ndive. Cua mocui reve imiari chupe reta, jare oyocui jecuaeño uyeco reta vaerã Tumpa ipiacavi re.

<sup>44</sup>Jare mbutuu ara ou vae pe opaete seri tenta guasu pegua reta uyembati, uyapisaca vaerã Tumpa iñee re. <sup>45</sup>Ërei judío reta uecha yave jeta vae yati, uñemiagüiro, jare jei añete'ã co Pablo jei vae, jare jei icavi mbae vae Pablo coti. <sup>46</sup>Jayave Pablo jare Bernabé imiari uquiye mbae reve chupe reta. Jei reta:

—Añete icavi co ore numimbeu vaerã peve rani Tumpa iñee. Ërei perũro ma. Pipota'ã ma. Jucuarãi picuaaca oreve penoita'ã co tecove opa mbae vae. Jáeramo añave numimbeuta judío mbae vae reta pe. <sup>47</sup>Echa'ã yandeYa oreocui cuarã:

'Pomondo judío mbae vae reta pe, peraa vaerã tembipe chupe reta, jare pemimbeu vaerã opaete ivi pegua reta pe Tumpa umbiasata co.'

Jucuarãi oreocui —jei reta.

<sup>48</sup>Jare judío mbae vae reta uyandu yave cua ñee, tuicha uyerovia reta, jare umbutuicha Tumpa iñee. Jare güirovia opaete jocua Tumpa uiparavo tecove opa mbae vae güinoi vaerã vae reta. <sup>49</sup>Jare Tumpa iñee uñemiai opaete jocua ivi rupi. <sup>50</sup>Ërei judío reta omboemboe cuña tenta guasu pegua reta itenondegua uipiũ Tumpa vae reta jare cuimbae tenta guasu pegua reta itenondegua reta, jare umbipi uiporaraca Pablo jare Bernabé pe, jare omombo reta iivi güi. <sup>51</sup>Jayave Pablo jare Bernabé umitimo ivicui ipi güi, uechaca vaerã tenta guasu pegua reta co teco güinoi, jare yugüiraa tenta guasu Iconio coti. <sup>52</sup>Ërei upurugüirovia vae reta uyerovia ete, jare tinee Espiritu Santo pe.

### Pablo jare Bernabé Iconio pe

**14** <sup>1</sup>Jare Iconio pe Pablo jare Bernabé uique pãve judío reta itupao pe, jare imiari reta joco pe ñugüinoi vae reta pe. Jáeramo jeta judío reta jare judío mbae vae reta upurugüirovia. <sup>2</sup>Ërei judío upurugüirovia mbae vae reta omboemboe judío mbae vae reta, jare umitarẽica chupe reta upurugüirovia vae reta. <sup>3</sup>Jáeramo Pablo jare Bernabé upita joco pe ima pegua,



jare imiari ĩru vae reta pe uquiye mbae reve yandeYa re. Jare yandeYa uechaca añete co ĩnee mbiacavi regua miacañi Pablo jare Bernabé uyapo vae reta rupi. <sup>4</sup>Ĕrei tenta guasu pegua reta uyembiyao uyugüi. Amocue uñemĩru judío reta ndive, jare amocue uñemĩru Jesús jemimondo reta ndive. <sup>5</sup>Jare judío reta jare judío mbae vae reta juvicha reta ndive uipota upurupeña Jesús jemimondo reta re, uyapo vaerã tēi icavi mbae vae chupe reta jare uyapi vaerã tēi ita pe. <sup>6</sup>Ĕrei Pablo jare Bernabé cua uicuaa yave, osi yugüĩraa tenta guasu reta Listra jare Derbe pe jare cua mocui tenta guasu iyipi rupi. Cua tenta guasu reta co ivi Licaonia pegua. <sup>7</sup>Jare joco pe vi jae reta umimbeu ñee icavi vae.

### Listra pegua reta uyapi Pablo ita pe

<sup>8</sup>Jare Listra pe uguapi oĩ penti cuimbae ipuere mbae uguata vae. Ichi jie güi oa güive ipuere'ã etei uguata. <sup>9</sup>Cua cuimbae uyandu Pablo imiari oĩ. Jare Pablo umae ngatu jese, jare uecha güinoi mburugüirovia ucuera vaerã. <sup>10</sup>Jayave Pablo ĩneeãta reve jei chupe:

—Epüa iyemboi.

Jare jae upüa voi uyemboi jare umbipi uguata. <sup>11</sup>Jayave yati vae reta uecha yave Pablo uyapo vae, jei reta Licaonia pegua reta ĩnee pe ĩneeãta reve:

—Tumpa cuimbae reta rami vae reta güeyi yandeve.

<sup>12</sup>Jare jae reta umbijee Bernabé Júpiter, jare umbijee Pablo Mercurio. Echa'ã Pablo icatu imiari vaerã. <sup>13</sup>Jare jocua tumpa-raanga Júpiter jee vae itupao oĩ tenta guasu jovai. Jare Júpiter isacerdote güeru güeye reta jare mbaepoti reta tenta guasu jonque pe, jare jae jare yati vae reta uipota tēi uyuca güeye reta umbiadora vaerã Pablo jare Bernabé. <sup>14</sup>Ĕrei Jesús jemimondo reta cua uicuaa yave, omondo reta jemimondei, jare osi yati vae reta ipite pe, jare ĩneeãta reve jei chupe reta:

<sup>15</sup>—Cuimbae reta, ¿maera pa piyapo cua? Ore perapicha retaño co. Jare numimbeu peve piyero vaerã cua icavi mbae vae piyapo vae güi Tumpa icove vae coti. Echa'ã jae uyapo ara, ivi, i guasu jare opaete mbaembae ime ñugüinoi pipe vae reta —jei reta—. <sup>16</sup>Tumpa umaño araca pegua reta re uyapo vaerã jae reta uipota vae. <sup>17</sup>Ĕrei jae jecuaeño uyecuaa chupe reta mbaembae icavi vae jae uyapo vae rupi. Echa'ã jae ombou yandeve ama jare umbicuacuaa cavi temiti reta yanderembiurã ime vaerã. Jare jucuarãi uyapo, yayerovia vaerã —jei reta.

<sup>18</sup>Cua jei reta yave, añapea umbiavai tenta guasu pegua reta agüiye vaerã uyuca güeye reta umbiadora vaerã.

<sup>19</sup>Jayave amocue judío reta yugüeru Antioquía jare Iconio güi. Jae reta omboemboe tenta guasu pegua reta uyapi vaerã Pablo ita pe. Jare uyapi ma yave, umbitiriri güiraa tenta guasu güi ñana coti. Umano echa chupe reta. <sup>20</sup>Ĕrei upurugüirovia vae reta yugüeru uyembati yave Pablo iyipi rupi, Pablo upüa oo ye tenta guasu pe. Jayave piareve pe oo Bernabé ndive Derbe coti.

<sup>21</sup>Jare umimbeu reta ñee icavi vae Derbe pe, jare jeta Derbe pegua reta güirovia Jesús re. Jayave Pablo jare Bernabé yugüeru ye Listra, Iconio

jare Antioquía pe. <sup>22</sup>Jare cua tenta guasu reta pe jae reta umiatangãtu upurugüirovia vae reta, jare umbiaracuaa jecuaño güinoi vaerã mburugüirovia Tumpa coti. Jare jei vi chupe reta:

—Jetañotai co yaiporara yaique vaerã Tumpa iporoyocua pe.

<sup>23</sup>Jare upurugüirovia vae reta uyembatimbati vae pe Pablo jare Bernabé uiparavo upurugüirovia vae reta itenondegua retarã. Jare uyerure reta uyecuacu reve tembú güi. Uyerure yandeYa pe jae uyandareco vaerã cua itenondegua reta re. Echa'ã güirovia reta ma yandeYa re.

### Yugüiraa ye Antioquía Siria pegua pe

<sup>24</sup>Jayave Pablo jare Bernabé uasa Pisidia rupi, jare yugüiraa uvãe Panfilia pe. <sup>25</sup>Jayave umimbeu ma yave Tumpa ñee Perge pe, yugüiraa tenta guasu Atalia pe. <sup>26</sup>Jare joco güi uasa i guasu rupi Antioquía coti. Echa'ã upurugüirovia vae reta Antioquía pegua tenonde yave uyerure Tumpa pe ipiacavi oĩ vaerã jae reta ndive cua mbaraviqui opa ma uyapo vae re. <sup>27</sup>Jare yugüiraa uvãe yave, Pablo jare Bernabé uyembati upurugüirovia vae reta ndive, jare umimbeu chupe reta opaete Tumpa uyapo chupe reta vae, jare quirãi Tumpa umaño judío mbae vae reta re upurugüirovia vaerã. <sup>28</sup>Jare upita reta joco pe ima pegua upurugüirovia vae reta ndive.

### Jerusalén pe uyeyapo vae

**15** <sup>1</sup>Jare yugüeru Judea güi amocue cuimbae reta, jare jei upurugüirovia vae reta pe:

—Piñemicircuncidaca'ã yave Moisés iporoyocui pe jei rami, ndarau peuere piyembiasaca.

<sup>2</sup>Jare Pablo jare Bernabé jeta uyeaca jae reta ndive cua re. Jayave upurugüirovia vae reta uiparavo Pablo jare Bernabé jare ñru vae reta jae reta ipite güi, yugüiraa vaerã Jerusalén pe uyemingueta cua re Jesús jemimondo reta jare upurugüirovia vae reta itenondegua reta ndive.

<sup>3</sup>Jayave ñru upurugüirovia vae reta omondo ma yave, jae reta uasa Fenicia jare Samaria rupi jare umimbeu joco pegua reta quirãi judío mbae vae reta uyerova Tumpa coti. Jare umbiyerovia ete upurugüirovia vae reta.

<sup>4</sup>Jare yugüiraa uvãe yave Jerusalén pe, Jesús jemimondo reta jare opaete upurugüirovia vae reta itenondegua reta ndive umbiresive cavi reta. Jare Pablo jare Bernabé umimbeu chupe reta opaete Tumpa uyapo chupe reta vae. <sup>5</sup>Èrei amocue fariseo pegua upurugüirovia vae reta upãa jare jei:

—Icavi co ñamicircuncidaca vaerã, jare yayocui uyapo vaerã Moisés iporoyocui.

<sup>6</sup>Jayave Jesús jemimondo reta jare upurugüirovia vae reta itenondegua reta uyembati, uyemingueta vaerã cua re. <sup>7</sup>Jare uyeaca ma uyupii yave, Pedro upãa jare jei chupe reta:

—Cherivi reta, picuaa catu co quirãi caramboe yave Tumpa cheparavo amimbeu vaerã judío mbae vae reta pe ñee icavi vae, jae reta güirovia

vaerã. <sup>8</sup>Tumpa uicuaa opaete vae ipia pe oĩ vae, jare jae uechaca jae reta güirovia co. Echa'ã umee chupe reta Espíritu Santo, yandeve umee rami —jei Pedro—. <sup>9</sup>Jare Tumpa umbiyuavi'ã etei yandegüi. Echa'ã oyoe ma ipia, jae reta güirovia yave —jei—. <sup>10</sup>Jayave ¿maera pa pipota pembiavai Tumpa? Echa'ã mboroyocui penti tivita rami. Pe reta pipota pembivita jocua upurugüirovia vae reta. Ërei yandetenondegua reta jare yande vi yandepuere'ã yavoi —jei—. <sup>11</sup>Yande yarovia yayembiasaca ma co yandeYa Jesús ipiacavi re, jae reta rami —jei.

<sup>12</sup>Jayave opaete yati vae reta iquĩño, jare uyapisaca Bernabé jare Pablo jei vae re. Jae reta umimbeu chupe reta opaete miacañi reta Tumpa uyapo jae reta rupi judío mbae vae reta ipite pe vae. <sup>13</sup>Jare jae reta opa imiari yave, Jacobo jei: —Cherivi reta, piyapisaca cheré. <sup>14</sup>Simón umimbeu ma yandeve quirãi Tumpa jaeramo etei uparaviqui judío mbae vae reta ipite pe, uiparavo vaerã chugüi reta amocue jae jee umbiadora vaerã —jei—. <sup>15</sup>Cua re co jei vi Tumpa ñee aracae umimbeu vae reta. Uyecuatía oĩ cuarãi:

<sup>16</sup> ‘Cua jaicue rupi ayu yeta,

jare ayapo yeta David jenta opa usururu vae’ —jei yandeYa—.

‘Amupúa yeta usururucue, jare ambipiauta,

<sup>17</sup> opaete ñru ivi pegua reta chereca vaerã,

jare opaete judío mbae vae reta.

Che co jae reta iYa.

<sup>18</sup> Che aicuaaca cua aracae güive’ —jei yandeYa.

Jucuarãi uyecuatía oĩ —jei chupe reta—. <sup>19</sup>Jáeramo che jae agüiye yamambeco jocua judío mbae vae uyerova Tumpa coti vae reta. <sup>20</sup>Ërei yaicuatía chupe reta agüiye vaerã jou soo tumpa-raanga pe ñemee vae, jare maemimba uyeyuvi vae isoo, jare soo jugüi reve, jare agüiye vaerã uyapo aguasa —jei Jacobo—. <sup>21</sup>Echa'ã aracae güive yugüireco tenta guasu guasu pe Moisés iporoyocui umimbeu vae reta. Opa mbutuu ara jae reta umingüeta Moisés iporoyocui itupao reta pe —jei.

<sup>22</sup>Jayave Jesús jemimondo reta jare opaete upurugüirovia vae reta itenondegua reta ndive jei icavi co uyeparavo vaerã amocue cuimbae reta jae reta ipite güi, omondo vaerã Antioquía pe Pablo jare Bernabé ndive. Jayave uiparavo Judas Barsabás jare Silas. Jae reta co upurugüirovia vae reta itenondegua reta.

<sup>23</sup>Jare jae reta güiraa tupapire. Cua tupapire pe jei cuarãi: “Ore co jae Jesús jemimondo reta jare opaete upurugüirovia vae reta itenondegua reta ndive. Nomondo numbisaluda opaete judío mbae vae upurugüirovia vae Antioquía, Siria jare Cilicia pegua reta. <sup>24</sup>Jerãcua oreve quirãi amocue orepite güi yugüiraa pemambeco. Jucuarãi uyapo reta, yepe tẽi ore ndoyocui'ã. Jáeramo pe reta picuaa'ã mbae piyapo vaerã. Echa'ã jei reta piñemicircuncidaca vaerã jare piyapo vaerã mboroyocui pe uyecuatía oĩ vae. <sup>25</sup>Nduyemingueta ma cua re, jare ore opaete ndoe icavi co uyeparavo vaerã amocue orepite güi, nomondo vaerã pecoti Bernabé jare Pablo ndive. Nduau co Bernabé jare Pablo. <sup>26</sup>Jae reta iquirẽi umee

jecove yandeYa Jesucristo pe uyeyocui vaerã. <sup>27</sup>Jáeramo nomondo pepi Judas jare Silas. Jae reta ñee pe etei umimbeuta vi peve cua. <sup>28</sup>Ore ndarau pumbiavai. Cua mbovño numimbeuta peve. Cua icavi Espíritu Santo pe jare oreve vi. <sup>29</sup>Agüiye peu soo tumpa-raanga pe uñemee vae, jare maemimba uyeyuvi vae isoo, jare soo jugüi reve. Jare agüiye piyapo aguasa. Cua ore ndoe peve vae piyapo yave, icavita pico. Tumpa ndiveño.” Jucuarãi uyecuatía oĩ tupapire pe.

<sup>30</sup>Jayave uyemondoca vae reta yugüiraa uvãe Antioquía pe. Jare umbati yave upurugüirovia vae reta, umee chupe reta tupapire. <sup>31</sup>Jare opa umingueta yave, opareve uyerovia cua ñee umbipiacatu vae re. <sup>32</sup>Jare Judas jare Silas Tumpa ñee umimbeu vae reta co, jare jeta uyemingueta upurugüirovia vae reta pe, umbipiacatu jare umimirãta vaerã. <sup>33</sup>Jare ñma ma joco pe ñugüinoi yave, upurugüirovia vae reta omondo cavi ye ombou vae reta coti. <sup>34</sup>Ërei icavi echa Silas pe upita vaerã joco pe. <sup>35</sup>Jare Pablo jare Bernabé upita Antioquía pe oporomboc Tumpa ñee re, jare umimbeu ñee icavi vae jeta ñru vae reta ndive.

#### **Pablo ueya Bernabé, jare oo ye umimbeu ñee icavi vae**

<sup>36</sup>Mbovi ara rupi Pablo jei Bernabé pe:

—Yaa ye yapou upurugüirovia vae reta pe opaete tenta guasu yamimbeu ma yandeYa ñee vae reta rupi, yaecha vaerã quirãi ra ñugüinoi.

<sup>37</sup>Jare Bernabé uipota tẽi güiraa jae reta jupíe Juan Marcos. <sup>38</sup>Ërei Pablo jei icavi'ã güiraa vaerã jae reta jupíe. Echa'ã Juan Marcos ou ye Panfilia güi chugüi reta, jare oo'ã jae reta jupíe Tumpa iparaviqui uyapo vaerã. <sup>39</sup>Jare uyeaca reta uyupii cua re. Jáeramo uyembiyao reta uyugüi. Marcos oo Bernabé jupíe, jare jae reta uasa i guasu rupi Chipre pe. <sup>40</sup>Ërei Pablo uiparavo Silas iguatañrurã, jare upurugüirovia vae reta uyerure yandeYa pe ipiacavi oĩ vaerã jae reta ndive. Jayave jae reta yugüiraa. <sup>41</sup>Jare uasa reta ivi Siria jare Cilicia rupi umiatangãtu reve upurugüirovia vae reta uyembatimbatì vae rupi.

#### **Timoteo oo Pablo jare Silas jupíe**

**16** <sup>1</sup>Jayave yugüiraa uvãe Derbe pe, jare joco güi yugüiraa Listra pe. Jare joco pe ico penti upurugüirovia vae Timoteo jee vae. Ichi co jae penti judía upurugüirovia vae, jare tu co jae penti griego. <sup>2</sup>Upurugüirovia vae Listra jare Iconio pe ñugüinoi vae reta uyemingueta cavi Timoteo re. <sup>3</sup>Pablo uipota güiraa Timoteo jae reta jupíe. Jáeramo umicircuncidaca, jacoropi judío ñugüinoi vae reta jeco pegua. Echa'ã opaete vae uicuaa jae tu griego co. <sup>4</sup>Jare yugüiraa rambueve tenta guasu reta rupi, umimbeu upurugüirovia vae reta pe Jesús jemimondo reta jare upurugüirovia vae reta itenondegua Jerusalén pe ñugüinoi vae reta uicuatía chupe reta vae, jae reta uyapo vaerã. <sup>5</sup>Jayave upurugüirovia vae reta uyembatimbatì vae rupi uñemiatangãtu Tumpa coti, jare opa ara rupi ñru vae reta güirovia Jesús re jare uñemñru jae reta ndive.

### Cuimbae Macedonia pegua

<sup>6</sup>Jare Pablo jare jae ndive ñugüinoi vae reta uasa ivi Frigia jare Galacia rupi. Jare Espiritu Santo oyopia reta, agüiye vaerã umimbeu Tumpa iñee Asia pe. <sup>7</sup>Jare ivi Misia pe yugüiraa uvãe yave, uipota tẽi yugüiraa ivi Bitinia pe. Ërei Espiritu Santo umaño'ã yugüiraa vaerã. <sup>8</sup>Jayave uasa reta coiño Misia güi, jare yugüiraa uvãe tenta guasu Troas pe. <sup>9</sup>Jare pĩtu yave Pablo uecha ique pe penti cuimbae ivi Macedonia pegua uyemboi oĩ joco pe. Jare cuimbae uyerure Pablo pe:

—Ecu Macedonia pe orembori.

<sup>10</sup>Jare cua uecha ma yave, jupivoiño nduipota ndoo Macedonia coti. Echa'ã nduicuaa ma Tumpa orereni numimbeu vaerã Macedonia pegua reta pe ñee icavi vae.

### Peresoriru pe Filipos pe

<sup>11</sup>Jayave ndoo nduasa simi i guasu rupi Troas güi ivi Samotracia pe. Jayave piareve pe ndoo nuvãe tenta guasu Neápolis pe. <sup>12</sup>Jayave joco güi ndoo tenta guasu Filipos pe. Cua co tenta guasu tenondegua ivi Macedonia pegua, jare cua pe yugüeru yugüireco vaerã Roma pegua reta. Cua tenta guasu pe ndupita mbovi ara. <sup>13</sup>Jare mbutuu ara pe ndoo tenta guasu jonque rupi iãca jembei pe. Joco pe oĩ penti yerurerenda. Jare joco pe nduguapĩ ma yave, oremiari cuña joco pe yatĩ vae reta pe. <sup>14</sup>Jare penti cuña Lidia jee vae tenta guasu Tiatira pegua uyapisaca oĩ. Cua cuña umbiadora Tumpa. Jae co temimonde pĩta vae umee vae. Jare yandeYa uparaviqui ipia pe, jae uyapisaca cavi vaerã Pablo jei vae re. <sup>15</sup>Jare jae jare jentarã reta uyembibautizaca ma yave, jae jei oreve:

—Perovia yave che arovia cavi yandeYa re, peyu pepita cherenta pe. Jare oremiñera ndupita vaerã joco pe.

<sup>16</sup>Jare ndoo yave yerurearenda pe, orerovãiti penti cuñatai aña oya jese vae. Cua cuñatai iya reta umingana jeta corepoti jese. Echa'ã cuñatai umimbeu ñru vae reta pe aña imbaepuere rupi mbae uyeyapota vae.

<sup>17</sup>Cua cuñatai oo oreraicue, jare iñeeãta reve jei:

—Cua cuimbae reta Tumpa ivate pegua jembiocui reta co. Jae reta umimbeu yandeve quirãi yandepuere yayembiasaca —jei.

<sup>18</sup>Jare jeta ara jucuarãi uyapo cuñatai. Jayave cua umambeco Pablo, jare jae uyerova jei aña pe:

—Jesucristo jee re ndoyocui: ¡Esiri chugüi!  
Jare jupivoiño aña usiri chugüi.

<sup>19</sup>Jare cuñatai iya reta uicuaa yave uminganata'ã ma co jese, uipisi reta Pablo jare Silas, jare güiraa reta plaza pe mburuvicha reta pe. <sup>20</sup>Jare mburuvicha reta pe güiraa ma yave, jei reta:

—Cua cuimbae reta judío reta co, jare umambeco ete ñanerenta guasu pegua reta. <sup>21</sup>Jupi'ã yambiresive vaerã ani yayapo vaerã cua moromboe umimbeu yandeve vae. Echa'ã yande Roma pegua reta co —jei reta mburuvicha reta pe.

<sup>22</sup>Jayave yati vae reta penti rami uepeña reta. Jare mburuvicha reta omondo Pablo jare Silas jemimonde reta, jare uinupaca ivira pe. <sup>23</sup>Jare jeta ma uinupaca reta yave, umiingueca reta peresoriru pe. Jare oyocui reta peresoriru iyandarecoa uãro cavi vaerã, agüiye vaerã osi. <sup>24</sup>Cua uyandu yave, peresoriru iyandarecoa umiingueca reta peresoriru japipe coti ete oĩ vae pe, jare oñono ipi iviracua pe.

<sup>25</sup>Ërei piare mbite ma yave Pablo jare Silas uyerure Tumpa pe, jare ucanta ñugüinoi umbiadora Tumpa. Jare ñru pereso reta uyapisaca ñugüinoi jese reta. <sup>26</sup>Jare aramoño tanta ucãta ivi, jare uñemicãta peresoriru iguapica. Jare jupivoiño uyepea opaete onque reta, jare uyera opaete cadena pereso reta uñeapiti pipe vae reta. <sup>27</sup>Jayave peresoriru iyandarecoa usareco, jare uecha uyepea ñugüinoi peresoriru jonque reta. Jayave uequi iquisepucu jiru güi, uyeyuca vaerã. Echa'ã jae jei tẽi pereso reta opa ma co osi. <sup>28</sup>Ërei Pablo iñeãta reve jei:

—Agüiye iyeyuca. Echa'ã opareveño noĩ cua pe —jei.

<sup>29</sup>Jayave peresoriru iyandarecoa ueni quía güeru vaerã chupe tembipe. Jayave osi peresoriru japipe pe, jare uyeatica Pablo jare Silas jovai. Uriri oĩ uquiye ramo. <sup>30</sup>Jayave güinoẽ reta oca pe jare jei chupe reta:

—Carai reta, ¿mbae pa ayapota ayembiasaca vaerã?

<sup>31</sup>Jayave jae reta jei chupe:

—Erovia yandeYa Jesucristo re, jare ndiyembiasacata co, jare nerenta pegua reta vi.

<sup>32</sup>Jayave jae reta umimbeu Tumpa iñee chupe jare opaete jenta pegua reta pe. <sup>33</sup>Jare jocua ora voi peresoriru iyandarecoa güiraa Pablo jare Silas oyoe ipere. Jayave jae jare opaete jenta pegua reta uyembibautizaca. <sup>34</sup>Jayave peresoriru iyandarecoa güiraa jenta pe umingararu Pablo jare Silas. Jare jae jare opaete jenta pegua reta uyerovia ete. Echa'ã güirovia reta ma Tumpa re.

<sup>35</sup>Jare cõe ma yave, mburuvicha reta ombou amocue sundaro reta jei vaerã:

—Iyora jocua cuimae reta.

<sup>36</sup>Jare peresoriru iyandarecoa umimbeu cua ñee Pablo pe. Jei chupe:

—Mburuvicha reta ombou cheocui poyora vaerã. Jáeramo añave pepuere peẽ jare peo cavi.

<sup>37</sup>Ërei Pablo jei sundaro reta pe:

—Mburuvicha reta orenupaca opaete vae jovaque orereco mbae reve, jare oremiingueca peresoriru pe, yepe tẽi ore co jae romano reta. Jare añave uipota oreyoraca viari. Ndarau uyapo jucuarãi. Tuyugüeru jae reta etei oreyora vaerã —jei.

<sup>38</sup>Jayave sundaro reta yugüiraa umimbeu cua ñee mburuvicha reta pe. Jayave mburuvicha reta uquiye, uicuaa yave jae reta romano reta co. <sup>39</sup>Jayave yugüeru peresoriru pe ueca vaerã ñee cavi Pablo jare Silas pe. Jayave güinoẽ oca pe, jare umiñera yugüiraa vaerã tenta guasu güi. <sup>40</sup>Jayave Pablo jare Silas yugüiraa peresoriru güi Lidia jenta pe. Jare uecha upurugüirovia vae reta, jare umbiaracuaa. Jayave yugüiraa joco güi.

### Tecorai Tesalónica pe

**17** <sup>1</sup>Pablo jare Silas uasa yave tenta guasu Anfípolis jare Apolonia rupi, yugüiraa uvãe tenta guasu Tesalónica pe. Joco pe oĩ penti judío reta itupao. <sup>2</sup>Jare Pablo oo tupao pe. Echa'ã jucuarãi uyapo opaete tenta guasu reta rupi. Jare mbapĩ mbutuu ara uyeaca judío reta ndive. <sup>3</sup>Uechaca chupe reta Tumpa ñínee uyecuatía oĩ vae, jare uicuaaca quirãi Cristo uiporarañotai co jare icove yeñotai co ou umanocue vae reta ipíte güi. Jare jei chupe reta:

—Cua Jesús che amimbeu peve vae co jae Cristo.

<sup>4</sup>Jayave amocue güirovia Pablo jei vae, jare jae reta, jare jeta griego umbiadora Tumpa vae reta, jare jeta cuña tenta guasu pegua reta itenondegua reta uñemüru Pablo jare Silas ndive. <sup>5</sup>Ërei judío güirovia mbae vae reta ñacatãa Pablo jare Silas re, jare güeru amocue cuimbae iyaquí vae reta. Jeco pochĩ co cua cuimbae reta. Jayave umbati jeta ñru vae reta, jare uyapo tecorai. Jayave upurupeña reta Jasón jenta re ueca tẽi Pablo jare Silas. Uipota tẽi güiraa tenta guasu pegua reta jovai.

<sup>6</sup>Ërei uvãe'ã chupe reta. Jayave uipisi güiraa Jasón jare amocue upurugüirovia vae reta mburuvicha tenta guasu pegua reta pe, jare ñíneeãta reve jei reta:

—Jocua cuimbae umambeco opaete ivi pegua reta vae reta yugüeru vi cua pe. <sup>7</sup>Jare Jasón güinoi jenta pe. Jare opaete jae reta oyovaicho César iporoyocui ndive. Echa'ã jei reta ime ñru mburuvicha guasu Jesús jee vae —jei reta.

<sup>8</sup>Jayave tenta guasu pegua reta jare juvicha reta cua uyandu yave, uyemipia'ã. <sup>9</sup>Jare Jasón jare ñru vae reta umbiepi chupe reta yave, jae reta umaẽño yugüiraa ye vaerã.

### Pablo jare Silas Berea pe

<sup>10</sup>Jare jupivoiño upurugüirovia vae reta omondo Pablo jare Silas pĩtu yave tenta guasu Berea jee vae coti. Jare jae reta yugüiraa uvãe yave joco pe, yugüiraa judío reta itupao pe. <sup>11</sup>Jare joco pegua judío reta iyaracuaa catu Tesalónica pegua reta güi. Iquirẽi uyapisaca Tumpa ñínee re, jare opa ara umingueta cavi Tumpa ñínee uyecuatía oĩ vae, uicuaa vaerã añete ra Pablo jei vae. <sup>12</sup>Jare jeta joco pegua reta güirovia. Jare güirovia vi jeta griega reta itenondegua reta, jare jeta griego reta. <sup>13</sup>Ërei judío Tesalónica pegua reta uicuaa yave Pablo umimbeu Berea pegua reta pe vi Tumpa ñínee, yugüiraa joco pe omboemboe umambeco vaerã joco pegua reta. <sup>14</sup>Jayave upurugüirovia vae reta omondo Pablo i guasu coti. Ërei Silas jare Timoteo upita Berea pe. <sup>15</sup>Jare Pablo jupie yugüiraa vae reta güiraa tenta guasu Atenas pe. Jayave Pablo oyocui jae reta umimbeu vaerã Silas jare Timoteo pe yugüeru vaerã icoti imambae, ipuere yave. Jayave jae reta yugüeru ye Berea coti.

### Pablo Atenas pe

<sup>16</sup>Jare Pablo uãro oĩ rambueve Atenas pe, uecha yave jeta tumpa-raanga reta ñugüinoi tenta guasu rupi, uyemipia'ã. <sup>17</sup>Jayave uyeaca judío reta itupao pe judío reta jare ñru umbiadora Tumpa vae reta ndive. Jare uyeaca vi opa ara



plaza pe joco pe ñugüinoi vae reta ndive. <sup>18</sup>Jare amocue iyaracuaa vae reta uyeaca Pablo ndive. Jae reta co Epicúreo jare Estoico jee vae reta. Amocue jei:

—¿Mbae ra uipota jei cua iyeminguetase vae?

Jare ñru vae reta jei:

—Aramoi jae umimbeu ñru tumpa yaicuaa mbae vae reta regua.

Echa'ã Pablo umimbeu chupe reta ñee icavi vae Jesús regua, jare quirãï jae icove ye ou umanocue vae reta ipite güi. <sup>19</sup>Jare jae reta güiraa Pablo ivitu Areópago jee vae pe. Jare jei reta chupe:

—Emimbeu oreve mbae nunga moromboe ipiau vae ra cua nemiari jese vae. <sup>20</sup>Echa'ã cua nemimbeu ma oreve vae jaeramo nduyandu. Jáeramo nduipota nducuaa mbae ra uipota jei cua —jei reta.

<sup>21</sup>Echa'ã opaete Atenas pegua reta jare queti güi yugüeru yugüireco joco pe vae reta jaeño ma yugüireco imiari vaerã jare uyapisaca mbae ipiau vae re.

<sup>22</sup>Jayave Pablo uyemboi Areópago pe jeta vae reta ipite pe, jare jei chupe reta:

—Cuimbae Atenas pegua reta, aecha ma pe reta pemiadora co tumpa reta. <sup>23</sup>Echa'ã aguata rambueve tenta guasu rupi, amae jocua pemiadora vae reta re, jare aecha penti yembiadorarenda, jare jese uyecuatía oï cuarãï: ‘Tumpa yaicuaa mbae vae’. Jucuarãï uyecuatía oï. Jáeramo tamimbeu peve pe reta picuaa'ã reve pemiadora vae —jei—.

<sup>24</sup>Tumpa uyapo ivi jare opaete oï pipe vae. Jae co ara jare ivi iYa. Jae ico'ã yembiadorarenda vae rupi yande yayapo vae reta pe. <sup>25</sup>Tumpa ueca'ã etei ivi pegua reta umee vaerã mbae chupe. Echa'ã jae etei co umee yandevere tecove, jare ñaneputúé, jare opaete mbaembae —jei chupe reta—.

<sup>26</sup>Jare Tumpa uyapo penti cuimbae, jare opaete ivi pegua reta ñnemoñaeta reta co. Jucuarãï Tumpa uyapo, jae reta yugüireco vaerã opaete ivi iárambo. Tumpa etei co umee quirãï yave ivi pegua reta yugüireco vaerã, jare umbiyaoyao ivi chupe reta yugüireco tee tee vaerã —jei Pablo—. <sup>27</sup>Opaete cua Tumpa uyapo, ivi pegua reta ueca vaerã Tumpa, jare aramoi uvã vaerã iyupe. Echa'ã añetete jae mbir'ã oï penti penti güi. <sup>28</sup>Jese yaicove jare ñami, yaico vaerã. Jare jucuarãï vi amocue pepite pe oï vae jei uicuatía vae pe: ‘Echa'ã jese yaico’ —jei, jei—. <sup>29</sup>Jare Tumpa umee yandevere tecove ramo, icavi'ã yae vaerã Tumpa co jae oro pegua, ani corepoti pegua, ani ita pegua. Echa'ã cuimbae reta uyapo cua nunga iyaracuaa rupiño. <sup>30</sup>Aracae ivi pegua reta uicuaa'ã ramo, Tumpa umaño jese reta. Ërei añave jae oyocui opaete ivi pegua reta ueya vaerã iyemingueta icavi mbae vae ipia pe oï vae —jei chupe reta—. <sup>31</sup>Echa'ã Tumpa uiparavo ma penti ara uãaca vaerã jupi rupi ivi pegua reta jocua cuimbae jae uiparavo vae pe. Jare cua uicuaaca opaete ivi pegua reta pe. Echa'ã Tumpa umbijecove ye jocua uiparavo vae güeru umanocue vae reta ipite güi —jei.

<sup>32</sup>Jare uyandu reta yave icove ye ou umanocue vae reta ipite güi vae regua, amocue vae oyoyai. Ërei ñru vae reta jei Pablo pe:

—Nduyapisaca yeta nderé ñru ara pe cua re.



<sup>33</sup>Jayave Pablo oo chugüi reta. <sup>34</sup>Ërei amocue vae güirovia Tumpa ñee, jare uñemĩru Pablo ndive. Cua reta ipite pe ñugüinoi penti Areópago pegua Dionisio jee vae, penti cuña Dámaris jee vae, jare ĩru vae reta.

### Pablo Corinto pe

**18** <sup>1</sup>Cua jaicue rupi Pablo oo Atenas güi tenta guasu Corinto pe. <sup>2</sup>Jare uñevãe joco pe penti judío Aquila jee vae ndive. Jae co Ponto pegua. Cua judío ou ramo uvãe Italia güi jembireco Priscila jee vae ndive. Echa'ã mburuvicha guasu Claudio jee vae oyocui opaete judío reta yugüiraa vaerã Roma güi. Jayave Pablo opou ipi. <sup>3</sup>Jare Pablo icatu uyapo Aquila iparaviqui. Jáeramo Pablo upita jae reta ndive, jare uparaviqui pãve reta. Jae reta co o reta guacapi pegua iyapoa. <sup>4</sup>Jare opa mbutuu ara Pablo uyeaca judío reta itupao pe. Cua uyapo, judío reta jare judío mbae vae reta güirovia vaerã.

<sup>5</sup>Jare Silas jare Timoteo yugüeru uvãe yave Macedonia güi, Pablo uñemiatangãtu umimbeu vaerã Tumpa ñee. Umimbeu judío reta pe Jesús co jae Cristo, Tumpa ombou vae. <sup>6</sup>Ërei judío reta oyovaicho jae ndive, jare jei reta icavi mbae vae icoti. Jáeramo Pablo umitimo jemimonde, jare jei chupe reta: —Pecañiteita co, jare pe retaño penoita teco. Che anoi'ã ma teco. Añave güive aata amimbeu judío mbae vae reta pe —jei.

<sup>7</sup>Jayave oo joco güi cuimbae Justo jee vae jenta pe. Cua cuimbae umbiadora Tumpa, jare jae jenta oĩ judío reta itupao iyipi pe. <sup>8</sup>Jare judío reta itupao pegua reta itenondegua Crispo jee vae jare opaete jenta pegua reta güirovia yandeYa re. Jare jeta Corinto pegua reta uyandu Pablo umimbeu vae yave, güirovia jare uyembibautizaca. <sup>9</sup>Jare yandeYa jei Pablo pe pĩtu yave ique pe:

—Agüiye equiye. Nemiarı jare agüiye nequii. <sup>10</sup>Echa'ã che aĩ nde ndive, jare ndarau quía ipuere nderé, uyapo vaerã icavi mbae vae ndeve. Echa'ã ime jeta cheré güirovia vae reta cua tenta guasu pe —jei.

<sup>11</sup>Jare Pablo upita joco pe penti año jare seis yasi, jare umimbeu Tumpa ñee tenta guasu pegua reta pe.

<sup>12</sup>Ërei Galión jee vae ico mburuvicha ivi Acaya pe yave, judío reta oyovaicho penti rami Pablo ndive, jare güiraa mburuvicha upuruãa vae pe <sup>13</sup>jare jei reta: —Cua cuimbae omboe yave tenta guasu pegua reta umbiadora vaerã Tumpa, omboe'ã mboroyocui pe uyecuatía oĩ vae rupi.

<sup>14</sup>Jare Pablo omoëta ma yave ñee, Galión jei judío reta pe: —Judío reta, cua cuimbae uyapo yave icavi mbae vae pecoti, ani jeco pochı yave, icavita tẽi ayapisaca vaerã peré. <sup>15</sup>Ërei pipota yave aãa vaerã ñee reta re, tee reta re jare peporoyocui re, ndarau ayapisaca peré. Pe reta etei pepuere peãa. Echa'ã che aipota'ã aãa cua nunga re —jei chupe reta.

<sup>16</sup>Jayave Galión omondo reta upuruãa vae güi. <sup>17</sup>Jayave griego reta uipisi judío reta itupao pegua itenondegua Sóstenes jee vae, jare ocua jese mburuvicha upuruãa vae jovai. Ërei Galión uyemambeco'ã etei jese.

<sup>18</sup>Jare cua rendave pe Pablo upita ye jeta ara joco pe. Jayave oo upurugüirovia vae reta güi, jare uasa i guasu rupi Siria coti Priscila jare Aquila jupíe. Jare tenta guasu Cencrea pe Pablo uipēpica iñāca. Echa'ã tenonde yave jei Tumpa pe uyapota mbae chupe ndei uipēpica iñāca mbove. <sup>19</sup>Jare yugüiraa uvãe yave tenta guasu Efeso pe, Pablo ueya Priscila jare Aquila. Jayave uique judío reta itupao pe, jare uyeaca judío reta ndive. <sup>20</sup>Jare judío reta umiñera yave upita vaerã joco pe, uipota'ã. <sup>21</sup>Jare oota ma yave chugüi reta, jei:

—Aata co Jerusalén pe, ayapo vaerã pascua uyaro ma oĩ vae. Ërei Tumpa uipota yave, tayu ye pepi curi —jei.

Jayave oo i guasu rupi Efeso güi.

### Pablo oo ye Antioquía güi umimbeu ñee icavi vae

<sup>22</sup>Jare oo uvãe yave Cesarea pe, oo umbisaluda vaerã upurugüirovia vae reta Jerusalén pe. Jayave oo joco güi Antioquía pe. <sup>23</sup>Jare mbovi ara joco pe oĩ yave, oo umbapí opaete tenta tenta Galacia jare Frigia rupi umiatangātu vaerã opaete upurugüirovia vae reta.

### Apolos uñemiñee Efeso pe

<sup>24</sup>Jare ou Efeso pe penti judío Alejandría pegua Apolos jee vae. Cua cuimbae ipuere imiari cavi, jare uicuaa cavi Tumpa iñee uyecuatía oĩ vae. <sup>25</sup>Cua cuimbae uyemboe ma yandeYa iporomboe re. Jatangātu, jare imiari jare oporomboe jaecavi yandeYa re. Ërei uicuaa moromboe Juan upurumbibautizase jese vaefío. <sup>26</sup>Jae umbipí imiari uquiye mbae reve judío reta itupao pe. Ërei Priscila jare Aquila uyandu yave jei vae, güiraa jenta pe, jare omboe cavi quirã yaico vaerã Tumpa coti vae re. <sup>27</sup>Jare Apolos uipota oo yave Acaya pe, upurugüirovia vae reta umiatangātu jese, jare uicuatía reta penti tupapire upurugüirovia vae reta pe, umbiresive cavi reta vaerã Apolos. Jare jae oo uvãe yave joco pe, ombori jocua Tumpa ipiacavi jeco pegua upurugüirovia vae reta. <sup>28</sup>Jae imiari mbaepuere reve, jare umiamiri judío reta tenta guasu pegua reta jovaque. Echa'ã uechaca chupe reta Tumpa iñee uyecuatía oĩ vae pe Jesús co jae Cristo.

### Pablo Efeso pe

**19** <sup>1</sup>Apolos Corinto pe oĩ rambueve, Pablo ou uvãe Efeso pe, opa yave umbapí opaete tenta guasu-rai-rai guarasi oẽ vae coti ñugüinoi vae reta rupi. Jare Efeso pe uñevãe amocue upurugüirovia vae reta ndive. <sup>2</sup>Jare Pablo upirandu chupe reta:

—¿Ou pa Espíritu Santo peve pepurugüirovia yave?

Jae reta jei chupe:

—Nduicuaa'ã etei Espíritu Santo ou vae regua.

<sup>3</sup>Jayave Pablo upirandu chupe reta:

—¿Mbae nunga moromboe re pa piyembibautizaca?

Jare jae reta jei chupe:

—Juan iporombœ re nduyembibautizaca.

4 Jayave Pablo jei chupe reta:

—Juan umbibautiza jocua reta ueya iyemingueta icavi mbae vae ipia pe oĩ vae. Jare jei chupe reta güirovia vaerã outa jaicue rupi vae re. Cua uipota jei Jesús re. Jesús co jae Cristo —jei—. 5 Jare cua uyandu yave, uyembibautizaca yandeYa Jesús jee re —jei chupe reta.

6 Jayave Pablo oñono ipo jese reta, jare ou chupe reta Espíritu Santo, jare jae reta uyemingueta ambie vae iñee pe, jare umimbeu reta Tumpa iñee. 7 Jare cua cuimbae reta uepiti doce rupi.

8 Jayave Pablo oo judío reta itupao pe, jare imiari uquiye mbae reve. Jare mbapi yasi uyeaca judío reta ndive Tumpa iporoyocua re. 9 Ërei amocue ipiatanta jare uipota'ã güirovia, jare jei reta ñee icavi mbae vae tenta guasu pegua reta jovaque upurugüirovia vae reta ipurugüirovia coti. Jayave Pablo oo chugüi reta, jare güiraa jae ndive upurugüirovia vae reta, jare uyeaca opa ara rupi Tiranno jo tuicha vae pe. 10 Jare jucuarãi uyapo mocui año. Jáeramo opaete judío jare judío mbae vae Asia pegua reta uyandu ñee yandeYa Jesús regua. 11 Jare Tumpa uyapo miacañi tuicha vae reta Pablo rupi. 12 Echa'ã ñru vae reta güiraa yave mbaembae Pablo omonde vae imbaerasi vae reta pe, imbaerasi vae reta ucuera, jare aña reta usiri oya jese vae reta güi.

13 Jayave amocue judío reta umbipi tēi ueni yandeYa Jesús jee aña reta oya jese vae reta re. Cua nunga judío reta uguata opaete que rupi umbisiri aña reta oya jese vae reta güi. Jae reta jei:

—Poyocui Jesús Pablo umimbeu vae jee re. 14 Jare penti judío Esceva jee vae güinoi siete tai reta. Esceva co jae penti sacerdote reta itenondegua. Jare cua cuimbae tai reta vi jucuarãi jei aña pe. 15 Ërei aña jei chupe reta:

—Che aicuaa co Jesús, jare aicuaa catu quía co jae Pablo. Ërei ¿quía pa co pe reta?

16 Jare jocua cuimbae aña oya jese vae upurupeña jese reta, jare umiamiri. Jare jae reta opa osi jocua tenta güi nani jare ipere reve. 17 Jare cua jerãcua opaete judío jare judío mbae vae Efeso pegua reta pe. Jáeramo opareve uquiye, jare umbiadora yandeYa Jesús jee.

18 Jare jeta upurugüirovia vae reta yugüeru umimbeu jeco icavi mbae vae ueya ma vae regua. 19 Jare jeta ipaye vae reta güeru itupapire reta, jare uapi opaete vae jovaque. Jare cua tupapire reta jepi uyepapa yave, uepiti cincuenta mil corepoti ti vae. 20 Echa'ã Tumpa iñee mbiri rupi ma uñemiai, jare mbaepuere tuicha vae güinoi.

21 Cua jaicue rupi Pablo jei oo vaerã Macedonia jare Acaya rupi Jerusalén pe. Jare jae jei:

—Joco güi aata vi co Roma pe.

22 Jayave omondo Macedonia coti mocui imboria reta Timoteo jare Erasto jee vae. Ërei jae upita ye mbovi ara Asia pe.

### Tecorai Efeso pe

<sup>23</sup>Jare jocua ara reta pe oĩ tecorai upurugüirovia vae reta ipurugüirovia re. <sup>24</sup>Echa'ã penti cuimbae Demetrio jee vae umindicui corepoti, jare uyapo tupao-raanga michi vae corepoti pegua reta. Efeso pegua reta umbiadora itumpa-raanga Diana jee vae cua nunga tupao-raanga michi vae pe. Jare Demetrio umbiepi cavi omborí uyapo vae reta pe. <sup>25</sup>Cua cuimbae umbati omborí uyapo vae reta jare ñru cua nunga mbaraviquí uyapo vae reta, jare jei chupe reta:

—Cuimbae reta, picuaa catu co cua mbaraviquí güi ñamingana yaicocatu vaerã. <sup>26</sup>Jare peecha jare piyandu ma quirãí cua Pablo umbiyerova jeta vae Efeso pe jare opaete seri Asia rupi jae iporombœ pe. Echa'ã jae jei tumpa-raanga cuimbae reta uyapo vae tumpa'ã co reta —jei—. <sup>27</sup>Jare aramoi tenta guasu pegua reta güiröta cua yandeparaviquí. Jare aramoi güiröta vi tumpa cuña uyembadora vae Diana itupao, jare ndarau ma quía umbiadora. Echa'ã añave opaete Asia pegua reta jare opaete ivi pegua reta umbiadora —jei chupe reta.

<sup>28</sup>Cua uyandu reta yave, pochí ete, jare iñeeãta reve jei:

—Uyembadora co Diana Efeso pegua.

<sup>29</sup>Jare tecorai uñemai opaete tenta guasu rupi. Jare jeta vae penti rami osi tenta guasu pegua reta uyuvanga vae pe. Jare uipisi güiraa joco pe Pablo iguataĩru reta Gayo jare Aristarco. Cua reta co Macedonia pegua. <sup>30</sup>Jayave Pablo uipota tẽi uique tenta guasu pegua reta yati ñugüinoi vae pe. Ërei upurugüirovia vae reta umaño'ã jese. <sup>31</sup>Jare amocue Asia pegua mburuvicha Pablo ndive uyepocuaa vae reta omondo umimbeu Pablo pe agüiye vaerã oo tenta guasu pegua reta uyuvanga vae pe. <sup>32</sup>Jare opaete yati vae reta iñeeãta, ërei oyovaque'ã iñee reta. Tecorai tuicha vaño uyapo reta. Echa'ã jeta joco pe ñugüinoi vae reta uicuaa'ã maera ra uyembati joco pe. <sup>33</sup>Jayave judío reta umiaña jenonde Alejandro jee vae yati vae reta ipite güi, iñee omoë vaerã. Jayave Alejandro umupúa ipo umiquí vaerã tẽi. Echa'ã uipota tẽi imiari tenta guasu pegua reta pe, agüiye vaerã jae reta umbijeco judío reta. <sup>34</sup>Ërei yati vae reta uicuaa yave jae co judío, opaete penti rami mocui ora seri iñeeãta reve jei:

—Uyembadora co Diana Efeso pegua.

<sup>35</sup>Jayave tenta guasu pegua reta juvicha umiquí yati vae reta, jare jei chupe reta:

—Cuimbae Efeso pegua reta. Diana co jae tumpa cuña uyembadora vae. Cua tenta guasu pegua reta uyandareco Diana itupao re. Jare uyandareco vi ita Diana echa vae Júpiter güi ou vae re. Opaete vae uicuaa cua —jei—. <sup>36</sup>Jayave ipuere'ã quía cua uicuacu ramo, icavi co pequí vaerã, agüiye vaerã mbae piyapo güirave ndei pepia pe piyemingueta mbove. <sup>37</sup>Echa'ã peru cua cuimbae reta cua pe, yepe tẽi oñomi'ã mbae yandetupao güi, jare jei'ã vi mbae icavi mbae vae ñanetumpa cuña coti —jei chupe reta—. <sup>38</sup>Demetrio jare imboria reta uipota yave uñeapo quía re, ime mburuvicha reta ñugüinoi uyapisaca vaerã jese reta. <sup>39</sup>Ërei pipota yave piñeapo ñru mbae re, mburuvicha reta uyapicatuta, uyembati yave —jei

chupe reta—. <sup>40</sup>Echa'ã aramoi mburuvicha reta yanembijecota yayapo vae re. Jei tãita yaipota ñañerãro jae reta ndive. Echa'ã yaicuaata'ã mbae ra yaeta chupe reta, jae reta upirandu yandeve yave maera ra yayapo cua tecorai —jei.

<sup>41</sup>Jare tenta guasu pegua reta juvicha cua jei yave, opa omondo yati vae reta.

### Pablo oo Macedonia jare Grecia pe

**20** <sup>1</sup>Opa ma tecorai yave, Pablo ueni upurugüirovia vae reta. Jayave opa umbiaracuaa reta yave, uicuãva jare oo chugüi reta Macedonia coti. <sup>2</sup>Jare umbapi opaete jocua tenta guasu reta rupi umbiaracuaa cavi reve upurugüirovia vae reta. Jayave oo uvãe ivi Grecia pe. <sup>3</sup>Jare upita joco pe mbapi yasi. Jare i guasu rupi oota yave joco güi Siria coti, judío reta uyemboemboe uyapo vaerã icavi mbae vae chupe. Jáeramo Pablo jei oota Macedonia rupi. <sup>4</sup>Jare yugüiraa jae jupíe Sópater Berea pegua, Aristarco jare Segundo Tesalónica pegua reta, Gayo Derbe pegua, Timoteo, jare Tíquico jare Trófimo Asia pegua reta. <sup>5</sup>Cua reta yugüiraa orerenonde, jare oreraãro Troas pe. <sup>6</sup>Ërei ara reta mbiyape ovu mbae vae pegua uasa yave, ore ndoo i guasu rupi Filipos güi, jare pandepo ara pe ndoo nuvãe Troas pe. Joco pe nuñevãe ñru reta ndive, jare ndupita joco pe siete ara.

### Pablo opou Troas pe

<sup>7</sup>Jare domingo ara pe upurugüirovia vae reta uyembati tembú umbiyao vaerã uyupe. Jayave Pablo piareve pe oota ramo, ipiare mbite rupi omboe reta. <sup>8</sup>Jare jeta tembipe ñugüinoi jocua o ivate vae pe yati ñugüinoi vae pe. <sup>9</sup>Jare jocua tenta co mbapi o ivate vae. Jare penti cunumi Eutico jee vae uguapi oĩ ventana pe, jare tanta oque oĩ. Jare Pablo jecuae omboe oĩ rambueve, cunumi oque oĩ ramo, oa joco güi oca coti ivi pe. Jare ñru vae reta yugüiraa uupi yave, uecha umano ma. <sup>10</sup>Jayave Pablo ugüeyi jare ipe cunumi iárambo. Jayave uicuãva jare jei: —Agüiye pepiatiti. Jecoveño oĩ.

<sup>11</sup>Jayave Pablo uyupi ye, jare joco pe ñugüinoi vae reta umbiyao uyupe tembú, jare ucaru reta. Jayave Pablo icõe omboe. Jayave oo chugüi reta. <sup>12</sup>Jare joco pe yati vae reta güiraa cunumi icove ye vae, jare ipiacatu reta.

### Troas güi Mileto pe

<sup>13</sup>Jare ore rani ndoo nduasa i guasu rupi tenta guasu Asón pe. Nduipota nuñevãe Pablo ndive joco pe, jae jei rami. Echa'ã jae uipota oo ivi rupi. <sup>14</sup>Jare nuñevãe yave jae ndive Asón pe, Pablo uyupi chalana guasu pe, jare ndoo pãve ivi Mitilene pe. <sup>15</sup>Jare joco güi ndoo ye i guasu rupi, jare piareve pe ndoo nuvãe ivi Quío jovai. Piareve pe ndoo nuvãe ivi Samos pe. Jayave ndupita ivi Trogilio pe, jare piareve pe ndoo nuvãe tenta guasu Mileto pe. <sup>16</sup>Pablo iquirëi uasa güirave Efeso güi, agüiye vaerã uyembiavai Asia pe. Echa'ã jae uipota uvãe vaerã Jerusalén pe Pentecostés ara pe, ipuere yave.

### Pablo imiari Mileto pe

<sup>17</sup>Jayave Mileto güi Pablo omondo Efeso pe uenica upurugüirovia vae reta itenondegua reta. <sup>18</sup>Jare jae reta yugüeru uvãe yave Pablo oĩ vae pe, jae jei chupe reta:

—Pe reta picuaa catu co quirãi aico pe reta ndive tenonde ete Asia pe ayu güive. <sup>19</sup>Ayeyocui yandeYa pe añemimichi reve jare ayao reve. Judío reta chembiavai ete. Echa'ã jecuaeño iquirëi reta uyapo icavi mbae vae cheve —jei—. <sup>20</sup>Aipiu'ã amimbeu vaerã peve opaete icavi peve peguarã vae. Jare pomboe jeta vae ipite pe jare perenta rupi vi. <sup>21</sup>Jare amimbeu judío reta jare judío mbae vae reta pe ueya vaerã iyemingueta icavi mbae vae ipia pe oĩ vae jare uyerova vaerã Tumpa coti, jare güirovia vaerã yandeYa Jesucristo re —jei chupe reta—. <sup>22</sup>Jare añave aa Jerusalén coti, Espíritu Santo chemondo ramo. Jare aicuaa'ã mbae ra ueyepota cheve joco pe —jei—. <sup>23</sup>Ërei opaete tenta guasu reta rupi Espíritu Santo umimbeu cheve ñru vae reta cheñonota co peresoriru pe jare aiporarata. <sup>24</sup>Ërei aquiye'ã. Chepia pe ayemingueta'ã etei ayerepi vaerã. Jaeño aipota ambapi cheguata Tumpa coti vae ayerovia reve. Aipota ayapo mbaraviqui yandeYa Jesús umee cheve vae. Echa'ã jecuaeño aipota amimbeu ñru vae reta pe ñee icavi vae Tumpa ipiacavi regua —jei Pablo chupe reta—. <sup>25</sup>Amimbeu ma pepite rupi Tumpa iporoyocua regua, jare añave aicuaa catu co pe reta ndarau ma cherecha ye. <sup>26</sup>Jáeramo añave amimbeu peve che anoi'ã etei co teco pecoti —jei—. <sup>27</sup>Echa'ã aipiu'ã etei amimbeu vaerã peve opaete Tumpa jei vae. <sup>28</sup>Jáeramo piñemoa ngatu, jare piyandareco opaete upurugüirovia vae reta re, penti ovecha iyandarecoa ovecha reta re uyandareco rami. Echa'ã Espíritu Santo co preparavo piyandareco vaerã jese reta. Jare pemimbeu Tumpa ñnee yandeYa re güirovia vae reta pe, penti ovecha reta iyandarecoa ovecha reta umingararu rami. Echa'ã yandeYa uepi reta jae jugüi pe —jei—. <sup>29</sup>Che aicuaa catu co che aa ma yave, yugüeruta pepite pe ñru vae reta. Cua reta uyapota icavi mbae vae upurugüirovia vae reta pe, yaguapita ou jou ovecha reta rami —jei—. <sup>30</sup>Jare pepite güi etei imeta cuimbae moromboe pichii vae re oporomboeta vae reta. Cua reta ombopata upurugüirovia vae reta. <sup>31</sup>Jáeramo piñemoa ngatu, jare pemandúa quirãi chiyao reve pumbiaracuaa vae re. Mbapi año ma jucuarãi ayapo, ara rupi jare pĩtu rupi —jei—.

<sup>32</sup>Añave ayerure Tumpa pe uyandareco vaerã peré, jare aeya pe reta ndive ñnee ipiacavi regua. Echa'ã cua ñee ipuere pemimirãta jare umee peve pembaerã opaete jocua ñru uñeño tee Tumpa peguarã vae reta ndive —jei Pablo—. <sup>33</sup>Aipota'ã anoi ñru vae icorepoti, ioro jare jemimonde. <sup>34</sup>Pe reta picuaa catu co quirãi chepo pe etei aparaviqui, mbaembae uata cheve vae anoi vaerã, jare amee vaerã cheñru reta pe —jei—. <sup>35</sup>Opaete rupi aicuaaca ma peve quirãi icavi co yaparaviqui vaerã, yambori vaerã mbae uata chupe vae reta. Yanemandúa yandeYa Jesús etei jei vae re. Echa'ã jae jei: 'Tumpa umbiyerovia eteta mbae umeeño vae mbae umbiresive vae güi' —jei, jei Pablo.

<sup>36</sup>Jare cua opa ma jei yave, Pablo uyeatica jare uyerure Tumpa pe opaete jae reta ndive. <sup>37</sup>Jayave opaete joco pe ñugüinoi vae reta uyao, jare uicuãva reta Pablo jare uyurupite reta. <sup>38</sup>Jare jae reta tuicha ipiatiti, Pablo jei chupe reta ndarau ma uecha ye ramo. Jayave jae reta yugüiraa jae jupíe chalana guasu oĩ vae pe.

### Pablo oo Jerusalén pe

**21** <sup>1</sup>Jare ndoo ma yave chugüi reta, nduasa simi i guasu rupi tenta guasu Cos pe. Jare piareve pe nduasa tenta guasu Rodas pe. Jayave joco güi nduasa tenta guasu Pátara pe. <sup>2</sup>Jare nuvãe joco pe chalana guasu oota Fenicia pe vae. Jayave nduyupi pipe, jare ndoo. <sup>3</sup>Jare Chipre nduecha oreaso coti, jare nduasa. Jare jecuae ndoo Siria coti, jare ndoo nuvãe tenta guasu Tiro pe. Echa'ã joco pe chalana guasu ueyata jivita. <sup>4</sup>Jare nuñevãe upurugüirovia vae joco pegua reta ndive, jare ndupita joco pe siete ara. Jare jae reta Espíritu Santo rupi jei Pablo pe agüiye vaerã oo Jerusalén pe. <sup>5</sup>Jocua ara reta uasa yave, ndoo tenta guasu güi, jare opaete upurugüirovia vae reta jembireco reta jare isambiai reta ndive oremiiru. Jayave nduyeatica i guasu jembei pe nduyere Tumpa pe. <sup>6</sup>Jayave nuñecuãva yave jae reta ndive, nduyupi chalana guasu pe, jare jae reta yugüiraa ye jenta pe.

<sup>7</sup>Jayave Tiro güi ndoo nuvãe tenta guasu Tolemaida pe. Jare joco pe numbisaluda upurugüirovia vae reta, jare ndupita jae reta ipi penti ara. <sup>8</sup>Piareve pe ndoo chugüi reta Pablo jupíe Cesarea pe, jare joco pe nduique ndupita Felipe ñee icavi vae umimbeu vae jenta pe. Jae co jocua siete vae güi penti. <sup>9</sup>Cua cuimbae güinoi irundi tayi Tumpa ñee umimbeu vae. Cua irundi reve ndei umenda. <sup>10</sup>Jare ndupita joco pe mbovi ara. Jare Tumpa ñee umimbeu vae Agabo jee vae ou Judea güi. <sup>11</sup>Jare jae ou ore noĩ vae pe, jare uequi Pablo jumbicuaa. Jayave uñeapíti ipi rupi jare ipo rupi jare jei:

—Cua jei Espíritu Santo: ‘Cuarãi Jerusalén pe judío reta uñapítita cua tumbicuaa iya, jare umeeta reta judío mbae vae reta pe’ —jei, jei Agabo.

<sup>12</sup>Cua nduyandu yave, ore jare joco pegua reta numiñera tẽi Pablo agüiye vaerã oo Jerusalén pe. <sup>13</sup>Èrei Pablo jei:

—¿Maera pa piyao jare chembipiatiti? Echa'ã aipiũ'ã añeapíti vaerã Jerusalén pe. Aipiũ'ã vi amano vaerã joco pe yandeYa Jesús jeco pegua —jei.

<sup>14</sup>Jayave ndoe'ã ye ma mbae chupe cua re, orepuere'ã jese ramo. Jayave ndoe: —Tuyeyapo yandeYa jei vae.

<sup>15</sup>Jare jocua ara reta uasa yave, nduyeyapicatu ndoo Jerusalén coti. <sup>16</sup>Jare yugüiraa vi orerupíe Cesarea güi amocue upurugüirovia vae joco pegua reta. Oo vi jae reta jupíe Chipre pegua Mnasón jee vae. Echa'ã ndupitata Mnasón jenta pe. Cua Mnasón tenonde voi güirovia Jesús re.

### Uipisi reta Pablo Tumpa jo pe

<sup>17</sup>Jare ndoo nuvãe yave Jerusalén pe, upurugüirovia vae reta orembiresive uyerovia reve. <sup>18</sup>Jayave piareve pe Pablo oo ore ndive opou Jacobo pe. Jare



opaete upurugüirovia vae reta itenondegua reta uyembati joco pe. <sup>19</sup>Jare opa ma umbisaluda yave, Pablo umimbeu chupe reta quirái jae uparaviqui judío mbae vae reta ipite rupi, jare quirái Tumpa jeta mbaembae uyapo chupe reta. <sup>20</sup>Jae reta uyandu yave, umbiadora Tumpa. Jayave jei reta Pablo pe:

—Orerivi, ndicuaa ma quirái jeta ete judío reta güirovia ma co Jesús re, jare opaete jae reta uñemiatangātu mboroyocui re. <sup>21</sup>Èrei jerácua chupe reta quirái nde nemboe opaete judío judío mbae vae reta ipite rupi ñugüinoi vae reta agüiye vaerã uyapo Moisés iporoyocui. Echa'ã jerácua quirái nde ndere chupe reta agüiye vaerã umicircuncidaca tai reta, jare agüiye vaerã uyapo yande yayapoñoi vae —jei reta Pablo pe—. <sup>22</sup>¿Mbae pa yayapota? Uyembatita co jeta vae. Echa'ã jae reta uicuaata nde ndeyu ma co cua pe. <sup>23</sup>Jáeramo iyapo cua ndoeta ndeve vae. Ime cua pe ñugüinoi irundi cuimbae tenonde yave jei mbae uyapota Tumpa pe vae. <sup>24</sup>Eraa cua cuimbae reta jare iyeyoe Tumpa coti mboroyocui jei rami jae reta ndive, jare embiepi iñaca uñeapica reta vaerã. Jayave opaete vae uicuaata añetete'ã nererácua chupe reta vae. Echa'ã jae reta uicuaata nde vi co ndiyapo ndico mboroyocui —jei reta—. <sup>25</sup>Èrei yaicuatía ma judío mbae vae upurugüirovia vae reta pe agüiye vaerã uyapo mboroyocui. Jaeño agüiye tou reta soo tumpa-raanga pe uñemee vae, jare soo jugüi reve, jare maemimba uyeyuvi vae isoo, jare agüiye tuyapo aguasa —jei reta.

<sup>26</sup>Jayave Pablo oo jocua cuimbae reta jupíe, jare piareve pe uyeyoe Tumpa coti mboroyocui jei rami jae reta ndive, jare uique Tumpa jo pe umimbeu mbae ara pe opata uyeyoe vae. Echa'ã jocua ara penti penti umeeta iofrenda.

<sup>27</sup>Jare cua rendave pe siete ara opata ma yave, judío Asia pegua reta uecha Pablo Tumpa jo pe, jare uyapo reta tecorai jeta vae ndive. Jayave uipisi reta Pablo, <sup>28</sup>jare iñeeãta reve jei:

—Cuimbae Israel pegua reta, orembori. Cua cuimbae oporomboe opaete que rupi opaete iru vae reta oyovaicho vaerã yande ndive, mboroyocui ndive jare cua Tumpa jo ndive. Jare jae güeru griego reta uruique Tumpa jo pe, jare jucuarái uminguiaca cua o Tumpa oí pipe vae —jei reta.

<sup>29</sup>Echa'ã tenonde yave uecha reta tenta guasu pe Efeso pegua Tróximo jee vae Pablo ndive. Jare ipia pe uyemingueta tēi Pablo uruique jocua cuimbae Tumpa jo pe.

<sup>30</sup>Jare opaete tenta guasu pegua reta pochi. Jáeramo uyembati reta, jare uipisi reta Pablo umbitiriri Tumpa jo güi oca pe. Jare jupivoiño Tumpa jo iyandarecoa reta uyuquenda onque reta. <sup>31</sup>Jayave yati vae reta uipota tēi uyuca Pablo. Èrei jerácua sundaro reta juvicha pe opaete Jerusalén pegua reta uyapo ñugüinoi tecorai. <sup>32</sup>Jare jupivoiño jae osi ou yati vae reta coti sundaro reta jare sundaro reta juvicha reta ndive. Jare tenta guasu pegua reta uecha yave sundaro reta jare juvicha, ocua'ã ma Pablo re. <sup>33</sup>Jayave sundaro reta juvicha oo Pablo coti jare uipisi. Oyocui sundaro reta uñapiti vaerã mocui cadena pe. Jayave upirandu quía ra co jae jare mbae ra co uyapo. <sup>34</sup>Amocue tenta guasu pegua reta iñeeãta, èrei oyovaque'ã iñee reta. Jare tecorai jeco pegua sundaro reta juvicha ipuere'ã



uicuaa mbae ra añete vae. Jáeramo oyocui sundaro reta güiraa vaerã Pablo jae reta yugüireco vae pe. <sup>35</sup>Jare uyupi ñugüinoi yave sundaro reta yugüireco vae pe, sundaro reta ovoi güiraa Pablo, yatĩ vae reta uipota uipisi ramo. <sup>36</sup>Echa'ã opaete yatĩ vae reta yugüiraa sundaro reta jaicue, jare iñeeãta reve jei:

—Tumano jocua cuimbae.

### **Pablo imiari tenta guasu pegua reta pe**

<sup>37</sup>Jare sundaro reta uruiqueta ma yave yugüireco vae pe, Pablo jei sundaro reta juvicha pe:

—¿Nemañota pa mbae jae ndeve?

Jae jei Pablo pe:

—¿Ndicuaa pa griego iñee? <sup>38</sup>Caramboe yave penti Egipto pegua omboemboe cuatro mil upuruyuca vae reta uñerãro vaerã mburuvicha reta ndive, jare güiraa ñana pe. ¿Nde pa co jae jocua Egipto pegua? —jei.

<sup>39</sup>Jayave Pablo jei chupe:

—Che co jae penti judío Tarso pegua. Jocua tenta guasu oĩ Cilicia pe, jare tuicha co. Emañño tachemiari tenta guasu pegua reta pe —jei.

<sup>40</sup>Jayave sundaro reta juvicha jei Pablo pe imiari vaerã. Jayave Pablo uyemboi ivate oĩ vae pe, jare umupúa ipo tenta guasu pegua reta coti. Jare opaete vae quĩ yave, Pablo imiari chupe reta hebreo iñee pe. Jei chupe reta:

**22** <sup>1</sup>—Cherivi reta jare cheriquei reta, piyapisaca che jaeta peve chiyee vae re.

<sup>2</sup>Jare tenta guasu pegua reta uyandu yave jae imiari chupe reta hebreo iñee pe, opareve quĩ ngatu. Jayave Pablo jei chupe reta:

<sup>3</sup>—Che co jae penti judío. Aa Tarso Cilicia pegua pe, ãrei acuacuaa cua tenta guasu pe. Gamaliel chemboe cavi yandetenondegua reta iporoyocui re. Che aipota ayapo Tumpa jei vae, opaete pe reta añave pipota rami —jei—.

<sup>4</sup>Che ayapo icavi mbae vae opaete Jesús re güirovia reve yugüireco vae reta pe. Jare aipisi amiingueca peresoriru pe cuimbae reta jare cuña reta. Ayucaca vi amocue vae —jei Pablo—. <sup>5</sup>Sacerdote tenondegua jare opaete tenta guasu pegua reta itenondegua reta ipuere umimbeu peve cheregua. Jae reta uicuatía umee cheve tupapire araa vaerã ñru judío reta pe. Jayave aa Damasco coti, aipisi vaerã tẽi Jesús re güirovia vae joco pe ñugüinoi vae reta, jare aru vaerã tẽi Jerusalén pe, aiporaraca vaerã tẽi chupe reta —jei—.

### **Pablo jei quirãi güirovia Jesús re**

(Hch 9.1-19; 26.12-18)

<sup>6</sup>Ñrei che coiño ma Damasco güi aa yave, guarasi ara mbite rupi yave, aramoiño penti tembipe tuicha vae ara güi jembipe cheré. <sup>7</sup>Jare aa ivi re, jare ayandu penti ñee jei cheve: ‘Saulo, Saulo, ¿maera pa ndiyapo icavi mbae vae cheve?’ <sup>8</sup>Jayave che jae: ‘¿Quía pa co nde, cheYa?’ Jayave jae jei cheve: ‘Che co jae Jesús Nazaret pegua. Nde ndiyapo icavi mbae vae cheve’ —jei, jei Pablo—. <sup>9</sup>Jare che ndive

ñugüinoi vae reta uecha co tembipe, jare uquiye reta. Ërei uicuaa'ã mbae jei jocua uyemingueta cheve vae. <sup>10</sup>Jayave che apirandu: '¿Mbae pa ayapota, cheYa?' Jare yandeYa jei cheve: 'Epüa ecua Damasco pe, jare joco pe amimbeucata ndeve opaete mbae ndoyocuita jese vae' —jei, jei—. <sup>11</sup>Jayave che ndive ñugüinoi vae reta chepoco chereraa chereruvãe Damasco pe. Echa'ã chepuere'ã etei amae, jocua tembipe jembipe cheré vae jeco pegua —jei—. <sup>12</sup>Jare ico joco pe penti cuimbae Ananías jee vae. Jae uipiu Tumpa mboroyocui uyapo reve, jare opaete judío joco pe yugüireco vae reta uyemingueta cavi jese. <sup>13</sup>Jae ou chepi. Uyemboi cheyipí pe jare jei: 'Saulo, nde co jae cherivi. Emae ye.' Jare jupivoiño chepuere amae, jare aecha Ananías joco pe oí —jei Pablo—. <sup>14</sup>Jayave jae jei cheve: 'Yandetenondegua reta iTumpa ndeparavo, ndicuaa vaerã jae jei vae, jare ndeecha vaerã jocua jupi vae, jare ndiyandu vaerã iñee. <sup>15</sup>Echa'ã nemimbeuta co jeseagua opaete ivi pegua reta pe. Nemimbeuta chupe reta ndeecha jare ndiyandu vae' —jei, jei—. <sup>16</sup>¿Maera pa añave neãro nei? Epüa iyembibautizaca ndiyerure reve chupe, nembraeyoa reta uyembai vaerã' —jei, jei Pablo—.

### Jesús omondo Pablo judío mbae vae reta pe

<sup>17</sup>Jayave ayu ye Jerusalén pe, jare ayerure añ rambueve Tumpa jo pe, cheque pe aecha. <sup>18</sup>Jare aecha Jesús, jare jae jei cheve: 'Ecua imambae Jerusalén güi. Echa'ã ndarau uipota güirovia nde nemimbeuta cheregua chupe reta vae' —jei cheve, jei—. <sup>19</sup>Jayave che jae chupe: 'CheYa, jae reta uicuaa catu co quirãi che aase opaete judío reta itupao reta rupi añonoca vaerã peresoriru pe jare ainupaca vaerã nderé güirovia vae reta. <sup>20</sup>Jare uyuca reta yave Esteban nderegua umimbeu vae, che vi añ joco pe, jare icavi cheve imano. Jare che ayandareco upuruyuca vae reta jemimonde re' —jae chupe, jei—. <sup>21</sup>Jayave jae jei cheve: 'Ecua. Echa'ã che nomondota mbiri judío mbae vae reta coti' —jei cheve, jei.

### Sundaro reta uipisi Pablo

<sup>22</sup>Jare Pablo cua jei yave, tenta guasu pegua reta uipota'ã ma uyapisaca jese. Iñeeãta reve jei reta:

—Tumano jocua cuimbae. Echa'ã icavi'ã ico vaerã —jei reta.

<sup>23</sup>Jare iñeeãta reta rambueve, umbivava jemimonde, jare ivicui omombo ivate. <sup>24</sup>Jayave sundaro reta juvicha oyocui sundaro reta uruique vaerã Pablo jae reta yugüireco vae pe. Jare oyocui vi uinupa reta vaerã chicote pe upirandu chupe reve, uicuaa cavi vaerã maera ra tenta guasu pegua reta iñeeãta jucuarãi icoti. <sup>25</sup>Èrei sundaro reta uñapiti yave timasa pe, Pablo jei sundaro reta juvicha joco pe oí vae pe:

—¿Jupi pa pinupa vaerã penti romano peãa mbae reve?

<sup>26</sup>Cua uyandu yave, sundaro reta juvicha oo itenondegua pe jare jei chupe: —¿Mbae pa ndiyapota? Echa'ã jocua cuimbae penti romano co.

<sup>27</sup>Jayave sundaro reta juvicha itenondegua ou Pablo oí vae pe jare jei chupe: —Emimbeu cheve, ¿romano pa co nde?

Jayave Pablo jei chupe:

—Jae co che.

<sup>28</sup>Jayave sundaro reta juvicha itenondegua jei chupe:

—Che jeta ambiepi ayeyapo vaerã romanorã. Jayave Pablo jei chupe:

—Ërei che pipe voi aa.

<sup>29</sup>Jayave yugüiraa Pablo güi upiranduta tēi chupe vae reta. Jare sundaro reta juvicha itenondegua uquiye, uicuaa yave jae romano co, uñapitica ramo.

### Pablo mburuvicha reta jovai

<sup>30</sup>Jare piareve pe sundaro reta juvicha itenondegua uipota uicuaa cavi mbae re ra judío reta umbijeco Pablo. Jáeramo oyora Pablo, jare oyocui sacerdote reta itenondegua reta jare opaete ñru mburuvicha reta uyembati vaerã. Jayave güiraa Pablo oñono jae reta jovai.

**23** <sup>1</sup>Jayave Pablo umae ngatu mburuvicha reta re jare jei:  
—Cheriquei reta, che jecuaeño aico cavi, chepia icavi anoi vaerã Tumpa coti.

<sup>2</sup>Jayave sacerdote tenondegua Ananías jee vae oyocui Pablo iyipi pe ñugüinoi vae reta ocua vaerã iyuru re. <sup>3</sup>Jayave Pablo jei chupe:

—Tumpa tocu nderé. Echa'ã nde co jae iguambi tĩ asi vae rami. Nde ndeguapi co neĩ cherãa vaerã mboroyocui jei vae rupi. Ërei ndiyavi mboroyocui. Echa'ã ndiyocui reta ocua vaerã cheré —jei.

<sup>4</sup>Jayave joco pe ñugüinoi vae reta jei chupe:

—¿Maera pa nde ndere ñee icavi mbae vae Tumpa isacerdote tenondegua pe?

<sup>5</sup>Jayave Pablo jei:

—Cheriquei reta, aicuaa'ã jae co sacerdote tenondegua. Echa'ã uyecuatía oĩ: 'Ndereta'ã ñee icavi mbae vae nderuvicha coti' —jei.

<sup>6</sup>Jare Pablo uecha yave amocue jae reta saduceo reta jare amocue fariseo reta, iñeeãta reve jei mburuvicha reta ipite pe:

—Cheriquei reta, che co jae penti fariseo, jare cheru vi co jae penti fariseo. Che arovia umanocue vae reta icove yeta co. Cua jeco pegua pe reta cherãa peĩ —jei.

<sup>7</sup>Jare cua jei yave, uyembiyao uyugüi yati vae reta, jare fariseo reta uyeaca saduceo reta ndive. <sup>8</sup>Echa'ã saduceo reta jei umanocue vae reta ndarau ma icove ye. Jei vi mbaeti co oĩ ángel jare espíritu. Ërei fariseo reta güirovia ime co. <sup>9</sup>Jare uyeaca reta uyupii. Jare upüa amocue fariseo pegua mboroyocui re oporombocue vae reta jare jei:

—Ore nuvãe'ã etei teco cua cuimbae re. Aramoi penti espíritu ani ángel imiari chupe. Agüiye yayovaicho Tumpa ndive —jei reta.

<sup>10</sup>Jare jeiete uyeaca reta uyupii yave, sundaro reta juvicha itenondegua ipia pe uyemingueta aramoi uyucata reta Pablo, jare oyocui sundaro reta yugüeru vaerã güiraa Pablo jae reta ipite güi sundaro reta yugüireco vae pe.

<sup>11</sup>Jare piareve pe pĩtu yave yandeYa uyecuaa Pablo pe jare jei chupe:

—Inemiatangātu, Pablo. Chemimbeu ma Jerusalén pe. Chemimbeuta vi co Roma pe.

### Judío reta uipota tēi uyuca Pablo

<sup>12</sup>Jayave piareve pe amocue judío reta uyemboemboe, jare uyepipeyu reve iyee jei ucaruta'ã jare jouta'ã i, uyuca regua Pablo. <sup>13</sup>Jare cuimbae cua jei uyepipeyu reve iyee vae reta cuarenta uasa. <sup>14</sup>Jayave jae reta yugüiraa sacerdote reta itenondegua reta jare tenta guasu pegua reta itenondegua reta pe jare jei chupe reta:

—Ore ndoe ma nduyepipeyu reve oriye nducaruta'ã, nduyuca regua Pablo. <sup>15</sup>Jáeramo pe reta ñru mburuvicha reta ndive pemimbeu sundaro reta juvicha itenondegua pe tugüeru Pablo peve piareve. Jae ipia pe uyemingueta tēita pe reta pipota pepirandu cavi ete chupe mbae uyapo vae re. Jayave ore nucuatĩrota noĩ jese nduyuca vaerã, ndei ou uvãe mbove —jei reta.

<sup>16</sup>Ñrei Pablo jindi imembi cuimbae vae uicuaa yave jae reta ucuatĩrota Pablo re vae, oo uique sundaro reta yugüireco vae pe, jare umimbeu Pablo pe.

<sup>17</sup>Jayave Pablo ueni sundaro reta juvicha jare jei chupe:

—Eraa cua cunumi nderuvicha pe. Echa'ã uipota mbae umimbeu chupe —jei.

<sup>18</sup>Jayave sundaro reta juvicha güiraa cunumi juvicha tenondegua vae pe, jare jei chupe:

—Pablo uyepisi oĩ vae chereni, jare chemiñera aru vaerã ndepi cua cunumi. Echa'ã uipota mbae umimbeu ndeve —jei.

<sup>19</sup>Jayave sundaro reta juvicha itenondegua uipisi cunumi ipo pe, jare güiraa ñru vae reta ñugüinoi vae güi. Jayave upirandu chupe:

—¿Mbae pa nemimbeuta cheve?

<sup>20</sup>Jayave cunumi jei chupe:

—Judío reta uyemboemboe ma, jare nemiñerata Pablo nderaaca vaerã curiye mburuvicha reta pe. Uipota nde ndepia pe ndiyemingueta tēi vaerã jae reta upirandu cavi eteta chupe mbae uyapo vae re —jei—.

<sup>21</sup>Ñrei agüiye erovia. Echa'ã judío reta ucuatĩrota jese. Jae reta cuarenta uasa. Jei reta uyepipeyu reve iyee ucaruta'ã jare jouta'ã i, uyuca regua Pablo. Jare añave uãro ñugüinoi, aramoi nderaaca pegua —jei chupe.

<sup>22</sup>Jayave sundaro reta juvicha itenondegua jei cunumi pe:

—Agüiye emimbeu quía pe cua nemimbeu cheve vae.

Jayave omondo cunumi.

### Omondo reta Pablo mburuvicha guasu Félix jee vae pe

<sup>23</sup>Jayave sundaro reta juvicha itenondegua ueni mocui sundaro reta juvicha jare jei chupe reta:

—Piyapĩcatu cavi doscientos sundaro reta, jare setenta sundaro cavayu re opo vae reta, jare doscientos sundaro güiraa ui vae reta, yugüiraa

vaerã Cesarea pe nueve ora ma pĩtu yave. <sup>24</sup>Jare peeca Pablo opo vaerã, peraa cavi vaerã mburuvicha guasu Félix pe —jei chupe reta.

<sup>25</sup>Jayave jae uicuatía penti tupapire pe cuarãi: <sup>26</sup>“Félix. Nde co jae mburuvicha guasu uyembutuichaca vae. Che co jae Claudio Lisias. Numbisaluda. <sup>27</sup>Judío reta uipisi cua cuimbae, jare uyucata tẽi. Jayave che aa sundaro reta ndive aepi chugüi reta. Echa'ã jerãcua cheve jae romano co. <sup>28</sup>Jare aipota aicuaa maera ra jae reta umbijeco. Jáeramo araa judío reta juvicha reta upuruãa vae pe. <sup>29</sup>Joco pe aicuaa jae reta umbijeco iporoyocui re. Ërei jae uyapo'ã teco umano vaerã ani oĩ vaerã peresoriru pe. <sup>30</sup>Ërei jerãcua cheve judío reta ucuatĩrota jese. Jáeramo jupivoiño amondo ndecoti. Jare ayocui umbijeco vae reta uñeapo vaerã jese ndeve teco uyapo chupe reta vae re. Jaeño ma.” Jucuarãi uicuatía.

<sup>31</sup>Jayave pĩtu yave sundaro reta güiraa Pablo tenta guasu Antípatis pe, juvicha oyocui rami. <sup>32</sup>Jayave piareve pe sundaro cavayu re opo vae reta güiraa Pablo, jare ñru sundaro reta yugüeru ye yugüireco vae pe. <sup>33</sup>Jare yugüiraa uvãe yave Cesarea pe, sundaro reta umee Pablo tupapire reve mburuvicha guasu pe. <sup>34</sup>Jare opa umingueta yave tupapire, mburuvicha guasu upirandu Pablo pe quía tenta guasu pegua ra co jae. Jare uicuaa yave Cilicia pegua co, <sup>35</sup>jei Pablo pe:

—Tayapisaca nderé, yugüeru yave nembijeco vae reta.

Jayave oyocui sundaro reta uyandareco vaerã jese mburuvicha Herodes jenta pe.

### Pablo imiari Félix pe

**24** <sup>1</sup>Pandepo ara ma uasa yave, yugüeru sacerdote tenondegua Ananías, amocue tenta guasu pegua reta itenondegua reta jare penti cuimbae Tértulo jee vae. Cua cuimbae iyaracuaa catu uyemingueta vaerã. Jae reta uñeapo Pablo re mburuvicha pe. <sup>2</sup>Jare Pablo uñeeni ma yave, Tértulo umbipi umbijeco Pablo. Jae jei Félix pe:

—Ndereco pegua orepiacatu nduico. Ndearacuaa jeco pegua ndeporoyocui cavi jeta mbaembae re oreivi pe. <sup>3</sup>Nde co jae oreruvicha numbutuicha vae. Opaete que rupi jecuaeño nduyapo yasurupai ndeve opaete cua re —jei—. <sup>4</sup>Ndepiacavi ramo, numñera ndiyapisaca vaerã oriñee re michi peguaño, agüiye vaerã numambeco mbatee —jei—. <sup>5</sup>Echa'ã nducuaa ma cua cuimbae upurumbiavai penti mbaerasi rami. Jae omboemboe judío opaete ivi rupi ñngüinoi vae reta. Jare jae co penti nazareno pegua reta itenondegua —jei Tértulo Félix pe—. <sup>6</sup>Jae uipota vi uyapo jupi mbae vae Tumpa jo pe. Ërei ore nduipisi, jare nuãata tẽi oreporoyocui pe uyecuatía oĩ vae rupi. <sup>7</sup>Ërei sundaro reta juvicha itenondegua Lisias ou umiãta oregüi jare upĩro güiraa oregüi. <sup>8</sup>Jare oyocui umbijeco vae reta yugüeru vaerã ndepi. Nde etei neãa yave, ndicuaata opaete numbijeco vae —jei.

<sup>9</sup>Judío reta vi jei añete co opaete cua mbaembae. <sup>10</sup>Jayave mburuvicha guasu upuvẽe Pablo re uyemingueta vaerã. Jayave Pablo jei:

—Che aicuaa catu co nde ima ete ma neãa cua ivi pegua reta. Jáeramo ayerovia reve chemiarita ayerepi vaerã —jei—. <sup>11</sup>Nde ndepuere ndicuaa rami, doce ara ramo aa güiive Jerusalén pe, ambiadora vaerã Tumpa. <sup>12</sup>Jare cua reta cherecha'ã ayeaca quía ndive, ani amboemboe tenta guasu pegua reta Tumpa jo pe, ani itupao reta pe, ani tenta guasu rupi —jei—. <sup>13</sup>Añete chembijeco ma cua mbaembae re. Èrei mbaeti mbae añete vae ipuere umimbeu ndeve cua mbaembae re —jei Pablo—. <sup>14</sup>Èrei cua amimbeu ndeve. Che aico Jesús re arovia reve, jare jucuarãi ayeyocui chetenondegua reta iTumpa pe, yepe tēi judío reta jei aico penti moromboe añete mbae vae re. Echa'ã che arovia opaete mboroyocui pe uyecuatía oĩ vae, jare Tumpa iñee aracae umimbeu vae reta uicuatiaque —jei—. <sup>15</sup>Che arovia Tumpa umbijecove yeta co umanocue vae reta. Jae umbijecoveta jupi vae reta jare jupi mbae vae reta. Jucuarãi cua reta güirovia vi. <sup>16</sup>Jáeramo che jecuaño aipota chepia icavi anoi vaerã Tumpa coti jare ivi pegua reta coti —jei—.

<sup>17</sup>Che mbovi año ma aico'ã cheivi pe. Jaeramo ayu ye, corepoti aru vaerã iparavete vae reta peguarã jare Tumpa peguarã. <sup>18</sup>Jare cua ayapo añ rambueve, amocue Asia pegua judío reta cherecha Tumpa jo pe. Joco pe ayeyoe añ Tumpa coti mboroyocui jei rami. Ayembati'ã co jeta vae ndive. Ayapo'ã vi tecorai —jei—. <sup>19</sup>Icavi tēi co jocua judío reta yugüeru vaerã cua pe uñeapo cheré ndeve, ime yave mbae chembijeco jese vae —jei Pablo Félix pe—. <sup>20</sup>Cua reta etei tumimbeu ndeve mbae nunga teco uvãe cheré, mburuvicha reta jovai ayemboi yave. <sup>21</sup>Aramoi jaño penti mbae re ipuere chembijeco. Mburuvicha reta ipite pe añ rambueve, chiñeãta reve jae: 'Umanocue vae reta icove yeta vae re pe reta cherãa peĩ cua ara.' Jucuarãi jae —jei.

<sup>22</sup>Jare Félix cua uyandu yave, oyopia judío reta. Echa'ã jae uicuaa catu Jesús re güirovia vae reta ipurugüirovia regua. Jáeramo jei judío reta pe: —Sundaro reta juvicha itenondegua Lisias ou yave, aãata cua pemimbeu cheve vae re.

<sup>23</sup>Jayave Félix oyocui sundaro reta juvicha uyandareco vaerã Pablo re. Èrei oyocui vi umaño vaerã icoiño, jare agüiye vaerã oyopia jentarã reta, ou yave ipi uyeyocui chupe vaerã.

<sup>24</sup>Mbovi ara rupi Félix ou jembireco Drusila jee vae ndive. Drusila co jae penti judía. Jayave Félix ueni Pablo, jare uyapisaca quirãi yaroviata co Jesucristo re vae re. <sup>25</sup>Jare Pablo jei chupe quirãi icavi yayapo vaerã jupi vae, jare yayopia vaerã yanderete uipota vae güi, jare quirãi Tumpa uãata ivi pegua reta. Jayave Félix uquiye jare jei Pablo pe:

—Ecuano rani. Chepuere yave, turueni ye curi.

<sup>26</sup>Èrei Félix uipota tēi vi Pablo umee vaerã corepoti chupe, oyoraca vaerã. Jáeramo güeruruca aveiño, uyemingueta vaerã jae ndive. <sup>27</sup>Èrei mocui año ma uasa yave, Porcio Festo ou uipepica Félix. Jare Félix uipota umbiyerovia judío reta ramo, ueya Pablo peresoriru pe.

**Pablo uipota oo mburuvicha guasu César jee vae pe**

**25** <sup>1</sup>Festo ou uvãe yave jocua ivi pe, mbapí ara ma uasa yave, oo Cesarea güi Jerusalén pe. <sup>2</sup>Jayave sacerdote reta itenondegua reta jare judío reta itenondegua reta imiari chupe Pablo jeco re, jare umiñera <sup>3</sup>uyapo vaerã icavi vae chupe reta, güeruruca vaerã Pablo Jerusalén pe. Jare jae reta ucuatĩrota jese tape rupi, uyuca vaerã tẽi. <sup>4</sup>Ërei Festo jei chupe reta: —Ore nduyandareco noĩ Pablo re Cesarea pe, jare che aata joco pe curi. <sup>5</sup>Pepuere yave, pecua cherupíe. Jare uyapo yave teco icavi mbae vae jocua cuimbae, piñeapo jese —jei chupe reta.

<sup>6</sup>Jayave Festo upita yave joco pe aramoi ocho ani diez ara, ou ye Cesarea pe. Jayave piareve pe uguapí upuruãa vae pe, jare güeruruca Pablo. <sup>7</sup>Jare Pablo ou ma yave, judío Jerusalén güi yugüeru vae reta uyemboi Pablo iyipí rupi jare umbijeco jeta icavi mbae vae re. Ërei ipuere'ã uicuaaca cua teco uipota omboya jese vae añete co. <sup>8</sup>Jayave Pablo jei uyerepi vaerã:

—Ayovaicho'ã etei judío reta iporoyocui ndive, ani Tumpa jo ndive, ani César ndive.

<sup>9</sup>Ërei Festo uipota umbiyerovia judío reta. Jáeramo upirandu Pablo pe: —¿Ndipota pa ndeo Jerusalén pe, che nuãa vaerã joco pe cua teco reta re?

<sup>10</sup>Ërei Pablo jei chupe:

—César ndeocui nepuruãa vaerã, jare icavi co nde cherãa vaerã cua pe. Ayapo'ã etei teco judío reta coti. Nde etei ndicuaa cua —jei—. <sup>11</sup>Ime yave teco ayapo icoti, ani ime yave mbae ayapo amano vaerã, ndarau ayerure ndeve ayerepi vaerã mano güi. Ërei cua teco uipota omboya cheré vae ayapo'ã yave, ndarau quía ipuere chemee chupe reta. Aipota César cherãa vaerã —jei chupe.

<sup>12</sup>Jayave Festo uyemingueta ĩru mburuvicha reta ndive. Jayave jei Pablo pe: —Ndipota César nerãa vaerã. César pe ndeota —jei.

**Pablo Agripa jare Berenice jovai**

<sup>13</sup>Jare mbovi ara ma uasa yave, mburuvicha guasu Agripa jare jindi Berenice yugüeru Cesarea pe, umbisaluda vaerã Festo. <sup>14</sup>Jare mbovi ara ma joco pe ñugüinoi yave, Festo umimbeu mburuvicha guasu pe Pablo regua. Jei chupe:

—Ime cua pe oĩ penti cuimbae Félix ueya peresoriru pe vae. <sup>15</sup>Jerusalén pe aa yave, judío pegua sacerdote reta itenondegua reta jare tenta guasu pegua reta itenondegua reta umimbeu cheve cua cuimbae regua. Jae reta chemiñera che jae vaerã icavi co uyeyucaca vaerã —jei—. <sup>16</sup>Ërei che jae chupe reta: ‘Romano reta uyepocua'ã umee vaerã quía, ndei umbijeco vae reta yugüeru uñeapo jese mbove jare ndei uyerepi umbijeco vae reta güi mbove’ —jae chupe reta, jei—. <sup>17</sup>Jáeramo jae reta yugüeru uvãe yave, aãro'ã. Piareve pe aguapí apuruãa vae pe, jare aruruca jocua cuimbae —jei—. <sup>18</sup>Jare umbijeco vae reta joco pe ñugüinoi, ãrei umimbeu'ã cheve jocua nunga teco che chepia pe

ayemingueta tēi omboyata jese vae. <sup>19</sup>Jaeño umbijeco reta jae ipurugüirovia re, jare penti cuimbae Jesús jee vae re. Jocua Jesús umano ma. Ërei Pablo jei icove ye co —jei—. <sup>20</sup>Che aicuaa'ã mbae ra ayapota cua re. Jáeramo apirandu Pablo pe uipota ra oo Jerusalén pe, joco pe che aãa vaerã cua mbaembae re. <sup>21</sup>Ërei Pablo uipota nduyandareco vaerã jese, Augusto uãa vaerã. Jáeramo ayocui sundaro reta uyandareco vaerã jese, César pe chepuere amondo regua —jei.

<sup>22</sup>Jayave Agripa jei Festo pe:

—Che vi aipota ayapisaca jocua cuimbae re.

Jayave Festo jei chupe:

—Curiye ndiyapisacata jese.

<sup>23</sup>Jayave piareve pe Agripa jare Berenice yugüeru jemimonde ipõra vae ndive, jare uique reta Festo upuruãa vae pe sundaro reta juvicha itenondegua reta jare tenta guasu pegua reta itenondegua reta ndive. Jayave Festo oyocui güeru vaerã Pablo. <sup>24</sup>Jayave Festo jei:

—Mburuvicha guasu Agripa, jare opaete pe reta cua pe peñ vae, co oĩ cua cuimbae. Opaete judío Jerusalén pegua reta jare cua pegua reta chemiñera iñeãta reve jae umano vaerã —jei—. <sup>25</sup>Ërei che avãe'ã teco jese umano vaerã. Jare jae etei uipota mburuvicha guasu Augusto uãa vaerã. Jáeramo chepia pe ayemingueta ma amondo vaerã icoti —jei—. <sup>26</sup>Ërei aicuaa'ã mbae ra aicuatiata cheruvicha pe. Jáeramo aruruca perovai, jare nderovai etei, mburuvicha guasu Agripa, aicuaa vaerã mbae ra aicuatiata, opa yapirandu chupe yave —jei chupe reta—. <sup>27</sup>Echa'ã icavi'ã co yamondo vaerã penti pereso yamimbeu mbae reve mbae pereso re uñeapo vae reta umbijeco jese vae —jei.

### Pablo imiari Agripa pe

**26** <sup>1</sup>Jayave Agripa jei Pablo pe: —Ndepuere nemiari ndiyee.  
Jayave Pablo umupüa ipo, jare cuarãi imiari iyee:

<sup>2</sup>—Mburuvicha guasu Agripa, ayerovia quirãi añave chemiarita chiyee nderovai opaete judío reta chembijeco vae re. <sup>3</sup>Echa'ã nde ndicuaa catu opaete judío reta iyemboe jare iyeaca. Jáeramo numiñera ndiyapisaca vaerã cheré ndepiaquirēi reve —jei—.

### Quirãi Pablo uyapo ndei güirovia Jesús re mbove

<sup>4</sup>Chetairusu güive aico cherentarã reta ndive Jerusalén pe, jare judío reta uicuaa catu quirãi aico. <sup>5</sup>Jae reta uicuaa catu vi quirãi iyipi güive che aico moromboe fariseo pegua re. Cua moromboe pegua reta uipota yayapo cavi ete vaerã iporomboe jei vae. Jae reta ipuere chemimbeu ndeve, uipota yave —jei—. <sup>6</sup>Jare añave che arovia Tumpa uyapota co yandetenondegua reta pe jei chupe vae. Jáeramo judío reta uñeapo cheré —jei Pablo—. <sup>7</sup>Jare jocua doce yandetenondegua reta iñemoñaa reta vi güirovia Tumpa uyapota co jei chupe vae. Jáeramo uyeyocui reta Tumpa pe iquirēi reve ara rupi jare pĩtu rupi. Mburuvicha guasu Agripa, cua



che arovia ramo, judío reta chembijeco —jei—. <sup>8</sup>¿Maera pa perovia'ã Tumpa ipuere umbijecove ye umanocue vae reta? —jei chupe reta—.

### **Pablo uyapo icavi mbae vae upurugüirovia vae reta pe**

<sup>9</sup>Che chepia pe ayemingueta tēi icavi co ayapo vaerã jeta icavi mbae vae Jesús Nazaret pegua re güirovia vae reta coti. <sup>10</sup>Jare jucuarãi ayapo Jerusalén pe. Sacerdote reta itenondegua reta mbaepuere umee cheve yave, añoño peresoriru pe jeta upurugüirovia vae reta. Jare ndei uyeyucaca mbove, che jae vi umanota co reta —jei—. <sup>11</sup>Jare jeta ainupaca opaete judío reta itupao reta rupi, jare aipota jae reta jei vaerã icavi mbae vae Jesús coti. Jare chepochi ete ma chupe reta ramo, ayapo icavi mbae vae chupe reta tenta guasu ambie vae reta rupi —jei—.

### **Pablo jei quirãi güirovia Jesús re (Hch 9.1-19; 22.6-16)**

<sup>12</sup>Cua ayapo aico rambueve, sacerdote reta itenondegua reta umee cheve mbaepuere chemondo Damasco coti. <sup>13</sup>Jare guarasi ara mbite ma oĩ yave tape rupi aa rambueve, mburuvicha guasu, aecha penti tembipe ara güi jembipe ete guarasi güi vae. Jembipe cheré jare cherupie yugüiraa vae reta re —jei—. <sup>14</sup>Jare opareve ndoa ivi re, jare che ayandu penti ñee hebreo ñnee pe jei cheve: ‘Saulo, Saulo, ¿maera pa ndiyapo icavi mbae vae cheve? Nde co jae penti güeya ivira jacuarovi vae re upatara vae rami. Jáeramo ndiporara neĩ’ —jei cheve, jei—. <sup>15</sup>Jayave che apirandu: ‘¿Quía pa co nde, cheYa?’ Jare yandeYa jei: ‘Che co jae Jesús. Nde ndiyapo icavi mbae vae cheve. <sup>16</sup>Èrei epúa iyemboi. Che aipota ndiyeyocui vaerã cheve, jare nemimbeu vaerã aicuaaca ndeve jare aicuaacata ndeve vae. Echa'ã cua jeco pegua ayecuaa ndeve’ —jei, jei Pablo—. <sup>17</sup>‘Jare che nduepita nerentaigua reta güi jare judío mbae vae reta güi. Echa'ã nomondota icoti, <sup>18</sup>nemimae reta vaerã, jare uyerova reta vaerã pītumimbi güi tembipe coti, jare Satanás güi Tumpa coti. Cua uyapo reta yave, Tumpa umbiasata chupe reta imbaeyoa reta cheré güirovia ramo, jare umeeta chupe reta imbaerã ñru uñeñoño tee Tumpa peguarã vae reta ndive’ —jei, jei—.

### **Pablo uyapo Jesús oyocui vae**

<sup>19</sup>Jáeramo, mburuvicha guasu Agripa, cheatē'ã ayapo vaerã Tumpa uicuaaca cheve ayapo vaerã vae. <sup>20</sup>Echa'ã tenonde amimbeu Damasco pegua reta pe. Jayave amimbeu vi Jerusalén pegua reta pe, opaete Judea pegua reta pe jare judío mbae vae reta pe. Amimbeu chupe reta ueya vaerã iyemingueta icavi mbae vae ipia pe oĩ vae, jare uyerova vaerã Tumpa coti. Amimbeu vi chupe reta uyapo vaerã icavi vae, ñru vae reta uicuaa vaerã ueya ma co iyemingueta icavi mbae vae ipia pe oĩ vae — jei—. <sup>21</sup>Cua jeco pegua, amocue judío reta chepisi Tumpa jo pe, jare uipota tēi cheyuca. <sup>22</sup>Èrei Tumpa chembori ramo, imeño aico cua ara.

Moisés jare ñru Tumpa ñnee aracae umimbeu vae reta jei uyeyapota vae re. Jocuano che vi amimbeu sambiai reta jare ucuacuaa vae reta pe — jei—. <sup>23</sup>Echa'ã jae reta jei Cristo uiporarañotai co, jare jae tenonde icove yeta co ou umanocue vae reta ipite güi, uechaca vaerã tembipe judío reta jare judío mbae vae reta pe —jei Pablo chupe reta.

### Pablo jei tõi Agripa pe upurugüirovia vaerã

<sup>24</sup>Jare Pablo jucuarãi imiari iyee yave, Festo ñneeãta reve jei: —Pablo, nembiquere ma. Jeta mbaembae re ndiyemboe ramo, nembiquere ma —jei chupe.

<sup>25</sup>Ërei Pablo jei chupe: —Chembiquere'ã co, mburuvicha guasu Festo. Che jae ndeve vae añete vae jare aracuaa pegua co —jei—. <sup>26</sup>Echa'ã mburuvicha guasu Agripa uicuaa catu cua mbaembae regua, jare chepuere chemiari chupe aipiu mbae reve. Aicuaa jae uicuaa catu cua mbaembae regua. Echa'ã cua uyeyapo viari'ã — jei chupe—. <sup>27</sup>Mburuvicha guasu Agripa, ¿nderovia pa Tumpa ñnee aracae umimbeu vae reta uicuatiaque? Che aicuaa nderovia co —jei Agripa pe.

<sup>28</sup>Jayave Agripa jei Pablo pe:

—Ndipota tõi ndipo imambae cheapo cristianorã.

<sup>29</sup>Jayave Pablo jei chupe:

—Ayerure Tumpa pe, imambae ani ñma pe, nde jare opaete ñru añave uyapisaca cheré vae reta piyeyapo vaerã che rami, ñrei agüiye vaerã penoi cua nunga cadena —jei.

<sup>30</sup>Jare Pablo jucuarãi jei ma yave, uyemboi reta mburuvicha guasu Agripa, mburuvicha guasu Festo, Berenice jare jae reta ndive uguapi ñugüinoi vae reta. <sup>31</sup>Jare oẽ reta oca pe yave, jei uyupe:

—Cua cuimbae uyapo'ã mbae umano vaerã ani oĩ vaerã peresoriru pe.

<sup>32</sup>Jare Agripa jei Festo pe:

—Yayorata tõi cua cuimbae, uipota'ã yave César uã vaerã.

### Omondo reta Pablo Roma pe

**27** <sup>1</sup>Jare mburuvicha reta ipia pe uyemingueta ma yave icavi co ndoo vaerã ivi Italia pe, umee reta Pablo jare amocue ñru pereso reta sundaro reta juvicha Julio jee vae pe. Jae co penti ati Augusto jee vae pegua. <sup>2</sup>Jare ndoo joco güi penti chalana guasu tenta guasu Adramitio pegua pe. Cua oota Asia pegua tenta guasu i guasu jembei pe ñugüinoi vae reta pe. Jare oo orerupíe Aristarco Tesalónica pegua. Tesalónica ivi Macedonia pegua co. <sup>3</sup>Piareve pe ndoo nuvãe tenta guasu Sidón pe. Jare Julio ipiacavi Pablo pe. Jáeramo umaño jese oo vaerã opou iiru reta pe, jae reta uyandareco vaerã jese. <sup>4</sup>Jayave joco güi ndoo ye i guasu rupi, jare nduasa Chipre icupe rupi, agüiye vaerã ivitu orerovãiti. <sup>5</sup>Jayave nduasa i guasu Cilicia jare Panfilia jovai oĩ vae rupi, jare ndoo nuvãe tenta guasu Mira pe. Mira ivi Licia pegua co.

<sup>6</sup>Jare joco pe sundaro reta juvicha uvãe penti chalana guasu Alejandría pegua oota Italia coti vae pe, jare pipe orembuyupi. <sup>7</sup>Jeta ara ndoo ndeve, jare yavai ete ndoo vaerã nuvãe tenta guasu Gnido jovai, ivitu orerovãiti ramo. Jare Gnido güi ndoo ivi Creta icupe rupi ivi Salmón jovai. <sup>8</sup>Jare ndoo ivi iyipi rupi, ãrei yavai ete ndoo vaerã nuvãe Buenos Puertos pe. Cua güi coiño oĩ tenta guasu Lasea.

<sup>9</sup>Jare ima ete ma nduguata ramo, icavi'ã ma ndoo ye vaerã i guasu rupi. Echa'ã uyaro ma roi vaerã, jare jocua yasi reta rupi uguata'ã chalana guasu reta. Jayave Pablo umbiaracuaa jei:

<sup>10</sup>—Cherivi reta, yaaño yave, che aicuaa ucañita co tivita reta jare chalana guasu, jare yande vi aramoi ñamanota —jei.

<sup>11</sup>Ërei sundaro reta juvicha güirovia chalana guasu uruguata vae reta juvicha jare chalana guasu iya Pablo güi. <sup>12</sup>Jare jocua chalana uñepãtiarenda i guasu jembei pe icavi'ã ndupita vaerã opaete roi guasu iara reta uasa regua. Jáeramo jeta ore ndive ñugüinoi vae reta umbiaracuaa ndoo vaerã joco güi. Jei reta aramoi orepuereta ndoo nuvãe tenta guasu Fenice pe, ndupita vaerã joco pe roi guasu iara pegua. Fenice co jae penti chalana uñepãtiarenda Creta pegua. Joco güi i guasu uyecuaa guarasi oẽ vae coti.

### Ivitu tanta vae i guasu pe

<sup>13</sup>Jare ivitu umbipi uyepeyu ndeve catu sur coti güi yave, jae reta jei tẽi icavita ndoo vaerã. Jayave chalana guasu uruguata vae reta uupi chalana iyepitasoca, jare ndoo Creta iyipi rupi coiño ivi güi. <sup>14</sup>Ërei ndei ima mbove uñeovãiti chalana guasu ndive tanta ivitu cusumirón ndive Euroclidón jee vae. <sup>15</sup>Jare ivitu uipota umbiyerova chalana guasu, jare orepuere'ã ma numisimi ivitu coti. Jayave numaeño ivitu re orereraa vaerã. <sup>16</sup>Jayave ndoo yave ivi michi vae Clauda icupe rupi, añaepa nduupi chalana-rai chalana guasu jaicue numbitiriri ndugüiraa vae. <sup>17</sup>Jare nduupi ma yave chalana guasu pe, chalana guasu uruguata vae reta oyocua chalana guasu piola pe. Jare ipia pe uyemingueta aramoi oota upãa Sirte jee vae pe, jare uquiye reta. Echa'ã Sirte pe i tip'i'ã co. Jáeramo umbigüeyi reta ivitu umiaña chalana guasu pipe vae tuicha vae ivate güi. Jare jucuarãi ivitu orereraa. <sup>18</sup>Jare jecuaeño tanta ete ivitu oreve. Jáeramo piareve pe chalana guasu uruguata vae reta umbipi omombo tivita reta. <sup>19</sup>Jare mbapi ara uasa ma yave orepo pe etei nomombo jocua ivitu umiaña chalana guasu pipe vae ivate güi umbigüeyi reta vae. <sup>20</sup>Uyecuaa'ã guarasi jare yasitata jeta ara ma, jare jecuaeño tanta ivitu oreve. Nduicuaa'ã ma quirãi nduyembiasa vaerã.

<sup>21</sup>Jare ima ma nducaru'ã yave, Pablo uyemboi orepite pe jare jei:

—Cuimbae reta, piyapisacata tẽi co chiñee re, agüiye vaerã tẽi yayu Creta güi pemicañi cua mbaembae. <sup>22</sup>Ërei añave che jae peve piñemiatangãtu vaerã. Echa'ã ndarau quía umano pepite pe. Jaeño chalana guasu ucañita —jei—.

<sup>23</sup>Echa'ã piare uyecuaa cheve penti ángel Tumpa pe uyeyocui vae. Che co jae

Tumpa imbae, jare chupe ayeyocui —jei Pablo—. <sup>24</sup>Ángel jei cheve: ‘Pablo, agüiye equiye. Ndeoñotai co ndiyemboi César jovai. Jare Tumpa ipiacavi nde ndive ramo, uepita vi opaete cua nderupíe yugüiraa vae reta’ —jei cheve, jei—. <sup>25</sup>Jáeramo, cuimbae reta, piñemiatangātu. Echa'ã che arovia Tumpa, jare jae jei cheve vae uyeyapota co. <sup>26</sup>Ërei yaañotai co ñavãe penti ivi oĩ vae pe —jei.

<sup>27</sup>Jare catorce ara uasa ma yave, ivitu orereraa rambueve i guasu Adriático rupi, piare catu yave chalana guasu uruguata vae reta uicuaa coño ma yugüiraa ivi güi. <sup>28</sup>Jayave umbigüeyi i tipí pe umiaanga vaerã, jare uicuaa i tipícue oĩ treinta y seis metro rupi. Jare ndoo catu ye ma yave, umiaanga ye, jare uicuaa i tipícue oĩ veintisiete metro rupi. <sup>29</sup>Jayave ipia pe uyemingueta aramo upãata ita reta re, jare uquiye reta. Jayave umbigüeyi reta chalana guasu jaicue coti irundi chalana iyepitasoca reta. Jare uipota echa ma cõe vaerã tẽi chupe reta. <sup>30</sup>Jare chalana guasu uruguata vae reta uipota tẽi osi chalana guasu güi. Jáeramo umbigüeyi chalana-rai i pe. Uipota ñru reta ipia pe uyemingueta vaerã jae reta umbigüeyita chalana guasu jenonde coti chalana iyepitasoca reta. <sup>31</sup>Jayave Pablo jei sundaro reta juvicha jare sundaro reta pe:

—Cua reta upita'ã yave chalana guasu pe, ndarau pepuere piyembiasa.

<sup>32</sup>Jayave sundaro reta uyasía chalana-rai ichã, jare umaño oo ucañi.

<sup>33</sup>Jare cõeta ma yave, Pablo umbiaracuaa opaete joco pe ñugüinoi vae reta ucaru vaerã. Jei chupe reta:

—Catorce ara ma piyemipia'ã, jare pecaru'ã. <sup>34</sup>Jáeramo che pumiñera pecaru, pepirãta vaerã. Echa'ã ndarau ucañi pea ave peãca güi —jei.

<sup>35</sup>Jare cua jei yave, uipisi mbiyape, jare umee yasurupai Tumpa pe opaete vae jovaque. Jayave upisãa mbiyape jare jou. <sup>36</sup>Jayave opaete jae reta uñemiatangātu, jare ucaru reta vi. <sup>37</sup>Jare opaete nduico chalana guasu pe vae co doscientos setenta y seis. <sup>38</sup>Jare opareve iyangapii yave, omombo reta trigo i pe, jare jucuarãi umbivevi chalana guasu.

### Chalana guasu icumegua

<sup>39</sup>Jare cõe ma yave, uicuaa'ã reta jocua ivi. Ërei uecha reta penti i jugua jare ivi ipecavi joco pe. Jáeramo jocoti uipota reta omondo chalana guasu, ipuere yave. <sup>40</sup>Jayave jae reta omombo ueya i pe chalana iyepitasoca reta, jare umungúe timón ichã. Jayave uupi ivitu umiaña chalana guasu pipe vae michi vae, jare güiraa i jembei coti. <sup>41</sup>Jayave chalana guasu oo uyererocua ivicuíti re upãa ndei oo uvãe i jugua pe mbove. Echa'ã joco pe i uyuasa oĩ. Jare chalana guasu itĩ uyeatica upita, jare omi'ã ye. Jayave i yacarachi ete ramo, oyoca chalana guasu jaicue coti. <sup>42</sup>Jare sundaro reta uipota tẽi uyuca pereso reta, agüiye vaerã quía osi, uitai yave. <sup>43</sup>Ërei sundaro reta juvicha uipota uepi Pablo. Jáeramo jei sundaro reta pe agüiye vaerã uyuca reta. Oyocui ipuere uitai vae reta rani oa vaerã i pe, yugüiraa vaerã uvãe ivi pe. <sup>44</sup>Jare oyocui ñru reta yugüiraa vaerã ivirape re ani ipotave chalana guasu pe oĩ vae re. Jare jucuarãi opareve yugüiraa cavi uvãe ivi pe.

### Pablo Malta pe

**28** <sup>1</sup>Opareve noẽ ma ivi pe yave, nduicuaa jocua ivi jee Malta. <sup>2</sup>Jare joco pegua reta ipiacavi oreve. Echa'ã orembiresive cavi, jare uyatapi, ama oqui jare roi ramo. <sup>3</sup>Jare Pablo umbati yepea, jare oñono tata pe. Jayave penti mboi tata güi oẽ osi, jare uñemama Pablo ipo re, uichuu yave. <sup>4</sup>Jare joco pegua reta uecha yave mboi usagüigüi oĩ Pablo ipo re, jei reta uyupe:

—Añetete yepe cua cuimbae upuruyuca vae. Yepe tẽi umano'ã i guasu pe, ãrei ndarau ipuere icono, jupi'ã ramo.

<sup>5</sup>Ërei Pablo umitimo ipo güi mboi tata pe, jare uyeyapo'ã mbae chupe. <sup>6</sup>Jare joco pegua reta ipia pe uyemingueta tẽi iruruta ani aramoi oata jare umanota. Ërei jae reta uãro tẽi ma ima yave, uecha uyeyapo'ã mbae chupe. Jayave jae reta jei'ã ma tenonde rami. Jei reta ma:

—Cua cuimbae penti tumpa co.

<sup>7</sup>Jare jocua ivi pegua reta juvicha Publio jee vae güinoi jocoropi iivi reta. Jae orembiresive cavi, jare oremingaruru mbapi ara. <sup>8</sup>Jare Publio tu imbaerasi oĩ jupa pe. Jacu jare jepotiugüi. Pablo oo umae jese. Jare uyerure Tumpa pe yave, oñono ipo jese, jare umbigüera. <sup>9</sup>Jare cua uyeyapo yave, ñru imbaerasi vae jocua ivi pegua reta yugüeru, jare Pablo umbigüera vi. <sup>10</sup>Jayave jae reta umeei oreve jeta mbaembae. Jare nduyupi ye yave chalana guasu pe, umbuyupi vi oreve mbaembae nduipota vae.

### Pablo oo uvãe Roma pe

<sup>11</sup>Jare mbapi yasi ma uasa yave, ndoo joco güi penti chalana guasu Alejandría pegua pe. Cua chalana guasu upita jocua ivi pe, roi iara umbiasa vaerã. Chalana guasu itĩ re ñugüinoi choguaquiri-raanga ivira pegua Cástor jare Pólux jee vae.

<sup>12</sup>Jayave ndoo nuvãe tenta guasu Siracusa pe, jare ndupita joco pe mbapi ara.

<sup>13</sup>Jayave joco güi nduyere jare ndoo nuvãe tenta guasu Regio pe. Jayave piareve pe ivitu uyepeyu sur coti güi, jare piareve ye pe ndoo nuvãe tenta guasu Puteoli pe.

<sup>14</sup>Jare joco pe nuñevãe upurugüirovia vae reta ndive. Jare jae reta uparea oreve ndupita vaerã jae reta ndive siete ara pegua. Jare joco güi ndoo tenta guasu Roma coti. <sup>15</sup>Jare orererãcua upurugüirovia vae Roma pegua reta pe, jare amocue jae reta yugüeru orerovãiti Foro Apio pe, jare ñru vae reta yugüeru orerovãiti Tres Tabernas pe. Jare Pablo uecha yave cua reta, umee yasurupai Tumpa pe, jare uñemiatangãtu. <sup>16</sup>Jare ndoo nuvãe yave Roma pe, sundaro reta juvicha umee pereso reta penti sundaro reta juvicha tenondegua vae pe. Ërei umaẽno Pablo re icono vaerã penti sundaro uyandareco jese vae ndive.

### Pablo umimbeu ñee icavi vae Roma pe

<sup>17</sup>Jare mbapi ara ma uasa yave, Pablo uenica judío reta itenondegua reta. Jare uyembati reta yave, Pablo jei chupe reta:

—Cheriquei reta, yepe tēi ayapo'ã mbae nunga teco ñanerentaigua reta coti ani yandetenondegua reta iyemboe coti, ãrei Jerusalén pegua reta chemee romano reta pe, jare romano reta cheñono peresoriru pe —jei—. <sup>18</sup>Jare jae reta upirandu yave cheve, uipota tēi cheyora, ayapo'ã mbae nunga teco amano vaerã ramo. <sup>19</sup>Ërei judío reta oyovaicho cheré ramo, ayapo'ã vaerã mbae, jaeño ayu vaerã cherãa César, yepe tēi mbaeti mbae ambijeco vaerã cherentaigua reta jese vae —jei chupe reta—. <sup>20</sup>Jáeramo che pueni puecha vaerã, jare ayemingueta vaerã pe reta ndive. Echa'ã Israel pegua reta güirovia vae jeco pegua añeapíti aĩ cua cadena pe —jei.

<sup>21</sup>Ërei jae reta jei chupe:

—Mbaeti quía ombou tupapire oreve Judea güi nemimbeu vaerã oreve. Jare ou'ã penti ave ñanerentaigua joco güi umimbeu vaerã oreve icavi mbae vae nderegua. <sup>22</sup>Ërei nduipota nduicuaa mbae ndepia pe ndiyemingueta vae. Echa'ã nduicuaa opaete que rupi jei reta icavi'ã co cua moromboe —jei reta.

<sup>23</sup>Jayave jei reta Pablo pe ñru ara rupi yugüeruta co. Jayave jocua ara jeta vae yugüeru Pablo jenta pe. Jare neimbove güive Pablo icaaru umimbeu chupe reta Tumpa iporoyocua regua. Jare Moisés iporoyocui rupi jare Tumpa ñnee aracaе umimbeu vae reta uicuatiaque vae rupi umimbeu vi chupe reta Jesús regua. Cua uyapo, jae reta güirovia vaerã. <sup>24</sup>Jare amocue güirovia Pablo jei vae. Ërei ñru vae reta güirovia'ã. <sup>25</sup>Jáeramo uyembiyao reta uyugüi, jare yugüiraa Pablo jenta güi, Pablo opa yave jei chupe reta cua ñee:

—Jupi co jei Espíritu Santo Tumpa ñnee aracaе umimbeu vae Isaías rupi yandetenondegua reta pe. Echa'ã jei cuarái:

<sup>26</sup>'Ecuа tenta guasu pegua reta pe, jare ere chupe reta:

Piyandu tēita, ãrei ndarau picuaa.

Peecha tēita, ãrei ndarau picuaa cavi.

<sup>27</sup>Echa'ã cua reta ipiatanta,

jare iyapisa pe uyandu tēi,

jare usapimiño,

agüiye vaerã uecha jesa pe,

jare agüiye vaerã uyandu iyapisa pe,

jare agüiye vaerã uicuaa ipia pe,

jare agüiye vaerã uyerova checoti' —jei Tumpa—.

'Echa'ã uyerova checoti yave, ambaita tēi imbaeyoa reta' —jei.

Jucuarái jei —jei Pablo chupe reta—.

<sup>28</sup>Picuaa cavi cua: Tumpa umimbeucata cua ñee judío mbae vae reta pe, jae reta uyembiasaca vaerã. Echa'ã jae reta uyapisacata jese —jei.

<sup>29</sup>Jare cua Pablo opa ma jei yave, judío reta yugüiraa uyeaca reve uyupii.

<sup>30</sup>Jare Pablo uiporu penti o umbiepi reve, jare ico joco pe mocui año. Jare umbiresive opaete yugüeru opou ipi vae reta. <sup>31</sup>Jare jecuaeño umimbeu Tumpa iporoyocua regua, jare oporomboe yandeYa Jesucristo re uquiye mbae reve, jare mbaeti quía umbiavai.

# LA CARTA DEL APOSTOL SAN PABLO A LOS ROMANOS

---

**1** <sup>1</sup>Che co jae Pablo. Che ayeyocui Jesucristo pe. Jae cheparavo aico vaerã jemimondorã, jare cheñono tee amimbeu vaerã ñee icavi vae Tumpa regua. <sup>2</sup>Echa'ã aracae Tumpa umee ñee icavi vae iñee umimbeu vae reta rupi uyecuatía oĩ vae pe. <sup>3</sup>Ñee icavi vae umimbeu yandevé Tumpa Tai regua. Jae co yandeYa Jesucristo. Jae David ñemoñaá reta pegua co. <sup>4</sup>Ërei Espíritu iyoa mbae vae rupi jae uyecuaa Tumpa Tai mbaepuere güinoi vae. Echa'ã cua uyecuaa, icove ye yave ou umanocue vae reta ipite güi. <sup>5</sup>Jesucristo rupi Tumpa umee oreve ipiacavi jare oremondo numimbeu vaerã opaete ivi pegua reta pe, Tumpa jei rami jae reta upurugüirovia vaerã. Cua nduyapo, Tumpa uyembíadoraca vaerã. <sup>6</sup>Jare pe reta co cua nunga amocue. Echa'ã Tumpa preparavo, pico vaerã Jesucristo imbaerã. <sup>7</sup>Aicuatía cua tupapire opaete Roma pe pico vae pe. Tumpa perau jare preparavo peñono tee vaerã iyupeguarã. YandeRu Tumpa jare yandeYa Jesucristo tumee peve ipiacavi jare ipiacatu.

## Pablo uipota oo Roma pe

<sup>8</sup>Tenonde voi amee yasurupai Tumpa pe Jesucristo rupi peré, quirãí pepurugüirovia jerãcua opaete ivi rupi. <sup>9</sup>Che ayeyocui Tumpa pe opaete chequirëi reve. Echa'ã amimbeu ñru vae reta pe ñee icavi vae Tumpa Tai regua. Jare chepuere jae peve Tumpa jovaque quirãí jecuaeño ayerure chupe peré. <sup>10</sup>Aipota ete apou pepi. Jáeramo ayerure Tumpa pe jese. Tumpa uipota yave, aañotai co pepi. <sup>11</sup>Echa'ã aipota puecha, pombori vaerã Espíritu pegua re, piñemimirãta vaerã. <sup>12</sup>Jare cuarãí yayembipiacatuta yandepurugüirovia rupi. Echa'ã pe reta vi pepurugüirovia che apurugüirovia rami. <sup>13</sup>Ërei, cherivi reta, aipota picuaa vaerã quirãí jeta vese ma aata tẽi pepi, ãrei jecuaeño mbae chembiavai. Echa'ã aipota ayeyocui Cristo pe pepite pe, jae uyembíadoraca vaerã pe reta rupi, jucuarãí uyeyapo ñru

judío mbae vae reta ipite pe rami. <sup>14</sup>Echa'ã chepía co Cristo pe ayeyocui vaerã uyemboe vae reta jare uyemboe mbae vae reta pe, jare iyaracuaa vae reta jare iyaracuaa mbae vae reta pe. <sup>15</sup>Jáeramo chepuere yave, aipota ete amimbeu ñee icavi vae pe reta Roma pe pico vae pe.

### Ñee icavi vae imbaepuere

<sup>16</sup>Echa'ã chemara'ã ñee icavi vae re. Echa'ã ñee icavi vae rupi Tumpa umbiasa imbaepuere pe opaete güirovia vae reta. Umbiasa judío reta rani jare judío mbae vae reta vi. <sup>17</sup>Echa'ã ñee icavi vae umimbeu yandev quirái Tumpa yanembujupi co yarovia yave. Jare jucuarái umimbeu yandev, yarovia vaerã. Echa'ã Tumpa ñee pe uyecuatía oĩ cuarái: “Tumpa umbujupi vae güinoita tecove upurugüirovia ramo.” Jucuarái uyecuatía oĩ.

### Ivi pegua reta imbaeyoa

<sup>18</sup>Jare uyecuaa ara güi quirái Tumpa uiporaraca ete opaete jae ndive oyovaicho vae reta jare icavi mbae vae uyapo vae reta pe. Echa'ã jae reta umbiavai añete vae icavi mbae vae uyapo vae rupi. <sup>19</sup>Opaete vae ipuere uicuaa Tumpa regua vae uyecuaa co chupe reta. Echa'ã Tumpa etei uicuaaca chupe reta. <sup>20</sup>Añete co, mbaeti quía ipuere uecha Tumpa jare imbaepuere opa mbae vae. Ërei ivi uyeyapo güive, Tumpa uicuaaca cua imbaepuere jare quirái jae co Tumpa. Echa'ã ivi pegua reta ipuere tēi uicuaa, opaete mbaembae Tumpa uyapo vae jeco pegua. Jáeramo mbaeti penti ave ipuere jei: “Che aicuaa'ã co.” <sup>21</sup>Yepe tēi jucuarái uicuaa reta tēi Tumpa, umbiadora'ã co. Umee'ã vi yasurupai chupe. Ërei ipia pe uyemingueta reta iyaracuaa mbae vae reta rami, jare iyaracuaa mbae vae reta rami ipuere'ã ipia pe uyemingueta cavi mbae re. <sup>22</sup>Jae reta ipia pe uyemingueta tēi iyee iyaracuaa catu vae reta co. Ërei uyeyapo reta iyaracuaa mbae vae reta. <sup>23</sup>Jae reta umbiadora'ã Tumpa umano mbae vae. Ërei umbiadora cuimbae-raanga reta, yepe tēi cuimbae reta umano vae co. Umbiadora reta vi güira-raanga reta, maemimba-raanga reta jare mboi-raanga reta.

<sup>24</sup>Jáeramo Tumpa umaño jese reta ipia pe uyemingueta vaerã icavi mbae vae re ipia jei vae rupi, jare jucuarái uyapo reta uyupe imarata tēi jese vae. <sup>25</sup>Güirovia'ã añete vae Tumpa regua. Ërei güirovia reta apu. Echa'ã umbiadora'ã reta Tumpa opaete mbaembae uyapo vae, jare uyeyocui'ã vi chupe. Ërei umbiadora mbaembae Tumpa uyapo vae jare uyeyocui chupe reta. Tumpa tuyembidoraca jaño mai pegua. Amén.

<sup>26</sup>Jáeramo Tumpa umaño jese reta uyapo vaerã pichĩ vae imarata tēi jese vae. Echa'ã cuña reta opoco iyee. Tumpa uyapo'ã cuña reta jucuarái uyapo vaerã. <sup>27</sup>Jae ramiño vi cuimbae reta uyapo'ã cuña reta ndive Tumpa uipota uyapo vaerã vae. Ërei cuimbae reta uyupii uyepota, jare opoco iyee. Jáeramo Tumpa uiporaraca chupe reta. Echa'ã jae reta uyemimbaerasi icavi mbae vae uyapo vae jeco pegua.

<sup>28</sup>Jare uipota'ã reta uicuaa Tumpa ramo, Tumpa umaño jese reta ipia pe uyemingueta vaerã opaete mbae icavi mbae vae re, jae reta



uyapo vaerã opaete mbae icavi mbae vae. <sup>29</sup>Jae reta jecuaeño uyapo jupi mbae vae. Uyapo aguasa. Uipota ñru vae reta imbaembae. Uyapo icavi mbae vae. Ñacatãa. Upuruyuca. Jovaichopota. Upurumbitavi. Ipia pe uyemingueta icavi mbae vae uyapo vaerã. Indayepota. <sup>30</sup>Oporomboyovaichoca ñru ndive. Umitarẽi Tumpa. Jecopochi. Uyembicate. Uyembutuicha. Icatu ete uyapo vaerã icavi mbae vae. Uyapo'ã tu jare ichi jei vae. <sup>31</sup>Imbiquere. Uyapo'ã jei uyapota tẽi vae. Mbaeti etei güinoi mburuau. Ipiatanta. Mbaeti güinoi mburuparareco. <sup>32</sup>Cua reta uicuaa Tumpa jei ma co quirãi cua mbaembae icavi mbae vae uyapo vae reta umanota co. Ërei yepe tẽi cua uicuaa, ãrei jecuaeño uyapo cua mbaembae icavi mbae vae, jare icavi chupe jucuarãi uyapo vae reta.

### Tumpa upuruãa jupi vae rupi

**2** <sup>1</sup>Nde vi ndarau ndepuere ndiyerepi. Echa'ã ime yave quã ñru vae umbijeco vae, uyembijeco vi co, ñru vae umbijeco yave. Echa'ã ñru vae umbijeco vae uyapo vi jocua jeco icavi mbae vae reta. <sup>2</sup>Ërei yaicuaa quirãi Tumpa uãa añete vae rupi jocua jeco icavi mbae vae reta uyapo vae reta. <sup>3</sup>Agüiye ndepia pe iyemingueta nde ndiyerepita vae re, agüiye vaerã Tumpa nerãa. Echa'ã penti vae umbijeco yave jocua jeco icavi mbae vae reta uyapo vae reta, ndarau uyerepi. Echa'ã jae etei vi jucuarãi uyapo. <sup>4</sup>Nde nerãro ndico Tumpa ipiacavi jare quirãi Tumpa umiaguanta jare ipiaguasu ndeve. Ndicuaa co quirãi Tumpa ipiacavi ndeve, nde ndeeya vaerã icavi mbae vae ndepia pe oĩ vae. <sup>5</sup>Ërei ndepiatanta yave, jare ndeeya'ã yave icavi mbae vae ndepia pe oĩ vae, Tumpa uiporaracata ndeve jocua ara opaete ñru vae reta pe uiporaraca yave. Echa'ã jocua ara uyecuaata co quirãi Tumpa upuruãa jupi vae rupi. <sup>6</sup>Tumpa umeeta opaete vae pe ipotave vae uyapo vae rupi. <sup>7</sup>Icavi vae jecuaeño ipiaguasu reve uyapo vae reta pe Tumpa umeeta tecove opa mbae vae. Echa'ã jocua rupi jae reta uicuaaca quirãi jecuaeño ueca mbaembae opa mbae vae yembiadora pegua. <sup>8</sup>Ërei Tumpa uiporaracata co mbaembae iyupeguaraño uipota vae reta pe. Echa'ã uipota'ã uyapo añete vae rupi. Jaeño uipota uyapo jupi mbae vae. Jáeramo Tumpa uiporaracata chupe reta. <sup>9</sup>Opaete ivi pegua icavi mbae vae uyapo vae reta uiporarata co jare ipiatitita co - judío reta rani jare judío mbae vae reta vi. <sup>10</sup>Ërei opaete icavi vae uyapo vae reta güinoita yepi jare mbiacatu - judío reta jare judío mbae vae reta vi. <sup>11</sup>Echa'ã Tumpa uau'ã penti vaeño ñru vae güi. <sup>12</sup>Echa'ã opaete Moisés iporoyocui mbaeti güinoi vae iyoa vae reta yugüiraata cañitei pe, yepe tẽi mbaeti güinoi Moisés iporoyocui. Jare opaete Moisés iporoyocui güinoi vae iyoa vae reta uñeãacata Moisés iporoyocui re. <sup>13</sup>Echa'ã Tumpa umbujupi'ã mboroyocui uyanduiño vae reta. Tumpa umbujupita mboroyocui jei vae uyapo vae reta. <sup>14</sup>Echa'ã judío mbae vae reta, yepe tẽi mbaeti güinoi Moisés iporoyocui, ãrei amo pe uyapo reta mboroyocui jei vae mbaeti quã umimbeu chupe reta reve. Cua uicuaaca ime güinoi penti mboroyocui ipia pe, yepe tẽi mbaeti güinoi Moisés iporoyocui. <sup>15</sup>Echa'ã uicuaaca ime güinoi penti mboroyocui ipia pe, mbaembae uyapo vae

rupi. Jae reta uicuaa vi ipia pe mbae icavi uyapo vaerã vae. Jáeramo ipia pe uyemingueta rupiño uyembijeco ani uyerepi mbaembae uyapo vae re. <sup>16</sup>Jucuarãi co uñeãacata reta, Tumpa uãa yave ivi pegua reta Jesucristo rupi. Echa'ã jocua ara uyecuaata co opaete vae uyapo vae tenonde yave uyecuaa mbae vae. Jare Tumpa upuruãata ñee icavi vae che amimbeu vae re.

### Judío reta jare mboroyocui

<sup>17</sup>Ërei nde ndere ndiyupe nde co jae judío. Nde ndiyeco mboroyocui re, jare ndiyembicate nde ndere ndicuaa co Tumpa ramo. <sup>18</sup>Nde ndicuaa Tumpa jei vae, jare mboroyocui jei vae rupi nde ndicuaa mbae icavi ete ndiyapo vaerã vae. <sup>19</sup>Nde nderovia ndepuere co nemimae jesa mbae Tumpa coti vae reta, jare ndepuere neme Tumpa jembipe pītumimbi pe ñugüinoi vae reta pe. <sup>20</sup>Nde nderovia vi ndicuaa co quirãi ndepuere nemboe mbaeti mbae uicuaa vae reta jare sambiai reta. Echa'ã mboroyocui umimbeu ndeve aracuaa jare añete vae. <sup>21</sup>Nde nemboe ñru vae. Jáeramo nde rani ndiyemboeta tēi. Nde nemimbeu ñru vae reta pe agüiye vaerã imonda. Jáeramo agüiyeta tēi nemonda nde vi. <sup>22</sup>Nde ndere ñru vae reta pe agüiye vaerã uyuvanga menda re. Jáeramo agüiyeta tēi ndiyuvanga menda re nde vi. Nde nemitarēi tumpa-raanga reta. Jáeramo agüiyeta tēi nde vi niñomi mbaembae icavi vae itupao reta güi. <sup>23</sup>Nde ndiyembicate mboroyocui neni ramo. Ërei ñru vae reta güiñro Tumpa nde ndiyapo'ã mboroyocui jei vae ramo. <sup>24</sup>Echa'ã Tumpa ñnee pe uyecuatía oĩ cuarã: “Judío mbae vae reta jei mbaembae icavi mbae vae Tumpa coti pereco pegua.” Jucuarãi uyecuatía oĩ.

<sup>25</sup>Icavi co niñemicircuncidaca vaerã, Moisés iporoyocui jei vae ndiyapo yave. Ërei ndiyapo'ã yave mboroyocui jei vae, ndiyeyapo co penti uñemicircuncidaca mbae vae rami, yepe tēi niñemicircuncidaca. <sup>26</sup>Jare uñemicircuncidaca'ã vae uyapo yave mboroyocui jei vae, jae uyeyapo co penti uñemicircuncidaca vae rami, yepe tēi uñemicircuncidaca'ã. <sup>27</sup>Jare uñemicircuncidaca'ã jete pe vae, mboroyocui jei vae uyapo yave, nembijecota co. Echa'ã nde ndiyavi mboroyocui jei vae, yepe tēi ime neni mboroyocui uyecuatía oĩ vae, jare yepe tēi niñemicircuncidaca. <sup>28</sup>Echa'ã penti judío mbaeti co judío añetete vae uyecuaa vae jeco peguaño. Jae ramiño vi penti uñemicircuncidaca vae mbaeti co uñemicircuncidaca vae añetete vae uyecuaa vae jeco peguaño. Echa'ã jete peño uñemicircuncidaca. <sup>29</sup>Ërei penti judío ipia pe oĩ vae jeco pegua judío añetete vae co. Jae ramiño vi penti uñemicircuncidaca vae ipia pe oĩ vae jeco pegua uñemicircuncidaca vae añetete vae co. Echa'ã cua nunga uyapo Espíritu jei vae rupi, uyecuatía oĩ vae rupiño'ã. Tumpa jeita icavi cua nunga, yepe tēi ñru vae reta jeita'ã jucuarãi.

**3** <sup>1</sup>Jáeramo ¿mbae pe pa uyuavi judío reta judío mbae vae reta güi? ¿Mbae pe pa uyuavi uñemicircuncidaca vae reta uñemicircuncidaca mbae vae reta güi? <sup>2</sup>Jeta co opaete quirãirãi rupi. Tenonde tae cua: Tumpa umee ñnee chupe reta, jae reta uñuvatu vaerã. <sup>3</sup>Añete co, aramoi

amocue vae güirovia'ã. Ërei yepe tẽi jae reta güirovia'ã, ãrei cua uipota'ã jei Tumpa ndarau uyapo jei vae. <sup>4</sup>Jucuarãi'ã etei co. Echa'ã Tumpa uyapo opaete añete vae rupi, yepe tẽi opaete ivi pegua reta iyapu vae reta co. Echa'ã Tumpa iñee pe uyecuatía oĩ cuarãi:

“Ndiyemingueta yave, uyecuaata añete vae co jocua nde ndere vae. Jare ñru vae reta nembijeco yave, ndicuaacata jupi vae co nde ndiyapo vae.”

Jucuarãi uyecuatía oĩ.

<sup>5</sup>Upurugüirovia mbae vae reta jei cuarãi: “Jupi mbae vae yayapo vae uicuaaca quirãi Tumpa co jae jupi vae. Jáeramo Tumpa uiporaraca yandeve yave, jupi mbae vae co uyapo.” Jucuarãi jei reta. <sup>6</sup>Ërei yandepuere'ã yae jucuarãi. Echa'ã Tumpa uyapo yave mona jupi mbae vae, ndarau tẽi ipuere uãa ivi pegua reta.

<sup>7</sup>Jare jei reta vi cuarãi: “Cheapu yave, ñru vae reta umbiadora eteta Tumpa. Echa'ã uicuaata añete vae Tumpa jei vae icavi ete co. Jáeramo Tumpa agüiyeta tẽi chembijeco cheapu re.” <sup>8</sup>Añete co, yandepuere yae: “Yayapo icavi mbae vae, icavi vae uyeyapo vaerã.” Jucuarãi jei reta. Icavi co Tumpa umbijeco vaerã jucuarãi jei vae reta. Jare amocue vae jei ore jucuarãi ndoporomboc. Cuarãi jei icavi mbae oreré.

### Mbaeti co jupi vae

<sup>9</sup>Jáeramo yandepuere'ã etei yae judío reta icavi ete judío mbae vae reta güi. Echa'ã yaicuaaca ma quirãi judío reta jare judío mbae vae reta teco güinoi. Echa'ã opaete vae iyoa vae reta co. <sup>10</sup>Echa'ã Tumpa iñee pe uyecuatía oĩ cuarãi:

“Mbaeti co quía uyapo icavi vae, mbaeti penti ave.

<sup>11</sup>Mbaeti co quía uicuaa Tumpa vae.

Mbaeti co quía ueca Tumpa vae.

<sup>12</sup>Opaete vae uyerova Tumpa güi.

Opaete vae uyapo icavi mbae vae.

Mbaeti co quía uyapo icavi vae, mbaeti penti ave.

<sup>13</sup>Iyuru co penti teögüeriru uyasoi mbae vae rami.

Uyemingueta yave, upurumbitaviñoi.

Opaete jei vae jasi ete, mboi imbayachi jasi ete rami.

<sup>14</sup>Jecuaeño jei icavi mbae vae ñru vae reta coti, jare jecuaeño iarasi ñru vae reta pe.

<sup>15</sup>Iquirẽi ete upuruyuca.

<sup>16</sup>Jecuaeño uyapo icavi mbae vae ñru vae reta pe umbipiatiti vaerã.

<sup>17</sup>Jare iquirẽi'ã etei umbipiacatu ñru vae reta.

<sup>18</sup>Ipia pe uyemingueta'ã etei Tumpa re, yepe tẽi uquiyeta tẽi co chugüi.”

Jucuarãi uyecuatía oĩ.

<sup>19</sup>Jare yaicuaa quirãi mboroyocui jei vae imiari mboroyocui güinoi vae reta pe, agüiye vaerã penti ave ipuere uyerepi, jare opaete ivi pegua reta uyecuaa vaerã iyoa vae reta co Tumpa jovai. <sup>20</sup>Jáeramo mbaeti quía

ipueru uyembujupi Tumpa jovai mboroyocui jei vae re uyapo vae rupi. Echa'ã mboroyocui güinoi ramo, uicuaa reta iyoa vae reta co.

### Añave Tumpa yanembujupi yandepurugüirovia rupi

<sup>21</sup>Ërei añave uyecuaa ma quirãi Tumpa ipuere yanembujupi mboroyocui jei vae yayapo mbae reve. Jare mboroyocui pe uyecuatía oĩ vae jare Tumpa iñee aracae umimbeu vae reta uicuatía vae umimbeu cua regua. <sup>22</sup>Echa'ã Tumpa umbujupita opaete Jesucristo re güirovia vae reta ipurugüirovia rupi. Penti vae uyuañi'ã ñru vae güi. <sup>23</sup>Echa'ã opaete vae iyoa vae reta co. Tumpa ipuere'ã jei penti ave re: “Cua co jae jupi vae.” <sup>24</sup>Ërei Tumpa ipuere ma yanembujupi ipiacavi rupi. Jae co penti regalo Tumpa umee yandevae vae. Echa'ã Tumpa yanderepi ma Cristo Jesús rupi. <sup>25</sup>Tumpa umee Cristo umano vaerã maemimba uyeyucacue sacerdote umee vae rami, agüiye vaerã ma uiporaraca yandevae, yarovia yave Cristo umano co yanderé. Jare jucuarãi uyecuaa quirãi Tumpa jupi co. Echa'ã aracae yave, ivi pegua reta iyoa yave, Tumpa ipiaguasu chupe reta. Uiporaraca'ã chupe reta imbaeyoa reta re. <sup>26</sup>Jare añave uyecuaa ma quirãi Tumpa jupi co. Echa'ã jae uyapo jupi vae, umbujupi yave Jesús re güirovia vae.

<sup>27</sup>Jáeramo mbaeti etei ñanoi mbae yandepuere yayembicate jese vae. Echa'ã yayapo'ã mboroyocui jei vae - jaño yapurugüirovia. <sup>28</sup>Jáeramo yaicuaa ma quirãi Tumpa yanembujupi yandepurugüirovia rupi. Yanembujupi'ã mboroyocui jei vae yayapo vae rupi.

<sup>29</sup>Jare Tumpa co jae judío mbae vae reta iTumpa - judío reta peguaño'ã co. <sup>30</sup>Echa'ã Tumpa pentiño co, jare umbujupita uñemicircuncidaca vae reta ipurugüirovia rupi. Jae ramiño vi umbujupita uñemicircuncidaca mbae vae reta ipurugüirovia rupi. <sup>31</sup>Jáeramo aramoi quía jeita: “Jucuarãi yave, mboroyocui mbaeti co mbaerã. Echa'ã Tumpa yanembujupi yandepurugüirovia rupi.” Jucuarãi'ã co. Echa'ã cua jeco pegua yaicuaa ma maera Tumpa uicuaaca mboroyocui.

### Abraham pe uyeyapo vae

**4** <sup>1</sup>Jáeramo, ¿mbae ra güinoi yandetenondegua Abraham jae uyapo vae rupi? (Abraham co jae opaete judío reta itenondegua.) <sup>2</sup>Echa'ã Abraham uyembujupi yave mona jae uyapo vae rupi, uyembicateta tēi. Ërei ipuere'ã uyembicate Tumpa jovai. <sup>3</sup>Echa'ã Tumpa iñee pe uyecuatía oĩ cuarãi: “Abraham güirovia Tumpa, jare jocua jeco pegua Tumpa umbujupi.” Jucuarãi uyecuatía oĩ. <sup>4</sup>Ërei ime yave quía uparaviqui vae, umimbaraviqui vae umbiepi uparaviqui vae pe ipía chupe ramo - ipiacavi ramo'ã. <sup>5</sup>Ërei ime yave quía güirovia Tumpa mbae uyapo mbae reve vae, Tumpa umbujupi ipurugüirovia rupi. Echa'ã Tumpa umbujupi iyoa vae. <sup>6</sup>Jae ramiño vi David jei quirãi uyerovia catu co mbae uyapo mbae reve uyembujupica Tumpa pe vae. <sup>7</sup>Echa'ã aracae jei cuarãi: “Uyerovia catu co imbaeyoa reta Tumpa umbiasa chupe vae reta. Uyerovia catu co imbaeyoa reta uyembai oĩ vae reta.

<sup>8</sup> Uyerovia catu co Tumpa umbijeco'ã imbaeyoa re vae reta.”  
Jucuarãi jei.

<sup>9</sup> ¿Umee ra Tumpa cua yerovia catu uñemicircuncidaca vae reta peño?  
Ani ¿umee ra uñemicircuncidaca mbae vae reta pe vi? Echa'ã yae ma  
quirãi Tumpa umbujupi Abraham ipurugüirovia rupi. <sup>10</sup> Èrei ¿quirãi yave ra  
umbujupi? ¿Uñemicircuncidaca ma yave ra? ani ¿ndeño uñemicircuncidaca  
mbove ra? Uñemicircuncidaca yave'ã co. Tumpa umbujupi ndeño  
uñemicircuncidaca mbove. <sup>11</sup> Jayave Abraham uñemicircuncidaca  
uicuaaca vaerã ñru vae reta pe Tumpa umbujupi co ipurugüirovia rupi ndei  
uñemicircuncidaca mbove. Jáeramo Abraham co opaete upurugüirovia vae  
uñemicircuncidaca mbae vae reta tu rami. Echa'ã jae reta vi uyembujupica ma  
Tumpa pe. <sup>12</sup> Jae ramiño vi Abraham co opaete uñemicircuncidaca vae reta  
tu rami. Cua reta uñemicircuncidacaño'ã co. Jae reta güinoi mburugüirovia  
yandetenongua Abraham ndei uñemicircuncidaca mbove güinoi vae rami.

### **Tumpa jei uyapota Abraham pe vae**

<sup>13</sup> Echa'ã Tumpa jei Abraham jare ññemoñaeta reta pe umee vaerã chupe  
reta ivi. Èrei umee'ã chupe reta cua jei uyapota vae, Abraham uyapo  
mboroyocui jei vae ramo - jaño umee chupe reta Abraham ipurugüirovia  
rupi umbujupi ramo. <sup>14</sup> Echa'ã Tumpa umee yave mona ivi mboroyocui  
jei vae uyapo vae reta pe mboroyocui jei vae uyapo reta ramo, jae reta  
mbaetita tẽi mbaerã mburugüirovia güinoi vaerã, jare mbaetita tẽi  
mbaerã vi co Tumpa jei uyapota vae. <sup>15</sup> Echa'ã mboroyocui uicuaaca  
quirãi Tumpa uiporacata jei vae uyapo'ã vae reta pe. Èrei mbaeti yave  
mboroyocui, mbaetita tẽi co quã uyavi mboroyocui.

<sup>16</sup> Jáeramo jei uyapota vae mburugüirovia pegua co, Tumpa umee vaerã  
jei uyapota vae ipiacavi rupi, jare opaete Abraham ññemoñaeta reta añetete  
güinoi vaerã. Cua reta co opaete Abraham güinoi vae nunga mburugüirovia  
güinoi vae reta - mboroyocui jei vae uyapo vae retaño'ã co. Echa'ã Abraham  
co jae opaete yanderu rami Tumpa jovai. <sup>17</sup> Echa'ã jae vi güirovia Tumpa.  
Echa'ã Tumpa ññee pe uyecuatía oĩ cuarãi: “Che nduyapo jeta vae reta  
tu rami” —jei Tumpa. Jucuarãi uyecuatía oĩ. Echa'ã Tumpa umee tecove  
umanocue vae reta pe, jare uyeyapota co mbaembae ndeño uyeyapo vae.

<sup>18</sup> Yepe tẽi mbaeti echa mbaerã Abraham uãro vaerã, èrei jecuaño güirovia  
Tumpa jare uãro uyerovia reve. Jáeramo uyeyapo jeta vae reta tu rami. Echa'ã  
Tumpa jei ma chupe cuarãi: “Ndiyeyapota jeta vae reta tu rami.” Jucuarãi jei.  
<sup>19</sup> Cien año seri ma güinoi yave, Abraham uicuaa ma jae jete pe umanota ma co.  
Uicuaa vi Sara ucuacuaa ete ma co jare jáeramo ndarau ma echa imembi. Èrei  
jecuaño güinoi mburugüirovia Tumpa coti. <sup>20</sup> Umicani'ã etei ipurugüirovia.  
Jecuaño güirovia Tumpa uyapota co jei chupe vae. Jáeramo ipurugüirovia  
umimiráta, jare cua jeco pegua umbiadora Tumpa. <sup>21</sup> Echa'ã jae uicuaa catu Tumpa  
ipuera co uyapo opaete jei vae. <sup>22</sup> Jáeramo Tumpa umbujupi ipurugüirovia rupi.

<sup>23</sup>Jare cua Tumpa umbujupi ipurugüirovia rupi vae uyecuatia'ã Abraham reño. <sup>24</sup>Echa'ã uyecuatía vi yanderé. Echa'ã Tumpa yanembujupi yandepurugüirovia rupi, yande yarovia yave jese - umbijecove ye yandeYa Jesús güeru umanocue vae reta ipite güi vae re. <sup>25</sup>YandeYa Jesús uñemee umano vaerã yanembaeyoa reta re, jare icove ye ou umanocue vae reta ipite güi uicuaaca vaerã yayembujupica ma co.

### Yembujupi rupi ñanoi vae

**5** <sup>1</sup>Tumpa yanembujupi ma yandepurugüirovia rupi. Jáeramo ñanoi ma mbiacatu Tumpa ndive yandeYa Jesucristo rupi. <sup>2</sup>Jae ramiño vi yaya ma Tumpa re Jesucristo rupi yandepurugüirovia rupi, Tumpa ipiacavi vaerã yandeve. Ñañemimirãta ma Tumpa ipiacavi re, jare ñaãro ñaï yayerovia reve Tumpa ndive yaico vaerã jae uyembiaadoraca yave. <sup>3</sup>Jare cuaño'ã co. Jae ramiño vi yayerovia yaiporara yave. Echa'ã yaicuaa quirãï yaiporara yave, Tumpa umee yandeve yandepiaguasu vaerã. <sup>4</sup>Jare yandepiaguasu yave, yaicuaa ñanepirãta ma co. Jare yaicuaa yave ñanepirãta ma co, ñaãro yayerovia reve. <sup>5</sup>Jare ñaãro yave yayerovia reve, ndarau yandetavi. Echa'ã Tumpa uicuaaca ma yandeve yandepia pe ipuruau Espíritu Santo jae umee yandeve vae rupi.

<sup>6</sup>Echa'ã yande yandepuere'ã etei yayembiasa. Ërei Cristo umano iyoa vae reta re ara ou ma uvãe yave umano vaerã. <sup>7</sup>Añete co, ndarau ndipo quía uipota umano penti jupi vae ipepica pe. Ërei aramoi quía iquirëita umano penti ipiacavi vae ipepica pe. <sup>8</sup>Ërei Tumpa uicuaaca ma ipuruau yandecoti. Echa'ã yepe tãi yande co jae iyoa vae reta, ërei Cristo umano yanderé. <sup>9</sup>Jare Tumpa jeta eteta uyapo yandeve. Echa'ã Tumpa yanembujupi ma Cristo imano rupi. Jáeramo Cristo uyapo vae rupi Tumpa ndarau uiporaraca yandeve. <sup>10</sup>Echa'ã yepe tãi yande yayovaichose Tumpa ndive, ërei añave yayembipiacatua ma Tumpa ndive Tai imano rupi. Jare Tumpa jeta eteta uyapo yandeve. Echa'ã yayembipiacatua ma Tumpa ndive ramo, yaicuaa catu yayembiasacata co Tai icove ye ramo. <sup>11</sup>Jare cuaño'ã co. Jae ramiño vi yayerovia Tumpa re yandeYa Jesucristo rupi. Echa'ã Cristo rupi yayembipiacatua ma Tumpa ndive.

### Adán jare Cristo

<sup>12</sup>Jare mbaeyoa uique cua ivi pe penti cuimbae rupi. Jare mano uique mbaeyoa rupi. Jáeramo mano ou opaete vae pe. Echa'ã opaete vae iyoa. <sup>13</sup>Jare ndei Tumpa uicuaaca Moisés iporoyocui mbove, imeño mai mbaeyoa ivi pe. Ërei mbaeti mboroyocui yave, yandepuere'ã etei quía yambijeco uyavi ramo. <sup>14</sup>Ërei opaete vae umano Adán güive Moisés ico regua, yepe tãi ïru vae reta iyoa'ã Adán iyoa rami. Jare Adán uyemijaanga Cristo re, jae co outa vae.

<sup>15</sup>Ërei yandepuere'ã yamboyovaque Adán imbaeyoa Tumpa umee yandeve vae ndive. Echa'ã penti cuimbae iyoa ramo, jeta vae umano. Ërei Tumpa umee yandeve ipiacavi rupi vae tuicha ete co cua güi. Echa'ã Tumpa umee ma ipiacavi jeta vae pe penti cuimbae rupi - jae co Jesucristo. <sup>16</sup>Yandepuere'ã

yamboyoaque jocua penti cuimbae imbaeyoa Tumpa umee yandeve vae ndive. Echa'ã jocua penti mbaeyoa jeco pegua Tumpa uãa jare umbijeco opaete vae. Ërei Tumpa umee yandeve vae rupi yayembujupica ma, yepe tẽi jeta mbaeyoa reta yayapo. <sup>17</sup>Echa'ã mano güinoi mbaepuere opaete vae re jocua penti cuimbae imbaeyoa jeco pegua. Ërei Tumpa imbaepuere tuicha ete co cua güi. Echa'ã umee ma yandeve ipiacavi yayembujupica vaerã, tecove imbaepuere ñanoi vaerã penti cuimbae rupi - jae co Jesucristo.

<sup>18</sup>Jáeramo penti cuimbae imbaeyoa jeco pegua Tumpa umbijeco opaete vae. Jae ramiño vi penti cuimbae jupi vae uyapo vae jeco pegua Tumpa ipuere umbujupi opaete vae tecove opa mbae vae güinoi reta vaerã. <sup>19</sup>Penti cuimbae Tumpa jei vae uyapo'ã ramo, jeta vae uyeyapo iyoa vae retarã. Jae ramiño vi penti cuimbae Tumpa jei vae uyapo ramo, Tumpa umbujupita jeta vae.

<sup>20</sup>Jare Tumpa uicuaaca mboroyocui, mbaeyoa uyecuaa cavi vaerã. Ërei uyecuaa yave jeta co mbaeyoa reta, uyecuaa vi tuicha ete co Tumpa ipiacavi. <sup>21</sup>Echa'ã mbaeyoa jecuaño güinoi mbaepuere opaete vae re. Echa'ã opaete vae umano. Jae ramiño vi Tumpa ipiacavi güinoi mbaepuere yanembujupi vaerã, jare jucuarãi umee vaerã yandeve tecove opa mbae vae yandeYa Jesucristo rupi.

### Ñamano ma mbaeyoa güi

**6** <sup>1-2</sup>Jáeramo icavi'ã etei yandepia pe yayemingueta vaerã cuarãi: “Icavi co yayapo vaerã mbaeyoa uyecuaa vaerã tuicha ete co Tumpa ipiacavi.” Yande ñamano ma co mbaeyoa güi. Jáeramo icavi'ã etei jecuaño mbaeyoa yayapo vaerã. <sup>3</sup>Picuaa co quirãi opaete yande yayembibautizaca pentiño Cristo Jesús ndive ñaã vaerã vae ñamano jae ndive yayembibautizaca yave. <sup>4</sup>Jáeramo yayembibautizaca yave, ñañeñotica Cristo ndive ñamano ramo. Ërei Tumpa umbijecove ye Cristo güeru umanocue vae reta ipite güi imbaepuere rupi. Jae ramiño vi Tumpa umee ma yandeve tecove ipiau vae. <sup>5</sup>Echa'ã Tumpa yandeapo pentiño Cristo ndive Cristo imano re. Jae ramiño vi Tumpa yanembijecove yeta yandereru umanocue vae reta ipite güi, umbijecove ye Cristo güeru umanocue vae reta ipite güi rami. <sup>6</sup>Yaicuaa quirãi yanderecove indechicue umano curusu re Cristo ndive, agüiye vaerã mbaeyoa yanderete pe oĩ vae mbaepuere güinoi yanderé, agüiye vaerã jecuaño yayapo mbaeyoa. <sup>7</sup>Echa'ã umanocue vae ipuere'ã ma uyapo mbaeyoa. <sup>8</sup>Yande ñamano Cristo ndive ramo, yarovia yaicoveta vi co jae ndive. <sup>9</sup>Echa'ã yaicuaa quirãi Tumpa umbijecove ye Cristo güeru umanocue vae reta ipite güi. Jáeramo Cristo ndarau umano ye. Echa'ã mano ipuere'ã ma jese. <sup>10</sup>Echa'ã Cristo umano yave, penti veseño umano mbaeyoa jeco pegua. Ërei añave icono mai. Jecuaño ico pentiño Tumpa ndive. <sup>11</sup>Jae ramiño vi pe reta perovia quirãi pemento ma co mbaeyoa güi, jare pico Tumpa pe piyeyocui vaerã yandeYa Cristo Jesús rupi.



<sup>12</sup>Jáeramo agüiye pemaño mbaeyoa re güinoi vaerã mbaepuere perete re. Agüiye piyapo mbaeyoa perete uipota uyapo vae. <sup>13</sup>Agüiye vi pemee perete mbaeyoa uyapo vaerã. Echa'ã jucuarãi yave, perete uyapota icavi mbae vae. Ërei piñemee Tumpa pe. Echa'ã pe reta co jae umanocue vae tecove ipiau vae güinoi vae reta rami. Jáeramo pemee perete Tumpa pe. Echa'ã jucuarãi yave, perete uyapota icavi vae. <sup>14</sup>Echa'ã mbaeyoa ndarau güinoi mbaepuere peré. Echa'ã pico'ã mboroyocui jei vae re. Pico ma ñee mbiacavi pegua re.

### Yaico jupi vae rupi

<sup>15</sup>Jáeramo icavi'ã etei yandepia pe yayemingueta vaerã cuarã: “Yayapo mbaeyoa, yaico'ã mboroyocui jei vae re ramo jare yaico ñee mbiacavi pegua re ramo.” <sup>16</sup>Piñemee yave quía pe piyeyocui chupe vaerã, pe reta co jae jembiocui reta. Jecuaño mbaeyoa piyapo yave, pemanota co. Ërei piyapo yave Tumpa jei vae, picota jupi vae rupi. ¿Picuaa'ã pa cua? <sup>17</sup>Jecuaño piyapose mbaeyoa. Ërei amee yasurupai Tumpa pe piyapo ma Tumpa jei vae perovia reve jocua moromboe uñemee peve vae. <sup>18</sup>Jáeramo piyero va ma mbaeyoa güi, jare piyeyocui ma Tumpa pe pico vaerã jupi vae rupi. <sup>19</sup>(Chemiari aĩ peve cuarã amijaanga reve, pepuere'ã picuaa cavi cua mbaembae ramo.) Tenonde yave pemee perete piyapo vaerã mbaeyoa, piyapo vaerã pichii vae jare jupi mbae vae. Ërei añave pemee perete Tumpa pe pico vaerã jupi vae rupi, perete uñeño tee vaerã Tumpa peguarã.

<sup>20</sup>Echa'ã jecuaño mbaeyoa piyapose yave, piyeyocui'ã Tumpa pe pico vaerã jupi vae rupi. <sup>21</sup>Mbaeti etei mbae icavi vae piyapo jocua ara reta pe. Echa'ã añave pemara jocua mbaembae piyapose vae re. Echa'ã jocua mbaembae mano pegua co. <sup>22</sup>Ërei añave piyapo'ã ma mbaeyoa. Piyeyocui ma Tumpa pe. Jáeramo añave piyapo icavi vae. Echa'ã perete uñeño tee oĩ Tumpa peguarã. Jare perecove opa yave cua ivi pe, penoita tecove opa mbae vae. <sup>23</sup>Echa'ã mbaeyoa uyapo vae umanota co. Ërei regalo Tumpa umee yandeve yandéYa Cristo Jesús rupi vae tecove opa mbae vae co.

### Menda re umijaanga vae

**7** <sup>1</sup>Cherivi reta, pe reta picuaa co mboroyocui jei vae. Jare picuaa co quirã mboroyocui güinoi mbaepuere penti vae re jae ico rambueño. <sup>2</sup>Echa'ã mboroyocui jei cuña umenda vae penti ramiño co ime ndive, ime ico rambueve. Ërei ime umano chugüi yave, cuña uyeyora ma jocua mboroyocui ime regua güi. <sup>3</sup>Jáeramo cuña imegua yave ime tenondegua vae ico rambueve, cuña uyuvanga menda re. Ërei ime umano ma yave, cuña uyeyora ma jocua mboroyocui ime regua güi. Jayave umenda yave ñru cuimbae ndive, uyuvanga'ã menda re.

<sup>4</sup>Jae ramiño vi, cherivi reta, pe reta piyeyora mboroyocui güi Cristo imano rupi, pico vaerã Cristo re. Añete co, pico ma Tumpa umbijecove ye güeru umanocue vae reta ipite güi vae re, piyapo vaerã icavi vae, Tumpa uyembiaadoraca vaerã. <sup>5</sup>Echa'ã



yaico yave yande yae vae reño, yaipota yayapo mbaeyoa, mboroyocui jei agüiye vaerã yayapo ramo. Jare cua mbaeyoa uparaviqui yanderete pe ñamano vaerã. 6 Ërei añave yayeyora ma mboroyocui güi. Echa'ã yayeyora ma yandecuisse vae güi. Jáeramo yandepuere yayeyocui Tumpa pe tecove ipiaü vae rupi Espiritu umee yandeve vae rupi. Yayeyocui'ã ma chupe mboroyocui indechi vae jei vae re.

### Mbaeyoa ico chepia pe vae

7 Yandepuere'ã etei yae icavi mbae vae co mboroyocui. Mboroyocui umimbeu'ã yave cheve mbaeyoa regua, ndarau tẽi aicuaa jesequa. Echa'ã ndarau tẽi aicuaa aipota ñru vae reta imbaembae yave cheyoa co vae, mboroyocui jei'ã yave: "Agüiye ipota ñru vae reta imbaembae." 8 Ërei mboroyocui jei agüiye vaerã ayapo ramo, mbaeyoa jeiete uparaviqui chepia pe che aipota vaerã ñru vae reta imbaembae. Echa'ã mbaeti yave mboroyocui, aicuaa'ã co cheyoa. 9 Tenonde yave aicuaa'ã mboroyocui jei vae yave, che aico penti icove catu vae rami. Ërei aicuaa yave mboroyocui jei vae, aicuaa vi cheyoa co mboroyocui jei vae ayavi ramo, jare aicuaa vi amanota co. 10-11 Chepia pe ayemingueta tẽi mboroyocui umeeta cheve tecove. Ërei chetavi. Echa'ã cheyoa yave, mboroyocui uicuaaca cheve amanota co.

12 Ërei mboroyocui mbaeyoa pegua'ã co, jare mboroyocui jei vae iyoa mbae vae pegua jare jupi vae pegua jare icavi vae pegua co. 13 Jocua icavi vae pegua uyeyapo'ã etei cheve mano peguarã. Mbaeyoa mano pegua co. Jare jucuarã uyecuaa mbaeyoa. Jocua icavi vae pegua uicuaaca cheve amanota co cheyoa ramo. Jare jucuarã mboroyocui uicuaaca mbaeyoa icavi mbae ete co.

14 Echa'ã yaicuaa Espiritu Santo umee mboroyocui. Ërei che aico che jae vae reño. Añemee ayapo vaerã mbaeyoa. 15 Aicuaa'ã maera ra ayapo cuarã. Echa'ã ayapo'ã chequirẽi tẽi ayapo vae. Ërei ayapo cheatẽi tẽi ayapo vae. 16 Jáeramo aicuaa mboroyocui icavi vae pegua co. Echa'ã ayapo cheatẽi tẽi ayapo vae. 17 Jáeramo icavi mbae vae uyapo vae che'ã co. Icavi mbae vae uyapo vae co jae mbaeyoa chepia pe ico vae. 18 Che aico che jae vae reño. Jáeramo aicuaa mbaeti co mbae icavi vae anoi chiyee. Echa'ã chequirẽi tẽi ayapo icavi vae, ãrei chepuere'ã ayapo. 19 Ayapo'ã icavi vae chequirẽi tẽi ayapo vae. Ërei jecuae ayapo icavi mbae vae cheatẽi tẽi ayapo vae. 20 Jáeramo icavi mbae vae uyapo vae che'ã co. Icavi mbae vae uyapo vae co jae mbaeyoa chepia pe ico vae. Echa'ã ayapo cheatẽi tẽi ayapo vae.

21 Uyeyapo cheve cua: Icavi vae chequirẽi tẽi ayapo yave, jecuaño ayapo icavi mbae vae. 22 Aicuaa chepia pe icavi co Tumpa iporoyocui. 23 Ërei che jae vae reño aico ramo, jecuaño uyecuaa cheve chequirẽi tẽi chepia pe ayapo vae ndive oyovaicho vae. Jae co mbaeyoa ayapo vae. Cua mbaeyoa güinoi mbaepuere cherẽ.

24 Chepiatiti ete. ¿Quía ra umeeta cheve mbaepuere agüiye vaerã ayapo mbaeyoa? Echa'ã mbaeyoa mano pegua co. 25 Jaeño Tumpa, yandeYa Jesucristo rupi. Yasurupai amee Tumpa pe. Jayave chequirẽi reve chepia pe ayemingueta ayapo vaerã Tumpa iporoyocui jei vae. Ërei che jae vae reño aico ramo, jecuaño ayapo mbaeyoa.

## Ñanoi tecove opa mbae vae Espíritu Santo rupi

**8** <sup>1</sup>Jáeramo Tumpa ndarau etei umbijeco Cristo Jesús re güirovia vae reta. <sup>2</sup>Echa'ã Espíritu Santo uparaviqui ma, anoi vaerã tecove opa mbae vae Cristo Jesús re arovia ramo. Jáeramo ayeyora ma mbaeyoa imbaepuere güi. Echa'ã mbaeyoa ayapo ramo amanota tēi. <sup>3</sup>Moisés iporoyocui ipuere'ã yanembori, yandepuere'ã yayapo mboroyocui jei vae ramo. Jáeramo Tumpa yanembori. Echa'ã ombou Tai etei cua ivi pe. Tai uyeyapo penti cuimbaerã. Yepe tēi opaete ivi pegua reta iyoa, jae iyoa'ã co. Ou umano vaerã yanembaeyoa re. Umiamiri mbaeyoa, agüiye vaerã mbaeyoa güinoi mbaepuere yanderé. <sup>4</sup>Cristo cua uyapo, Tumpa yanembujupi vaerã. Echa'ã mboroyocui jeise yayapo vaerã jupi vae. Echa'ã yaico'ã ma yande yae vae reño. Yaico ma co Espíritu Santo jei vae re.

<sup>5</sup>Jei vae reño yugüireco vae reta ipia pe uyemingueta mbaembae jete uipota vae reño. Ërei Espíritu Santo jei vae re yugüireco vae ipia pe uyemingueta Espíritu Santo uipota vae re. <sup>6</sup>Echa'ã mbaembae jete uipota vae reño ipia pe uyemingueta vae reta umanota co. Ërei Espíritu Santo uipota vae re ipia pe uyemingueta vae reta güinoi tecove opa mbae vae jare mbiacatu. <sup>7</sup>Echa'ã mbaembae jete uipota vae reño ipia pe uyemingueta vae reta oyovaicho Tumpa ndive. Echa'ã ñatēi reta uyapo Tumpa iporoyocui. Ipuere'ã etei uyapo Tumpa iporoyocui. <sup>8</sup>Jáeramo jei vae reño yugüireco vae reta ipuere'ã uyapo Tumpa uipota uyapo vaerã vae.

<sup>9</sup>Ërei pe reta pico'ã ma pipota vae reño. Pico Espíritu Santo jei vae re. Echa'ã Tumpa iEspíritu ico pepia pe. Echa'ã Cristo iEspíritu mbaeti güinoi vae Cristo imbae'ã co. <sup>10</sup>Ërei Cristo ico pepia pe. Jáeramo Espíritu Santo umee peve tecove opa mbae vae, yepe tēi perete umanota co mbaeyoa jeco pegua. Echa'ã Tumpa pembujupi ma. <sup>11</sup>Tumpa umbijecove ye Jesús güeru umanocue vae reta ipite güi. Jare Tumpa iEspíritu ico pepia pe. Jáeramo Tumpa umbijecove catuta co perete umanota vae iEspíritu ico pepia pe vae rupi. Echa'ã umbijecove ye Cristo Jesús güeru umanocue vae reta ipite güi.

<sup>12</sup>Jáeramo, cherivi reta, yandepuere'ã ma yayapo yanderete pe yayapose vae. <sup>13</sup>Echa'ã ime yave quía jei vae reño ico vae, umanota co. Ërei Espíritu imbaepuere rupi pepuere peeya piyugüi perete uipota vae. Jare jucuarã yave, picoñotai co.

<sup>14</sup>Echa'ã opaete Espíritu Santo jei vae re yugüireco vae reta Tumpa tai reta co. <sup>15</sup>Echa'ã Tumpa umee peve iEspíritu piyeyapo vaerã Tumpa tai retarã. Peapo'ã co uyeyocui vae uquiye ipatrón güi vae reta rami. Jáeramo Espíritu Santo yanembori yandepuere vaerã yae: “CheRu.” <sup>16</sup>Jare Espíritu Santo etei uicuaaca yandeve yande co jae Tumpa tai reta. <sup>17</sup>Jare yande co jae Tumpa tai reta ramo, ñanoita vi yanembaerã Tumpa umeeta yandeve vae. Ñanoita co yanembaerã Cristo ndive. Echa'ã yaiporara ñaí Cristo uiporara rami. Jáeramo Tumpa yanembutuichacata Cristo ndive.

<sup>18</sup>Añave yaiporara ñaí. Ërei arovia cua yaiporara ñaí vae mbae'ã co. Echa'ã icavi eteta co yandeve jocua ndeño uyecuaa vae Tumpa umeeta yandeve vae. <sup>19</sup>Echa'ã opaete Tumpa uyapo vae uãro oĩ iquirēi ete reve Tumpa umbutuichaca vaerã tai

reta. <sup>20</sup>Tumpa uyapo opaete mbaembae icavi ete. Ërei opaete uyapo vae icumegua ma, yepe tēi mbaembae etei uyapo'ã mbae icumegua vaerã. Echa'ã Tumpa umaẽño icumegua vaerã Adán iyoa ramo. Ërei ndarau jecuaeño mbaembae icumegua.

<sup>21</sup>Echa'ã Tumpa uepita tai reta opaete mbae icavi mbae vae güi, umbutuichaca reta yave. Jae ramiño vi Tumpa uepita uyapo vae etei, agüiye vaerã jecuaeño icumegua. <sup>22</sup>Echa'ã yaicuaa co quirãi iyipi güiye jare jecuae añave opaete Tumpa uyapo vae uiporara oĩ penti cuña imembi oata vae uiporara oĩ rami. <sup>23</sup>Jae ramiño vi yande yaiporara ñai yandepia pe, yepe tēi ñanoi ma Espíritu Santo - echa'ã Espíritu Santo rani Tumpa umee yandeve. Echa'ã ñaãro ñai Tumpa uicuaaca vaerã opaete pe yande co jae Tumpa tai reta. Cua ueyeyapo yave, Tumpa uipepicata yanderete añave ñanoi vae, yanderete ipiau vaerã. <sup>24</sup>Echa'ã yayembiasaca yave, yambipi ñaãro yayerovia reve. Ërei Tumpa uepi yanderete yave, ndarau ma ñaãro tēi. Echa'ã ime yave quía mbae uãro vae, jocua güinoi ma yave, uãro'ã ma. <sup>25</sup>Ërei ñaãro ñai mbae ndeño ñanoi vae. Jáeramo ñaãro ñai yandepiaguasu reve.

<sup>26</sup>Jae ramiño vi Espíritu Santo yanembori, ñanepirãta'ã ramo. Yayerureta tēi co Tumpa pe mbae re. Ërei yaicuaa'ã mbae re yayerure vaerã chupe. Amo pe yaicuaa'ã mbae yae vaerã. Ërei jeseve Espíritu Santo etei uyerure Tumpa pe yanderé. <sup>27</sup>Tumpa uicuaa opaete vae ipia pe oĩ vae, jare uicuaa vi Espíritu Santo ipiyemingueta. Echa'ã Espíritu Santo uyerure Tumpa pe yanderé Tumpa jei vae rupi. Yande co jae uñeño tee Tumpa peguarã vae reta.

### Opaete mbaembae ñamiamirita

<sup>28</sup>Jare yaicuaa co quirãi opaete ueyeyapo vae rupi Tumpa yanembori oĩ icavi vaerã yandeve, yande yaau Tumpa ramo. Echa'ã Tumpa jei vae rupi yandeparavo. <sup>29</sup>Echa'ã iyipi güiye Tumpa yandecuaa. Jae ramiño vi iyipi güiye Tumpa yandeparavo yande yayeyapo vaerã Tai rami, jare Tai ico vaerã tenondeguarã opaete Tumpa tai reta ndive. <sup>30</sup>Jae ramiño vi Tumpa ñanereni, iyipi güiye yandeparavo ramo. Jae ramiño vi Tumpa yanembujupi, ñanereni ramo. Jae ramiño vi yanembutuichacata co, yanembujupi ramo.

<sup>31</sup>Jare cua yaicuaa ramo, yaicuaa vi cua: Tumpa yanembori ramo, mbaeti quía ipuere ñanemiamiri. <sup>32</sup>Tumpa ñatēi'ã umee yandeve Tai. Echa'ã umee co, jae umano vaerã yanderé. Jáeramo Tumpa umeeta co yandeve opaete mbaembae. Echa'ã umee yandeve Tai. <sup>33</sup>Mbaeti quía ipuere yanembijeco mbae re. Echa'ã yande co jae Tumpa uiparavo vae reta, jare Tumpa yanembujupi ma. <sup>34</sup>Mbaeti quía ipuere yanembijeco yanembaeyoa reta re. Echa'ã Cristo umano yanembaeyoa reta re, jare icove ye ou umanocue vae reta ipite güi, jare añave ime oĩ Tumpa iyacata coti. Jae etei uyerure Tumpa pe yanderé. <sup>35</sup>Cristo yanderau, jare ndarau quía ipuere yanembisiri Cristo güi. Aramoi yaiporarata, ani yavaita co yandeve yaico vaerã, ani ñru vae reta uyapota icavi mbae vae yandeve, ani caruai outa yandeve. Aramoi ndarau ñanoi corepoti yanderemimonderã yagua vaerã. Aramoi ñru vae reta iquirẽita yandeyuca. Aramoi yepe yandeyucata. Ërei jecuaeño Cristo yanderauta. <sup>36</sup>Echa'ã Tumpa iñee pe uyecuatía oĩ cuarã:

“Cristo re yarovia ramo, opa ara rupi ñru vae reta ñanemiatarëi ipia pe. Umae yanderé ovecha reta uyeyucacata vae re umae vae rami.”

Jucuarãi uyecuatía oĩ. <sup>37</sup>Ërei yepe tẽi opaete cua uyeyapo yandevẽ, ërei jecuae ñamiamirita opaete yayerovia reve Cristo imbaepuere rupi. Echa'ã jae yanderau. <sup>38</sup>Che aicuaa catu Tumpa yanderau co, jare ndarau quía ipuere yanembisiri Tumpa güi. Aramoi ñamanota, ani aramoi jecuaeño yaicota. Ërei jeseve Tumpa yanderauta. Ángel reta jare mburuvicha ara pegua reta ndarau ipuere yanembisiri Tumpa güi. Opaete añave uyeyapo oĩ vae jare opaete uyeyapota vae ndarau ipuere yanembisiri Tumpa güi. <sup>39</sup>Ipotave ivate oĩ vae, jare ipotave ivigüi pe oĩ vae, jare ipotave ñru mbae Tumpa uyapo vae yepe ndarau ipuere yanembisiri Tumpa güi. Jecuaeño Tumpa yanderau. Echa'ã uicuaaca yandevẽ ipuruau yandeyã Cristo Jesús rupi.

### Tumpa uiparavo Israel pegua reta

**9** <sup>1</sup>Che co jae Cristo imbae. Cua che jae vae añete vae co. Cheapu'ã co. Espiritu Santo ico chepia pe. Jáeramo aicuaa catu cua che jae vae añete vae co. <sup>2</sup>Jecuaeño chepiatiti. <sup>3</sup>Echa'ã aipota tẽi ayembisiri vaerã Cristo güi penti yepipeyu oa jese vae rami, jucuarãi yave chepuere ambori cherivi reta. Jae reta co cherentaigua reta. <sup>4</sup>Jae reta co Israel pegua reta. Uyeyapo reta Tumpa tai retarã. Tumpa uechaca imbaepuere jae reta jovaque. Tumpa umee chupe reta itrato reta, jare uicuaaca vi chupe reta Moisés iporoyocui. Jae reta uyeyocui Tumpa pe Tumpa jo pe. Tumpa umimbeu chupe reta uyapota chupe reta vae. <sup>5</sup>Jae reta co Israel pegua reta itenondegua reta inemoñaeta, jare chugüi reta Cristo ou uyeyapo cuimbaerã. Cristo co jae Tumpa etei. Jae co opaete mbaembae iYa. Tuyembiadoraca jaeño mai pegua. Amén.

<sup>6</sup>Cua uipota'ã jei Tumpa uyapo'ã jae jei uyapota vae. Echa'ã mbaeti co opaete Israel inemoñaeta reta Israel pegua añetete vae reta. <sup>7</sup>Jae ramiño vi mbaeti co opaete Abraham inemoñaeta reta Abraham tai añetete vae reta. Echa'ã Tumpa jei Abraham pe cuarãi: “Isaac inemoñaeta ñeño co jae niñemoñaeta añetete vae reta.” Jucuarãi jei. <sup>8</sup>Cua uipota jei jocua uñemoña cuimbae jei vae jeco peguaño vae reta Tumpa tai reta'ã co. Jaeño Tumpa jei vae rupi uñemoñaeta vae reta co jae inemoñaeta añetete vae reta. <sup>9</sup>Echa'ã Tumpa jei Abraham pe. Jei chupe cuarãi: “Ñru año re cuarãi yave ayu yeta, jare Sara imembita co.” Jucuarãi jei.

<sup>10</sup>Jare cua mbaeti co opaete Tumpa jei vae. Echa'ã Tumpa imiari Rebeca pe jae imembita yave. Jocua imembita reta tu co jae yandetenondegua Isaac. <sup>11-12</sup>Jare Tumpa imiari Rebeca pe yave, ndeiño oa choguaquiri reta. Jáeramo ndeiño uyapo icavi vae jare icavi mbae vae. Ërei Tumpa jei Rebeca pe cuarãi: “Tenondegua vae uyeyocuita co taicuegua vae pe.” Jucuarãi jei. Jare cua uicuaaca yandevẽ quirãi Tumpa uiparavo jae jei vae rupi. Tumpa uiparavo'ã mbae ipotave vae uyapo vae jeco pegua. Tumpa uiparavo jae etei uipota ramo. <sup>13</sup>Echa'ã Tumpa inee pe uyecuatía oĩ cuarãi: “Aiparavo Jacob. Aiparavo'ã Esau” —jei Tumpa. Jucuarãi uyecuatía oĩ.

14 Jare Tumpa uyapo'ã etei jupi mbae vae jucuarãi jei ramo. 15 Echa'ã Tumpa jei Moisés pe cuarãi: “Aipararecota co chequirëi aiparareco vae. Jare chepiacavita co chequirëi chepiacavi chupe vae pe.” Jucuarãi jei. 16 Jáeramo ñanoi mburuparareco Tumpa güi, Tumpa etei iquirëi yandeparareco ramo, yandeño'ã ñanequirëi ramo, jare mbaeti vi mbae yande yayapo vae jeco pegua. 17 Echa'ã Tumpa ñnee pe uyecuatía oĩ vae pe yamingueta quirãi Tumpa jei Egipto pegua reta juvicha guasu pe cuarãi: “Cuarã etei che nduparavo mburuvicha guasurã, aicuaaca vaerã chembaepuere nderovaque, opaete ivi pegua reta pe chererãcua vaerã.” Jucuarãi jei. 18 Jáeramo Tumpa uiparareco iquirëi uiparareco vae. Jae ramiño vi umipiatanta iquirëi umipiatanta vae.

19 Jáeramo aramoi quía upiranduta cheve: “Jucuarãi yave, ¿maera pa Tumpa yanembijeco? Echa'ã mbaeti quía ipuere oyopia Tumpa jei vae.” 20 Agüiye ere jucuarãi. Echa'ã nde co jae penti ivi peguaño. Icavi'ã etei ñiñeengata vaerã Tumpa pe. Iru ipuere'ã etei uñeengata iyapoa pe. Ipuere'ã jei: “¿Maera pa nde cheapo cuarãi?” 21 Ñaeu uyapo vae ipuere uyapo ñaeu güi jae uipota vae rupi. Iyapoaño ipuere uyapo penti mbae ipõra vae jare ñru mbae ipõra mbae vae.

22 Tumpa pochi co oĩ uyembaita oĩ vae reta pe. Ërei umiaguanta chupe reta ipiaguasu ete reve, yepe tõi iquirëi uicuaaca quirãi pochi chupe reta jare quirãi uicuaacata chupe reta imbaepuere. 23 Cua Tumpa uyapo, uicuaaca vaerã quirãi umbutuichacata co uiparareco vae reta. Echa'ã iyipi güive Tumpa uiparavo cua reta umbutuichaca vaerã. 24 Cua reta co jae yande reta. Echa'ã Tumpa yandeparavo. Yande co jae judío reta jare judío mbae vae reta. 25 Echa'ã Tumpa jei Oseas uicuatía vae pe cuarãi:

“Tenonde yave chembae'ã vae reta uyeyapota co chembae retarã, jare tenonde yave aaui'ã vae reta añave aauta co.

26 Tenonde yave che jae peve: ‘Pe reta chembae'ã co.’

Ërei jocua che jae vae pe etei che jaeta peve: Pe reta co jae cherai reta. Che co jae Tumpa icove vae.”

Jucuarãi jei. 27 Jare Isaías jei ñneeãta reve Israel pegua reta re: “Yepe tõi jeta ete Israel ññemoñaã reta jeta ete ivicuĩti i guasu jembei pe oĩ vae rami, ãrei mbovño Tumpa umbiasata. 28 Echa'ã yandeYa opa voita uyapo cua ivi pe jei uyapota vae.” Jucuarãi jei. 29 Echa'ã tenonde yave Isaías jei cuarãi:

“YandeYa co jae opaete vae iYa. Jae umbiasa amocue ñanerentaigua reta.

Jucuarãi'ã yave uyapo, uyeyapota tõi yandeve Sodoma jare Gomorra pe uyeyapo vae rami.”

Jucuarãi jei.

### **Yembujupi Tumpa umee mburugüirovia re vae**

30 Jáeramo yandepuere yae cua: Judío mbae vae reta, yepe tõi ueca'ãse uyembujupica vaerã, añave uyembujupica ma co. Uyembujupica ma co, mburugüirovia güinoi ramo. 31 Ërei Israel pegua reta uipota tõi uyembujupica mboroyocui jei vae re uyapo vae rupi. Ërei ipuere'ã uyapo mboroyocui jei

vae. <sup>32</sup>¿Maera ra uyembujupica'á? Uipota'ã uyembujupica mburugüirovia rupi ramo. Echa'ã uipota tẽi uyembujupica mboroyocui jei vae re uyapo vae rupi. Jáeramo Cristo umbiavai chupe reta penti ita re jae reta ipĩsayeyuca jese vae rami co. <sup>33</sup>Echa'ã Tumpa iñee pe uyecuatía oĩ cuarãi:

“Che añoño judfo reta ipite pe penti vae” —jei Tumpa—.

“Jae co penti ita ipĩsayeyuca jese vae rami. Ipĩsapaa reta jocua ita re.

Ërei güirovia jese vae cuarãi jeita: ‘Icaviño arovia jese.’ ”

Jucuarãi uyecuatía oĩ.

**10** <sup>1</sup>Cherivi reta, aipota ete Israel pegua reta uyembiasaca vaerã. Jáeramo ayerure Tumpa pe jese reta. <sup>2</sup>Echa'ã chepuere amimbeu jesegua reta quirãi uipota ete uyeyocui Tumpa pe, ãrei uyeyocui tẽi chupe uicuaa mbae reve. <sup>3</sup>Echa'ã uicuaa'ã quirãi Tumpa yanembujupi. Jáeramo jecuaeño uipota tẽi uyembujupi. Umaeño'ã Tumpa re umbujupi vaerã. <sup>4</sup>Echa'ã Cristo opa ma umbai Moisés iporoyocui. Mbaeti ma quía ipuere uyembujupica mboroyocui jei vae re uyapo vae rupi. Opaete Cristo re güirovia vae reta uyembujupica co.

<sup>5</sup>Echa'ã Moisés uicuatía jocua uipota uyembujupica mboroyocui jei vae re uyapo vae rupi vae re cuarãi: “Ime yave quía jocua mbaembae uyapo vae, güinoita tecove opa mbae vae uyapo ramo.” Jucuarãi uicuatía. <sup>6</sup>Ërei uyembujupica mburugüirovia rupi vae re Tumpa jei cuarãi: “Agüiye ndepia pe iyemingueta: ‘¿Quía ra oota ara pe güeru vaerã cua ivi pe Cristo?’ <sup>7</sup>Agüiye vi ere: ‘¿Quía ra ugüeyita güeru vaerã Cristo umanocue vae reta ipite güi?’” Jucuarãi jei. <sup>8</sup>Jare Tumpa jei vi cuarãi: “Chiñee coiño oĩ ndegüi. Ndepuere ndiyemingueta jese, jare ndepuere ndepia pe ndiyemingueta jese.” Jucuarãi jei. Jae co ñee numimbeu vae. Echa'ã numimbeu ñru vae reta pe jae reta güirovia vaerã. <sup>9</sup>Nde ndere yave: “Jesús co jae cheYa”, jare nderovia yave ndepia pe Tumpa umbijecove ye co Jesús güeru umanocue vae reta ipite güi, ndiyembiasacata co. <sup>10</sup>Echa'ã ndepia pe nderovia yave, ndiyembujupicata co, jare ndere yave: “Jesús co jae cheYa”, ndiyembiasacata co.

<sup>11</sup>Echa'ã Tumpa iñee pe uyecuatía oĩ cuarãi: “Güirovia jese vae cuarãi jeita: ‘Icaviño arovia jese.’” Jucuarãi uyecuatía oĩ. <sup>12</sup>Echa'ã judfo jare judfo mbae vae uyuvavã uyugüi. Echa'ã yandeYa co jae opaete vae iYa, jare tuicha ete uyecuaa yandevẽ imbaepuere yayerure chupe mbae re yave. <sup>13</sup>Echa'ã uyerure yandeYa pe umbiasa vaerã vae uyembiasacata co. <sup>14</sup>Ërei ndarau quía uyerure yandeYa pe umbiasa vaerã, güirovia'ã yave jese. Jare ndarau güirovia jese, uyandu'ã yave jesegua. Jare ndarau uyandu jesegua, mbaeti yave quía umimbeu chupe. <sup>15</sup>Jare ndarau quía umimbeu chupe, Tumpa omondo'ã quía yave. Echa'ã Tumpa iñee pe uyecuatía oĩ cuarãi: “Yayerovia ete co. Echa'ã yugüeru ma uvãe ñee mbiacatu pegua umimbeu vae reta. Yugüeru umimbeu vaerã yandevẽ ñee icavi vae, yande yayerovia vaerã.” Jucuarãi uyecuatía oĩ.

<sup>16</sup>Ërei opaete vae'ã güirovia ñee icavi vae. Echa'ã aracae Isaías jei cuarãi: “CheYa, ¿quía ra güirovia numimbeu chupe vae?” Jucuarãi jei. <sup>17</sup>Jáeramo numimbeu Cristo regua, ñru vae reta uyandu vaerã. Jare uyandu yave, amocue vae güirovia.

18 Ërei tapirandu peve: ¿Uyandu'ã ra reta? Uyandu reta tõi co. Echa'ã Tumpa ñee pe uyecuatía oĩ cuarãi:

“Tumpa jembiocui reta yugüiraa opaete ivi rupi, jare umimbeu opaete vae pe.”

Jucuarãi uyecuatía oĩ. 19 Ërei tapirandu ye peve: ¿Uicuaa'ã ra Israel pegua reta? Uicuaa reta tõi co. Echa'ã tenonde voi aracae Moisés jei cuarãi:

“Ayapota icavi vae chembae'ã vae reta pe, pe reta piñemiagüiro vaerã jese reta” —jei Tumpa—.

“Ayapota icavi vae iyaracuaa mbae vae pere chupe vae reta pe, pombopochica vaerã” —jei.

Jucuarãi jei. 20 Jare Isaías jei vi uquiye mbae reve cuarãi:

“Chereca'ã vae reta chevãe ma” —jei Tumpa—.

“Ayecuaa upirandu'ã cheré vae reta pe” —jei.

Jucuarãi jei. 21 Jare Isaías jei vi Israel pegua reta re cuarãi: “Jecuaño aeni tõi yugüeru vaerã checoti” —jei Tumpa—. “Ërei uyapo'ã che jae chupe reta uyapo vaerã vae. Jecuaño oyovaicho che ndive” —jei. Jucuarãi jei.

### Tumpa uiparavo amocue Israel pegua reta

**11** 1 Ërei yepe tõi jucuarãi uyapo reta, ãrei Tumpa ueya'ã etei jae uiparavo vae reta. Echa'ã che vi co jae penti Israel pegua. Che co jae Abraham ñemoñaã reta pegua jare Benjamín ñemoñaã reta pegua. 2 Tumpa ueya'ã co jae uiparavo vae reta. Echa'ã iyipi güiive uicuaa reta. Picuaa co Tumpa ñee pe Elías regua uyecuatía oĩ vae. Echa'ã Elías uyerure Tumpa pe yave, umbijeco Israel pegua reta. Jei Tumpa pe cuarãi: 3 “CheYa, uyuca reta niñee umimbeu vae reta, jare umbai reta maemimba uyeyuca vae uñemeearenda reta. Cheño ayeyocui ndeve, jare jae reta uipota vi cheyuca.” Jucuarãi jei. 4 Ërei Tumpa jei chupe cuarãi: “Imeño siete mil cuimbae che aiparavo uyeyocui cheve vaerã vae reta. Jae reta uyeatica'ã tumpa-raanga Baal jovai umbiadora vaerã.” Jucuarãi jei. 5 Jae ramiño vi añave ime amocue vae Tumpa uiparavo ipiacavi rupi vae. 6 Tumpa uiparavo reta ipiacavi rupi. Uiparavo'ã mbae jae reta uyapo vae rupi. Echa'ã uiparavo yave mbae jae reta uyapo vae rupi, Tumpa ipiacavi mbiacavi'ã ma co.

7 Jáeramo Israel pegua reta güinoi'ã jocua uipota tõi güinoi vae. Jaeño Tumpa uiparavo vae reta güinoi. Jare ñru reta uyemipiatantaca. 8 Echa'ã Tumpa ñee pe uyecuatía oĩ cuarãi: “Tumpa uyapo chupe reta agüiye vaerã iyaracuaa. Jáeramo yepe tõi umingueta Tumpa ñee, ãrei uicuaa'ã, jare yepe tõi uyandu Tumpa ñee, ãrei güirovia'ã. Jare jecuaño cuarãi oĩ.” Jucuarãi uyecuatía oĩ. 9 Jae ramiño vi aracae David jei cuarãi:

“Opaete uyeco reta jese vae toĩ ñuai reta rami.

Toa reta ñuai pe. Tuiporara reta imbaeyoa jeco pegua.

10 Agüiye tuicuaa, Tumpa ñee umingueta reta yave.

Tuiporara reta, tivita poi ete vae güiraa vae rami.”

Jucuarãi jei.



### Tumpa umbiasata judío mbae vae reta

<sup>11</sup> Aramoi amocue vae jei tēi Israel pegua reta uyempiatantaca agüiye etei vaerã Tumpa uiparareco. Jucuarã'ã co. Ërei iyoa reta ramo, Tumpa omondo ñee yembiasa pegua judío mbae vae reta pe. Jare judío mbae vae reta uyembiasaca yave, Israel pegua reta ñacatãata jese reta jare uipotata uyembiasaca vaerã vi. <sup>12</sup> Jare Israel pegua reta uyavi ramo, icavi co judío mbae vae reta pe. Echa'ã Israel pegua reta iyoa ramo, Tumpa ipiacavi opaete ivi pegua reta pe. Ërei Israel pegua reta uyeyapo ye yave Tumpa imbaerã, icavi eteta co opaete ivi pegua reta pe.

<sup>13</sup> Pe reta co jae judío mbae vae reta. Chemiari ai peve. Echa'ã che co jae Cristo jemimondo judío mbae vae reta pe. Ambutuicha ete co cua mbaraviqui Cristo umee cheve vae. <sup>14</sup> Jucuarã aipota amiagüiroca judío reta, amocue vae uyembiasaca vaerã. <sup>15</sup> Echa'ã Tumpa uyerova chugüi reta ramo, opaete ivi pegua reta ipuere uyembipiacatu Tumpa ndive. Echa'ã uñatima Tumpa coti reta yave, icavi eteta co opaete ivi pegua reta pe - umanocue vae icove ye ou ñru umanocue vae reta ipite güi yave rami. <sup>16</sup> Yamijaanga. Mbiyape tenonde voi oyi vae uñeñono tee yave Tumpa peguarã, opaete harina omonacue vae vi uñeñono tee Tumpa peguarã. Yamijaanga vi. Penti temiti japo reta uñeñono tee yave Tumpa peguarã, opaete jãca reve uñeñono tee Tumpa peguarã.

<sup>17</sup> Yandepuere yayasia amocue temiti olivo jee vae jãca reta, ñañoño vaerã jendacue pe olivo ñana rupigua jãca reta. Jucuarãi yave, temiti olivo iyaisi uguata olivo ñana rupigua jãca reta re jare umee chupe reta tecove. Jae ramiño vi Tumpa uyerova judío reta güi ipiacavi vaerã peve. Pe reta co jae judío mbae vae reta.

<sup>18</sup> Ërei agüiye pepia pe piyemingueta pe reta icavi ete co judío reta güi. Echa'ã pe reta co jae olivo ñana rupigua jãca reta rami. Jáeramo agüiye piyembicate. Echa'ã jãca reta umee'ã tecove japo reta pe. Japo reta umee tecove jãca reta pe.

<sup>19</sup> Jayave aramoi pereta: “Tumpa omombo judío reta olivo jãca reta yayasia rami, ipiacavi vaerã judío mbae vae reta pe. Echa'ã judío mbae vae reta olivo ñana rupigua jãca temiti olivo reta jãca reta jendacue pe uñeñono vae reta rami.” <sup>20</sup> Añete co. Ërei Tumpa uyerova chugüi reta, jae reta güirovia'ã ramo, jare judío mbae vae reta upitata joco pe, güirovia yave. Jáeramo agüiye piyembicate. Pequiyeño. <sup>21</sup> Echa'ã Tumpa uyerova judío reta güi, yepe tēi jae reta co temiti olivo jãca reta etei rami. Jae ramiño vi Tumpa uyerovata pegüi, perovia'ã yave. <sup>22</sup> ¡Mase! Tumpa ipiacavi co. Ërei uiporaraca vi. Echa'ã uiporaraca jocua Israel pegua uyavi vae reta pe. Ërei ipiacavita co judío mbae vae reta pe, jare jecuaeño ipiacavita chupe reta güirovia reta yave. Ërei güirovia'ã yave, Tumpa omombota vi temiti olivo jãca reta yayasia rami. <sup>23</sup> Jare yayasia yaequi yave temiti olivo jãca reta, yandepuere ye ñañoño reta. Jae ramiño vi Tumpa ipiacavita co Israel pegua reta pe, jae reta mbaeti yave jecuae ñatēi güirovia vaerã. Echa'ã Tumpa ipuere uyapo jucuarãi. <sup>24</sup> Echa'ã yandepuere yave ñañoño jãca yayasia olivo ñana rupigua güi vae reta temiti olivo re, yavai'ã co oñ ñañoño vaerã temiti olivo jãcacue reta etei jese. Echa'ã



olivo ñana rupigua uyuavi temiti olivo güi. Jae ramiño vi Tumpa ipiacavi yave judío mbae vae reta pe, yavai'ã co oĩ ipiacavi vaerã Israel pegua reta pe.

### Israel pegua reta uyembiasacata co

<sup>25</sup>Cherivi reta, aipota picuaa vaerã cua ndeiño uyecuaa vae regua, agüiye vaerã piyembicate. Jae co cua: Jeta Israel pegua reta ipiatanta ma. Ërei ndarau jecuaeño jucuarãi, jaeño opaete judío mbae vae reta uyembiasaca regua. <sup>26</sup>Jare cua uyeyapo ma yave, Tumpa umbiasata opaete Israel pegua reta. Echa'ã Tumpa iñee pe uyecuatía oĩ cuarãi:

“Outa judío reta ipite güi uepi vaerã.

Jae umbaita opaete Jacob inemoñaeta reta güi imbaeyoa reta.

<sup>27</sup>YandeYa jei: ‘Echa'ã cuarãi ayapota jae chupe reta vae, ambai yave imbaeyoa reta.’ ”

Jucuarãi uyecuatía oĩ.

<sup>28</sup>Israel pegua reta oyovaicho Tumpa ndive. Echa'ã güirovia'ã reta ñee icavi vae. Ërei cua jeco pegua pe reta pepuere perovia ñee icavi vae. Ërei Tumpa uiparavo Israel pegua reta. Jáeramo uau reta, itenondegua reta uiparavo vae rupi. <sup>29</sup>Echa'ã Tumpa umeeta co chupe reta jei umeeta co chupe reta vae. Ndarau omombo uiparavo vae reta. <sup>30</sup>Pe reta co jae judío mbae vae reta. Tenonde yave pe reta piyapo'ã Tumpa jei vae. Ërei añave Tumpa preparamo, Israel pegua reta uyapo'ã Tumpa jei vae ramo. <sup>31</sup>Jae ramiño vi añave Israel pegua reta uyapo'ã Tumpa jei vae, Ërei Tumpa uipararecota reta, preparamo rami. <sup>32</sup>Echa'ã Tumpa uicuaaca opaete vae oyovaqueño. Mbaeti co quía Tumpa jei vae uyapo vae. Cuarãi Tumpa uyapo, ipuere vaerã uiparareco opaete vae.

<sup>33</sup>Tumpa iyaracuaa catu ete co, jare uicuaa opaete. Yandepuere'ã etei yaicuaa Tumpa ipiyemingueta. Uepit'ã yaicuaa jae uyapo vae. <sup>34</sup>Echa'ã mbaeti quía uicuaa yandeYa ipiyemingueta. Mbaeti quía umbiaracuaa yandeYa mbae re. <sup>35</sup>Mbaeti quía ipuere umee rani mbae yandeYa pe, yandeYa umbijecovia chupe vaerã. <sup>36</sup>Echa'ã opaete mbaembae ou yandeYa güi. Jae uyapo opaete mbaembae iyupeguarã. YandeYa tuyembiadoraca jaeño mai pegua. Amén.

### Upurugüirovia vae reta mbae uyapo vaerã

**12** <sup>1</sup>Jáeramo, cherivi reta, pumiñera piñemee vaerã Tumpa pe. Echa'ã jae preparamo. Israel pegua reta umee Tumpa pe maemimba uyeyucacue. Jucuarãi vi pe reta pemee chupe perete icove vae. Perete tuñeño tee Tumpa peguarã. Cuarãi yave, Tumpa uyeroviata co. Echa'ã jupi co piyeyocui vaerã Tumpa pe cuarãi. <sup>2</sup>Jare agüiye pico jei vae reño yugüireco vae rami. Pemaño Tumpa re umee vaerã peve pepiyemingueta ipiau vae, pepia pe piyemingueta vaerã icavi vae re. Cuarãi yave, picuaata co Tumpa jei vae. Echa'ã icavi co peve piyapo vaerã Tumpa jei vae, pembiyerovia vaerã Tumpa. Echa'ã Tumpa jei vae icavi ete co.

<sup>3</sup>Tumpa ipiacavi cheve ayeyocui vaerã chupe. Jáeramo che jae peve cua: Agüiye quía ipia pe tuyemingueta ete iyee uyemitenonde vaerã ipia pe

uyeminguetata tēi iyee vae güi. Penti penti ipia pe tuyemingueta cavi iyee. Echa'ã Tumpa umee penti penti pe mburugüirovia, ipuere vaerã mbae uyapo Tumpa peguarã. <sup>4</sup>Echa'ã pentiño co yanderete. Ërei yanderete pe ñanoi yandepi jare yandepo jare yandepisa jare yanderesa jare jeta ñru ñru vae. Jare opaete güinoi iparaviqui penti penti yanderete pe. <sup>5</sup>Jae ramiño vi yande jeta ete co. Ërei yayeyapo ma Cristo ndive penti jete ramiño, jare yayemborimbori penti jete rami.

<sup>6</sup>Tumpa ipiacavi yandeve. Jáeramo umee yandeve mbaepuere uyuavi vae reta. Mbaepuere güinoi Tumpa ñnee umimbeu vaerã vae tumimbeu mburugüirovia Tumpa umee chupe vae rupi. <sup>7</sup>Mbaepuere güinoi ñru upurugüirovia vae reta pe uyeyocui vaerã vae tuyeyocui cavi chupe reta. Mbaepuere güinoi oporomboc vaerã vae toporomboc cavi. <sup>8</sup>Mbaepuere güinoi upurumbiaracuaa vaerã vae tupurumbiaracuaa cavi. Mbae ipuere umee ñru vae pe vae tumee iquirēi reve. Mbaepuere güinoi ñru vae reta oyocui vaerã vae toporoyocui cavi. Mbaepuere güinoi ombori vaerã iparavete vae reta vae tombori uyerovia reve.

<sup>9</sup>Piyerau mburuau añetete vae pe. Pemitarēi icavi mbae vae. Jecuaño piyapo icavi vae. <sup>10</sup>Piyerau penti cuimbae uau tiví rami. Pemaē cavi piyee piyepiu reve.

<sup>11</sup>Piyapo mbaraviqui peaqui mbae reve. Peratangātu Espíritu Santo imbaepuere pe. Piyeyocui yandeYa pe.

<sup>12</sup>Peãro yandeYa piyerovia reve. Pepiaguasu piporara yave. Peratangātu piyerure vaerã Tumpa pe.

<sup>13</sup>Mbae uata yave ñru uñeñoño tee Tumpa peguarã vae reta pe, pemee mbae chupe reta. Pepiacavi mboupa reta pe.

<sup>14</sup>Piyerure Tumpa pe uyapo vaerã icavi vae chupe uiporaraca peve vae reta pe. Agüiye piyepipeyu jese reta.

<sup>15</sup>Piyerovia uyerovia vae reta ndive. Pepiatiti ipiatiti vae reta ndive.

<sup>16</sup>Penti ramiño pico uyupii. Agüiye piyembicate. Peau iparavete vae reta. Agüiye pepia pe piyemingueta piyee opaete aracuaa penoi co vae.

<sup>17</sup>Yepe tēi quía uyapo icavi mbae vae peve, agüiye pembijecovia icavi mbae vae pe. Jecuaño piyapo icavi vae opaete vae jovaque. <sup>18</sup>Pepuere yave, ñru vae reta umaño yave peré, pico cavi pepiacatu reve ñru vae reta ndive. <sup>19</sup>Cherivi reta, agüiye pembijecovia mbae icavi mbae vae uyapo peve vae icavi mbae vae pe. Pemaño Tumpa tuiporaraca chupe. Echa'ã Tumpa ñnee pe uyecuatía oĩ cuarã: “Che taiporaraca chupe. Che tambijecovia” —jei yandeYa. Jucuarã uyecuatía oĩ. <sup>20</sup>Jáeramo oyovaicho nde ndive vae iyembaí yave, emingarú. Jare iúe yave, emee i tou. Echa'ã jucuarã yave, imarata co icavi mbae vae uyapo ndeve vae re. <sup>21</sup>Iyapo icavi vae mbae icavi mbae vae uyapo ndeve vae pe. Echa'ã jucuarã nemiamirita icavi mbae vae. Icavi mbae vae ndarau nemiamiri.

**13** <sup>1</sup>Opaete vae tuyapo mburuvicha reta jei vae. Echa'ã Tumpa etei oñoño mburuvicha retarã. Tumpa uiparavo mbaepuere güinoi reta vaerã. <sup>2</sup>Jáeramo uyapo'ã mburuvicha jei vae oyovaicho co Tumpa iporoyocui ndive. Jare mburuvicha uiporaracata oyovaicho jae ndive vae pe <sup>3</sup>Echa'ã mburuvicha reta uminguíyē'ã icavi vae uyapo vae. Uminguíyē icavi mbae vae uyapo vae.

Jáeramo iyapo icavi vae, agüiye vaerã ndequiye mburuvicha güi. Echa'ã mburuvicha uyemingueta cavita nderé. <sup>4</sup>Mburuvicha reta uyeyocui ñugüinoi Tumpa pe. Echa'ã Tumpa uiparavo, nembori vaerã. Ërei icavi mbae vae ndiyapo yave, equiye chugüi reta. Echa'ã Tumpa umee chupe reta mbaepuere uiporaraca vaerã. Jáeramo uyeyocui ñugüinoi Tumpa pe, uiporaraca yave icavi mbae vae uyapo vae reta pe. <sup>5</sup>Jáeramo piyapo mburuvicha reta jei vae, jupi co piyapo vaerã ramo, pequiye'ã uiporaracata peve vae güi ramoño. <sup>6</sup>Jare cua jeco pegua pembiepi mburuvicha reta ocovara peve vae. Echa'ã uyeyocui ñugüinoi Tumpa pe, jare jae reta iparaviqui co ocovara vaerã peve.

<sup>7</sup>Piyapo opaete vae pe jupi co piyapo vaerã vae. Echa'ã jupi co mburuvicha reta ocovara vaerã peve. Pequiye jupi co pequiye vaerã chugüi vae güi. Pipiu jupi co pipiu vaerã vae. <sup>8</sup>Agüiye pepia quia pe mbae re. Ërei jecuaño piyerau. Echa'ã japicha uau vae uyapo ma opaete mboroyocui. <sup>9</sup>Echa'ã mboroyocui jei cuarãi: “Agüiye iyuvanga menda re. Agüiye epuruyuca. Agüiye nemonda. Agüiye ndeapu ñru vae re. Agüiye ipota ñru vae reta imbaembae.” Jucuarãi jei. Jare ime vi ñru mboroyocui reta. Ërei opaete cua mboroyocui reta penti ramoño co. Jae co cua: “Eau nderapicha nde ndiyerau rami.” <sup>10</sup>Echa'ã japicha uau vae ndarau uyapo icavi mbae vae chupe. Jáeramo japicha uau vae uyapo ma opaete mboroyocui.

<sup>11</sup>Coiño ma oi yanembiasa ete vaerã. Yapurugüirovia ramo yave, mbiri echa yandevé. Ërei añave coiño ma oi. Picuaa cavi cua. Jáeramo icavi co ñañemiatangãtu vaerã. <sup>12</sup>Yamijaanga pïtu mbaeyoa re. Cõe seri ma. Jáeramo agüiye ma yayapo pïtumimbi pe uyeyapo vae. Yayapo tembipe oi yave uyeyapo vae. Jucuarãi yandepuereta ñañerãro mbaeyoa ndive. <sup>13</sup>Yaico cavi tembipe pe yugüireco vae reta rami. Agüiye yacau. Agüiye yasavipo. Agüiye yandeporopotaiño. Agüiye yayapo pichïi vae. Agüiye yayovaicho ñru vae ndive. Agüiye ñaneacatãa ñru vae re. <sup>14</sup>Ërei pemaño yandeYa Jesucristo re pemimirãta vaerã, pepuere vaerã piñerãro mbaeyoa ndive. Agüiye pepia pe piyemingueta quirãi pepuere piyapo pipota vaeño.

### Upurugüirovia vae reta agüiye tiñera

**14** <sup>1</sup>Pemaño upurugüirovia vae uicuaa cavi'ã mburugüirovia regua vae re uñemïru vaerã pe ndive, ërei agüiye piyeaca jae ndive mbae uicuaa cavi'ã vae re. <sup>2</sup>Echa'ã penti vae güirovia opaete mbaembae ipuere co jou. Ërei ñru vae uicuaa cavi'ã mburugüirovia regua vae jou'ã soo. <sup>3</sup>Opaete mbaembae ipuere jou vae agüiye tugüirïro jou'ã soo vae. Jare soo jou'ã vae agüiye tiñera opaete mbaembae ipuere jou vae re. Echa'ã jae co Tumpa imbae. <sup>4</sup>Soo jou'ã vae agüiyeta tãi ñnera Tumpa jembiocui re. Jaeño iYa ipuere jei icavi vae uyapo ani icavi mbae vae co uyapo. Jare Tumpa ipuere uparaviqui ipia pe, jae uyapo vaerã icavi vae.

<sup>5</sup>Penti vae ipia pe uyemingueta penti ara icavi ete ñru ara reta güi. ñru vae jei opaete ara reta oyovaque co. Penti penti tuicuaa cavi maera ipia pe uyemingueta cuarãi. <sup>6</sup>Ipia pe uyemingueta penti ara icavi ete ñru ara reta güi vae jei cuarãi uipota umbiyerovia yandeYa ramo. Jae ramoño vi ipia pe

uyemingueta opaete ara reta oyovaque co vae jei cuarã uipota umbiyerovia yandeYa ramo. Opaete mbaembae ipuere jou vae umbiyerovia Tumpa jou yave. Echa'ã umee yasurupai Tumpa pe. Jae ramiño vi soo jou'ã vae umbiyerovia Tumpa jou'ã yave. Echa'ã jae vi umee yasurupai Tumpa pe.

<sup>7</sup>Mbaeti penti ave yaico yayapo vaerã yande yaipota vaenõ. Jae ramiño vi mbaeti penti ave ñamano yaipota ñamano ramo. <sup>8</sup>Echa'ã yaico rambueve, yayeyocui yandeYa pe. Jare ñamanota, yandeYa uipota ñamano vaerã ramo. Jáeramo yaico rambueve jare ñamano yave, yande co jae yandeYa imbae reta. <sup>9</sup>Echa'ã cuarã Cristo umano jare icove ye ou umanocue vae reta ipite güi, uyeyapo vaerã umanocue vae reta jare icove vae reta iYarã.

<sup>10</sup>Penti upurugüirovia vae agüiyeta tõi ñera ñru upurugüirovia vae re. Jae ramiño vi penti upurugüirovia vae agüiyeta tõi güirõ ñru upurugüirovia vae. Echa'ã opaete yande yayemboita Tumpa jovai, jae uãa vaerã yandeparaviqui. <sup>11</sup>Echa'ã Tumpa ñee pe uyecuatía oĩ cuarãi:

“Añetete co” —jei Tumpa—. “Opaete vae uyeaticata cherovai, jare opaete vae chembiadorata co.”

Jucuarãi uyecuatía oĩ. <sup>12</sup>Jáeramo penti penti yamimbeuta Tumpa pe yayapocue vae regua.

<sup>13</sup>Jáeramo agüiye ma ñaniñera. Ñañemoa ngatu quirãi yaico cavi vaerã, agüiye vaerã ñru upurugüirovia vae iyoa yandereco pegua. <sup>14</sup>Che aicuaa yandepuere co yau opaete mbaembae. Echa'ã yandeYa Jesús uicuaaca cheve cua regua. Ërei ime yave quã ipia pe uyemingueta jupi'ã jou vaerã mbae nunga tembú vae, ndarau icavi chupe jou vaerã. <sup>15</sup>Ërei penti upurugüirovia vae umbipiatiti yave ñru upurugüirovia vae jou vae jeco pegua, ico'ã co upuruau reve. Agüiye tou jocua nunga tembú. Echa'ã jou yave, aramoi ombopiacata ñru upurugüirovia vae jou vae jeco pegua. Echa'ã Cristo umano vi jocua ñru upurugüirovia vae re. <sup>16</sup>Jáeramo agüiye tou jocua nunga tembú, yepe tõi uicuaa ipuere co jou. Echa'ã jou yave, ñru vae reta jeita uyapo icavi mbae vae. <sup>17</sup>Echa'ã Tumpa yandecui ramo, agüiye yayemipia'ã mbae yau vae re. Yayapo jupi vae, jare yaico mbiacatu reve uyupii, jare yayerovia. Echa'ã Espíritu Santo yanembori, cuarãi yaico vaerã. <sup>18</sup>Uyeyocui Cristo pe cuarãi vae umbiyerovia co Tumpa, jare ñru vae reta uyemingueta cavi jese.

<sup>19</sup>Jáeramo jecuaenõ yaico cavi, yandepiacatu vaerã uyupii, jare jecuaenõ yaipota ñañemimiráta vaerã. <sup>20</sup>Agüiye yarucumegua Tumpa iparaviqui mbae yau vae jeco pegua. Añete co, yandepuere yau opaete mbaembae. Ërei ñru vae reta iyoa yave mbae nunga tembú yau ramo, icavi'ã yau vaerã jocua nunga tembú. <sup>21</sup>Agüiye yau soo jare vino, jare agüiye yayapo ñru mbaembae, yambiavai yave ñru upurugüirovia vae jocua nunga mbaembae jeco pegua. Echa'ã aramoi ñru upurugüirovia vae iyoata ani ipituta ipurugüirovia re. <sup>22</sup>Añete co, amocue upurugüirovia vae reta güirovia ipuere jou opaete mbaembae. Tumpaño tuicuaa jesegua. Jae reta jou yave uicuaa Tumpa uipota jou vaerã vae, uyeroviata co. <sup>23</sup>Ërei ipia pe uyemingueta jupi'ã jou vaerã mbae nunga tembú

vae, uyembijeco jocua tembúu jou yave. Echa'ã güirovia'ã jupi jou vaerã. Echa'ã mbae yayapo yave, yarovia'ã yave jupi yayapo vaerã, yandeyoa co.

**15** <sup>1</sup>Ime amocue yande ñanepirãta yandepurugüirovia re vae. Jáeramo icavi co yambori vaerã uicuaa cavi'ã mburugüirovia regua vae reta. Agüiye yayapo yande yaipota yayapo vaëño. <sup>2</sup>Penti penti yaico yambiyerovia vaerã ñru vae, jucuarãi yandepuere yave yayapo icavi vae chupe, ipirãta vaerã ipurugüirovia re. <sup>3</sup>Echa'ã Cristo etei uyapo'ã jae uipota uyapo vaëño. Jae uyapo Tumpa jei vae. Echa'ã Tumpa ñnee pe uyecuatía oĩ cuarãi: “Jei icavi mbae vae ndeve vae jei vi icavi mbae vae checotí?” —jei Cristo Tumpa pe. Jucuarãi uyecuatía oĩ. <sup>4</sup>Opaete tenonde yave Tumpa ñnee pe uyecuatía oĩ vae uyecuatía co yande yayemboe vaerã. Echa'ã Tumpa ñnee pe uyecuatía oĩ vae ipuere umee yandeve mbiaguasu jare mbiacatu, ñaãro vaerã yayerovia reve. <sup>5</sup>Tumpa co jae mbiaguasu jare mbiacatu umee peve vae. Tumpa tuparaviqui pepia pe, pico cavi vaerã penti ramiño. Echa'ã cua co jae Cristo Jesús jei vae. <sup>6</sup>Pepia pe piyemingueta jare piyemingueta penti ramiño, pemiadora vaerã Tumpa. Jae co yandeYa Jesucristo Tu.

#### Umimbeu ñee icavi vae judío mbae vae reta pe

<sup>7</sup>Jáeramo pemaie cavi piyee, Cristo umaie cavi yanderé rami, ñru vae reta umbiadora vaerã Tumpa. <sup>8</sup>Echa'ã che jae peve cua: Cristo ou uyeyocui vaerã judío reta pe, uicuaaca vaerã chupe reta Tumpa ñnee añete vae. Echa'ã jae ou uicuaaca vaerã judío reta pe Tumpa uyapota itenondegua reta pe jei vae. <sup>9</sup>Jare Cristo ou judío mbae vae reta vi umbiadora vaerã Tumpa, jae uiparareco reta ramo. Echa'ã aracae David jei Tumpa pe cuarãi:

“Jáeramo che numbiadorata judío mbae vae reta ipite pe.  
Che numbiadorata canta pe.”

Jucuarãi jei. <sup>10</sup>Jare aracae Moisés vi jei cuarãi:

“Judío mbae vae reta tuyerovia Tumpa imbae vae reta ndive.”

Jucuarãi jei. <sup>11</sup>Jare David jei vi cuarãi:

“Judío mbae vae opaete ivi pegua reta tumbiadora yandeYa,  
tuyemingueta imbaepuere re, opaete ivi pegua reta.”

Jucuarãi jei.

<sup>12</sup>Jare aracae Isaías jei cuarãi:

“Outa co Isaf ñnemoña.

Jae uyeyapota judío mbae vae reta juvicha guasurã.

Judío mbae vae reta güiroviata jese.”

Jucuarãi jei.

<sup>13</sup>Tumpa uparaviqui yandepia pe ñaãro vaerã yayerovia reve. Jecuaëño tuparaviqui pepia pe, pemiayerovia ete vaerã jare pemiapiacatu vaerã pepurugüirovia rupi. Jucuarãi yave, peãrota co piyerovia ete reve Espíritu Santo imbaepuere rupi.

<sup>14</sup>Che etei vi aicuaa catu, cherivi reta, quirãi pe reta pepiacavi ete co. Picuaa catu jeta mbaembae regua. Jáeramo pepuere piyembiaracuaa.

<sup>15</sup>Ērei aicuatía ma peve, cherivi reta, aquíye mbae reve amocue mbaembae re, pumimandúa jese vaerã. Cuarãi ayapo, Tumpa ipiacavi umee cheve vae rupi. <sup>16</sup>Echa'ã Tumpa cheparavo ayeyocui vaerã Jesucristo pe judío mbae vae reta ipite pe. Jáeramo amimbeu chupe reta ñee icavi vae Tumpa regua. Jare judío mbae vae reta güirovia yave, Tumpa uyerovia co. Echa'ã Espíritu Santo oñono tee jocua judío mbae vae reta Tumpa peguarã.

<sup>17</sup>Jáeramo chepuere chemiari cavi cheparaviqui re. Ērei jucuarãi ambiadora Cristo Jesús. Echa'ã mbaraviqui co jae Tumpa iparaviqui. <sup>18</sup>Chemiarita Cristo uyapo che rupi vae reño. Jae uparaviqui judío mbae vae reta ipia pe che amimbeu vae jare ayapo vae rupi, jae reta upurugüirovia vaerã. <sup>19</sup>Jare Espíritu Santo umee cheve mbaepuere ayapo vaerã miacañi reta, judío mbae vae reta ipiacañi vaerã. Jare che ambapí opaete que rupi Jerusalén güi Ilírco pe amimbeu vaerã ñee icavi vae Cristo regua. <sup>20</sup>Jare cuarãi aipota ayapo. Aipota ete amimbeu ñee icavi vae uyandu'ã etei Cristo regua vae pe, agüiye vaerã aparaviqui ñru vae uparaviqui vae pe. <sup>21</sup>Jare jucuarãi uyeyapo Tumpa ñíee pe uyecuatía oĩ vae. Echa'ã uyecuatía oĩ cuarãi: “Ndeño quía umimbeu Cristo chupe vae reta uyanduta co. Ndeño uyandu vae reta uicuaata co.” Jucuarãi uyecuatía oĩ.

### Pablo iquirëi oo Roma pe

<sup>22</sup>Jare cua jeco pegua ayembiavai ete, yepe tēi aipota aa pepi. <sup>23</sup>Jeta año ma aipota ete aa apou pepi, jare añave opa ma cheparaviqui cua pe. <sup>24</sup>Jáeramo España pe aa yave, aipota aa apou pepi, ayerovia vaerã pe ndive mbovi ara pegua. Jayave joco güi aramoi pepuereta chembori aa ye vaerã España coti. <sup>25</sup>Ērei aata rani Jerusalén pe araa vaerã corepoti uñeño tee Tumpa peguarã vae reta pe. <sup>26</sup>Echa'ã Macedonia jare Acaya pegua reta jei icavi co omondo vaerã corepoti Jerusalén pegua uñeño tee Tumpa peguarã vae iparavete vae reta pe. <sup>27</sup>Añete co, jae reta uvãe icavi cua uyapo vaerã. Jare ipía co judío reta pe. Echa'ã judío reta rani umimbeu judío mbae vae reta pe Tumpa ñíee. Jáeramo icavi co judío mbae vae reta ombori vaerã judío reta mbaembae cua ivi pegua pe. <sup>28</sup>Jáeramo araata rani chupe reta cua corepoti. Jayave cua mbaraviqui opa ma yave, aata pepi, jare joco güi aata España coti. <sup>29</sup>Jare aicuaa che aa pepi yave, amimbeu cavita peve ñee icavi vae Cristo regua. Jáeramo piyerovia eteta co.

<sup>30</sup>Pe reta perovia yandeYa Jesucristo re, jare Espíritu Santo pemboe piyerau vaerã. Jáeramo che pumiñera, cherivi reta, piyerure Tumpa pe cheré. <sup>31</sup>Piyerure Tumpa pe jae cherepi vaerã upurugüirovia mbae vae Judea pegua reta güi. Piyerure vi Jerusalén pegua Tumpa peguarã uñeño tee vae reta uyerovia vaerã cua corepoti araata chupe reta vae re. <sup>32</sup>Jae ramiño vi piyerure aa vaerã pepi ayerovia reve Tumpa jei vae rupi, jare aputuu vaerã pe reta ndive. <sup>33</sup>Tumpa toĩ opaete pe ndive. Echa'ã jae umee yandev mbiacatu. Amén.

## Saludo reta

**16** <sup>1</sup>Amondota pepi yanderindi Febe. Jae uyeyocui iru upurugüirovia vae Cencrea pegua reta pe. <sup>2</sup>Pembiresive cavi yandeYa jee pe. Echa'ã icavi co ñeñono tee Tumpa peguarã vae reta jucuarãi uyapo vaerã uyupe. Jare pembali, mbae uata chupe yave. Echa'ã jae ombori jeta vae, jare chembori vi.

<sup>3</sup>Tumpa ndiveño toĩ Priscila jare Aquila. Jae reta chembori Cristo Jesús iparaviqui pe. <sup>4</sup>Jae reta umano seri cherepi vaerã. Jáeramo amee yasurupai chupe reta. Jae ramiño vi opaete judío mbae vae uyembatimbati vae reta umee yasurupai chupe reta. <sup>5</sup>Jae ramiño vi Tumpa ndiveño toĩ opaete Priscila jare Aquila jenta pe uyembati vae reta. Jae ramiño vi Tumpa ndiveño toĩ yanderivi Epeneto. Jae rani güirovia Cristo re Acaya pe. <sup>6</sup>Jae ramiño vi Tumpa ndiveño toĩ María. Jae uparaviqui tanta pepite pe. <sup>7</sup>Jae ramiño vi Tumpa ndiveño toĩ Andrónico jare Junias. Jae reta co cherentaigua reta, jare yugüirecose peresoriru pe che ndive. Temimondo reta uyemingueta cavi ete jese reta. Jae reta güirovia Cristo re ndei che arovia jese mbove.

<sup>8</sup>Jae ramiño vi Tumpa ndiveño toĩ Amplias. Jae güirovia yandeYa re jare che aau. <sup>9</sup>Jae ramiño vi Tumpa ndiveño toĩ Urbano. Jae orembori Cristo iparaviqui pe. Jae ramiño vi Tumpa ndiveño toĩ yanderivi Estaquis. <sup>10</sup>Jae ramiño vi Tumpa ndiveño toĩ Apeles. Uyecuua co quirãi uyeyocui cavi Cristo pe. Jae ramiño vi Tumpa ndiveño toĩ Aristóbulo jenta pegua reta. <sup>11</sup>Jae ramiño vi Tumpa ndiveño toĩ Herodión. Jae co cherentaigua. Jae ramiño vi Tumpa ndiveño toĩ Narciso jenta pegua upurugüirovia vae reta. <sup>12</sup>Jae ramiño vi Tumpa ndiveño toĩ Trifena jare Trifosa. Jae reta uparaviqui ñugüinoi yandeYa pe. Jae ramiño vi Tumpa ndiveño toĩ yanderindi Pérsida. Jae vi uparaviqui tanta yandeYa pe. <sup>13</sup>Jae ramiño vi Tumpa ndiveño toĩ Rufo jare ichi. Rufo uyeyocui cavi yandeYa pe. Jare ichi uyandareco cavi cheré chesi rami. <sup>14</sup>Jae ramiño vi Tumpa ndiveño toĩ Asíncrito, Flegonte, Hermas, Patrobas, Hermes jare opaete cherivi uyembati jae reta ndive vae reta. <sup>15</sup>Jae ramiño vi Tumpa ndiveño toĩ Filólogo, Julia, Nereo, Nereo jindi, Olimpas jare opaete ñeñono tee Tumpa peguarã vae uyembati jae reta ndive vae reta.

<sup>16</sup>Piyembisaluda yave, piñecuãva piyerau reve. Opaete upurugüirovia vae uyembatimbati vae jei peve Tumpa ndiveño pei.

<sup>17</sup>Añave che pumiñera, cherivi reta, piñemoa ngatu vaerã yembiyao uyapo vae reta güi. Echa'ã jae reta umbiavai Tumpa iparaviqui. Jae reta iporomboc uyuavi piyemboe jese vae güi. Agüiye piyembati jae reta ndive. <sup>18</sup>Echa'ã jae reta uyeyocui'ã yandeYa Jesucristo pe. Jaeño uparaviqui reta iyupeguarã. Jae reta uiporu ñee icavi vae echa. Ërei jucuarãi umbitavi yemboe añete vae uicuaa cavi'ã vae reta. <sup>19</sup>Opaete vae uicuaa quirãi pe reta perovia yandeYa re. Jáeramo ayerovia peré. Jare aipota jecuaeño pequirẽi vaerã piyapo icavi vae. Agüiye petavi piyapo vaerã icavi mbae vae. <sup>20</sup>Tumpa jecuaeño umee yandave ipiacatu. Jae pembali, imambae pemiamiri ete vaerã Satanás. YandeYa Jesucristo tumee peve ipiacavi.

<sup>21</sup>Timoteo uparaviqui oĩ che ndive. Jae jare Lucio, Jasón jare Sosípater - jae reta co cherentaigua reta - jei peve Tumpa ndiveño peĩ.

<sup>22</sup>Tercio uicutía oĩ cua tupapire cheve peguarã. Jae vi jei peve Tumpa ndiveño peĩ yandeYa re perovia ramo.

<sup>23</sup>Gayo vi jei peve Tumpa ndiveño peĩ. Che aico jae jenta pe, jare opaete upurugüirovia vae reta vi uyembati cua pe. Erasto vi jei peve Tumpa ndiveño peĩ. Jae uñuvatu tenta guasu pegua reta icorepoti. Yanderivi Cuarto vi jei peve Tumpa ndiveño peĩ.

<sup>24</sup>YandeYa Jesucristo tumee opaete peve ipiacavi. Amén.

### **Tumpa tuyembidoraca**

<sup>25</sup>Jare añave yambidora Tumpa. Echa'ã jae ipuere pemimirãta. Cuarã amimbeu ma peve, ñee icavi vae Jesucristo regua amimbeu peve yave. Echa'ã jae umee cheve etei amimbeu vaerã. Cua ñee icavi vae uyecuaa'ã etei ivi uyeyapo güive. Jaeramo Tumpa uicuaaca. <sup>26</sup>Jáeramo añave uyecuaa. Jare Tumpa icono mai vae oyocui uyecuaa vaerã opaete ivi pegua reta pe Tumpa iñee umimbeu vae reta uicutía vae rupi, opaete vae güirovia vaerã Tumpa jei chupe reta rami.

<sup>27</sup>Tumpaño co jae iyaracuaa catu vae. Tumpa tuyembidoraca Jesucristo rupi jaeño mai pegua. Amén.



# PRIMERA CARTA DEL APOSTOL SAN PABLO A LOS CORINTIOS

---

**1** <sup>1</sup> Che co jae Pablo. Tumpa cheparavo aico vaerã Jesucristo jemimondorã. Echa'ã cua co jae Tumpa jei vae. Cherivi Sóstenes ime cua pe oĩ che ndive. <sup>2</sup> Aicuatía cua tupapire opaete pepurugüirovia vae Corinto pe piyembati vae reta pe. Pe reta co jae Tumpa imbae. Tumpa cheparavo peñono tee vaerã iyupeguarã. Cuarãi Tumpa uyapo Cristo Jesús rupi. Jae ramiño vi Tumpa uiparavo opaete yondeYa Jesucristo re güirovia vae reta. Jae reta opaete que rupi ñugüinoi. Jae reta iYa co jae yandeYa Jesucristo. <sup>3</sup> YandeRu Tumpa jare yandeYa Jesucristo tumee peve ipiacavi jare ipiacatu.

## Yasurupai umee Tumpa pe Corinto pegua reta re

<sup>4</sup> Jecuaeño amee yasurupai Tumpa pe peré, Tumpa umee ipiacavi peve Cristo Jesús rupi ramo. <sup>5</sup> Echa'ã Tumpa pemivendise ete, pepuere vaerã pemimbeu ñru vae reta pe jare picuaa cavi vaerã. <sup>6</sup> Jare jucuarãi pe reta picuaaca ñru vae reta pe añetete vae co jocua amimbeu peve Cristo regua vae. <sup>7</sup> Jucuarãi uata'ã etei peve penti ave mbaepuere Espiritu Santo umee vae. Jare jecuaeño peãro piyerovia reve yandeYa Jesucristo ou ye vaerã. <sup>8</sup> YandeYa Jesucristo jecuaeño pemimírãtata jae ou ye regua, agüiye vaerã quía ipuere pembijeco mbae re jocua ara. <sup>9</sup> Tumpa jecuaeño uyapo jei uyapota vae. Echa'ã jae cheparavo, pico vaerã Tai ndive. Jae co yandeYa Jesucristo.

## Upurugüirovia vae reta uyembiyao uyugüi

<sup>10</sup> Cherivi reta, che pumiñera, yandeYa Jesucristo jee re agüiye vaerã piyeaca uyupii, jare agüiye vaerã piyembiyao piyugüi. Pumiñera pico vaerã penti ramiño. Toyovaque pepia pe piyemingueta oĩ vae jare pearacuaa. <sup>11</sup> Echa'ã Cloé jenta pegua reta umimbeu cheve peregua, cherivi reta, quirãi piyeaca pico uyupii. <sup>12</sup> Amocue pe reta pere: “Che co jae Pablo regua.” Jare amocue pere:

“Che co jae Apolos regua.” Jare ĩru pe reta pere: “Che co jae Pedro regua.” Jare ĩru pe reta pere: “Che co jae Cristo regua.” Jáeramo tae peve cua: <sup>13</sup>Cristo uyembiyao'ã etei. Che amano'ã co curusu re pembaeyoa reta jeco pegua. Piyembibautizaca'ã co cheree re. <sup>14</sup>Ameeyasurupai Tumpa pe quirãĩ mboviño pumbibautiza. Jaeño ambibautiza Crispo jare Gayo. <sup>15</sup>Jáeramo pepuere'ã etei pere cheree re piyembibautizaca co. <sup>16</sup>Añete yepe, ambibautiza Estéfanas jenta pegua reta vi. Ērei chemandua'ã ambibautiza ra ĩru vae. <sup>17</sup>Echa'ã Cristo chembou'ã apurumbibautiza vaerã. Jaeño chembou amimbeu vaerã ñee icavi vae. Ērei aiporu'ã ñee iyaracuaa catu vae pegua. Echa'ã jocua nunga ñee aiporu yave, aramoi ñee Cristo icurusu regua ndarau tēi mbaepuere güinoi.

### Cristo co jae Tumpa iyaracuaa jare imbaepuere

<sup>18</sup>Echa'ã yamimbeu yave ñee Cristo icurusu regua, cañitei pe yugüiraata vae reta ipia pe uyemingueta tēi jae penti mbiquere co. Ērei cua ñee rupi Tumpa uicuaaca yandevē imbaepure. Echa'ã yande yayemiasaca co. <sup>19</sup>Echa'ã Tumpa ñee pe uyecuatía oĩ cuarãĩ:

“Che aicuaacata quirãĩ iyaracuaa catu echa vae reta añetete iyaracuaa'ã etei co” —jei Tumpa—.

“Jae ramiño vi aicuaacata quirãĩ opaete mbaembae uicuaa cavi echa vae reta añetete uicuaa cavi'ã etei co” —jei.

Jucuarãĩ uyecuatía oĩ.

<sup>20</sup>¿Quía ra co jae iyaracuaa catu vae? ¿Quía ra co jae mboroyocui re oporombocue vae? ¿Quía ra co jae ipoqui cua ivi pe uyeaca vaerã vae? Echa'ã Tumpa uicuaaca quirãĩ aracuaa cua ivi pegua mbae'a co. <sup>21</sup>Ivi pegua reta ipuere'ã uicuaa Tumpa jae reta iyaracuaa catu echa vae rupi. Ērei Tumpa umbiasa upurugüirovia vae ñee icavi vae yamimbeu vae rupi, yepe tēi penti mbiquere echa ĩru vae reta pe.

<sup>22</sup>Echa'ã judío reta uipota yayapo vaerã penti miacañi jae reta uecha vaerã. Jare judío mbae vae reta uipota yayemingueta vaerã iyaracuaa catu vae cua ivi pegua reta uyemingueta rami. <sup>23</sup>Ērei yande yamimbeu chupe reta quirãĩ Cristo umano curusu re. Ērei cua yamimbeu vae penti yembiavai judío reta pe, jare judío mbae vae reta ipia pe uyemingueta tēi penti mbiquere co. <sup>24</sup>Ērei Tumpa uiparavo vae reta pe Tumpa uicuaaca Cristo rupi quirãĩ tuicha ete co imbaepuere jare quirãĩ iyaracuaa catu ete co. Tumpa uiparavo vae reta co jae judío reta jare judío mbae vae reta. <sup>25</sup>Ime amocue ivi pegua iyaracuaa catu vae. Ērei Tumpa iyaracuaa catu ete ye cua reta güi, yepe tēi jae reta ipia pe uyemingueta tēi penti mbiquere co Tumpa Cristo rupi uyapo vae. Jae ramiño vi ime amocue ivi pegua mbaepuere güinoi vae. Ērei Tumpa imbaepuere tuicha ete cua reta imbaepuere güi, yepe tēi jae reta ipia pe uyemingueta tēi Tumpa Cristo rupi uyapo vae jucuarãĩ uyapo mbaeti mbaepuere güinoi ramo. <sup>26</sup>Cherivi reta, pemandúa Tumpa peparavo vae re, yepe tēi jeta'ã co iyaracuaa catu vae reta pepite pe - jucuarãĩ jei chupe reta ivi peguareta - jare jeta'ã co mbaepuere güinoi vae reta, jare jeta'ã co mburuvicha reta ñemoñaeta. <sup>27</sup>Echa'ã Tumpa uiparavo iyaracuaa mbae vae

reta cua ivi pegua re vae reta, iyaracuaa catu vae reta uicuaa vaerãa iyaracuaa mbae'ã co Tumpa pe. Jae ramiño vi Tumpa uiparavo mbaepuere güinoi mbae vae reta cua ivi pegua re vae reta, mbaepuere güinoi vae reta uicuaa vaerã imbaepuere mbae'ã co Tumpa pe. <sup>28</sup>Jae ramiño vi Tumpa uiparavo iparavete vae reta jare uñereriroca vae reta. Uiparavo vi mbaembae uyembutuichaca mbae vae, uicuaaca vaerã mbae'ã co mbaembae uyembutuichaca vae. <sup>29</sup>Jare jucuarãi uyapo Tumpa, agüiye vaera quía uyembicate jae jovaque. <sup>30</sup>Ërei Tumpa etei peapo penti ramiño Cristo Jesús ndive. Echa'ã Cristo Jesús rupi Tumpa umee yandeve aracuaa. Jae ramiño vi Cristo Jesús rupi Tumpa yanembujupi jare ñaneño tee iyupeguarã jare yanderepi mbaeyoa güi. <sup>31</sup>Jáeramo yayapo Tumpa iñee pe uyecuatía oĩ vae rami. Echa'ã uyecuatía oĩ cuarãi: “Ime yave quía uipota uyembicate vae, tuyembicate yandeYa re.” Jucuarãi uyecuatía oĩ.

### Umimbeu quirãi Cristo umano curusu re

**2** <sup>1</sup>Jare aa pepi yave, cherivi reta, amimbeu peve añete vae Tumpa regua. Aipota'ã pepia pe piyemingueta vaerã aicatu co chemiari vaerã ani chearacuaa catu co. <sup>2</sup>Echa'ã pepite pe añ rambueve, chequirëi amimbeu peve cuaño - Jesucristo jare quirãi jae umano curusu re. <sup>3</sup>Jare pepite pe añ rambueve, chepia pe ayemingueta aramoi ndarau piyapisaca cheré. Jáeramo ariri aqüiye ramo. <sup>4</sup>Jare chemiari peve yave amimbeu vaerã peve ñee icavi vae, aiporu'ã ñee reta cuimbae iyaracuaa catu vae uiporu vae aicuaaca vaerã peve ñee icavi vae añete co. Echa'ã chemiari peve yave, aicuaaca peve ñee icavi vae añete co Espiritu Santo imbaepuere rupi. <sup>5</sup>Jare cua ayapo agüiye vaerã cuimbae iyaracuaa catu vae jei vae jeco pegua pepurugüirovia. Aipota pepurugüirovia vaerã Tumpa imbaepuere jeco pegua.

### Tumpa uicuaaca yandeve Espiritu Santo rupi vae

<sup>6</sup>Ërei ore nduiporu ñee aracuaa pegua ipirãta ipurugüirovia re vae reta ipite rupi. Ërei cua aracuaa ivi pegua'ã co jare jae'ã vi co ivi pegua reta juvicha reta iyaracuaa. Echa'ã cua juvicha reta imambae opata. <sup>7</sup>Ërei ore ndoe vae aracuaa Tumpa güi ou vae co. Cua aracuaa tenonde yave uyecuaa'ã. Echa'ã tenonde yave Tumpa uicuaaca'ã etei. Ërei iyipi güiive Tumpa iquirëi uicuaaca yandeve cua aracuaa, yayembiasaca vaerã. <sup>8</sup>Ërei mbaeti penti ave ivi pegua reta juvicha uicuaa cua aracuaa. Echa'ã mburuvicha reta uicuaa yave mona, ndarau tõi uyuca curusu re yandeYa yembiadora pegua vae. <sup>9</sup>Ërei Tumpa iñee pe uyecuatía oĩ cuarãi:

“Mbaeti quía uecha jare mbaeti quía uyandu jocua mbaembae

Tumpa umicuatiro ma uau Tumpa vae reta pe vae.

Mbaeti vi quía ipia pe uyemingueta jese.”

Jucuarãi uyecuatía oĩ. <sup>10</sup>Ërei Tumpa uicuaaca yandeve Espiritu Santo rupi. Echa'ã Espiritu Santo uicuaa opaete. Uicuaa vi opaete Tumpa regua javai ete yaicuaa vaerã vae.

<sup>11</sup>Penti vae ipuere'ã uicuaa ñru vae ipia pe uyemingueta vae. Jae eteño uicuaa. Jae ramiño vi mbaeti quiave uicuaa Tumpa ipiyemingueta. Jaeño Tumpa iEspíritu uicuaa. <sup>12</sup>Jare Tumpa umee ma yandeve Espiritu Santo. Jáeramo yandepia pe yayemingueta'ã ma upurugüirovia mbae vae reta ipia pe uyemingueta rami. Echa'ã Espiritu Santo uicuaaca yandeve mbaembae Tumpa umee yandeve ipiacavi jeco pegua vae. <sup>13</sup>Jare ore numimbeu ñru vae reta pe cua mbaembae. Ërei nduiporu'ã ñee iyaracuaa catu vae oporomboe jese vae reta. Ore nduiporu ñee Espiritu Santo oremboe jese vae reta: Jáeramo nduicuaaca ñru vae reta pe mbaembae Espiritu Santo pegua ñee Espiritu Santo oremboe jese vae reta pe.

<sup>14</sup>Ërei upurugüirovia mbae vae uipota'ã güirovia Tumpa iEspiritu oporomboe jese vae. Echa'ã mbae'ã echa chupe. Ipuere'ã uicuaa. Echa'ã jaeño Espiritu Santo ico ipia pe vae ipuere uicuaa. <sup>15</sup>Echa'ã Espiritu Santo ico ipia pe vae ipuere uicuaa cavi opaete cua mbaembae. Ërei upurugüirovia mbae vae ipuere'ã uicuaa cavi upurugüirovia vae regua. <sup>16</sup>Echa'ã mbaeti quía uicuaa cavi yandeYa ipiyemingueta, jare mbaeti quía ipuere omboe yandeYa mbaembae re. Ërei yande yandepia pe yayemingueta Cristo ipia pe uyemingueta rami.

### Uyeyocui reta Tumpa pe

**3** <sup>1</sup>Cherivi reta, chepuere'ã pumingueta ipirãta ipurugüirovia re vae reta pe ayemingueta rami. Pumingueta jei vae rupiño yugüireco vae reta pe ayemingueta rami jare Cristo re güirovia ramo vae reta pe ayemingueta rami. <sup>2</sup>Pe reta co jae sambiaí necheño jou vae reta rami. Pe reta jae'ã co ucuacuaa vae tembü ipuere jou vae reta rami. Echa'ã che pomboe mbaembae yavai'ã etei yaicuaa vaerã vae re. Chepuere'ã pomboe mbaembae yavai yaicuaa vaerã vae re. Echa'ã jecuaeño pepuere'ã picuaa yavai vae. <sup>3</sup>Pe reta pepia pe piyemingueta jei vae rupiño yugüireco vae reta ipia pe uyemingueta rami. Echa'ã peacataa jare piyovaicho uyupii. Cua uicuaaca quirãi pico upurugüirovia mbae vae reta yugüireco rami. Echa'ã jae reta yugüireco jei vae reño. <sup>4</sup>Echa'ã amocue pe reta pere: “Che co jae Pablo regua.” Jare ñru pe reta pere: “Che co jae Apolos regua.” Cua uicuaaca quirãi pepia pe piyemingueta jei vae reño yugüireco vae reta ipia pe uyemingueta rami co.

<sup>5</sup>Che mbae'ã co, jare Apolos mbae'ã co. Jaeño nduyeyocui yandeYa pe, pe reta perovia vaerã jese. Jare penti penti nduyapo mbaraviqui yandeYa umee oreve vae. <sup>6</sup>Che rani amimbeu peve ñee icavi vae perovia vaerã jare taicue rupi Apolos pembali picuaa cavi vaerã. Ërei Tumpa co jae pemimãrãta pepurugüirovia re vae. Yamijaanga penti temiti. Che co jae temiti oñoti vae rami, jare Apolos co jae temiti umbiu vae rami. Ërei Tumpa etei umbicuacuaa temiti. <sup>7</sup>Jáeramo che mbae'ã co, yepe tẽi che co jae temiti oñoti vae rami. Jae ramiño vi Apolos mbae'ã co, yepe tẽi jae co temiti umbiu vae rami. Mbaraviqui Tumpa iparaviqui co. Echa'ã jae umbicuacuaa temiti. <sup>8</sup>Jare temiti oñoti vae jare temiti umbiu vae uparaviqui penti ramiño. Jare Tumpa umbiepãta penti penti pe iparaviqui rupi. <sup>9</sup>Echa'ã ore nduparaviqui nduico Tumpa ndive. Pe reta co jae

temiti Tumpa ico pe ñugüinoi vae reta rami. Jae ramiño vi pe reta co jae penti tenta Tumpa uyapo oĩ vae rami. <sup>10</sup>Che co jae icatu tenta uyapo vae rami. Jare Tumpa umaño cheré jae ipiacavi jeco pegua añoño vaerã tenta iguapicarã. Jare ñru vae co jae tenta oñono oĩ iguapica iárambo vae rami. Ërei penti penti tuñemoa ngatu quirãì uparaviqui tenta iguapica iárambo. <sup>11</sup>Echa'ã Jesucristo co jae tenta iguapica rami. Tenta iguapica uñeñoño ma co. Mbaeti ye co ñru tenta iguapica. <sup>12</sup>Tenta iyapoa reta ipuere oñono tenta iguapica iárambo oro jare corepoti jare ita ipõra ete vae, ani ipuere oñono ivira reta jare capii jare atigüie. <sup>13</sup>Penti penti iparaviqui uyecuaata co jocua ara Tumpa uicuaaca yave. Echa'ã jocua ara imeta co tata, jare tata uicuaacata mbae nunga mbaraviqui penti penti uyapo vae. <sup>14</sup>Mbaraviqui tenta iguapica iárambo uyeyapo vae ocai'ã yave, Tumpa umbiepita jocua mbaraviqui uyapo vae pe. <sup>15</sup>Mbaraviqui ocai yave, Tumpa ndarau umbiepi jocua mbaraviqui uyapo vae pe. Ërei mbaraviqui uyapo vae etei uyembiasacata co, penti cuimbae oyepe tata güi vae rami.

<sup>16</sup>Picuaa co quirãì pe reta co jae Tumpa jo jare quirãì Tumpa iEspíritu ico pepia pe. <sup>17</sup>Ime yave quía Tumpa jo urucumegua vae, jocua Tumpa umbaita. Echa'ã Tumpa jo uñeñoño tee Tumpa peguarã. Pe reta co jae Tumpa jo.

<sup>18</sup>Agüiye quía tuyembítavi. Ime yave quía ipia pe uyemingueta iyaracuaa catu co aracuaa ivi pegua re vae, tuicuaa uicuaa cavi'ã co mbae. Jucuarãì uicuaa yave, añetete iyaracuaa catuta co. <sup>19</sup>Echa'ã Tumpa uicuaaca quirãì aracuaa cua ivi pegua mbae'ã co. Echa'ã Tumpa ñnee pe uyecuatía oĩ cuarãì: “Tumpa umiamiri iyaracuaa catu vae reta aracuaa jae reta güinoi vae re.” <sup>20</sup>Jare: “YandeYa uicuaa quirãì iyaracuaa catu vae reta ipiyemingueta mbae'ã co.” Jucuarãì uyecuatía oĩ. <sup>21</sup>Jáeramo agüiye quía tuyembicate cuimbae reta re. Echa'ã Tumpa uyapo opaete mbaembae pembedi vaerã. <sup>22</sup>Echa'ã Tumpa umee peve Pablo jare Apolos jare Cefas pembedi vaerã. Umee vi peve mbaembae ivi pegua piporu vaerã. Jae ramiño vi umee peve tecove pico cavi vaerã, jare pemano yave icavita peve. Opaete añave uyeyapo vae jare opaete uyeyapota vae icavita peve. <sup>23</sup>Jare pe reta co jae Cristo imbae, jare Cristo co jae Tumpa imbae.

#### Uyeyocui reta Tumpa pe Tumpa jei vae rupi

**4** <sup>1</sup>Oreré pepia pe piyemingueta yave, pemandúa cua re: Ore co jae Cristo jembiocui reta. Tumpa uicuaaca oreve jocua tenonde yave uyecuaa mbae vae, ore nduicuaaca vaerã ñru vae reta pe. <sup>2</sup>Jare penti upurumimbaraviqui vae jecuaeño uipota jembiocui uyapo vaerã jei vae. <sup>3</sup>Ërei pe reta cherãa yave ani ñru vae reta cherãa yave, mbae'ã co cheve. Che añeãa'ã vi. <sup>4</sup>Yepe tẽi aicuaa'ã co mbae ayembijeco jese vaerã, cua uipota'ã jei anoĩ'ã co teco. Echa'ã yandeYa co jae cherãa vae. <sup>5</sup>Jáeramo agüiye ñapuruãa añave. Peãro yandeYa ou ye regua. Echa'ã jae güeruta tembipe opaete mbaembae añave uñemi pĩtumimbi pe vae uyecuaa cavi vaerã. Echa'ã yandeYa uicuaacata opaete vae ipiyemingueta. Jayave Tumpa umbiyeroviata penti penti. <sup>6</sup>Cherivi reta, cua moromboe amimbeu ma peve chiye jare Apolos re, piyemboe vaerã cua

pemingueta oreré vae rupi quirái icavi'ã pemptuicha vaerã cuimbae retaño. Pepia pe piyemingueta cuimbae reta re uyecuatía oĩ vae rupiño. Jare agüiye pemptuicha penti vae ñru vae güi. Echa'ã jucuarái piyapo yave, perĩro jocua ñru vae. 7 ¿Quía ra co jei nde icavi ete ñru vae güi? ¿Mbae ra co nenoĩ Tumpa umee'ã ndeve vae? Tumpa co umee ndeve opaete nenoĩ vae. Jáeramo ¿maera pa ndiyembicate? ¿Ndepia pe ndiyemingueta ra Tumpa umee'ã co ndeve?

8 Pe reta piyerovia iyangapii vae reta uyerovia rami. Jare piyembicate icocatu vae reta uyembicate rami. Jae ramiño vi piyembicate mburuvicha reta uyembicate rami, jare pepia pe piyemingueta ndipo jucuarái piyeyapo ore pombori mbae reve. Ërei tome piyeyapo mburuvicha añetete vae retarã, ore vi ndoporoyocui vaerã pe reta ndive. 9 Ore co jae Cristo jemimondo reta. Ërei chepia pe ayemingueta quirái Tumpa oreñoño opaete vae jaicue. Ore co jae jocua cuimbae uyeparavo umano vaerã vae reta rami. Opaete vae umae oreré. Ángel reta umae oreré, jare ivi pegua reta umae oreré. 10 Ore nduyeyocui Cristo pe ramo, ñru vae reta orereni imbiquere vae reta. Ërei pe reta pepia pe piyemingueta pearacuaa catu co Cristo re. Ore co jae ipirãta mbae vae reta rami, jare pe reta co jae ipirãta vae reta rami. Pe reta piyepiua ñru vae reta pe, Ërei ñru vae reta orererĩro. 11 Jecuaeño oriyembaĩ jare oreúe. Jecuaeño uata oreve temimonde. Ñru vae reta orenupa. Mbaeti co orerenta. 12 Jecuaeño orecandi nduparaviqui orepo pe. Ñru vae reta uyepipeyu oreré, Ërei ore nduyerure Tumpa pe uyapo vaerã chupe reta icavi vae. Ñru vae reta uyapo mbaembae icavi mbae vae oreve, Ërei ore orepiaguasu chupe reta. 13 Ñru vae reta iyapu oreré, Ërei ore oremiari cavi chupe reta. Jecuaeño ñru vae reta oremombo ipite güi, ñti jare icavi'ã ma uyeporu vaerã vae uyemombo rami.

14 Aicuatia'ã cuarái pumimaraca vaerã. Pe reta co jae cherivi aau vae reta. Jáeramo cuarái pumbiaracuaa. 15 Echa'ã yepe tẽi jocua pemboe Cristo re vae reta uyepapa diez mil, Ërei jeta'ã co peru. Echa'ã che co jae peru mburugüirovia Cristo Jesús regua re. Echa'ã che amimbeu peve ñee icavi vae. 16 Jáeramo che pumiñera pico vaerã peeche che aico rami.

17 Cua jeco pegua amondo ma peve Timoteo. Jae co cherivi aau vae, jare jae uyeyocui cavi yandeYa pe. Jae pemimanduata co quirái che aico Cristo re, jare quirái cuarái amboe opaete upurugüirovia vae uyembatimbati vae reta opaete que rupi. 18 Ërei amocue pepite pe ñugüiñoĩ vae uyembutuicha, ipia pe uyemingueta tẽi ndarau ma aa pepi ramo. 19 Ërei aata imambaeño pepi, yandeYa uipota yave. Jare aa yave, aicuaata mbae ipuere uyapo jocua uyembutuicha vae reta. Ndarau apirandu mbae ra jei reta. 20 Echa'ã yayeyocui Tumpa pe yave, ñanoi mbaepuere. Yayeminguetaiño'ã. 21 ¿Mbae nunga ra pipota? ¿Pipota ra aa vaerã pepi aiporaraca peve vaerã? Anĩ ¿pipota ra añemimichi reve aicuaaca vaerã peve chepuruau?

### Menda re uyuvanga vae uñeãa

**5** 1 Jeta vae uicuaa quirái penti pepite pe oĩ vae güireco ichi-raanga. Jocua uyuvanga menda re vae mbae pichĩ ete vae uyapo. Echa'ã uicuaa'ã Tumpa vae reta umaeño'ã etei uyapo vaerã jucuarái. 2 Agüiyeta tẽi piyembicate

mbae re. Pemara eteta tēi ma cua re. Pemombota tēi pepite güi jocua cuimbae jucuarāi jeco vae. <sup>3</sup>Echa'ã yepe tēi che aĩ'ã co pepi, ěrei jecuaeño chepia pe ayemingueta peré, jare aãa ma jocua cuimbae jucuarāi jeco vae. Jucuarāi aãata tēi pepi aĩ yave. <sup>4</sup>Piyembati yave pemiadora vaerã yandeYa Jesús, pemandúa quirāi che chepia pe ayemingueta aĩ peré jare quirāi yandeYa Jesús imbaepuere penoita co. <sup>5</sup>Agüiye pemaño jocua cuimbae re uyembati vaerã pe reta ndive. Jucuarāi imarata uyapo vae re, jare jecove uyembiasacata yandeYa ou ye yave.

<sup>6</sup>Icavi'ã co piyembicate pico vaerã. Picuaa co jocua yae vae: “Mboviño levadura umbiyasi opaete masa uñemona vae.” <sup>7-8</sup>Yamijaanga judío reta pascua pe uyapo vae. Echa'ã judío reta omombo mbiyape indechi vae levadura güinoi vae, jare fiesta uyapo yave jou mbiyape ipiau vae levadura güinoi mbae vae. Jae ramiño vi pe reta co jae mbiyape ipiau vae levadura mbaeti güinoi vae rami. Jáeramo agüiye ma yayapo icavi mbae vae yayapose vae. Echa'ã Cristo uyeyucaca yanderé, pascua pe maemimba reta uyeyucaca uñemee vaerã Tumpa pe rami. Jáeramo jecuaeño yayapo icavi vae añete vae rupi.

<sup>9</sup>Che aicutía peve ĩru tupapire, jare joco pe che poyocui agüiye vaerã piñemiĩru aguasa uyapo vae reta ndive. <sup>10</sup>Poyocui'ã etei piyembiyao vaerã opaete cua ivi pegua aguasa uyapo vae reta güi, jare ĩru vae reta imbaembae uipota vae reta güi, jare ĩru vae reta güi imbaembae upiro vae reta güi, jare tumpa-raanga reta umbiadora vae reta güi. Echa'ã jucuarāi piyapo yave, pepuere'tã tēi pico cua ivi pe. <sup>11</sup>Ěrei aicutía co peve agüiye vaerã piñemiĩru penti upurugüirovia vae jei iyupe vae ndive aguasa uyapo yave, ani ĩru vae reta imbaembae uipota yave, ani tumpa-raanga reta umbiadora yave, ani icavi mbae vae japicha reta coti jei yave, ani jecuaeño usavipo yave, ani ĩru vae reta güi imbaembae upiro yave. Agüiye etei pecaru jocua nunga ndive. <sup>12-13</sup>Echa'ã chepuere'ã etei aãa upurugüirovia mbae vae reta. Tumpa uãata co jocua reta. Ěrei pe reta penoi mbaepuere peãa vaerã upurugüirovia vae reta. Jáeramo pembisiri pepite güi cuimbae jocua icavi mbae vae uyapo vae.

### Ñeapo reta

**6** <sup>1</sup>Ime yave quía pepite pe oĩ vae ĩru vae mbae re umbijeco vae, icavi'ã co uñeapo vaerã ĩru vae re upurugüirovia mbae vae reta pe. ¿Maera pa uñeapo'ã jese uñeño tee Tumpa peguarã vae reta pe? <sup>2</sup>¿Picuaa'ã pa uñeño tee Tumpa peguarã vae reta uãata co ivi pegua reta? Jáeramo ¿maera pa pepuere'ã pepuruãa mbaembae yavai'ã ñapuruãa jese vaerã vae re? Echa'ã pe reta peãata ivi pegua reta. <sup>3</sup>Picuaa co quirāi yande ñaãata ángel reta. Jáeramo ¿maera pa pepuere'ã pepuruãa cua ivi pegua teco re? Echa'ã cua mbaembae yavai'ã co ñapuruãa jese vaerã. <sup>4</sup>Jáeramo ime yave quía ĩru vae cua ivi pegua teco re umbijeco vae, agüiye pemaño upurugüirovia mbae vae reta re uãa vaerã. <sup>5</sup>Cuarāi jae pumimaraca vaerã. ¿Mbaeti pa co penti iyaracuaa catu vae pepite pe? ¿Mbaeti pa quía pepite pe penti ñeapo ipuere uyapicatu vae? <sup>6</sup>Echa'ã upurugüirovia vae reta uñeapo iyee upurugüirovia mbae vae reta pe.



7 Ërei jucuarãi piñeapo piyee yave, penti teco tuicha vae co. Agüiye piñeapo piyee, yepe tẽi penti vae uyapo icavi mbae vae ïru vae pe ani penti vae umbitavĩ ïru vae. 8 Pe reta piyapo icavi mbae vae ïru upurugüirovia vae reta pe jare pembĩtavĩ ïru upurugüirovia vae reta.

9 Picuaa co quirãĩ jupi mbae vae reta ndarau ico Tumpa iporoyocua pe. Agüiye piyembĩtavĩ. Aguasa uyapo vae reta, jare tumpa-raanga umbiadora vae reta, jare menda re uyuvanga vae reta, jare cuimbae uyupii uyereco vae reta, 10 jare imonda vae reta, jare ïru vae reta imbaembae uipota vae reta, jare usavĩpo vae reta, jare uyepĩpeyu vae reta, jare ïru vae reta güi imbaembae upĩro vae reta ndarau ico Tumpa iporoyocua pe. 11 Jare jucuarãi piyapose amocue pe reta. Ërei yandeRu Tumpa iEspĩritu oyoe pegüi opaete cua mbaembae icavi mbae vae, jare peñono tee Tumpa peguarã, jare pembujupi. Cuarãĩ uyeyapo peve yandeYa Jesucristo jee re.

### Pembiadora Tumpa perete pe

12 Chepuere ayapo opaete aipota vae. Ërei icavi'ã opaete ayapo vaerã. Añete co, chepuere ayapo opaete aipota vae. Ërei ndarau che amaẽña cherẽ mbae pe. 13 Tembũ yanderie peguarã co, jare yanderie tembũ pegua co. Ërei Tumpa umbaita co mocui reve. Ërei ñanoi'ã yanderete yayapo vaerã aguasa. Ñanoi yanderete yayeyocui vaerã yandeYa pe, jare yandeYa ipuere umee yandevẽ opaete yanderete uipota vae. 14 Jare Tumpa umbijecove ye yandeYa güeru umanocue vae reta ipite güi. Jae ramiño vi umbijecove yeta yanderete güeru umanocue vae reta ipite güi imbaepuere pe.

15 Picuaa co perete co jae Cristo jete pegua. Jáeramo agüiye etei peya cuña iaguasapota vae re. 16 ¿Picuaa'ã pa quirãĩ cuimbae uñemĩru penti cuña iaguasapota vae ndive vae uyeyapo pentiño jae ndive? Echa'ã Tumpa jei cuarãĩ: “Mocui reve uyeyapota penti ramiño.” Jucuarãĩ jei. 17 Ërei jocua uñemĩru yandeYa ndive vae uyeyapo pentiño yandeYa ndive Espĩritu Santo rupi.

18 Agüiye piyapo aguasa. Opaete ïru mbaeyoa piyapo vae piyapo'ã co perete pe. Ërei aguasa piyapo yave, perete coti etei mbaeyoa piyapo. 19 ¿Picuaa'ã pa perete co jae Espĩritu Santo ico pipe vae? Echa'ã Tumpa ombou peve Espĩritu Santo, jare jae ico pepia pe. Jáeramo pe reta pico'ã ma piyupegarã. 20 Echa'ã Tumpa umbĩepi jeta perẽ, peapo vaerã jae imbaerã. Jáeramo pembiadora Tumpa perete pe jare perecove pe. Echa'ã mocui reve Tumpa imbae co.

### Menda regua

**7** 1 Añave aipota aicutia peve jocua mbaembae picuatia cheve jese vae re. Icavi tẽi co cuimbae agüiye vaerã güireco cuña. 2 Ërei agüiye vaerã piyapo aguasa, penti penti cuimbae tugüinoi jembirecoi jare penti penti cuña tugüinoi imei. 3 Cuimbae tuico jembireco ndive, uyupii reta icavi yugüireco vaerã vae rupi. Jae ramiño vi cuña tuico ime ndive, uyupii reta icavi yugüireco vaerã vae rupi. 4 Cuña ipuere'ã uyapo jete pei jae uipota uyapo vae rupi. Echa'ã jete ime imbae co. Jae ramiño vi cuimbae ipuere'ã uyapo jete pei jae uipota uyapo vae



rupi. Jae jete jembireco imbae co. <sup>5</sup>Mocui reve pipota'ã pepoco piyee yave mbovi ara pegua piyerure vaerã Tumpa pe, icaviño jucuarãi piyapo. Ërei agüiye piyeeya ete. Taicue rupi pepoco ye piyee, agüiye vaerã Satanás pe perëgua pepuere'ã ma piyopia yave perete uipota vae güi. <sup>6</sup>Ërei cua che jae peve picuaa vaerã mbae icavi piyapo vaerã. Poyocui'ã co mbae re. <sup>7</sup>Ërei aipota tã opaete cuimbae reta yugüireco vaerã che aico rami. Ërei penti penti güinoi Tumpa umee chupe vae. Jare Tumpa umee penti vae pe vae uyuaví umee ñru vae pe vae güi.

<sup>8</sup>Jáeramo che jae ndeño umenda vae reta pe jare ime umano vae reta pe cua: Icavi tã co agüiye vaerã umenda, che amenda'ã rami. <sup>9</sup>Ërei ipuere'ã yave oyopia jete uipota vae güi, icavi co umenda vaerã. Echa'ã ipuere'ã yave uyapo jete uipota ete uyapo vae, uiporara eteta co. Jáeramo icavi co umenda vaerã.

<sup>10</sup>Jare ayocui umenda vae reta cuarãi - ërei cheño'ã ayocui, echa'ã yandeYa vi oyocui cuarãi: Cuña agüiye tomombo ime. <sup>11</sup>Ërei omombo yave ime, tuico umenda mbae reve, ani tuñatima ye ime pe tuico ye jae ndive. Jare cuimbae agüiye tomombo jembireco.

<sup>12</sup>Ërei ñru reta pe che jae cua - mboroyocui yandeYa umee vae'ã co: Ime yave penti cuimbae upurugüirovia vae jare jembireco upurugüirovia'ã yave, jembireco uipota yave ico jae ndive, agüiye tomombo. <sup>13</sup>Jae ramiño vi ime yave penti cuña upurugüirovia vae jare ime upurugüirovia'ã yave, ime uipota yave ico jae ndive, agüiye tomombo. <sup>14</sup>Echa'ã cuimbae upurugüirovia mbae vae aramoi güiroviata Cristo re jembireco upurugüirovia vae jeco pegua. Jae ramiño vi cuña upurugüirovia mbae vae aramoi güiroviata Cristo re ime upurugüirovia vae jeco pegua. Jare uyemombo reta yave, isambiai reta ndarau ndipo güirovia Cristo re. Ërei uyemombo'ã reta yave, aramoi güiroviata Cristo re. <sup>15</sup>Ërei upurugüirovia mbae vae omombo yave upurugüirovia vae, cua mboroyocui amimbeu peve vae upurugüirovia vae peguar'ã co. Echa'ã Tumpa yandeparavo yaico cavi vaerã yandepiacatu reve. <sup>16</sup>Echa'ã nde, cuña, ndicuaa'ã uyembiasacata ra neme ndereco pegua. Jae ramiño vi nde, cuimbae, ndicuaa'ã uyembiasacata ra nembireco ndereco pegua.

<sup>17</sup>Ërei penti penti jecuaeño tuyapo mbaraviqui yandeYa umee chupe uyapo vaerã vae. Penti penti tuico, Tumpa ueni uyembiasaca vaerã yave ico rami. Jare jucuarãi ayocui opaete upurugüirovia vae uyembatimbati vae reta. <sup>18</sup>Aramoi Tumpa ueni uñemicircuncidaca vae uyembiasaca vaerã. Tupita jucuarãiño. Jae ramiño vi aramoi Tumpa ueni uñemicircuncidaca mbae vae uyembiasaca vaerã. Agüiye tuñemicircuncidaca. <sup>19</sup>Ñañemicircuncidaca yave, mbae'ã co. Jae ramiño vi ñañemicircuncidaca'ã yave, mbae'ã co. Jaeño icavi yayapo vaerã Tumpa iporoyocui reta. <sup>20</sup>Penti penti jecuaeño tuico Tumpa ueni uyembiasaca vaerã yave ico rami. <sup>21</sup>Aramoi Tumpa ueni penti uyeyocui vae uyembiasaca vaerã. Agüiye tipiatiti jocua re. Ërei ipuere yave uyeyora ipatrón güi, icavi co uyapo vaerã. <sup>22</sup>Echa'ã yandeYa ueni yave uyeyocui vae uyembiasaca vaerã, yandeYa oyora ma opaete imbaeyoa güi. Jae ramiño vi yandeYa ueni yave uyeyocui mbae vae uyembiasaca vaerã, jae uyeyapo ma Cristo jembiocuirã. <sup>23</sup>Tumpa umbiëpi

ma perepĩ vaerã. Jáeramo piyeyocui chupe. <sup>24</sup>Cherivi reta, penti penti tuico Tumpa ueni uyembiasaca vaerã yave ico rami. Jucuarãĩ tuyeyocui Tumpa pe.

<sup>25</sup>Añave taicuatía peve ndeiño umenda vae re. Anoi'ã mboroyocui yandeYa güi jesegua. Ërei che tupumbiaracuaa. Jare pepuere chererovia, yandeYa cheparareco ramo. <sup>26</sup>Jáeramo che jae icavi co penti cuimbae oĩ vaerã añave oĩ rami, cua ara reta pe yaiporara ramo. <sup>27</sup>Jocua cuimbae umenda ma vae agüiye tomombo jembireco. Jare jocua cuimbae ndeiño umenda vae, agüiye tueca jembirecorã. <sup>28</sup>Ërei umenda yave, iyoa'ã co. Jae ramiño vi cuñatai umenda yave, iyoa'ã vi co. Ërei yemipia'ã ivi pegua güinoita umenda vae reta, jare che aipota'ã piyemipia'ã vaerã jucuarãĩ.

<sup>29</sup>Ërei che jae peve cua, cherivi reta: Mbaetita ma ima yaico vaerã. Jáeramo mbaeti ma tiempo jembireco güinoi vae reta uyemipia'ã ete vaerã jembireco re. <sup>30</sup>Jae ramiño vi mbaeti ma tiempo ipiatiti vae reta uyao vaerã. Jae ramiño vi mbaeti ma tiempo uyerovia vae reta upuca vaerã. Jae ramiño vi mbaembae ogua vae reta mbaeti ma güinoi tiempo opa vaerã uiporu imbaembae. <sup>31</sup>Jare mbaembae cua ivi pegua uiporu vae agüiye tuipota ete. Echa'ã mbaembae cua ivi pegua opata co.

<sup>32</sup>Ërei aipota'ã mbae pemipia'ã vaerã. Cuimbae umenda mbae vae uyandareco yandeYa iparaviqui re. Echa'ã uipota umbiyerovia yandeYa. <sup>33</sup>Ërei cuimbae umenda vae uyandareco mbaembae ivi pegua re. Echa'ã uipota umbiyerovia jembireco. <sup>34</sup>Jae ramiño vi cuña ime reve vae uyuavi cuñatai ndeiño umenda vae güi. Echa'ã ndeiño umenda vae uyandareco yandeYa iparaviqui re. Echa'ã uipota jete jare jecove uñeño tee vaerã Tumpa peguarã. Ërei umenda vae uyandareco mbaembae ivi pegua re. Echa'ã uipota umbiyerovia ime.

<sup>35</sup>Jare cua che jae peve icavi peve vaerã. Aipota'ã etei poyopia menda güi. Jaeño aipota piyapo vaerã jocua icavi piyapo vaerã vae, pepuere vaerã piyeyocui yandeYa pe piyemipia'ã mbae reve.

<sup>36</sup>Ërei penti cuimbae uicuaa yave uyapo'ã co jupi vae tayi ndeiño umenda vae coti - echa'ã aramoi tayi tairusu'ã ma jare uipota tẽi umenda. Tumaño tayi re umenda vaerã. Jucuarãĩ uyapo yave, iyoa'ã co. <sup>37</sup>Ërei aramoi ïru cuimbae ipia pe ipirãta jare güinoi mbaepuere uyapo vaerã iquirẽi uyapo vae yepe tẽi yavai chupe, jare jae ipia pe uyemingueta cavi tayi re agüiye vaerã umaño jese umenda vaerã. Jucuarãĩ yave, icavi uyapo. <sup>38</sup>Jáeramo cuimbae umaño tayi re umenda vaerã vae icavi uyapo. Ërei cuimbae umaño'ã tayi re umenda vaerã vae icavi ete uyapo.

<sup>39</sup>Mboroyocui jei vae rupi cuña ime pegua co ime ico rambueve. Ërei ime umano yave, cuña ipuere umenda ye jae uipota vae ndive. Ërei tumenda cuimbae yandeYa re güirovia vae ndive. <sup>40</sup>Ërei che jae icavi eteta co chupe umenda'ã ye yave. Jare aicuaa Tumpa iEspíritu chembiaracuaa che jae vaerã cuarãĩ.

### Soo uñemee tumpa-raanga pe vae

**8** <sup>1</sup>Añave taicuatía peve soo uñemee tumpa-raanga pe vae re. Añete co, opaete yaicuaa cua regua. Yaicuaaño yave yayembicate co, ãrei yayerau yave ñañemimirãta co. <sup>2</sup>Ime yave quía ipia pe uyemingueta iyee uicuaa co mbaembae, jae uicuaa'ã viteño mbae uicuaata tãi vae. <sup>3</sup>ãrei ime yave quía uau Tumpa vae, Tumpa uicuaa cua nunga.

<sup>4</sup>Jayave yayemingueta soo uñemee tumpa-raanga pe vae re. Yaicuaa co tumpa-raanga güinoi'ã co tecove. Jare yaicuaa vi Tumpa pentiño co. <sup>5</sup>Ime mbaembae ivi pegua reta umbijee tumpa vae. Cua mbaembae ñugüinoi ivi pe jare ara re. Jeta co jocua tumpa reta, jare jeta vi co ivi pegua iya reta. <sup>6</sup>ãrei yande yaicuaa ime co pentiño Tumpa. Jae co yandeRu. Jae uyapo opaete, jare yande yaico yambiadora vaerã. Ime vi co pentiño yandeYa. Jae co Jesucristo. Jae vi uyapo opaete, jare jae umee yandeve tecove.

<sup>7</sup>ãrei ime amocue cua regua uicuaa mbae vae. Echa'ã jae reta tenonde yave umbiadora tumpa-raanga, jare jecuaeño ipia pe uyemingueta quirãi soo jou vae uñemee co tumpa-raanga pe. Jáeramo jou yave, ipia pe uyemingueta tãi mbae icavi mbae vae co uyapo oĩ. Echa'ã ipirãta'ã ipurugüirovia re. <sup>8</sup>ãrei yau yave, mbae'ã co Tumpa pe. Echa'ã yau yave, Tumpa ndarau jei mbae icavi vae co yayapo. Jare yau'ã yave, Tumpa ndarau jei mbae icavi mbae vae co yayapo. <sup>9</sup>Pepuere peu jocua nunga soo. ãrei piñemoa agüiye vaerã cua piyapo vae rupi jocua ipirãta'ã ipurugüirovia re vae uyapo mbae icavi mbae echa chupe vae. <sup>10</sup>Echa'ã nde ndicuaa cavi co cua regua. ãrei jocua ipirãta'ã ipurugüirovia re vae nderecha yave ndeguapi ñei tumpa-raanga jo pe soo ndeu vaerã, aramoi jae ipia pe uyeminguetata jae vi co ipuere jou soo uñemee tumpa-raanga pe vae. <sup>11</sup>Jáeramo ipirãta'ã ipurugüirovia re vae opiata ndipo nde ndicuaa ndiyupe vae jeco pegua. ãrei jese vi co Cristo umano. <sup>12</sup>Jáeramo jucuarãi peyoya yave ñru upurugüirovia vae ipurugüirovia re ipirãta'ã vae coti, Cristo coti peyoya vi co. Echa'ã jocua ñru upurugüirovia vae uyapo mbae ipia pe uyemingueta tãi icavi'ã uyapo vaerã vae. <sup>13</sup>Jáeramo ñru upurugüirovia vae iyoa yave che jau vae jeco pegua, ndarau ye jau soo, agüiye vaerã ñru upurugüirovia vae iyoa ayapo vae jeco pegua.

### Temimondo ipuere uyapo vae

**9** <sup>1</sup>Che vi chepuere ayapo che aipota vae rupi. Echa'ã che co jae penti temimondo. Che aecha yandeYa Jesús. Jare pe reta perovia yandeYa re che aparaviqui chupe ramo. <sup>2</sup>Aramoi ñru vae reta jei'ã che co jae penti temimondo. ãrei pe reta picuaa cavi che co jae penti temimondo. Echa'ã pe reta perovia yandeYa re, jare cua uicuaaca che co jae penti temimondo.

<sup>3</sup>Cua co che jae ñnera cheré vae reta pe: <sup>4</sup>Orepuere co ndou ipotave tembú. <sup>5</sup>Nduipotava yave, ore vi orepuere numenda cuña upurugüirovia vae ndive jare ndugüiraa orerupíe, ñru temimondo reta jare yandeYa tivi reta jare Pedro uyapo

rami. <sup>6</sup>Aramoi pepia pe piyemingueta tēi jaeño Bernabé jare che orepuere'ã nduico nduparaviqui mbae reve. <sup>7</sup>Ime yave quía oo uñerãro vaerã vae, omondo vae umbiepi co chupe. Uva oñoti vae jou co uva iacue. Jae ramiño vi ovecha reta re uyandareco vae jou co ovecha ineche. <sup>8</sup>Cua mbaembae che jae ivi pegua reta jei rami. Ërei jucuarãi vi jei mboroyocui. <sup>9</sup>Echa'ã Moisés iporoyocui pe uyecuatía oĩ cuarãi: “Güeye trigo umbipiriri oĩ yave, agüiye iyuruyocua.” Jucuarãi uyecuatía oĩ. Ërei Tumpa cua jei yave, jei'ã co güeye reta reño. <sup>10</sup>Jei vi oreré. Echa'ã ore co jae co pe uparaviqui vae reta rami. Umaeti vae jare trigo umbipiriri vae uãro pãve uyerovia reve. Echa'ã mocui reve uipota ucaru iparaviqui güi. <sup>11</sup>Ore co jae umaeti vae rami. Echa'ã numimbeu peve mbaembae Espíritu pegua. Jae ramiño vi ore co jae umbaeviro vae rami. Echa'ã yavaita'ã tēi peve ore nonoi vaerã mbaembae ivi pegua jocua penoi vae güi. <sup>12</sup>Ïru vae reta ipuere yave güinoi mbaembae pegüi, orepuere eteta tēi chugüi reta. Ërei yepe tēi orepuere nonoi mbaembae pegüi, ãrei nduyere'ã peve jese. Opaete numiaguanta, agüiye vaerã numbiavai ñee icavi vae Cristo regua. <sup>13</sup>¿Picuaa'ã pa quirãi Tumpa jo pe uparaviqui vae reta jou tembú Tumpa jo pegua? Echa'ã maemimba uyeyucacue Tumpa pe uñemearendã pe vae uparaviqui vae reta jou maemimba uyeyucacue isoo. <sup>14</sup>Jae ramiño vi yandeYa oyocui ïru vae reta umbiepi vaerã ñee icavi vae umimbeu vae reta pe. <sup>15</sup>Ërei che aipota'ã etei ïru vae reta umbiepi vaerã cheve. Aicuatia'ã vi cua mbaembae peve, pe reta pemiepi vaerã cheve. Ayerovia cua chepuere jae peve vae re. Icavi ete co amano vaerã pe reta pemiepi cheve vaerãve.

<sup>16</sup>Yepe tēi amimbeu ñee icavi vae, ãrei ayembicate'ã etei. Echa'ã yandeYa cheocui amimbeu vaerã. Amimbeu'ã yave ñee icavi vae, aramoi mbae icavi mbae vae uyeyapota cheve. <sup>17</sup>Echa'ã che ayapo yave cua mbaraviqui che etei aipota ramo, icavita tēi ïru vae reta umbiepi vaerã cheve. Ërei ayapo cua mbaraviqui, yandeYa cheocui ayapo vaerã ramo. Jáeramo ñee icavi vae amimbeu yave, ayeyocui ai Tumpa pe. <sup>18</sup>Ayerovia ete quirãi amimbeu ñee icavi vae acovara mbae reve. Jare Tumpa umbiepi cheve cua yerovia anoi vae pe. Echa'ã yepe tēi amimbeu ñee icavi vae, jare yepe tēi icavi co ïru vae reta umbiepi vaerã ñee icavi vae umimbeu vae pe, ãrei che aipota'ã ïru vae reta umbiepi vaerã cheve.

<sup>19</sup>Jáeramo ïru vae reta ipuere'ã cheocui mbae ayapo vaerã. Ërei ayeyapo ma opaete vae jembiocuirã, jeta vae güirovia vaerã Cristo re chereco pegua. <sup>20</sup>Judío reta ndive aico yave, che aico vi penti judío ico rami, judío reta güirovia vaerã Cristo re chereco pegua. Mboroyocui jei vae uyapo vae reta ndive aico yave, che aico vi penti mboroyocui jei vae uyapo vae ico rami, jae reta vi güirovia vaerã Cristo re chereco pegua. Cuarãi ayapo, yepe tēi añave aico'ã ma mboroyocui jei vae re. <sup>21</sup>Moisés iporoyocui güinoi'ã vae reta ndive aico yave, che aico vi penti Moisés iporoyocui güinoi'ã vae ico rami, jae reta vi güirovia vaerã Cristo re chereco pegua. Cua uipota'ã jei aico'ã ma Tumpa iporoyocui re. Echa'ã che aico Cristo iporoyocui re. <sup>22</sup>Ipirãta'ã ipurugüirovia re vae reta ndive aico yave, che aico vi penti ipirãta'ã ipurugüirovia re vae ico rami, jae reta vi güirovia vaerã

Cristo re chereco pegua. Jecuaño ayemboyovaque penti penti ndive, amocue vae uyembiasaca vaerã chereco pegua. <sup>23</sup>Jare opaete cua ayapo ñru vae reta güirovia vaerã ñee icavi vae, jae reta uñemïru vaerã che ndive.

<sup>24</sup>Pe reta picuaa co quirã amocue vae uñeñocui yave, opaete jae reta osi, ãrei pentiño upurumiamiri jare güinoi upurumiamiri vae pe uñemee vae. Pico penoi vaerã upurumiamiri vae pe uñemeeta vae. <sup>25</sup>Jare penti penti uipota upurumiamiri vae uyecuacu opaete mbaembae icaviã chupe vae güi. Jare jae reta jucuarã uyapo güinoi vaerã upurumiamiri vae pe uñemee vae imambae icumegua vae. Ërei yande yaipota ñanoi mbae jaño mai pegua icota vae. <sup>26</sup>Jáeramo che aico penti uñeñocui vae simi osi vae rami, mbaeti osiño vae rami. Che aico penti uñerãro vae uipota upurumiamiri vae rami. <sup>27</sup>Echa'ã aiporaraca cherete pe, uyapo vaerã che aipota uyapo vaerã vae, agüiye vaerã che etei anoïã upurumiamiri vae pe uñemeeta vae, yepe tã amimbeu ñru vae reta pe.

### Tumpa-raanga regua

**10** <sup>1</sup>Jare aipota picuaa cavi vaerã, cherivi reta, quirã opaete Israel pegua reta yugüiraa jocua amapïtu igüi pe, jare opaete jae reta uasa i guasu. <sup>2</sup>Jare opaete vae uyeyapo pentiño Moisés ndive amapïtu igüi pe yugüiraa yave jare i guasu uasa reta yave. <sup>3</sup>Jare opaete vae jou tembïu Espïritu Santo umee chupe reta vae. <sup>4</sup>Jare opaete vae jou i Espïritu Santo umee chupe reta vae. Jare opaete vae jou jocua ita Espïritu pegua jae reta jupïe oo vae güi. Jare jocua ita Cristo co. <sup>5</sup>Ërei Tumpa pochï jeta vae pe. Jáeramo opa uyucaca ueya ñana pe.

<sup>6</sup>Jare Tumpa uechaca yandevae cua mbaembae uyeyapo chupe reta vae, agüiye vaerã yande yaipota mbaembae icavi mbae vae jae reta uipota vae rami. <sup>7</sup>Jáeramo agüiye pemiadora tumpa-raanga, amocue jae reta umbiadora tumpa-raanga rami. Echa'ã Tumpa iñee pe uyecuatïa oï cuarã: “Jae reta uguapi ucaru vaerã. Jayave upüa reta upirae vaerã.” Jucuarã uyecuatïa oï. <sup>8</sup>Agüiye vi yayapo aguasa, amocue jae reta uyapo rami. Jare jucuarã uyapo ramo, umano veintitrés mil jocua ara. <sup>9</sup>Agüiye vi yayapo icavi mbae vae yaicuaa vaerã tuicha ra yandeYa ipiaguasu. Echa'ã jucuarã uyapo amocue jae reta, jare uyucaca reta mboi reta pe. <sup>10</sup>Agüiye vi piñeenguru yandeYa coti. Echa'ã jucuarã uyapo amocue jae reta, jare Tumpa uyucaca penti ángel pe.

<sup>11</sup>Ërei Tumpa uechaca opaete cua mbaembae uyeyapo chupe reta vae, jare uyecuatïa oï yanembiaracuaa vaerã. Echa'ã yande yaico ara taicuegua vae reta pe. <sup>12</sup>Jáeramo ipia pe uyemingueta ipirãta co ipurugüirovia re vae tuñemoa ngatu agüiye vaerã iyoa. <sup>13</sup>Jecuaño aña guasu pepiãro uyavica peve vaerã. Echa'ã jucuarã uyapo opaete vae pe. Ërei jecuaño pepuere perovia catu Tumpa pembali vaerã. Echa'ã Tumpa ndarau umaño perëgua ete vaerã aña guasu pe. Echa'ã aña guasu pepiãro yave, Tumpa uicuaacata peve quirã pepuere piyapo agüiye vaerã peyoa, jare jucuarã pepuereta pemiãmiri aña guasu.

<sup>14</sup>Jáeramo, cherivi reta, agüiye pemiadora tumpa-raanga. <sup>15</sup>Che jae cua peve, jare chepia pe ayemingueta pe reta co jae iyaracuaa vae reta.

Pe reta etei pepuere picuaa añete ra cua che jae peve vae. <sup>16</sup>Ñamee yasurupai yandeYa pe jocua vino re. Vino uyemijaanga icavi vae yandeYa uyapo yandeve vae re. Jucuarãi yayapo yave, yaicuaaca quirãi yande ñaĩ pentiño Cristo ndive Cristo jugüi uyepeyere vae jeco pegua. Jae ramiño vi ñapisãa yave mbiyape, yaicuaaca quirãi yande ñaĩ pentiño Cristo ndive Cristo jete umano vae jeco pegua. <sup>17</sup>Echa'ã yepe tẽi yande co jeta vae, ãrei yande co jae Cristo jete pegua reta. Jáeramo yande ñaĩ penti rami. Echa'ã mbiyape pentiño co, jare opaete vae yau jocua mbiyape.

<sup>18</sup>Yamijaanga Israel pegua reta. Jae reta jou maemimba uyeyucacue Tumpa pe uñemee vae isoo, jare jucuarãi uicuaaca quirãi jae reta uñemiĩru Tumpa ndive jocua maemimba uyeyucacue vae jeco pegua. <sup>19</sup>Aipota'ã etei jae penti tumpa-raanga co jae penti tumpa añetete vae. Aipota'ã vi jae soo tumpa-raanga pe uñemee vae ĩru soo rami'ã co. <sup>20</sup>Ërei che jae peve cua: Jocua reta umee maemimba uyeyucacue vae isoo añã reta pe. Umee'ã Tumpa pe. Jare aipota'ã piñemiĩru vaerã añã reta ndive. <sup>21</sup>icavi'ã etei peu vaerã vino uyemijaanga yandeYa jugüi re vae vino añã reta pe uñemee vae ndive. Jae ramiño vi icavi'ã etei peu vaerã mbiyape uyemijaanga yandeYa jete re vae soo añã reta pe uñemee vae ndive. <sup>22</sup>Agüiye ñamiñemiro yandeYa añã reta pe. YandeYa ipuere ete co yandegüi.

### Opaete mbae piyapo vae rupi pemiadora Tumpa

<sup>23</sup>Chepuere ayapo opaete aipota vae. Ërei icavi'ã opaete ayapo vaerã. Añete co, chepuere ayapo opaete aipota vae. Ërei opaete'ã yanembori ñanepirãta vaerã. <sup>24</sup>Agüiye quãa tuyapo jae uipota uyapo vaẽño. Penti penti tuiyapota tombori ĩru vae reta.

<sup>25</sup>Pepuere peu ipotave soo mercado pe uñemee vae. Agüiye pepirandu uñemee ra tumpa-raanga pe. Echa'ã picuaa yave, aramoi pepia pe piyemingueta jupi'ã co peu vaerã. <sup>26</sup>Echa'ã cua ivi jare opaete ivi pegua co jae yandeYa imbae.

<sup>27</sup>Penti upurugüirovia mbae vae uparea yave peve pecaru vaerã jae ndive, pipota yave peo, peu ipotave umee peve peu vaerã vae. Agüiye pepirandu uñemee ra soo tumpa-raanga pe. Echa'ã picuaa yave, aramoi pepia pe piyemingueta jupi'ã co peu vaerã. <sup>28</sup>Ërei aramoi uparea peve vae jeita peve: “Uyuca reta cua maemimba umee vaerã tumpa-raanga pe.” Jucuarãi jei peve yave, agüiye peu umimbeu peve vae jeco pegua. Echa'ã aramoi jae ipia pe uyemingueta jupi'ã co peu vaerã. <sup>29</sup>Añave chemiari añ ĩru vae ipia pe uyemingueta jese vae re, pe reta pepia pe piyemingueta'ã jese vae re. Ërei aramoi pepia pe piyemingueta cuarãi: “Ërei ¿maera pa ndere cheve chepuere'ã co jau soo ĩru vae ipia pe uyemingueta jese vae jeco pegua? <sup>30</sup>Echa'ã jecuaẽño che amee yasurupai Tumpa pe cherembüi re. Jáeramo ¿maera pa chembijeco jese? Echa'ã amee yasurupai Tumpa pe jese.” Jucuarãi ndipo pepia pe piyemingueta. <sup>31</sup>Ërei che jae peve cua: Jecuaẽño pemiadora Tumpa. Opaete mbaembae peu vae rupi jare opaete mbaembae

piyapo vae rupi pemiadora Tumpa. <sup>32</sup>Agüiye piyapo icavi mbae echa ñru vae reta pe vae - judío reta pe, jare judío mbae vae reta pe, jare Tumpa uiparavo vae reta pe. Echa'ã piyapo yave, aramoi pemiavaita. <sup>33</sup>Jucuarãño vi che ayapo opaete mbaembae icavi echa opaete ñru vae reta pe vae. Aico'ã che ayembiyerovia vaeraño. Jaëño aipota ambori jeta ñru vae reta, jae reta uyembiasaca vaerã.

**11** <sup>1</sup>Pico che aico rami. Echa'ã jecuaëño che aico Cristo uipota aico vaerã rami.

### Cuña reta jemimonde

<sup>2</sup>Jare ayerovia peré, cherivi reta, quirã jecuaëño pemandúa cheré, jare jecuaëño piyapo che amimbeu peve rami. <sup>3</sup>Ërei aipota picuaa vaerã cua: Cuimbae reta uyeyocui Cristo pe, jare cuña reta uyeyocui ime pe, jare Cristo uyeyocui Tumpa pe. <sup>4</sup>Penti cuimbae uyerure Tumpa pe yave ani umimbeu Tumpa ñnee ñru vae reta pe yave, uñeãcasoi reve, penti ñemimaraca co. <sup>5</sup>Ërei penti cuña uyerure Tumpa pe yave ani umimbeu Tumpa ñnee ñru vae reta pe yave, uñeãcasoi mbae reve, penti ñemimaraca vi co. Echa'ã jae oyovaque cuña opaete ññaca uñeãpi vae ndive. <sup>6</sup>Cuña uñeãcasoi mbae vae tuñeãpi ía. Echa'ã penti ñemimaraca co cuña ía chutu ete yave ani opaete ññaca uñeãpi yave. Jáeramo cuña tuñeãcasoi. <sup>7</sup>Añete co, icavi'ã cuimbae uñeãcasoi vaerã. Echa'ã cuimbae uyemijaanga Tumpa re jare Tumpa yaruanda vae re. Ërei cuña uyemijaanga cuimbae yaruanda vae re. <sup>8</sup>Echa'ã Tumpa uyapo'ã cuimbae cuña güi. Uyapo cuña cuimbae güi. <sup>9</sup>Jae ramiño vi Tumpa uyapo'ã cuimbae cuña iñurã. Uyapo cuña cuimbae iñurã. <sup>10</sup>Jáeramo icavi co cuña uñeãcasoi vaerã uicuaaca vaerã uyeyocui co cuimbae pe, jare ángel reta uecha vaerã. <sup>11</sup>Ërei cuimbae ipuere'ã ico cuña mbae reve. Jae ramiño vi cuña ipuere'ã ico cuimbae mbae reve. YandeYa uyapo reta yugüireco vaerã penti rami. <sup>12</sup>Añete co, Tumpa uyapo cuña cuimbae güi. Ërei cuimbae oa cuña güi. Jare Tumpa uyapo opaete.

<sup>13</sup>Tapirandu peve cua re: ¿Icavi ra cuña uyerure vaerã Tumpa pe uñeãcasoi mbae reve? <sup>14</sup>Opaete vae yaicuaa quirã penti cuimbae iavucu yave, penti ñemimaraca co. <sup>15</sup>Ërei penti cuña iavucu yave, iyaruandaca co. Echa'ã Tumpa umee cuña pe ía ññaca uyasoi vaerã. <sup>16</sup>Ërei ime yave quía uipota uyeaca cua re vae, tuicuaa quirã ore nduyemboe jucuarã. Jae ramiño vi upurugüirovia vae opaete que rupi uyembatimbatí umbiadora vaerã Tumpa vae reta jucuarã vi uyemboe.

### Icavi mbae uyapo vae, yandeYa re imandúa yave

<sup>17</sup>Ërei chepuere'ã ayerovia peré añave aicuatia peve jese vae re. Echa'ã piyembati yave, piyapo icavi mbae vae, icavi vae piyapo vaerãve. <sup>18</sup>Cua rani tae peve: Jerãcua cheve quirã piyembiyao piyugüi, piyembati yave pemiadora vaerã Tumpa. Jare chepia pe ayemingueta aramoi añete co. <sup>19</sup>Echa'ã imeta co yembiyao reta pepite pe, añetete upurugüirovia vae reta uyecuaa vaerã pepite pe. <sup>20</sup>Jáeramo piyembati yave pemandúa vaerã yandeYa re, añetete'ã co pemandúa



yandeYa re tembúu peu yave. <sup>21</sup>Echa'ã amocue pe reta pembipi peu tembúu peru vae ndei ñru reta yugüeru mbove. Jáeramo penti vae iyembai, jare ñru vae usavipo. <sup>22</sup>Pipota yave pecaru cavi, pepuere pecaru perenta pei. Agüiye perño ñru Tumpa uiparavo vae reta. Agüiye pemimaraca mbaeti mbae güinoi vae reta. ¿Mbae ra jaeta peve? ¿Ayeroviata ra peré cua jeco pegua? Ndarau etei co.

**Pablo oporomboe quirái yanemandúa vaerã yandeYa re**

(Mt 26.26-29; Mr 14.22-25; Lc 22.14-20)

<sup>23</sup>Echa'ã yandeYa umimbeu cheve che amimbeu-yuapi ye peve vae. Jae co cua: YandeYa uipisi mbiyape jocua piare uñemeeta umano vaerã yave. <sup>24</sup>Jayave yasurupai Tumpa pe umee yave, upisãa mbiyape jare jei: “Pipisi peu. Cua co jae cherete peré ameeta vae. Peu cua, pemandúa vaerã cheré.” Jucuarái jei. <sup>25</sup>Jae ramiño vi yandeYa uipisi copa opa ma ucaru reta yave, jare jei: “Cua vino co jae Tumpa jei piau ye vae cherugüi pe ayapota vae. Peu ñave ñave, pemandúa cheré.” Jucuarái jei. <sup>26</sup>Echa'ã mbiyape jare vino peu ñave ñave, picuacata quirái yandeYa umano co, jare jucuarái piyapota yandeYa ou ye regua.

<sup>27</sup>Jáeramo ime yave quía jou mbiyape jare vino yanemimandúa yandeYa re vae cua icavi mbae vae uyapo reve vae, iyoa co yandeYa jete jare jugüi coti. <sup>28</sup>Ñerei penti penti tuñeãa ipia pe. Jayave tou jocua mbiyape jare jocua vino. <sup>29</sup>Echa'ã ime yave quía jou mbiyape jare vino cua icavi mbae vae uyapo reve vae, uyembijeco jou ramo. Echa'ã uyandareco'ã yandeYa jete re. <sup>30</sup>Cua jeco pegua jeta pepite pe ñugüinoi vae reta imbaerasi jare ipitu mbaerasi jeco pegua, jare jeta ma umano. <sup>31</sup>Echa'ã ñañeãa yave, yandeYa ndarau uiporaraca yandeve. <sup>32</sup>Ñerei yaiporara yandeYa ñanenupa ramo, icavi vaerã yandeve, agüiye vaerã yayembijeco upurugüirovia mbae vae reta ndive.

<sup>33</sup>Jáeramo, cherivi reta, piyembati yave pecaru vaerã, piñeraãro rani. <sup>34</sup>Jare ime yave quía iyembai vae, tucaru rani jenta pe, agüiye vaerã yandeYa uiporaraca peve, piyembati yave. Jare opaete ñru mbaembae ayapicatuta aa pepi yave.

**Mbaepuere reta Espiritu Santo umee vae**

**12** <sup>1</sup>Añave, cherivi reta, aipota amimbeu peve mbaepuere reta Espiritu Santo umee vae regua. Aipota'ã pico vaerã picuaa mbae reve.

<sup>2</sup>Picuaa cavi quirái ndei perovia yandeYa re mbove, pemiadorase tumpa-raanga reta, piyemboe jese rami, yepe tẽi tumpa-raanga reta ñnee'ã etei. <sup>3</sup>Jáeramo aipota picuaa vaerã cua: Tumpa iEspiritu rupi piyemingueta yave, ndarau piyepipeyu Jesús re. Jare jaeno Espiritu Santo rupi ipuere quía jei: “Jesús co jae cheYa.”

<sup>4</sup>Jare mbaepuere Espiritu Santo umee vae reta uyuavi, ñerei Espiritu Santo pentiño co. <sup>5</sup>Jare jocua mbaraviqui yayapo yayeyocui vaerã yandeYa pe vae reta uyuavi, ñerei yandeYa pentiño co. <sup>6</sup>Jare yepe tẽi mbaraviqui yayapo vae reta uyuavi, Tumpa pentiño co, jare Tumpa umbupuere opaete vae opaete mbaraviqui reta uyapo vaerã. <sup>7</sup>Ñerei Espiritu Santo umee mbaepuere penti penti pe, penti



penti ipuere vaerã ombori ïru vae reta. <sup>8</sup>Echa'ã Espïritu Santo umee penti vae pe uyemingueta vaerã iyaracuaa catu reve. Jare jae etei umee ïru vae pe uyemingueta vaerã uicuaa cavi reve. <sup>9</sup>Jare Espïritu Santo umee ïru vae pe mburugiïrovia. Jare jae etei umee ïru vae pe umbigüera vaerã imbaerasi vae reta. <sup>10</sup>Umee ïru vae pe uyapo vaerã miacañi reta, jare ïru vae pe umimbeu vaerã Tumpa ñee. Umee ïru vae pe uicuaa vaerã ou ra penti ñee Espïritu Santo güi ani ambie coti güi. Umee ïru vae pe uyemingueta vaerã ambiembie vae ñee reta pe, jare ïru vae pe umimbeu vaerã mbae uipota jei ambiembie vae ñee reta pe uyendu vae. <sup>11</sup>Ërei pentiño co Espïritu Santo opaete cua mbaepuere reta güinoi vae reta umbupuere vae. Jare jae umee mbaepuere uyuavi vae reta jae uipota vae rupi.

### Cristo jete pegua reta pentiño co

<sup>12</sup>Echa'ã pentiño co yanderete. Ërei yanderete pe ñanoi yandepi jare yandepo jare yandeapisa jare yanderesa jare jeta ïru ïru vae. Jare opaete yanderete pegua reta uyapo pentiño yanderete, yepe tõi jeta uyuavi vae co. Jae ramiño vi Cristo jete pegua reta pentiño co. <sup>13</sup>Echa'ã pentiño co Espïritu Santo jare jae yanembibautiza opaete, Cristo jete yayeyapo vaerã. Pentiño vi co Cristo jete. Jucuarãi Espïritu Santo uyapo judío reta jare judío mbae vae reta pe. Jae ramiño vi jae uyapo uyeyocui vae reta jare uyeyocui mbae vae reta pe. Jare pentiño co Espïritu Santo cua uyapo yandeve vae.

<sup>14</sup>Ime jeta yanderete pegua reta, pentiño'a co. <sup>15</sup>Aramoi yandepi jeita: “Che ipo'ã co. Jáeramo che jete pegua'ã co.” Ërei yepe tõi jucuarãi jeita, ërei yanderete pegua co. <sup>16</sup>Jae ramiño vi aramoi yandeapisa jeita: “Che jesa'ã co. Jáeramo che jete pegua'ã co.” Ërei yepe tõi jucuarãi jeita, ërei yanderete pegua co. <sup>17</sup>Opaete yanderete yanderesa catuii yave, ndarau tõi yandepuere mbae yayandu. Jae ramiño vi opaete yanderete yandeapisa catuii yave, ndarau tõi yandepuere mbae ñaetu. <sup>18</sup>Ërei Tumpa oñono penti penti yanderete pegua reta yanderete pe jae uipota vae rupi. <sup>19</sup>Jare ime yave pentiño yanderete pegua, ndarau tõi yanderete. <sup>20</sup>Ërei ime co jeta yanderete pegua reta, ërei pentiño co yanderete.

<sup>21</sup>Jare yanderesa ipuere'ã jei yandepo pe: “Che aipota'ã nde chembori vaerã.” Jae ramiño vi ñaneãca ipuere'ã jei yandepi pe: “Che aipota'ã nde chembori vaerã.” <sup>22</sup>Añete, jucuarãi'ã co. Echa'ã yanderete pegua reta iparaviqui'ã echa vae uparaviqui ete co. <sup>23</sup>Jare yanderete pegua reta icavi'ã echa yandeve vae ñamopõra. Jae ramiño vi yanderete pegua reta ñanemara jese vae yamiemonde cavi.

<sup>24</sup>Ërei yanderete pegua reta icavi tõi yandeve vae ñamopõra'ã. Ërei Tumpa umbiyuapiyuapi opaete yanderete pegua reta, jare uipiuca jocua yanderete pegua yande yaipiu'ã vae reta. <sup>25</sup>Jucuarãi uyapo, agüiye vaerã yanderete pegua reta uyembiyao uyugüi, opaete yanderete pegua reta uyandareco cavi vaerã iyee. <sup>26</sup>Jare penti yanderete pegua uiporara yave, opaete yanderete pegua reta uiporara pãve. Jae ramiño vi penti yanderete pegua uyepiuca yave, opaete yanderete pegua reta uyerovia pãve.

<sup>27</sup>Jare pe reta co jae Cristo jete, jare penti penti co jae Cristo jete pegua. <sup>28</sup>Jare Tumpa oñono amocue vae upurugüirovia vae reta ipite pe temimondo retarã yugüireco vaerã. Oñono vi ñru vae reta Tumpa ñnee umimbeu vaerã. Oñono vi ñru vae reta omboc vaerã upurugüirovia vae reta. Oñono vi ñru vae reta uyapo vaerã miacañi reta, jare ñru vae reta umbigüera vaerã imbaerasi vae reta, jare ñru vae reta ombori vaerã ñru upurugüirovia vae reta, jare ñru vae reta ipuere vaerã oyocui ñru upurugüirovia vae reta, jare ñru vae reta uyemingueta vaerã ambiembie vae ñnee reta pe. <sup>29</sup>Opaete'ã co temimondo reta vae. Opaete'ã vi co Tumpa ñnee umimbeu vae reta. Opaete'ã vi co upurugüirovia vae reta omboc vae reta. Opaete'ã vi co miacañi reta uyapo vae reta. <sup>30</sup>Opaete'ã vi co imbaerasi vae reta umbigüera vae reta. Opaete'ã vi co ambiembie vae ñnee reta pe uyemingueta vae reta. Opaete'ã vi co mbae uipota jei ambiembie vae ñnee reta pe uyendu vae umimbeu vae reta. <sup>31</sup>Ërei pipota ete penoi vaerã mbaepuere icavi ete ñru reta güi vae reta. Ërei amimbeuta peve mbae icavi ete cua mbaembae reta güi vae.

### Mburuau icavi ete

**13** <sup>1</sup>Aramoi chepuere ayemingueta ambiembie vae ñnee reta pe jare ángel reta ñnee pe. Ërei apuruau'ã yave, che jae vae mbae'ã co, jare ayeyapo campana ipu rami ani temimbi ñnee rami. <sup>2</sup>Jare aramoi ime anoi mbaepuere Tumpa ñnee amimbeu cavi vaerã. Jare aramoi aicuaa mbaembae ñru vae reta pe uyecuaa mbae vae jare mbaembae ñru vae reta uicuaa mbae vae. Jare aramoi ime anoi mburugüirovia tuicha ete vae chepuere vaerã ambisiri ivitu guasu reta. Ërei apuruau'ã yave, che mbae'ã co. <sup>3</sup>Jare aramoi ameeta opaete chembaembae amingararu vaerã iparavete vae reta. Jare aramoi ameeta cherete etei amano vaerã tata pe. Ërei apuruau'ã yave, mbae'ã co cheve.

<sup>4</sup>Yapuruau yave, yandepiaguasu jare yandepiacavi ñru vae reta pe. Yapuruau yave, yaipota'ã ñru vae reta imbaembae, yayemitenonde'ã, yayembicate'ã, <sup>5</sup>yayapo'ã icavi mbae vae, yaipota'ã mbae yandeyupeguarãño, yandearasi'ã, yanemandua'ã icavi mbae vae ñru vae reta uyapo yandeve vae re, <sup>6</sup>yayerovia'ã ñru vae reta iyoa yave, Ërei yayerovia añete vae re. <sup>7</sup>Yapuruau yave, ñamiaguanta opaete yapurugüirovia reve, jare ñaãro yandepiaguasu reve.

<sup>8</sup>Mburuau ndarau etei opa. Ërei mbaepuere Tumpa ñnee umimbeu vaerã ñanoi vae opata co. Jae ramiño vi mbaepuere ambiembie vae ñnee reta pe yayemingueta vaerã ñanoi vae opata co. Jare mbaepuere mbaembae yaicuaa vaerã ñanoi vae opata co. <sup>9</sup>Echa'ã mboviño co jocua yaicuaa vae, jare Tumpa ñnee yamimbeu yave mboviño vi co jocua yamimbeu vae. <sup>10</sup>Ërei opaete uyecuaa yave, jocua mboviño vae opata co.

<sup>11</sup>Che chemichi yave, ayemingueta penti sambiai uyemingueta rami, jare aicuaa penti sambiai uicuaa rami, jare chepia pe ayemingueta penti sambiai ipia pe uyemingueta rami. Ërei acuacuaa ma yave, ayapo'ã ma penti sambiai uyapo rami. <sup>12</sup>Namae yave yandero va re espejo pe, yayeecha cavi'ã. Jucuarãño vi añave yaicuaa cavi'ã mbaembae regua. Ërei ñamae yave

ĩru vae re coiño güi, yaecha cavi. Jucuarãiño vi penti ara yaicuaa cavita mbaembae regua. Echa'ã añave mboviño aicuaa. Ërei jocua ara aicuaata opaete, Tumpa checuaa rami. <sup>13</sup>Ërei jecuae yapurugüiroviata, jare ñaãrota yayerovia reve, jare yapuruauta. Ërei mburuau icavi ete cua ĩru mocui güi.

### Ambiembie vae iñee reta

**14** <sup>1</sup>Jecuaño pepuruau. Jare penoi quirëi pipota vaerã mbaepuere Espiritu Santo umee vae reta. Ërei pemitenonde mbaepuere Tumpa iñee pepuere pemimbeu vaerã. <sup>2</sup>Echa'ã ambiembie vae iñee reta pe uyemingueta vae uyemingueta Tumpa pe, ĩru vae reta pe'ã. Echa'ã quía uicuaa'ã mbae jei vae. Jae uyemingueta Espiritu Santo rupi uyecuaa mbae vae re. <sup>3</sup>Ërei Tumpa iñee umimbeu vae uyemingueta ĩru vae reta pe, umimirãta jare umbiaracuaa jare umbipiacatu vaerã. <sup>4</sup>Ambie vae iñee pe uyemingueta vae jaeño uñemimirãta. Ërei Tumpa iñee umimbeu vae umimirãta ĩru upurugüirovia vae reta.

<sup>5</sup>Che aipota opaete pe reta piyemingueta vaerã ambiembie vae iñee reta pe. Ërei aipota ete pemimbeu vaerã Tumpa iñee. Echa'ã Tumpa iñee umimbeu vae uyeyocui ete ĩru upurugüirovia vae reta pe ambiembie vae iñee reta pe uyemingueta vae güi. Ërei ambiembie vae iñee reta pe uyemingueta vae umimbeu yave mbae uipota jei ambiembie vae iñee reta pe uyandu vae, uyeyocui vi ĩru upurugüirovia vae reta pe. Echa'ã umimbeu yave, umimirãta ĩru upurugüirovia vae reta. <sup>6</sup>Jáeramo, cherivi reta, che aa yave pepi, jare ayemingueta yave ambiembie vae iñee reta pe, ndarau etei mbae icavi vae ayapo peve, aicuaaca'ã peve yave Tumpa uicuaaca cheve vae, ani amimbeu peve mbae aicuaa vae, ani Tumpa iñee, ani pomboe mbae re.

<sup>7</sup>Yamijaanga mbaembae tecove güinoi mbae vae ipu vae. Temimbi ñamiñee yave ani miori yambopu yave, yambopu cavi'ã yave, ndarau quía uicuaa mbae nunga canta ra ipu oĩ vae. <sup>8</sup>Picuaa co quirãi sundaro reta uñerãrota yave, penti temimbi uñee sundaro reta uyeyapicatu uñerãro vaerã. Ërei uñee cavi'ã yave temimbi, ndarau quía uyeyapicatu uñerãro vaerã. <sup>9</sup>Jae ramiño vi pe reta piyemingueta'ã yave ñee ĩru vae reta ipuere uicuaa cavi vae pe, ndarau quía uicuaa mbae pere vae. Piyemingueta yuvangaiño. <sup>10</sup>Añete co, ime jeta ñee uyuavi vae reta cua ivi pe, jare opaete vae uicuaa iñeeñeei. <sup>11</sup>Jáeramo aicuaa'ã yave ĩru vae iñee, ayemingueta chupe yave, jae uicuaata che co jae ambie ivi pegua, jare jae uyemingueta cheve yave, che aicuaata jae co ambie ivi pegua. <sup>12</sup>Jae ramiño vi pe reta pipota ete penoi vaerã mbaepuere Espiritu Santo umee vae reta. Jáeramo pipota ete jocua mbaepuere pipe ĩru upurugüirovia vae reta pepuere pemimirãta vae reta.

<sup>13</sup>Jáeramo ambie vae iñee pe uyemingueta vae tuyerure Tumpa pe ipuere vaerã umimbeu mbae uipota jei ambie vae iñee pe uyandu vae. <sup>14</sup>Echa'ã che ayerure yave Tumpa pe ambie vae iñee pe, aicuaa'ã che jae vae. Echa'ã cheespirituño co uyerure. <sup>15</sup>Jáeramo ¿mbae ra ayapota? Cheespiritu uyerure

reve ayerureta Tumpa pe, jare ayerureta Tumpa pe aicuaa reve vi. Jae ramiño vi cheespíritu ucanta reve acantata, jare acantata aicuaa reve vi. <sup>16</sup>Echa'ã nde neme yave yasurupai Tumpa pe ndeespíritu peño, ñee ndiyemingueta pipe vae uicuaa mbae vae ndarau ipuere uñemïru nde ndive, yasurupai Tumpa pe neme yave. Echa'ã uicuaa'ã mbae ndere vae. <sup>17</sup>Añete co, icavi ete nde neme yasurupai Tumpa pe, ãrei jocua ïru vae nemimirãta'ã pipe. <sup>18</sup>Che amee yasurupai Tumpa pe quirãi jeta ete ayemingueta ambiembie vae ñee reta pe opaete pe reta güi. <sup>19</sup>Ërei ayembati yave ïru upurugüirovia vae reta ndive, aipota ete jae pandepo ñeeño aicuaa reve amboe vaerã ïru vae reta, diez mil ñee ambie vae ñee pe jae vaerãve.

<sup>20</sup>Cherivi reta, agüiye pepia pe piyemingueta sambiai reta ipia pe uyemingueta rami. Agüiye piyapo icavi mbae vae, sambiai-rai reta uyapo'ã icavi mbae vae rami. Ërei pepia pe piyemingueta mbaembae re ucuaacuaa vae reta ipia pe uyemingueta rami. <sup>21</sup>Mboroyocui pe uyecuatía oĩ cuarãi: “Ayeminguetata cua ivi pegua reta pe ambie ivi pegua reta ñee pei uyemingueta vae rupi. Ërei jeseve ndarau uyapisaca cheré” —jei yandeYa. Jucuarãi uyecuatía oĩ. <sup>22</sup>Jáeramo ambiembie vae ñee reta pe yayemingueta yave, yaicuaaca Tumpa imbaepuere upurugüirovia mbae vae reta pe, upurugüirovia vae reta pe'ã. Ërei Tumpa ñee yamimbeu yave, yaicuaaca upurugüirovia vae reta pe, upurugüirovia mbae vae reta pe'ã. <sup>23</sup>Jáeramo opaete pepurugüirovia vae reta piyembati yave, opaete pe reta piyemingueta yave ambiembie vae ñee reta pe, jare uique yave pepite pe cua nunga ñee reta uicuaa mbae vae reta ani upurugüirovia mbae vae reta, jae reta jeita pembiquere co. <sup>24</sup>Ërei opaete pe reta pemimbeu yave Tumpa ñee, jare uique yave pepite pe penti upurugüirovia mbae vae ani penti uicuaa mbae vae, jae uicuaata iyugüi quirãi jae co iyoa vae jare uñeãata, uyandu yave opaete pe reta pere vae. <sup>25</sup>Jare jucuarãi uyecuaata chupe opaete ipia pe oĩ vae, jare uyeaticata umbiadora reve Tumpa, jare jeita quirãi añetete Tumpa ico pepite pe.

### Piyapo cavi opaete mbiacatu reve

<sup>26</sup>Jáeramo, cherivi reta, ¿mbae ra yaeta? Piyembati yave, penti penti pipota pemiadora Tumpa pecanta reve, ani pipota peporombie, ani pipota piyemingueta ambie vae ñee pe, ani pipota picuaaca ïru reta pe Tumpa uicuaaca peve vae, ani pipota pemimbeu mbae uipota jei ambie vae ñee pe uyendu vae. Piyapo opaete piñemimirãta vaerã. <sup>27</sup>Ime yave quía reta uipota uyemingueta ambiembie vae ñee reta pe vae, tuyemingueta mocui ani mbapiño, jare tuñeraãro tuyemingueta, jare penti vae tumimbeu mbae uipota jei ambiembie vae ñee reta pe uyendu vae. <sup>28</sup>Ërei joco pe oĩ'ã yave mbae uipota jei ambiembie vae ñee reta pe uyendu vae ipuere umimbeu vae, agüiye quía tuyemingueta ambie vae ñee pe uyembatia pe. Jaeño ipuere uyemingueta iyupe jare Tumpa pe ambie vae ñee pe. <sup>29</sup>Jae ramiño vi tuyemingueta mocui ani mbapi Tumpa ñee umimbeu vae reta, jare uyapisaca jese vae reta ipia pe tuyemingueta icavi ra jocua uyandu vae. <sup>30</sup>Ërei Tumpa uicuaaca yave mbae ïru vae uguapi oĩ vae pe, uyemingueta oĩ vae tiqui. <sup>31</sup>Echa'ã jucuarãi opaete pe reta pepuere pemimbeu Tumpa ñee penti penti rupi, opaete

vae piyemboe vaerã jare piyembipiacatu vaerã. <sup>32</sup>Jare Tumpa ñnee umimbeu vae reta ime mbaepuere güinoi uñeraãro vaerã. <sup>33</sup>Echa'ã Tumpa uipota opaete piyapo vaerã mbiacatu reve. Uipota'ã piyapo vaerã tecorai piyembatia pe. Echa'ã jucuarãi Tumpa uipota opaete uñeño tee Tumpa peguarã vae reta uyembatimbatia pe.

<sup>34</sup>Piyembati yave, tiqui toï cuña reta. Echa'ã ñnamaeño'ã jese reta oporomboc vaerã. Penti penti tuyapo ime jei vae. Echa'ã jucuarãi jei mboroyocui. <sup>35</sup>Jare ime yave mbae cuña uipota uicuaa vae, tupirandu ime pe jenta pe. Echa'ã piyembatia pe cuña reta uyemingueta yave, penti ñemimaraca co.

<sup>36</sup>Pemandúa quirãi pe reta rani'ã co pemimbeu Tumpa ñnee, jare pe retaño'ã co piyandu Tumpa ñnee. <sup>37</sup>Aramoi quía ipia pe uyemingueta iyee jae co penti Tumpa ñnee umimbeu vae ani mbaepuere Espiritu Santo umee vae güinoi vae. Jocua nunga tuicuaa quirãi cua mbaembae aicuatía peve vae yandeYa iporoyocui reta co. <sup>38</sup>Ërei uipota'ã yave uicuaa, tupita uicuaa mbae reve.

<sup>39</sup>Jáeramo, cherivi reta, penoi quirëi pipota vaerã pemimbeu Tumpa ñnee, jare agüiye piyopia uipota uyemingueta ambiembie vae ñnee reta pe vae. <sup>40</sup>Ërei piyapo cavi opaete mbiacatu reve.

### **Cristo icove ye ou umanocue vae reta ipite güi**

**15** <sup>1</sup>Añave, cherivi reta, aipota pumimandúa ñee icavi vae amimbeu peve vae re. Echa'ã pe reta perovia cua ñee icavi vae jare pepirãta jese. <sup>2</sup>Jare piyembiasaca ñee icavi vae rupi pemandúa yave amimbeu peve vae re, añetete pegua pepurugüirovia yave.

<sup>3</sup>Echa'ã cua rani amimbeu peve, quirãi Cristo umano yanembaeyoa reta re, cuarãi Tumpa ñnee pe uyecuatía oï rami. Cua co uyecuaaca cheve vae. <sup>4</sup>Amimbeu vi peve quirãi Cristo uñeñoti jare mbapi ara rupi icove ye ou umanocue vae reta ipite güi, cuarãi Tumpa ñnee pe uyecuatía oï rami. <sup>5</sup>Jocua jaicue rupi uyecuaa Pedro pe, jare jocua rendave pe uyecuaa jocua doce vae pe. <sup>6</sup>Jocua rendave pe uyecuaa jeta upurugüirovia vae reta yati vae pe. Jocua reta quinientos uasa. Jare jeta jocua reta imeño co ñugüinoi. Ërei amocue umano ma. <sup>7</sup>Jocua rendave pe uyecuaa Jacobo pe, jare joco güi uyecuaa opaete temimondo reta pe.

<sup>8</sup>Jare taicue ete uyecuaa cheve vi. Che co jae penti sambiai ocua seri vae echa rami. <sup>9</sup>Echa'ã che co jae penti temimondo, ërei opaete ñru temimondo reta uyepiua chegüi. Jup'i'ã ayembijee vaerã temimondo pe. Echa'ã che ayapose icavi mbae vae Tumpa uiparavo vae reta pe. <sup>10</sup>Che co jae penti temimondo Tumpa ipiacavi rupi. Jare ipiacavi umee cheve vae ucañi'ã etei. Echa'ã che aparaviqui tanta ete opaete ñru reta güi. Ërei chei'ã co aparaviqui. Tumpa ipiacavi umee cheve vae chemimbaraviqui. <sup>11</sup>Aicuaa'ã quía ra umimbeu peve quirãi Cristo icove ye ou umanocue vae reta ipite güi, che ani ñru reta. Ërei jucuarãi numimbeu, jare jucuarãi pe reta perovia.

### Umanocue vae reta icove yeta co

<sup>12</sup>Jáeramo ¿maera pa jei amocue pepite pe ñugüinoi vae mbaeti quía ipuere icove ye ou umanocue vae reta ipite güi? Echa'ã ore numimbeu peve quirãi Cristo icove ye co ou umanocue vae reta ipite güi. <sup>13</sup>Ërei mbaeti yave quía ipuere icove ye ou umanocue vae reta ipite güi, Cristo vi icove yeta'ã tõi ou umanocue vae reta ipite güi. <sup>14</sup>Jare Cristo icove ye'ã yave ou umanocue vae reta ipite güi, cua numimbeu peve vae mbaetita tõi co mbae, jare pepurugüirovia vi mbaetita tõi co mbae. <sup>15</sup>Jare jucuarãi yave, oreaputa tõi Tumpa re. Echa'ã ore numimbeu quirãi Tumpa umbijecove ye Cristo güeru umanocue vae reta ipite güi. Ërei quía ipuere'ã yave icove ye ou umanocue vae reta ipite güi, Tumpa umbijecove yeta'ã tõi Cristo güeru umanocue vae reta ipite güi. <sup>16</sup>Echa'ã quía ipuere'ã yave icove ye ou umanocue vae reta ipite güi, Cristo icove yeta'ã tõi ou umanocue vae reta ipite güi. <sup>17</sup>Jare Cristo icove ye'ã yave ou umanocue vae reta ipite güi, pepurugüirovia mbaetita tõi co mbae, jare uyembaita'ã tõi pemaeyoa reta. <sup>18</sup>Jae ramiño vi, jucuarãi yave, Cristo re güirovia vae reta umano ma vae ucañiteita tõi co. <sup>19</sup>Cua ivi pe ñaï rambueve ñaãro tõi yave yayerovia reve Cristo re, yandepiatiti eteta tõi upurugüirovia mbae vae reta güi.

<sup>20</sup>Ërei yaicuaa Cristo icove ye co ou umanocue vae reta ipite güi. Jae rani icove ye ou umanocue vae reta ipite güi, uicuaaca vaerã opaete umanocue vae reta icove yeta co. <sup>21</sup>Echa'ã mano uique cua ivi pe penti cuimbae mbaeyoa uyapo vae jeco pegua. Jae ramiño vi umanocue vae reta icove yeta ñru cuimbae uyapo vae jeco pegua. <sup>22</sup>Echa'ã Adán co jae opaete vae itenondegua. Jáeramo opaete vae umano. Jae ramiño vi yande yaico Cristo re. Jáeramo opaete yaicove yeta co. <sup>23</sup>Cristo rani icove ye. Ërei Cristo ou ye yave, opaete güirovia Cristo re vae reta icove yeta. <sup>24</sup>Jare taicue ete opata co opaete, Cristo uequi ma yave imbaepuere opaete mburuvicha reta ara pegua jare ivi pegua jare ipotave mbaepuere güinoi vae güi, jare umee ma yave iporoyocua Tumpa pe - jae co yandeRu. <sup>25</sup>Echa'ã Cristo oyocuita co opaete ivi pegua reta, umiamiri opaete jovaicho reta regua. <sup>26</sup>Jare taicue ete Cristo umbaita mano. <sup>27</sup>Echa'ã Tumpa umee ma Cristo pe mbaepuere umiamiri vaerã opaete. Echa'ã jucuarãi jei Tumpa ñnee pe uyecuatía oï vae. Ërei cua opaete jei vae uipota'ã jei Tumpa etei. Echa'ã Tumpa umee mbaepuere Cristo pe. <sup>28</sup>Jare Tumpa Tai umiamiri ma yave opaete, jae etei uyeyocuita Tumpa pe. Echa'ã Tumpa umee chupe mbaepuere umiamiri vaerã opaete. Jayave Tumpa oyocuita opaete.

<sup>29</sup>Jare amocue vae uyembibautizaca umanocue vae reta ipepica pe. ¿Maera ra uyapo reta jucuarãi? Echa'ã ndarau icove ye yave umanocue vae reta, ¿maera ra uyembibautizaca umanocue vae reta ipepica pe?

<sup>30</sup>Jare ¿maera ra orequirẽi nduiporara nduico opa ara rupi? <sup>31</sup>Opa ara ñru vae reta uipota cheyuca. Cua añete co, cherivi reta, yerovia anoi peré vae añete rami. Echa'ã ayerovia peré yandeYa Jesucristo re. <sup>32</sup>Yandepuere yae yamijaanga reve che añerãro maemimba pochi vae reta ndive Efeso

pe. Ërei ¿mbae pe ra icavi cheve? Umanocue vae reta ndarau icove ye yave, yandepuere yae: “Yayecou. Echa'ã piareve ñamanota co.”

<sup>33</sup>Agüiye petavi. Pochi vae reta ndive ñañemiïru yave, jae reta yanembopochi vi. <sup>34</sup>Piyerova Tumpa coti piyapo vaerã jupi vae. Agüiye ma peyoa. Echa'ã amocue pe reta picuaa'ã Tumpa. Cua jae peve pemara vaerã.

### ¿Quirãita ra icove ye umanocue vae reta?

<sup>35</sup>Ërei aramoi quía jeita: “¿Quirãita ra icove ye umanocue vae reta? Jare ¿mbae nunga jete ra güinoita?” <sup>36</sup>Jucuarãi jei vae iyaracuaa'ã co. Echa'ã penti temiti jäicue ñañoti yave, umano co jeñi vaerã. <sup>37</sup>Jare jocua ñañoti vae oyovaque'ã co temiti ucuacuaa ma vae ndive. Ñañoti jäicueño, aramoi trigo jäicue ani ïru temiti jäicue. <sup>38</sup>Ërei Tumpa umbicuaa, temiti oï vaerã Tumpa jei vae rupi. Jare Tumpa umbuyavi opaete temiti reta. <sup>39</sup>Jae ramiño vi oyovaque'ã opaete jete. Echa'ã ime cuimbae jete, jare maemimba jete, jare jevae i rupigua jete, jare güira jete. Opaete uyuavi uyugüi. <sup>40</sup>Jae ramiño vi ime mbaembae ara re ñugüinoi vae, jare ime mbaembae ivi pe ñugüinoi vae. Mbaembae ara re ñugüinoi vae ipõra. Jare mbaembae ivi pe ñugüinoi vae ipõra. Ërei ipõra vae pe uyuavi uyugüi. <sup>41</sup>Ipõra co guarasi jare yasi jare yasitata reta. Ërei ipõra vae pe uyuavi uyugüi. Jae ramiño vi opaete yasitata reta ipõra vae pe uyuavi uyugüi. <sup>42</sup>Jucuarãita vi uyeypa, umanocue vae reta icove ye yave. Echa'ã uñeñoti yave, umano vae jetecue icumegua. Ërei icove ye yave ndarau etei icumegua. <sup>43</sup>Uñeñoti yave, mbaeti co mbae yaipiu vaerã. Ërei icove ye yave, ipõra eteta co. Uñeñoti yave, güinoi'ã etei mbaepuere. Ërei icove ye yave, ipirãta eteta co. <sup>44</sup>Umano vae jetecue uñeñoti yave, ivi pegua co. Ërei icove ye yave, ara pegua co. Ime co jete ivi pegua. Jae ramiño vi ime jete ara pegua.

<sup>45</sup>Echa'ã Tumpa iñee pe uyecuatía oï cuarãi: “Tumpa umee tecove cuimbae tenondegua vae pe - jae co Adán. Jocua Adán taicuegua vae - jae co Cristo - tecove ara pegua umee vae co.” Cuarãi uyecuatía oï. <sup>46</sup>Ërei ara pegua tenonde'ã oï. Jocua ivi pegua tenonde oï, jare taicue oï ara pegua. <sup>47</sup>Cuimbae tenondegua vae ivi pegua co. Echa'ã Tumpa uyapo ivi güi. Ërei cuimbae taicuegua vae co jae yandeYa ara güi ou vae. <sup>48</sup>Yanderete ivi pegua oyovaque cuimbae ivi pegua jete ndive. Jae ramiño vi yanderete ara pegua oyovaqueta cuimbae ara pegua jete ndive. <sup>49</sup>Yaguacatu ma cuimbae ivi pegua. Jae ramiño vi yaguacatuta cuimbae ara pegua.

<sup>50</sup>Jare cua che jae peve, cherivi reta: Yanderete ivi pegua ndarau uique Tumpa iporoyocua pe. Jae ramiño vi mbae icumegua vae ndarau uique icumegua mbae oï vae pe. <sup>51</sup>Mase, tamimbeu peve ndeiño uyecuaa vae. Ndarau opaete ñamano, ãrei opaete ñanoita yanderete ipiau vae. <sup>52</sup>Jare cua uyeypota imbae pegua penti jei vae pe Tumpa itrompeta uñee yave. Echa'ã Tumpa itrompeta uñeeta co, jare umanocue vae reta icove yeta güinoi vaerã jete ndarau etei icumegua vae. Jare yande imeño ñai vae vi ñanoita yanderete ipiau vae. <sup>53</sup>Echa'ã yanderete



icumegua vae uyepepicata yanderete ndarau etei icumegua vae ndive. Jae ramiño vi yanderete ipuere umano vae uyepepicata yanderete ndarau etei ipuere umano vae ndive. <sup>54</sup>Jare ñanoi yave yanderete ndarau etei icumegua vae yanderete icumegua vae ipepica pe, jare ñanoi yave yanderete ndarau etei ipuere umano vae yanderete ipuere umano vae ipepica pe, uveyapota ma co Tumpa iñee pe uyecuatía oĩ vae. Echa'ã uyecuatía oĩ cuarãi: “Tumpa umiamiri mano jare umbai. <sup>55</sup>Mano güinoi'ã etei mbaepuere yanderé. Ñanemiamiri'ã etei.” Jucuarãi uyecuatía oĩ. <sup>56</sup>Añave mano güinoi mbaepuere yanderé mbaeyoa jeco pegua. Jare mboroyocui uicuaaca mbaeyoa. <sup>57</sup>Ërei ñamee yasurupai Tumpa pe. Echa'ã jae umiamiri mano yandeve yandeYa Jesucristo rupi.

<sup>58</sup>Jáeramo, cherivi reta aau vae, piñemiatangātu jare piñemimirāta. Jecuaeño tanta peparaviqui yandeYa pe. Echa'ã picuaa quirãi peparaviqui yave yandeYa pe, yandeYa umbijecoviata peve.

#### Corepoti umbatita oporombori vaerã

**16** <sup>1</sup>Añave tamimbeu peve quirãi pembati vaerã corepoti pembori vaerã ñru uñeño tee Tumpa peguarã vae reta. Ayocui ma cua re upurugüirovia vae reta Galacia rupi uyembatimbati vae. Jae ramiño vi pe reta piyapo jucuarãi. <sup>2</sup>Domingomingo pe penti penti piñuvatu corepoti Tumpa pembupuere rupi, agüiye vaerã pembati che aa pepi yave ramo. <sup>3</sup>Jare che aa avãe yave pepi, ameeta tupapire reta piparavo vae reta pe jare amondota reta Jerusalén pe güiraa vaerã corepoti pemeeta vae. <sup>4</sup>Jare icavi yave cheve che vi aa vaerã, jae reta yugüiraata cherupíe.

#### Pablo ipia pe uyemingueta uyapo vaerã vae re

<sup>5</sup>Jare che aata pepi, Macedonia rupi aasa yave. Echa'ã aasata co Macedonia rupi. <sup>6</sup>Jare aramoi apitata pe reta ndive. Aramoi apitata pepi ambiasa opaete roi ara reta, pe reta chembori vaerã aa ye yave icoti'ã perenta güi. <sup>7</sup>Aipota'ã apou pepi michi peguaño. Echa'ã aipota apita pepi ima pegua, yandeYa uipota yave. <sup>8</sup>Ërei apitata cua pe Efeso pe Pentecostés ara ou uvãe regua. <sup>9</sup>Echa'ã ime cua pe jeta mbaraviqui chepuere ayapo yandeYa pe vae, jare ime vi jeta oyovaicho yandeYa iparaviqui ndive vae reta.

<sup>10</sup>Ërei Timoteo oo yave pepi, piyandareco cavi jese, ipiagüiye oĩ vaerã pepite pe. Echa'ã jae vi uparaviqui yandeYa pe, che ayapo rami. <sup>11</sup>Agüiye quía tugüiriro. Ërei outa yave checoti perenta güi, pembori ou vaerã checoti ipiacatu reve. Echa'ã aipota jae ou vaerã chepi ñru yanderivi reta jupíe.

<sup>12</sup>Tamimbeu peve yanderivi Apolos. Chequirëi ete jae oo vaerã pepi ñru yanderivi reta jupíe. Ërei uipota'ã etei oo pepi añave. Ërei oota co jae ipuere yave.



### Saludo reta

<sup>13</sup>Piñemoa, pepirãta pepurugüirovia re, piyembucuibae, piñemiatangãtu. <sup>14</sup>Opaete piyapo vae piyapo pepuruau reve.

<sup>15</sup>Añave, cherivi reta, pe reta picuaa quirãi Estéfnas jenta pegua reta rani güirovia Cristo re Acaya pe, jare quirãi jae reta jecuaeño uparaviqui tanta uyeyocui vaerã ñru uñeño tee Tumpa peguarã vae reta pe. <sup>16</sup>Jáeramo aipota pe reta piyeyocui vaerã cua nunga pe, jae reta peocui yave, jare vi piyeyocui vaerã opaete orembori vae reta jare uparaviqui yandeYa pe vae reta pe, jae reta peocui yave. <sup>17</sup>Ayerovia Estéfnas jare Fortunato jare Acaico yugüeru chepi vae re. Echa'ã jae reta uyapo cheve icavi vae pe reta pepuere'ã piyapo cheve vae. <sup>18</sup>Echa'ã jae reta chembiyerovia co. Jae ramiño vi jae reta pemiyerovia. Jáeramo pepuere pipiu cua nunga reta.

<sup>19</sup>Upurugüirovia vae reta Asia rupi uyembatimbati vae jei peve Tumpa ndiveño peĩ. Aquila jare Priscila jare upurugüirovia vae reta uyembati jae reta jenta pe vae jei vi peve Tumpa ndiveño peĩ yandeYa re perovia ramo. <sup>20</sup>Opaete yanderivi reta jei peve Tumpa ndiveño peĩ. Saludo reta piyapo piyupe yave, piñecuãva piyerau reve.

<sup>21</sup>Che aicuatía cua chepo pe etei. Che vi jae peve Tumpa ndiveño peĩ.

<sup>22</sup>Ime yave quía uau'a yandeYa Jesucristo vae, Tumpa uiporacata chupe. YandeYa outa.

<sup>23</sup>YandeYa Jesucristo tumee peve ipiacavi. <sup>24</sup>Chepuruau toĩ opaete pe reta perovia Cristo Jesús re vae ndive. Amén.

# SEGUNDA CARTA DEL APOSTOL SAN PABLO A LOS CORINTIOS

**1** <sup>1</sup>Che co jae Pablo. Che co jae Jesucristo jemimondo Tumpa jei vae rupi. Yanderivi Timoteo vi ime cua pe oĩ che ndive. Aicutafía cua tupapire opaete pepurugüirovia vae Corinto pe piyembati vae reta pe, jare opaete ĩru uñeño tee Tumpa peguarã vae opaete Acaya rupi ñugüinoi vae reta pe. <sup>2</sup>YandeRu Tumpa jare yandeYa Jesucristo tumee peve ipiacavi jare ipiacatu.

## Pablo uiporara

<sup>3</sup>Yambiadora Tumpa. Jae co yandeYa Jesucristo Tu. Jae co yandeRu vi. Jae yandeparareco. Jae jecuaeño yanembipiacatu. <sup>4</sup>Echa'ã jae jecuaeño yanembipiacatu yaiporara yave, yandepuere vaerã yambipiacatu ĩru uiporara ñugüinoi vae reta. Echa'ã jucuarã vi Tumpa yanembipiacatu. <sup>5</sup>Echa'ã yaiporara ete yave Cristo re yarovia ramo, yandepiacatu ete vi Cristo rupi. <sup>6</sup>Jare ore nduiporara yave, nduiporara co pe reta penoi vaerã mbiacatu jare yembiasa. Jare Tumpa yanembipiacatu yave, jucuarã uyapo pe reta penoi vaerã mbiacatu jare yembiasa. Jare jucuarã pepuere pemiaguanta pepiaguasu reve piporara yave ore nduiporara rami. <sup>7</sup>Jare jecuaeño ndugüirovia catu peré pemiaguanta vaerã. Echa'ã nduicuaa quirã pe reta vi piporara ore nduiporara rami. Jae ramiño vi nduicuaa quirã Tumpa pembipiacatu orembipiacatu rami. <sup>8</sup>Echa'ã nduipota picuaa vaerã, cherivi reta, quirã nduiporara Asia pe nduico yave. Nduiporara ete. Orepuere'ã seri numiaguanta. Jáeramo orepia pe nduyemingueta tẽi numanota co. <sup>9</sup>Añete co, orepia pe nduyemingueta tẽi Tumpa umaeñota co oreré numano vaerã. Ĕrei jucuarã Tumpa uicuaaca oreve orepuere'ã co nduyeco orembaepuere rei, jaeño orepuere nduyeco Tumpa re. Echa'ã Tumpa ipuere umbijecove ye umanocue vae reta. <sup>10</sup>Echa'ã jae orerepi numano seri yave, jare jecuae orerepi mano güi. Jae ramiño vi ndugüirovia orerepi yeta co. <sup>11</sup>Pe reta vi pepuere orembori. Echa'ã pepuere piyerure Tumpa pe oreré. Jare jucuarã

yave, jeta vae umeeta yasurupai Tumpa pe jae uyapota oreve vae re. Echa'ã Tumpa uyapota co oreve, jeta vae uyerureta chupe oreré ramo.

### Maera Pablo uipota oo Corinto pe

<sup>12</sup>Echa'ã ore nduico cavi upurugüirovia mbae vae reta ipite pe jare pepite pe vi, Tumpa orembori ramo. Ndupurumbitavi'ã etei. Jare cuarãi nduico Tumpa ipiacavi rupi, nduico'ã orearacuaa rupiño. Jare nducuaa cua añete co. Jáeramo nduyerovia. <sup>13</sup>Echa'ã pemingueta ramiño nduicuatía peve. Jare pepuere picuaa cavi nduicuatía peve vae. Jare aipota jecuaeño picuaa cavi vaerã. <sup>14</sup>Añete co, amocue pe reta oredua cavi ma. Echa'ã pe reta piyerovia oreré. Jae ramiño vi ore nduyeroviata peré yandeYa Jesús ivã ara pe.

<sup>15</sup>Jare cua aicuaa cavi ramo, aipota tẽi aa rani pepi, che pumbiyerovia vaerã tẽi mocui vese. <sup>16</sup>Echa'ã aipota tẽi apou pepi Macedonia pe ayu yave, jare apou ye pepi Macedonia güi aa ye yave, pe reta pepuere vaerã chembori aa ye yave perenta güi Judea coti. <sup>17</sup>Jare chepia pe ayemingueta yave jucuarãi ayapo vaerã, chepia pe ayeminguetaiño'ã co jese. Echa'ã chepia pe ayemingueta yave mbae ayapo vaerã, chepia pe ayemingueta'ã che jae vae rupiño. Che jae yave: "Ayapota co", ndarau jae voi ye: "Ayapota'ã." <sup>18</sup>Tumpa vi uicuaa quirãi ore ndoe yave: "Nduyapota co", ndarau ndoe voi ye: "Nduyapota'ã." <sup>19</sup>Echa'ã Tumpa Tai jae co Cristo Jesús - che jare Silvano jare Timoteo numimbeu peve vae jei yave: "Ayapota co", ndarau jei voi ye: "Ayapota'ã." Jaeño jae jei: "Ayapota co." <sup>20</sup>Echa'ã opaete Tumpa jei uyapota vae Cristo uyapota co. Jáeramo orepuere ndoe: "Amén", Tumpa pe Cristo rupi, jare jucuarãi numbiadora Tumpa. <sup>21</sup>Jare Tumpa oremimirãta Cristo rupi jare oreñoño tee nduyapo vaerã iparaviqui. Jae ramiño vi Tumpa pemimirãta. <sup>22</sup>Jare Tumpa umee ma yandeve Espiritu Santo, uicuaaca vaerã yande jae imbae co, jare Espiritu Santo yandepia pe ico ramo, yaicuaa jeta ete co Tumpa umeeta yandeve.

<sup>23</sup>Jare ndeiño aa Corinto pe agüiye vaerã añeengata peve. Tumpa uicuaa cua amimbeu peve vae añete co. <sup>24</sup>Nonoi'ã etei mbaepuere pepurugüirovia re. Echa'ã pepirãta ma pepurugüirovia re. Jaeño nduipota pombori, pe reta piyerovia vaerã.

**2** <sup>1</sup>Jáeramo che jae chiyupe ndarau aa ye pepi chepiatiti reve. <sup>2</sup>Echa'ã che pumbipiatiti yave, ¿quía ra co chembiyeroviata? Pe retaño co. Ërei che pumbipiatitita tẽi, aa pepi yave. <sup>3</sup>Jáeramo aicuatía peve, agüiye vaerã pe reta chembiyerovia vaerãve chembiipiatiti, aa pepi yave. Echa'ã che arovia che ayerovia yave, pe reta vi piyeroviata co. <sup>4</sup>Echa'ã aicuatía peve ayao reve, chepiatiti ramo. Ayandu chepia pe. Aipota'ã pepiatiti vaerã. Ërei aipota picuaa vaerã quirãi tuicha ete co chepuruau pecoti.

### Pembiasa icavi mbae vae uyapo vae pe

<sup>5</sup>Jocua iyoa vae cheño'ã chembiipiatiti. Amocue pe reta vi pembipiatiti. <sup>6</sup>Jeta ma pe reta piporaraca chupe. Jáeramo agüiye ma piporaraca ye chupe. <sup>7</sup>Añave icavi co pembiasa vaerã chupe. Icavi co añave pembipiacatu vaerã. Agüiye

ma piporaraca ye chupe. Echa'ã piporaraca ye yave chupe, aramoi uyapota mbae icavi mbae vae, ipiatiti ete ramo. <sup>8</sup>Jáeramo che pumiñera pemimbeu vaerã chupe quirã jecuaeño co peau vae. <sup>9</sup>Echa'ã cua jeco pegua aicuatía peve, aicuaa vaerã mbae ra piyapota. Aipota aicuaa piyapota ra opaete che jae peve piyapo vaerã vae. <sup>10</sup>Pe reta pembiasa yave quía pe mbae, che vi ambiasa chupe. Echa'ã jocua ambiasa quía pe vae, ime yave mbae ambiasa vaerã quía pe vae, ambiasa co chupe peré Cristo jovai. <sup>11</sup>Yaipota'ã Satanás ñanemiamiri vaerã. Echa'ã yaicuaa cavi co mbae jae uipota uyapo vae.

### Pablo uyemipia'ã Troas pe

<sup>12</sup>Jare che aa avãe yave Troas pe amimbeu vaerã ñee icavi vae Cristo regua, yepe tẽi yandeYa umee cheve aparaviqui cavi vaerã chupe, <sup>13</sup>ẽrei chepiacatu'ã etei avãe'ã yanderivi Tito joco pe ramo. Jáeramo che jae Troas pegua reta pe aa yeta co, jare ayu chugüi reta Macedonia coti.

### Ñapurumiamiri Cristo rupi

<sup>14</sup>Yasurupai numee Tumpa pe. Echa'ã jae jecuaeño orembori ndupurumiamiri vaerã Cristo rupi, jare umee oreve ñee icavi vae nduicuaaca vaerã opaete que rupi, mbae ipiche cavi vae uñeetu opaete que rupi rami. <sup>15</sup>Numimbeu yave ñru vae reta pe Cristo regua, numbiyerovia Tumpa, mbae ipiche cavi vae yanembiyerovia rami. Jare numimbeu uyembiasaca vae reta pe jare ucañiteita vae reta pe, mbae ipiche cavi vae uñeetu opaete que rupi vae rami. <sup>16</sup>Echa'ã numimbeu yave ucañiteita vae reta pe, mbae ipiche cavi vae amijaanga oreré vae uyeyapo mbayachi quía upuruyuca pipe vae rami. Jae ramiño vi numimbeu yave uyembiasaca vae reta pe, jae uyeyapo mbae tecove umee vae rami. Jare mbaeti quía ipuere jaeiño uyapo cua mbaraviqui. <sup>17</sup>Echa'ã jeta vae uiporu Tumpa iñee umingana vaerã mbaembae iyupeguarã. Ẽrei ore jae reta rami'ã co. Ore numimbeu cavi Tumpa iñee Tumpa oreocui numimbeu vaerã rami. Oremiari Tumpa jovaque Cristo re ndugüirovia ramo.

### Trato ipiau vae

**3** <sup>1</sup>Aramoi pe reta pepia pe piyemingueta tẽi ore numbipi ye nduyembutuicha. Jucuarã'ã co. Pipota'ã ndipo ndugüeru vaerã peve tupapire reta nduicuaaca vaerã peve quía co ore. Pipota'ã ndipo pemee oreve tupapire reta nduicuaaca vaerã ñru vae reta pe quía co ore. Echa'ã ñru vae reta güinoi jocua nunga tupapire. <sup>2</sup>Nduyembutuicha'ã co. Echa'ã pe reta co jae oretupapire rami uyecuatía oĩ orepia pe vae rami. Opaete vae ipuere perecha uicuaa vaerã quía co ore, penti tupapire ipuere umingueta rami. <sup>3</sup>Echa'ã opaete vae ipuere uicuaa quirã pe reta co jae penti tupapire Cristo güi ore ndugüeru vae rami. Ẽrei pe reta co penti tupapire Tumpa imeño mai ico vae iEspíritu pe uyecuatiaca vae rami, mbaeti co penti tupapire tinta pe uyecuatía vae rami. Tumpa uicuatía ñee pepia re etei. Uicuatía'ã ita reta re.

<sup>4</sup>Jare cuarã orepuere ndoe peve, ndugüirovia catu Tumpa Cristo rupi ramo. <sup>5</sup>Oreño orepuere'ã etei mbae nduyapo. Ërei Tumpa umee oreve imbaepuere. <sup>6</sup>Jae ramiño vi Tumpa umee oreve mbaepuere, nduyeyocui cavi vaerã chupe trato ipiau vae re. Cua trato ipiau vae Espiritu pegua co, mboroyocui uyecuatía oĩ vae pegua'ã co. Echa'ã mboroyocui uyecuatía oĩ vae jei vae uyapo'ã vae umanota co. Ërei Espiritu Santo umee yandevete cove opa mbae vae.

<sup>7</sup>Jocua mboroyocui uyecuatía oĩ ita reta re vae uñemee Moisés pe yave, Tumpa umiembipe Moisés iárambo. Jáeramo Israel pegua reta ipuere'ã umaengatu Moisés jova re. Echa'ã Moisés jova jembipe ete. Ërei yepe tẽi mboroyocui jei vae uyapo'ã vae umanota co, ãrei uñemee Moisés jova jembipe ete reve. Ërei jocua jembipe vae ima'ã ico. <sup>8</sup>Jáeramo jocua ñee Espiritu Santo güeru yandevete vae icavi ete mboroyocui jei vae güi. <sup>9</sup>Echa'ã yepe tẽi mboroyocui jei vae uyapo'ã vae umanota co, ãrei icavise. Jáeramo icavi ete ma jocua güi ñee uicuaaca yandevete Tumpa yanembujupi co vae. <sup>10</sup>Echa'ã tenonde yave Tumpa uipiuca mboroyocui. Ërei ucañi ma mboroyocui imbaepuere. Echa'ã cua añave Tumpa uipiuca ma vae icavi ete chugüi. <sup>11</sup>Echa'ã jocua mboroyocui ita reta re uyecuatía vae icavise, yepe tẽi uyembai ma. Jáeramo jocua taicuegua vae icavi ete chugüi, echa'ã ndarau opa.

<sup>12</sup>Jare cua ndugüirovia ramo, numimbeu cavi peve opaete. <sup>13</sup>Nduyapo'ã Moisés uyapo rami. Echa'ã jae umbiyasoi jova penti tarapo pe, agüiye vaerã Israel pegua reta umaengatu jova re. Echa'ã uipota'ã Israel pegua reta uecha vaerã quirãi ove jocua jova re jembipe vae. <sup>14</sup>Ërei Israel pegua reta uicuaa cavi'ã. Echa'ã jecuaeño iyaracuaa uyeasoi oĩ, Moisés jova tarapo pe uyeasoi rami. Jáeramo uicuaa cavi'ã, trato indechi vae umingueta yave. Ërei jocua trato indechi vae Cristo umbai ma. <sup>15</sup>Ërei Moisés uicuatía vae umingueta yave, jecuaeño ime oĩ jocua iyaracuaa uyasoi vae. <sup>16</sup>Ërei yandeYa coti uyerova yave, uyeequita jocua iyaracuaa uyasoi vae. <sup>17</sup>Jare yandeYa oyovaque Espiritu Santo ndive. Jare ime yave quía güinoi yandeYa iEspiritu vae, ipuere iyaracuaa catu. <sup>18</sup>Jare yande co jova uyasoi mbae vae rami co. Jáeramo yande co jae penti espejo rami. Echa'ã ñru vae reta ipuere uicuaa yandeYa regua, umaengave yanderé. Jare yande ñamaengatu yandeYa re ramo, jecuaeño yandeYa iEspiritu uparaviqui yandepia pe, ñãñ vaerã yandeYa rami.

**4** <sup>1</sup>Jáeramo orequeri'ã. Echa'ã Tumpa oreparareco jare umee oreve nduyeyocui vaerã chupe. <sup>2</sup>Nduyapo'ã etei ñru vae reta uyapo viari imara ramo vae. Nduyapo'ã etei mbae ndupurumbitavi vaerã. Ndorova'ã vi Tumpa ñnee. Jaño numimbeu ñru vae reta pe añete vae, jare jucuarãi opaete vae ipuere uicuaa quirãi ore nduico cavi Tumpa jovaque. <sup>3</sup>Amocue vae jei ipuere'ã uicuaa cavi ñee icavi vae ore numimbeu vae. Ërei jucuarãi jei, jae reta ucañiteita ramo. <sup>4</sup>Echa'ã jae reta güirovia'ã Tumpa. Jáeramo cua ivi pegua reta iya umipñtumimbi iyaracuaa, agüiye vaerã uicuaa cavi ñee icavi vae Cristo uyembiaadora vae regua. Cristo co jae Tumpa etei cuimbaerã uyeyapo vae. Echa'ã ñee icavi vae penti tembipe yanemiembipe vae rami co. <sup>5</sup>Ore nuñemiñee yave, numimbeu yandeYa

Cristo Jesús, orempiari'ã co oriye. Echa'ã ore co jae perembiocui retaño, Jesús nduau ramo. <sup>6</sup>Echa'ã opaete p̃tumimbi yave, Tumpa jei tome toĩ tembipe. Jae ramiño vi Tumpa umiembipe orepia pe penti tembipe rami, nduicuaa vaerã quirã jae uyembiaadoraca ete. Tumpa imbaepuere uyecuaa Jesucristo rupi.

### Mburugüirovia rupi yaico

<sup>7</sup>Jare cua icavi ete vae ime Tumpa güi nonoi vae ico orerete pe, yepe t̃i orerete ivi pegua co, uyecuaa vaerã cua mbaepuere tuicha ete vae ime nonoi vae Tumpa imbaepuere co, orembaepuereño'ã co. <sup>8</sup>Opaete que rupi nduiporara, ãrei jecuaeño orepuere nduparaviqui Tumpa pe. Nduicuaa'ã mbae nduyapo vaerã, ãrei jecuaeño Tumpa uicuaaca oreve. <sup>9</sup>Ïru vae reta uyapo icavi mbae vae oreve, ãrei jecuaeño Tumpa ime oĩ ore ndive. Numano seri, ãrei jecuaeño Tumpa umee oreve tecove. <sup>10</sup>Opaete que rupi nduquiy'e'ã numano vaerã Jesús umano rami, uyecuaa vaerã orerete re tecove Jesús ime güinoi vae. <sup>11</sup>Echa'ã yepe t̃i imeño noĩ, ãrei jecuaeño nduquiy'e'ã numano vaerã Jesús nduau ramo, uyecuaa vaerã orerete umanota vae re tecove Jesús ime güinoi vae. <sup>12</sup>Jáeramo jecuaeño nduiporara ete nduico, pe reta penoi vaerã tecove opa mbae vae.

<sup>13</sup>Orepurugüirovia oyovaque co jocua mburugüirovia yamingueta jese vae ndive. Echa'ã Tumpa ñee pe uyecuatía oĩ cuarã: “Che arovia. Jáeramo chemiari jese.” Jucuarã uyecuatía oĩ. Jae ramiño vi ore ndugüirovia. Jáeramo orempiari jese. <sup>14</sup>Jare nduicuaa Tumpa umbijecove ye co yandeYa Jesús güeru umanocue vae reta ipite güi. Jae ramiño vi nduicuaa Tumpa orembijecove yeta co orereru umanocue vae reta ipite güi nduico vaerã Jesús ndive, jare oreñonota pe reta ndive jae jovai. <sup>15</sup>Echa'ã opaete nduiporara, orepuere vaerã pombori, jare Tumpa ipiacavi oĩ vaerã jeta vae ndive. Echa'ã jucuarã yave, jeta vae umeeta yasurupai Tumpa pe, jare jucuarã Tumpa uyembiaadoracata.

<sup>16</sup>Jáeramo orecueri'ã. Echa'ã yepe t̃i orerete pe jecuaeño nduiporara, ãrei Tumpa jecuaeño umee oreve imbaepuere. <sup>17</sup>Echa'ã yaiporara vae michi ete jare michi peguaño co. Jare yaiporara yave, Tumpa umeeta yandeve yerovia tuicha ete vae ndarau etei opa vae. <sup>18</sup>Jáeramo yandepia pe yayemingueta'ã mbaembae yandepuere yaecha vae re. Yandepia pe yayemingueta mbaembae yandepuere'ã yaecha vae re. Echa'ã mbaembae yandepuere yaecha vae opata co. ãrei mbaembae yandepuere'ã yaecha vae ndarau etei opa.

**5** <sup>1</sup>Echa'ã yaicuaa yanderete umanota co. Jae co penti tenta ñma'ã ico vae rami. ãrei Tumpa umeeta yandeve yanderete ipiau vae. Jae co penti tenta Tumpa uyapo vae rami. Jare cua Tumpa umeeta yandeve vae ara pegua co, ivi pegua'ã co, jare ndarau etei opa. <sup>2</sup>Echa'ã cua yanderete pe yaico rambueve, yaiporara, jare yaipota ete ñanoi yanderete ipiau vae penti tenta Tumpa uyapo vae rami. <sup>3</sup>Jare Tumpa umee yave yandeve yanderete ipiau vae, ndarau etei ñã yanderete mbae reve. <sup>4</sup>Echa'ã cua yanderete pe yaico rambueve, yaiporara co, yavai ete yandeve ramo. ãrei yaipota'ã ñã yanderete mbae reve. Yaipota

ñanoi yanderete ipiau vae, ñanoi vaerã tecove opa mbae vae, agüiye vaerã ñamano. <sup>5</sup>Jare cuarã Tumpa uparaviqui yandepia pe, jare umee ma yandeve Espiritu Santo uicuaaca vaerã yandeve jocua umeeta yandeve vae.

<sup>6</sup>Jáeramo jecuaeño yayerovia. Echa'ã yaicuaa cua ivi pe yaico rambueve, ndei ñaĩ yandeYa ndive. <sup>7</sup>Echa'ã yaico yandeYa re yandepurugüirovia reve. Ërei ndeiño yaecha. <sup>8</sup>Ërei jecuaeño yayerovia. Jare ñanequirëi yaeya yanderete, ñaĩ vaerã yandeYa ndive. <sup>9</sup>Jáeramo jecuaeño yaipota yambiyerovia yandeYa cua ivi pe yaico rambueve jare jae ndive ñaĩ ma yave. <sup>10</sup>Echa'ã opaete vae ñaíta Cristo jovai, jae ñanerãa vaerã. Jare Cristo umbijecoviata penti penti pe cua ivi pe ico rambueve uyapo vae. Jae umbijecoviata icavi vae uyapo vae jare icavi mbae vae uyapo vae pe.

### Umimbeu quirãi yayembipiacatu Tumpa ndive

<sup>11</sup>Jáeramo ore nduparaviqui ñru vae reta güirovia vaerã yandeYa re. Echa'ã nduicuaa yandeYa orerãata co. Ërei Tumpa uicuaa maera nduyapo opaete nduyapo vae. Jae ramiño vi aipota pe reta picuaa vaerã cua. <sup>12</sup>Ndoe'ã co peve cua nduyembicate vaerã. Ërei nduipota pe reta picuaa vaerã cua, pepuere vaerã pepiamaiña orecotí. Echa'ã jucuarãi yave, pepuereta pemiari cua re ñru vae reta pe, jae reta uyembicate yave. Echa'ã jae reta uyembicate mbae uyecuaa vae re. Uyembicateta tẽi co ipia pe güinoi vae re. <sup>13</sup>Aramoi ñru vae reta jeita orembiquere co. Ërei jaeño nduipota numbiadora Tumpa. Ërei jei reta yave ore orearacuaa co, icavi co peve. <sup>14</sup>Echa'ã Cristo orerau ramo, orequirëi ete nduyeyocui chupe. Echa'ã nduicuaa cavi Cristo umano opaete yanderé. Jáeramo opaete yande ñamano vi yaicose vae güi. <sup>15</sup>Jare Cristo umano opaete vae re, yande jecuaeño yayeyocui vaerã chupe yaico rambueve cua ivi pe, agüiye vaerã yaico yandiyupe vaerãño. Echa'ã Cristo umano yanderé jare icove ye ou umanocue vae reta ipite güi. <sup>16</sup>Jáeramo añave güive ndarau yandepia pe yayemingueta ñru vae re jae co ivi peguaño. Yepe tẽi yaicuaa quirãi Cristo ico cua ivi pe, Ërei añave güive ndarau yandepia pe yayemingueta jese jocua re. <sup>17</sup>Jáeramo ime yave quía güirovia Cristo re vae, Tumpa umee chupe tecove ipiau vae. Uipota'ã ma mbaembae tenonde yave uipota vae. Uipota ma mbaembae tecove ipiau vae pegua.

<sup>18</sup>Jare Tumpa uyapo opaete cua. Jare jae yanembipiacatu jae ndive Cristo rupi, jare umee yandeve yamimbeu vaerã ñru vae reta pe quirãi jae uipota umbipiacatu reta jae ndive. <sup>19</sup>Cua uipota jei Tumpa umbipiacatu jae ndive opaete ivi pegua reta Cristo rupi, agüiye vaerã umbijeco reta imbaeyoa reta re. Jare Tumpa umee yandeve yamimbeu vaerã ñru vae reta pe quirãi uipota umbipiacatu reta jae ndive. <sup>20</sup>Jáeramo Cristo yanemondo jae ipepica pe. Jare ñanemiari yave, jae co Tumpa imiari oĩ yande rupi. Echa'ã Tumpa uipota umbipiacatu ñru vae reta jae ndive. Jáeramo yande ñamiñera ñru vae reta Cristo jee re uyembipiacatu vaerã Tumpa ndive. <sup>21</sup>Cristo iyoa'ã etei. Ërei Tumpa uiporaraca chupe opaete yanembaeyoa re, Tumpa ipuere vaerã yanembujupi yarovia Cristo re yave.

**6** <sup>1</sup>Ore nduparaviqui Tumpa ndive. Jáeramo ore pumiñera agüiye vaerã piyuvanga Tumpa ipiacavi re. <sup>2</sup>Echa'ã Tumpa jei iñee uyecuatiã oĩ vae pe cuarãi:

“Chepiacavi ramo, ayapisaca nderé.

Che nduepi jocua ara ndiyembiasaca yave.”

Jucuarãi jei. Mase, añave Tumpa ipiacavi. Añave ara co yembiasa pegua.

<sup>3</sup>Jecuaño nduico cavi, agüiye vaerã quía numbiavai. Jucuarãi nduico, agüiye vaerã ñru vae reta jei: “Jocua Tumpa jembiocui reta uyapo icavi mbae vae.”

<sup>4</sup>Jecuaño nduipota nduicuaaca ñru vae reta pe quirãi nduyeyocui cavi Tumpa pe. Echa'ã orepiaguasu. Nduiporara ete. Jecuaño uata mbaembae oreve. Yavai co nduico vaerã. <sup>5</sup>Ñru vae reta orenupa jare oreñoño peresoriru pe. Ñru vae reta uyapo tecorai oreré. Tanta nduparaviqui. Amo pe ndoque'ã. Amo pe mbaeti oreremiurã. <sup>6</sup>Nduyapo'ã mbae pichii vae ñru vae reta coti. Nduicuaaca añete vae ñru vae reta pe. Numiaguanta ñru vae reta uyapo icavi mbae vae oreve yave. Orepiacavi ñru vae reta pe. Jecuaño Espíritu Santo orembori. Añetete nduau ñru vae reta. <sup>7</sup>Numimbeu ñru vae reta pe ñee añete vae, jare Tumpa orembori imbaepuere pe. Jecuaño nduyapo jupi vae, amocue vae güirovia vaerã Cristo re, jare agüiye vaerã ñru vae reta ipuere orembijeco mbae re. <sup>8</sup>Amocue vae orepiu, jare amocue vae orereriro. Amocue vae jei mbaembae icavi vae oreré, jare amocue vae jei mbaembae icavi mbae vae oreré. Yepe tẽi ñru vae reta jei ore co jae upurumbitavi vae reta, jecuaño ndoe añete vae. <sup>9</sup>Ñru vae reta oredua'ã. Ërei Tumpa oredua cavi. Numano seri aveiño, ërei jecuaño noi. Ñru vae reta orenupa, ërei ndeiño oreyuca. <sup>10</sup>Orepiatiti, ërei jecuaño nduyerovia. Oreparavete, ërei jeta ñru vae reta güirovia Cristo re ore rupi. Mbovi ete mbaembae ivi pegua nonoi, ërei ime nonoi jeta ete Tumpa umee oreve vae.

<sup>11</sup>Numisimi oremiari peve, Corinto pegua reta. Picuaa ma quirãi ore puau vae. <sup>12</sup>Yayerau'ã yave, ore nonoi'ã teco. Pe reta co penoi teco. <sup>13</sup>Tachemiari peve penti tu imiari isambiai reta pe rami. Ore puau ramo, pe reta vi picuaaca oreve quirãi pe reta orerau.

### Agüiye piñemiñru upurugüirovia mbae vae reta ndive

<sup>14</sup>Agüiye piñemiñru upurugüirovia mbae vae reta ndive. Echa'ã upurugüirovia mbae vae reta ipiyemingueta oyovaque'ã upurugüirovia vae reta ipiyemingueta ndive. Echa'ã jupi vae oyovaque'ã etei jupi mbae vae ndive. Jae ramiño vi tembipe jare pitumimbi ipuere'ã etei yugüireco pãve. <sup>15</sup>Cristo unemiñru'ã etei Satanás ndive. Jae ramiño vi upurugüirovia vae ico'ã upurugüirovia mbae vae ico rami. <sup>16</sup>Ícavi'ã etei tumpa-raanga reta ñugüinoi vaerã Tumpa ico vae pe. Jare pe reta co jae Tumpa ico pipe vae rami. Echa'ã Tumpa jei cuarãi:

“Aicota jare aguatata ipite rupi.

Aicota jae reta iTumparã,

jare jae reta yugüirecota chembaerã.”

Jucuarãi jei Tumpa imeño mai ico vae. <sup>17</sup>Jáeramo jae jei vi peve cuarãi:



“Jáeramo pesiri icavi mbae vae uyapo vae reta ipite güi.

Agüiye ye ma piñemiïru jae reta ndive.

Agüiye piyapo icavi mbae vae jae reta uyapo rami.

Jare che pumbiresiveta.

<sup>18</sup> Jare che aicota peRurã,

jare pe reta picota cherairã jare cherayirã.”

Jucuarãi jei yandeYa opaete mbaepuere güinoi vae.

**7** <sup>1</sup>Tumpa umimbeu ma yandeve opaete cua jei uyapota vae. Jáeramo, cherivi reta, aicuatía peve cuarãi: Agüiye ma yayapo icavi mbae vae yanderete pegua jare yanderecove pegua. Jecuaeño ñañeño tee Tumpa peguarã yaquiye reve Tumpa güi.

### Pablo uyerovia Corinto pegua reta uyapo vae re

<sup>2</sup>Picuaaca oreve quirãi co orerau. Ore nduyapo'ã etei mbae icavi mbae vae ipotave vae pe. Jae ramiño vi nduyapoca'ã etei mbae icavi mbae vae ipotave vae pe. Ndupurumbitavi'ã etei. <sup>3</sup>Jae'ã peve cua pumbijeco vaerã. Echa'ã che jae ma peve quirãi ore puau ete. Jáeramo ñamano yave ani jecuae yaico yave, ipuereta'ã mbae uequi cua mburuau orepia güi. <sup>4</sup>Amisimi chemiari peve, jare ñru vae reta pe chemiari yave ayerovia ete peré. Yepe tẽi nduiporara ete noĩ, Tumpa jecuaeño chembipiacatu jare ayerovia ete.

<sup>5</sup>Macedonia pe ndoyu nuvãe güive, orepuere'ã etei nduputuu opaete nduiporara vae güi. Ñru vae reta oyovaicho ore ndive oremingüiye vaerã.

<sup>6</sup>Ñrei Tumpa umbipiacatu ipiatiti vae reta. Jáeramo jae orembipiacatu Tito ou yave uvãe orepi. <sup>7</sup>Jare orepiacatu'ã Tito ou uvãe orepi vae reño. Orepiacatu ete vi nduicuaa yave quirãi pe reta pempipiacatu Tito. Echa'ã jae umimbeu oreve quirãi pe reta pipota ete cherecha vaerã, jare quirãi pepiatiti ete jocua uyeyapo vae re, jare quirãi pipota ete chembierovia. Jáeramo che ayerovia ete peré.

<sup>8</sup>Aicuaa yave quirãi che pumbipiatiti aicuatía peve vae pe, che vi chepiatiti, yepe tẽi mbovi ara rupiño pepiatiti. Ñrei añave chepiatiti'ã, yepe tẽi che pumbipiatiti aicuatía peve vae pe. <sup>9</sup>Añave ayerovia. Ñrei ayerovia'ã pepiatiti ramoño. Echa'ã pepiatiti ramo, peeya piyemingueta icavi mbae vae pepia pe oĩ vae. Jare cua jeco pegua ayerovia ma. Echa'ã mbiatiti penoi vae icavi Tumpa pe. Jáeramo ore nduyapo'ã co mbae icavi mbae vae peve. <sup>10</sup>Echa'ã mbiatiti ñanoi vae icavi yave Tumpa pe, yaeya yandiyemingueta icavi mbae vae yandepia pe oĩ vae, jare Tumpa yanderepi. Jare cua re ndarau yandepiatiti. Ñrei yandepiatiti yave upurugüirovia mbae vae reta ipiatiti rami, Tumpa yanderepita'ã tẽi.

<sup>11</sup>Echa'ã picuaa ma quirãi piñemiatangãtu ete Tumpa coti, mbiatiti penoi vae icavi Tumpa pe ramo. Echa'ã pipota picuaaca cheve pe reta penoi'ã co teco. Pepochi jocua mbaeyoa re, jare pequiye vi jese. Pipota ete cherecha vaerã. Pipota ete vi piyapo che amimbeu peve piyapo vaerã vae. Echa'ã pipota piporaraca icavi mbae vae uyapo vae pe. Aicuaa ma quirãi mbaeti etei teco penoi cua

uyeyapo vae re. <sup>12</sup>Aicuatía peve yave, aicuatia'ã icavi mbae vae uyapo vae jeco peguaño, jare aicuatia'ã vi icavi mbae vae uyeyapo chupe vae jeco peguaño. Ërei aicuatía peve picuaa vaerã quirãï pe reta orerau ete co Tumpa jovaque. Echa'ã cuarãï Tumpa uyembiadoracata co. <sup>13</sup>Jáeramo Tumpa orembipiaccatu ma. Jare nduyerovia ete Tito uyerovia peré vae re. Jare jucuarãï Tumpa orembipiaccatu. Echa'ã pe reta pembiyerovia Tito. <sup>14</sup>Echa'ã chemiari cavi Tito pe peré, jare chemara'ã jocua re. Opaete ndoe peve vae añete co. Jae ramiño vi Tito uicuaa ma añete co jocua che jae chupe peré vae. Echa'ã chemiari cavi chupe peré. <sup>15</sup>Jare Tito perau ete ma. Echa'ã imandúa quirãï piyapo jae jei peve piyapo vaerã vae, jare quirãï pembiresive cavi pipiu reve jare piñemimichi reve. <sup>16</sup>Jáeramo ayerovia peré. Echa'ã opaete pe chepuere pugüirovia catu.

### Corepoti umbati oporombori vaerã

**8** <sup>1</sup>Añave aipota aicuaaca peve quirãï upurugüirovia vae Macedonia pe uyembatimbatì vae reta uicuaaca Tumpa ipiacavi uñemee chupe reta vae. <sup>2</sup>Echa'ã uiporara ramo, yavai ete chupe reta. Ërei uyerovia. Jare yepe tẽi iparavete ete reta, ãrei jeta umee, ombori vaerã ñru upurugüirovia vae reta. <sup>3</sup>Chepuere amimbeu peve quirãï jae reta umee che chepia pe ayemingueta icavi co umee vaerã vae. Añete co, umee reta jeta ete ye chepia pe ayemingueta icavi co umee vaerã vae güi. Jare umee reta che ayocui mbae reve. <sup>4</sup>Jare uyerure oreve numbiresive vaerã jocua uipota umee vae, jucuarãï ipuere vaerã ombori ñru uñeñono tee Tumpa peguarã vae reta. <sup>5</sup>Jare uyapo reta jeta ete ye ore nuãro tẽi uyapota vae güi. Echa'ã uñemee reta yandeYa pe uyeyocui vaerã. Jayave uñeñono reta oreve vi, orembori vaerã Tumpa jei vae rupi. <sup>6</sup>Jáeramo numñera Tito opa vaerã umbati pe reta pemeeta pepiacavi jeco pegua vae. Echa'ã jae etei umbipi umbati. <sup>7</sup>Peपुरugüirovia tuicha ete co. Icavi ete peporomoe. Jeta mbaembae picuaa. Peratangãtu jare orerau ete. Opaete cua piyapo cavi. Jáeramo picuaaca vi quirãï pepiacavi ete cua pemeeta vae re.

<sup>8</sup>Cua che jae peve vae penti mboroyocui'ã co. Ërei chemiari peve cuarãï ñru vae reta uipota umee ombori vaerã ñru upurugüirovia vae reta ramo, jare cuarãï piyapo yave, picuaacata pepuruau añetete co. <sup>9</sup>Picuaa cavi co quirãï yandeYa Jesucristo uicuaaca ipiacavi. Echa'ã yepe tẽi jae icocatu ete, ãrei uyembiparavete yanderau ramo, yande yaicocatu vaerã Tumpa coti.

<sup>10</sup>Che pumbiaracuaa cua re cuarãï: Icavi co piyapo vaerã cua. Echa'ã penti año ma pe reta pipota tẽi pembori vaerã, jare pembipi pembati pemee vaerã. <sup>11</sup>Jáeramo añave jucuarãï piyapo. Echa'ã cue año pe pipota piyapo cua. Jáeramo añave opa piyapo cue año pe pipota piyapo vae. Pemee jocua penoi vae güi, pembori vaerã ñru upurugüirovia vae reta. <sup>12</sup>Echa'ã yaipota yave ñamee ñanequirẽi reve, Tumpa uipota ñamee vaerã ime ñanoi vae rupi. Tumpa uipota'ã ñamee vaerã mbaeti yave ñanoi ñamee vaerã.

<sup>13</sup>Echa'ã aipota'ã etei piyembiparavete vaerã ñru vae reta yugüireco cavi vaerã. <sup>14</sup>Ërei aipota opaete vae oyovaque yugüireco vaerã. Añave pe reta

pepuere pemee mbovi jeta penoi vae güi pembori vaerã mbaembae uata chupe vae reta. Jae ramiño vi jae reta jeta güinoi yave jare mbaembae uata peve yave, jae reta ipuereta umee peve mbovi jeta güinoita vae güi. Jáeramo jucuarãi opaete vae oyovaque yugüirecota. <sup>15</sup>Echa'ã Tumpa ñnee pe uyecuatía oĩ cuarãi: “Jocua jeta güinoi vae uasa'ã mbae güinoi, jare jocua mboviño güinoi vae pe uata'ã mbae.” Jucuarãi uyecuatía oĩ.

### Tito jare ñru reta

<sup>16</sup>Ërei amee yasurupai Tumpa pe quirãi jae umiatangãtu Tito pecoti, oremiatangãtu pecoti rami. <sup>17</sup>Echa'ã Tito uipota uyapo ore nduipota uyapo vaerã vae. Ërei jatangãtu ete pecoti ramo, jaeiño iquirëi oo pepi.

<sup>18</sup>Jare nomondo jae jupíe orerivi opaete upurugüirovia vae reta uyembatimbatí vae pe uyemingueta cavi jese vae. Echa'ã jae umimbeu cavi ñee icavi vae. <sup>19</sup>Jare jocua reño'ã. Echa'ã upurugüirovia vae reta uyembatimbatí vae uiparavo, jae oo vaerã orerupíe orembori vaerã cua mbaraviqui mbiacavi pegua re. Cua mbaraviqui nduyapo numbiadoraca vaerã yandeYa jare nduicuaaca vaerã quirãi nduipota ndoporombori. <sup>20</sup>Cuarãi nduipota nduyapo, agüiye vaerã quía orembijeco cua jeta corepoti numbatí opaete que rupi numee vaerã iparavete vae reta pe vae re. <sup>21</sup>Jecuaeño nduipota nduyapo jupi vae ñru vae reta jovaque, yandeYa jovaqueño'ã.

<sup>22</sup>Jare nomondo vi jae reta jupíe ñru orerivi. Jeta vese ma jae uicuaaca oreve quirãi jatangãtu jeta mbaembae re. Jare añave jae jatangãtu ete pererovia catu ramo. <sup>23</sup>Ime yave quía upirandu Tito re vae, pepuere pere jae co cheñru jare uparaviqui co che ndive ore pombori vaerã. Aní upirandu yave ñru orerivi reta re, pepuere pere upurugüirovia vae uyembatimbatí vae reta omondo, jare jae reta umbiadoraca co Cristo. <sup>24</sup>Jáeramo picuaaca chupe reta quirãi peau. Jucuarãi yave, ñru upurugüirovia vae uyembatimbatí vae reta vi uicuaata, jare jucuarãi uicuaata añete co mbaembae icavi vae ndoe chupe reta peré vae.

### Corepoti uyembatita vae

**9** <sup>1</sup>Tamimbeu ye peve corepoti pematita vae re. Cua corepoti rupi pepuereta pembori ñru uñeño tee Tumpa peguarã vae reta. Ërei cua picuaa ma che aicutía mbae reve. <sup>2</sup>Che aicuaa quirãi pipota ete piyapo cua. Echa'ã cua re chemiari cavi peré Macedonia pegua reta pe. Che jae chupe reta quirãi penti año ma pipota peporombori pe reta Acaya pe pico vae. Jare ñru vae reta uyandu yave quirãi pe reta pipota peporombori, jae reta vi uipota oporombori. <sup>3</sup>Ërei amondo ma orerivi reta pepi, agüiye vaerã oremiariño peré cua re, jare pemicutãro voi penoi vaerã corepoti, che jae ma rami. <sup>4</sup>Aramoi amocue Macedonia pegua reta yugüiraata cherupíe, che aa yave pepi. Jare pematit'ã yave corepoti, jae reta uicuaa yave, oremarata. Echa'ã ndoe chupe reta quirãi pe

reta pipota peporombori. Jae ramiño vi pe reta pamarata. <sup>5</sup>Jáeramo chepia pe ayemingueta icavi co ayocui vaerã orerivi reta jae reta rani yugüiraa vaerã pepi. Jucuarãi jae reta ipuereta pembori opa vaerã pembati corepoti tenonde yave pere pipota pemee vae. Jare jucuarãi yave, che aa yave pepi, uyecuaata quirãi pemee pepiacavi ramo, mbaeti ore poyocui ramoño. <sup>6</sup>Yamijaanga umaeti vae mbaembae pemee vae re. Pemandúa cua re: Mboviño oñoti vae mboviño uavirota. Jare jeta oñoti vae jeta uavirota. <sup>7</sup>Penti penti tumee iquirãi reve uipota umee rami. Agüiye quía tumee jacatãi reve ani che ayocui ramoño. Echa'ã Tumpa uau uyerovia reve umee vae. <sup>8</sup>Jare Tumpa ipuere umee peve jeta mbaembae ipiacavi jeco pegua, agüiye vaerã mbae uata peve, pe reta jecuaeño pepuere vaerã peporombori opaete mbaraviqui icavi vae re. <sup>9</sup>Echa'ã Tumpa ñee pe uyecuatía oĩ cuarãi:

“Jeta umee iparavete vae reta pe.

Jupi vae uyapo vae re Tumpa jaeño mai pegua imanduata.”

Jucuarãi uyecuatía oĩ. <sup>10</sup>Tumpa umee yandevé ñaneremitirã ñañoti vaerã, jare yanderembiurã yau vaerã. Jae ramiño vi umeeta peve opaete, pepuere vaerã piyapo icavi vae, jare umivendiseta ñru vae reta jupi vae piyapo vae rupi. <sup>11</sup>Jucuarãi pe reta penoita opaete mbaembae icavi vae, pepuere vaerã jeta pemee. Jare ore ndugüiraa yave ñru vae reta pe pemeeta vae, jae reta umeeta yasurupai Tumpa pe. <sup>12</sup>Echa'ã piyeyocui yave Tumpa pe cuarãi, pemeeta ñru uñeño tee Tumpa peguarã vae reta pe mbaembae uata chupe reta vae. Ërei cuaño'ã uyeyapota. Echa'ã cuarãi piyapo yave, jeta vae umeeta yasurupai tuicha Tumpa pe. <sup>13</sup>Jare piyeyocui yave Tumpa pe pemeeta chupe reta vae rupi, jae reta umbiadorata Tumpa peré. Echa'ã cuarãi picuaacata chupe reta quirãi piyapo cua icavi vae, ñee icavi vae Cristo regua perovia ramo. Jare jae reta umbiadorata Tumpa jeta pemeeta chupe reta jare opaete vae pe vae jeco pegua. <sup>14</sup>Jare jae reta uyerureta Tumpa pe peré, jare perauta Tumpa ipiacavi uyecuaa peré vae jeco pegua. <sup>15</sup>Ñamee yasurupai Tumpa pe regalo jae umee yandevé vae re. Yandepuere'ã etei yaicuaa cavi cua regalo Tumpa umee yandevé vae.

### Mbaepuere Pablo güinoi vae

**10** <sup>1</sup>Che etei pumiñera cua re. Cristo umee cheve añemimichi jare chepiaguasu vaerã. Jáeramo chepuere pumiñera cuarãi, yepe tãi amocue vae jei añemimichi ete pepi aĩ rambueve, ërei aĩ'ã yave pepi chemiari peve aquíye mbae reve. <sup>2</sup>Ërei che pumiñera cua re. Echa'ã aipota'ã añeengata peve aa yave pepi. Ërei chepia pe ayemingueta aramoi icavi co añeengata vaerã amocue pepite pe ñugüinoi vae pe. Echa'ã jae reta ipia pe uyemingueta tãi ore nduico ore ndoe vae rupiño. <sup>3</sup>Ërei yepe tãi ore nduico cua ivi pe, ërei nduiporu'ã orembaepuereño nuñerãro vaerã aña guasu ndive. <sup>4</sup>Echa'ã ore nuñerãro'ã orembaepuere peño. Ore nuñerãro Tumpa imbaepuere tuicha vae pe, orepuere vaerã numiamiri aña guasu, yepe tãi imbaepuere tuicha co. <sup>5</sup>Jucuarãi nduicuaaca añete'ã co upurugüirovia mbae vae reta ipiyemingueta jare opaete moromboe aña guasu uiporu agüiye

vaerã ñru vae reta uicuaa Tumpa vae. Jare jucuarãi nduyapo opaete vae ipia pe uyemingueta vaerã Cristo uipota ipia pe uyemingueta vaerã rami. <sup>6</sup>Jare jeta pe reta pepia pe piyemingueta yave Cristo uipota pepia pe piyemingueta vaerã rami, chepuere aiporaraca opaete jucuarãi'ã uipota ipia pe uyemingueta vae reta pe.

<sup>7</sup>Pe reta pembutuicha ñru vae reta mbae uyecuaa vae re. Aramoi quía uicuaa cavi jae co Cristo imbae. Ërei tuicuaa cavi ore vi co jae Cristo imbae, jae rami. <sup>8</sup>YandeYa umee oreve mbaepuere orepuere vaerã pombori. Umee'ã oreve pumbiavai vaerã. Jare cua mbaepuere nonoi vae jecuañotai co aipiu. Ndarau chemara jese. <sup>9</sup>Jáeramo agüiye pepia pe piyemingueta che aipota puminguíye aicutía peve vae pe. <sup>10</sup>Echa'ã amocue vae jei cuarã: “Pablo uicutía yandeve vae pe jei yandeve jeta mbaembae yavai vae yayapo vaerã, jare uicutía mbaepuere güinoi vae rami. Ërei jae etei oĩ yave yandepi, uyecuaa quirã jae mbaeti etei mbaepuere güinoi, jare imiari yave, ñariro co.” Jucuarãi jei. <sup>11</sup>Ërei jucuarãi jei vae tuicuaa cua: Nduicuaaca orembaepuere nduicutía peve vae pe, pepi noi'ã yave. Jae ramiño vi nduicuaacata orembaepuere nduyapota vae pe, pepi noi yave.

<sup>12</sup>Ime amocue vae uyembutuicha vae. Nduipota'ã etei nduyemboyovaque jae reta ndive. Nduipota'ã vi ndoe peve mbaraviqui ore nduyapo vae icavi ete co mbaraviqui jae reta uyapo vae güi. Jae reta iyaracuaa'ã. Echa'ã uñeãa reta iyemingueta rupiño, jare jei reta mbaraviqui jae reta uyapo vae icavi ete mbaraviqui ñru reta uyapo vae güi. <sup>13</sup>Ërei ore ndarau ndoe ore nduyapo penti mbaraviqui icavi vae, nduyapo'ã yave. Echa'ã ore nduyapo mbaraviqui icavi vae Tumpa umee oreve nduyapo vaerã vae. Jare Tumpa umaño oreré nduyapo vaerã mbaraviqui icavi vae pepite pe vi. <sup>14</sup>Tumpa etei umee oreve mbaepuere cua mbaraviqui nduyapo vaerã. Nduyavi'ã. Añete co, nduyavita tēi, Tumpa umee'ã yave oreve cua mbaepuere. Jáeramo ndoo ma pepi numimbeu vaerã peve ñee icavi vae Cristo regua. <sup>15</sup>Ndarau etei ndoe ore nduyapo mbaraviqui icavi vae ñru vae reta uyapo vae. Ërei nduipota uyembutuicha vaerã pepurugüirovia. Jare jucuarãi yave, pepuereta orembori jeta ete mbaraviqui orepuere vaerã nduyapo, Tumpa uipota nduyapo vaerã vae rupi, <sup>16</sup>jare orepuere vaerã numimbeu ñee icavi vae perenta cuti rupi ñugüinoi vae reta pe. Echa'ã nduipota'ã etei ndoe ore nduyapo mbaraviqui icavi vae ñru vae uyapo Tumpa jei vae rupi vae.

<sup>17</sup>Ërei ime yave quía uipota uyembicate vae, tuyembicate yandeYa re. <sup>18</sup>Echa'ã yandeYa umbutuichaca vae uyembutuichacata co, uyembutuichaca'ã co jaeiño.

### Pablo jare temimondo añetete mbae vae reta

**11** <sup>1</sup>Aipota pepiaguasu vaerã cheve, chemiari rambueve iyaracuaa mbae vae rami. Jáeramo pepiaguasu cheve. <sup>2</sup>Añemiagüiro ete peré. Echa'ã Tumpa umee cheve jucuarã añemiagüiro vaerã peré. Echa'ã aipota pumee Cristo pe, penti cuñatai icavi vae ndeño cuimbae güireco vae

penti cuimbae ndive umenda yave uñemee ime pe rami. <sup>3</sup>Ërei chepia pe ayemingueta quirãï aramoi petavita, agüiye vaerã pepia pe piyemingueta cavi Cristo re. Echa'ã jucuarãï jocua mboi ipoqui upurumbitavi vaerã vae umbitavi Eva. <sup>4</sup>Echa'ã ou yave pepi quía Jesús regua umimbeu peve vae, chupe pepiaguasu ete co, yepe tẽi jae umimbeu'ã Jesús regua ore numimbeu peve rami. Jae ramiño vi pepiaguasu co chupe jae umimbeu peve yave pembiresive vaerã ñru espíritu tenonde yave Espíritu pembiresive vae güi uyuavi vae. Jae ramiño vi pepiaguasu co chupe jae umimbeu peve yave ñru ñee icavi echa vae tenonde yave ñee icavi vae perovia vae güi uyuavi vae. <sup>5</sup>Ërei che arovia jocua temimondo tenondegua vae reta pe reta pere chupe vae jeta'ã etei uyapo Tumpa pe che ayapo vae güi. <sup>6</sup>Yepe tẽi chepoqui'ã chemiari vaerã, ãrei aicuaa catu chemiari peve jese vae. Jare jecuaeño nducuaaca cua peve opaete nduyapo vae rupi.

<sup>7</sup>Amimbeu peve yave ñee icavi vae Tumpa güi ou vae acovara'ã etei peve mbae re. ¿Ayapo echa ra mbaeyoa peve? Echa'ã che añemimichi ayapo vaerã icavi vae peve. <sup>8</sup>Ambiresive ñru upurugüirovia vae reta uyembatimbatì vae güi corepoti agüiyeta tẽi ambiresive chugüi reta vae. Echa'ã jae reta umbiepi cheve, chepuere vaerã ayeyocui peve. <sup>9</sup>Jare aico pepi rambueve mbae uata cheve yave, mbaeti quía pepite pe amambeco chembori vaerã. Echa'ã yanderivi Macedonia güi yugüeru vae reta güeru cheve mbae uata cheve vae. Jare jucuarãï aico, agüiye vaerã pumambeco chembori vaerã. Jare jecuaeño aicota jucuarãï. <sup>10</sup>Ayerovia ete cua re, jare jecuae chemiarita jese opaete Acaya rupi. Mbaetita quía ipuere chemiqui. Echa'ã Cristo ico chepia pe. Jáeramo aicuaa cua che jae vae añete vae co. <sup>11</sup>Cua uipota'ã jei che puau'ã co. Tumpa uicuaa puau co.

<sup>12</sup>Ërei jecuaeño ayapo vae jecuaeñota co ayapo. Echa'ã jocua ñru reta uipota ete tẽi uyemboyovaque ore ndive, ipuere vaerã uyembutuicha. Ërei cuarãï jecuae ayapo yave, ndarau ipuere. <sup>13</sup>Jae reta temimondo añetete vae reta'ã co. Uparaviqui reta upurumbitavi vaerã. Jae reta uipota ñru vae reta ipia pe uyemingueta jese vaerã jae reta co Cristo jemimondo reta. <sup>14</sup>Jare agüiye ñanepiacañi cua re. Echa'ã Satanás etei ipuere uyembiambie, uyecuaa vaerã penti ángel tembipe pe ico vae rami. <sup>15</sup>Jáeramo penti miacañi'ã co Satanás pe uyeyocui vae reta uyembiambie yave uyecuaa vaerã jupi vae uyapo vae reta rami. Ërei taicue rupi Tumpa uiporacata chupe reta uyapo vae jeco pegua.

### Pablo uiporara

<sup>16</sup>Cua che jae ye peve: Agüiye quía ipia pe tuyemingueta che co jae iyaracuaa mbae vae. Ërei jucuarãï pepia pe piyemingueta yave, pepiaguasu cheve penti iyaracuaa mbae vae pe pepiaguasu rami, che vi ayembicate vaerã michi pegua. <sup>17</sup>Aicuaa cavi chepuere ayembicate. Ërei cuarãï chemiari yave, chemiari añ penti iyaracuaa mbae vae imiari rami. Chemiari'ã co añ yandeYa uipota chemiari vaerã

rami. <sup>18</sup>Jeta vae uyembicate ñugüinoi jae retaiño uyapo vae re. Jáeramo che vi ayembicateta. <sup>19</sup>Echa'ã pe reta pepiaguasu piyerovia reve iyaracuaa mbae vae reta pe, pe reta pepia pe piyemingueta pearacuaa ramo. <sup>20</sup>Echa'ã pepiaguasu pemimbaraviqui tanta piyeyocui vaerã chupe vae reta pe, jare pecorepoti umingasta vae reta pe, jare pemitavi vae reta pe, jare pereriro vae reta pe, jare ocua perova re vae reta pe. <sup>21</sup>Ërei pe reta pere ore orepirãta'ã co. Che jae peve añete co jocua pere oreve vae. Ërei ime yave quía ipuere uyembicate vae, che vi chepuere ayembicate. Añave chemiari aĩ iyaracuaa mbae vae imiari rami.

<sup>22</sup>Jae reta jei: “Ore co jae hebreo reta.” Che jae vi co. Jare jei reta: “Ore co jae Israel pegua reta.” Che jae vi co. Jare jei reta: “Ore co jae Abraham ñemonaa reta pegua.” Che jae vi co. <sup>23</sup>Jare jei reta: “Ore nduyeyocui Cristo pe.” Che ayeyocui ete Cristo pe chugüi reta. Ayemingueta ye aĩ iyaracuaa mbae vae uyemingueta rami. Che aparaviqui tanta ete chugüi reta. Jeta vese ñru vae reta chenupa chicote pe - chepuere'ã opa aipapa. Jeta vese añeñonoca peresoriru pe. Jeta vese amano seri. <sup>24</sup>Pandepo vese judío reta chenupa chicote pe. Chenupa ñave ñave uiporu cheré treinta y nueve vese chicote. <sup>25</sup>Mbapi vese ñru vae reta chenupa ivira pe. Penti vese cheapi reta ita pe. Mbapi vese chalana guasu aa i guasu rupi pipe vae uyeca. Penti vese apita i guasu pe etei penti piare jare penti ara. <sup>26</sup>Jeta ete aguata opaete que rupi. I chereraa seri. Upurupiãro vae reta cheraãro aguata vae rupi. Cherentaigua reta oyovaicho che ndive. Jae ramiño vi judío mbae vae reta oyovaicho che ndive. Amano seri tenta guasu reta pe jare tape rupi jare i guasu pe. Jare upurugüirovia-raanga vae reta oyovaicho che ndive. <sup>27</sup>Tanta aparaviqui aiporara reve. Jeta vese aque cavi'ã. Chiyembai jare cheúe. Jeta vese uata cheve tembú, roi cheve jare uata cheve temimonde.

<sup>28</sup>Jare ñru mbaembae amimbeu'ã peve vae uyeyapo cheve chembiavai vaerã. Jare opa ara rupi jeta ete chepia pe ayemingueta opaete upurugüirovia vae uyembatimbati vae reta re. <sup>29</sup>Ime yave quía ipirãta'ã ipurugüirovia re vae, che vi añemñru jae ndive chepia pe. Ime yave quía ñru vae umbiavai vae, che vi chepochi jese. <sup>30</sup>Pipota yave ayembicate vaerã, ayembicateta co jocua mbaembae chepirãta'ã co uicuaaca vae re. <sup>31</sup>Tumpa uicuaa cheapu'ã etei aĩ. Jae co yandeYa Jesús Tu. Opaete vae umbiadorata jaeño mai pegua. <sup>32</sup>Damasco pe aico yave, Damasco pegua reta juvicha mburuvicha guasu Aretas jee vae pe uyeyocui vae uipota tēi chepisi. Jáeramo oyocui sundaro reta uãro vaerã opaete Damasco jonque reta. <sup>33</sup>Ërei cheñru reta chembigüeyi penti canasta pe penti ventana Damasco iquesemba ita pegua vae pe oĩ vae rupi. Jare jucuarãi asi Damasco pegua reta juvicha güi, agüiye vaerã chepisi.

### YandeYa umee ipiacavi Pablo pe

**12** <sup>1</sup>Pipota ayembutuicha vaerã, yepe tēi icavi'ã co ayembutuicha vaerã. Ërei tamimbeu peve quirãi yandeYa uechaca jare uicuaaca cheve mbaembae. <sup>2</sup>Che co jae penti cuimbae Cristo re güirovia vae. Uasa mai catorce año ayereraa vae ara ivate ete oĩ vae pe. Aicuaa'ã oo ra cherete ani



oo'ã ra. Tumpaño uicuaa. <sup>3-4</sup>Jare aicuaa quirãï ayereraa ara pe, jare joco pe ayandu ñee reta jupi'ã penti cuimbae ñee uaa vaerã vae. Tumpa umaño'ã penti cuimbae re ñee omoẽ jocua ñee reta re. Aicuaa'ã oo ra cherete ani oo'ã ra. Tumpaño uicuaa. <sup>5</sup>Ayembicateta tẽi cua re. Ërei ndarau ayembiccate. Jaño ayembicateta jocua mbaembae chepirãta'ã co uicuaaca vae re. <sup>6</sup>Ërei ndarau chemiari iyaracuaa mbae vae imiari rami, yepe tẽi ayembiccate. Echa'ã chemiarita tẽi añete vae re. Ërei ndarau chemiari jese, agüiye vaerã quía chembutuicha jese. Echa'ã aipota ïru vae reta ipia pe uyemingueta vaerã mbae ayapo vae uecha vae jare cheporomboc uyandu vae reño.

<sup>7</sup>Jeta vese yandeYa uicuaaca cheve mbaembae. Jare agüiye vaerã ayembiccate ete cua re, ou cheve penti mbaerasi chemambeco vaerã. Chemambeco penti yuu yandesoo pe oï vae yanemambeco rami. Jocua mbaerasi Satanás ombou uiporaraca cheve vaerã. <sup>8</sup>Ayerure yandeYa pe mbapi vese cua mbaerasi re, upita vaerã chegüi. <sup>9</sup>Ërei yandeYa jei cheve cuarãï: “Tamee ndeve chepiacavi nemiaguanta vaerã. Echa'ã nde nepirãta'ã ramo, chepuere aicuaaca quirãï tuicha ete co chembaepuere.” Jucuarãï jei. Jáeramo ayerovia chepirãta'ã ramo. Echa'ã chepirãta'ã ramo, Cristo umee cheve imbaepuere. <sup>10</sup>Añete co, chepirãta'ã. ïru vae reta chererïro. Mbaembae uata cheve. ïru vae reta uyapo icavi mbae vae cheve. Yavai ete aico vaerã. Ërei opaete cua mbaembae uyeyapo cheve yave Cristo pe ayeyocui ramo, ayerovia co. Echa'ã che etei chepirãta'ã yave, yandeYa chemimirãta.

<sup>11</sup>Ayeyapo ma penti iyaracuaa mbae vae rami ayembiccate vaerã. Pe reta etei pipota jucuarãï ayapo vaerã. Pe reta chembicatecata tẽi co. Echa'ã jocua temimondo tenondegua vae reta pe reta pere chupe vae jeta'ã etei uyapo Tumpa pe che ayapo vae güi. Chepuere jae cua, yepe tẽi che mbae'ã etei co. <sup>12</sup>Añete co, che aicuaaca peve quirãï che co jae penti temimondo añetete vae pepi aico rambueve. Echa'ã aparaviqui chepiaguasu reve. Ayapo miacañi reta picuaa vaerã. <sup>13</sup>¿Maera pa pepia pe piyemingueta che ayapo'ã pepite pe ïru upurugüirovia vae uyembatimbatì vae reta ipite pe ayapo rami? Añete co, pemiëpi'ã cheve jae reta umbiëpi cheve rami. Jocua icavi'ã echa peve yave, chembiasa.

### **Pablo umimbeu oo yeta co Corinto pegua reta ipi**

<sup>14</sup>Mase, mocui vese ma apou pepi. Jare añave ayeyapicatu aï, aa ye vaerã pepi. Jare ndarau aipota pemiëpi vaerã cheve. Echa'ã aipota'ã pecorepoti. Pombori vaerãño aipota. Che co jae peru rami. Icavi co tu reta uñuvatu vaerã mbaembae umee vaerã isambiai reta pe. Yae'ã co sambiai reta pe uñuvatu vaerã mbaembae umee vaerã tu pe. <sup>15</sup>Chequirëi amingasta chembaembae jare chequirëi vi ayemingasta ayerovia reve chepuere vaerã pombori. Yepe tẽi pe reta cherau ete'ã, ërei che puau ete.

<sup>16</sup>Ërei aramoi amocue vae jeita cuarãï: “Añete co, Pablo jei'ã yandev yambiëpi vaerã chupe. Ërei jae ipoqui upurumbitavi vaerã. Yanembitavi co.” Aramoi jucuarãï jeita. <sup>17</sup>Che pumbitavica'ã etei jocua amondo pepi vae reta



pe. <sup>18</sup>Amiñera Tito oo vaerã pepi, jare amondo jae jupíe ñru yanderivi. Tito pembitavi'a etei co. Jae uyapo Espíritu Santo imbaepuere pe che ayapo vae rami.

<sup>19</sup>Aramoi pepia pe piyemingueta quirãí añave oremiari cuarãí nduyerepi vaerãño. Ërei jucuarãí'ã co. Oremiari cuarãí Tumpa jovaque Cristo re ndugüirovia ramo. Jare opaete nduyapo pe reta pepirãta vaerã pepurugüirovia re. Echa'ã ore puau ete. <sup>20</sup>Ërei aa ye yave pepi, chepia pe ayemingueta aramoi aechata pico'ã che aipota pico vaerã rami, jare aramoi jocua jeco pegua che ayapota pe reta pipota'ã ayapo vaerã vae. Echa'ã chepia pe ayemingueta aramoi piyeaca uyupii, peacataa piyee, pepochi piyupe, piyembiyao piyugüi, pemiari ndaye re ñru pe, piñera piyee, piyembicate jare piñeengueta piyupe. <sup>21</sup>Jae ramiño vi chepia pe ayemingueta aramoi Tumpa umañota cheré chemara vaerã pegüi, aa ye yave pepi. Echa'ã aramoi chepiatiti eteta jeta pepite pe ñugüinoi vae mbaeyoa uyapo vae re, uyerova'ã yave teco pichii vae güi, jare aguasa uyapo vae güi, jare mbiquere uyapo vae güi.

### Aracuaa reta jare saludo reta

**13** <sup>1</sup>Mocui vese ma apou pepi. Añave aa yeta pepi. Ime yave quía teco uyapo vae, timiari mocui ani mbapi uicuaa cavi jeco regua vae, yaicuaa vaerã añete co. <sup>2</sup>Amimbeu ma peve taicue rupi pepi aa yave, jare añave aï'ã pepi, ërei amimbeu ye aï peve. Cua aicuatía opaete mbaeyoa uyapo vae reta pe jare opaete ñru reta pe: Che aa ye yave pepi, aiporaracata co iyoa vae reta pe. <sup>3</sup>Jocua uicuaacata peve quirãí Cristo imiari peve che rupi. Echa'ã cua pipota picuaa. Jare Cristo ipuere'ã vae rami'ã co peré. Echa'ã uicuaaca peve imbaepuere. <sup>4</sup>Echa'ã yepe tēi Cristo mbaeti mbaepuere güinoi vae rami co uyecutu curusu re yave, ërei icove ye Tumpa imbaepuere rupi. Jae ramiño vi ore etei mbaeti mbaepuere nonoi, ërei picuaata quirãí nonoi tecove ipiau vae Cristo güi Tumpa imbaepuere rupi. Jáeramo nonoita co mbaepuere pepite pe.

<sup>5</sup>Jecuaño pemaes piyee picuaa vaerã pe reta co upurugüirovia vae añetete vae reta. Picuaa co quirãí Jesucristo ico pepia pe, pe reta co jae upurugüirovia vae añetete vae reta yave. <sup>6</sup>Ërei aipota picuaa vaerã ore co jae upurugüirovia vae añetete vae reta. <sup>7</sup>Jare nduyerure Tumpa pe agüiye vaerã piyapo mbae icavi mbae vae. Nduipota'ã cua, ñru vae reta ipia pe uyemingueta vaerã ore nduyapo icavi vae. Jaeño nduipota pe reta piyapo vaerã icavi vae, yepe tēi aramoi ñru vae reta ipia pe uyemingueta ore nduyapo'ã icavi vae. <sup>8</sup>Echa'ã nonoi'ã mbaepuere ndoyovaicho vaerã añete vae ndive. Jaeño orepuere nuñemñiru añete vae ndive. <sup>9</sup>Pe reta pepirãta yave pepurugüirovia re, ore nduyerovia, yepe tēi pere ore orepirãta'ã co. Jare cua re nduyerure: Tumpa tapemimñirãta ete pepurugüirovia re. <sup>10</sup>Jáeramo aicuatía peve cuarãí pepi aï'ã rambueve, agüiye vaerã aiporu mbaepuere yandēYa umee cheve vae aiporaraca vaerã peve pepi aa yave. Echa'ã yandēYa umee cheve jocua mbaepuere pombori vaerã, aiporaraca peve vaerãño'ã.

<sup>11</sup>Jaeño ma, cherivi reta. Piyerovia. Piñemimñirãta pepurugüirovia re. Piyembipiacatu. Pico cavi pepiacatu reve penti ramiño. Jare Tumpa etei

oĩta pe ndive. Tumpa yanderau jare yanembipiãcatu. <sup>12</sup>Saludo reta piyapo piyupe yave, piñecuãva piyerau reve. <sup>13</sup>Opaete uñeño tee Tumpa peguarã vae reta jei peve Tumpa ndiveño peĩ.

<sup>14</sup>YandeYa Jesucristo tumee opaete peve ipiacavi. Tumpa tumee opaete peve ipuruau. Espíritu Santo tumee opaete peve yerovia jae uñemiĩru pe ndive ramo. Amén.

# LA CARTA DEL APOSTOL SAN PABLO A LOS GÁLATAS

---

**1** <sup>1</sup> Che co jae Pablo. Che co jae Jesucristo jemimondo. Cuimbae reta'ã cheparavo, jare cuimbae reta'ã chemondo. YandeRu Tumpa jare Jesucristo chemondo. Tumpa umbijecove ye Jesucristo güeru umanocue vae reta ipite güi. <sup>2</sup> Che jare opaete yanderivi che ndive ñugüinoi vae reta nduicuatía cua tupapire opaete pepurugüirovia vae reta Galacia rupi piyembatimbati vae pe. <sup>3</sup> YandeRu Tumpa jare yandeYa Jesucristo tumee peve ipiacavi jare ipiacatu. <sup>4</sup> YandeYa Jesucristo uñemee umano vaerã yanembaeyoa reta re, yanderepi vaerã teco icavi mbae vae ivi pegua güi. Echa'ã cua co jae yandeRu Tumpa jei vae. <sup>5</sup> YandeRu Tumpa tuyembiadoraca jaeño mai pegua. Amén.

## Ñee icavi vae pentiño co

<sup>6</sup> Chepiacañi ete quirãi imambae ete piyembopiaca Tumpa güi perovia vaerã ñru ñee icavi echa vae. Echa'ã Tumpa peparavo Cristo ipiacavi rupi. <sup>7</sup> Ërei mbaeti co ñru ñee icavi vae. Jaeño ime amocue pembopa vae. Echa'ã jae reta uipota perovia vaerã ñru ñee icavi echa vae ñee icavi vae Cristo regua ipepica pe. <sup>8</sup> Ërei numimbeu ma peve ñee icavi vae. Jare ime yave quía ñru ñee icavi echa vae umimbeu peve vae - ore yepe ani penti ángel ara güi ou vae yepe - Tumpa tuyapo mbae icavi mbae vae chupe. <sup>9</sup> Cua co tenonde yave ndoe ma peve. Ërei añave amimbeu ye peve. Perovia co ñee icavi vae. Ime yave quía ñru ñee icavi echa vae umimbeu peve vae, Tumpa tuyapo mbae icavi mbae vae chupe. <sup>10</sup> Aipota'ã etei ivi pegua reta chembutuicha vaerã. Aipota Tumpaño chembutuicha vaerã. Aipota'ã etei vi ivi pegua reta uyemingueta cavi vaerã checoti. Echa'ã aipota yave mona ivi pegua reta uyemingueta cavi vaerã checoti, ndarau tẽi ayeyocui Cristo pe.

### Quirái Pablo uyeyapo Jesucristo jemimondorá

<sup>11</sup>Ērei aipota picuaa vaerã, cherivi reta, cua: Cua ñee icavi vae che amimbeu vae ou'ã co cuimbae güi. <sup>12</sup>Echa'ã mbaeti penti ave cuimbae umimbeu cheve. Ayemboe'ã etei jese cuimbae güi. Jaeño Jesucristo uicuaaca cheve.

<sup>13</sup>Pe reta picuaa ma quirái judío reta iporomboe re che aicose. Echa'ã ayapose jeta ete mbae icavi mbae vae Tumpa uiparavo vae reta coti, jare aipota tēi opa amicañi. <sup>14</sup>Jare judío reta iporomboe re cheratangātu ete jeta cherentaigua cheaveigua reta güi. Echa'ã cheratangātu ete chetenondegua reta iporomboe re. <sup>15</sup>Ērei Tumpa cheñoño tee iyupeguarã ndei chesi güi aa mbove, jare cheparavo ipiacavi jeco pegua. Jare jae uipota ma yave, <sup>16</sup>uicuaaca Tai cheve, che amimbeu vaerã judío mbae vae reta pe. Cua uyeyapo yave, ayemingueta'ã jese quía ndive. <sup>17</sup>Aa'ã vi Jerusalén pe Tumpa jemimondo reta tenonde Tumpa omondo chegüi vae ñügüinoi vae pe. Ērei aa Arabia pe, jare joco güi ayu ye Damasco pe.

<sup>18</sup>Cua jaicue rupi, mbapí año uasa ma yave, aa Jerusalén pe ayemingueta vaerã Pedro ndive, jare apita jae ndive quince ara. <sup>19</sup>Ērei aecha'ã penti ave ñru temimondo. Jaeño aecha Jacobo - jae co yandeYa tiví. <sup>20</sup>Mase, cua aicuatía peve vae añete vae co. Tumpa uicuaa catu añete vae co.

<sup>21</sup>Cua jaicue rupi aa Siria jare Cilicia pe. <sup>22</sup>Jare Cristo re güirovia vae Judea pe uyembatímbatí vae reta checuaa'ã, cherecha'ã ramo. <sup>23</sup>Jaeño jae reta uyandu jei cuarái: “Jocua cuimbae icavi mbae vae uyapose yandeve vae añave umimbeu mburugüirovia tenonde yave uipota tēi opa umicañi vae.” Jucuarái uyandu jei. <sup>24</sup>Jare umbiadora reta Tumpa chereco pegua.

**2** <sup>1</sup>Cua jaicue rupi, catorce año uasa ma yave, aa ye Jerusalén pe Bernabé ndive, jare araa vi Tito. <sup>2</sup>Jare aa, Tumpa uicuaaca cheve aa vaerã ramo, jare amimbeu cavi chupe reta jocua ñee icavi vae amimbeu judío mbae vae reta pe vae. Ērei amimbeu rani itenondegua reta peño. Echa'ã aipota ayemingueta cavi jae reta ndive, jae reta uicuaa cavi vaerã jocua jecuaeño amimbeu vae. <sup>3</sup>Jare ipuere'ã quía umicircuncidaca Tito che ndive oí vae, yepe tēi jae griego co, <sup>4</sup>jare yepe tēi amocue mbaeti añetete upurugüirovia vae reta uique viari orepíte pe. Echa'ã uipota uecha viari quirái ra nduico. Echa'ã uicuaa reta ore numimbeu co quirái Cristo Jesús oreyora ma mboroyocui güi. Echa'ã uipota tēi nduico ye vaerã mboroyocui re. <sup>5</sup>Ērei nuñemaño'ã etei jese reta. Echa'ã nduipota jecuaeño penoi vaerã ñee icavi vae añetete vae.

<sup>6</sup>Ērei itenondegua uyembutuichaca echa vae reta ipuere'ã etei umiñru ñee amimbeu vae ndive. Yepe tēi tenonde yave uyembutuichaca reta co, ěrei jocua uipota'ã jei mbae cheve. Echa'ã Tumpa uau'ã penti vaño ñru vae güi. <sup>7</sup>Ērei jae reta uicuaa ma Tumpa umee co cheve amimbeu vaerã ñee icavi vae judío mbae vae reta pegua, Pedro pe umimbeu vaerã ñee icavi vae judío reta pegua umee rami. <sup>8</sup>Echa'ã Tumpa omondo Pedro ico vaerã jemimondorá judío reta pegua. Jae ramiño vi jae chemondo aico vaerã

jemimondorã judío mbae vae reta pegua. <sup>9</sup>Jáeramo uicuaa reta ma yave quirãi Tumpa umee cheve ipiacavi, Jacobo, Cefas jare Juan - jae reta co itenondegua echa vae reta - chepopisi jare uipopisi vi Bernabé, uicuaaca vaerã penti rami co noĩ, jare ore ndoo vaerã judío mbae vae reta pe, jare jae reta yugüiraa vaerã judío reta pe. <sup>10</sup>Jaeño jei reta oreve oremandúa vaerã iparavete vae reta re. Ërei che etei aipota ete ayapo jucuarãi.

### Pablo umbijeco Pedro Antioquía pe

<sup>11</sup>Ërei Pedro ou yave Antioquía pe, chupe etei ambieta, teco güinoi ramo. <sup>12</sup>Echa'ã ndei amocue judío reta Jacobo güi yugüeru mbove, Pedro ucaruñoi judío mbae vae reta ndive. Ërei yugüeru ma yave, Pedro ucaru'ã ma judío mbae vae reta ndive, jare opou'ã ma ipi. Echa'ã uquiye judío reta güi. <sup>13</sup>Jayave ïru judío reta vi uyemboe Pedro jeco re, jare uyapo reta jae uyapo rami. Jáeramo Bernabé vi uñemaño chupe reta, uyapo vaerã jae reta uyapo rami. <sup>14</sup>Ërei aecha yave uyapo'ã jupi añete vae ñee icavi vae pegua rupi, che jae Pedro pe opaete vae jovaque: “Yepe tõi nde co jae penti judío, ãrei ndico judío mbae vae reta yugüireco rami, ndico'ã judío reta yugüireco rami. Jáeramo ¿maera pa ndipota judío mbae vae reta yugüireco vaerã judío reta yugüireco rami?” Jucuarãi jae chupe. <sup>15</sup>Ore mbaeti etei co judío mbae vae reta - mbaeyoa pegua ndoe chupe vae. Ërei yepe tõi ore co jae judío reta etei, <sup>16</sup>nduicuaa ndarau quía ipuere uyembujupica mboroyocui jei vae re uyapo vae rupi. Jaeño ipuere uyembujupica güirovia yave Jesucristo re. Jáeramo ore vi ndugüirovia ma Jesucristo re nduyembujupica vaerã mburugüirovia Cristo re nonoi vae rupi, nduyembujupica'ã mboroyocui jei vae re nduyapo vae rupi. Echa'ã ndarau quía uyembujupica mboroyocui jei vae re uyapo vae rupi.

<sup>17</sup>Jare nduipota yave nduyembujupica Cristo re, ore vi nduyecuaa mbaeyoa pegua reta. Ërei yepe tõi nduyecuaa cuarãi, ãrei Cristo oreapo'ã etei co mbaeyoa pegua retarã. <sup>18</sup>Echa'ã aipota yave ayapo ye jocua ambai vae, añete co che ayeyapo mbaeyoa peguarã. <sup>19</sup>Mboroyocui jei vae rupi amano ma co. Jáeramo añave che co jae penti umano ma mboroyocui coti vae rami. Jare jáeramo añave chepuere ayeyocui Tumpa pe. <sup>20</sup>Cristo umano curusu re yave, che amano vi jae ndive. Jáeramo aicove'ã ma, jaeño Cristo icove chepia pe. Jare cua ivi pe aico rambueve, aico co mburugüirovia Tumpa Tai re anoi vae re. Echa'ã jae cherau, jare uñemee umano vaera cheré. <sup>21</sup>Arĩro'ã Tumpa ipiacavi. Echa'ã mboroyocui jei vae re yayapo vae rupi yandepuere yayembujupi yave mona, Cristo umanoiñota tõi.

### Mboroyocui ani mburugüirovia

**3** <sup>1</sup>Galacia pegua reta, pe reta co jae iyaracuaa mbae vae reta rami. ¿Quía pa pembĩtavi, agüiye vaerã perovia añete vae? Echa'ã perovaque etei amĩmbeu cavi ma quĩrai Jesucristo uyecutu curusu re. <sup>2</sup>Cuaño aipota pemĩmbeu vaerã cheve: ¿Pembĩresive pa Espĩritu Santo mboroyocui jei vae

re piyapo vae rupi, ani ñee icavi vae piyandu yave pepurugüirovia ramo?  
 3 ¿Pearacuaa'ã etei pa co? Pe reta pembipi Espíritu Santo rupi. ¿Piñemimirātata pa pe retaiño pepuere piyapo vae rupi? 4 ¿Piporaraíño ma pa jeta mbaembae? Quirāi mona agüiye piporaraíño. 5 Tumpa umee peve Espíritu Santo, jare uyapo miacañi reta pepite pe. ¿Uyapo pa cua mbaembae mboroyocui jei vae re piyapo vae rupi, ani ñee icavi vae piyandu yave pepurugüirovia ramo?

6 Jucuarāi vi Abraham güirovia Tumpa, jare Tumpa umbujupi ipurugüirovia jeco pegua. 7 Jáeramo picuaa co cua: Mburugüirovia güinoi vae reta co jae Abraham tai reta rami. 8 Tumpa ñee pe uyecuatía oĩ ñee icavi vae Tumpa umimbeu Abraham pe vae. Tumpa umimbeu chupe ndei uyeyapo mbove. Echa'ã jei Abraham pe cuarāi: “Nde rupi opaete ivi pegua reta amivendiseta.” Jucuarāi jei chupe. Echa'ã Tumpa uicuaa ndei uyeyapo mbove quirāi umbujupita judío mbae vae reta ipurugüirovia jeco pegua. 9 Jáeramo Tumpa añave umivendise mburugüirovia güinoi vae reta, Abraham umivendise rami. Echa'ã Abraham vi güinoi mburugüirovia.

10 Opaete uipota uyembujupi mboroyocui jei vae re uyapo vae rupi vae reta jecuaeño teco güinoi. Echa'ã Tumpa ñee pe uyecuatía oĩ cuarāi: “Tuyembijeco toĩ jocua jecuaeño uyapo'ã opaete uyecuatía oĩ mboroyocui itupapire pe vae.” Jucuarāi uyecuatía oĩ. 11 Echa'ã yandepuere yaicuaa quirāi mbaeti penti ave ipuere uyembujupi Tumpa jovaque mboroyocui jei vae re uyapo vae rupi. Echa'ã Tumpa ñee pe uyecuatía oĩ cuarāi: “Tumpa umbujupi vae güinoita tecove upurugüirovia ramo.” Jucuarāi uyecuatía oĩ. 12 Jare mboroyocui mburugüirovia pegua'ã co. Echa'ã Tumpa ñee pe uyecuatía oĩ mboroyocui re cuarāi: “Ime yave quía cua nunga uyapo vae, icota uyapo ramo.” Jucuarāi uyecuatía oĩ.

13 Mboroyocui yanembijecose. Ērei Cristo yanderepi ma chugüi. Echa'ã jae uyembijecoca yandepépica pe. Echa'ã Tumpa ñee pe uyecuatía oĩ cuarāi: “Teco güinoi jocua uyecutu curusu re vae.” Jucuarāi uyecuatía oĩ. 14 Jare cua uyeyapo Cristo pe, Tumpa umivendise vaerã Cristo Jesús rupi judío mbae vae reta, umivendise Abraham rami, jare yande ñanoi vaerã Espíritu Tumpa jei umeeta vae yandepurugüirovia jeco pegua.

15 Cherivi reta, tachemiari peve cua ivi pe mbae uyeyapo vae re. Ivi pegua reta penti trato uyapo yave uyupe, yepe tēi ivi pegua retaño co, ndarau quía ipuere umbai, jare ndarau quía ipuere mbae umĩiru jae ndive. 16 Cuarāi vi Tumpa jei umeeta mbaembae Abraham jare inemoña pe. Tumpa imiari'ã inemoña reta re. Echa'ã jucuarāi yave mona, uipotata tēi jei jeta vae. Ērei imiari inemoña re. Echa'ã cua uipota jei penti vae. Jare jocua penti vae Cristo co. 17 Jáeramo che jae peve cua: Tumpa tenonde yave uyapo penti trato Abraham ndive, jare uicuaaca chupe añetete vae co. Jayave cuatrocientos treinta año uasa ma yave ramo, Tumpa umimbeu mboroyocui. Jáeramo mboroyocui ipuere'ã umbai jocua trato. Echa'ã umbai yave mona, Tumpa ndarau tēi uyapo jei uyapota vae. 18 Echa'ã mboroyocui re yave mona Abraham güinoita Tumpa jei umeeta chupe vae, ndarau tēi güinoi jei uyapota vae re. Ērei uyeyapo co Tumpa jei uyapota vae Abraham pe.

### ¿Maera pa uñemee mboroyocui?

<sup>19</sup>Jayave ¿maera pa uñemee mboroyocui? Uñemiñru co mbaeyoa reta jeco pegua, jocua Abraham iñemoñaá Tumpa jei umeeta vae ou regua. Jare Tumpa uicuaaca mboroyocui Moisés pe ángel reta rupi, Moisés uicuaaca-yuapi ye vaerã Israel pegua reta pe. <sup>20</sup>Jare uicuaaca-yuapi ye vae oĩ mocui vae ipãu pe, uicuaaca-yuapi ye vaerã penti vae güi ñru vae pe. Ërei Tumpa co jae pentiño.

<sup>21</sup>Ërei mboroyocui oyovaicho'ã etei co Tumpa jei uyapota vae ndive. Echa'ã tecove uñemee yave mona mboroyocui Tumpa uicuaaca vae re, añetete co mboroyocui upurumbujupita tẽi. <sup>22</sup>Ërei Tumpa iñee pe uyecuatía oĩ vae uicuaaca opaete vae iyoa co, Tumpa jei uyapota vae uñemee vaerã mburugüirovia Jesucristo re güinoi vae reta pe. <sup>23</sup>Ërei ndei ndugüirovia Jesucristo re mbove, mboroyocui güinoise mbaepuere oreré, penti peresoriru iyandarecoa mbaepuere güinoi pereso reta re rami. Jare mboroyocui güinoise mbaepuere oreré, Tumpa uicuaaca regua ndugüirovia vaerã Jesucristo re. <sup>24</sup>Jáeramo mboroyocui oreyandarecoa rami vi co. Jae uyandarecose oreré, Cristo ou regua orembujupica vaerã mburugüirovia rupi. <sup>25</sup>Ërei güinoi'ã ma mbaepuere oreré jocua uyandarecose oreré vae. Echa'ã ndugüirovia ma Cristo re. <sup>26</sup>Jare opaete pe reta vi Tumpa tai reta co mburugüirovia Cristo Jesús re penoi vae rupi. <sup>27</sup>Echa'ã opaete pe reta piyembibautizaca ma piyeyapo vaerã Cristo jete peguarã. Jáeramo pe reta piyeyapo ma penti ramiño Cristo ndive. <sup>28</sup>Cristo Jesús re uyuvã'ã uyupii judío jare judío mbae vae, uyeyocui vae jare uyeyocui mbae vae, cuimbae jare cuña. Echa'ã Cristo Jesús re opaete pe reta penti ramiño co. <sup>29</sup>Jare pe reta co jae Abraham iñemoñaá reta rami. Echa'ã pe reta co jae Cristo imbae. Jáeramo pembae co jocua Tumpa jei Abraham pe umeeta vae.

**4** <sup>1</sup>Ërei che jae peve cua: Pentu cuimbae umano yave, tai güinoita tu imbaembrae vae sambiai ico rambueve, oyovaque penti uyeyocui vae ndive, yepe tẽi opaete mbaembrae imbae ma co. <sup>2</sup>Echa'ã omboe vae reta jare uyandareco jese vae reta güinoi mbaepuere jese jare imbaembrae re, jae uepiti regua iaño tu amiri ndei umano mbove umimbeu vae. <sup>3</sup>Jae ramiño vi tenonde yave moromboe ivi pegua mbaepuere güinoi oreré. Echa'ã jayave nduicose jocua sambiai rami. <sup>4</sup>Ërei ou ma uvãe yave ara, Tumpa ombou Tai. Jae oa cuña güi, jare mboroyocui güinoi mbaepuere jese, <sup>5</sup>jae ipuere vaerã uepi mboroyocui güinoi mbaepuere jese vae reta, ore orepuere vaerã nduyeyapo Tumpa tai retarã. <sup>6</sup>Jare tai reta ma pe reta pico ramo, Tumpa ombou pepia pe Tai iEspíritu. Jae jei: “CheRu, cheRu.” <sup>7</sup>Jáeramo pe reta uyeyocui vae reta'ã ma. Pe reta co jae Tumpa tai reta. Jare tai reta ma pico ramo, Tumpa umee vae pembae co Cristo rupi.

### Pablo ipiatiti upurugüirovia vae reta re

<sup>8</sup>Añete co, tenonde yave picuaa'ã Tumpa yave, piyeyocuisse tumpa-raanga reta pe. Jae reta mbaeti etei tecove güinoi. <sup>9</sup>Ërei añave picuaa ma Tumpa, Tumpa pecuaa ma ramo. Jáeramo ¿maera pa pipota perovia ye moromboe

reta ivi pegua? Echa'ã güinoi'ã mbaepuere pembedi vaerã. ¿Maera pa pipota güinoi vaerã mbaepuere peré? <sup>10</sup>Echa'ã piyandareco peñ ara reta re, yasi reta re, fiesta reta iara reta re jare año reta re. <sup>11</sup>Chepiatiti ete peré. Echa'ã chepia pe ayemingueta aramoi aparaviquiño ma pepite pe.

<sup>12</sup>Cherivi reta, pumiñera piyapo vaerã che ayapo rami. Echa'ã che ayeyapo peñurã. Mbaeti etei mbae icavi mbae vae piyapo checoti. <sup>13</sup>Echa'ã pe reta picuaa co quirã chembaerasi jeco pegua tenonde yave amimbeu peve ñee icavi vae. <sup>14</sup>Jare yepe tẽi chembaerasi, ãrei chereriro'ã jare chemitarẽi'ã. Echa'ã pe reta chembiresive cavi. Penti ángel Tumpa güi ou yave mona pepi, pembiresiveta tẽi jucuarã. Jare Cristo Jesús ou yave mona pepi, pembiresiveta tẽi jucuarã. <sup>15</sup>¿Maera pa penoi'ã ma jocua yerovia penoise vae? Echa'ã chepuere amimbeu peregua cua: Pepuere yave mona, peequita tẽi peresa piyugüi, pemee vaerã cheve. <sup>16</sup>Che amimbeu peve añete vae. Cua uipota'ã jei ayemboyovaicho ma pe ndive.

<sup>17</sup>Jocua pembedi vae reta jatangãtu ete peré, ãrei icavi'ã peve peguarã. Echa'ã uipota pembedi oregüi, pe reta peratangãtu vaerã jese reta. <sup>18</sup>Ërei icavi jecuaño peratangãtu vaerã icavi vae re - mbaeti pepi añaveño. <sup>19</sup>Cherivi reta, penti cuña uiporara imembĩ oata yave vae rami che aiporara ye ma añaveño Cristo jecove uyecuaa vaerã peré. <sup>20</sup>Aipota tẽi añaveño vaerã pe reta ndive añave, jare aipota'ã tẽi pumingueta vaerã cuarã. Echa'ã chepiacani ete peré.

### Umijaanga Agar jare Sara

<sup>21</sup>Pe reta pipota mboroyocui güinoi vaerã mbaepuere peré. Pemimbeu cheve, ¿picuaa'ã pa mboroyocui pe uyecuatía oĩ vae? <sup>22</sup>Echa'ã Tumpa ñee pe uyecuatía oĩ vae umimbeu quirã Abraham mocui tai güinoi. Penti tai cuña uyeyocui vae imembĩ co, jare ñee tai cuña uyeyocui mbae vae imembĩ co. <sup>23</sup>Jare jocua uyeyocui vae imembĩ uñemoña cuimbae jei vae jeco peguaño. Ërei jocua uyeyocui mbae vae imembĩ uñemoña Tumpa jei ramo. <sup>24</sup>Jare cua co penti jaanga. Echa'ã cua cuña reta uyemijaanga jocua mocui trato re. Penti trato co jae ivitu guasu Sinaí jee vae re uñemee vae. Cua trato pegua reta co jocua oa uyeyocui vaerã vae reta rami. Echa'ã jucuarã vi co Agar imembĩ. <sup>25</sup>Echa'ã cua Agar uyemijaanga ivitu guasu Sinaí Arabia pegua re, jare uyemijaanga vi tenta guasu Jerusalén cua ivi pe oĩ vae re. Echa'ã jocua tenta guasu Jerusalén jare joco pegua reta uyeyocui vae reta rami co. <sup>26</sup>Ërei jocua Jerusalén ara pe oĩ vae uyeyocui mbae vae reta rami co. Echa'ã jae yandesi rami co. <sup>27</sup>Echa'ã Tumpa ñee pe uyecuatía oĩ cuarã:

“Nde nemembĩ'ã. Ërei iyerovia,

yepe tẽi ndepuere'ã etei neni nemembirã.

Nde nemembirasi'ã etei. Ërei esapicai ndiyerovia reve.

Echa'ã cuña ime mbae vae güinoita jeta ete imembĩ cuña ime reve vae güi.”

Jucuarã uyecuatía oĩ.

<sup>28</sup>Cherivi reta, Isaac oa Tumpa jei ramo. Jae ramiño vi yande ñanoi tecove Tumpa jei vae jeco pegua. <sup>29</sup>Ërei jocua cuimbae jei vae jeco



peguaño uñemoña vae uyapo icavi mbae vae jocua Espiritu Santo imbaepuere rupi uñemoña vae pe. Jae ramiño vi añave uyeyapo yandeve jucuarái. <sup>30</sup>Ērei ¿mbae pa jei Tumpa iñee pe uyecuatía oĩ vae? Jei cuarái: “Emombo cuña uyeyocui vae jare imembi. Echa'ã cuña uyeyocui vae imembi ndarau güinoi Abraham imbaembae. Jaeño cuña uyeyocui mbae vae imembi güinoita Abraham imbaembae.” Jucuarái jei. <sup>31</sup>Jáeramo, cheriví reta, yande mbaeti co jocua cuña uyeyocui vae imembi rami. Yande co jae jocua cuña uyeyocui mbae vae imembi rami.

### Cristo yandeyora ma

**5** <sup>1</sup>Yayeyora ma. Echa'ã Cristo yandeyora ma. Jáeramo jecuaeño pipota ete pico uyeyora vae reta rami. Agüiye ye ma pipota pico uyeyora mbae vae reta rami.

<sup>2</sup>Mase, che jae peve, piñemicircuncidaca yave, pe reta co jae uyeyoraca'ã etei Cristo pe vae rami. <sup>3</sup>Amimbeu ye opaete piñemicircuncidaca vae pe, cua piyapo vae uipota jei piyapota co opaete mboroyocui jei vae. <sup>4</sup>Jare cua uipota jei pipota'ã ma Cristo pembujupi vaerã. Echa'ã pipota tẽi piyembujupi mboroyocui jei vae re piyapo vae rupi. Pipota'ã ma piyembujupi mbiacavi rupi. <sup>5</sup>Echa'ã yande yarovia Tumpa yanembujupi yandepurugüirovia rupi. Jare Espiritu Santo yanembori cuarái yarovia vaerã. <sup>6</sup>Echa'ã Cristo Jesús re yarovia yave, ñañemicircuncidaca yave mbae'ã co, jare ñañemicircuncidaca'ã yave mbae'ã co. Jaeño icavi Tumpa pe ñanoi yave jocua mburugüirovia umee yandeve mburuau ñru vae reta coti vae.

<sup>7</sup>Tenonde voi peguata cavi co Tumpa coti. ¿Quía pa pemiavai, agüiye vaerã perovia añete vae? <sup>8</sup>Echa'ã Tumpa preparavo ma jare umee peve aracuaa, ěrei cua ñru aracuaa ou'ã Tumpa güi. <sup>9</sup>Mboviño levadura uñemíai opaete masa rupi. <sup>10</sup>YandeYa umee ma cheve mbiacatu peré, quirái pe reta pepia pe piyeminguetata che chepia pe ayemingueta rami. Aicuaa'ã quía ra co jae pemiavai vae. Ērei Tumpa uiporacata co chupe.

<sup>11</sup>Cheriví reta, che amimbeu'ã etei ñru vae reta pe uñemicircuncidaca vaerã. Echa'ã cherovaicho reta uyapo icavi mbae vae cheve amimbeu'ã ramo. Echa'ã jocua amimbeu yave, ndarau tẽi quía chererĩro Cristo icurusu regua amimbeu vae jeco pegua. <sup>12</sup>Quirái mona uyembisiri reta jocua pemambeco vae reta.

<sup>13</sup>Añete co, cheriví reta, Tumpa preparavo pico vaerã uyeyora vae reta rami. Ērei agüiye pere piyupe: “Tumpa yandeyora ma. Jáeramo yandepuere yayapo ipotave yaipota vaeño.” Agüiye pere jucuarái. Ērei piyeyocui piyupe, piyerau ramo. <sup>14</sup>Echa'ã opaete mboroyocui oyovaque cua ndive: “Eau nderapicha nde ndiyerau rami.” <sup>15</sup>Ērei piñerãro yave uyupii, aramoi piñemitarẽita.

### Espíritu Santo jei vae uyuavi yande yaipota vae güi

<sup>16</sup>Jáeramo che jae peve cua: Pico Espíritu Santo jei vae re, agüiye vaerã pico pe pere vae reño. <sup>17</sup>Echa'ã peiño pere vae uyuavi Espíritu Santo jei vae güi, jare Espíritu Santo jei vae uyuavi peiño pere vae güi. Mocui reve uyuavi uyugüi. Jáeramo pepuere'ã piyapo pipota piyapo vae. <sup>18</sup>Ërei pico yave Espíritu Santo jei vae re, mboroyocui mbaeti etei mbaepuere güinoi peré.

<sup>19</sup>Jare jocua mbaeyoa reta yae vae reño yaico yave, yayapo vae uyepocuavi'ã co. Echa'ã yayapo cuarã: Yayuvanga menda re. Yayapo aguasa. Yayapo pichii vae. Yanembiquere. <sup>20</sup>Yambiadora tumpa-raanga reta. Yayapo paye reta. Ñanemitarëi. Yayovaicho ïru vae reta ndive. Ñanemiarïro. Yandepochi catu ïru vae reta coti. Yaipota mbaembae yandiyupe peguarãño. Yayembiyao ïru vae reta güi. Yarovia moromboe añete mbae vae.

<sup>21</sup>Ñaneacatãa yanderapicha re. Yapuruyuca. Yasavipo. Uasa ete yacaru. Jare ïru cua nunga icavi mbae vae yayapo. Echa'ã amimbeu ma peve quirãi cua nunga icavi mbae vae jecuaeño uyapo vae reta ndarau yugüireco Tumpa iporoyocua pe. Jare añave amimbeu ye peve.

<sup>22</sup>Ërei Espíritu Santo umee yandeve mburuau, yerovia, mbiacatu, mbiaguasu, mbiacavi, mburugüirovia, <sup>23</sup>jare ñemimichi. Yayapo icavi vae jare ñañemoa. Cua reta re ipuere'ã etei co mboroyocui. <sup>24</sup>Jare Cristo imbae reta umbai ma jei vaeño. Echa'ã uipotatã ma tenonde yave uau jare uipota vae reño vae. <sup>25</sup>Echa'ã Espíritu Santo umee yandeve tecove ipiau vae. Jáeramo yaico Espíritu Santo jei vae re. <sup>26</sup>Agüiye yaipota ïru vae reta yanembicate vaerã. Agüiye yayovaicho uyupii. Agüiye ñaneacatãa yandiyee.

### Piyemborimbori

**6** <sup>1</sup>Cherivi reta, ime yave quía uyepocouca mbae icavi mbae vae uyapo yave vae, pe reta peguata cavi Tumpa coti vae piyapicatu piñemimichi reve. Piñemoa ngatu. Echa'ã aramoi añã guasu uipotata vi uyapoca vaerã peve mbae icavi mbae vae. <sup>2</sup>Piyemborimbori, tivita poi vae reta piyemborimbori pevoi vaerã rami. Echa'ã jucuarãi piyapo yave, piyapota co Cristo iporoyocui.

<sup>3</sup>Ërei ime yave quía uyembutuicha vae, uyembitavi co. Echa'ã jae mbae'ã co. <sup>4</sup>Ërei penti penti tuyemboe quirãi ipuere uicuaa icavi ra mbaraviqui uyapo vae. Jayave mbaraviqui icavi vae uyapo yave, ipuereta uyerovia jese iyee. Ndarau uipota ïru vae reta umbiyerovia vaerã jese. <sup>5</sup>Echa'ã penti penti tuyapo iparaviqui, yepe tãi yavai chupe penti tivita poi vae rami.

<sup>6</sup>Tumpa ñnee re uyemboe vae tumee mbaembae güinoi vae güi oporomboe vae pe.

<sup>7</sup>Agüiye piyembitavi. Pepuere'ã pemitavi Tumpa. Echa'ã Tumpa umeeta penti penti pe uyapo vae rupi. <sup>8</sup>Ime yave quía ico jei vae reño vae, Tumpa ndarau umee chupe mbae icavi vae. Ërei ime yave quía ico Espíritu Santo jei

vae re vae, Tumpa umeeta chupe tecove opa mbae vae Espíritu Santo rupi. <sup>9</sup>Jare agüiye yandecueri icavi vae yayapo vae güi. Echa'ã Tumpa umbijecoviata yandeve, yandecueri'ã yave. <sup>10</sup>Jáeramo yandepuere yave, yayapo icavi vae opaete vae pe. Icavi ete co yayapo vaerã icavi vae upurugüirovia vae reta pe.

### Pablo uyerovia yandeYa Jesucristo icurusu re

<sup>11</sup>Mase, tuicha co cua cuatía reta chepo pe etei aicuatía peve vae. <sup>12</sup>Uipota uyepiua ñru vae reta pe vae reta uipota ete piñemicircuncidaca vaerã, agüiye vaerã ñru vae reta uyapo icavi mbae vae chupe reta Cristo icurusu jeco pegua. <sup>13</sup>Ërei jae reta etei uyapo'ã mboroyocui jei vae, yepe tēi ññemicircuncidaca reta. Ërei uipota pe reta piñemicircuncidaca vaerã, jae reta uyerovia ete vaerã ñru vae reta jovaque, jucuarãi piyapo yave. <sup>14</sup>Ërei yandeYa Jesucristo icurusu reño ayeroviata ñru vae reta jovai. Jesucristo re arovia ramo, opaete mbaembae upurugüirovia mbae vae reta ueca vae mbae'ã co cheve. Pentí cuimbae uyecutu curusu re vae umano mbaembae ivi pegua güi. Jae ramiño vi che aeca'ã ma mbaembae ivi pegua. <sup>15</sup>Echa'ã Cristo Jesús re yarovia yave, ñañemicircuncidaca yave mbae'ã co, jare ñañemicircuncidaca'ã yave mbae'ã co. Jaeño icavi Tumpa pe ñanoi vaerã tecove ipiau vae. <sup>16</sup>Jare opaete cua tecove ipiau vae re yugüireco vae pe tumee Tumpa mbiacatu jare mburuparareco. Tumee vi Israel pegua reta Tumpa imbae vae pe.

<sup>17</sup>Añave güiye agüiye quía tachemambeco. Echa'ã cherete re uyecuaa chepere reta. Cua anoi yandeYa Jesús pe ayeyocui ramo. <sup>18</sup>Cherivi reta, yandeYa Jesucristo ipiacavi toï pe ndive. Amén

# LA CARTA DEL APOSTOL SAN PABLO A LOS EFESIOS

**1** <sup>1</sup> Che co jae Pablo. Che co jae Jesucristo jemimondo Tumpa jei vae rupi. Aicuatía cua tupapire Efeso pe pico vae pe. Tumpa peñoño tee iyupeguarã, jare piyeyocui cavi Cristo Jesús pe. <sup>2</sup> YandeRu Tumpa jare yandeYa Jesucristo tumee peve ipiacavi jare ipiacatu.

## Tumpa yanemivendise Cristo rupi

<sup>3</sup> Yambiadora Tumpa. Jae co yandeYa Jesucristo Tu. Tumpa umee yandeve jeta mbaembae icavi vae ara pegua Espíritu Santo rupi, Cristo re yarovia ramo. <sup>4</sup> Echa'ã ndei ivi uyeyapo mbove, Tumpa yandeparavo, yande ñaĩ vaerã Cristo imbaerã. Cua uyapo, ñaneñoño tee vaerã iyupeguarã, jare yanembujupi vaerã jae jovaque. <sup>5</sup> Tumpa yanderau. Jáeramo tenonde yave yandeparavo yayeyapo vaerã tai retarã Jesucristo rupi. Echa'ã cua iquirëi ete uyapo jae jei vae rupi. <sup>6</sup> Jare cua uyapo, yambiadora vaerã ipiacavi tuicha vae jeco pegua. Tumpa ipiacavi ete yandeve Tai uau vae rupi. <sup>7</sup> Jesucristo yanderepi ma. Echa'ã umano yanderé. Jáeramo Tumpa umbiasa yandeve yanembaeyoa reta. Echa'ã jae ipiacavi tuicha ete co. <sup>8</sup> Tumpa iyaracuaa catu jare opaete uicuaa. Jáeramo ipiacavi ete yandeve. <sup>9</sup> Tenonde yave uicuaaca'ã iquirëi uyapo vae. Ërei añave uicuaaca yandeve iquirëi uyapo vae. Cua uyapo jae jei vae rupi. <sup>10</sup> Cua co Tumpa iquirëi uyapo vae: Uambatita opaete mbaembae uyeyapocue vae, Cristo oĩ vaerã iYarã - opaete mbaembae ara pe ñugüinoi vae, jare opaete mbaembae ivi pe ñugüinoi vae. Cua Tumpa uyapota ara iyapi yave.

<sup>11</sup> Tenonde yave Tumpa yandeparavo ñanoi vaerã jae umeeta yandeve vae. Jae yandeparavo, yande ñaĩ vaerã Cristo imbaerã. Jare Tumpa cua uyapo iquirëi ramo. Echa'ã jae uyapo opaete mbaembae jae jei vae rupi. <sup>12</sup> Cua Tumpa uyapo uyembiadoraca vaerã ñru vae reta pe ore rupi. Echa'ã ore rani ndugüirovia Cristo re. <sup>13</sup> Jare pe reta vi perovia Cristo re, piyandu yave ñee añete vae. Echa'ã jocua ñee icavi vae umimbeu peve quirã piyembiasaca

vaerã. Jare perovia Cristo re yave, Tumpa umee peve Espíritu Santo, uicuaaca vaerã pe reta jae imbae co. Echa'ã Tumpa jei umee vaerã Espíritu Santo. 14 Tumpa umee yandeve Espíritu Santo, uicuaaca vaerã ñanoita opaete Tumpa umeeta yandeve vae. Cua Tumpa umeeta yandeve yanderepi ete yave. Yande co jae imbae. Jare Tumpa cua uyapo yave, uyembidoracata co cua jeco pegua.

### Pablo uyerure Tumpa pe upurugüirovia vae reta re

15 Jáeramo che aicuaa güive quirãï pe reta perovia yandeYa Jesús re, jare quirãï peau opaete Tumpa oñono tee iyupeguarã vae reta, 16 jecuaeñoï amee yasurupai Tumpa pe peré, jare jecuaeñoï chemandúa peré, ayerure Tumpa pe yave. 17 Tumpa tumee peve aracuaa Espíritu Santo rupi, jare tuicuaaca peve mbaembae, picuaa cavi vaerã Tumpa regua. Tumpa co jae yandeYa Jesucristo uicuaaca yandeve vae. Jae co yandeRu uyembidoraca vae. 18 Tumpa tumee peve aracuaa, picuaa vaerã quirãï pepuere peãro piyerovia reve. Echa'ã jae peparavo cuarã. Tumpa tuicuaaca vi peve quirãï uyembidoraca eteta opaete vae pe umeeta yandeve vae jeco pegua. Echa'ã jae ñaneñoï tee iyupeguarã. 19 Tumpa tuicuaaca vi peve quirãï tuicha ete imbaepuere yanembori vaerã. Echa'ã yande yarovia Cristo re. Tumpa uicuaaca ma tuicha ete co cua imbaepuere. 20 Echa'ã cua imbaepuere rupi Tumpa umbijecove ye Cristo güeru umanocue vae reta ipite güi, jare umee chupe uguapï vaerã iyacata coti ara pe. 21 Cristo imbaepuere tuicha ete opaete mburuvicha reta ara pegua jare ivi pegua jare ipotave mbaepuere güinoï vae imbaepuere güi. Cristo imbaepuere tuicha ete opaete cua ara reta pe mbaepuere güinoï vae reta jare opaete ara reta outa vae pe mbaepuere güinoita vae reta imbaepuere güi. 22 Echa'ã Tumpa umee Cristo pe ico vaerã opaete vae iYarã. Umee vi chupe ico vaerã upurugüirovia vae reta iYarã. 23 Echa'ã upurugüirovia vae reta Cristo jete co. Jáeramo upurugüirovia vae reta jare Cristo pentiño co. Jare Tumpa umee opaete mbaembae Cristo pe.

### Tumpa yanembiasa ipiacavi jeco pegua

**2** 1 Jare Tumpa umee ma peve tecove ipiau vae. Echa'ã tenonde yave penoi'ã tecove ipiau vae pereco icavi mbae vae jare pemaeyoa reta jeco pegua. 2 Jare jocua jeco pegua jecuaeño piyapose icavi mbae vae upurugüirovia mbae vae reta jeco rami. Echa'ã jucuarãï uipota piyapo vaerã jocua mburuvicha icavi mbae vae yandepuere mbae yaecha vae - jae co jocua aña guasu upurugüirovia mbae vae reta ipia pe uparaviqui oï vae. Jucuarãï uparaviqui, agüiye vaerã jae reta uyapo Tumpa jei vae. 3 Tenonde yave opaete yande vi yaico yande yae vae reño jae reta rami. Echa'ã yaicose yanderete jare yandepiyemingueta uipota vae re. Jáeramo Tumpa uiporaracata tēï yandeve, opaete ñru vae reta pe uiporaracata rami. Echa'ã yande vi ivi pegua reta co jae reta rami. 4 Ërei Tumpa yandeparareco ete, jare yanderau ete. 5 Jáeramo umee yandeve tecove opa mbae vae yaico vaerã Cristo ndive, yepe tēï tenonde yave ñanoi'ã tecove opa mbae vae

yanembaeyoa reta jeco pegua. Tumpa yanembiasa ipiacavi jeco pegua. <sup>6</sup>Tumpa umbijecove ye Cristo Jesús güeru umanocue vae reta ipite güi. Jae ramiño vi umee yandeve tecove opa mbae vae Cristo Jesús ndive, jare yandeapo pentiño Cristo Jesús ndive. <sup>7</sup>Cua uyapo, uicuaaca vaerã ara reta outa vae pe quirã tuicha ete co ipiacavi. Cua ipiacavi uicuaaca ma yandeve Cristo Jesús rupi. <sup>8</sup>Echa'ã Tumpa yanembiasa ipiacavi jeco pegua, yapurugüirovia ramo. Yande yamingana'ã etei yembiasa. Jae co Tumpa umeeiño yandeve vae. <sup>9</sup>Mbaeti quía ipuere umingana yembiasa ipotave mbaraviqui rupi, agüiye vaerã quía ipuere jei: “Cheparaviqui rupi co amingana yembiasa.” <sup>10</sup>Echa'ã Tumpa yandeapo. Jare yandeapo ma penti ramiño Cristo Jesús ndive, yande yayapo vaerã icavi vae. Echa'ã tenonde yave Tumpa iquirëi jecuaeño yayapo vaerã icavi vae.

### **Cristo yanembipiacatu Tumpa ndive**

<sup>11</sup>Jáeramo pemandúa cua re: Pe reta co jae judío mbae vae reta. Jare jocua uñemicircuncidaca jee vae reta - jae reta uñemicircuncidaca co jete pe - jae reta pembijee uñemicircuncidaca mbae vae reta. <sup>12</sup>Jáeramo jocua ara reta pe Cristo mbae'ã co peve. Echa'ã pe reta Israel pegua reta'ã co, jare Tumpa jei umeeta Israel pegua reta pe vae pembaerã'ã co. Jáeramo peãro'ã mbae piyerovia reve. Echa'ã picose cua ivi pe Tumpa picuaa mbae reve. <sup>13</sup>Tenonde yave pe reta mbiri pico Tumpa güi. Ërei añave piyeyapo penti ramiño Cristo Jesús ndive, jare coiño ma co pico Tumpa güi Cristo imano jeco pegua. <sup>14</sup>Echa'ã Cristo co jae mbiacatu umee yandeve vae. Jae uyapo penti ramiño judío reta jare judío mbae vae reta. Tenonde yave judío reta jare judío mbae vae reta oyovaicho uyupii. Uyembiyao reta uyugüi. Ërei Cristo umbai ma yembiyao. <sup>15</sup>Echa'ã Cristo umano yave, umbai mboroyocui. Echa'ã mboroyocui umimbeu judío reta pe mbae uyapo vaerã. Jáeramo Cristo umbai mboroyocui, uyapo vaerã mocui reve penti ramiño jae ndive. Jucuarãi umee mbiacatu. <sup>16</sup>Jare cua uyapo, umbipiacatu vaerã Tumpa ndive mocui reve penti ramiño imano jeco pegua. Echa'ã imano jeco pegua oyovaicho'ã ma uyupii.

<sup>17</sup>Jayave ou umimbeu mbiacatu regua pe reta tenonde yave mbiri pico chugüi vae pe jare ore tenonde yave coiño nduico chugüi vae pe. <sup>18</sup>Echa'ã Cristo rupi mocui reve yandepuere yaya yandeRu re Espíritu Santo rupi. Echa'ã Espíritu Santo pentiño co. <sup>19</sup>Jáeramo pe reta ambie ivi pegua reta rami'ã ma co. Pe reta co jae uñeño tee Tumpa peguarã vae reta jentaigua reta. Pe reta co jae Tumpa jentarã reta. <sup>20</sup>Yamijaanga penti tenta. Temimondo reta jare Tumpa iñee umimbeu vae reta tenta iguapicarã oño vae reta rami co, jare pe reta co jae tenta rami. Jesucristo etei co jae ita uñeño tenonde tentarã vae rami. <sup>21</sup>Opaete tenta uyeyapocavi oĩ ita uñeño tenonde tentarã vae ndive, jare uyeyapo oĩ penti tenta uñeño tee yandeYa peguarã vae. <sup>22</sup>Pe reta vi penti ramiño co yandeYa ndive. Jáeramo pe reta vi co jocua tenta rami. Echa'ã Tumpa ico jocua tenta pe Espíritu Santo rupi.

### Tumpa uicuaaca Pablo pe tenonde yave uyecuaa mbae vae

**3** <sup>1</sup>Jáeramo che etei ayerure Tumpa pe peré. Che co jae penti pereso pereco pegua, Cristo Jesús pe ayeyocui ramo - pe reta co jae judío mbae vae reta. <sup>2</sup>Picuaa ma co aipo quirái Tumpa uicuaaca cheve ñee Tumpa ipiacavi regua, che aicuaaca-yuapí ye vaerã peve. Cuarái ayeyocui aĩ Tumpa pe. <sup>3</sup>Picuaa ma co aipo quirái jae etei uicuaaca cheve jocua tenonde yave uyecuaa mbae vae. Echa'ã cua regua aicutía ma peve mboví ñee peño. <sup>4</sup>Pemingueta yave, picuaa cavita co quirái che aicuaa jocua Cristo regua tenonde yave uyecuaa mbae vae. <sup>5</sup>Tenonde yave cua uyecuaa'ã etei ivi pegua reta pe. Êrei añave Tumpa uicuaaca temimondo oñono tee iyupegarã vae reta pe jare ñee umimbeu vae reta pe. Jae uicuaaca chupe reta Espíritu Santo rupi. <sup>6</sup>Jae co cua: Uyandu yave ñee icavi vae, jare güirovia yave Cristo Jesús re, judío mbae vae upurugüirovia vae reta güinoita imbaerã judío upurugüirovia vae reta ndive, jare mocui reve uyeyapota penti ramiño - penti jete rami - jare mocui reve güinoita Tumpa jei umeeta vae. <sup>7</sup>Che ayeyocui Tumpa pe. Ipiacavi jeco pegua Tumpa umee cheve jae imbaepuere rupi che amimbeu vaerã ñee icavi vae. <sup>8</sup>Yepe tẽi che co jae uñeño tee Tumpa peguarã vae reta jaicuegua ete, êrei Tumpa cua umee cheve ipiacavi jeco pegua, che amimbeu vaerã judío mbae vae reta pe quirái yaicocatu ete co Tumpa coti, Cristo re yarovia yave. Echa'ã mbaeti quía ipuere uicuaa cua regua ipiyemingueta rupiño. <sup>9</sup>Jare Tumpa umee cheve aicuaaca vaerã opaete vae pe quirái Tumpa umee cheve ayeyocui vaerã chupe cua tenonde yave uyecuaa mbae vae re. Echa'ã tenonde yave Tumpa uicuaaca'ã etei quía pe cua. Tumpa co jae opaete mbaembae iyapoa. <sup>10</sup>Cua Tumpa umee cheve, mburuvicha reta jare mbaepuere güinoi vae ara pe ñugüinoi vae reta uicuaa vaerã quirái Tumpa iyaracuaa catu co. Cua uicuaata reta upurugüirovia vae reta rupi. <sup>11</sup>Echa'ã cuarái Tumpa jecuaeño iquirẽi uyapo yandeYa Jesucristo rupi. <sup>12</sup>Yandepuere yaya Tumpa re Cristo rupi. Echa'ã yarovia ma Cristo re ramo, yandepuere yaya yaquiye mbae reve. <sup>13</sup>Jáeramo agüiye pepiatiti aiporara pereco pegua vae re. Pepuere pemiadora Tumpa cua re.

### Cristo ipuruau

<sup>14</sup>Jáeramo che ayeatica yandeYa Jesucristo Tu jovai. <sup>15</sup>Opaete jentarã ara pe ñugüinoi vae reta jare jentarã ivi pe ñugüinoi vae reta güinoi jee chugüi. <sup>16</sup>Ayerure Tumpa pe umee vaerã peve mbaepuere. Echa'ã jae imbaepuere jeco pegua uyembiadoraca ete. Jare cua mbaepuere rupi Tumpa iEspíritu tapemimirãta pepia pe. <sup>17</sup>Tuyecuaa cavi quirái Cristo ico pepia pe pepurugüirovia jeco pegua. Tumpa tapemimirãta jare tapemiatangãtu ipuruau pe, <sup>18</sup>pepuere vaerã picuaa cavi opaete uñeño tee Tumpa peguarã vae reta ndive quirái tuicha ete co Cristo ipuruau, <sup>19</sup>jare picuaa vaerã Cristo ipuruau, yepe tẽi ipuere'ã quía uicuaa cavi ete opaete jocua mburuau. Pepia titinee Tumpa pe.

<sup>20</sup>Jare añave yambiadora Tumpa. Echa'ã jae ipuere ete opaete yande yayerure chupe jese vae güi, jare opaete yandepia pe yayemingueta jese vae güi. Jeta ete uyapota yandeve imbaepuere yandepia pe uparaviqui vae rupi. <sup>21</sup>Tumpa tuyembiadoraca opaete vae pe upurugüirovia vae reta rupi jare Cristo Jesús rupi jaeño mai pegua. Amén.

### Penti ramiño Espíritu Santo rupi

**4** <sup>1</sup>Che co jae penti pereso, yandeYa pe ayeyocui ramo. Che pumiñera jecuaño pico cavi vaerã, ñru vae reta uicuaa vaerã Tumpa preparavo co. <sup>2</sup>Piñemimichi uyucoti. Agüiye pepochi piyupe. Pepiaguasu piyupe. Piyerau ramo, agüiye piñengata piyupe. <sup>3</sup>Piñemiatangãtu pico vaerã penti ramiño pepiacatu reve Espíritu Santo rupi. <sup>4</sup>Cristo jete pegua reta pentiño co, jare Espíritu Santo pentiño co. Jae ramiño vi Tumpa preparavo, peãro vaerã piyerovia reve penti ramiño. <sup>5</sup>Ime vi pentiño yandeYa, jare opaete yarovia yandeYa re, jare opaete yayembibautizaca Espíritu Santo pe. <sup>6</sup>Tumpa vi pentiño co. Jae co yandeRu. Jae co yandeYa. Jae uparaviqui opaete yande rupi. Jae ico yandepia pe.

<sup>7</sup>Ërei Cristo umee yandeve penti penti pe ipiacavi, yandepuere vaerã yayapo mbaraviqui Cristo uipota yayapo vaerã vae. <sup>8</sup>Echa'ã Tumpa ñnee pe uyecuatía oĩ cuarãi:

“Uyupi oo ara pe yave, güiraa pereso reta,  
jare umee mbaepuere ivi pegua reta pe Tumpa iparaviqui uyapo vaerã.”  
Jucuarãi uyecuatía oĩ.

<sup>9</sup>Tapirandu peve, ¿mbae pa uipota jei cua uyupi oo ara pe jei vae? Uipota jei ugüeyi rani vi co ivi igüi pe etei. <sup>10</sup>Jocua ugüeyi vae co jae uyupi oo ivate ete opaete ara reta güi vae etei. Jucuarãi uyupi, uyeyapo vaerã opaete mbaembae iYarã. <sup>11</sup>Jare Cristo etei umee amocue vae pe temimondo retarã yugüireco vaerã. Jare umee amocue vae pe Tumpa ñnee umimbeu vaerã. Umee vi amocue vae pe umimbeu vaerã ñee icavi vae. Umee vi ñru vae reta pe uyandareco vaerã upurugüirovia vae reta re, jare ñru vae reta pe ombae vaerã upurugüirovia vae reta. <sup>12</sup>Cua Cristo uyapo, uñeño tee Tumpa peguarã vae reta ipirãta vaerã ipurugüirovia re, jae reta ipuere vaerã uparaviqui Tumpa pe, Cristo jeterã uyeyapo vaerã. <sup>13</sup>Cristo uipota yayeyapo vaerã penti ramiño yandepurugüirovia rupi, yaicuaa cavi vaerã jae co Tumpa Tai. Uipota yayeyapo vaerã penti cuimbae ipirãta vae rami. Jare jucuarãi yayeyapota co, yandepia ñnee oĩ Cristo pe yave. <sup>14</sup>Cristo uipota'ã yaico vaerã sambiaia reta rami. Echa'ã sambiaia reta uicuaa'ã mbae ra güirovia vaerã. Echa'ã penti ara ipuere güirovia penti moromboe, jare ñru ara ipuere güirovia ñru moromboe. Echa'ã moromboe añete mbae vae re oporomboe vae reta ipoqui ete co upurumbitavi vaerã. <sup>15</sup>Ërei yande jecuaño yae añete vae yayerau reve. Jucuarãi yave, yaicota ucuacuaa vae reta rami, Cristo uipota rami. Echa'ã jae co upurugüirovia vae reta ññaca. <sup>16</sup>Cristo jare upurugüirovia vae reta penti cuimbae rami co. Echa'ã



opaete cuimbae jete jare opaete iyuapiapia uparaviqui penti ramiño, icavi oĩ vaerã cuimbae. Jae ramiño vi opaete upurugüirovia vae reta uparaviqui penti ramiño uyerau reve, Cristo jeterã uyeyapocavi vaerã.

### Tecove ipiau vae

<sup>17</sup>Jáeramo che amimbeu peve yandeYa jee re cua: Agüiye ma pico upurugüirovia mbae vae reta yugüireco rami. Echa'ã jae reta yugüireco ipiyemingueta cavi mbae reve. <sup>18</sup>Echa'ã ipiyemingueta uñemipitumimbi ma. Güinoi'ã tecove Tumpa umee vae. Echa'ã uicuaa'ã Tumpa regua, ipiatanta ramo. <sup>19</sup>Jecuaño imbiquere, jare imara'ã etei. Echa'ã uipota ete reta uyapo vaerã opaño mbae pichii vae. <sup>20</sup>Ërei jucuarãi'ã co Cristo pemboe. <sup>21</sup>Piyandu ma co aipo chupe, jare piyemboe ma co aipo añete vae re. Echa'ã añete vae co jae Jesús. <sup>22</sup>Jáeramo agüiye ma pico picose rami. Peeya piyugüi pereco mai indechicue pichii vae. Echa'ã picose pe pere vae reño, jare jucuarãi piyembitavi. <sup>23</sup>Tuyembipiau pepiayemingueta. <sup>24</sup>Pipisi teco mai ipiau vae. Echa'ã teco mai ipiau vae jupi co, jare uyapoca'ã etei mbaeyoa peve. Cua teco mai ipiau vae icavi co Tumpa pe.

<sup>25</sup>Jáeramo agüiye ma peapu piyupe. Opaete pere añete vae perapicha pe. Echa'ã opaete yande penti ramiño co.

<sup>26</sup>Pepochi yave, agüiye peyoa. Agüiye pepitu pearasi reve.

<sup>27</sup>Agüiye pemaño aña gasu re mbaepuere güinoi vaerã peré.

<sup>28</sup>Imondase vae agüiye ye ma timonda. Ërei tuyapo ipo pe mbaraviqui icavi vae, ime vaerã güinoi mbae umee vaerã iparavete vae pe.

<sup>29</sup>Agüiye pemoë ñee pichii vae. Ërei pemoë ñee icavi vae, pembali vaerã ñru vae reta. Echa'ã jucuarãi Tumpa ipuere ombori uyapisaca peré vae reta. <sup>30</sup>Jare agüiye pembipiatiti Tumpa iEspíritu Santo. Echa'ã Tumpa umee ma peve Espíritu Santo, uicuaaca vaerã pe reta jae imbae co. Jare Espíritu Santo icota pe reta ndive, Tumpa perezpe ete regua.

<sup>31</sup>Agüiye pembasi pico piyupe. Agüiye pepochi piyupe. Agüiye pearasi piyupe. Agüiye piñeengata piyupe. Agüiye pere icavi mbae vae piyupe. Agüiye piyapo icavi mbae vae piyupe. <sup>32</sup>Ërei pepiacavi piyupe. Piyerau. Piyembiasa uyupii. Echa'ã Tumpa pembiasa ma Cristo rupi.

### Yaico Tumpa jei vae re

**5** <sup>1</sup>Jecuaño pico Tumpa jei vae re. Echa'ã Tumpa co jae yandeRu jare jae yanderau. <sup>2</sup>Jáeramo pico piyerau reve, Cristo yanderau rami. Echa'ã Cristo uñemee umano vaerã, penti maemimba uyeyucacue Tumpa pe uñemee vae rami. Jare cua uyapo umbai vaerã yanembaeyoa reta. Cua umbiyerovia Tumpa, mbae ipiche cavi vae upurumbiyerovia rami.

<sup>3</sup>Ërei agüiye etei piyapo aguasa jare opaete mbae pichii vae, jare agüiye pipota ñru vae reta imbaembae. Echa'ã Tumpa peñoño tee ma iyupeguarã.

<sup>4</sup>Jare agüiye vi piyemingueta imbiquere vae reta uyemingueta rami.

Agüiye piyemingueta iyaracuaa mbae vae reta uyemingueta rami. Agüiye peyurupichĩ ñee icavi mbae vae pe. Echa'ã icavi'ã piyemingueta vaerã jucuarã. Ërei cua mbaembae icavi mbae vae pere vaerãve pemee yasurupai Tumpa pe. <sup>5</sup>Echa'ã pe reta picuaa cua: Aguasa uyapo vae reta, jare opaete mbae pichĩ vae uyapo vae reta, jare ñru vae reta imbaembae uipota vae reta - echa'ã uipota ete ñru vae reta imbaembae Tumpa güi - ndarau yugüireco Cristo jare Tumpa iporoyocua pe. <sup>6</sup>Agüiye pemaño quía re pembitavi vaerã cua re. Echa'ã cua icavi mbae vae jeco pegua Tumpa uiporacata co Tumpa jei vae uyapo'ã vae reta pe. <sup>7</sup>Jáeramo agüiye pico jae reta yugüireco rami.

<sup>8</sup>Echa'ã tenonde yave pe reta picose yugüireco pñtumimbi pe vae reta rami. Ërei añave pico tembipe yandeYa umee peve vae pe. Jecuaño pico yugüireco tembipe pe vae reta rami. <sup>9</sup>Echa'ã tembipe pe yugüireco vae reta ipiacavi, jare jupi vae uyapo, jare jei añete vae. <sup>10</sup>Jecuaño pipota picuaa yandeYa uipota piyapo vaerã vae. <sup>11</sup>Agüiye ete piñemñru pñtumimbi pe yugüireco vae reta ndive. Echa'ã jocua uyapo reta vae icavi'ã Tumpa pe. Ërei picuaaca icavi mbae vae co jocua uyapo reta vae. <sup>12</sup>Echa'ã penti ñemimaraca co yayemingueta vaerã jocua uyapo viari reta vae re. <sup>13</sup>Tembipe oñ yave, opaete uyecuaa cavi, jare yandepuere yaicuaaca icavi mbae vae co opaete jocua mbaembae. Echa'ã jocua uyapo opaete uyecuaa cavi vaerã vae tembipe co. <sup>14</sup>Jáeramo Tumpa jei oque vae pe cuarã:

“Esarecoño ma.

Icove ye penti ou umanocue vae reta ipite güi vae rami.

Cristo tumee ndeve tembipe.”

Jucuarã jei.

<sup>15</sup>Jáeramo piñemiatangātu pico cavi vaerã. Agüiye pico iyaracuaa mbae vae reta yugüireco rami. Pico iyaracuaa catu vae reta yugüireco rami. <sup>16</sup>Jecuaño piyapo icavi vae. Echa'ã jeta vae uyapo icavi mbae vae. <sup>17</sup>Jáeramo agüiye pearacuaa mbae vae echa. Ërei picuaa cavi yandeYa jei vae. <sup>18</sup>Jare agüiye pesavipo. Echa'ã usavipo vae reta uyapo jeta mbae icavi mbae vae. Ërei pemaño Espíritu Santo re umitinee vaerã pepia. <sup>19</sup>Picuaaca quirã piyerovia ete canta reta yambidora Tumpa pipe vae pe. Pecanta jare pambidora yandeYa pepia pe. <sup>20</sup>Jecuaño pemee yasurupai opaete mbae re yandeRu Tumpa pe yandeYa Jesucristo jee re.

### Yayeyocui yandiyupe

<sup>21</sup>Piyeyocui piyupe, pipñu Cristo ramo.

<sup>22</sup>Cuña reta tuyeyocui ime pe, uyeyocui yandeYa pe rami. <sup>23</sup>Echa'ã cuimbae oyocui jembireco, ñaneãca oyocui yanderete rami. Jae ramiño vi Cristo co jae upurugüirovia vae reta inãca. Jare upurugüirovia vae reta co jae Cristo jete, jare Cristo co jae upurugüirovia vae reta umbiasa vae. <sup>24</sup>Jare upurugüirovia vae reta uyeyocui Cristo pe. Jáeramo jae ramiño vi cuña reta tuyeyocui ime pe opaete mbae re.

<sup>25</sup>Cuimbae reta tuau jembireco, Cristo uau upurugüirovia vae reta rami. Echa'ã jae uñemee umano vaerã jese reta, <sup>26</sup>oñono tee vaerã

iyupeguarã, jare oyoe vaerã. Echa'ã ñnee yandeyoe, mbae yayoe i pe rami. <sup>27</sup>Jucuarãi Cristo uyapo, upurugüirovia vae reta uyembutuichaca vaerã jae jovai ñugüinoi yave. Ndarau güinoi mbae iquia vae jare mbae pichii vae. Ndarau etei güinoi cua nunga mbaembae. Echa'ã Cristo uñemee umano vaerã, upurugüirovia vae reta uñeñono tee vaerã chupeguarã, jare icavi ete ñugüinoi vaerã. <sup>28</sup>Cuimbae reta tuau jembireco, jete uau rami. Cuimbae jare jembireco pentiño co. Jáeramo jocua uau jembireco vae jae co uyerau. <sup>29</sup>Echa'ã mbaeti etei quía umitarëi jete. Opaete vae umingarü jete, jare uyandareco jese. Jae ramiño vi Cristo uyandareco upurugüirovia vae reta re. <sup>30</sup>Echa'ã yande co jae Cristo jete pegua reta. Yande co jae Cristo isoo jare icägüe pegua reta. <sup>31</sup>Cua jeco pegua penti cuimbae tusiri tu jare ichi güi, jare tuñemüru jembireco ndive, mocui reve uyeyapo vaerã penti ramiño. <sup>32</sup>Yandepuere'ã etei yaicuaa cavi cua regua. Ërei chemiari ai peve Cristo jare upurugüirovia vae reta re. <sup>33</sup>Ërei penti penti tuau jembireco, jae uyerau rami. Jare cuña tuiþiu ime.

**6** <sup>1</sup>Cunumi reta jare cuñatai reta tuyapo tu jare ichi jei vae, yandeYa re güirovia ramo. Echa'ã cua jupi co. <sup>2</sup>Tumpa umimbeu Moisés rupi mboroyocui reta. Jare mboroyocui itenondegua vae co cua: "Iþiu nderu jare ndesi, <sup>3</sup>ndico cavi vaerã, jare ndicopucu vaerã ivi pe." Jucuarãi Tumpa jei umeeta vae.

<sup>4</sup>Jare tu reta agüiye tumbiarasiño isambiai reta. Ërei tumbicuacuaa cavi. Tomboe jupi vae re, jare tumbiaracuaa, yandeYa uipota rami.

<sup>5</sup>Uyeyocui vae reta tuyapo ipatrón jei vae uipiü reve jare umbutuicha reve. Iþiaquirëi reve tuyeyocui ipatrón pe. Tuyeyocui chupe, Cristo pe uyeyocui rami. <sup>6</sup>Agüiye tuyeyocui cavi ipatrón pe jae umae oi jese yaveño, umbiyerovia vaerãño. Tuyeyocui chupe, Cristo pe uyeyocui ramo, jare Tumpa jei vae ipiaquirëi reve uyapo ramo. <sup>7</sup>Tuyeyocui chupe, iquirëi ete ramo. Tuyeyocui chupe, Cristo pe uyeyocui rami. Echa'ã cuimbae peño'ã uyeyocui. <sup>8</sup>Tuicuaa cua: Ipotave vae - penti uyeyocui vae ani penti uyeyocui mbae vae - mbae icavi vae uyapo yave, yandeYa uyapota vi chupe mbae icavi vae.

<sup>9</sup>Jare patrón reta tuyapo icavi vae jembiocui reta coti. Agüiye jecuaeño tuyuvanga catu. Echa'ã tuicuaa jae reta vi güinoi co iYa ara pe. Jare yandeYa ara pe oi vae uau'ã penti vaeño ñru vae güi.

#### **Mbaepuere yandeYa ipuere umee yandeve vae**

<sup>10</sup>Taicue rupi ete tae peve, cherivi reta, cua: Piñemiatangätu jocua mbaepuere yandeYa ipuere umee yandeve vae re. <sup>11</sup>Piporu opaete Tumpa ipuere umee yandeve vae, pepuere vaerã piyerepi opaete mbae icavi mbae vae aña guasu uipota uyapo peve vae güi. <sup>12</sup>Echa'ã ñañerãro'ã ñai ivi pegua reta ndive. Ñañerãro ñai espíritu icavi mbae vae ara pe ñugüinoi vae reta ndive. Jae reta co ivi pegua þitumimbi pe yugüireco vae reta iya reta, jare mbaepuere güinoi reta oporoyocui

vaerã. <sup>13</sup>Jáeramo piporu opaete Tumpa ipuere umee yandeve vae, agüiye vaerã pemaño piyee icavi mbae vae uñerãro pe ndive vae reta pe, jare piñerãro yave, jecuaño pepirãta vaerã. <sup>14</sup>Jáeramo piñemimirãta. Yamijaanga sundaro. Sundaro güinoi mbaembae ipuere vaerã uñerãro cavi. Jae ramiño vi Tumpa umee yandeve vae yanembupuere, yandepuere vaerã ñañerãro cavi. Echa'ã pere yave añete vae, icavita peve sundaro jumbicuaa icavi sundaro pe rami. Jare piyapo yave jupi vae, icavita peve sundaro icamisa fierro pegua icavi sundaro pe rami. <sup>15</sup>Jare pipota yave pemimbeu ñru vae reta pe ñee icavi vae mbiacatu regua, icavita peve sundaro ipipasa icavi sundaro pe rami. <sup>16</sup>Jare mburugüirovia jecuaño penoi yave, icavita peve penti yeyopiaca icavi sundaro pe rami. Echa'ã sundaro ipuere oyopia yeyopiaca pe opaete ui jovaicho reta uyapi pipe vae. Jae ramiño vi mburugüirovia jecuaño penoi yave, ndarau piyapo icavi mbae vae, yepe tẽi aña guasu uipota ete piyapo vaerã. <sup>17</sup>Jare jecuaño pemandúa yave quirãi Tumpa pembiasa ma co, icavita peve ãca regua fierro pegua icavi sundaro pe rami. Jare piporu yave Tumpa ñíee Espíritu Santo imbaepuere rupi, icavita peve penti quisepecu icavi sundaro pe rami. <sup>18</sup>Jecuaño piyerure Tumpa pe mbaembae re. Jecuaño piyerure Espíritu Santo rupi. Jecuaño piñemiatangãtu, agüiye vaerã pecueri. Jecuaño piyerure Tumpa pe opaete uñeño tee Tumpa peguarã vae reta re. <sup>19</sup>Piyerure ete cheré, Tumpa umee vaerã cheve chemiari vaerã aquíye mbae reve, aicuaaca vaerã ñee icavi vae tenonde yave uyecuaa mbae vae. <sup>20</sup>Echa'ã Tumpa chembou amimbeu vaerã cua ñee, jare cua ñee jeco pegua pereso aĩ. Piyerure cheré, amimbeu vaerã aquíye mbae reve. Echa'ã jucuarãi icavi co amimbeu vaerã.

<sup>21</sup>Tíquico umimbeuta peve opaete mbaembae, picuaa vaerã cheregua jare ayapo aĩ vae regua. Tíquico co jae yanderivi. Aau co. Jae uyeyocui cavi yandeYa pe. <sup>22</sup>Jáeramo amondo pepi, picuaa vaerã oreregua, jare jae pembipiacatu vaerã.

<sup>23</sup>Cherivi reta, yandeRu Tumpa jare yandeYa Jesucristo tumee peve mbiacatu jare mburuau jare mburugüirovia. <sup>24</sup>Tumpa tumee ipiacavi opaete mburuau opa mbae vae yandeYa Jesucristo coti güinoi vae reta pe. Amén.

# LA CARTA DEL APOSTOL SAN PABLO A LOS FILIPENSES

---

**1** <sup>1</sup> Che co jae Pablo, jare Timoteo ime cua pe oĩ che ndive. Ore nduyeyocui Cristo Jesús pe. Aicuatía cua tupapire Filipos pe pico vae pe - pe reta co jae tenondegua reta, jare ĩru upurugüirovia vae reta ombori vae reta, jare opaete ĩru uñeño tee Tumpa peguarã vae reta. Pe reta perovia Cristo Jesús re. <sup>2</sup> YandeRu Tumpa jare yandeYa Jesucristo tumee peve ipiacavi jare ipiacatu.

## **Pablo uyerure Tumpa pe upurugüirovia vae reta re**

<sup>3</sup> Amee yasurupai Tumpa pe chemandúa peré ñave ñave. <sup>4</sup> Ayerure Tumpa pe opaete peré yave, jecuaño ayerure ayerovia reve. <sup>5</sup> Echa'ã pe reta jecuaño chembori amimbeu vaerã ñee icavi vae pe reta piyandu güive. <sup>6</sup> Tumpa umbipi ma uyapo penti mbaraviqui icavi vae pepia pe, jare aicuaa catu jae etei co jecuaño uyapota jocua mbaraviqui Jesucristo ou ye regua. <sup>7</sup> Icavi co chepia pe ayemingueta vaerã cuarãi peré. Echa'ã puau ete. Peresoriru pe aĩ rambueve, jare aicuaaca yave ĩru vae reta pe ñee icavi vae Tumpa pegua co jare añete vae co, Tumpa jecuaño umee cheve ipiacavi. Jare mbiacavi umee cheve vae umee peve vi. <sup>8</sup> Echa'ã Tumpa uicuaa quirãi che puau ete co, Jesucristo etei perau rami. <sup>9</sup> Jare ayerure Tumpa pe jecuaño tucuaa pepuruau picuaa catu reve jare pearacuaa catu reve, <sup>10</sup> pipota vaerã piyapo icavi vae, pico cavi vaerã, agüiye vaerã quía ipuere pembijeco mbae re Cristo ou ye regua. <sup>11</sup> Ayerure jecuaño piyapo vaerã mbaembae icavi vae jupi vae pegua Jesucristo rupi. Echa'ã cuarãi Tumpa uyembadoracata.

## **Pablo jecuaño uipota uyeyocui Cristo pe**

<sup>12</sup> Cherivi reta, aipota picuaa vaerã quirãi uyeyapo cheve vae ombori ma uñemai vaerã ñee icavi vae. Umbiavai'ã etei. <sup>13</sup> Echa'ã opaete sundaro mburuvicha guasu jenta pe ñugüinoi vae reta jare opaete ĩru vae reta uicuaa

quirāi che cua peresoriru pe aĩ Cristo pe ayeyocui ramo. <sup>14</sup>Jare jeta yanderivi reta uñemiatangātu ma yandeYa coti, uicuaa reta peresoriru pe uyeyapo cheve vae ramo. Jare jae reta umimbeu Tumpa iñee uquiye mbae reve.

<sup>15</sup>Añete co, amocue vae umimbeu Cristo regua ñacatāa cheré ramo, jare jovaichopota che ndive ramo. Ērei ĩru vae reta umimbeu iquirēi ramo. <sup>16</sup>Jocua jovaichopota che ndive vae reta umimbeu Cristo regua uipota tēi cheacatāa vaerā jese reta ramo. Jucuarāi uipota tēi aiporara vaerā, peresoriru pe aĩ rambueve. <sup>17</sup>Ērei ĩru vae reta umimbeu Cristo regua, cherau ramo. Echa'a uicuaa reta quirāi Tumpa cheñono cua pe, aicuaaca vaerā ĩru vae reta pe ñee icavi vae Tumpa pegua co. <sup>18</sup>Ērei icaviño co. Echa'a opaete quirāi rupi jaeñoi umimbeu reta Cristo regua - amocue vae uipota tēi uyapo icavi mbae vae cheve, jare ĩru vae reta uipota uyapo icavi vae cheve. Cua jeco pegua ayerovia aĩ. Jare jecuaeño co ayeroviata. <sup>19</sup>Echa'a aicuaa opaete cua icavita co cheve, pe reta piyerure cheré ramo, jare Jesucristo iEspíritu chembori ramo. <sup>20</sup>Cuarāi uyeyapota che aipota ete vae. Echa'a jecuaeño aipota aico, agüiye vaerā chemara mbae re. Aipota aico aqüiye mbae reve, jecuaeño Cristo uyembidoraca vaerā cherete rupi, amano yave ani jecuaeño aico yave. <sup>21</sup>Echa'a jecuaeño aico yave, ayeyocuiñotai co Cristo pe. Jare amano yave, icavi eteta co cheve. <sup>22</sup>Jare jecuaeño aico yave, aparaviquita Tumpa pe, icavi vae ayapo vaerā. Aicuaa'ā icavi ra amano vaerā, ani icavi ra aicoño vaerā. <sup>23</sup>Mocui reve aipota tēi. Echa'a aipota amano, Cristo ndive aĩ vaerā. Cua icavi eteta co cheve. <sup>24</sup>Ērei icavi ndipo jecuaeño aico vaerā, chepuere vaerā pombori. <sup>25</sup>Aicuaa catu cua. Jáeramo aicuaa jecuaeño aicota, apita vaerā opaete pe reta ndive, jare pombori vaerā, piñemimirāta vaerā pepurugüirovia re piyerovia reve, <sup>26</sup>jare pe reta pemiadora ete vaerā Cristo Jesús chereco pegua, che aĩ ye yave pepi.

<sup>27</sup>Jaeño pico cavi. Echa'a perovia ma ñee icavi vae Cristo regua. Jáeramo icavi co pico cavi vaerā. Aramoi aata apou pepi. Ērei aa'a yave, aipota pererācua cavi vaerā cheve, quirāi piñemimirāta penti ramiño, jare quirāi piñemiatangātu penti ramiño mburugüirovia ñee icavi vae regua penoi vae re, <sup>28</sup>jare quirāi pequiye'ā etei oyovaicho pe ndive vae reta güi. Echa'a cua uicuaaca jae reta yugüiraata co cañitei pe. Ērei cua uicuaaca vi Tumpa pemiadora ma co. <sup>29</sup>Echa'a Tumpa umee peve perovia vaerā Cristo re. Jae ramiño vi umee peve piporara vaerā Cristo jeco pegua. <sup>30</sup>Jáeramo pe reta piporara peĩ, tenonde yave cherecha aiporara rami, jare añave picuaa aiporara co.

### Cristo uñemimichi, jare Tumpa umbiadora

**2** <sup>1</sup>Jáeramo Cristo ipuere pemiadangātu ramo, jare Cristo ipuruau ipuere pembipiacatu ramo, jare Espíritu Santo ipuere imiari peve ramo, jare pepuere piyerau ramo, jare pepuere piyeparareco ramo, <sup>2</sup>pico cavi uyupii, jare piyerau, jare penti ramiño pico pepia pe piyemingueta vae oyovaque reve. Cuarāi piyapo yave, ayerovia eteta co. <sup>3</sup>Agüiye mbae piyapo piyovaicho reve

uyupii. Agüiye mbae piyapo piyembicate reve. Ërei opaete mbaembae piyapo piñemimichi reve. Penti penti tumae cavi ñru vae re. Agüiye tuyembicate.

<sup>4</sup>Penti penti tuyandareco ñru vae reta re. Agüiye tuyandareco iyeeiño.

<sup>5</sup>Pepia pe piyemingueta uyucoti, Cristo Jesús ipia pe uyemingueta rami. <sup>6</sup>Echa'ã jae etei co Tumpa. Ërei yepe tẽi jae oyovaque Tumpa ndive, uyembutuicha'ã cua re. <sup>7</sup>Ërei jae uñemimichi, jare uyeyapo cuimbaerã uyeyocui vaerã ivi pegua reta pe. <sup>8</sup>Jare cuimbaerã uyeyapo ma yave, uñemimichi ye, jare umano Tumpa jei vae uyapo vaerã. Jare umano penti curusu re cuimbae jeco vae umano vae rami. <sup>9</sup>Jáeramo Tumpa umbutuichaca ete ma, jare umee chupe mbaepuere opaete ñru mbaepuere güi tuicha ete vae, <sup>10</sup>opaete ara pe ñugüinoi vae reta, jare opaete ivi pe ñugüinoi vae reta, jare opaete cañitei pe ñugüinoi vae reta uyeatica vaerã Jesús jovai, <sup>11</sup>jare opaete vae jei vaerã Jesucristo co jae opaete vae iYa. Jare cua uyeyapo yave, yandeRu Tumpa uyembiadoracata opaete vae pe.

### Upurugüirovia vae reta tembipe rami co

<sup>12</sup>Che puau co. Pe ndive aico rambueve, jecuaeño piyapo che jae peve piyapo vaerã vae. Jare yepe tẽi añave aĩ'ã ma pe ndive, ërei jecuaeño piñemiatangãtu ete yembiasa penoi vae rupi pipiu reve Tumpa güi jare pemiadora reve. <sup>13</sup>Echa'ã Tumpa etei umee peve quirẽi piyapo vaerã jae jei vae. Echa'ã Tumpa jei vae icavi co.

<sup>14</sup>Opaete piyapo vae piyapo piñeenguru mbae reve jare piyeaca mbae reve. <sup>15</sup>Jucuarãi yave, ndarau quía pembijeco mbae re, jare ndarau mbae icavi mbae vae piyapo ñru vae coti, jare picota upurugüirovia mbae vae reta ipite pe pereco mbae reve. Pe reta co jae Tumpa tai reta. Jáeramo piyecuaa upurugüirovia mbae vae reta ipite rupi, guarasi umiembipe ivi pe vae rami. Echa'ã upurugüirovia mbae vae reta jupi'ã jare jecopochi co. <sup>16</sup>Jecuaeño pemimbeu ñru vae reta pe ñee tecove opa mbae vae ipuere umee chupe reta vae, chepuere vaerã ayerovia Cristo ou ye yave. Echa'ã aicuaata añemiatangãtúiño'ã jare aparaviquiño'ã. <sup>17</sup>Ayeyocui ma Tumpa pe pepite pe, pe reta pepurugüirovia vaerã. Jare jocua mburugüirovia penoi vae amee Tumpa pe, sacerdote maemimba uyeyucacue umee rami. Aramoi cherugüi uyepiyereta vi, vino uyepiyere maemimba uyeyucacue iárambo rami. Ërei cua uyeyapo yave, jeseve ayeroviata co opaete pe reta ndive. <sup>18</sup>Cua jeco pegua pe reta vi piyerovia che ndive.

### Timoteo jare Epafrodito

<sup>19</sup>Ërei yandeYa Jesús uipota yave, amondota Timoteo pepi curi, che vi chepiacatu vaerã, aicuaa yave peregua. <sup>20</sup>Echa'ã mbaeti co quía ye ipia pe uyemingueta peré che chepia pe ayemingueta peré rami vae. Mbaeti co quía ye añetete iquirẽi uyandareco peré vae. <sup>21</sup>Echa'ã opaete ñru vae reta iquirẽi uyandareco iyeeiño. Iquirẽi'ã uyandareco Cristo Jesús iparaviqui re. <sup>22</sup>Ërei

picuaa co quirãi Timoteo jecocavi, jare quirãi jae uyeyocui Tumpa pe che ndive, ñee icavi vae numimbeu vaerã. Jae uparaviqui Tumpa pe che ndive, penti tai uparaviqui tu ndive vae rami. <sup>23</sup>Jáeramo aipota amondo curi, aicuaa yave mbae ra uyeyapota cheve. <sup>24</sup>Ërei yandeYa uipota yave, che vi aata pepi curi.

<sup>25</sup>Ërei amondo ma pecoti Epafrodito. Echa'ã icavi echa cheve amondo vaerã. Jae co yanderivi yandeYa re. Jae vi uparaviqui Tumpa pe che ndive, jare jecuaeño uñemiatangãtu yandeYa re. Pe reta pembou chepi uyandareco vaerã cheré. <sup>26</sup>Jae uipota ete perecha, jare ipiatiti ete. Echa'ã jerãcua peve quirãi jae imbaerasi. <sup>27</sup>Añete co, imbaerasi ete. Umano seri. Ërei Tumpa uiparareco. Jare jucuarãi Tumpa uicuaaca vi cheve ipuruparareco - mbaeti Epafrodito peño. Echa'ã chepiatiti ñru mbaembae re. Ërei jae umano yave mona, chepiatiti eteta tõi. <sup>28</sup>Jáeramo amondo pecoti chequirõi ete reve, piyerovia vaerã, peecha ye yave, jare agüiye vaerã che chepiatiti ete. <sup>29</sup>Pembiresive cavi yandeYa re piyerovia reve. Jare jecuaeño pemaecavi jae rami vae reta re. <sup>30</sup>Echa'ã Cristo iparaviqui jeco pegua umano seri. Uipi'u'ã umano vaerã, ipuere vaerã uyandareco cheré pepepica pe. Echa'ã pe reta pepuere'ã piyandareco cheré.

### Añemiatangãtu, aipisi vaerã Tumpa umeeta cheve vae

**3** <sup>1</sup>Cuaño ma tamimbeu peve, cherivi reta: Piyerovia yandeYa re. Checueri'ã etei aicutiã cua peve. Echa'ã icavi peve jecuaeño cua aicutiã vaerã, agüiye vaerã petavi. <sup>2</sup>Piñemoa ñee icavi vae re oyovaicho vae reta güi. Echa'ã jae reta oporomboe moromboe añete mbae vae re. Jae reta uñemicircuncidaca jete peño. <sup>3</sup>Echa'ã yande co jae uñemicircuncidaca ipia pe vae reta. Echa'ã yande yambiadora Tumpa iEspíritu rupi. Yayerovia catu Cristo Jesús re. Yayeco'ã etei yandiyee. <sup>4</sup>Ërei che vi ime tõi anoi ayeco vaerã chiyee. Ime yave quía ye ipia pe uyemingueta ime güinoi uyeco vaerã iyee vae, che vi ime tõi anoi jeta ete chugüi. <sup>5</sup>Echa'ã añemicircuncidaca ocho ara ma anoi yave aa güiive. Che co jae penti Israel pegua. Che co jae Benjamín iñemoña pegua. Che co jae penti hebreo añetete vae. Che co jae penti fariseo. Echa'ã jecuaeño aicose mboroyocui jei vae re. <sup>6</sup>Añemiatangãtuse ayeyocui vaerã Tumpa pe. Jáeramo ayapose icavi mbae vae Cristo re güirovia vae reta pe. Mbaeti quía ipuere chembijeco mbae re. Echa'ã cherecove jecuaeño jupi mboroyocui rupi. <sup>7</sup>Tenonde yave ayembiccate cua mbaembae re. Ërei añave ayembiccate'ã etei jese Cristo re arovia güiive. <sup>8</sup>Jae ramiño vi ayembiccate'ã etei ipotave mbae re, aicuaa vaerã cheYa Cristo Jesús. Echa'ã cua icavi ete cheve opaete güi. Cristo Jesús re arovia güiive ayembiccate'ã etei ma mbae re. Echa'ã opaete jocua mbaembae iti rami co cheve, Cristo anoi vaerã, <sup>9</sup>jare uyecuaa vaerã quirãi che co jae Cristo imbae. Aipota'ã ma ayembujupi mboroyocui jei vae re ayapo vae rupi. Ayembujupi ma mburugüirovia Cristo re anoi vae rupi. Echa'ã Tumpa chembujupi ma, Cristo re arovia ramo. <sup>10</sup>Aipota co aicuaa cavi Cristo. Aipota anoi jocua mbaepuere Cristo icove ye yave ou umanocue vae reta ipite güi uyeporu vae. Aiporara yave, aipota



aicuaa aiporara co Cristo jeco pegua, chequirëi vaerã amano Cristo umano vae rami. <sup>11</sup>Jucuarãi yave, aãrota aicove ye vaerã ayu umanocue vae reta ipite güi.

<sup>12</sup>Ndeño aicuaa cavi Cristo. Ndeño co che jupi. Ërei jecuaeño añemiatangãtu, aipisi vaerã Tumpa umeeta cheve vae. Echa'ã cua jeco pegua Cristo Jesús cherepi. <sup>13</sup>Cherivi reta, chepia pe ayemingueta'ã chiyee aepiti ma co. Ërei cuaño ayapo - cheacañi uasacue güi, aepiti vaerã chequirëi reve uyemiaanga oĩ cheve vae. <sup>14</sup>Jáeramo añemiatangãtu, aepiti vaerã Tumpa umeeta cheve vae. Umeeta cheve Cristo Jesús uyapo yandeve vae jeco pegua, ara pe chereraa yave.

<sup>15</sup>Jáeramo opaete ñañemimirãta Tumpa coti vae cuarãi yandepia pe yayemingueta. Jare pepia pe piyemingueta'ã yave cuarãi, Tumpa uicuaacata peve. <sup>16</sup>Ërei jecuaeño yaico yaicuaa ma vae re. Yandepia pe yayemingueta penti ramiño.

<sup>17</sup>Cherivi reta, piyapo che ayapo rami. Jare jecuaeño pemae ngatu jocua yugüireco cavi vae reta re. Echa'ã jucuarãi picuaa ore nduico. <sup>18</sup>Echa'ã ime jeta yugüireco oyovaicho reve Cristo icurusu regua ndive vae. Jeta vese ma amimbeu peve cua reta regua, jare añave amimbeu ye peve ayao reve. <sup>19</sup>Cua reta yugüiraata cañitei pe. Mbae yau vae reño ipia pe uyemingueta reta. Icavi chupe reta jocua imarata tẽi jese vae. Mbaembae cua ivi pegua reño ipia pe uyemingueta reta. <sup>20</sup>Ërei yandeivirã ara pe co oĩ. Echa'ã ñaãro ñaĩ joco güi ou vaerã yanembiasa vae - jae co yandeya Jesucristo. <sup>21</sup>Jae umbiambieta yanderete cua ivi pe ñanoi vae yanderete ipiau vae ndive. Echa'ã yanderete ipiau vae icavi eteta co jae jete rami. Cuarãi yandeYa uyapota imbaepuere rupi. Echa'ã jocua imbaepuere rupi ipuere opaete mbaembae re.

### Jecuaeño piyerovia catu yandeYa re

**4** <sup>1</sup>Jáeramo, cherivi reta, jecuaeño piñemimirãta yandeYa imbaepuere rupi. Che puau, jare aipota puecha. Ayeroviaño mai peré. Chemiari cavi peré ñru vae reta pe.

<sup>2</sup>Amiñera Evodia jare Síntique yugüireco cavi vaerã uyupii. Echa'ã mocui reve güirovia yandeYa re. <sup>3</sup>Jare che numiñera vi - echa'ã nde co jae cheparaviqui ñru ete - nembori vaerã cua cuña reta. Echa'ã jae reta uparaviqui tanta che ndive, numimbeu vaerã ñee icavi vae. Uparaviqui reta Clemente ndive jare ñru che ndive uparaviqui vae reta ndive vi. Cua reta jee Tumpa uicuatía ma ilibro pe. Echa'ã Tumpa umee ma tecove opa mbae vae chupe reta.

<sup>4</sup>Jecuaeño piyerovia catu yandeYa re. Tae ye cua: Piyerovia catu.

<sup>5</sup>Opaete vae tuicuaa quirãi pe reta pepiacavi co. YandeYa ou ye seri ma co.

<sup>6</sup>Agüiye etei piyemipia'ã mbae re. Ërei jecuaeño piyerure Tumpa pe opaete mbaembae re yasurupai Tumpa pe pemee reve, jare cuarãi pemimbeu Tumpa pe mbae pipota vae. <sup>7</sup>Jare Tumpa umeeta peve ipiacatu. Yandepia pe yayemingueta rupiño yandepuere'ã etei yaicuaa Tumpa ipiacatu. Cua mbiacatu uyandarecota pepia re jare pepiyemingueta re. Echa'ã ou Cristo Jesús güi.

### Pepia pe piyemingueta cua re

<sup>8</sup>Cuaño ma tamimbeu peve, cherivi reta: Pepia pe piyemingueta opaete mbae añete vae re, opaete mbae icavi vae re, opaete mbae jupi vae re, opaete mbae iyoa mbae vae re, opaete mbae ipõra vae re, jare opaete mbae yandepuere ñanemiari cavi jese vae re. Yandepuere yae yave: “Cua icavi co”, jare yandepuere yaipiu icavi vae ramo, yandepia pe yayemingueta jese.

<sup>9</sup>Piyemboe ma che amimbeu peve piyapo vaerã vae re. Piyandu co che jae peve vae, jare peecha co che ayapo vae. Jáeramo cuarã piyapo, jare Tumpa pemborita. Echa'ã jae umee yandeve ipiacatu.

### Filipos pegua reta ofrenda ombou Pablo pe vae

<sup>10</sup>Ërei ayerovia ete, jare amee yasurupai yandeYa pe peré. Echa'ã ima ma pembou'ã mbae chembori vaerã. Ërei añave pemandúa ye ma cheré. Añete co, jecuaeño pemandúa cheré, ërei pepuere'ã pembou mbae chembori vaerã. <sup>11</sup>Jae'ã cuarã, mbae uata cheve ramo. Echa'ã aicuaa ma quirã aico vaerã chepiacatu reve chepuere rupiño. <sup>12</sup>Aicuaa quirã aico vaerã, mboviño mbaembae anoi yave. Aicuaa vi quirã aico vaerã, jeta mbaembae anoi yave. Opaete pegua aicuaa ma quirã aico vaerã cheangapii reve jare chiyembaï reve. Aicuaa ma quirã aico vaerã, jeta mbaembae anoi yave, jare jeta mbaembae uata cheve yave. <sup>13</sup>Opaete chepuere ayapo Cristo rupi. Echa'ã jae umee cheve imbaepuere.

<sup>14</sup>Ërei piyapo ma icavi vae cheve. Echa'ã chembori ma, aiporara aï yave. <sup>15</sup>Jare pe reta Filipos pegua picuaa vi quirã ñee icavi vae ambipi amimbeu yave, aa Macedonia güi yave, mbaeti ye ñru uyembatimbati vae reta ombou cheve ofrenda chembori vaerã, jaeño pe reta pembou cheve. <sup>16</sup>Echa'ã Tesalónica pe aico yave, pembou cheve ofrenda chembori vaerã. Jayave taicue rupi pembou ye ofrenda cheve. <sup>17</sup>Ayerovia pembou cheve vae re. Ërei ayerovia'ã jese chembori ramoño. Ayerovia ete jese mbae icavi vae piyapo ramo. Jare aipota jecuaeño mbae icavi vae piyapo vaerã, Tumpa umbijecovia vaerã peve. <sup>18</sup>Ërei che opaete mbaembae anoi. Jeta ete anoi. Mbaeti mbae uata cheve. Echa'ã Epafrodito umee ma cheve pembou cheve vae. Jocua pembou vae penti ofrenda icavi vae uñemee Tumpa pe vae rami co. Jocua nunga umbiyerovia Tumpa. Jae co mbae ipiche cavi vae rami. <sup>19</sup>Jare cheRu Tumpa umeeta peve opaete mbaembae icavi peve vae jeta ete güinoi vae güi. Echa'ã Cristo Jesús uyapo vae jeco pegua jeta ete güinoi yandeve peguarã. <sup>20</sup>YandeRu Tumpa tuyembiaadoraca jaeño mai pegua. Amén.

<sup>21</sup>Tumpa ndiveño toï opaete uñeño tee Tumpa peguarã vae reta. Echa'ã güirovia Cristo Jesús re. Yanderivi reta che ndive ñgüinoi vae vi jei peve Tumpa ndiveño peï. <sup>22</sup>Jae ramiño vi opaete uñeño tee Tumpa peguarã vae reta cua pe ñgüinoi vae jei peve Tumpa ndiveño peï. Cua reta ipite pe ime amocue César pe uyeyocui vae.

<sup>23</sup>YandeYa Jesucristo tumee opaete peve ipiacavi. Amén.

# LA CARTA DEL APOSTOL SAN PABLO A LOS COLOSENSES

---

**1** <sup>1</sup> Che co jae Pablo. Che co jae Jesucristo jemimondo Tumpa jei vae rupi. Yanderivi Timoteo ime vi cua pe oí che ndive. <sup>2</sup> Aicutía cua tupapire Colosas pe pico vae pe. Pe reta vi co jae cherivi reta. Tumpa peñoño tee iyupeguarã, jare piyeyocui cavi Cristo pe. YandeRu Tumpa jare yandeYa Jesucristo tumee peve ipiacavi jare ipiacatu.

## **Pablo uyerure Tumpa pe upurugüirovia vae reta re**

<sup>3</sup> Numees yasurupai Tumpa pe peré. Jae co yandeYa Jesucristo Tu. Jare jecuaeño nduyerure peré. <sup>4</sup> Cuarãi nduyapo, nduicuaa güive quirãí perovia Cristo Jesús re, jare quirãí peau opaete uñeñoño tee Tumpa peguarã vae reta. <sup>5</sup> Pe reta penoi cua mburuau, peãro peĩ piyerovia reve Tumpa umeeta peve vae ramo. Echa'ã Tumpa uñuvatu ma peve ara pe. Pe reta picuaa cua regua, ñee icavi vae piyandu yave. Echa'ã ñee icavi vae añete vae co. <sup>6</sup> Cua ñee jerãcua peve vae jerãcua vi opaete ivi rupi. Jare opaete que rupi quía quía güirovia, jare uyeyocui Tumpa pe pe reta rami. Echa'ã pe reta perovia, jare piyeyocui Tumpa pe, jocua ara Tumpa ipiacavi regua piyandu güive. Echa'ã picuaa añete co cua ñee. <sup>7</sup> Cua re piyemboe Epafras güi. Epafras uyeyocui Cristo pe ore ndive, jare nduau ete. Jae co penti Cristo jembiocui pepuere perovia catu vae. <sup>8</sup> Jare jae uicuaaca oreve mburuau Espíritu Santo umee peve vae.

<sup>9</sup> Jáeramo ore vi cua nduyandu güive, jecuaeño nduyerure peré. Nduyerure Tumpa pe, jae uicuaaca cavi vaerã peve jei vae. Tumpa tumee peve opaete aracuaa Espíritu pegua, picuaa cavi vaerã jae jei vae. <sup>10</sup> Tumpa tapembori, pico cavi vaerã. Echa'ã pe reta co jae yandeYa imbae. Jare cuarãí pico yave, pembiyeroviata co yandeYa. Jecuaeño piyeyocui yandeYa pe icavi vae piyapo vae rupi. Jare jecuaeño piyemboe Tumpa re, picuaa cavi ete vaerã. <sup>11</sup> Tumpa tapemimirãta imbaepuere tuicha ete vae pe, pepiaguasu vaerã piyerovia reve. <sup>12</sup> Pemee yasurupai yandeRu

pe. Echa'ã jae umee ma peve penoi vaerã pembaerã opaete ñru uñeñoño tee Tumpa peguarã vae reta pe uñemeeta vae. Echa'ã cua reta yugüireco tembipe pe. <sup>13</sup>YandeRu yanderepi ma mbaepuere pñtumimbi re güinoi vae güi, jare yandererova ma Tai iporoyocua pe. Jae uau Tai. <sup>14</sup>YandeRu yanderepi Tai imano rupi, jare yanembiasa yanembaeyoa reta güi.

### **Cristo yanembipiacatu ma Tumpa ndive imano rupi**

<sup>15</sup>Mbaeti etei quía uecha Tumpa. Ërei Tai uicuaaca yandeve quirãi co jae. Tai co jae opaete mbaembae uyeyapo vae iYa. <sup>16</sup>Echa'ã jae uyapo opaete. Jae uyapo opaete ara pe oñ vae jare opaete ivi pe oñ vae. Jae uyapo opaete yandepuere yaecha vae jare opaete yandepuere mbae yaecha vae. Jae uyapo opaete mburuvicha reta ara pegua jare ivi pegua, jare opaete mbaepuere güinoi vae. Jae etei uyapo opaete iyupeguarã. <sup>17</sup>Jare jae icoño mai ndei mbae uyeyapo mbove, jare mbaetita tẽi mbae ipuere ico jae uyandareco'ã yave jese. <sup>18</sup>Jare upurugüirovia vae reta co jae Cristo jete rami, jare Cristo co jae upurugüirovia vae reta iñãca rami. Jae co tenondegua vae. Echa'ã jae tenonde voi icove ye ou umanocue vae reta ipite güi, jae ico vaerã opaete vae iYarã. <sup>19</sup>Echa'ã Tumpa uipota vae co jae etei ico vaerã Cristo jete pe. <sup>20</sup>Tumpa uipota vae vi co umbipiacatu vaerã jae ndive Cristo rupi opaete ivi pe ñugüinoi vae reta jare opaete ara pe ñugüinoi vae reta. Echa'ã umee ma yandeve ipiacatu Cristo imano rupi curusu re.

<sup>21</sup>Jare tenonde yave pe reta mbiri ete pico Tumpa güi. Echa'ã piyovaichose pepia pe Tumpa ndive, jare piyapose icavi mbae vae. Ërei añave Cristo pembipiacatu ma Tumpa ndive. <sup>22</sup>Jucuarãi jae uyapo imano rupi cuimbaerã uyeyapo yave. Jare jucuarãi uyapo, peñoño tee vaerã iyupeguarã, jare agüiye vaerã penoi mbaeyoa, jare agüiye vaerã quía ipuere pembijeco mbae re, jae jovai peñ yave, <sup>23</sup>jecuaeño piñemimirãta yave jare piñemiatangãtu yave pepurugüirovia re, jare jecuaeño peãro yave piyerovia reve ñee icavi vae rupi uñemee peve vae. Echa'ã pe reta picuaa ñee icavi vae opaete ivi pegua reta pe jerãcua vae. Jare che vi amimbeu ñee icavi vae, jare cuarãi ayeyocui Tumpa pe.

### **Pablo uyeyocui upurugüirovia vae reta pe**

<sup>24</sup>Añave ayerovia aiporara añ peré vae re. Echa'ã aiporara añ cherete pe jocua uataño co Cristo jete uiporara vaerã vae. Echa'ã jae jete co jae upurugüirovia vae reta. <sup>25</sup>Echa'ã uñemee cheve ayeyocui vaerã upurugüirovia vae reta pe. Tumpa etei cheapo jae jembiocuirã, che ayeyocui vaerã peve, jare amimbeu vaerã peve opaete Tumpa iñee. <sup>26</sup>Cua co jocua tenonde yave uyecuaa mbae vae. Echa'ã Tumpa uicuaaca'ã etei tenonde yave. Ërei añave Tumpa uicuaaca co oñoño tee iyupeguarã vae reta pe. <sup>27</sup>Echa'ã Tumpa iquirẽi uicuaaca chupe reta quirãi cua tenonde yave uyecuaa mbae vae mbaeyecou tuicha vae güinoi judío mbae vae reta coti. Jae co Cristo ico pepia pe vae. Jáeramo pepuere peãro piyerovia reve Tumpa pembiyeroviata vae re.

<sup>28</sup>Ore vi numimbeu Cristo regua. Numbiaracuaa opaete vae, jare nomboe opaete vae orearacuaa catu reve, opaete vae ipirāta vaerā Cristo imbaepuere rupi. <sup>29</sup>Cua jeco pegua che vi aparaviqui añ Tumpa pe. Tanta aparaviqui añ aiporara reve Cristo imbaepuere rupi. Echa'ā jae tanta uparaviqui oī chepia pe.

**2** <sup>1</sup>Ērei aipota picuaa vaerā quirāi tanta aparaviqui aiporara reve peré, jare Laodicea pegua reta re, jare opaete cherecha mbae vae reta re. <sup>2</sup>Aipota ete pepiacatu vaerā, jare piyerau vaerā, penti ramiño pico vaerā. Aipota piñemimirāta vaerā opaete picuaa vae rupi, jare picuaa vaerā jocua tenonde yave uyecuaa mbae vae Cristo regua yandeRu Tumpa uicuaaca yandeve vae. <sup>3</sup>Pipota yave pearacuaa catu, Cristo re uñevāe opaete aracuaa. Jare pipota yave picuaa cavi mbae regua, Cristo uicuaa cavi opaete mbae regua. <sup>4</sup>Jare cua che jae peve, agüiye vaerā quía pemitavi ñee icavi echa vae pe. <sup>5</sup>Echa'ā yepe tēi che añ'ā pepi, ěrei jecuaeño chepia pe ayemingueta peré. Aicuaa quirāi pico cavi co uyupii, jare quirāi piñemimirāta pepurugüirovia Cristo regua re. Jare cua re ayerovia.

<sup>6</sup>Pembiresive ma yandeYa Jesucristo mburugüirovia rupi. Jae ramiño vi jecuaeño pico perovia reve jese. <sup>7</sup>Piñemimirāta Cristo imbaepuere rupi, pecuacuaa cavi vaerā jese. Piñemiatangātu pepurugüirovia re. Echa'ā jucuarāi co piyemboe. Jecuaeño pemee yasurupai Tumpa pe pepurugüirovia re.

### **Cristo umee ma yandeve tecove ipiau vae**

<sup>8</sup>Piñemoa, agüiye vaerā quía pemitavi aracuaa tavi pegua pe. Echa'ā cua nunga aracuaa moromboe ivi pegua retaño co. Oporomboe'ā Cristo re, jaeño mbaembae ivi pegua re.

<sup>9</sup>Echa'ā Cristo co jae Tumpa etei cuimbaerā uyeyapo vae. <sup>10</sup>Jáeramo opaete mbaembae penoi, Cristo penoi ramo. Echa'ā jae co opaete mburuvicha reta ara pegua jare ivi pegua iYa. <sup>11</sup>Jare piñemicircuncidaca ma vi pepia pe, Cristo re perovia ramo. Echa'ā Cristo uyapo peve pepia pe vae penti cuimbae uñemicircuncidaca vae jete pe uyeyapo vae rami co. Echa'ā Cristo perepi opaete mbaeyoa imbaepuere güi. <sup>12</sup>Piyembibautizaca yave, piñeñoti co Cristo ndive, jare Tumpa umee peve tecove opa mbae vae Cristo ndive. Cua uyeyapo Tumpa imbaepuere rupi, pepurugüirovia ramo. Echa'ā Tumpa umbijecove ye Cristo güeru umanocue vae reta ipite güi. <sup>13</sup>Tenonde yave pe reta penoi'ā tecove opa mbae vae pembaeyoa reta jeco pegua, jare piñemicircuncidaca'ā pembaeyoa reta güi ramo. Ērei Tumpa umee ma peve tecove opa mbae vae Cristo ndive jare pemiassa ma opaete pembaeyoa reta güi. <sup>14</sup>Tumpa umbai ma mboroyocui uyecuatía oī vae. Echa'ā jocua uyecuatía oī vae oyovaichose ore ndive, jare jecuaeño orembijecose. Ērei Tumpa güiraa co oregüi, Cristo uyecutuca curusu re yave. <sup>15</sup>Jáeramo Tumpa yanderepi ma opaete mbaepuere yanderé güinoise vae reta güi, jare umimaraca reta opaete vae jovaque. Echa'ā Tumpa umiamiri reta, Cristo umano yave curusu re.

<sup>16</sup>Jáeramo agüiye quía tapembijeco mbae peu vae re, jare fiesta reta iara reta re, jare yasipiau re, jare mbutuu ara reta re. <sup>17</sup>Echa'ã opaete cua reta jaanga retaño co. Tenonde yave Tumpa umijaanga reta uyeyapota vae re. Echa'ã cua reta uyemijaangaño Cristo re. <sup>18</sup>Agüiye quía tapeopia Tumpa umeeta peve vae güi. Echa'ã amocue vae uñemimichi-raanga, jare umbiadora ángel reta. Cua nunga ipia pe uyemingueta tēi uicuaa co uecha mbae vae regua, jare uyembicate ipiyemingueta rupiño uicuaa vae re, yepe tēi mbae uicuaa cavi'ã. <sup>19</sup>Cua nunga uyeco'ã Cristo re. Echa'ã Cristo co jae upurugüirovia vae reta iñaca. Echa'ã opaete yandeyuapiapia jare yanderayi uyapo yanderete penti ramiño. Ērei yanderete uyeco ñaneäca re, ucuacuaa cavi vaerã. Jucuarãiño vi Cristo jete ucuacuaa Tumpa jei vae re.

<sup>20</sup>Pe reta pemento co Cristo ndive moromböe ivi pegua reta güi. Jáeramo ¿maera pa jecuaeño pico ivi pegua reta yugüireco rami? jare ¿maera pa piyapo iporoyocui reta? <sup>21</sup>Echa'ã jae reta peocui cuarãi: “Agüiye pipisi. Agüiye peu. Agüiye piyaviqui.” Jucuarãi jei reta. <sup>22</sup>Ērei opaete jocua mbaembae uyembaita co, uyeporu yave. Jare opaete cua mboroyocui reta moromböe ivi pegua retaño co. <sup>23</sup>Añete co, cua nunga mboroyocui aracuaa pegua echa co. Echa'ã cua nunga mboroyocui iyapoa reta umbiadora-raanga Tumpa pe ipia pe uyemingueta vae reño, jare uñemimichi-raanga, jare uiporaraca jete pe. Ērei cua mbaembae rupi ipuere'ã etei oyopia jete uipota vae reta.

**3** <sup>1</sup>Tumpa umee ma peve tecove opa mbae vae Cristo ndive. Jáeramo jecuaeño pepia pe piyemingueta mbaembae ara pe ñugüinoi vae re. Echa'ã joco pe Cristo uguapi oi Tumpa iyipi pe iyacata coti. <sup>2</sup>Jecuaeño pepia pe piyemingueta mbaembae ara pe ñugüinoi vae re. Agüiye jecuaeño pepia pe piyemingueta mbaembae ivi pe ñugüinoi vae reño. <sup>3</sup>Echa'ã pemento ma ivi pegua güi, jare perecove añetete vae ime ma oi Cristo ndive Tumpa oi vae pe. Mbaeti quía ipuere uecha. <sup>4</sup>Cristo co jae perecove añetete vae. Cristo uyecuaa ye yave, pe reta vi piyecuaata jare piyeroziata jae ndive.

#### Teco mai indechi vae jare teco mai ipiau vae

<sup>5</sup>Jáeramo agüiye pemaño icove vaerã jocua teco mai ivi pegua icavi mbae vae perete pe oi vae. Agüiye piyapo aguasa. Agüiye pepia pe piyemingueta icavi mbae vae re. Agüiye peporopotaño. Agüiye pipota icavi mbae vae. Agüiye pipota ñru vae reta imbaembae - echa'ã pipota yave, pipota ete ñru vae reta imbaembae Tumpa güi. <sup>6</sup>Cua icavi mbae vae jeco pegua Tumpa uiporaracata co jae jei vae uyapo'ã vae reta pe. <sup>7</sup>Tenonde yave pe reta vi piyapose cua icavi mbae vae reta. Echa'ã picose jucuarãi piyapo vaerã. <sup>8</sup>Ērei añave pemombo piyugüi opaete cua ñru icavi mbae vae reta. Agüiye pepochi. Agüiye pearasi. Agüiye piyapo icavi mbae vae piyupe. Agüiye pere icavi mbae vae piyupe. Agüiye pemoë ñee pichĩ vae. <sup>9</sup>Agüiye peapu piyupe. Echa'ã pemombo ma piyugüi pereco mai indechicue pichĩ vae jare icavi mbae vae reta piyapose vae.

<sup>10</sup>Jare pipisi ma teco mai ipiau vae. Echa'ã cua teco mai ipiau vae umbĩpiauta pepia pe piyemingueta vae, picuaa cavi vaerã Tumpa regua, jare pico vaerã jae jei vae re. Echa'ã Tumpa umee peve cua teco mai ipiau vae. <sup>11</sup>Jare cua teco mai ipiau vae güinoi vae reta ipite pe mbaeti ma uyuavi uyugüi judío mbae vae jare judío, uñemicircuncidaca vae jare uñemicircuncidaca mbae vae, ñanaigua reta, uyeyocui vae jare uyeyocui mbae vae. Echa'ã jaeño Cristo ico opaete vae ipia pe.

<sup>12</sup>Tumpa perau, jare peparavo peño tee vaerã iyupeguarã. Jáeramo pico cavi. Piyeparareco. Pepiacavi piyupe. Piñemimichi piyupe. Pepiaguasu piyupe. <sup>13</sup>Pemiaguanta piyupe, jare piyembiasa, ime yave quía ñru vae mbae re umbijeco vae. Echa'ã yandeYa pemiãsa ma. Jae ramiño vi pe reta piyembiasa. <sup>14</sup>Jare piyerau. Echa'ã mburuau icavi ete opaete ñru güi. Echa'ã piyerau yave, pico cavi eteta uyupii penti ramiño. <sup>15</sup>Jare Tumpa ipiacatu pepia pe oĩ vae tuicuaaca peve mbae icavi piyapo vaerã vae. Echa'ã cuarã Tumpa peparavo, pico vaerã penti ramiño. Jare jecuaeño pemee yasurupai Tumpa pe.

<sup>16</sup>Ñee Cristo regua jecuaeño tuico pepia pe. Piyemboe jare piyembiaracuaa pearacuaa catu reve. Piyerovia reve pecanta yandeYa pe canta reta yambiadora pipe vae. <sup>17</sup>Jare mbae re piyemingueta yave jare mbae piyapo yave, piyemingueta jese jare piyapo opaete yandeYa Jesús jee re. Jare jecuaeño pemee yasurupai yandeRu Tumpa pe yandeYa Jesús rupi.

### Yayeyocui yandiyupe

<sup>18</sup>Cuña reta tuyeyocui ime pe. Echa'ã icavi co jucuarãi uyapo vaerã. Echa'ã güirovia ma yandeYa re.

<sup>19</sup>Cuimbae reta tuau jembireco, jare agüiye tipochiño chupe.

<sup>20</sup>Cunumi reta jare cuñatai reta tuyapo opaete tu jare ichi jei vae. Echa'ã cua icavi co yandeYa pe.

<sup>21</sup>Tu reta agüiye tumbiarasiño isambiai reta, agüiye vaerã isambiai reta umbiaqui.

<sup>22</sup>Uyeyocui vae reta tuyapo opaete ipatrón jei vae. Agüiye tuyeyocui cavi ipatrón pe jae umae oĩ jese yaveño, umbiyerovia vaerãño. Ipiquirẽi reve tuyeyocui chupe uipiu reve yandeYa güi. <sup>23</sup>Jare opaete uyapo vae, tuyapo ipiaquirẽi reve. Tuyeyocui ipatrón pe, yandeYa pe uyeyocui rami. Echa'ã cuimbae peño'ã uyeyocui oĩ. <sup>24</sup>Jare tuicuaa yandeYa umbijecoviata co chupe jocua umeeta chupe vae pe. Echa'ã uyeyocui co oĩ yandeYa Cristo pe. <sup>25</sup>Èrei icavi mbae vae uyapo vae pe Tumpa umbijecoviata vi icavi mbae vae uyapo vae re. Echa'ã Tumpa uau'ã penti vaeño ñru vae güi.

**4** <sup>1</sup>Patrón reta tuyapo jupi vae jembiocui reta pe, jare agüiye tumbitavi. Echa'ã tuicuaa jae reta vi güinoi co iYa ara pe.

<sup>2</sup>Jecuaeño piyerure Tumpa pe. Piñemiatangātu, jecuaeño piyerure vaerã pemee reve yasurupai Tumpa pe. <sup>3</sup>Jae ramiño vi piyerure oreré, Tumpa uicuaaca vaerã oreve quirãi numimbeu vaerã ñee. Echa'ã chequirẽi chemiari tenonde yave Cristo

regua uyecuaa mbae vae re. Echa'ã jáeramo che aĩ cua peresorĩru pe. <sup>4</sup>Piyerure cheré, aicuaaca cavi vaerã ĩru vae reta pe. Echa'ã icavi co cuarãĩ ayapo vaerã.

<sup>5</sup>Pico pearacuaa catu reve upurugũirovia mbae vae reta ndive. Jecuaeño piyapo icavi vae. <sup>6</sup>Jecuaeño piyemingueta ñee icavi vae pe mbae icavi vae re. Jare piyemboe quirãĩ piyemingueta vaerã ipotave vae pe.

### Saludo reta

<sup>7</sup>Tĩquico co jae cherĩvi aau vae. Jae co penti yandeYa jembiocui che ndive uyeyocui cavi yandeYa pe vae. Jae umimbeuta peve opaete cheregua. <sup>8</sup>Echa'ã cuarã amondo pepĩ, jae uicuaa vaerã peregua, jare jae pembĩpiacatu vaerã. <sup>9</sup>Amondo vi jae ndive Onésimo. Jae vi co cherĩvi aau vae yandeYa pe uyeyocui cavi vae. Jae co penti perentaigua. Jae umimbeuta peve opaete mbae cua pe uyeyapo vae. <sup>10</sup>Aristarco jei peve Tumpa ndiveño peĩ. Jae ime che ndive oĩ peresorĩru pe. Marcos vi jei peve Tumpa ndiveño peĩ. Jae co Bernabé jii. Echa'ã che poyocui ma pembiresive cavi vaerã, jae oo pepĩ yave. <sup>11</sup>Jesús vi jei peve Tumpa ndiveño peĩ. Jae co Justo pe uyembijee vae. Echa'ã opaete judío reta upurugũirovia vae güi cua retaño chembori amimbeu vaerã Tumpa iporoyocuiã regua. Jae reta chembĩpiacatu ete. <sup>12</sup>Epafras vi jei peve Tumpa ndiveño peĩ. Jae vi uyeyocui Cristo pe. Jare jae vi co penti perentaigua. Jae jecuaeño uyerure ete Tumpa pe peré, piñemimirãta vaerã, jare picuaa cavi vaerã opaete Tumpa jei vae. <sup>13</sup>Echa'ã che etei chepuere amimbeu peve quirãĩ Epafras uparaviqui tanta peré, jare Laodicea jare Hierápolis pe ñugũĩnoi vae reta re. <sup>14</sup>Lucas jare Demas vi jei peve Tumpa ndiveño peĩ. Lucas co jae upurupiano vae aau vae.

<sup>15</sup>Tumpa ndiveño toĩ upurugũirovia vae reta Laodicea pegua, jare Ninfas jare opaete upurugũirovia vae reta Ninfas jenta pe uyembati vae. <sup>16</sup>Pe reta pemingueta ma yave cua tupapire, pemondo Laodicea pe upurugũirovia vae reta joco pe uyembati vae vi umingueta vaerã. Jare jocua tupapire Laodicea pe amondo vae pe reta pemingueta vi. <sup>17</sup>Pere Arquipo pe tuñemiatangãtu, uyapo vaerã mbaraviqui yandeYa umee chupe vae, uyeyocui vaerã yandeYa pe.

<sup>18</sup>Che etei jae peve Tumpa ndiveño peĩ. Cua aicutatĩa chepo pe etei. Pemandúa peresorĩru pe aĩ vae re. Tumpa tumee peve ipiacavi. Amén.



# PRIMERA CARTA DEL APOSTOL SAN PABLO A LOS TESALONICENSES

**1** <sup>1</sup> Che co jae Pablo. Che ndive ime ñugüinoi Silvano jare Timoteo. Aicuatía cua tupapire opaete pepurugüirovia vae reta Tesalónica pe piyembati vae pe. Pe reta co jae yandeRu Tumpa jare yandeYa Jesucristo imbae. YandeRu Tumpa jare yandeYa Jesucristo tumee peve ipiacavi jare ipiacatu.

## **Jeta vae uicuaa Tesalónica pegua reta ipurugüirovia regua**

<sup>2</sup> Jecuaeño numee yasurupai Tumpa pe peré, jare oreacañi'ã pegüi. Jecuaeño nduyerure Tumpa pe peré. <sup>3</sup> Jare nduyerure yandeRu Tumpa pe yave, jecuaeño oremandúa quirãi pico Tumpa coti vae re. Echa'ã preparaviqui Tumpa pe, perovia Jesucristo re jare peau ramo, jare jecuaeño pepiaguasu, peãro piyerovia reve yandeYa Jesucristo ou ye vaerã ramo. <sup>4</sup> Pe reta co jae orerivi reta. Tumpa perau jare preparavo. Cua nduicuaa cavi co. <sup>5</sup> Echa'ã numimbeu yave peve ñee icavi vae, Espíritu Santo umee oreve mbaepuere numimbeu cavi vaerã peve. Ñeeiño'ã co. Echa'ã nduicuaa cavi añetete co ñee icavi vae. Jare pe reta picuaa cavi co quirãi ore nduico cavi pepite pe, puau ramo.

<sup>6</sup> Jare pe reta pembipi pico, ore nduico rami, jare yandeYa ico rami. Perovia co numimbeu peve vae. Jáeramo piporara ete. Ërei Espíritu Santo pembiyerovia. <sup>7</sup> Cua jeco pegua opaete upurugüirovia vae reta Macedonia pegua jare Acaya pegua uicuaa quirãi icavi co yugüireco vaerã. <sup>8</sup> Echa'ã pe reta pemimbeu ñee icavi vae yandeYa regua ñru vae reta pe. Macedonia jare Acaya pegua reta uicuaa perovia co Tumpa re. Jare opaete que rupi rupi uicuaa vi. Jáeramo uata'ã ma mbae ore numimbeu vaerã chupe reta. <sup>9</sup> Echa'ã jae reta etei umimbeu ñru vae reta pe quirãi ore ndoo perenta pe, jare mbae uyeyapo joco pe. Umimbeu reta vi quirãi pemiadora'ã ma tumpa-raanga reta - echa'ã piyerovia ma jocua reta güi Tumpa coti - jare quirãi piyeyocui ma Tumpa añetete vae pe - jae co jecuaeño ico vae. <sup>10</sup> Umimbeu reta vi quirãi peãro pei Tumpa Tai ou ye vaerã ara güi - jae co Jesús. Echa'ã Tumpa umbijecove ye

güeru umanocue vae reta ipíte güi. Tumpa uiporacata co upurugüirovia mbae vae reta pe, ěrei Jesús yanderepi ma ĩru vae reta uiporacata vae güi.

### Quirái Pablo uyeyocui Tumpa pe Tesalónica pe

**2** <sup>1</sup>Ndoo yave perenta pe, ndooĩño'ã co. Cua picuaa pe reta etei, cherivi reta. <sup>2</sup>Yepe tēi nduiporara Filipos pe, ĩru vae reta uyapo icavi mbae vae oreve yave - cua vi picuaa - ěrei numimbeu peve ñee icavi vae Tumpa ombou vae. Nduquiyē'ã, yepe tēi yavai ete oreve. Echa'ã Tumpa orembori. <sup>3</sup>Jocua numimbeu peve vae añete co. Ndueca'ã co pembiepi vaerã oreve cua numimbeu peve vae. Nduipota'ã etei vi pumbitavi. <sup>4</sup>Tumpa etei uicuaa quirái nduyeyocui chupe, jare uicuaaca ma icavi numimbeu vaerã ñee icavi vae. Jáeramo numimbeu ĩru vae reta pe, Tumpa numbiyerovia vaerã. Numimbeu'ã, ivi pegua retaño numbiyerovia vaerã. Echa'ã Tumpa uicuaa cavi orepia pe oĩ vae. <sup>5</sup>Ndoe'ã etei mbae peve, piyembutuicha vaerã. Cua picuaa co pe reta. Nduipota viari'ã mbae pegüi oreypugarã. Cua uicuaa vi co Tumpa. <sup>6</sup>Ndueca'ã vi pe reta jare ĩru vae reta orembutuicha vaerã. Ęrei icavita tēi ndueca pe reta orembutuicha vaerã. Echa'ã ore co jae Cristo jemimondo reta. <sup>7</sup>Ęrei ore nduyandareco peré puau reve, penti ichi imembi umicambu vae uyandareco uau reve vae rami. <sup>8</sup>Ore puau. Jáeramo numimbeu ma peve ñee icavi vae Tumpa ombou vae. Ore puau ete co. Jáeramo orerecove yepe numeeta tēi peré. <sup>9</sup>Pemandúa quirái tanta nduparaviqui orecañi reve, cherivi reta. Nduparaviqui ara rupi jare pĩtu rupi, agüiye vaerã pumambeco mbae pemee vaerã oreve vae re. Jucuarái nduyapo, jare numimbeu vi peve ñee icavi vae Tumpa ombou vae.

<sup>10</sup>Pe reta co jae upurugüirovia vae reta. Pe reta picuaa, jare Tumpa vi uicuaa quirái nduico pepite pe. Jecuaeño nduyapo icavi vae. Mbaeti quía ipuere orembijeco mbae re. Jecuaeño nduyapo jupi vae. <sup>11</sup>Oremiari peve - penti penti pe - penti tu imiari taĩ reta pe rami. Ore pumbiaracuaa, jare pumbipiacatu. Opaete cua picuaa cavi. <sup>12</sup>Ore poyocui piyapo vaerã icavi vae. Echa'ã pe reta co jae Tumpa imbae. Jare Tumpa preparavo ma, pe reta vi pico vaerã iporoyocua pe.

<sup>13</sup>Jáeramo jecuaeño numee yasurupai Tumpa pe. Echa'ã numimbeu peve yave Tumpa iñee, perovia jae co Tumpa iñee añetete vae - ore numimbeu peve vaeño'ã co. Jare cua Tumpa iñee jecuaeño uparaviqui pepia pe, pe reta pepurugüirovia ramo. <sup>14</sup>Jare uyeyapo ma peve, Judea pe uyembatimbatí vae reta pe uyeyapo vae rami, cherivi reta. Jae reta vi co Tumpa imbae. Echa'ã güirovia Cristo Jesús re. Echa'ã perentaigua reta uyapo icavi mbae vae peve, judío reta uyapo icavi mbae vae jocua upurugüirovia vae reta pe rami. <sup>15</sup>Echa'ã judío reta uyucaca Tumpa iñee araca umimbeu vae reta jare yandeYá Jesús vi, jare oreve vi uyapo icavi mbae vae. Uipotā'ã uyapo Tumpa jei vae, jare oyovaicho opaete vae ndive. <sup>16</sup>Echa'ã jecuaeño orembiavai, agüiye vaerã oremiari judío mbae vae reta pe, uyembiasaca vaerã. Jucuarái jecuaeño judío reta uyapo jeta ete icavi mbae vae. Ęrei Tumpa uiporacata eteta co chupe reta.

### Pablo uipota oo opou ye Tesalónica pegua reta pe

<sup>17</sup>Michi peguaño co mbiri noĩ pegüi, cherivi reta. Ërei yepe tēi puecha'ã ma, ãrei jecuaeño oremandúa peré. Nduipota ete tēi puecha ye. <sup>18</sup>Jáeramo nduipota tēi ndoo Tesalónica pe. Jecuaeño che etei aipota tēi aa pepi. Ërei Satanás jecuaeño orembiavai. <sup>19</sup>YandeYa Jesús ou yeta co ara güi. Jare ore nuãro noĩ nduyerovia reve. Echa'ã jae ndive ñaĩ yave, ore nduyeroviata, jare yandeYa jeita icavi co nduyapo, pe reta vi joco pe peĩta ramo. <sup>20</sup>Añete co, nduyeroviata pereco pegua, yandeYa jei yave icavi co nduyapo.

**3** <sup>1</sup>Jare orequirēi ete tēi ndoo pepi ramo, nduyemingueta ndupita vaerã oreño Atenas pe, <sup>2</sup>jare nomondo vaerã pepi Timoteo. Jae co yanderivi. Jae uyeyocui Tumpa pe. Umimbeu ore ndive ñee icavi vae Cristo regua. Jáeramo nomondo Timoteo, jae pematangãtu vaerã, jare pembiñiacatu vaerã pepurugüirovia re. <sup>3</sup>Agüiye pepiatiti ete, piporara ramo. Echa'ã pe reta etei picuaa jucuarã yaiporarata co. <sup>4</sup>Ore nduico yave pe ndive, numimbeu peve yaiporarata vae. Jare jucuarã uyeyapo ma. Cua picuaa co. <sup>5</sup>Jáeramo chequirēi ete tēi aa pepi ramo, amondo Timoteo, aicuaa vaerã pepurugüirovia regua. Echa'ã chepia pe ayemingueta aramoi jocua uipota ivi pegua reta icavi mbae vae uyapo vaerã vae uparaviqui ma pepia pe, uyapoca vaerã peve icavi mbae vae. Echa'ã jucuarã yave mona, nduparaviquiñota tēi co.

<sup>6</sup>Ërei Timoteo ou uvãe yave cua pe Tesalónica güi, umimbeu oreve quirã pepurugüirovia cavi peĩ, jare quirã peau yandeYa. Jei vi oreve quirã jecuaeño pemandúa oreré orerau reve, jare quirã pipota orerecha, ore nduipota puecha rami. <sup>7</sup>Jáeramo, cherivi reta, yepe tēi ñru vae reta uyapo icavi mbae vae oreve jare nduiporara noĩ, ãrei orepiacatu pepurugüirovia jeco pegua. <sup>8</sup>Orepiacatu noĩ, pe reta jecuaeño piyeyocui yandeYa pe ramo. <sup>9</sup>Jáeramo numee yasurupai tuicha Tumpa pe peré. Echa'ã nduyerovia ete pereco pegua yandeRu Tumpa jovaque. <sup>10</sup>Jare tanta nduyerure Tumpa pe ara rupi jare pĩtu rupi, ndoo vaerã puecha. Nduipota numimbeu peve mbaembae ndeiño picuaa cavi vae, pepirãta vaerã pepurugüirovia re.

<sup>11</sup>YandeRu Tumpa etei jare yandeYa Jesús taoremondo pepi. <sup>12</sup>Jare yandeYa tuparaviqui pepia pe, piyerau ete vaerã, jare peau vaerã opaete vae. Pepuruau, ore puau rami. <sup>13</sup>Jare yandeYa tapemimirãta, piyapo vaerã jupi vae, jare agüiye vaerã yandeRu Tumpa pembijeco mbae re, yandeYa Jesús ou ye yave. Jae ou yeta co opaete uñeño tee chupeguarã vae reta ndive.

### Quirã yandepuere yambiyerovia Tumpa

**4** <sup>1</sup>Pe reta picuaa ma quirã pico vaerã, jare quirã pembiyerovia vaerã Tumpa. Cua numimbeu ma peve. Jáeramo añave pumbiaracuaa yandeYa Jesús jee re, cherivi reta, jecuaeño pico cuarã, pembiyerovia ete vaerã Tumpa.

<sup>2</sup>Echa'ã pe reta picuaa mboroyocui reta numimbeu peve vae. YandeYa Jesús umimbeu oreve numimbeu peve vaerã. <sup>3</sup>Echa'ã Tumpa uipota piñeño tee vaerã chupeguarã. Uipota'ã piyapo vaerã aguasa. <sup>4</sup>Jáeramo penti penti penoi pembireco. Piyapo jupi vae pembireco coti, jare pemae cavi jese pipiu reve. <sup>5</sup>Agüiye peporopotaño. Echa'ã jucuarã uyapo ivi pegua güirovia'ã Tumpa re vae reta. <sup>6</sup>Agüiye piyapo cua nunga icavi mbae vae. Echa'ã cua nunga icavi mbae vae piyapo yave, piyapo co icavi mbae vae perivi reta pe. Jare jucuarã piyapo yave, yandeYa uiporacata co peve jocua jeco pegua. Cua numimbeu ma peve, agüiye vaerã piyapo. <sup>7</sup>Echa'ã Tumpa yandeparavo, ñañeño tee vaerã chupeguarã - yandeparavo'ã yaporopota vaerã. <sup>8</sup>Jáeramo periro yave ore poyocui piyapo vaerã vae, periro co Tumpa iporoyocui - oreporoyocuiño'ã co. Echa'ã Tumpa umee ma yandeve Espíritu Santo, jae ico vaerã yandepia pe. <sup>9</sup>Aicuatia'ta'ã peve mburuau penoi vaerã ñru upurugüirovia vae reta coti vae re. Echa'ã picuaa ma co. Tumpa pemboe ma piyerau vaerã. <sup>10</sup>Añete co, peau opaete upurugüirovia vae Macedonia pegua reta. Ërei pumiñera jecuaño piyerau ete vaerã, cherivi reta. <sup>11</sup>Cua poyocui: Pico pepiacatu reve. Jare piyapo peparaviqui. Pemimbaraviqui pepo. Jucuarã ore poyocui ma. <sup>12</sup>Jucuarã pico yave, piyepiucata co upurugüirovia mbae vae reta pe, jare ndarau mbae uata peve.

### YandeYa ou yeta

<sup>13</sup>¿Picuaa'ã pa umanocue vae reta regua, cherivi reta? Nduipota picuaa vaerã, agüiye vaerã pepiatiti, ñru vae reta ipiatiti rami. Echa'ã jae reta mbaeti mbae uãro vaerã uyerovia reve. <sup>14</sup>Yande yarovia Jesús umano co jare icove ye co ou umanocue vae reta ipite güi. Jae ramiño vi Tumpa ombouta Jesús ndive upurugüirovia vae umanocue vae reta.

<sup>15</sup>Jáeramo numimbeu peve yandeYa umimbeu oreve vae. Jae co cua: YandeYa ou ye yave, yande imeño ñaĩ vae ndarau yaa umanocue vae reta jenonde. <sup>16</sup>Echa'ã yandeYa etei ugüeyita ara güi ñee mbaepuere pegua reve. Uyenduta vi penti ángel tenondegua vae ñnee jare Tumpa itrompeta. Jare Cristo re güirovia vae umanocue vae reta icove yeta rani yugüeru ñru umanocue vae reta ipite güi. <sup>17</sup>Cua jaicue rupi yande cua ivi pe imeño ñaĩ vae ndeiño ñamano vae yaa pãveta jae reta ndive. YandeYa yandereupita, ñañeovãiti vaerã jae ndive amapitu re. Jare jaeño mai pegua yaicota yandeYa ndive. <sup>18</sup>Jáeramo piyembipiacatu cua ñee reta pe.

**5** <sup>1</sup>Ërei jocua ara reta re mbaeti ma mbae uata amimbeu vaerã peve, cherivi reta. <sup>2</sup>Penti imonda vae ou aramoiño pñtu yave. Jae ramiño vi yandeYa outa aramoiño. Cua picuaa cavi ma co. <sup>3</sup>Ivi pegua reta jeita ñugüiñoi: “Tecora'ã ma. Mbaeti ma mbae yaquiyẽ chugüi vae.” Jucuarã jeita. Jayave outa aramoiño chupe reta mbaesuserẽ, cuña imembirasi aramoiño ou chupe rami. Jare ndarau oyepe reta jocua mbaesuserẽ güi. <sup>4</sup>Penti imonda vae uique aramoiño penti tenta pe pñtumimbi yave, tenta iya uicuaa mbae reve. Ërei pe reta jocua tenta iya rami'ã co, cherivi reta. Pico'ã pñtumimbi pe. <sup>5</sup>Echa'ã opaete pe reta pico guarasi

jembipe yave yugüireco vae rami. Echa'ã guarasi umee tembipe. Yaico'ã co pïtu yave yugüireco vae rami. Echa'ã pïtu yave, pïtumimbi co. <sup>6</sup>Jáeramo agüiye pico oque vae reta rami. Echa'ã ñru vae reta yugüireco jucuarãi. Ërei ñañemiatangãtu, jare ñañemoa ngatu ñai. <sup>7</sup>Echa'ã oque vae reta oque pïtu yave, jare usavipo vae reta usavipo pïtu yave. <sup>8</sup>Ërei yande yaico guarasi jembipe yave yugüireco vae rami. Jáeramo ñañemoa ñai. Yarovia jare yaau Tumpa. Echa'ã cuarãi yave, jae co penti camisa fierro pegua uñerãro vae omonde vae rami. Ñãaro vi yayerovia reve yayembiasaca ete vaerã. Echa'ã cuarãi yave, jae co penti áca regua fierro pegua uñerãro vae oñono vae rami. <sup>9</sup>Echa'ã Tumpa yandeparavo'ã uiporaraca vaerã yandeve. Jae yandeparavo co, yayembiasaca vaerã yandeYa Jesucristo uyapo yandeve vae jeco pegua. <sup>10</sup>Echa'ã yandeYa Jesucristo umano yanderé, yande yaico vaerã jae ndive. Ñamano yave ani ndei ñamano yave, yaicota jae ndive. <sup>11</sup>Jáeramo piyembipiacatu jare piñemimirãta, jucuarãi piyapo pei rami.

### Pablo umbiaracuaa upurugüirovia vae reta

<sup>12</sup>Cherivi reta, pumiñera pipiu vaerã yandeYa pe uyeyocui vae pepite pe ñugüinoi vae reta. Echa'ã jae reta co petenondegua reta yandeYa iparaviqui re. Jae reta pembiaracuaa. <sup>13</sup>Pipiu jare peau iparaviqui jeco pegua. Jare pico cavi uyupii pepiacatu reve.

<sup>14</sup>Cherivi reta, pumiñera vi pembiaracuaa vaerã iyaqui vae reta, jare pembipiacatu vaerã ipiatiti vae reta, jare pembori vaerã ipirãta mbae vae reta, jare pepiaguasu vaerã opaete vae pe.

<sup>15</sup>Piñemoa ngatu. Ñru vae uyapo yave icavi mbae vae pecoti, agüiye piyeepe icavi mbae vae pe. Jecuaño pico cavi uyupii, jare pico cavi vi opaete vae ndive.

<sup>16</sup>Jecuaño piyerovia catu. <sup>17</sup>Jecuaño piyerure Tumpa pe. <sup>18</sup>Jecuaño pemee yasurupai Tumpa pe ipotave mbae re. Echa'ã cua co jae Tumpa uipota vae. Echa'ã perovia ma Cristo Jesús re.

<sup>19</sup>Agüiye piyopia Espiritu Santo iparaviqui. Echa'ã jae uparaviqui oi pepia pe. <sup>20</sup>Agüiye periro Tumpa iñee umimbeu vae reta iñee. <sup>21</sup>Pepia pe piyemingueta cavi opaete mbae re. Piñuvatu piyupe icavi vaño. <sup>22</sup>Agüiye piyapo ipotave icavi mbae vae.

<sup>23</sup>Tumpa umee ma yandeve ipiacatu. Tumpa etei tapeño tee iyupeguarãño. Tuyandareco cavi peespíritu re, jare perecove re, jare perete re, agüiye vaerã quía ipuere pembijeco mbae re yandeYa Jesucristo ou ye yave. <sup>24</sup>Tumpa uyapota co cua. Echa'ã jae preparavo ma, jare jecuaño uyapo jei uyapota vae.

<sup>25</sup>Cherivi reta, piyerure Tumpa pe oreré.

<sup>26</sup>Saludo reta piyapo piyupe yave, piñecuãva piyerau reve.

<sup>27</sup>Che pumiñera pemingüeta vaerã cua tupapire opaete yanderivi reta pe. Jae co yandeYa jei vae. Jae oñono tee reta iyupeguarã.

<sup>28</sup>YandeYa Jesucristo tumee peve ipiacavi. Amén.

# SEGUNDA CARTA DEL APOSTOL SAN PABLO A LOS TESALONICENSES

**1** <sup>1</sup>Che co jae Pablo. Che ndive ime ñugüinoi Silvano jare Timoteo. Aicuatía cua tupapire opaete pepurugüirovia vae reta Tesalónica pe piyembati vae pe. Pe reta co jae yandeRu Tumpa jare yandeYa Jesucristo imbae. <sup>2</sup>YandeRu Tumpa jare yandeYa Jesucristo tumee peve ipiacavi jare ipiacatu.

## **Tumpa upuruãata jupi vae rupi**

<sup>3</sup>Jecuaño numee yasurupai Tumpa pe peré, cherivi reta. Jare icavi co cuarãi nduyapo vaerã. Echa'ã jecuaño ucuacuaa pepurugüirovia, jare mburuau penoi uyucoti vae jecuaño ucuacuaa vi. <sup>4</sup>Jáeramo ore nduyemingueta cavi peré ñru upurugüirovia vae uyembatimbati vae reta pe oremiari peré yave. Numimbeu chupe reta quirãï pepiaguasu jare tanta pepurugüirovia, yepe tẽi ñru vae reta jecuaño uyapo icavi mbae vae peve jare uiporaraca peve. <sup>5</sup>Cua uicuaaca quirãï Tumpa jecuaño upuruãa jupi vae rupi, jare jucuarãï Tumpa jeita jupi co pe reta pico vaerã jae ndive iporoyocua pe. Echa'ã jocua jeco pegua añave piporara pico.

<sup>6</sup>Echa'ã jupi co Tumpa uiporaraca vaerã uiporaraca peve vae reta pe. <sup>7</sup>Jare pe reta piporara vae peputuuta ore ndive. Echa'ã jupi co Tumpa yanembuputuú vaerã, yandeYa Jesús uyecuaa ye yave, ara güi ou yave ángel mbaepuere güinoi vae reta ndive. <sup>8</sup>Yugüeruta tata jendi vae rami. Jayave yandeYa uiporaracata uicuaa'ã Tumpa vae reta pe. Echa'ã jae reta uipota'ã güirovia ñee icavi vae yandeYa Jesucristo regua. <sup>9</sup>Jáeramo uiporarata co. Echa'ã yandeYa umbisirita reta yugüireco vaerã jaeño mai pegua mbiri chugüi. Ndarau ete uecha reta yandeYa imbaepuere tuicha ete vae rupi uyapota vae. <sup>10</sup>Echa'ã jucuarãï uyeyapota, yandeYa ou ye yave. Jare jocua ara reta pe opaete uñeño tee yandeYa peguarã vae reta umbiadorata yandeYa. Opaete güirovia jese vae reta ipiacañita yandeYa re. Jare pe reta vi perovia numimbeu peve vae.

<sup>11</sup>Jáeramo jecuaño nduyerure Tumpa pe peré. Echa'ã ore nduyeyocui Tumpa pe jare jae preparavo vi. Nduipota Tumpa jei vaerã jupi co preparavo

vaerã. Tumpa tapembori imbaepuere rupi, piyapo vaerã opaete mbae icavi vae pipota piyapo vae, jare peparaviquí vaerã pepurugüirovia reve. <sup>12</sup>Jucuarãi yave, ñru vae reta umbiadorata yandeYa Jesucristo jee icavi vae piyapo vae regua. Jare pe reta vi piyepiucata perovia jese ramo. Jare cua uyeyapota yandeRu Tumpa jare yandeYa Jesucristo ipiacavi jeco pegua.

### Cuimbae mbaeyoaño iparaviquí vae uyecuaata

**2** <sup>1</sup>YandeYa Jesucristo ou yeta co jare jae yanembatita ñãñeovãiti vaerã jae ndive. Jáeramo ore pumiñera cua, cherivi reta: <sup>2</sup>Agüiye piyembopa jare agüiye piyemipia'ã. Aramoi ñru vae reta jei ma peve uyaro ma oĩ yandeYa ivãe ara. Aramoi jei peve Espíritu Santo umimbeu chupe reta, ani jei jerãcua chupe reta, ani jei ore nduicuatía jucuarãi penti tupapire pe. <sup>3</sup>Ërei agüiye pemaño quía re pembítavi vaerã. Echa'ã jocua ara ndarau ou rai. Echa'ã ndei ou mbove, upurugüirovia mbae vae reta oyovaicho eteta Tumpa ndive, jare uyecuaata jocua cuimbae mbaeyoaño iparaviquí vae. Jae co ucañiteita vae. <sup>4</sup>Jae uyembutuichata jare oyovaichota opaete morombœ Tumpa regua ndive jare ndarau umaño ivi pegua reta re umbiadora vaerã Tumpa. Jae uguapita Tumpa jo pe jare jeita: “Che Tumpa co.”

<sup>5</sup>¿Pemandua'ã pa quirãi che aĩ pepi rambueve amimbeu peve cua mbaembae re? <sup>6</sup>Jare picuaa vi quirãi añave ime quía oyopia vae. Echa'ã jae oyopia oĩ jocua mbaeyoaño iparaviquí vae, agüiye vaerã uyecuaa ndei ivãe ara ou mbove. <sup>7</sup>Echa'ã jocua icavi mbae ndeiño uyecuaa vae uparaviquí ma oĩ. Ërei añave oyopia oĩ vae oyopiata co, Tumpa güiraa cua ivi güi regua. <sup>8</sup>Jayave uyecuaata jocua icavi mbae vae. Ërei yandeYa uyucata ipitüé pe. Umbaita co, ou yave jembipe asi reve. <sup>9</sup>Jocua icavi mbae vae outa uyapo vaerã Satanás iparaviquí. Güinoita mbaepuere tuicha vae jare uyapota miacañi reta upurumbítavi vaerã. <sup>10</sup>Uyapota opaete mbae jupi mbae vae umbítavi vaerã ucañiteita vae reta. Echa'ã jae reta uipota'ã güirovia añete vae. Echa'ã güirovia yave, uyembiasacata tẽi co. <sup>11</sup>Jáeramo Tumpa umañota jese reta uyembítavi vaerã añete mbae vae rupi, güirovia reta vaerã jocua apu. <sup>12</sup>Jáeramo ucañiteita reta. Echa'ã güirovia'ã añete vae. Jaeño uyerovia jupi mbae vae re.

### Tumpa yandeparavo yanembiasa vaerã

<sup>13</sup>Ërei icavi co jecuaeño numee vaerã yasurupai Tumpa pe peré, cherivi reta. Echa'ã yandeYa perau jare Tumpa peparavo iyipi güiive pembiasa vaerã, Espíritu Santo peñoño tee Tumpa peguarã ramo jare añete vae perovia ramo. <sup>14</sup>Cuarã Tumpa peparavo ñee icavi vae numimbeu peve vae rupi, pe reta vi piyembutuichaca vaerã yandeYa Jesucristo ndive.

<sup>15</sup>Jáeramo, cherivi reta, pepirãta pepurugüirovia re. Agüiye peacañi ore pomboe jese vae güi. Echa'ã ore pomboe oriñee pe jare tupapire nduicuatía peve vae pe. <sup>16</sup>YandeRu Tumpa yanderau jare umee yandevere mbiacatu ndarau etei opa vae. Jáeramo yandepuere ñaãro yayerovia reve ipiacavi jeco

pegua. YandeYa Jesucristo etei jare yandeRu Tumpa <sup>17</sup>tumee peve ipiacatu jare tapemimirãta ñee icavi vae pere vaerã, jare icavi vae piyapo vaerã.

### Tumpa iñee tuyepiua

**3** <sup>1</sup>Cuaño aipota, cherivi reta - piyerure oreré, yandeYa iñee jecuaeño uñemiai vaerã, opaete vae güirovia vaerã pe reta perovia rami. Jucuarãi yave, yandeYa iñee uyepiucata co. <sup>2</sup>Piyerure vi yandeYa orerepi vaerã cuimbae icavi mbae vae oyovaicho ore ndive vae reta güi. Echa'ã opaete vae'ã güirovia yandeYa re. <sup>3</sup>Ërei jecuaeño yandepuere yarovia catu yandeYa re. Jae pemimirãtata pepurugüirovia re, jare umeeta peve mbaepuere agüiye vaerã piñemiamirica icavi mbae vae pe. <sup>4</sup>Jare ore pugüirovia catu yandeYa re perovia ramo, quirãi piyapo peĩ jare piyapota ore ndoe peve piyapo vaerã vae. <sup>5</sup>YandeYa tapembori picuaa cavi vaerã quirãi Tumpa perau, jare penoi vaerã mbiaguasu Cristo uipota umee peve vae.

### Icavi co uparaviqui vaerã

<sup>6</sup>Añave ore poyocui, cherivi reta, yandeYa Jesucristo jee re, piyembiyao vaerã ipotave upurugüirovia vae iyaquí vae güi. Echa'ã jocua nunga uipotã ico moromboe nduicuaaca peve vae re. <sup>7</sup>Pe reta etei picuaa quirãi icavi co pico vaerã ore nduico rami. Echa'ã ore nduico pepite pe yave, nduico'ã co nduparaviqui mbae reve. <sup>8</sup>Nducaruiño'ã vi numbiepi mbae reve. Ërei tanta nduparaviqui ara rupi jare pĩtu rupi, agüiye vaerã quía pepite pe oĩ vae uyemambeco oreré. <sup>9</sup>Cuarãi nduyapo yepe tẽi mbaepuere nonoi nduyerure vaerã peve mbaembae re. Ërei nduipota nduicuaaca peve quirãi ore nduico, pe reta vi pico vaerã ore nduico rami. <sup>10</sup>Echa'ã nduico pepi yave, poyocui cuarãi: Ime yave quía ñatẽi uparaviqui vae, agüiye quía tumingarú. <sup>11</sup>Echa'ã jerãcua oreve quirãi ime pepite pe amocue iyaquí vae. Yugüiraaiño ñru vae reta iparaviqui re uma ueicuaa vaerã. Ërei iquĩ'ã-raanga iyupe uparaviqui vaerã. Ërei uyapo'ã mbae ave. <sup>12</sup>Ërei ndoyocui jare numbiaracuaa jocua nunga yandeYa Jesucristo jee re uparaviqui reta vaerã mbiacatu reve, ime vaerã güinoi mbae jou vaerã.

<sup>13</sup>Ërei pe reta, cherivi reta, agüiye pecueri icavi vae piyapo vae güi. <sup>14</sup>Jare ime yave quía cua nduicuatía peve piyapo vaerã vae uyapo'ã vae, picuaa cavi jesegua quía nunga vae, jare agüiye piñemĩru jae ndive, jae imara vaerã. <sup>15</sup>Agüiye piyovaicho jae ndive. Ërei pembiaracuaa penti perivi pembiaracuaa rami.

### Saludo reta

<sup>16</sup>Jare yandeYa etei mbiacatu umee vae jecuaeño tumee peve ipiacatu opaete rupi. YandeYa toĩ opaete pe ndive.

<sup>17</sup>Che etei jae peve Tumpa ndiveño peĩ. Aicuatía cua chepo pe etei. Jucuarãi ayapo opaete aicuatiaa vae pe, aechaca vaerã añetete co. Cuarãi aicuatía. <sup>18</sup>YandeYa Jesucristo tumee opaete peve ipiacavi. Amén.



# PRIMERA CARTA DEL APOSTOL SAN PABLO A TIMOTEO

**1** <sup>1</sup>Che co jae Pablo. Che co jae Jesucristo jemimondo. Tumpa jare yandeYa Jesucristo iporoyocui rupi che ayeyapo temimondorã. Tumpa yanembiasa ma jare ñaãro yandeYa Jesucristo yayerovia reve. <sup>2</sup>Aicuatía cua tupapire ndeve, Timoteo. Nde co jae cheraí añetete vae yandepurugüirovia re. YandeRu Tumpa jare yandeYa Jesucristo tumee ndeve ipiacavi jare ipuruparareco jare ipiacatu.

## Umimbeu moromboe añete mbae vae reta regua

<sup>3</sup>Epita Efeso pe, Macedonia coti aa yave che jae ndeve rami, ndiyocui vaerã amocue vae agüiye vaerã oporomboe ambie moromboe re. <sup>4</sup>Ïru vae reta umimbeu aracae ndaye retaño jare jecuaeño umierãcua mbae itenondegua reta pe uyeyapo vae reguaño. Che jae ndeve ndiyocui vaerã vi agüiye vaerã uyapisaca jocua nunga re. Echa'ã uyapisaca jese yave, umbipita uyeaca jocua mbaembae re, jare jucuarãi yave, ndarau uyeyocui cavi Tumpa pe. Echa'ã yayeyocui Tumpa pe mburugüirovia re.

<sup>5</sup>Jare jucuarãi iyocui, jae reta güinoi vaerã mburuau. Yandepia uyeyoe yave mbaeyoa güi, jare yaicuaa yave yayapo'ã co icavi mbae vae, jare ñanoi yave mburugüirovia añetete vae Tumpa coti, ñanoita mburuau. <sup>6</sup>Ërei amocue vae uyavi cua mbaembae. Jáeramo uyembopa jare añave uyeacaíño. <sup>7</sup>Jae reta uipota tẽi oporomboe mboroyocui re. Ërei uicuaa cavi'ã mbae jei vae jare mbae imiari jese vae, yepe tẽi imiari jese uicuaa cavi vae imiari rami.

<sup>8</sup>Yaicuaa mboroyocui icavi co, uyeporu yave Tumpa uipota uyeporu vaerã rami. <sup>9</sup>Echa'ã yaicuaa mboroyocui uyeyapo'ã co mbaepuere güinoi vaerã jupi vae reta re. Jaeño uyeyapo mbaepuere güinoi vaerã mboroyocui jei vae uipota'ã uyapo vae reta re, jare Tumpa jei vae uipota'ã uyapo vae reta re, jare iyoa vae reta re, jare icavi mbae vae uyapo vae reta re, jare icavi mbae vae Tumpa coti jei vae reta re, jare tu uyuca vae reta re, jare ichi uyuca vae reta re, jare opaete upuruyuca vae reta re, <sup>10</sup>jare aguasa uyapo vae reta re, jare cuimbae reta uyupii

uyerereco vae re, jare oñomi japicha umee vaerã corepoti re vae reta re, jare iyapu vae reta re, jare ñru vae re uñeapo iyapu reve vae reta re, jare ipotave moromboe añete vae ndive oyovaicho vae reta re. <sup>11</sup>Cua moromboe añete vae ñee icavi vae pegua co. Tumpa jecuaeño uyerovia catu jare uyembadoraca ñee icavi vae rupi. Jae umimbeu cheve ñee icavi vae, che amimbeu-yuapi ye vaerã.

### Quirãi Pablo uyeyocui yandeYa pe

<sup>12</sup>Jare amee yasurupai yandeYa Cristo Jesús pe imbaepuere umee cheve vae re. Jae uicuaaca quirãi chererovia catu. Echa'ã umee cheve ayeyocui vaerã chupe. <sup>13</sup>Jucuarãi uyapo, yepe tẽi tenonde yave che jae icavi mbae vae yandeYa coti, jare ayapo icavi mbae vae yandeYa re güirovia vae reta pe, jare cherecopochi icoti. Ërei yandeYa cheparareco. Echa'ã apurugüirovia'ã ramo, opaete cua ayapo aicuaa'ã icavi mbae vae ayapo ramo. <sup>14</sup>Jare yandeYa umee cheve jeta ete ipiacavi. Jae ramiño vi umee cheve mburugüirovia jare mburuau. Echa'ã cua reta yanembae co Cristo Jesús re yarovia yave.

<sup>15</sup>Cua co jae ñee yandepuere yarovia catu vae, jare icavi co opaete vae güirovia vaerã: Cristo Jesús ou cua ivi pe umbiasa vaerã iyoa vae reta, jare che co jae iyoa vae reta güi iyoa ete ye vae. <sup>16</sup>Ërei cuarã yandeYa cheparareco. Echa'ã che co jae iyoa ete vae ramo, Jesucristo cheparareco yave, jae uicuaaca quirãi jae ipiaguasu tuicha ete co. Jare che co jae penti jaanga rami, ñru vae reta vi uicuaa vaerã ipuere güirovia jese, jae reta vi güinoi vaerã tecove opa mbae vae. <sup>17</sup>Yambiadora jaeño mai pegua yanderuvicha guasu opa mbae vae. Jae ndarau etei umano jare mbaeti quã ipuere uecha. Jaeño co Tumpa. Amén.

<sup>18</sup>Cua mbaraviquí re ndoyocui, cherai Timoteo. Echa'ã jucuarãi tenonde yave nemimbeu Tumpa ñnee umimbeu vae reta. Nemandúa jocua re, ndepuere vaerã niñerãro cavi icavi mbae vae ndive. <sup>19</sup>Ñemimirãta ndepurugüirovia re, jare agüiye iyapo mbae ndicuaa agüiyeta tẽi ndiyapo vae. Echa'ã amocue vae uyapo agüiyeta tẽi uyapo vae. Jáeramo, uyembopa ipurugüirovia re. <sup>20</sup>Cuarãi uasa Himeneo jare Alejandro. Jáeramo amaño'ã jese reta uñemñru vaerã ñru upurugüirovia vae reta ndive. Cua jeco pegua ndarau ndipo jei reta icavi mbae vae Tumpa coti.

### Umimbeu quirãi uyerure vaerã Tumpa pe

**2** <sup>1</sup>Cua rani jae peve: Upurugüirovia vae reta tuyerure Tumpa pe opaete vae re, jare tumee yasurupai Tumpa pe jese reta. <sup>2</sup>Jucuarãi tuyerure mburuvicha guasu reta re, jare opaete mbaepuere güinoi vae reta re, yaico cavi vaerã yandepiacatu reve, yandepuere vaerã yayeyocui Tumpa pe yambiadora reve. <sup>3</sup>Echa'ã icavi co yayapo vaerã jucuarãi, yambiyerovia vaerã Tumpa - jae co yanembiasa vae. <sup>4</sup>Jae uipota opaete vae uyembiasaca vaerã jare uicuaa cavi vaerã añete vae. <sup>5</sup>Echa'ã ime pentiño Tumpa. Jae ramiño vi ime pentiño ipuere umbipiacatu ivi pegua reta Tumpa ndive vae. Jae co penti cuimbae Cristo Jesús jee vae. <sup>6</sup>Jae uñemee umano vaerã, ipuere vaerã uepi opaete vae. Jare Tumpa uicuaaca cua, ara ou ma uvãe

yave uicuaaca vaerã. <sup>7</sup>Jare yandeYa cheparavo amimbeu vaerã cua regua. Jae cheapo jemimondorã, amboe vaerã judío mbae vae reta mburugüirovia añete vae re. Cua che jae peve vae añete vae co. Cheapu'ã etei co.

<sup>8</sup>Jáeramo aipota cuimbae reta uyerure vaerã Tumpa pe opaete que rupi rupi. Agüiye tuyerure mbochi reve jare mbae umbasi reve. Tuyerure ipia icavi reve. <sup>9</sup>Jae ramiño vi cuña reta agüiye tomonde temimonde ipõra ete vae ñru vae reta pe uechaca vaerãño. Agüiye tiyemipia'ã ete temimonde re, ani ía re, ani mbaembae oro pegua vae re jare mbaembae ipõra ete vae re. <sup>10</sup>Ñerei tuyapo icavi vae. Echa'ã amocue cuña reta jei uyapo co Tumpa uipota uyapo vaerã vae. Jáeramo icavi co jocua nunga uyapo vaerã icavi vae. <sup>11</sup>Cuña reta tiqui yemboe pe uñemimichi reve. <sup>12</sup>Jare ayocui'ã cuña reta oporombocoe vaerã jare güinoi vaerã mbaepuere cuimbae reta re. Tiquiño. <sup>13</sup>Echa'ã Tumpa uyapo Adán rani jare jaicue rupi uyapo Eva. <sup>14</sup>Jare Adán itavi'ã. Cuña itavi. Jare itavi ramo, cuña iyoa. <sup>15</sup>Cuña reta jecuaño imembita uiporara reve, ñerei Tumpa uepita. Ñerei jecuaño tupurugüirovia jare tupuruau. Tuñeño tee Tumpa peguarã. Jecuaño tuico cavi.

#### Quirã i cavi ico vaerã upurugüirovia vae reta itenondegua

**3** <sup>1</sup>Añete co cua yae vae: Ime yave quía uipota uyeyapo upurugüirovia vae reta itenondeguarã vae, uipota uyapo mbaraviqui icavi vae. <sup>2</sup>Jáeramo upurugüirovia vae reta itenondegua tuico cavi, agüiye vaerã quía umbijeco mbae re. Tugüireco pentiño cuña. Tuñemoa ngatu. Jecuaño tuyapo icavi vae, uyepiuca vaerã ñru vae reta pe. Tiquirëi umbiresive vaerã mboupa reta jenta pe. Ticatu toporombocoe. <sup>3</sup>Agüiye ticause. Agüiye tiñerãrose. Tipiacavi. Agüiye tijovaichopota. Agüiye tuiyapo ete corepoti iyupeguarã. <sup>4</sup>Toyocui cavi opaete jenta pegua reta. Toyocui cavi isambiaí reta, jae reta uyapo vaerã tu jei vae jare uipiú vaerã. <sup>5</sup>Echa'ã cuimbae icatu'ã yave oyocui cavi vaerã jenta pegua reta, ndarau etei ipuere uyandareco Tumpa uiparavo vae reta re. <sup>6</sup>Jare agüiye tuyeyapo upurugüirovia vae reta itenondeguarã penti cuimbae güirovia ramo yandeYa re vae. Echa'ã jucuarãi uyeyapo yave, aramoi uyembicateta, jare ñru vae reta umbijecota icate re, Tumpa umbijeco aña guasu jae uyembicate yave rami. <sup>7</sup>Jae ramiño vi upurugüirovia vae reta itenondegua tierãcua cavi, upurugüirovia mbae vae reta imiari cavi vaerã jese. Echa'ã jucuarãi'ã yave, aramoi jae reta umbijecota, jare jucuarãi upurugüirovia vae reta itenondegua aramoi uñemiamiricata aña guasu pe.

#### Quirã i cavi ico vaerã ñru upurugüirovia vae reta ombori vae

<sup>8</sup>Jae ramiño vi ñru upurugüirovia vae reta ombori vae reta tuyepiuca ñru vae reta pe. Agüiye tipurumbitavise. Agüiye ticause. Agüiye tuiyapo ete corepoti iyupeguarã. <sup>9</sup>Tuicuaa cavi jocua opaete vae pe'ã uyecuaa

vae yandepurugüirovia regua, jare agüiye tuyapo mbae uicuaa agüiyeta tēi uyapo vae. <sup>10</sup>Epirandu rani jese jecocavi ra, jare ĩru vae reta uicuaa cavi yave ico cavi co, ipuere uyeyocui Tumpa pe jucuarāi. <sup>11</sup>Cua reta jembireco vi tuyepiua ĩru vae reta pe. Agüiye tiyapu ĩru vae re. Tuñemoa ngatu jare tuico cavi, ĩru vae reta ipuere vaerā güirovia catu opaete pe. <sup>12</sup>Īru upurugüirovia vae reta ombori vae reta tugüireco pentiño cuña, jare toyocui cavi isambiai reta jare opaete jenta pegua reta. <sup>13</sup>Echa'ã cua reta uyeyocui cavi yave Tumpa pe, uyepiua ĩru vae reta pe, jare ipuere imiari uquiye mbae reve mburugüirovia güinoi Cristo Jesús re vae re.

#### Uyecuaa yandeve vae

<sup>14</sup>Chepia pe ayemingueta imambaño aa vaerā ndepi. Ērei cua mbaembae re aicutía ndeve, <sup>15</sup>ndicuaa vaerā quirāita ndico Tumpa jentarā reta ndive - jae reta co Tumpa imeño mai ico vae uiparavo vae reta - jae reta uñemimirāta añete vae re jare uicuaaca ĩru vae reta pe añete vae. Echa'ã aramoĩ apitata ima cua pe. <sup>16</sup>Añete co, ñanemipiacañi ete cua yandevño uyecuaa vae. Echa'ã yande yayeyocui Tumpa pe.

Tumpa uyeyapo cuimbaerā.

Espíritu Santo uicuaaca jae co jupi vae.

Ángel reta uecha.

Jerācua opaete ivi pegua reta pe.

Ivi pegua reta güirovia jese.

Jare Tu umbiresive ye ara pe.

#### Umimbeu yarovia vae güi uyerovata vae reta

**4** <sup>1</sup>Jare Espíritu Santo umimbeu yandeve quirāi ara reta taicuegua vae pe amocue vae uyerovata yarovia vae güi. Jae reta güiroviata añe upurumbitavi vae reta jare moromboe reta añe reta uipota güirovia vaerā vae. <sup>2</sup>Oporomboe reta yave, iyaputa upurumbitavi vaerā. Jare ndarau ipiatiti jese, ipiatanta ramo. <sup>3</sup>Oyopiata ĩru vae reta agüiye vaerā umenda, jare oyopiata ĩru vae reta agüiye vaerā jou mbae nunga tembú, yepe tēi Tumpa uyapo yandeve tembú yau vaerā yasurupai ñamee reve chupe. Echa'ã yande yarovia Tumpa jare yaicuaa ma añete vae. <sup>4</sup>Echa'ã opaete mbaembae Tumpa uyapo vae icavi co. Agüiye ñarĩro mbae nunga tembú. Icavi co yau vaerā yasurupai ñamee reve Tumpa pe. <sup>5</sup>Echa'ã uñeño tee co yau vaerā Tumpa ñnee jare yerure rupi.

#### Jesucristo pe uyeyocui cavi vae

<sup>6</sup>Nemimandúa yave yanderivi reta cua mbaembae re, ndiyeyocui cavi co Jesucristo pe. Jecuae ñemimirāta ñee yarovia vae reta re jare moromboe añete vae regua re. Echa'ã cua reta re jecuaeño ndico. <sup>7</sup>Ērei agüiye erovia araca ndaye vae reta. Ērei ñemiatangātu ndiyapo vaerā Tumpa uipota yayapo vaerā vae. <sup>8</sup>Echa'ã yanderete yamungúe yave, michi peguaño icavi

yandeve. Ërei ñañemiatangātu yave yayapo vaerã Tumpa uipota yayapo vaerã vae, jecuaecuae icavi ete yandeve. Echa'ã icavi yandeve cua ivi pe yaico rambueve, jare icavita vi yandeve Tumpa ndive ma yaico yave. <sup>9</sup>Cua co ñee yandepuere yarovia catu vae, jare icavi co opaete vae güirovia vaerã. <sup>10</sup>Echa'ã cuarã yaparaviquí ñai yaiporara reve, Tumpa imeño mai ico vae re yarovia ramo. Jae co opaete vae umbiasa vae. Jae umbiasa güirovia jese vae reta.

<sup>11</sup>Cua mbaembae re eporoyocui jare eporomboe. <sup>12</sup>Agüiye quía tanereriño ndetairusu ramo. Ërei jecuaeño nde rani ico cavi, ñru upurugüirovia vae reta uicuaa vaerã quirã icavi co jae reta vi yugüireco vaerã. Jáeramo jecuaeño nemiari icavi vae re. Jecuaeño iyapo icavi vae. Jecuaeño epuruau. Jecuaeño erovia Tumpa. Agüiye iyapo mbae pichii vae. <sup>13</sup>Che aa avãe ndeve regua, jecuaeño ñnemiatangātu nemingueta vaerã Tumpa ñnee ñru vae reta pe, jare ndepurumbiaracuaa vaerã, jare ndeporomboe vaerã. <sup>14</sup>Jecuaeño ñnemiatangātu ndiporu vaerã mbaepuere Tumpa umee ndeve vae. Echa'ã uñemee ndeve Tumpa ñnee umimbeu vae reta jei rami, upurugüirovia vae reta itenondegua reta oñono yave ipo nderé.

<sup>15</sup>Jecuaeño iyandareco cavi cua mbaembae re opaete ndepia reve, uyecuaa vaerã opaete vae pe quirã icavi ete co ndiyemboe neí.

<sup>16</sup>Ñemoa ngatu ndico cavi vaerã jare ndeporomboe cavi vaerã. Jecuaeño ñnemiatangātu jese reta. Echa'ã jucuarã ndiyapo yave, ndiyerepicata jare ndeepicata vi uyapísaca nderé vae reta.

### Quirã umbiaracuaa vaerã ñru upurugüirovia vae reta

**5** <sup>1</sup>Agüiye ñneengata cuimbae indechi vae reta pe. Ërei embiaracuaa, penti cuimbae umbiaracuaa tu rami. Jare embiaracuaa cuimbae tairusu vae reta, penti cuimbae umbiaracuaa tivi rami. <sup>2</sup>Embiaracuaa cuña ucuacuaa vae reta, penti cuimbae umbiaracuaa ichi rami, jare embiaracuaa cuñatai reta, penti cuimbae umbiaracuaa jindi rami. Agüiye ndepia pe iyemingueta icavi mbae vae jese reta.

<sup>3</sup>Embori ime umano vae reta mbaeti etei güinoi yave quía ombori vaerã. <sup>4</sup>Ërei ime umano vae ime yave güinoi imembi reta ani jamariro reta, jae reta rani tombori, uicuaaca vaerã uyeyocui co Tumpa pe. Echa'ã ime umano vae jae reta jentarã co. Jucuarã tuyapo reta ombori vaerã ichi jare iyari. Echa'ã jucuarã uyapo yave, umbiyerovia Tumpa. <sup>5</sup>Ërei penti ime umano vae mbaeti etei güinoi quía ombori vaerã vae co jae penti añetete ime umano vae. Jae güirovia Tumpa, jare jecuaeño uyerure chupe pñtu rupi jare ara rupi. <sup>6</sup>Ërei ime umano vae ueca yave jete umbiyerovia vaerãño, uyeyocui'ã etei Tumpa pe, penti umanocue vae ipuere'ã etei uyeyocui ñru vae pe rami. <sup>7</sup>Jáeramo cua mbaembae re iyocui upurugüirovia vae reta, agüiye vaerã quía umbijeco reta mbae re. <sup>8</sup>Ërei ime yave penti upurugüirovia vae uyandareco'ã jenta pegua reta re jare ñru jentarã reta re vae, upurugüirovia mbae vae echa. Jeta upurugüirovia mbae vae reta uyapo cavi ete chugüi. Echa'ã jae reta uyandareco jenta pegua reta re jare ñru jentarã reta re.

<sup>9</sup>Agüiye emĩru ime umano vae ĩru ime umano vae reta ndive ndei sesenta año güinoi mbove. Sesenta año güinoi yave ramo emĩru jae reta ndive mbaeti yave imegua, <sup>10</sup>jare ĩru vae reta umierãcua yave icavi vae uyapo vae, jare uyandareco cavi yave sambiai reta re, jare umingararu yave jenta pe opou vae reta, jare uyeyocui yave uñemimichi reve ĩru uñeño tee Tumpa peguarã vae reta pe, jare ombori yave uiporara vae reta, jare uñemiatangãtu yave uyapo vaerã icavi vae.

<sup>11</sup>Ērei agüiye emĩru tairusu ime umano vae reta ĩru ime umano vae reta ndive. Echa'ã cua nunga uipota ye yave cuimbae, uipota'ã ma uyeyocui Cristo pe ĩru ime umano vae reta uyeyocui chupe rami. Uipotãño umenda. <sup>12</sup>Jáeramo güinoi teco. Echa'ã uyapo'ã ma tenonde yave jei uyapo vaerã upurugüirovia vae reta pe vae. <sup>13</sup>Jae ramiño vi iyaquí uyeyapo jare opou reño. Jae ramiño vi uyemingueta japicha re jare ĩru vae iparaviqui re iyurungueta. Imiari mbaembae agüiyeta tẽi imiari jese vae re. <sup>14</sup>Jáeramo aipota tairusu ime umano vae reta umenda ye vaerã. Icavi co imembi vaerã jare uyandareco cavi vaerã jenta pegua reta re. Agüiye tuyapo mbae icavi mbae vae, agüiye vaerã oyovaicho Cristo ndive vae ipuere umbijeco mbae re. <sup>15</sup>Echa'ã amocue vae uyerova ma uyapo vaerã Satanás uipota uyapo vaerã vae.

<sup>16</sup>Penti cuña upurugüirovia vae jentarã ime umano yave, upurugüirovia vae tombori ime umano vae, agüiye vaerã ime umano vae uyeco ĩru upurugüirovia vae reta re jae reta ombori vaerã, jae reta ipuere vaerã ombori ĩru ime umano vae reta mbaeti etei jentarã güinoi ombori vaerã vae.

<sup>17</sup>Jupi co upurugüirovia vae reta itenondegua Tumpa iparaviqui uyapo cavi vae reta uyepiua vaerã jare ĩru reta umbiepi vaerã chupe reta. Jae ramiño vi jupi co upurugüirovia vae reta itenondegua Tumpa iñee umimbeu jare oporombocue vae reta uyepiua ete vaerã jare ĩru reta umbiepi vaerã chupe reta. <sup>18</sup>Echa'ã Tumpa iñee pe uyecuatía oĩ cuarãi: “Güeye trigo umbipiriri oĩ yave, agüiye iyuruyocua.” Jare: “Jupi co umimbaraviqui vae umbiepi vaerã uparaviqui vae pe mbaraviqui uyapo vae.” Cuarãi uyecuatía oĩ.

<sup>19</sup>Ime yave quía penti upurugüirovia vae reta itenondegua mbae re umbijeco vae, agüiye iyapisaca jese ipuere'ã yave imiari mocui ani mbapi uicuaa cavi jeco regua vae. <sup>20</sup>Iyocua vae reta pe ere iyocua co opaete vae jovaque, ĩru vae reta uquiye vaerã mbaeyocua uyapo. <sup>21</sup>Che ndoyocui Tumpa jare yandeYa Jesucristo jare ángel reta Tumpa uiparavo vae jovaque: Cua mbaembae jecuaeño iyapo, jare agüiye eau penti vaeño ĩru vae güi. Oyovaque reve iyapo opaete vae pe. <sup>22</sup>Agüiye ndeapura iyapo vaerã upurugüirovia vae reta itenondeguarã, agüiye vaerã niñemĩru ĩru cuimbae reta ndive imbaeyocua reta re. Agüiye iyapo mbae pichĩ vae.

<sup>23</sup>Imeño nderie pe nembraerasi. Cua jeco pegua vino jeu michi michi nepoarã. Agüiye iño jeu.

<sup>24</sup>Amocue vae imbaeyocua reta tenonde voi uyecuaa cavi jare uicuaaca quirãi uñeacata co. ĩru vae reta imbaeyocua reta uyecuaata taicue rupi.

<sup>25</sup>Jae ramiño vi icavi vae amocue vae uyapo vae tenonde voi uyecuaa cavi, jare icavi vae añave uyecuaa mbae vae vi uyecuaata co.

**6** <sup>1</sup>Opaete uyeyocui patrón pe vae reta tuiptu ipatrón, agüiye vaerã ñru vae reta jei icavi mbae vae Tumpa coti jare yandeporomboc coti. <sup>2</sup>Jare ipatrón upurugüirovia yave, chupe uyeyocui vae reta agüiye tugüiriro. Echa'ã aramoi ipia pe uyeminguetata güiriro vaerã, ipatrón vi upurugüirovia ramo. Ërei uyeyocui vae reta tuyeyocui cavi ipatrón pe. Echa'ã ipatrón vi güirovia yandeYa re, jare yandeYa uau. Jare icavi eteta co ipatrón pe, jembiocui reta uparaviqui cavi yave chupe. Cua mbaembae re eporomboc jare epurumbiaracuaa.

### Yayeyocui Tumpa pe yandepiacatu reve

<sup>3</sup>Aramoi ñru vae oporomboeta ambie moromboc re, jare ndarau güirovia moromboc añete vae, yepe tẽ moromboc añete vae co jae yandeYa Jesuscristo regua. Echa'ã jocua moromboc añete vae yanemboe quirã yayeyocui vaerã Tumpa pe. <sup>4</sup>Ërei jocua nunga oporomboc vae uyembicate co, jare uicuaa'ã mbae ave. Echa'ã jecuaeño uyeaca. Jare cua icavi'ã co. Jáeramo ñacatãa, jare jovaichopota, jare jei icavi mbae vae, jare jei quirã ñru vae reta uyapo icavi mbae vae. <sup>5</sup>Jocua nunga uyeacaiño mbae icavi mbae vae re. Ipiayemingueta jupi'ã co. Jae reta uicuaa'ã etei añete vae. Ipia pe uyemingueta tẽ ipuere uyeyocui Tumpa pe icocatu vaerã. Agüiye ñnemiru jocua nunga ndive. <sup>6</sup>Ërei yayeyocui yave Tumpa pe, icavi ete co yandeve, yaico yave yandepiacatu reve. <sup>7</sup>Echa'ã yaa yandesĩ güi yave, mbaeti etei mbae yaru. Jae ramiño vi ñamano yave, ndarau etei mbae yaraa. <sup>8</sup>Jáeramo ñanoi yave añave yanderembiurã jare yanderemimonderã, yaico yandepiacatu reve. <sup>9</sup>Ërei yavai'ã uipota icocatu vae reta iyoa vaerã. Yavai'ã aña guasu uyavica chupe reta vaerã. Jáeramo jae reta ipia pe uyemingueta cavi mbae reve uipota ete jeta mbaembae icavita'ã etei chupe reta vae. Echa'ã jocua nunga mbaembae pe uñemicañitei reta. <sup>10</sup>Echa'ã corepoti uipota ete vae uyapo opaete mbaembae icavi mbae vae. Jare amocue vae uipota ete icocatu ramo, uyembopia mburugüirovia yandeYa regua güi, jare umbieta tẽi jucuarã uyapo ramo.

### Tanta eparaviqui Tumpa pe

<sup>11</sup>Ërei nde co jae cuimbae Tumpa pe uyeyocui vae. Jáeramo agüiye etei iyapo jucuarã. Ërei ipota ete ndiyapo vaerã jupi vae jare ndiyeyocui vaerã Tumpa pe. Jae ramiño vi ipota ete mburugüirovia, jare mburuau, jare mbiaguasu, jare ñemimichi. <sup>12</sup>Jecuaeño eparaviqui tanta ndiporara reve yarovia vae re. Ico cavi yandeYa ndive, echa'ã jae umee yandeve tecove opa mbae vae. Echa'ã cuarã Tumpa ndeparavo. Jare nemimbeu cavi ma ndepurugüirovia jeta uyapisaca nderé vae reta pe. <sup>13</sup>Cua re co che ndoyocui Tumpa jee re. Echa'ã jae umee tecove opaete pe. Ndoyocui vi jese Cristo Jesús jee re. Echa'ã jae umimbeu cavi añete vae regua Poncio Pilato jovaque. <sup>14</sup>Jecuaeño iyapo cua che ndoyocui jese

vae. Jucuarãi ndiyapo yave, ndarau mbae icavi mbae vae ndiyapo, jare ndarau quía ipuere nembijeco mbae re, yandeYa Jesucristo ou ye regua. <sup>15</sup>Echa'ã ara ou uvãe yave, Tumpa uechacata co yandeYa Jesucristo. Tumpa jecuaeño uyerovia catu. Jaeño co opaete vae iYa. Jae co mburuvicha guasu mbaepuere tuicha ete vae güinoi vae. Jae imbaepuere tuicha ete co opaete ñru mburuvicha guasu reta imbaepuere güi. Jae co opaete ivi pegua reta iya reta iYa. <sup>16</sup>Jaeño co umano mbae vae. Jae ico tembipe oñ vae pe. Mbaeti quía ipuere oya jocua tembipe re. Mbaeti etei quía uecha Tumpa, jare mbaeti etei quía ipuere uecha. Tuyembiaadoraca Tumpa jaeño mai pegua. Imbaepuere tuicha ete co. Amén.

<sup>17</sup>Iyocui cua ivi pegua mbaembae re icocatu vae reta agüiye vaerã ticate iyee iparavete vae reta güi, jare agüiye vaerã uyeco icorepoti re. Echa'ã aramoi imambae opata. Ërei tuyeco Tumpa imeño mai ico vae re. Echa'ã jae umee yandeve opaete mbaembae yayerovia vaerã. <sup>18</sup>Jare iyocui vi tuyapo icavi vae. Echa'ã jucuarãi yave, icocatuta co Tumpa coti icavi vae uyapo vae re. Jecuaeño tiquirëi umee vaerã güinoi vae güi ñru vae reta pe, ombori reta vaerã. <sup>19</sup>Echa'ã jucuarãi uyapo yave, güinoita mbae icavi vae opa mbae vae ara outa vae reta peguarã, jare güinoita tecove opa mbae vae.

#### **Pablo jaeño ma oyocui Timoteo vae**

<sup>20</sup>Timoteo, jecuaeño iyandareco cavi jocua uñemee ndeve ndiyandareco vaerã jese vae re. Agüiye iyapisaca ndaye reta re. Echa'ã jei vae mbae'ã co. Agüiye erovia Tumpa ndive oyovaicho vae reta jei tēi uicuaa cavi vae. Echa'ã uicuaa'ã co mbae. <sup>21</sup>Echa'ã amocue jei tēi uicuaa cavi vae uyembopia yarovia vae güi.

Tumpa tumee ndeve ipiacavi. Amén.



# SEGUNDA CARTA DEL APOSTOL SAN PABLO A TIMOTEO

**1** <sup>1</sup>Che co jae Pablo. Che co jae Jesucristo jemimondo Tumpa jei vae rupi. Echa'ã cheparaviqui jae co amimbeu vaerã quirã Tumpa jei umee vaerã tecove opa mbae vae opaete Cristo Jesús re güirovia vae reta pe. <sup>2</sup>Aicutáa cua tupapire ndeve, Timoteo. Echa'ã nde co jae cheraí aau ete vae. YandeRu Tumpa jare yandeYa Cristo Jesús tumee ndeve ipiacavi jare ipuruparareco jare ipiacatu.

## **Cristo regua umimbeu ñru vae reta pe**

<sup>3</sup>Jecuaeño chemandúa nderé pñtu rupi jare ara rupi ayerure Tumpa pe yave. Jáeramo amee yasurupai Tumpa pe. Ambiadora Tumpa, chetenondegua reta umbiadora rami. Jare jucuarã ayapo yave, ayapo'ã mbae aicuaa agüiyeta tẽi ayapo vae. <sup>4</sup>Aipota ete nduecha, ayerovia ete vaerã. Echa'ã chemandúa quirã oremondo peñ yave nderesai nemombo vae re. <sup>5</sup>Chemandúa vi ndepurugüirovia añetete vae re. Ndiyari Loida jare ndesi Eunice rani güinoi jocua mburugüirovia, jare aicuaa cavi nde vi co neni.

<sup>6</sup>Jáeramo turumimandúa cua re. Ñemiatangātu jocua mbaepuere Tumpa umee ndeve vae re ndiyapo vaerã iparaviqui. Echa'ã uñemee co ndeve chepo añono nderé yave. <sup>7</sup>Tumpa umee yandev Espíritu Santo ñanoi vaerã mbaepuere, jare yapuruau vaerã, jare ñañemoa vaerã, agüiye vaerã yaquiye mbaembae güi. <sup>8</sup>Jáeramo agüiye nemara nemimbeu vaerã yandeYa regua. Agüiye vi nemara chereco pegua. Echa'ã che aico cua peresoriru pe yandeYa pe ayeyocui ramo. Ñrei iporaraño che aiporara rami ñee icavi vae jeco pegua. Echa'ã Tumpa umee yandev mbaepuere, yaiporara yave. <sup>9</sup>Tumpa yanembiasa jare yandeparavo ñañeño tee vaerã iyupeguarã. Yandeparavo'ã co mbae icavi vae yande yayapo vae jeco pegua. Yandeparavo co jae jei vae rupi jare ipiacavi rupi. Echa'ã ipiacavi yandev Cristo Jesús rupi ndei ivi uveyapo mbove. <sup>10</sup>Cristo Jesús ou cua ivi pe yanembiasa vaerã. Jocua rupi Tumpa añave uicuaaca yandev ipiacavi. Echa'ã

Cristo Jesús umbai mano imbaepuere, jare uicuaaca quirāi yandepuere ñano tecove opa mbae vae. Jare cua yamimbeu ñee icavi vae rupi.

<sup>11</sup>Tumpa cheparavo amimbeu vaerã ñee icavi vae. Jae umee cheve aico vaerã Jesucristo jemimondorã, jare aporomboc vaerã jese. <sup>12</sup>Jáeramo aiporara aĩ. Ērei chemara'ã. Echa'ã aicuaa arovia co Cristo re, jare aicuaa vi jae ipuere uñuvatu cheve che amee chupe uñuvatu vaerã vae jocua ara ou uvãe regua.

<sup>13</sup>Jecuaeño eporomboc moromboc añete vae re. Echa'ã jocua re che nomboc. Jare jecuaeño enoi mburugüirovia jare mburuau Cristo Jesús umee yandevae vae.

<sup>14</sup>Tumpa umee ndeve mbaepuere. Jecuaeño iporu jocua mbaepuere ndiyeyocui cavi vaerã chupe Espíritu Santo rupi. Echa'ã Espíritu Santo ico yandepia pe.

<sup>15</sup>Ndicuaa ma co quirāi opaete Asia pegua reta usiri chegüi. Cua reta ipite pegua co jae Figelo jare Hermógenes. <sup>16</sup>YandeYa tuiparareco Onesíforo jeta pegua reta. Echa'ã Onesíforo jeta vese chembiyerovia, jare imara'ã opou vaerã chepi, yepe tēi aico peresoriru pe. <sup>17</sup>Añete co, Roma pe ou uvãe rupive, chereca opaete que rupi chevãe regua. <sup>18</sup>YandeYa tumaeño tugüinoi ipuruparareco jocua ara ou uvãe yave. Echa'ã nde etei ndicuaa catu quirāi jeta ete uyeyocui cheve Efeso pe.

### Jesucristo pegua sundaro icavi vae

**2** <sup>1</sup>Jáeramo, cherai, inēmimirāta mbiacavi Cristo Jesús umee yandevae vae rupi. <sup>2</sup>Jeta mbaembae re aporomboc jeta vae jovaque. Jocua mbaembae ndiyandu vae re emboe cuimbae nderovia catu vae reta, jae reta vi ipuere vaerã omboc-yuapi ye jese iru vae reta.

<sup>3</sup>Iporara che aiporara rami. Echa'ã uiporara co Cristo Jesús isundaro reta. <sup>4</sup>Jare penti sundaro oo uñerāro vaerã vae mbaeti uyemipia'ã etei mbaembae cua ivi pegua re, umbiyerovia vaerã uiparavo sundarorã vae. <sup>5</sup>Jae ramiño vi uñeñocuiñocui vae, osi'ã yave oporombosi vae reta jei vae rupi, ipuere'ã etei güinoi upurumbisipe vae pe uñemee vae. <sup>6</sup>Jae ramiño vi co pe uparaviqui vae rani uipisita uyeaviro vae. <sup>7</sup>Jecuaeño ndepia pe iyemingueta che jae ndeve vae re. Jare yandeYa tumee ndeve aracuaa ndicuaa cavi vaerã opaete.

<sup>8</sup>Jesucristo co jae David inemoña pegua. Imandúa quirāi jae etei icove ye ou umanocue vae reta ipite güi. Jae umee cheve cua ñee icavi vae amimbeu vaerã. <sup>9</sup>Jare ñee icavi vae amimbeu ramo aiporara aĩ. Echa'ã cheñoño peresoriru pe icavi mbae vae uyapo vae rami. Ērei mbaeti quía ipuere oñoño Tumpa inee peresoriru pe. <sup>10</sup>Jáeramo opaete aiporara chepiaguasu reve Tumpa uiparavo vae reta jeco pegua, jae reta vi güinoi vaerã yembiasa Cristo Jesús rupi, jare güinoi vaerã vi yembutuicha opa mbae vae.

<sup>11</sup>Cua co jae ñee yandepuere yarovia catu vae:

“Jae ndive ñamano yave,  
jae ndive yaicove yeta vi.

<sup>12</sup>Yandepiaguasu reve yaiporara yave, jae ndive yaporoyocuita vi.  
Yaicuacu yave, jae vi yandecuacuta.

13 Yepe tēi yarovia'ã, ãrei jae jecuaẽño uyapo jei vae.  
Echa'ã jae jei yave mbae uyapota, uyapota co.”

### Uparaviqui cavi Tumpa pe vae

14 Emimandúa reta cua mbaembae re, jare iyocui reta yandeYa jee re agüiye vaerã uyeaca reta ñee reta re. Echa'ã jucuarãi uyeaca yave, ndarau etei icavi chupe reta, jaeño ombopata uyapisaca jese vae reta.  
15 Ñemiatangātu ndeporombœ cavi vaerã ñee añete vae umimbeu yandevae vae, Tumpa uicuaa vaerã icavi co ndeparaviqui. Jucuarãi yave, ndarau nemara ndeparaviqui jeco pegua. 16 Ërei agüiye iyapisaca ndaye reta re. Echa'ã jei vae mbae'ã co. Jare ndaye reta re imiari vae reta uyapota jeta mbaeyoa reta. 17 Jare jae reta iporombœ uñemaiata mbaerasi yanderete pe uñemai vae rami. Cua reta ipite pegua co jae Himeneo jare Fileto. 18 Jae reta uyavi añete vae. Echa'ã jei tēi uasa ma co ara upurugüirovia vae reta icove ye vaerã ou umanocue vae reta ipite güi. Jare jucuarãi jei ramo, amocue vae uicuaa'ã mbae güirovia vaerã. 19 Ërei Tumpa jei vae añete co uyepepica'ã etei. Yaicuaa cua Tumpa ñee pe uyecuatía oĩ vae rupi. Echa'ã uyecuatía oĩ cuarãi: “YandeYa uicuaa imbae reta.” Jare: “Penti penti che co jae Cristo imbae jei vae agüiye tuyapo jupi mbae vae.” Jucuarãi uyecuatía oĩ.

20 Ërei penti tenta tuicha vae pe ime plato reta oro pegua jare corepoti pegua. Jae ramiño vi ime plato reta ivira pegua jare ñaeu pegua. Jare iya uiporu amocue, plato ipõra vae reta uipota yave, jare uiporu ñru reta, plato ipõra mbae vae uipota yave. 21 Jae ramiño vi yaeya yave icavi mbae vae, yandeYa ñaneño teeta iyupeguarã, ipuere vaerã yandeporu, tenta tuicha vae iya plato ipõra vae reta uiporu rami. Jare jucuarãi yave, yandeYa ipuereta yandeporu ipotave mbae icavi vae yayapo vaerã.

22 Agüiye etei iyapo mbaembae icavi mbae vae tairusu vae reta uipota uyapo vae. Ërei ipota ete ndiyapo vaerã jupi vae. Jae ramiño vi ipota ete mburugüirovia, jare mburuau, jare mbiacatu. Jare ñemñiru uyerure yandeYa pe ipia iquia mbae reve vae reta ndive. 23 Ërei agüiye iyeaca iyaracuaa mbae vae reta ndive. Echa'ã jae reta uicuaa'ã etei uyeaca jese vae. Jare nde ndicuaa quirãi uyeaca yave uyupii, umbipi uñerãro uyupii. 24 Jare icavi'ã co yandeYa pe uyeyocui vae uñerãro vaerã. Tipiacavi opaete vae pe. Ticatu oporombœ vaerã. Tipiaguasu. 25 Tomboe uñemimichi reve oyovaicho jae ndive vae reta. Echa'ã aramoi Tumpa umaẽnota jese reta ueya vaerã ipiyemingueta icavi mbae vae jare uicuaa vaerã añete vae, 26 jare uñemoa vaerã, oyepe vaerã aña guasu güi. Echa'ã maemimba yaipisi ñuai pe rami, aña guasu uipisi reta, jae reta uyapo vaerã aña guasu jei vae.

### Ara taicuegua reta pe uyeyapota vae

**3** <sup>1</sup>Icuaa catu cua vi: Ara taicuegua reta pe yavai eteta co yaico cavi vaerã. <sup>2</sup>Upurugüirovia mbae vae reta jaëño uyerauta. Uipota eteta reta corepoti. Uyembicateta jae reta uyapo vae re. Uyembicateñoita. Jeita icavi mbae vae Tumpa coti. Ndarau uyapo tu jare ichi jei vae. Ndarau umee yasurupai mbae re. Ndarau uyeyocui Tumpa pe. <sup>3</sup>Ndarau upuruparareco. Ndarau umbiasa japicha reta. Iyaputa japicha re. Ndarau uñemoa. Jovaichopotata. Umitarëita icavi vae uyapo vae reta. <sup>4</sup>Umbitavita japicha reta. Uyapota mbaembae ipia pe uyemingueta mbae reve. Uyererovia catu eteta. Tumpa uau vaerãve, uipota eteta uyembiyerovia. <sup>5</sup>Uyapota mbaembae ñru vae reta ipia pe uyemingueta vaerã tõi jese jae reta uyeyocui co Tumpa pe. Ërei ndarau güinoi Tumpa imbaepuere. Agüiye ñemñiru jocua nunga ndive.

<sup>6</sup>Jocua nunga cuimbae reta oo ñru vae jenta pe, jare umbitavi cuña reta iyaracuaa mbae vae. Jocua nunga cuña reta iyoa ete, jare jeta mbae icavi mbae vae uipota uyapo ramo, uyembopa. <sup>7</sup>Jecuaëño uipota uyemboe mbaembae re, ërei ndarau etei ipuere uicuaa añete vae. <sup>8</sup>Jare ipaye vae reta Janes jare Jambres jee vae oyovaicho Moisés ndive rami, jocua nunga cuimbae reta vi oyovaicho añete vae ndive. Pichñi vae reño ipia pe uyemingueta. Jae reta'ã co upurugüirovia vae añetete vae reta. <sup>9</sup>Ërei ndarau ipuere jecuaëño upurumbitavi. Echa'ã uyecuaata opaete vae pe quirãi jae reta iyaracuaa mbae vae co, jucuarãi Janes jare Jambres uyecuaa rami.

### Pablo oyocui Timoteo

<sup>10</sup>Ërei nde ndicuaa catu co cheporomboe, jare quirãi che aico, jare aipota ayapo Tumpa pe vae, jare chepurugüirovia, jare quirãi chepiaguasu aiporara reve, jare chepurau, <sup>11</sup>jare quirãi aiporara ñru vae reta uyapo icavi mbae vae cheve yave Antioquía pe jare Iconio pe jare Listra pe. Ërei yandeYa cherepi opaete aiporara vae güi. <sup>12</sup>Añete co, opaete Cristo Jesús re güirovia vae reta uipota uyeyocui Tumpa pe vae pe uyapota icavi mbae vae ñru vae reta. <sup>13</sup>Jare icavi mbae vae uyapo vae reta jare upurumbitavi vae reta jeta ete icavi mbae vae uyapota. Jae reta umbitavita ñru vae reta jare uyembitavita vi.

<sup>14</sup>Ërei nde jecuaëño eporomboe ndiyemboe jese vae re. Echa'ã ndicuaa catu jocua moromboe añete co. Jare ndicuaa catu vi quía co nemboe jese, <sup>15</sup>jare quirãi nemichi güiye ndicuaa Tumpa re uyecuatía oñ vae. Echa'ã jocua ipuere nembiaracuaa, ndiyembiasaca vaerã mburugüirovia Cristo Jesús regua rupi. <sup>16</sup>Opaete Tumpa ñnee pe uyecuatía oñ vae Tumpa co umimbeu, jare icavi co yandeve. Echa'ã uyecuatía oñ vae rupi yaicuaa mbae nunga moromboe añete vae jare mbae nunga moromboe añete

mbae vae. Umimbeu yandeve yayavi yave, jare yandepuere yayemboe jupi vae re. <sup>17</sup>Jucuarãi yande yayeyocui Tumpa pe vae yandepuere yaicuaa opaete Tumpa uipota yaicuaa vaerã vae, jare yandepuere yayapo opaete mbae icavi vae.

#### Emimbeu ñee icavi vae

**4** <sup>1</sup>Jáeramo che ndoyocui cua re, Tumpa jare yandeYa Jesucristo jee re. Echa'ã yandeYa Jesucristo uãata ime ñugüinoi vae reta jare umanocue vae reta jae ou ye yave oporoyocui vaerã. <sup>2</sup>Emimbeu Tumpa ñnee. Jecuaeño ñnemiatangãtu opa ara rupi. Icuaca iyoa vae pe imbaeyoa, jare embieta chupe jese. Epurumbiaracuaa jare eporomboe ndepiaguasu reve. <sup>3</sup>Echa'ã outa ara reta uvãe agüiye vaerã ivi pegua reta uipota uyapisaca moromboe añete vae re. Erei jei vae reño uecata reta jeta oporomboe vae reta, uyemboe vaerã chugüi reta mbae uipota uyapisaca jese vae reño. <sup>4</sup>Jare ndarau uipota uyapisaca añete vae re. Erei uipotata uyapisaca aracae vae ndaye reta re. <sup>5</sup>Erei jecuaeño ññemoa ngatu. Agüiye neatëi ndiporara vaerã. Ññeño nemimbeu vaerã ñee icavi vae. Iyapo opaete ndiyeyocui vaerã Tumpa pe.

<sup>6</sup>Jecuaeño ayeyocui Tumpa pe, jare añave aicavi ma añ amano vaerã. Echa'ã coiño ma ou amano vaerã. <sup>7</sup>Che aparaviqui tanta aiporara reve. Opa ma ayapo Tumpa umee cheve ayapo vaerã vae. Jecuaeño añemimirãta yarovia vae re. <sup>8</sup>Jaeño ma. Uñeñuvatu ma oï cheve penti corona jupi vae pegua. Jare yandeYa umeeta cheve penti corona jocua ara. YandeYa co jae upuruãa jupi vae rupi vae. Jare umeeta vi jocua nunga corona opaete uãro ñugüinoi ivãe ara re vae reta pe - cheveño'ã co.

#### Pablo oyocui Timoteo

<sup>9</sup>Ññemiatangãtu immbae ndeyu vaerã chepi. <sup>10</sup>Demas oo ma chegüi Tesalónica coti, jae uau ete mbaembae cua ivi pegua ramo. Crescente vi oo Galacia coti, jare Tito oo Dalmacia coti. <sup>11</sup>Jaeño Lucas upita che ndive. Eeca Marcos nderu vaerã nderupie. Echa'ã jae ipuereta chembori Tumpa iparaviqui pe. <sup>12</sup>Amondo ma Tíquico Efeso pe. <sup>13</sup>Aeya chesaco Troas pe Carpo jenta pe. Ndeyu yave chepi, eru cheve. Eru libro reta vi jare tupapire reta. Agüiye neacañi tupapire reta güi.

<sup>14</sup>Alejandro mbaembae fierro pegua uyapo vae uyapo jeta icavi mbae vae cheve. YandeYa tumbiepi chupe uyapo vae re. <sup>15</sup>Nde vi ññemoa chugüi. Echa'ã jae oyovaicho ete yande ndive, ññaniñee güirovia'ã ramo.

<sup>16</sup>Tenonde uñeapo reta cheré yave, chembori'ã quía. Quiave upita'ã che ndive. Ayerure Tumpa pe agüiye vaerã jae umbijeco reta jese. <sup>17</sup>Erei yandeYa chembori jare chemimirãta, amimbeu cavi vaerã ñee icavi vae opaete vae pe, jare opaete judío mbae vae reta uyandu vaerã. Jucuarãi yandeYa cherepi, penti cuimbae uyerepi yaguapita iyuru güi rami. <sup>18</sup>Jare

yandeYa cherepita opaete icavi mbae vae güi, jare chereraata ara pe iporoyocuia pe. YandeYa tuyembiadoraca jaeño mai pegua. Amén.

### Saludo reta

<sup>19</sup>Tumpa ndiveño toĩ Priscila jare Aquila, jare Onesíforo jenta pegua reta. <sup>20</sup>Erasto upita Corinto pe. Ërei aeya Trófimo Mileto pe. Jae imbaerasi oĩ ayu joco güi yave. <sup>21</sup>Inemiatangātu ndeyu vaerã chepi ndei roi iara ou uvãe mbove. Eubulo, jare Pudente, jare Lino, jare Claudia, jare opaete ñru upurugüirovia vae reta jei peve Tumpa ndiveño peĩ.

<sup>22</sup>YandeYa Jesucristo toĩ nde ndive. Tume ipiacavi peve. Amén.

# LA CARTA DEL APOSTOL SAN PABLO A TITO

**1** <sup>1</sup>Che co jae Pablo. Ayeyocui Tumpa pe. Echa'ã che co jae Jesucristo jemimondo. Jae chemondo Tumpa uiparavo vae reta pe güirovia vaerã jese, jare uicuaa vaerã añete vae, uyeyocui vaerã Tumpa pe, <sup>2</sup>jare uãro vaerã uyerovia reve tecove opa mbae vae. Echa'ã Tumpa ipuere'ã etei iyapu, jare jae jei ndei ivi uyeyapo mbove umee vaerã yandeve tecove opa mbae vae. <sup>3</sup>Erei uicuaaca iñee jae uipota ma yave che amimbeu vae rupi. Echa'ã Tumpa co jae yanembiasa vae, jare umee cheve iñee amimbeu vaerã iporoyocui rupi. <sup>4</sup>Aicuatía cua tupapire ndeve, Tito. Nde co jae cherai añetete vae yandepurugüirovia re. YandeRu Tumpa jare yandeYa Cristo Jesús yanembiasa vae tumee ndeve ipiacavi, ipuruparareco jare ipiacatu.

## Tito iparaviqui Creta pe

<sup>5</sup>Che ndueya Creta pe nde ndiyapicatu vaerã opaete uata uyeyapicatu vaerã vae, jare niñono vaerã upurugüirovia vae reta itenondegua retarã tenta guasurai-rai rupi che ndoyocui rami. <sup>6</sup>Upurugüirovia vae reta itenondegua tuico cavi, agüiye vaerã quía umbijeco mbae re. Tugüireco pentiño cuña. Isambiai reta tupurugüirovia, jare agüiye tuyapo icavi mbae vae, jare jecuaeño tuyapo tu jare ichi jei vae. Echa'ã jucuarã i yave, ndarau quía umbijeco reta. <sup>7</sup>Upurugüirovia vae reta itenondegua uyeyocui Tumpa pe. Jáeramo tuico cavi, agüiye vaerã quía umbijeco mbae re. Agüiye tuyembicate. Agüiye tipiarai. Agüiye ticause. Agüiye tijovaichopota. Agüiye tuiyapota ete corepoti iyupeguarã. <sup>8</sup>Erei tiquirëi tumingaruru opou ipi vae reta. Icavi vaerã tuyapo. Tuñemoa. Tuyapo jupi vae. Tuyeyocui cavi Tumpa pe. <sup>9</sup>Tuñemiatangãtu ñee yandepuere yarovia catu vae re. Echa'ã jese uyemboe. Jucuarã i yave, ipuereta upurumbiaracuaa moromoe añete vae rupi, jare ipuereta vi uicuaaca oyovaicho jae ndive vae reta pe uyavi vae.

<sup>10</sup>Ime jeta ñru vae ipurumbiaracuaa re uipota'ã uyapisaca vae reta. Jeta ete judío reta jocua nunga. Jae reta imiariño jare upurumbitavi. <sup>11</sup>Icavi

co ñamiquĩ vaerã jocua nunga. Echa'ã jae reta oporomboe agüiyeta tẽi oporomboe jese vae re umingana vaerã corepoti iyupeguarã. Jare iporomboe rupi ombopa jeta tenta pegua reta.

<sup>12</sup>Penti oporomboe vae Creta pegua jei jentaigua reta re cuarã: “Creta pegua reta jecuaeño iyapu, jovaichopota, iyaquí jare icaru etc.” Jucuarãi jei. <sup>13</sup>Cua jei jese reta vae añete co. Jáeramo tanta rupi embieta chupe reta, uñemimirãta reta vaerã ipurugüirovia re. <sup>14</sup>Agüiye tuyapisaca judío reta aracae vae indaye reta re. Agüiye vi tuyapisaca uyerova ma añete vae güi vae reta iporoyocui reta re.

<sup>15</sup>Ipiayemingueta iquia mbae vae pe opaete mbaembae iquia mbae co. Ërei upurugüirovia mbae vae ipiayemingueta iquia vae pe opaete mbaembae iquia co. Echa'ã ipiayemingueta iquia co, jare ipiatiti'ã etei mbae icavi mbae vae uyapo yave. <sup>16</sup>Jae reta jei tẽi uicuaa Tumpa. Ërei mbae uyapo vae uicuaaca ñru vae reta pe uicuaa'ã co Tumpa. Echa'ã jae reta uyapo mbaembae pichĩ ete vae. Uyapo'ã reta Tumpa jei vae. Uyapo'ã etei mbae icavi vae.

#### Pablo jei Tito pe umimbeu vaerã moromboe añete vae

**2** <sup>1</sup>Ërei nde emimbeu ñru vae reta pe mbaembae moromboe añete vae pegua. <sup>2</sup>Ndechi reta tuñemoa jare tuyepiua ñru vae reta pe. Tipirãta ipurugüirovia re. Tupuruau. Tipiaguasu. <sup>3</sup>Jae ramiño vi cuña ucuacuaa vae reta tuyugüireco cavi uyeyocui vaerã Tumpa pe. Agüiye tiyapu ñru vae re. Agüiye ticause. Toporomboe icavi vae re. <sup>4</sup>Tomboe cuña tairusu vae reta uau vaerã ime jare imembi reta, <sup>5</sup>jare uñemoa vaerã, jare agüiye vaerã uyapo mbae pichĩ vae, jare uparaviqui cavi vaerã jenta pe, jare uyapo vaerã icavi vae, jare uyapo vaerã ime jei vae. Echa'ã jucuarãi uyapo reta yave, ñru vae reta ndarau jei icavi mbae vae Tumpa ñnee coti.

<sup>6</sup>Jae ramiño vi iyocui cuimbae tairusu vae reta uñemoa vaerã. <sup>7</sup>Jecuaeño nde rani iyapo icavi vae, ñru vae reta uicuaa vaerã quirãi icavi co jae reta vi yugüireco vaerã. Eporomboe añete vae re Tumpa ndipiu reve. <sup>8</sup>Iporu ñee reta icavi vae, agüiye vaerã quía nembijeco nde ndere vae re, jare oyovaicho nde ndive vae imara vaerã, ipuere'ã etei jei mbae icavi mbae vae ndecoti ramo.

<sup>9</sup>Iyocui uyeyocui vae reta uyapo vaerã ipatrón jei vae jare umbiyerovia vaerã ipatrón opaete mbae re. Agüiye ñnee tomoë güirave. <sup>10</sup>Agüiye timonda. Tuechaca ipatrón pe ipuere vaerã güirovia catu. Echa'ã jucuarãi yave, ipatrón uicuaata icavi ete co moromboe Tumpa regua jembiocui uyemboe jese vae. Tumpa co jae yanembiasa vae.

<sup>11</sup>Echa'ã Tumpa ipiacavi rupi yayembiasaca co, jare Tumpa uicuaaca opaete vae pe jae ipiacavi vae co. <sup>12</sup>Tumpa ipiacavi rupi yayemboe ma quirãi icavi co yaeya vaerã mbaeyoa reta jare mbaembae upurugüirovia mbae vae reta uipota ete vae, jare ñañemoa vaerã, jare yayapo vaerã jupi vae, jare yayeyocui vaerã Tumpa pe. Jucuarãi yaico cua ivi pe ñaĩ rambueve. <sup>13</sup>Jare jecuaeño ñaãro yayerovia reve Cristo Jesús ou ye uyecuaa vaerã



jembipe reve. Jae co Tumpa etei uyembiaadoraca vae. Jae co yanembiasa vae. <sup>14</sup>Echa'ã jae uñemee umano vaerã yanderé, jae yanderepi vaerã opaete icavi mbae vae güi, jare oyoe vaerã yandepia yanembaeyoa reta güi, yande yayeyapo vaerã imbae retarã, yande yaipota ete vaerã yayapo icavi vae.

<sup>15</sup>Cua mbaembae re eporomboc. Epurumbiaracuaa jare embieta icavi mbae vae uyapo vae pe. Jecuaño iporu mbaepuere Tumpa umee ndeve vae. Agüiye quía tanereríro.

### Tumpa yanembujupi ipiacavi rupi

**3** <sup>1</sup>Emimandúa uyapisaca nderé vae reta uyapo vaerã mburuvicha reta jare mbaepuere güinoi vae reta jei vae, jare uyapo vaerã ipotave mbae icavi vae. <sup>2</sup>Agüiye tei icavi mbae vae ipotave vae coti. Agüiye tijovaichopota. Tipiaguasu. Tuñemimichi opaete vae ndive.

<sup>3</sup>Tenonde yave yande vi yandearacuaa'ã. Yayapo'ãse Tumpa jei vae. Yayembitavise. Yaicose yaipota vae reño yayembiyerovia vaerã. Jecuaño yayapose icavi mbae vae jare yaipotase ñru vae reta imbaembae. Ñru vae reta ñanemitareise jare ñañemitareise. <sup>4</sup>Ñrei Tumpa uicuaaca yandeve quirai jae ipiacavi yandeve jare yanderau co. Jae co yanembiasa vae.

<sup>5</sup>Tumpa yanembiasa yandeparareco ramo, jupi vae yayapo ramo'ã. Jae yandeyoe yanembaeyoa güi, ñanoi vaerã tecove ipiau vae. Espíritu Santo rupi ñanoi ma tecove ipiau vae. <sup>6</sup>Echa'ã Tumpa umee yandeve Espíritu Santo opaete imbaepuere reve Jesucristo rupi. Jesucristo co jae yanembiasa vae. <sup>7</sup>Jucuarai Tumpa uyapo ñanoi vaerã tecove opa mbae vae, jare jocua ñaño ñai yayerovia reve. Echa'ã Tumpa yanembujupi ipiacavi rupi.

<sup>8</sup>Cua co ñee yandepuere yarovia catu vae. Jare aipota jecuaño tanta ndeporoyocui vaerã cua mbaembae re, Tumpa re güirovia vae reta uñemiatangātu uyapo vaerã icavi vae. Echa'ã jucuarai uyapo reta yave, icavita co opaete vae pe. <sup>9</sup>Ñrei agüiye iyeaca iyaracuaa mbae vae reta rami. Agüiye vi iyapisaca mbae itenondegua reta pe uyeyapo vae reguaño umieracua vae reta re. Agüiye iyeaca mbaembae mboroyocui regua re. Echa'ã jucuarai uyapo vae reta uyapo'ã co mbae icavi vae. Mbae'ã co uipota jei jae reta imiari jese vae.

<sup>10</sup>Ime yave quía uipota umbiyao amocue upurugüirovia vae reta ñru upurugüirovia vae reta güi vae, ere chupe penti ani mocui vese agüiye vaerã uyapo jucuarai. Ñrei uipota'ã yave ueya jeco, agüiye ñnemiru jae ndive. <sup>11</sup>Echa'ã ndicuaa jocua nunga ipuere'ã co ipia pe uyemingueta cavi. Jae iyoa, jare jae etei uicuaa iyoa co.

### Mboroyocui reta

<sup>12</sup>Amondo yave ndepi Artemas ani Tíquico, ñnemiatangātu ndeyu vaerã chepi Nicópolis pe. Echa'ã chequiréi apita joco pe roi iara uasa regua.

<sup>13</sup>Embori opaete ndepuere rupi Zenas mboroyocui uicuaa catu vae jare

Apolos, yugüiraa cavi vaerã, agüiye vaerã mbae uata chupe reta. <sup>14</sup>Jare upurugüirovia vae reta tuyemboe jecuaño uyapo vaerã icavi vae, ipuere vaerã omborì mbae uata chupe vae reta. Echa'ã jucuarãi uyapo reta yave, uyeyocui co Tumpa pe.

#### **Saludo reta**

<sup>15</sup>Opaete che ndive ñugüinoi vae jei peve Tumpa ndiveño peĩ. Tumpa ndiveño toĩ opaete upurugüirovia vae reta. Echa'ã jae reta orerau ete. Tumpa tumee opaete peve ipiacavi. Amén.

# LA CARTA DEL APOSTOL SAN PABLO A FILEMÓN

---

<sup>1</sup>Che co jae Pablo. Che co jae penti pereso Cristo Jesús pe ayeyocui ramo. Yanderivi Timoteo ime vi cua pe oĩ che ndive. Aicuatía cua tupapire ndeve, Filemón. Ore nduau co. Nde ndeparaviqui ore ndive. <sup>2</sup>Aicuatía ndeve vi, Apia. Nde co jae orerindi yandeYa re. Jae ramiño vi aicuatía ndeve, Arquipo. Nde ndeparaviqui tanta ore ndive. Aicuatía vi opaete upurugüirovia vae reta nerenta pe uyembati vae pe, Filemón. <sup>3</sup>YandeRu Tumpa jare yandeYa Jesucristo tumee peve ipiacavi jare ipiacatu.

## Filemón ipuruau jare ipurugüirovia

<sup>4</sup>Jecuaeño ayerure Tumpa pe nderé, Filemón, jare amee yasurupai Tumpa pe nderé. <sup>5</sup>Echa'ã jerãcua cheve mburuau jare mburugüirovia nde nenoĩ yandeYa Jesús coti jare opaete uñeño tee yandeYa peguarã vae reta coti vae. <sup>6</sup>Ime amocue ndepurugüirovia rupi yandeYa re güirovia vae. Ayerure Tumpa pe jocua reta uicuaa cavi vaerã opaete mbae icavi vae Cristo rupi ñanoi vae. <sup>7</sup>Ayerovia ete jare chepiacatu ndepuruau re, cherivi. Echa'ã nde nembipiacatu uñeño tee yandeYa peguarã vae reta.

## Pablo umiñera Onésimo re

<sup>8</sup>Che ndoyocuita tẽi ndiyapo vaerã jupi ndiyapo vaerã vae. Echa'ã Cristo umee cheve mbaepuere cuarãĩ ndoyocui vaerã. <sup>9</sup>Ërei mburuau checoti nenoĩ ramo, cheiño numiñera. Chendechi ma co, jare che co jae penti pereso Cristo Jesús pe ayeyocui ramo. <sup>10</sup>Che numiñera Onésimo re. Echa'ã jae uyeyapo ma cherairã yandeYa re peresoriru pe aĩ rambueve.

<sup>11</sup>Tenonde yave Onésimo uyeyocui cavi'ã ndeve. Ërei añave uyeyocui cavita co ndeve uyeyocui cavi cheve rami. <sup>12</sup>Jare amondo ye ndepi, yepe tẽi aau ete. Embiresive nde chembiresive rami. <sup>13</sup>Echa'ã animbitata tẽi che ndive, jae uyeyocui vaerã cheve ndepica pe, peresoriru pe aĩ rambueve. Cua peresoriru

pe aĩ ñee icavi vae amimbeu ramo. <sup>14</sup>Ërei aipota'ã ayapo jucuarãi, aicuaa'ã icavita ra ndeve ramo. Aipota ndiyapo vaerã icavi vae cheve, nde etei nequirëi ndiyapo yave. Aipota'ã ndoyocui jese. <sup>15</sup>Aramoi Onésimo osi ndegüi ndereya michi pegua, nde nenoï ye vaerã jaeño mai pegua. <sup>16</sup>Ërei jae penti uyeyocui vaeño'ã ma co. Echa'ã añave jae co yanderivi yaau vae. Jare penti nderivi icavi ete ndeve penti uyeyocui ndeve vae güi. Che aau co. Jae ramiño vi nde ndeau eteta co. Echa'ã jae co penti cuimbae nde rami, jare mocui reve perovia yandeYa re.

<sup>17</sup>Jáeramo embiresive cavi nde chembiresive rami. Echa'ã nde cheapo penti neĩrurã. <sup>18</sup>Jae uyapo yave icavi mbae vae ndeve ani ipía yave ndeve mbae re, cheve ecovara. <sup>19</sup>Chepo pe etei aicutía ndeve cua. Che tambiepi ndeve. Ërei chepuere numimandúa quirãi nde ndepía vi cheve nderecove re. <sup>20</sup>Añete co, cherivi, iyapo cua icavi vae cheve yandeYa re yarovia ramo. Chembipiäcatu. Echa'ã mocui reve yarovia yandeYa re.

<sup>21</sup>Aicutía cuarãi ndeve, aicuaa catu nde ndiyapota co che jae ndeve vae ramo. Aicuaa catu vi ndiyapota co jeta ete che jae ndeve vae güi. <sup>22</sup>Jare numiñera vi cua: Iyapicatu cheve aĩ pepi vaerã. Echa'ã chepia pe ayemingueta aĩ aramoi Tumpa chemondota pepi. Echa'ã pe reta piyerure Tumpa pe cheré chemondo vaerã pepi.

### Saludo reta

<sup>23</sup>Epafras jei ndeve Tumpa ndiveño eĩ. Jae ime peresoriru pe oĩ che ndive Cristo Jesús pe uyeyocui ramo. <sup>24</sup>Jare Marcos, Aristarco, Demas jare Lucas jei vi ndeve Tumpa ndiveño eĩ. Jae reta chembori yandeYa iparaviqui re.

<sup>25</sup>YandeYa Jesucristo tumee peve ipiacavi. Amén.

# LA CARTA A LOS HEBREOS

---

## Tumpa uyemingueta ma Tai rupi

**1** <sup>1</sup>Aracae yave Tumpa uyemingueta aveiño yandetenondegua reta pe iñee umimbeu vae reta rupi. Jeta quirairai rupi uyemingueta chupe reta. <sup>2</sup>Erei añave cua ara reta pe Tumpa uyemingueta ma yandeve Tai rupi. Tumpa uyapo opaete uyeyapo vae Tai rupi, jare Tai rupi vi jei mbae uasata opaete uyeyapo vae pe vae. Tumpa jei vae co Tai güinoi vaerã opaete uyeyapo vae. <sup>3</sup>Tumpa Tai oyovaque Tumpa ndive, jare cua ivi pe ico rambueve uicuaaca quirai Tumpa imbaepuere tuicha ete co. Echa'ã jae uiporu Tumpa imbaepuere etei. Opaete uyeyapo vae jecuaeño ico Tumpa Tai jei vae rupi jare imbaepuere rupi. Jae etei uñemee umano vaerã, ipuere vaerã umbai yanembaeyoa reta, jare cua jaicue rupi uguapi Tumpa iyipi pe iyacata coti ara pe.

## Tumpa Tai jare ángel reta

<sup>4</sup>Jucuarai Tumpa Tai uicuaaca quirai jae imbaepuere tuicha ete ángel reta imbaepuere güi. Jae ramiño vi tee uñemee chupe vae uyembutuichaca ete ángel reta jee güi. <sup>5</sup>Echa'ã Tumpa jei Tai pe cuarai: “Nde co jae cheRai. Cua ara aicuaaca nde co jae cheRai.” Jucuarai jei. Jucuarai'ã jei Tumpa ángel pe. Jare Tumpa jei Tai re cuarai: “Che co jae Tu, jare jae co cheRai.” Jucuarai jei. Jucuarai'ã jei Tumpa ángel regua. <sup>6</sup>Tumpa Tai co jae opaete mbaembae uyeyapo vae iYa. Jare Tumpa ombou ye yave Tai cua ivi pe Tumpa jeita cuarai: “Jare opaete ángel reta tumbiadora. Echa'ã jae reta uyeyocui cheve.” Jucuarai jeita. <sup>7</sup>Ángel reta re imiari yave, Tumpa jei cuarai: “Ayocui ángel reta uyapo vaerã che jae vae.”

Jatangātu ete uyeyocui vaerã cheve.”

Jucuarãi jei. <sup>8</sup>Ërei Tumpa jei Tai pe cuarãi:

“Nde co jae Tumpa etei.

Ndeporoyocuita jaeño mai pegua.

Nde ndeporoyocuita jupi vae rupi.

<sup>9</sup>Nde jecuaeño ndiyapo jupi vae.

Ndiyapota'ã etei mbaeyoa.

Jáeramo che noñono opaete ñru vae reta itenondeguarã, ndiyerovia ete vaerã.

Che co jae neTumpa.”

Jucuarãi jei. <sup>10</sup>Jare Tumpa jei vi Tai pe cuarãi:

“Nde co jae opaete mbae iYa.

Aracae ete nde ndiyapo ivi.

Jae ramiño vi ndiyapo opaete ara re oĩ vae.

<sup>11</sup>Jae reta opata, ãrei nde jaeño mai ndicota.

Jae reta opaete indechita penti temimonde indechi vae rami.

<sup>12</sup>Echa'ã indechi ete ma yave, uyemombo, jare uyeporu ñru temimonde jocua indechi vae ipepica pe.

Ërei nde jaeño mai ndicota.

Nde ndarau etei nendechi.”

Jucuarãi jei. <sup>13</sup>Jare Tumpa jei vi Tai pe cuarãi:

“Eguapi cheyipĩ pe cheacata cotĩ, nderovaicho reta opa amiamiri regua.”

Jucuarãi jei. Jucuarãi'ã jei Tumpa ángel pe.

<sup>14</sup>Echa'ã ángel reta uyeyocui Tumpa pe, jare Tumpa ombou ángel reta omborĩ vaerã uyembiasacata vae reta.

### Yembiasa icavi ete vae

**2** <sup>1</sup>Jáeramo icavi co ñaneratangātu ete vaerã yayapisaca jese vae re, agiiye vaerã yapia chugüi. <sup>2</sup>Echa'ã aracae yave Tumpa uyemingueta Israel pegua reta pe ángel reta rupi. Ërei Israel pegua reta uyapo'ã Tumpa jei vae. Jáeramo Tumpa uiporaraca chupe reta iyoa reta ramo. Echa'ã Tumpa co jae jupi vae. <sup>3</sup>Jae ramiño vi Tumpa uyemingueta ma yandev yembiasa icavi ete yandev vae re. Jáeramo uiporaracata yandev vi, yayapisaca'ã yave jese. Echa'ã yandeYa rani imiari cua yembiasa re, jare yaicuaa añete co uyapisaca jese vae reta umimbeu yandev vae rupi. <sup>4</sup>Tumpa etei vi uicuaaca añete co jae reta umimbeu yandev vae. Echa'ã umaeño jese reta uyapo vaerã miacañi reta uecha vae reta uicuaa vaerã, jare Tumpa umee chupe reta mbaepuere reta Espiritu Santo rupi jae etei uipota vae rupi.

### Jesucristo uyeyapo cuimbaerã

<sup>5</sup>Ángel reta ndarau yugüireco mburuvicha retarã ivi icota vae yayemingueta jese vae pe. <sup>6</sup>Ërei Tumpa iñee pe yamingueta quirãi penti vae jei Tumpa pe cuarãi:

“Yepe tẽi ivi pegua reta mbaeti co mbae,

ẽrei nde ndiyandareco jese reta jare jecuaẽño nembori reta.

<sup>7</sup> Añave jae reta imbaepuere michi ete ángel reta imbaepuere güi.

Cuarãi oĩ nde ndipota ramo.

Ërei michi peguaño cuarãita oĩ.

Echa'ã tenonde yave nemeẽ Adán pe mbaepuere tuicha vae jare nembutuichaca.

Nde nemeẽ chupe güinoi vaerã mbaepuere opaete nde ndiyapo vae re.

<sup>8</sup> Nde nemeaño jese ico vaerã opaete mbaembae juvicharã.”

Jucuarãi jei. Cua uipota jei mbaeti co mbae Adán jei vae ñatẽi uyapo vae.

Ërei yaicuaa quirãi añave ivi pegua reta ndei yugüireco opaete mbaembae juvicha retarã. <sup>9</sup>Ërei yaicuaa Tumpa umee ma co Jesús pe mbaepuere

tuicha vae jare umbiadoraca. Echa'ã Jesús imbaepuere vi uyeyapo michi ete ángel reta imbaepuere güi, ẽrei michi peguaño. Echa'ã jucuarãi

uyeyapo, Jesús umano vaerã opaete ivi pegua reta re, Tumpa uicuaaca

vaerã ipiacavi co yandeve. <sup>10</sup>Tumpa uyapo opaete, jare jae uyembutuichaca

opaete uyapo vae pe. Jae uipota jeta ivi pegua reta uyeyapo vaerã tai retarã jare uyembutuichaca vaerã. Jáeramo icavi chupe Jesús uiporara vaerã.

Echa'ã uiporara vae rupi Jesús uepiti upurumbiasa vaerã.

<sup>11</sup> Jesús ñaneño tee Tumpa peguarã, jare yande co jae pentiño Jesús ndive. Jáeramo jae ñanereni tiví reta. Imara'ã jucuarãi ñanereni vaerã.

<sup>12</sup>Echa'ã yamingueta Tumpa iñee pe quirãi Jesús jei Tumpa pe cuarãi:

“Che numimbeuta cherivi reta pe.

Yati yave, numbiadorata canta pipe ipite pe.”

Jucuarãi jei. <sup>13</sup>Jare jei vi cuarãi:

“Aroviata Tumpa.”

Jare jei vi cuarãi:

“Mase, co aĩ jare ime vi cua pe ñugüinoi Tumpa tai reta jae umiĩru che ndive vae.”

Jucuarãi jei.

<sup>14</sup>Opaete tai reta ivi pegua reta co. Jáeramo Jesús etei vi uyeyapo ivi peguarã,

imano rupi umiamiri vaerã aña guasu. Echa'ã aña guasu güinoise mbaepuere

mano regua. <sup>15</sup>Cua jeco pegua Jesús ipuere yanderepi. Echa'ã ñanemichi güiive

yaquiyẽ mano güi. Ërei Jesús yandeyora ma cua quiyẽ güi. <sup>16</sup>Añete co, Jesús

ou'ã ombori vaerã ángel reta. Ou co ombori vaerã Abraham inemoñaã reta.

<sup>17</sup>Jocua uyeyapota Jesús tiví retarã vae ivi pegua reta co. Jáeramo icavi co Jesús

vi uyeyapo vaerã ivi peguarã, ipuere vaerã umbai ivi pegua reta imbaeyoa reta.

Jae co sacerdote tenondegua Israel pegua rami. Echa'ã sacerdote tenondegua

uique Tumpa oĩ vae pe Israel pegua reta imbaeyoa reta re. Jae ramiño vi Jesús

uique Tumpa oĩ vae pe yanderé. Yandepuere yarovia catu. Jae yandeparareco.

<sup>18</sup>Echa'ã aña guasu umingueta uyavica vaerã tẽi chupe. Jáeramo aña guasu yanemingueta yave uyavica vaerã yandeve, Jesús ipuere yanembori.

### Jesús jare Moisés

**3** <sup>1</sup>Cherivi reta, Tumpa peñono tee iyupeguarã. Tumpa etei ara pe ico vae reparavo. Jáeramo pepia pe piyemingueta cavi Jesús re. Tumpa ombou Jesús umimbeu vaerã yandeve Tumpa regua, yande yarovia vaerã jese, jare añave Jesús ico Tumpa oĩ vae pe yanemborĩ vaerã yandepurugüirovia re, sacerdote tenondegua omborĩ Israel pegua reta rami. <sup>2</sup>Moisés uyapo cavi mbaraviqui Tumpa umee chupe uyapo vaerã vae. Jae ramiño vi Jesús uyapo cavi mbaraviqui Tumpa umee chupe uyapo vaerã vae. <sup>3</sup>Jare Jesús uyembutuichaca ete Moisés güi. Yamijaanga penti tenta. Moisés uyemijaanga tenta re. Ërei Jesús uyemijaanga tenta iyapoa re. Jecuaeño yambutuicha ete co tenta iyapoa tenta güi. <sup>4</sup>Jare penti penti tenta uyeyapoca tenta iyapoa pe. Ërei Tumpa uyapo opaete. <sup>5</sup>Moisés uyapo cavi mbaraviqui Tumpa umee chupe uyapo vaerã vae. Jucuarãi uyeyocui cavi Tumpa pe, jare Tumpa uicuaaca cua yandeve yaicuaa vaerã quirãi opaete Moisés imiari Tumpa re vae añete co. <sup>6</sup>Ërei Cristo co jae Tumpa Tai jare jae co opaete Tumpa re güirovia vae reta iYa. Echa'ã yande vi co jae imbae, jecuaeño yave ñaneratangãtu jare yayerovia yave ñaãro ñaĩ vae re.

### Tumpa imbae reta iputuú

<sup>7</sup>Jáeramo pemandúa Espíritu Santo jei vae re. Echa'ã Tumpa ñnee pe yamingueta quirãi Espíritu Santo jei yandetenondegua reta pe cuarãi:  
“Cua ara piyapisaca chiñee re.

<sup>8-9</sup>Jáeramo agüiye piyemipiatanta.

Echa'ã petenondegua reta uyemipiatanta ñana pe ñugüinoi yave.

Jae reta chembiavai jare chembiarasi.

Jare cuarenta año uecha reta opaete ayapo vae.

<sup>10</sup>Jáeramo chearasi petenondegua reta pe, jare che jae cuarãi:

‘Jecuaeño opia reta chegüi ipia pe.

Uipota'ã etei reta uyapo che aipota tẽi uyapo vaerã vae.’

Jucuarãi che jae.

<sup>11</sup>Jáeramo chearasi chupe reta ramo, che jae cuarãi:

‘Añete co, jae reta ndarau uique Canaán pe.

Echa'ã joco pe uputuuta tẽi co.’

Jucuarãi che jae.”

Jucuarãi jei Espíritu Santo.

<sup>12</sup>Jáeramo, cherivi reta, piñemoa, agüiye vaerã pepia uñemitanta perovia'ã Tumpa ramo. Echa'ã pepia uñemitanta yave, peopiata Tumpa imeño mai ico vae güi. <sup>13</sup>Ërei pepuere rambueve, piñemiatangãtungãtu opa ara rupi, agüiye vaerã penti pepite pe oĩ vae yepe uyemipiatanta mbaeyoa rupi. Echa'ã mbaeyoa ipuere yanembitavi yayemipiatanta vaerã. <sup>14</sup>Echa'ã yande yayeyapo ma Cristo iiru retarã jecuaeño yave ñaneratangãtu tenonde voi mburugüirovia ñanoi vae re. <sup>15</sup>Pemandúa cua Tumpa ñnee pe uyecuatía oĩ vae re:



“Cua ara piyapisaca chiñee re” —jei Espíritu Santo—.

“Jáeramo agüiye piyemipiatanta.

Echa'ã petenondegua reta uyemipiatanta ramo, chearasi chupe reta.”  
Jucuarãi uyecuatía oĩ.

<sup>16</sup>Yepe tẽi uyandu reta Tumpa iñee, ãrei amocue yandetenondegua reta umbiarasi Tumpa. Añete co, opaete Moisés güeru Egipto güi vae reta umbiarasi Tumpa. <sup>17</sup>Jáeramo Tumpa iarasi cuarenta año jocua yandetenondegua reta pe, iyoa reta ramo. Jare jae reta umano ñana pe. <sup>18</sup>Echa'ã Tumpa jei cuarãi:

“Añete co, jae reta ndarau uique Canaán pe.

Echa'ã joco pe uputuuta tẽi co.”

Jucuarãi jei Tumpa. Jare jucuarãi uyeyapo chupe reta, güirovia'ã Tumpa ramo. <sup>19</sup>Jáeramo yaicuaa jae reta ipuere'ã co uique Canaán pe, güirovia'ã Tumpa ramo.

**4** <sup>1</sup>Jáeramo pequiye. Echa'ã aramoi amocue pe reta ndarau peepiti penoi vaerã jocua mbutuu Cristo ipuere umee peve vae. Tumpa etei jei umee vaerã yandeve cua mbutuu. <sup>2</sup>Tumpa umimbeu yandetenondegua reta pe ñee icavi vae, ãrei jocua ñee icavi vae uyapo'ã mbae chupe reta. Echa'ã güirovia'ã reta jocua uyandu vae. Jae ramiño vi Tumpa umimbeu yandeve penti ñee icavi vae. <sup>3-5</sup>Jare yande yarovia Tumpa vae yaepiti jocua mbutuu Cristo umee yandeve vae. Echa'ã Tumpa jei cuarãi:

“Chearasi ete chupe reta.

Añete co, jae reta ndarau uique Canaán pe.

Echa'ã joco pe uputuuta tẽi co.”

Jucuarãi jei Tumpa. Echa'ã Tumpa iñee pe uyecuatía oĩ cuarãi:

“Tumpa opa iparaviqui uyapo seis ara pe.

Jayave jocua jaicue rupi uputuu penti ara.”

Jucuarãi uyecuatía oĩ. Ërei yepe tẽi opa iparaviqui uyapo cua ivi uyeyapo ma yave, ãrei uyecuatía oĩ Tumpa iñee pe quirãi Tumpa jei cuarãi:

“Jae reta ndarau uique Canaán pe.

Echa'ã joco pe uputuuta tẽi co.”

Jucuarãi jei Tumpa.

<sup>6</sup>Jáeramo yaicuaa cua: Tenonde voi Tumpa umimbeu jocua ñee icavi vae yandetenondegua reta pe. Ërei jae reta mbaeti güinoi jocua mbutuu Tumpa umeeta tẽi chupe reta vae, güirovia'ã Tumpa ramo. Jáeramo imeño jocua mbutuu amocue vae güinoita vae. <sup>7</sup>Jare Tumpa umimbeu yandeve ara. Echa'ã ima ma jae jei yave David rupi cuarãi: “Cua ara.” Echa'ã uyecuatía oĩ cuarãi:

“Cua ara piyapisaca chiñee re” —jei Espíritu Santo—.

“Jáeramo agüiye piyemipiatanta.”

Jucuarãi uyecuatía oĩ.

<sup>8</sup>Josué umee'ã jocua mbutuu yandetenondegua reta pe. Echa'ã umee chupe reta yave mona, mbaetita tẽi Tumpa uyemingueta taicue rupi ñru ara re. <sup>9</sup>Jáeramo imeño mbutuu Tumpa umeeta imbae reta pe vae. <sup>10</sup>Tumpa uputuu opa iparaviqui

uyapo yave. Jae ramiño vi yande ñanoi yave jocua mbutuu Tumpa umee yandeve vae, yaparaviqui'ã ma yembiasa ñanoi vaerã. <sup>11</sup>Jáeramo ñaneratangãtu ñanoi vaerã jocua mbutuu. Jocua yandetenondegua güirovia'ã Tumpa vae reta opa umano. Jae ramiño vi pe reta perovia'ã yave Tumpa, pecañiteita co.

<sup>12</sup>Echa'ã Tumpa iñee güinoi mbaepuere umee vaerã yandeve tecove opa mbae vae. Penti quisepecu jaimbeyovai vae ipuere yanembipere ete. Ipuere uyasia yandesoo jare ñanecãgüe yepe. Ërei Tumpa iñee imbaepuere tuicha ete quisepecu imbaepuere güi. Echa'ã Tumpa iñee uique yandepia pe etei jare uicuaaca yandeve mbae yaipota vae regua jare mbae Espíritu Santo regua. Tumpa iñee ipuere uicuaaca yandeve yandepiyemingueta etei, icavi ra ani icavi'ã ra. <sup>13</sup>Mbaeti mbae Tumpa uyapo vae ipuere uñemi Tumpa güi. Echa'ã jae uecha jare uicuaa opaete regua. Jare jae ñanerãata opaete yayapo vae re.

### Jesús co jae sacerdote tenondegua rami

<sup>14</sup>Jesús co jae Tumpa Tai. Jae uyupi oo ara pe, jare joco pe uyerure Tumpa pe yanderé, sacerdote tenondegua uyerurese yandetenondegua reta re rami. Ërei Jesús imbaepuere tuicha ete sacerdote tenondegua imbaepuere güi. Jare cua yaicuaa ramo, jecuae ñaneratangãtu ñanoi vaerã mburugüirovia. <sup>15</sup>Jesús mbaeti co sacerdote tenondegua ipuere'ã ipiatiti yaiporara yave vae rami. Echa'ã aña guasu umingueta uyavica vaerã tẽi chupe, aña guasu yanemingueta rami. Ërei jae iyoa'ã etei. <sup>16</sup>Jáeramo yaya yaquie mbae reve Tumpa re, Tumpa yandeparareco vaerã jare ñanoi vaerã ipiacavi. Echa'ã Tumpa ipiacavi jeco pegua yanemborita yaiporara yave.

**5** <sup>1</sup>Tumpa uiparavo penti cuimbae uyeyapo vaerã sacerdote tenondeguarã, jare umee chupe uyerure vaerã Tumpa pe ñru vae reta re, jare ipuere vaerã umee Tumpa pe ofrenda reta jare maemimba uyeyucacue reta. Maemimba uyeyucacue reta mbaeyoa reta regua co. <sup>2</sup>Amocue iyoa vae reta uicuaa cavi'ã imbaeyoa reta regua, ãrei ñru iyoa vae reta uicuaa uyapo'ã co Tumpa jei vae. Ërei sacerdote tenondegua ipuere uiparareco opaete vae, yavai'ã co jae etei iyoa vaerã ramo. <sup>3</sup>Jare cua jeco pegua icavi co sacerdote tenondegua umee vaerã Tumpa pe maemimba uyeyucacue imbaeyoa reta re, jucuarãi umee ñru vae reta imbaeyoa reta re rami. <sup>4</sup>Jare mbaeti quã ipuere uyeparavo jaeiño, ico vaerã sacerdote tenondeguarã. Jaeiño Tumpa uiparavo vae ipuere ico sacerdote tenondeguarã. Echa'ã jucuarãi Tumpa uiparavo Aarón.

<sup>5</sup>Jae ramiño vi Cristo uyembutuicha'ã jaeiño. Echa'ã uyeparavo'ã jaeiño, ico vaerã sacerdote tenondeguarã. Tumpa uiparavo Cristo ico vaerã sacerdote tenondeguarã. Echa'ã uyecuatía oĩ Tumpa iñee pe quirãi Tumpa jei Cristo pe cuarãi:

“Nde co jae cheRai.

Cua ara aicuaaca nde co jae cheRai.”

Jucuarãi jei. <sup>6</sup>Jare Tumpa iñee pe uyecuatía ye oĩ cuarãi:

“Nde ndicota penti sacerdoterã jaeño mai pegua” —jei Tumpa—,  
 “Melquisedec rami.”

Jucuarãi uyecuatía oĩ.

<sup>7</sup>Cristo cua ivi pe ico rambueve, uyao reve uyerure Tumpa pe ombori vaerã. Echa'ã Tumpa ipuere tẽi umbiasa mano güi. Jare Tumpa uyapisaca iyerure re, Cristo jecuaeño uipota uyapo Tumpa jei vae ramo. <sup>8</sup>Ërei yepe tẽi jae co Tumpa Tai, ãrei uyemboe uyapo vaerã Tumpa jei vae uiporara vae rupi. <sup>9</sup>Jare opaete Tumpa jei vae uyapo ma yave, ipuere umee yembiasa opa mbae vae opaete uyapo jae jei uyapo vaerã vae reta pe. <sup>10</sup>Tumpa iñee pe uyecuatía oĩ cuarãi:

“Nde co jae penti sacerdote tenondegua” —jei Tumpa—,  
 “Melquisedec rami.”

Jucuarãi uyecuatía oĩ.

### Agüiye pepia Tumpa güi

<sup>11</sup>Aipota tẽi amimbeu peve jeta cua regua, ãrei yavai co oĩ amimbeu peve vaerã. Echa'ã picuaata'ã, yepe tẽi piyapisaca jese. <sup>12</sup>Añave pe reta pemboeta tẽi ñru vae reta mbaembae re, piyemboe yave jese. Ërei piyemboe'ã jese. Jáeramo icavi co che pomboe ye vaerã jocua Tumpa umimbeu yandeve vae yavai'ã etei co yaicuaa vaerã vae. Tamijaanga tembú re. Sambiai-rai reta ipuere'ã jou tembú, jaeño neche. Pe reta sambiai-rai reta rami co. Echa'ã piyemboe cavi'ã Tumpa umimbeu yandeve vae re. <sup>13</sup>Sambiai-rai necheño ipuere jou vae uicuaa'ã mbae ave. Jae ramiño vi pe reta piyemboe'ã ñee Tumpa umimbeu yandeve vae re. Echa'ã piyemboe jese yave, picuaata tẽi mbae jupi vae. <sup>14</sup>Ërei ucuacuaa vae reta jou tembú. Jae ramiño vi Tumpa umimbeu yandeve vae re uyemboe cavi vae reta uicuaa cavi mbae icavi vae jare mbae icavi mbae vae.

**6** <sup>1</sup>Jáeramo agüiye yayemboe ye moromboe tenondegua Cristo regua re. Aipota pomboe ñru moromboe pepirãta vaerã pepurugüirovia re. Tenonde yave piyemboe quirãi pepuere peeya piyemingueta icavi mbae vae pepia pe oĩ vae - echa'ã piyapose vae rupi pepuere'ã penoi tecove opa mbae vae. Piyemboe vi mburugüirovia Tumpa coti vae re, <sup>2</sup>jare quirãi piyembibautizaca piyeyoe vaerã Tumpa coti. Piyemboe vi quirãi temimondo reta oñono ipo ñru vae reta iñãca re. Piyemboe vi umanocue vae reta icove ye vae re jare quirãi Tumpa uãata ivi pegua reta jare jae reta uiporarata jaeño mai pegua. <sup>3</sup>Cua aipota ayapo, Tumpa umaeño yave cheré. <sup>4-6</sup>Penti vae uicuaa yave Tumpa, Tumpa uicuaaca chupe vae rupi, jae uicuaa vi quirãi icavi ete mbaepuere Tumpa umee vae, jare uñemñru Espiritu Santo ndive. Jae uicuaa vi Tumpa iñee icavi ete vae jare mbaepuere reta ara ndeiño ou uvãe vae reta pe Tumpa uicuaacata vae. Ërei cua nunga opia yave Tumpa güi, ndarau etei ipuere ye ueya iyemingueta icavi mbae vae ipia pe oĩ vae. Jae co uyuca ye Tumpa Tai rami, jare jucuarãi güirãroca ñru vae reta pe.

<sup>7</sup>Echa'ã oquiñoi yave, ama umãqui ivi. Jayave ivi iya oñoti temiti, jare temiti yagüiye cavi yave, oñoti vae uyerovia ete. Jayave ivi iya jeita icavi ete jocua ivi. Echa'ã ivi uiporu cavi ama Tumpa ombou vae. <sup>8</sup>Ërei jocua ivi pe uñemoña yave yurãti catuii, ivi iya jeita icavi'ã etei jocua ivi. Aramoi Tumpa uyepipeyuta jese. Jocua ivi opata ocai.

<sup>9</sup>Ërei, cherivi reta, yepe tã chemiari ma peve cuarã, ãrei aicuaa pe reta pepia'ã co Tumpa güi. Piyapo co icavi vae piyembiasaca ramo. <sup>10</sup>Uyecuaa quirã peau Tumpa. Picuaaca pepuruau co piyapo vae rupi. Echa'ã jecuaeño piyeyocui ñru uñeño tee Tumpa peguardã vae reta pe. Tumpa ndarau ñacañi piyapo vae güi. Echa'ã ñacañi chugüi yave, mbaetita tã jupi. <sup>11</sup>Jare aipota pe reta penti penti jecuae picuaaca piñemiatangãtu co cua re, jecuae piyerovia catu vaerã peãro peñ vae re. <sup>12</sup>Agüiye peaquí. Pico ñru güirovia Tumpa vae reta yugüireco rami. Echa'ã jae reta ipurugüirovia jeco pegua ipiaguasu, güinoi vaerã Tumpa jei umeeta chupe reta vae.

### Tumpa jei umeeta chupe Abraham pe vae

<sup>13</sup>Tumpa jei umeeta Abraham pe vae re, Tumpa jei jee re uyapota co. Echa'ã mbaeti co mbaepuere tuicha ete Tumpa imbaepuere güi vae.

<sup>14</sup>Jare Tumpa jei Abraham pe cuarã:

“Añete co, che numivendiseta co.

Ameeta ndeve jeta ete niñemoña retarã.”

Jucuarãi jei. <sup>15</sup>Jare Abraham, ima ma uãro yave ipiaguasu reve, güinoi Tumpa jei umeeta chupe vae. <sup>16</sup>Penti vae jei yave ñru vae pe mbae uyapota chupe, jei mbaepuere tuicha vae güinoi vae jee re uyapota co. Jare cua jei vae uicuaaca ñru vae pe uyapota co, agüiye vaerã ñru vae ipia pe uyemingueta ndarau ndipo uyapo. <sup>17</sup>Jae ramiño vi Tumpa uipota ete uicuaaca jei güinoita vae reta pe quirã jae jei vae uyepepica'ã etei. Jáeramo jei jee re uyapota co jei vae. <sup>18</sup>Mocui reve - Tumpa jei vae jare jei jee re vae - uyepepica'ã etei, jare yaicuaa cua mocui reve añete co, Tumpa iyapu'ã etei ramo. Jáeramo cua ñanemimirãta yandepurugüirovia re. Echa'ã yande yayerova yandereco mai indechi vae güi jare yayerure Tumpa pe yanderepi vaerã. Jare ñaãro ñaï yayerovia reve ñanoi vaerã Tumpa jei umeeta yandeve vae. <sup>19</sup>Jare cua ñaãro ñaï yayerovia reve vae yanembori agüiye vaerã yapia Tumpa güi, jare yanemboya Tumpa ara pe oï vae re. <sup>20</sup>Echa'ã Jesús rani oo ma uique ara pe yanderenonde, jare Tumpa uyapo ma sacerdote tenondeguaã jaeño mai pegua Melquisedec rami.

### Jesús co jae sacerdote Melquisedec rami

**7** <sup>1</sup>Cua Melquisedec co jae Salem pegua reta juvicha guasu. Tumpa ara pe ico vae uyapo cua Melquisedec sacerdoterã. Abraham ou ye yave Salem pe uyucaca yave jocua mburuvicha guasu reta, uñeñovãiti Melquisedec ndive, jare Melquisedec jei Abraham pe cuarã: “Tumpa tanemivendise.”

2 Jayave Abraham umee Melquisedec pe diezmo opaete güinoi vae güi. Tee Melquisedec uipota jei “mburuvicha guasu jupi vae”. Cua Melquisedec co jae Salem pegua reta juvicha guasu, jare cua uipota jei “mburuvicha guasu mbiacatu pegua”. 3 Yaicuaa'ã quía reta ra jae tu jare jae ichi. Yaicuaa'ã vi quía reta ra jae itenondegua reta. Yaicuaa'ã vi quirãi yave ra ichi güi oa, jare quirãi yave ra umano. Jáeramo yandepuere yamijaanga Melquisedec Tumpa Tai re. Echa'ã jae co penti sacerdote imeño mai ico vae rami.

4 Mase, Tumpa uipiuca ete co cua cuimbae. Echa'ã yandetenondegua Abraham etei umee chupe diezmo opaete mbaembae upiŕo jovaicho reta güi vae güi. 5 Jare Israel pegua reta umee diezmo Leví inemoñaá sacerdote retará uyeyapo vae reta pe, yepe tẽi jentarã reta co. Echa'ã opareve Abraham inemoñaá reta co. Tumpa oyocui jucuarãi Moisés iporoyocui pe. 6 Ërei Melquisedec Leví inemoñaá pegua'ã co. Ërei Abraham umee diezmo chupe, jare Melquisedec jei Abraham pe cuarãi: “Tumpa tanemivendise.” Jare pemandúa cua re: Abraham co jae uipisi Tumpa güi jei umeeta chupe vae. 7 Jare penti vae jei yave: “Tumpa tanemivendise”, ïru vae pe, añetete jocua cuarãi jei vae uyembutuichaca ete ïru vae güi. 8 Jare cua ïvi pe Israel pegua reta umee diezmo sacerdote reta pe, yepe tẽi jocua sacerdote reta umano vae co. Ërei Abraham umee diezmo Melquisedec pe. Jare Tumpa inee pe uyecuatía oĩ jese vae rupi jae co imeño ico vae rami. 9 Jare yandepuere yae cua: Leví co jae Abraham inemoñaá pegua ramo, jae etei umee diezmo Melquisedec pe, yepe tẽi Israel pegua reta umee diezmo Leví inemoñaá reta pe. 10 Echa'ã Leví Abraham inemoñaá pegua co, ãrei ndeiño oa Abraham tai Isaac jee vae Melquisedec uñeñovãiti Abraham ndive yave. Jare Leví Isaac inemoñaá pegua co.

11 Tumpa uicuaaca Moisés iporoyocui Israel pegua reta pe yave, umee amocue Leví inemoñaá reta pe sacerdote retará yugüireco vaerã. Ërei jocua nunga sacerdote reta ipuere'ã opa umbai mbaeyoa reta. Jáeramo icavi co ico vaerã ïru sacerdote uyuavi jocua reta güi vae. Cua ïru sacerdote Melquisedec rami co, Aarón inemoñaá pegua'ã co. 12 Jocua reta uyeyapo sacerdote retará, jae reta co Leví inemoñaá pegua reta ramo. Ërei cua ïru sacerdote uyuavi jocua reta güi vae Leví inemoñaá pegua'ã co. 13-14 Echa'ã uyecuaa cavi quirãi cua ïru sacerdote Tumpa inee jucuarãi imiari jese vae - jae co yandeYa - Judá inemoñaá pegua co, Leví inemoñaá pegua'ã co. Judá inemoñaá ave uparaviqui'ã sacerdoterã maemimba uyeyucacue uñemeearenda pe. Echa'ã Moisés umimbeu'ã etei Judá inemoñaá reta ipuere uyeyapo sacerdote retará.

15 Ërei uyecuaa cavi ete quirãi icavi co uyeyapo vaerã ïru sacerdoterã Melquisedec rami vae. 16 Jocua reta uyeparavoca yugüireco vaerã sacerdote retará mboroyocui rupi, jae reta co Leví inemoñaá pegua reta ramo. Ërei cua ïru vae uyeparavoca ico vaerã sacerdoterã, imbaepuere tuicha ete ramo. Echa'ã jae güinoi tecove ndarau etei opa vae. 17 Echa'ã Tumpa inee pe uyecuatía oĩ jese cuarãi:

“Nde ndicota penti sacerdoterã jaeño mai pegua” —jei Tumpa—,  
 “Melquisedec rami.”

Jucuarãi uyecuatía oĩ. <sup>18-19</sup>Tenonde yave Tumpa oyocui amocue Leví ññemoñaa reta yugüireco vaerã sacerdote retarã. Ērei jae reta ipuere'ã opa umbai mbaeyoa reta. Jáeramo Tumpa oyocui'ã ma yugüireco vaerã sacerdote retarã. Umee yandeve icavi ete jocua reta güi vae. Echa'ã añave ññanoi ñããro ñãñ yayerovia reve vae, jare cua jeco pegua yandepuere yaya Tumpa re. <sup>20-21</sup>Jare jocua reta sacerdote retarã uyeyapo yave, Tumpa jei'ã etei mbae jee re. Ērei Tumpa umee yave cua ñru vae pe ico vaerã sacerdoterã, jei co mbae jee re. Echa'ã yandeYa Tumpa jei chupe cuarãi:

“Che jae ma cheree re, jare ndarau aipepica cua jae vae:

‘Nde ndicota penti sacerdoterã jaeño mai pegua, Melquisedec rami.’ ”

Jucuarãi jei. <sup>22</sup>Trato ipiau vae icavi ete trato tenondegua vae güi. Jare Jesús co jae penti sacerdote imeño mai ico vae ramo, yaicuaa añetete Tumpa uyapota cua taicue rupi jei vae. <sup>23</sup>Jare jeta ete co jocua sacerdote reta. Echa'ã penti penti umano. Jare sacerdote umano yave, ñru vae uyeyapo sacerdoterã uyapo vaerã mbaraviqui. <sup>24</sup>Ērei cua cuimbae imeño mai ico. Jáeramo ipuere uyapo sacerdote iparaviqui jaeño mai pegua. Ndarau uipota ñru vae uyapo vaerã iparaviqui. <sup>25</sup>Jáeramo Jesús ipuere umbiasa ete opaete oya Tumpa re jae uyapocue vae rupi vae reta. Echa'ã jae imeño mai ico uyerure vaerã Tumpa pe jese reta.

<sup>26</sup>Ícavi ete co uyerure vaerã yanderé cua nunga sacerdote tenondegua. Echa'ã jae co jupi vae. Mbaeti etei jeco. Jae co iyoa mbae vae. Ipuere'ã etei iyoa. Jae ico ara pe. <sup>27</sup>Jocua ñru sacerdote tenondegua reta opa ara rupi umee Tumpa pe maemimba uyeyucacue reta imbaeyoa reta re rani jare ñru Israel pegua reta imbaeyoa reta re. Ērei Jesús uyapo'ã jucuarãi. Echa'ã penti veseño Jesús umee Tumpa pe uyeyucacue vae. Jare jocua uyeyucacue vae jae etei co. <sup>28</sup>Echa'ã cuimbae reta mboroyocui rupi uyeparavoca yugüireco vaerã sacerdote tenondegua retarã vae iyoa mbae vae reta'ã co. Ērei añave mboroyocui uasa ma, jare Tumpa uiparavo Tai ico vaerã sacerdote tenondeguarã jocua jei jee re vae rupi. Jare Tumpa Tai iyoa mbae vae co jaeño mai pegua.

### Jesús jare trato ipiau vae

**8** <sup>1</sup>Opaete che jae ma peve vae uipota jei cua: Ime ññanoi cua nunga sacerdote tenondegua. Jae uguapi ma oĩ Tumpa iyipi pe iyacata coti ara pe. <sup>2</sup>Tumpa jo ññana pe Israel pegua reta uyapo vae uyemijaanga ara re. Echa'ã jocua o japipe pe Tumpa oĩ vae pe sacerdote tenondegua uyapose iparaviqui. Jae ramiño vi Jesús añave uyapo iparaviqui ara pe Tumpa oĩ vae pe. Israel pegua reta uyapo jocua o. Ērei yandeYa Tumpa uyapo ara.

<sup>3</sup>Jare sacerdote tenondegua penti penti uyeparavoca umee vaerã Tumpa pe ofrenda reta jare maemimba uyeyucacue reta. Jáeramo icavi co cua sacerdote tenondegua vi güinoi vaerã mbae umee vaerã chupe. <sup>4</sup>Ívi peño ico yave mona, mbaetita tēi ico sacerdoterã. Echa'ã jocua ñru sacerdote reta umee Tumpa pe ofrenda reta mboroyocui rupi. <sup>5</sup>Ērei mbaraviqui jae reta uyapo vae uyemijaangaño mbaraviqui ara pegua re. Echa'ã ndei Moisés uyapoca Tumpa jo

mbove, Tumpa umimbeu chupe quirãî uyapoca vaerã. Jei chupe cuarãî: “Mase, iyapoca opaete o cua amijaanga ndeve cua ivitu guasu re vae rami.” Jucaruãî jei chupe. <sup>6</sup>Jare mbaraviqui Tumpa umee Jesús pe vae icavi ete mbaraviqui jocua ïru sacerdote reta uyapo vae güi. Jae ramiño vi trato Jesús rupi yande ñanoi vae icavi ete trato tenondegua vae güi. Echa'ã jocua Tumpa jei umeeta yandeve vae icavi ete jocua Tumpa jei umeeta trato tenondegua vae rupi vae güi.

<sup>7</sup>Jocua trato tenondegua vae rupi ipuere'ã opa uyembai mbaeyoa reta. Jáeramo icavi co Tumpa uyapo vaerã ïru trato. <sup>8</sup>Echa'ã Tumpa uicuaa Israel pegua reta iyoa vae reta co. Jáeramo Tumpa ñnee pe uyecuatía oï quirãî yandeYa Tumpa jei cuarãî:

“Mase, outa ara reta amee vaerã trato ipiau vae Israel pegua reta jare Judá pegua reta pe.

<sup>9</sup>Jocua trato tenondegua vae amee itenondegua reta pe, aru yave Egipto güi.

Ërei trato ipiau vae uyuavi trato tenondegua vae güi.

Echa'ã jae reta uyapo'ã che jae chupe reta uyapo vaerã vae, trato tenondegua vae amee chupe reta yave.

Jáeramo ayandareco cavi'ã jese reta.

<sup>10</sup>Echa'ã jocua ara reta rendave pe ameeta trato ipiau vae Israel pegua reta pe.

Jae co cua: Ipia pe ambiyeminguetata reta cheporoyocui reta re, jare ayapocata chupe reta cheporoyocui reta.

Jae reta chembiadorata.

Echa'ã uicuaata che co jae Tumpa.

Jare che amborita reta.

Echa'ã yugüirecota chembae retarã.

<sup>11</sup>Ndarau etei quía omboe jentaigua cheré.

Ndarau etei quía omboe jentarã cheré.

Ndarau etei quía jei ïru vae pe: ‘Iyemboe yandeYa re’.

Echa'ã opaete vae - sambiaî reta jare ucuacuaa vae reta - checuata co.

<sup>12</sup>Aipararecota reta. Echa'ã ambiasata chupe reta imbaeyoa reta.

Ndarau ye chemandúa imbaeyoa reta re.”

Jucuarãî jei Tumpa. <sup>13</sup>Tumpa jei umeeta co chupe reta trato ipiau vae. Cua uipota jei jocua trato tenondegua vae indechi ma co. Jare mbae indechi vae opa seri ma co oï.

**9** <sup>1</sup>Tumpa umee yave Israel pegua reta pe trato tenondegua vae, oyocui quirãî umbiadora reta vaerã jocua o ñana pe uyapo reta vae pe. <sup>2</sup>Jocua o güinoi mocui o-rai. Tenondegua vae pe ñugüinoi lámpara reta, jare mesa, jare mbiyape uñeño tee vae reta Tumpa peguarã. Cua o-rai jee Lugar Santo. <sup>3</sup>Jare jocua Tumpa jo umbiyao vae cuti oï ïru o-rai Lugar Santísimo jee vae. <sup>4</sup>Joco pe ñugüinoi mesa oro pegua mbae ipiche cavi vae sacerdote reta uapi íárambo vae, jare ita reta Tumpa uicuatía mboroyocui reta jese vae jiru.

Jocua jiru ivira pegua vae co, ãrei opaete icupe rupi oro catuui. Jare jocua jiru japipe pe ñugüinoi yapepo oro pegua maná oĩ pipe vae, jare Aarón ipopoca joqui vae, jare ita reta Tumpa uicuatía mboroyocui reta jese vae. <sup>5</sup>Jare jocua jiru iaramboguea jocua oro catuui Tumpa uicuaaca Israel pegua reta pe ipuruparareco pipe vae co, jare jocua iárambo ñugüinoi jocua mocui ángel-raanga oro pegua ipõra ete vae. Jocua nunga ángel jee co querubine. Aipota tẽi amimbeu cavi peve jocua jiru iaramboguea regua, ãrei chepuere'ã añave.

<sup>6</sup>Opaete cua mbaembae uyeyapocavi ma yave, sacerdote reta jecuaeño uique o-rai tenondegua vae pe, joco pe uyapo vaerã iparaviqui. <sup>7</sup>Ërei sacerdote tenondeguaño uique ñru o-rai pe penti veseño año pe, jare jecuaeño uruique tugüi. Jae jare ñru Israel pegua reta iyoa uicuaa cavi'ã reve ramo, sacerdote tenondegua umee tugüi Tumpa pe opaete jocua mbaeyoa reta re. <sup>8</sup>Jucuarãi Espíritu Santo uicuaaca ipuere'ãño uique opaete vae Tumpa oĩ vae pe, jocua o-rai tenondegua vae oĩ rambueve. <sup>9</sup>Echa'ã jocua o-rai tenondegua vae penti jaangaño co. Joco pe sacerdote reta umee Tumpa pe ofrenda reta jare maemimba uyeyucacue reta. Ërei jocua ipuere'ã opa umbai jucuarãi umbiadora Tumpa vae imbaeyoa reta. Jare sacerdote reta etei uicuaa uyembai'ã co imbaeyoa reta. <sup>10</sup>Jaeño güinoi mboroyocui tembũ regua reta jare quirãi jae reta uyeyoe vaerã Tumpa coti. Opaete jocua mboroyocui reta ivi peguaño co. Tumpa umimbeu chupe reta jocua mboroyocui reta jae reta uyapo vaerã, Tumpa opaete uyapicatu regua.

<sup>11</sup>Ërei Cristo uyeyapo ma sacerdote tenondeguarã uyapo vaerã icavi vae yandeve. Jare jae uyapo iparaviqui ara pe. Ara icavi ete jocua Tumpa jo Israel pegua reta ñana pe uyapo vae güi. Echa'ã jocua Tumpa jo ivi peguaño co. <sup>12</sup>Jare sacerdote tenondegua ivi pegua uique yave Lugar Santísimo pe, uruique capura jugüi jare vaca tairusu vae jugüi. Ërei Cristo uique yave ara pe, uruique jae jugüi etei. Pentu veseño uique jare cuarãi umbiepi yanembaeyoa reta re. Jáeramo ñanoi ma yembiassa opa mbae vae. <sup>13</sup>Penti Israel pegua uyapo yave mbae Tumpa coti uyeminguia vae, sacerdote ipuere uipi toro jugüi pe ani capura jugüi pe ani i vaca ocaicue ndive uyea vae pe oyoe vaerã jete Tumpa coti. Jucuarãi uñeño tee Tumpa peguarã. <sup>14</sup>Ërei Cristo jugüi ipuere ete jocua reta güi. Echa'ã Cristo iyoa mbae vae co. Ërei jae umano uñemee vaerã Tumpa pe Espíritu Santo imeño mai ico vae rupi. Jáeramo jae jugüi ipuere umbai mbaembae mano pegua piyapo vae. Jare picuaata uyembai ma co, pepuere vaerã piyeyocui Tumpa imeño mai ico vae pe.

<sup>15</sup>Jare cua jeco pegua Tumpa uicuaaca ma trato ipiaiu vae Cristo rupi. Echa'ã Cristo umano umbiepi vaerã trato tenondegua vae güinoi vae reta imbaeyoa reta re. Jáeramo jocua Tumpa uiparavo vae reta güinoita imbaerã opa mbae vae Tumpa jei umeeta chupe reta vae.

<sup>16</sup>Cuimbae jei yave umee vaerã mbaembae ñru vae reta pe jae umano yave, jae reta ndarau ipuere güinoi jocua mbaembae imbaerã ndei iya umano mbove. <sup>17</sup>Echa'ã cuimbae umano yave ramo jae reta ipuere



güinoi imbaerã jocua mbaembæe. Ndarau ipuere güinoi mbaembæe jei umeeta vae imeño ico rambueve. <sup>18</sup>Jáeramo Moisés uiporu tugüi trato tenondegua vae uyeyapo vaerã. <sup>19</sup>Echa'ã Moisés opa rani umimbeu Israel pegua reta pe opaete mboroyocui reta. Jayave jocua jaicue rupi uiporu vaca tairusu vae reta jugüi jare capura reta jugüi jare i jare ovech-raagüe ñemipïta vae jare ñana hisopo jee vae uipi vaerã tupapire jare opaete Israel pegua reta. <sup>20</sup>Jare Moisés jei chupe reta cuarãi:

“Cua tugüi uicuaaca peve trato Tumpa umee ma peve vae.

Echa'ã cua trato rupi Tumpa peocui mbae piyapo vaerã.”

Jucuarãi jei. <sup>21</sup>Jae ramiño vi Moisés uipi tugüi pe Tumpa jo jare opaete sacerdote reta jembiporu reta. <sup>22</sup>Jare mboroyocui rupi opaete seri uyeyoe Tumpa coti tugüi pe. Jare maemimba reta uyeyuca'ã yave, Tumpa umbiasata'ã tẽi Israel pegua reta pe imbaeyoa reta.

### Jesús umano güiraa vaerã imbaeyoa reta

<sup>23</sup>Jare opaete cua reta mbaembæe ara pegua jaanga retaño co. Jáeramo icavi co uyeyoe vaerã Tumpa coti jucuarãi. Ërei icavi co mbaembæe ara pegua etei uyeyoe vaerã Tumpa coti Cristo jugüi pe. Echa'ã Cristo jugüi icavi ete maemimba reta jugüi güi. <sup>24</sup>Cristo uique ma ara pe, uique'ã penti o uñeño tee Tumpa peguarã vae Israel pegua reta uyapo vae pe. Echa'ã jocua o penti jaangaño co. Jocua o uyemijaanga Tumpa jo añetete vae re. Cristo ico ma Tumpa oĩ vae pe yanemborí vaerã. <sup>25</sup>Jare sacerdote tenondegua ivi pegua uruique Lugar Santísimo pe maemimba reta jugüi. Ipuere'ã co uruique jae jugüi. Jare jucuarãi jecuaeño uyapo opa año rupi. Ërei Cristo uñemee'ã ma jecuaeño umano vaerã. <sup>26</sup>Echa'ã jecuaeño jucuarãi uñemee yave mona, umanota tẽi uiporara reve jeta vese ivi uyeyapo güive. Ërei añave penti veseño ara taicuegua reta pe ou ma Cristo cua ivi pe umbai vaerã mbaeyoa reta imano rupi. <sup>27</sup>Ivi pegua reta umano, ou uvãe yave ara umano vaerã. Jare umano yave Tumpa uãata co. <sup>28</sup>Jae ramiño vi Cristo penti veseño uñemee umano vaerã, ipuere vaerã güiraa chugüi reta jeta vae imbaeyoa reta. Jare uyecuaa yeta opaete uyerovia reve uãro ñugüinoi vae reta pe. Ërei uyecuaa ye yave, outa umbiasa ete reta vaerã, outa'ã umbiepi ye vaerã mbaeyoa re.

**10** <sup>1</sup>Mboroyocui michiño uicuaaca icavi vae Tumpa uyapota vae. Uicuaaca cavi'ã. Echa'ã maemimba uyeyucacue reta uñemee Tumpa pe opa año. Ërei jocua nunga ipuere'ã etei opa umbai jucuarãi oya Tumpa re vae reta imbaeyoa reta. <sup>2</sup>Echa'ã ipuere yave mona opa umbai, uñemee yeta'ã tẽi co maemimba uyeyucacue reta. Echa'ã jucuarãi umbiadora Tumpa vae reta ipia pe uyemingueta yeta'ã tẽi co jecuaeño mbaeyoa reta güinoi vae re. <sup>3</sup>Ërei jocua maemimba uyeyucacue reta Tumpa pe uñemee vae umimandúa opa año Israel pegua reta imbaeyoa reta re. <sup>4</sup>Echa'ã toro jugüi jare capura jugüi ipuere'ã etei umicañi ete mbaeyoa reta.

<sup>5</sup>Jáeramo Cristo ou yave cua ivi pe, jei Tumpa pe cuarãi:

“Ndipota'ã jocua maemimba uyeyucacue ñemee ndeve vae reta. Jáeramo nde nemee cheve cherete ñemee vaerã.

6 Maemimba uyeyucacue reta ocai ñemee vaerã ndeve.

Ërei jocua reta nembiyerovia'ã.

Jae ramiño vi maemimba uyeyucacue reta mbaeyoa reta re ñemee vae nembiyerovia'ã.

7 Jayave che jae ndeve:

‘Mase, che ayu ayapo vaerã nde ndere vae.

Nde co jae Tumpa.

Echa'ã jucuarãi uyecuatía oĩ cheré niñee pe.’”

Jucuarãi jei Cristo Tumpa pe. 8 Cristo jei tenonde voi cuarãi:

“Ndipota'ã jocua maemimba uyeyucacue ñemee ndeve vae reta.

Maemimba uyeyucacue reta ocai ñemee vaerã ndeve.

Ërei jocua reta nembiyerovia'ã.

Jae ramiño vi maemimba uyeyucacue reta mbaeyoa reta re ñemee vae nembiyerovia'ã.”

Jucuarãi jei, yepe tẽi jocua nunga ñemee Tumpa pe mboroyocui rupi.

9 Jayave jocua jaicue rupi jei ye cuarãi:

“Mase, che ayu ayapo vaerã nde ndere vae.

Nde co jae Tumpa.”

Jucuarãi jei. Cua uipota jei jocua maemimba uyeyucacue ñemee vae reta mbaeti ma co mbaerã icavi, jare jocua ipepica pe Cristo jete ñemee Tumpa pe. 10 Echa'ã Jesucristo umee jete Tumpa pe penti veseño jaeño mai pegua. Jare cua jeco pegua Tumpa ñaneño tee iyupeguarã jei vae rupi.

11 Jocua ivi pegua sacerdote reta uyemboi Tumpa jo pe opa ara rupi uyeyocui vaerã Tumpa pe. Jeta vese jae reta umee Tumpa pe maemimba uyeyucacue reta. Opa ara jocua jocuaño uyapo reta. Ërei jocua nunga ipuere'ã etei umbai mbaeyoa reta. 12 Ërei cua cuimbae Cristo jee vae umano umee vaerã jete Tumpa pe. Pentu veseño jucuarãi uyapo, ipuere vaerã umbai mbaeyoa reta jaeño mai pegua. Jare jocua jaicue rupi uguapi Tumpa iyipi pe iyacata coti.

13 Jare uguapi joco pe güive, jecuaeño uãro oĩ Tumpa opa umiamiri vaerã jovaicho reta regua. 14 Echa'ã pentu veseño umee jete Tumpa pe, jare jucuarãi umbiasa ete jaeño mai pegua Tumpa oñono tee iyupeguarã vae reta.

15 Jare Espíritu Santo vi umimbeu cua yandev. Echa'ã uyecuatía oĩ Tumpa iñee pe quirãi yandeYa tenonde voi jei cuarãi:

16 “Jocua ara reta rendave pe ameeta cua trato ipiaiu vae chupe reta.

Ipia pe ambiyemínguetata reta cheporoyocui reta re,

jare ayapocata chupe reta cheporoyocui reta.”

Jucuarãi jei. 17 Jayave taicue rupi jei cuarãi:

“Jare ndarau ye chemandúa imbaeyoa reta re.”

Jucuarãi jei. 18 Jare Tumpa umbiasa yandev yanembaeyoa reta ramo, mbaeti ma mbae ñamee vaerã yanembaeyoa reta re.

### Yaique Tumpa oĩ vae pe

19 Jáeramo, cherivi reta, yandepuere yaique yaquiye mbae reve Tumpa oĩ vae pe Jesús jugüi jeco pegua. 20 Echa'ã Jesús umano yanderé yandepuere vaerã yaique Tumpa oĩ vae pe, maemimba uyeyuca yave sacerdote tenondegua uique Lugar Santísimo pe rami. Jucuarãi Jesús uyapo yandevé penti tape ipiau vae Tumpa oĩ vae pe, ñanoi vaerã tecove opa mbae vae. 21 Yande co jae Tumpa imbae reta, jare Jesús co jae sacerdote tenondegua uyerure Tumpa pe yanderé vae. 22 Jáeramo yaya Tumpa re ñanequirëi ngatu reve. Yarovia Tumpa uipota co yaya vaerã jese. Sacerdote ivi pegua oyase Tumpa re yave, uyeipi tugüi pe jare oyoe jete i icavi vae pe. Jae ramiño vi yande yaya Tumpa re yave, tuyeyoe Tumpa coti mbaeyoa güi yandepia jare yanderete. 23 Jecuaeño ñaneratangātu yamimbeu vaerã ñru vae reta pe ñaãro ñai yayerovia reve vae. Echa'ã yandepuere yarovia catu Tumpa jei umeeta yandevé vae. 24 Jare yayandareco yandiyee. Ñañemiatangātu yayerau vaerã jare icavi vae yayapo vaerã. 25 Amocue vae uyembati'ã ma ñru upurugüirovia vae reta ndive. Agüiye yayapo jae reta rami. Yayembati jare ñañemiatangātu. Ñañemiatangātu ete, yaicuaa jocua ara outa ma oĩ ramo.

26 Ërei yandeyoa yave ñanequirëi ngatu reve añete vae yaicuaa yave, mbaeti ye ma quía uñemee vaerã mbaeyoa reta re. 27 Jaeño ñaãrota yaquiye reve Tumpa ñanerãa vaerã. Echa'ã Tumpa pochi ete jovaicho reta pe. Jae co penti tata mbaembae opa uapi vae rami. 28 Penti Israel pegua Moisés iporoyocui uyapo'ã vae umano, ñru mocui ani mbapi Israel pegua reta umimbeu yave imbaeyoa re. ñru vae reta uiparareco'ã etei. 29 Ërei Tumpa upuruãa yave, güiriro Tumpa Tai vae uiporara eteta Israel pegua reta güi. Echa'ã güiriro Tumpa Tai vae ipia pe uyemingueta Tumpa Tai jugüi mbae'ã co, yepe tãi jocua jugüi uicuaaca chupe trato Tumpa umee chupe vae, jare jocua jugüi rupi Tumpa oñono teeta tãi iyupeguarã. Jucuarãi güiriro Tumpa Tai vae güiriro vi Espíritu Santo ipiacavi.

30 Yaicuaa co Tumpa jare quirãi jae jei Israel pegua reta pe cuarãi:  
 “Che co jae peYa.  
 Che puãata co.  
 Che aiporaracata co peve.”

Jucuarãi jei. Jare yaicuaa quirãi jei vi chupe reta cuarãi:  
 “Che co jae peYa.  
 Pe reta co jae chembae reta.  
 Che puãata co.”

Jucuarãi jei vi. 31 Penti quiye tuicha vae co Tumpa imeño mai ico vae uiporaraca yave quía nunga vae pe.

32 Ërei pemandúa ara reta uasa vae re. Jocua ara reta pe, Cristo re piyemboe yave, ñru vae reta uiporaraca ete peve, Ërei jecuaeño pepirãta pepurugüirovia re. 33 ñru vae reta pereriro. Echa'ã jei reta icavi mbae vae peve jare uyapo reta

icavi mbae vae peve. Jae ramiño vi piñemĩru ma jucuarĩi uiporara vae reta ndive. <sup>34</sup>Echa'ã piparareco peresoriru pe ñugüinoi vae reta. Jare ĩru vae reta pemaembae upĩro pegüi yave, piyerovia catu. Echa'ã picuaa penoi co ara pe mbaembae icavi ete jocua güi vae. Echa'ã mbaembae ara pegua jaẽño mai pegua co. Ërei mbaembae ivi pegua jaẽño mai pegua'ã co. <sup>35</sup>Jáeramo jecuaẽño perovia catu Tumpa pequiye mbae reve, Tumpa umee vaerã peve icavi ete vae. <sup>36</sup>Echa'ã Tumpa uipota pepiaguasu vaerã. Jucuarĩi yave, Tumpa umeeta peve jei umeeta vae, opa ma piyapo yave Tumpa jei vae. <sup>37</sup>Tumpa ñínee pe uyecuatía oĩ cuarãi: “Imambae jae outa vae outa co.

Ou seri ma co oĩ.

<sup>38</sup>Tumpa umbujupi vae güinoita tecove opa mbae vae, upurugüirovia ramo.

Ërei ime yave quía opia Tumpa güi vae, ndarau ayerovia jese.” Jucuarĩi uyecuatía oĩ. <sup>39</sup>Ërei yande jae'a co Tumpa güi opia vae reta. Echa'ã jae reta yugüiraata cañitei pe. Yande yapurugüirovia yanderecove uyembiasaca vaerã.

### Mburugüirovia regua

**11** <sup>1</sup>Mburugüirovia ñanoi yave, yaicuaa ñanoita co ñaãro ñaĩ yayerovia reve vae, yepe tẽi mbaetiño yaecha. <sup>2</sup>Yandetenondegua reta umbiyerovia Tumpa ipurugüirovia re.

<sup>3</sup>Yapurugüirovia yave, yaicuaa ivi jare opaete ara re ñugüinoi vae uyeyapo co Tumpa jei vae rupi, jare opaete cua reta yandepuere yaecha vae uyeyapo'ã mbae güi. Echa'ã ndei Tumpa uyapo mbove, mbaeti co mbae ave.

<sup>4</sup>Abel güirovia Tumpa. Jáeramo umee Tumpa pe maemimba uyeyucacue. Cua icavi ete Tumpa pe jocua Caín umee Tumpa pe vae güi. Jare Tumpa uicuaaca umbujupi co Abel jocua umee Tumpa pe vae rupi. Jare yepe tẽi Abel umano, ãrei jocua uyapo vae mbae uicuaaca yandeve.

<sup>5</sup>Enoc güirovia Tumpa. Jáeramo Tumpa güiraa ivi güi jecove reve. Mbaeti quía ipuere uvãe chupe. Echa'ã Tumpa güiraa ivi güi. Echa'ã ndei Tumpa güiraa mbove, Tumpa uicuaaca quirãi Enoc umbiyerovia. <sup>6</sup>Ërei yarovia'ã yave Tumpa, yandepuere'ã yambiyerovia. Echa'ã yarovia'ã yave ime co penti Tumpa, yandepuere'ã yaya jese. Jae ramiño vi yarovia'ã yave Tumpa uyecuaata co yandeve jecuaẽño yaeca yave, yandepuere'ã yaya jese.

<sup>7</sup>Noé güirovia Tumpa. Jáeramo uyapo chalana guasu jentarã reta oyepe vaerã iporu guasu güi. Echa'ã ndei iporu guasu uyeyapo mbove, Tumpa uicuaaca Noé pe uyeyapota co. Jáeramo Noé uyapo chalana guasu umbiadora Tumpa ramo. Jare jocua uyapo vae rupi Noé uicuaaca ivi pegua reta icavi mbae vae uyapo vae reta co, jare Tumpa umbujupi ipurugüirovia jeco pegua.

<sup>8</sup>Abraham güirovia Tumpa. Jáeramo uyapo Tumpa umimbeu chupe uyapo vaerã vae. Echa'ã Tumpa umimbeu chupe oo vaerã ambie ivi Tumpa umeeta imbaerã vae pe. Jayave Abraham oẽ oo jenta güi, yepe tẽi uicuaa'ã queti oo

vae. <sup>9</sup>Abraham güirovia Tumpa ramo, icoiño ivi Tumpa jei umeeta chupe vae pe jo carpa guacapi pegua pe. Jucuarãi uyecuaa jocua ivi jae imbae'ã co. Jae ramiño vi Isaac jare Jacob yugüireco joco pe jo guacapi pegua pe, yepe tẽi Tumpa jei chupe reta vi umeeta co jocua ivi imbaerã. <sup>10</sup>Echa'ã Abraham uãro oĩ uique vaerã tenta guasu Tumpa uyapo vae. Jocua tenta guasu ndarau opa.

<sup>11</sup>Sara güirovia Tumpa. Jáeramo Tumpa umee chupe imembi vaerã. Jare Sara imembi, yepe tẽi ucuacuaa ete. Echa'ã güirovia Tumpa uyapota co jei uyapota vae. <sup>12</sup>Jáeramo jeta ete co Abraham inemoñaã reta, yepe tẽi Abraham indechi ete ma. Jeta ete co yasitata ara re ñugüinoi vae reta jare jeta ete co ivicüiti i guasu jembei pe oĩ vae. Jae ramiño vi jeta ete co Abraham inemoñaã reta.

<sup>13</sup>Cua reta umano güirovia reve Tumpa, yepe tẽi Tumpa ndeiño umee chupe reta jei umeeta chupe reta vae. Jae reta jei iyupe imbae'ã co cua ivi. Ërei uicuaa ima yave Tumpa uyapota co jei uyapota vae. <sup>14</sup>Jare jei reta yave iyupe cua ivi imbae'ã vae co, uipota jei uãro ñugüinoi ñru ivi yugüireco pipe vaerã. <sup>15</sup>Añete co ipia pe uyemingueta yave jocua ivi Abraham oẽ oo chugüi vae re yugüiraa ye vaerã joco pe, aramoi ipuereta tẽi yugüiraa ye joco pe. <sup>16</sup>Ërei uipota reta ivi icavi ete jocua güi vae. Uipota penti ivi ara pegua. Jáeramo Tumpa imara'ã jee re. Echa'ã jee co Abraham jare Isaac jare Jacob iTumpa. Jare jae uyapo ma chupe reta tenta guasu jentarã.

<sup>17</sup>Tumpa uipota uicuaa uyapota ra Abraham Tumpa jei chupe uyapo vaerã vae. Jáeramo Abraham uyucata tẽi Isaac umee vaerã Tumpa pe. Jucuarãi uyapo güirovia Tumpa ramo. Yepe tẽi Tumpa umee ma chupe jei umeeta chupe vae reta, ãrei uyucata tẽi tai jae vaeño umee vaerã Tumpa pe. <sup>18</sup>Echa'ã Tumpa jei ma Abraham pe Isaac re cuarãi: “Nenoita niñemoñaã reta Isaac rupi.” Jucuarãi jei. <sup>19</sup>Abraham uicuaa jae uyuca yave tai, Tumpa ipuere umbijecove ye. Jare yandepuere yamijaanga cua uyeyapo vae, yae yave Abraham umbiresive Isaac mano güi.

<sup>20</sup>Isaac güirovia Tumpa. Jáeramo uyerure Tumpa pe umivendise vaerã Jacob jare Esaú uyeyapota chupe reta vae re.

<sup>21</sup>Jacob güirovia Tumpa. Jáeramo umanota ma yave, uyerure Tumpa pe umivendise vaerã José tai reta mocui reve, jare umbiadora Tumpa uyeco oĩ rambueve ipopoca re.

<sup>22</sup>José güirovia Tumpa. Jáeramo umanota ma yave, jei Israel pegua reta pe oẽta co yugüiraa Egipto güi, jare oyocui reta jetecue re.

<sup>23</sup>Moisés tu jare ichi güirovia Tumpa. Jáeramo Moisés ichi güi oa ma yave, tu jare ichi oñomi jo pe mbapĩ yasi. Echa'ã uecha Moisés ipõra ete co, jare uquiye'ã mburuvicha guasu Egipto pegua iporoyocui güi.

<sup>24</sup>Moisés güirovia Tumpa. Jáeramo ucuacuaa ma yave, uipota'ã ico vaerã Faraón tayi imembirã. <sup>25</sup>Ipuere tẽi uyapo mbaeyoa uyembiyerovia vaerã michi pegua. Ërei uipota ete jocua güi uiporara Tumpa imbae reta ndive. <sup>26</sup>Echa'ã Moisés güirovia icavi ete chupe uñererõroca vaerã Cristo jeco

pegua opaete corepoti Egipto pe oĩ vae güinoi vaerã vae güi. Echa'ã uicuaa icavi ete co Tumpa umeeta chupe vae opaete corepoti Egipto pe oĩ vae güi.

<sup>27</sup>Moisés güirovia Tumpa ramo, oẽ oo Egipto güi. Uquiyelã mburuvicha guasu güi, yepe tẽi mburuvicha guasu pochĩ ete chupe. Jare Moisés urupia ima ñana pe. Echa'ã yepe tẽi mbaeti quía ipuere uecha Tumpa, ãrei jae ico quía uecha Tumpa vae ico rami. <sup>28</sup>Moisés güirovia Tumpa ramo, omboe Israel pegua reta pascua re. Jocua ara pe jae reta uipi jonque penti penti tugüi pe, agüiye vaerã ángel uyuca tai tenondegua reta. Echa'ã jocua ángel uyuca Egipto pegua reta tai tenondegua vae reta.

<sup>29</sup>Israel pegua reta güirovia Tumpa. Jáeramo I Guasu Pita jee vae uasa ivi utini vae rupi uasa rami. ãrei Egipto pegua reta uasa rambueve, i ou ye chupe reta jare opa umbipitupa.

<sup>30</sup>Israel pegua reta güirovia Tumpa ramo, Jericó iquẽsea ita pegua vae uyapara Israel pegua reta siete ara ma uyere jese yave.

<sup>31</sup>Cuña aguasa rupi ico vae Rahab jee vae güirovia Tumpa. Jáeramo opaete Jericó pegua güirovia'ã Tumpa vae reta umano yave, Rahab umano'ã. Echa'ã jae umbiresive cavi Israel pegua reta uipiãro yave Jericó.

<sup>32</sup>Jeta ete ma che jae güirovia Tumpa vae reta re. Chepuere'ã ma amimbeu vaerã peve Gedeón, Barac, Sansón, Jefté, David, Samuel jare Tumpa iñee umimbeu vae reta regua. <sup>33</sup>Jae reta vi güirovia Tumpa. Jáeramo umiamiri mburuvicha guasu reta, uyapo jupi vae, Tumpa umeet chupe reta jei umeeta chupe reta vae, jare Tumpa uyandareco jese reta agüiye vaerã yaguapita reta uyuca. <sup>34</sup>Jae reta ombove tata tuicha vae reta. Amocue vae jovaicho reta uipota tẽi uyuca quisepecu pe, ãrei ipuere'ã. Ipitü reta yave, Tumpa umeet chupe reta mbaepuere. Jatangãtu ete reta uñerãro vaerã jare ombosi sundaro reta ambie ivi reta güi yugüeru uñerãro vaerã jae reta ndive vae. <sup>35</sup>Amocue cuña reta icuimbae uyeyucaca, jare Tumpa umbijecove ye güeru umanocue vae reta ipite güi, jae reta ipuere ye vaerã uyandareco cuña reta re. Īru vae reta uyeyucaca ivira pe. Uiporaraca chupe reta vae reta jei ipuere jecuae yugüireco cua ivi pe, uyapo yave jae reta jei chupe reta uyapo vaerã vae, ãrei uipota'ã reta. Echa'ã uicuaa Tumpa umbijecove yeta güeru umanocue vae reta ipite güi jare jayave icavi eteta chupe reta cua ivi pe jecuae yugüireco vae güi. <sup>36</sup>Īru vae reta uiporara ete uñereriroca jare uñenupaca chicote pe yave. Jare Īru vae reta uñeñonoca peresoriru pe jare uyepocuaaca joco pe. <sup>37</sup>Amocue vae jovaicho reta uyapi ita pe uyuca. Īru vae reta jovaicho reta uyasia icúa rupi sierra pe uyuca. Īru vae reta uiporara jovaicho reta jei yave ipuere jecuae yugüireco cua ivi pe, uyapo yave jae reta jei chupe reta uyapo vaerã vae. Īru vae reta uyeyucaca quisepecu pe. Amocue vae uguata opaete que rupi jare jemimonde co jae ovecha ipirecue ani capura ipirecue. Mbaeti etei mbae güinoi reta. Uiporara ete reta. Jovaicho reta uyapo icavi mbae vae chupe reta. <sup>38</sup>Jocua güirovia Tumpa vae reta uguataguata ñana reta rupi jare ivitu guasu reta rupi, jare yugüireco ivicua tuicha vae reta pe. Ivi pegua reta iyoa ete. Jáeramo ipuere'ã uicuaa icavi ete co jocua güirovia Tumpa vae reta.

<sup>39</sup>Opaete jocua reta umbiyerovia Tumpa ipurugüirovia re. Ërei Tumpa ume'e'ã chupe reta jei umeeta chupe reta vae. <sup>40</sup>Echa'ã Tumpa uicuaa yande ñanoita co mbae icavi ete umeeta chupe reta vae güi vae, agüiye vaerã jae reta uyembiasaca ete ndei yande yayembiasaca ete mbove.

### Yarovia catu Jesús yanembori vaerã

**12** <sup>1</sup>Jeta ete co güirovia Tumpa vae amimbeu peve vae reta. Jocua reta rupi yandepuere yaicuaa icavi co yandeve yarovia vaerã Tumpa. Jáeramo yamombo yandeyugüi opaete yanembaeyoa. Echa'ã mbaeyoa yanembiavai ete. Yamijaanga penti ñeñocui. Ñañeñocuiñocui yave, icavi co yamombo vaerã yandeyugüi opaete poi vae, jare yasi vaerã ñamiaguanta reve. Jae ramiño vi yaico yandepiaguasu reve cua ivi pe. Echa'ã Tumpa ume'e yandeve yaico vaerã cua pe. <sup>2</sup>Jare yarovia catu Jesús yanembori vaerã. Echa'ã Jesús ipurugüirovia tuicha ete opaete ñru vae reta ipurugüirovia güi. Jae tuicha urupia umano vaerã curusu re. Joco pe oĩ rambueve, ñru vae reta güirño, ñrei jae jei'ã mbae ave jocua re. Echa'ã uicuaa taicue rupi uyerovia catuta co. Añave uguapi oĩ Tumpa iyipi pe iyacata coti.

<sup>3</sup>Pepia pe piyemingueta Jesús re, quirãi iyoa vae reta icavi mbae vae jei yave icoti, jae umiaguanta. Echa'ã pepia pe piyemingueta yave jese, ndarau pecueri jare ndarau pepitu pepia pe. <sup>4</sup>Yepe tẽi piñerãro mbaeyoa ndive, ñrei ndeño piñerãro pemano vaerã. <sup>5-6</sup>Tumpa imiari peve penti tu imiari tai pe rami. Echa'ã Tumpa ñnee pe uyecuatía oĩ cuarãi:

“Cherai, agüiye ndepochi yandeYa uiporaraca ndeve yave agüiye vaerã ndeyoa,

jare agüiye ndecueri yandeYa umimbeu ndeve nembayoa yave.

Echa'ã yandeYa uiporaraca uau vae pe, agüiye vaerã iyoa.

Jucuarãi uiporaraca chupe, tairã uyapo yave.”

Jucuarãi uyecuatía oĩ. Aramoi pe reta peacañi jocua güi. <sup>7</sup>Pemiaguanta Tumpa jucuarãi uiporaraca peve yave. Echa'ã Tumpa jucuarãi uyapo, pe reta co jae tai reta ramo. Echa'ã tu reta uiporaraca tai pe jucuarãi. <sup>8</sup>Yaicuaa opaete tai reta uiporara jucuarãi. Jáeramo piporara'ã yave jucuarãi, pe reta jae'ã co tai ete reta. <sup>9</sup>Añete co, yanderu ivi pegua uiporaraca yandeve, agüiye vaerã yandeyoa, jare yaicuaa icavi co uyapo. Jáeramo agüiye etei yandepochi yandeRu ara pegua uiporaraca yandeve yave yaico vaerã icavi vae yayapo reve. <sup>10</sup>Echa'ã yanderu ivi pegua uiporaraca yandeve michi pegua jei vae rupiño. Ërei yandeRu ara pegua uiporaraca yandeve, agüiye vaerã yandeyoa. Cua icavi co yandeve. Echa'ã jae iyoa mbae vae co. <sup>11</sup>Añete co, yaiporara ñaĩ yave, yandepiatiti. Yayerovia'ã co. Ërei taicue rupi jocua yaiporara vae yanembori yayapo vaerã jupi vae yandepiacatu reve, ñamaeño yave Tumpa re yanemboe jese yaiporara vae rupi.



### Piyapisaca Tumpa jei vae re

<sup>12</sup>Jáeramo agüiye ma pecueri. Agüiye ma pepitu. <sup>13</sup>Piyapo jupi vae, agüiye vaerã ipitu vae opia Tumpa güi. Jucuarãi piyapo yave, pepuereta pembori ipitu vae ipirãta vaerã.

<sup>14</sup>Piñemiatangãtu pepiacatu vaerã opaete vae ndive, jare piñeño tee vaerã Tumpa peguarã. Echa'ã uñeño tee Tumpa peguarã vaeño ipuere uecha yandeYa Tumpa. <sup>15</sup>Jare piñemoa, agüiye vaerã quía uyerova Tumpa ipiacavi güi, jare agüiye vaerã pembipi piñemitarëi. Echa'ã piñemitarëi yave, piyembiavaita co jare jeta vae iyoata. <sup>16</sup>Jare piñemoa, agüiye vaerã oĩ pepite pe aguasa uyapo vae, jare agüiye vaerã oĩ quía güiriro uñeño tee Tumpa peguara vae. Esaú jucuarãi uyapo. Echa'ã Esaú umee tivi pe tembú re Tumpa umeeta tẽi Esaú pe vae. Echa'ã Tumpa umeeta tẽi co chupe, Esaú co jae Isaac tai tenondegua ramo. <sup>17</sup>Jare picuaa quirãi taicue rupi Esaú uipota tẽi güinoi Tumpa umeeta tẽi chupe vae. Ërei Isaac jei chupe ipuere'ã co güinoi. Yepe tẽi uyerure jese uyao reve, ërei ipuere'ã etei mbae uyapo. Tu jecuaeño jei chupe ipuere'ã co güinoi.

<sup>18</sup>Ërei pe reta mbaeti co Israel pegua ivitu guasu Sinaí iyipi pe ñugüinoi vae reta ramí. Echa'ã jocua ivitu guasu ivi pegua co. Israel pegua reta ipuere oya jocua ivitu guasu re. Jocua ivitu guasu re tata jendi oĩ. Pítumimbi oĩ jare ivitu ete joco pe. <sup>19</sup>Jare jae reta uyandu trompeta ñee jare Tumpa ñee. Jare Tumpa ñee uyandu ma yave, uyerure Moisés pe agüiye vaerã Tumpa uyemingueta ye chupe reta. <sup>20</sup>Echa'ã Tumpa oyocui reta cuarãi: “Penti maemimba upiro yave cua ivitu guasu re, piyapita co ita pe piyuca.” Cua mboroyocui yavai ete Israel pegua reta pe. <sup>21</sup>Opaete vae uquiye ete uecha vae jeco pegua. Jare Moisés etei jei cuarãi: “Aquiye ete. Ariri ete aquiye ramo.” Jucuarãi jei.

<sup>22</sup>Ërei pe reta peya ma ivitu guasu Sión re. Joco pe oĩ Tumpa imeño mai ico vae jenta guasu. Jae co Jerusalén ara pegua. Joco pe ñugüinoi vi jeta ete ángel reta. <sup>23</sup>Joco pe ñugüinoi vi opaete Tumpa uiparavo tecove ipiau vae güinoi vaerã vae reta. Echa'ã Tumpa uicuatía jae reta jee ara pe. Opaete vae uyembati joco pe. Jare joco pe oĩ vi Tumpa - jae uãata opaete vae. Jare joco pe ñugüinoi vi jupi vae reta iespíritu. Jae reta uyembiasaca ete ma. <sup>24</sup>Jare joco pe oĩ vi Jesús. Echa'ã Jesús rupi ñanoi trato ipiau vae. Jare joco pe oĩ vi Jesús jugüi jae yanderipi pipe vae. Jocua tugüi icavi ete tugüi Abel mbae uipi pipe vae güi.

<sup>25</sup>Tumpa pemingueta oĩ. Piñemoa piyapo vaerã jae jei peve piyapo vaerã vae. Israel pegua reta uiporara uyapo'ã Tumpa ivi pe jei chupe reta uyapo vaerã vae ramo. Jae ramiño vi yande yaiporara eteta, yayapo'ã yave Tumpa jei yandeve yayapo vaerã vae. Echa'ã añave Tumpa umingueta oĩ ara güi. <sup>26</sup>Tumpa ivi pe umingueta yave, ñee umicãta ivi. Ërei añave jei cuarãi: “Tamicãta penti vese ye ivi jare ara.” Jucuarãi jei. <sup>27</sup>Jare cua penti vese ye jei vae uipota jei Tumpa umbaita co umicãta vae reta. Echa'ã Tumpa etei uyapo jocua reta. Jucuarãi uyapota Tumpa jecuaeño ñugüinoi vaerã ipuere'ã uñemicãta vae reta.



<sup>28</sup>Jare Tumpa umee yandeve yaico vaerã iporoyocua pe, jare iporoyocua ipuere'ã uñemicãta. Jáeramo ñamee yasurupai Tumpa pe ipiacavi re. Echa'ã Tumpa ipiacavi rupi yandepuere yayeyocui chupe, jare jucuarãi yambiyerovia. Jecuaeño yayeyocui chupe yambiadora jare yaipiũ reve. <sup>29</sup>Echa'ã Tumpa co jae penti tata opaete mbaembae uapi vae rami.

### Quirãi pemiyyerovia Tumpa

**13** <sup>1</sup>Cherivi reta, jecuaeño piyerau. <sup>2</sup>Jecuaeño pequirẽi pemingaru vaerã mboupa reta. Echa'ã jucuarãi amocue vae umingaru ángel reta uicuaa mbae reve. <sup>3</sup>Jecuaeño pemandúa peresoriru pe ñugüinoi vae reta re, pemanduata tẽi co jese reta jae reta ndive peĩ yave rami. Amocue vae uiporara ñugüinoi ñru vae reta uyapo icavi mbae vae chupe reta ramo. Pemandúa vi jese reta. Echa'ã pe reta vi pico cua ivi pe, jare aramoi ñru vae reta uiporaracata peve vi jucuarãi.

<sup>4</sup>Umenda vae reta jecuaeño tuyapo jupi vae güireco vae coti. Agüiye quía tuyuvanga menda re. Echa'ã Tumpa uãata aguasa uyapo vae reta jare menda re uyuvanga vae reta.

<sup>5</sup>Agüiye pico jecuaeño jeta corepoti pipota ete reve. Pemee yasurupai Tumpa pe mbaembae penoi vae re. Agüiye piñemiro ñru vae pe jeta'ã mbaembae penoi ramo. Echa'ã Tumpa etei jei cuarãi: “Jecuaeño aicota nde ndive nombori vaerã.” Jucuarãi jei. <sup>6</sup>Jáeramo yandepuere yae yaquiyie mbae reve cuarãi:

“YandeYa chembori.

Ndarau aquiye mbae güi.

Ñru vae reta ndarau ipuere mbae uyapo cheve cheminguiye vaerã.” Jucuarãi yandepuere yae.

<sup>7</sup>Piyapisaca cavi petenondegua reta iñee re. Echa'ã jae reta umimbeu peve Tumpa iñee. Pepurugüirovia jae reta upurugüirovia rami. Echa'ã picuaa quirãi jae reta yugüireco umbiadoraca vaerã Tumpa. <sup>8</sup>Jesucristo uyepepica'ã etei. Iyipi güiye jare jaeño mai pegua uyepepica'ã. <sup>9</sup>Ime amocue moromboe uyuavi vae ore ndoporomboe'ã jese vae. Agüiye perovia jocua nunga moromboe. Echa'ã perovia yave, pepiata Tumpa güi. Icavi co ñañemimirãta vaerã yandepurugüirovia re Tumpa ipiacavi rupi. Ndarau yandepuere ñañemimirãta yandepurugüirovia re mboroyocui reta tembú regua rupi. Echa'ã ñru vae reta uipota tẽi uñemimirãta ipurugüirovia re jocua rupi, ãrei ipuere'ã.

<sup>10</sup>Israel pegua reta jou maemimba uyeyucacue isoo Tumpa jo ivi pegua pe uñemeearendã pe. Yande vi ñanoi jocua maemimba uyeyucacue uñemeearendã rami vae, jare jae reta ipuere'ã uñemĩru yande ndive joco pe. <sup>11</sup>Echa'ã sacerdote tenondegua güiraa maemimba uyeyucacue reta jugüi Lugar Santísimo japipe pe Israel pegua reta imbaeyoa reta re. Jayave ñru vae reta güiraa maemimba uyeyucacue reta isoo tenta reta güi ñana pe uapi. <sup>12</sup>Jáeramo Jesús

vi umano uiporara reve tenta guasu güi ñana pe, ñaneñono tee vaerã Tumpa peguardã jae jugüi rupi. <sup>13</sup>Jáeramo yaeya yandeyugüi yandereco mai indechicue vae jare yaya Jesucristo re, yepe tẽi ñru vae reta ñanererĩro güirĩro Jesús rami. <sup>14</sup>Echa'ã mbaeti ñanoi penti tenta guasu jaeño mai pegua oĩ vae cua ivi pe. Ërei ñãaro ñãj jocua tenta guasu oĩta vae. <sup>15</sup>Jáeramo jecuaeño yambiadora Tumpa Jesús rupi, yambiyerovia vaerã Tumpa. Cua uipota jei ñanemiari yave ñru vae reta pe, yamimbeu chupe reta Tumpa regua. <sup>16</sup>Ërei agüiye ñaneatẽi yayapo vaerã icavi vae jare ñamee vaerã mbaembae iparavete vae reta pe. Echa'ã cua yayapo yave, yambiyerovia Tumpa.

<sup>17</sup>Piyapısaca cavi petenondegua reta ñnee re jare piyapo jae reta jei peve piyapo vaerã vae. Echa'ã jae reta uyandareco oĩ perecove re, jare uicuaa Tumpa uãata co iparaviqui re. Jucuarãi piyapo yave, jae reta uparaviquita Tumpa pe uyerovia reve, ipiatiti mbae reve. Echa'ã ipiatiti reve uparaviqui yave Tumpa pe, ndarau icavi peve.

<sup>18</sup>Piyerure Tumpa pe oreré. Echa'ã nduicuaa jecuaeño nduyapo icavi vae pecoti. Jecuaeño nduipota nduyapo jupi vae. <sup>19</sup>Jare che pumiñera ete piyerure vaerã Tumpa pe, jae chemondo ye vaerã imambae pepi.

### **Tumpa ndiveño toĩ**

<sup>20</sup>Añave ayerure Tumpa mbiacatu umee yandevae vae pe peré. YandeYa Jesús imbaepuere tuicha ete co, jare jae uyandareco yanderé penti ovecha reta iyandarecoa iovecha reta re uyandareco rami. YandeYa Jesús umano, Tumpa ipuere vaerã umee yandevae itrato opa mbae vae. Jáeramo Tumpa umbijecove ye güeru umanocue vae reta ipite güi. <sup>21</sup>Tumpa tuparaviqui pepia pe, piyapo vaerã icavi vae, jare jucuarãi piyapo vaerã jei vae. Tumpa tuparaviqui pepia pe Jesucristo rupi, pe reta piyapo vaerã jocua umbiyerovia Tumpa vae. Jesucristo tuyembidoraca jaeño mai pegua. Amén.

<sup>22</sup>Cherivi reta, che pumiñera pepiaguasu vaerã cua che jae peve piyapo vaerã vae re. Echa'ã mboviño aicutatía peve cua tupapire pe. <sup>23</sup>Tamimbeu peve cua: Yanderivi Timoteo oẽ ma peresoriru güi. Aramoi jae oota imambae pepi. Jare che aata jae jupíe.

<sup>24</sup>Tumpa ndiveño toĩ opaete petenondegua reta jare opaete ñru Tumpa oñono tee iyupeguarã vae reta. Italia pegua reta vi jei peve Tumpa ndiveño peĩ.

<sup>25</sup>Tumpa tumee opaete peve ipiacavi. Amén.

# LA CARTA DE SANTIAGO

---

**1** <sup>1</sup>Che co jae Santiago. Che co jae Tumpa jare yandeYa Jesucristo jembiocui. Aicutía aĩ cua tupapire doce ati Israel pegua uñemiai ñugüinoi vae reta pe. Tumpa ndiveño peĩ.

## Aracuaa Tumpa umee vae

<sup>2</sup>Cherivi reta, amo pe yavai ete peve pico cavi vaerã Tumpa coti. Ërei jucuarãi yave, piyerovia eteño. <sup>3</sup>Echa'ã picuaa co quirãi mbaembae pemiavai vae uicuaaca peve ipirãta co pepurugüirovia. Jare cua picuaa yave, pepiaguasu ucuacuaa. <sup>4</sup>Ërei pemaño pepiaguasu re ucuacuaa cavi vaerã, pepiaguasu ete vaerã. Jucuarãi yave, ndarau mbae uata peve. Piyeyocui cavita Tumpa pe. <sup>5</sup>Ime yave quía aracuaa uata chupe vae, tuyerure Tumpa pe jese. Echa'ã Tumpa uipota ete umee aracuaa penti penti pe. Ndarau uñengata quía pe mbaeti aracuaa güinoi ramo. Umeeta co aracuaa chupe. <sup>6</sup>Ërei tuyerure Tumpa pe jese mburugüirovia reve. Agüiye tuyerure chupe jese mburugüirovia mbae reve. Echa'ã uyerure chupe jese mburugüirovia mbae reve vae iaparoa i guasu pe oĩ vae rami co. Echa'ã ivitu uyepeyu yave, coti coti güiraa. <sup>7</sup>Jocua uyerure yandeYa Tumpa pe aracuaa re mburugüirovia mbae reve vae agüiye ipia pe tuyemingueta Tumpa umeeta co mbae chupe. <sup>8</sup>Echa'ã yepe tẽi uyerure Tumpa pe mbae re, ãrei güirovia'ã Tumpa umeeta co chupe. Jocua nunga uicuaa'ã etei mbae uyapo vaerã. <sup>9</sup>Penti upurugüirovia vae iparavete vae tuyerovia jeta Tumpa umee chupe vae re. <sup>10</sup>Ërei upurugüirovia vae icocatu vae tuyerovia Tumpa umimichi ramo. Echa'ã yepe tẽi icocatu, ãrei umanota co penti mbaepoti umano rami. <sup>11</sup>Guarasi jasi yave jare ivitu jacu ou yave, ñana ipiru jare mbaepoti reta umano. Ipõra'ã ma. Jae ramiño vi icocatu vae aramoiño umanota.

## Ipiaguasu vae uicuaata ipurugüirovia ipirãta co

<sup>12</sup>Tuyerovia ipiaguasu vae jocua mbaembae umbiavai vae ou chupe yave. Echa'ã uicuaata ipurugüirovia ipirãta co jare uñemeeta chupe tecove opa mbae vae. Echa'ã yandeYa jei umee vaerã tecove opa mbae vae opaete

uau vae reta pe. <sup>13</sup>Ime yave quía yavai ete chupe ico cavi vaerã Tumpa coti vae, jare jocua jeco pegua uipota yave uyapo mbaeyoa, agüiye tei: “Tumpa uipota ayapo vaerã mbaeyoa.” Echa'ã Tumpa uipota'ã etei uyapo mbaeyoa. Jae ramiño vi uipota'ã etei quía uyapo vaerã mbaeyoa. <sup>14</sup>Ërei penti penti ipiyemingqueta icavi mbae vae rupi uipota uyapo mbaeyoa. Echa'ã jocua mbaeyoa icavi echa chupe uyapo vaerã. <sup>15</sup>Ipiyemingqueta icavi mbae vae reta uyapoca mbaeyoa reta. Jare taicue rupi mbaeyoa upuruyuca.

<sup>16</sup>Agüiye petavi, cherivi reta aau vae. <sup>17</sup>Tumpa umee mbaembae yandeve ipiacavi ramo, jare opaete umee yandeve vae icavi ete co. Jae uyapo tembipe jare uyepepica'ã etei. Jecuaño ipiacavi yandeve. <sup>18</sup>Tumpa uipota ramo, yandeapo tai retarã ñee añete vae rupi, ñaneño tee vaerã iyupeguarã, mbae yagüiye vae reta tenondegua vae Tumpa pe uñeño tee rami.

### Piyapo ñee piyapisaca jese vae

<sup>19</sup>Jáeramo, cherivi reta aau vae, penti penti tuiporta ete tuyapisaca, agüiye tiñee rai, agüiye tipochi rai. <sup>20</sup>Echa'ã pochí vae ndarau uyapo jupi vae Tumpa uipota tēi uyapo vaerã vae. <sup>21</sup>Jáeramo peeya opaete pichii vae jare opaete icavi mbae vae. Jare perovia piñemimichi reve ñee pepia pe uñeño vae. Echa'ã jucuarã yave, piyembiasacata co.

<sup>22</sup>Ërei piyapo ñee piyapisaca jese vae. Agüiye piyapisacaiño jese. Echa'ã piyapisacaiño yave ñee re, piyembitaviño co pei. <sup>23</sup>Ime yave quía ñee uyapisaca jese vae uyapo'ã vae - uyapisacaiño jese - jae co espejo pe umae iyee vae rami. <sup>24</sup>Yepe tēi umae ma iyee, Ërei joco güi oo rupive ñacañi uyeecha vae güi. <sup>25</sup>Ërei ime yave quía jecuaño mboroyocui icavi ete vae oporoyora vae re uyapisaca cavi vae, ñacañi'ã yave uyapo vaerã mboroyocui jei vae uyapisaca jese yave, Tumpa umivendiseta uyapo ramo.

<sup>26</sup>Ime yave quía mbaembae uyapo vae rupi Tumpa pe uyeyocui echa vae, tuñemoa cavi mbae jei vae re. Echa'ã uñemoa cavi'ã yave mbae jei vae re, uyembitavi co oĩ, jare mbaembae uyapo vae umbiyerovia'ã etei Tumpa. <sup>27</sup>Añetete yaipota yave yayapo mbaembae yayeyocui vaerã yandeRu Tumpa pe, yaa yapou tirēi reta jare cuña ime umano vae reta uiporara ñugüinoi vae ipi, jare agüiye yayapo icavi mbae vae upurugüirovia mbae vae reta uyapo vae.

### Icocatú vae reta jare iparavete vae reta

**2** <sup>1</sup>Cherivi reta, pe reta perovia yandeYa Jesucristo re. Jae uyembiadoraca ma. Jáeramo agüiye piparavo pipü vaerã icocatú vae reta jare perĩro vaerã iparavete vae reta. <sup>2</sup>Aramoi uiqueta piyembatia pe cuimbae icocatú vae jare cuimbae iparavete vae. Cuimbae icocatú vae jemimonde ipõra ete jare güinoi ipoãcaregua oro pegua vae. Ërei cuimbae iparavete vae jemimonde indechi ete. <sup>3</sup>Pemae cavi yave jemimonde ipõra ete vae re jare pere yave chupe: “Eguapi cua pe. Cua tenda icavi co”; jare pere yave iparavete vae pe: “Iyemboi joco pe”; ani: “Eguapi ivi pe”, <sup>4</sup>pipü

co peĩ jocua icocatu vae jare perĩro co peĩ iparavete vae. Icavi'ã jucuarãi pepuruyapo vaerã. Icavi mbae co pepia pe piyemingueta.

<sup>5</sup>Piyapisaca cheré, cherivĩ reta aau vae. Tumpa uiparavo iparavete vae reta icocatu vaerã ipurugüirovia re jare güinoi vaerã imbaerã iporoyocua pe. Echa'ã jocua Tumpa jei umeeta opaete uau vae reta pe. <sup>6</sup>Èrei pe reta perĩro iparavete vae reta. Picuaa co quirãi icocatu vae reta uyembiiya pemaembae re jare uñeapo peré. <sup>7</sup>Tumpa peparavo Jesucristo jee re. Èrei picuaa co quirãi icocatu vae reta jei icavi mbae vae jocua tee icavi vae coti.

<sup>8</sup>Tumpa iñee pe uyecuatía oĩ cuarãi: “Eau nderapicha nde ndiyerau rami.” Cua co jae mboroyocui Tumpa iporoyocua pegua. Piyapo yave cua mboroyocui, piyapo co icavi vae. <sup>9</sup>Èrei piparavo yave pipiu vaerã icocatu vae reta jare perĩro vaerã iparavete vae reta, piyapo mbaeyoa. Echa'ã mboroyocui uicuaaca peve piyavi co mboroyocui. <sup>10</sup>Ime yave quía opaete mboroyocui jei vae uyapo cavi vae, penti uyavi yave, uyavi ma opaete mboroyocui. <sup>11</sup>Mboroyocui pe uyecuatía oĩ cuarãi: “Agüiye iyuvanga menda re.” Èrei jae ramiño vi uyecuatía oĩ cuarãi: “Agüiye epuruyuca.” Aramoi nde ndiyuvanga'ã menda re. Èrei ndepuruyuca yave, ndiyavi ma mboroyocui. <sup>12</sup>Tumpa perãata mboroyocui oporoyora vae rupi. Jáeramo piyemingueta cavi jare piyapo icavi vae. <sup>13</sup>Echa'ã ime yave quía uiparareco'ã japicha vae, Tumpa uãata uiparareco mbae reve, yepe tẽi Tumpa upuruparareco uyerovia reve upuruãa yave.

### Mburugüirovia jare mboroyocui jei vae

<sup>14</sup>Cherivĩ reta, aramoi quía jei güinoi co mburugüirovia, èrei uyapo'ã mboroyocui jei vae. Jucuarãi yave, ipurugüirovia mbae'ã co. Ndarau uyembiasaca ipurugüirovia rupi. <sup>15</sup>Aramoi penti perivĩ ani penti perindi mbaeti güinoi jemimonderã jare jembiurã. <sup>16</sup>Pere yave chupe: “Tumpa reño ecua”, èrei pemee'ã yave chupe mbaembae uata chupe vae, jocua pere vae mbae'ã co. <sup>17</sup>Jae ramiño vi piyapo'ã yave mboroyocui jei vae, jaeño mburugüirovia penoi, jare jocua mbae'ã co.

<sup>18</sup>Aramoi quía jeita: “Nde ndere neno co mburugüirovia jare che jae ayapo mboroyocui jei vae.” Nde ndepuere'ã ndicuaaca cheve ndepurugüirovia. Echa'ã ndiyapo'ã mboroyocui jei vae. Èrei che aicuaacata ndeve chepurugüirovia mboroyocui jei vae ayapo vae rupi. <sup>19</sup>Nde nderovia ime co pentiño Tumpa. Icavi co jocua nderovia vaerã. Èrei añã reta vi güirovia jocua. Èrei jae reta urirĩ uquiye ramo. <sup>20</sup>Nde co jae iyaracuaa mbae vae. ¿Ndipota pa aicuaaca vaerã ndeve quirãi ndepurugüirovia mbae'ã co, ndiyapo'ã yave mboroyocui jei vae? <sup>21</sup>Nemandúa yandetenondegua Abraham re. Jae uyembujupica uyapo vae re, umee tai Isaac Tumpa pe uñemearendã pe yave. <sup>22</sup>Ndepuere ndicuaa quirãi Abraham ipurugüirovia uyapoca chupe Tumpa jei chupe uyapo vaerã vae. Abraham uyapo vae uicuaaca icavi ete co ipurugüirovia. <sup>23</sup>Jare uyeyapo Tumpa iñee pe uyecuatía oĩ vae. Echa'ã uyecuatía oĩ cuarãi: “Abraham güirovia Tumpa, jare Tumpa

umbujupi ipurugüirovia jeco pegua. Jare Abraham uyembijee Tumpa iamigo pe.” Jucuarãi uyecuatía oĩ. <sup>24</sup>Jáeramo pepuere picuaa quirãi Tumpa umbujupi mboroyocui jei vae uyapo vae. Umbujupi'ã mburugüiroviaño güinoi vae.

<sup>25</sup>Jae ramiño Rahab aguasa rupi ico vae uyembujupica uyapo vae re, Israel pegua reta Josué omondo vae re umaeño upita vaerã jenta pe yave jare omondo ye ambie tape rupi yave.

<sup>26</sup>Penti jete tecove mbaeti güinoi vae umano ma co. Jae ramiño vi ndepurugüirovia mbae'ã co, ndiyapo'ã yave mboroyocui jei vae.

### Ñanecū

**3** <sup>1</sup>Cherivi reta, agüiye pipota opaete piyeyapo vaerã oporombocoe vae retarã. Echa'ã picuaa quirãi oporombocoe vae reta uyavi yave, uyembijeco ete ñru vae reta güi. <sup>2</sup>Echa'ã yande opaete yayavi. Ime yave quía uyavi'ã jei vae re vae, jae icavi ete co. Jocua nunga güinoi mbaepuere opaete jete re.

<sup>3</sup>Mase, ñañoño cavayu reta iyuru pegua iyuru pe, jae reta yugüiraa vaerã yaipota vae coti. Jucuarãi yandepuere yarovarova cavayu reta. <sup>4</sup>Jae ramiño vi yepe tẽi chalana guasu reta tuicha ete jare yepe tẽi amo pe ivitu tanta vae güiraa i guasu rupi, yepe tẽi chalana guasu itimón michi ete, ãrei pipe chalana guasu uruguata vae ipuere güirovarova chalana guasu jae uipota vae coti. <sup>5</sup>Jae ramiño vi ñanecū michi co, ãrei pipe yandepuere yayembicate ete.

Penti tata michi ete jendi vae ipuere uapi ñuu guasu. <sup>6</sup>Jare ñanecū penti tata rami co. Uyapoca jeta ete icavi mbae vae. Yepe tẽi yanderete pegua co, ãrei uyapo icavi mbae vae opaete yanderete pegua pe. Echa'ã tata mbaembae uapi rami, ñanecū uyapoca yandeve icavi mbae vae. Jare cua icavi mbae vae ou cañitei güi etei. <sup>7</sup>Ivi pegua reta umimaso ma ipotave maemimba reta, jare güira reta, jare mboi reta, jare jevae i rupigua reta. Güinoi reta mbaepuere umimaso vaerã. <sup>8</sup>Ërei yandepuere'ã etei ñamimaso ñanecū. Yandepuere'ã jese. Jecuaeño uyapoca yandeve jeta ete icavi mbae vae. Imbayachi ete vae rami co. <sup>9</sup>Ñanecū pe yambiadora yandeRu Tumpa. Jae ramiño vi ñanecū pe yayepipeyu ñru vae reta re, yepe tẽi Tumpa uyapo reta jae etei rami. <sup>10</sup>Ñanecū pe yambiadora Tumpa jare yayepipeyu ñru vae reta re. Cherivi reta, icavi'ã yayapo vaerã cuarã. <sup>11</sup>I icavi vae jare i iro vae ipuere'ã etei oẽ penti icua i oẽ vae güiño. <sup>12</sup>Iva ipuere'ã etei umee saini reta. Jae ramiño vi uva ipuere'ã etei umee iva reta. Jae ramiño vi penti icua i oẽ vae ipuere'ã etei umee i icavi vae jare i iro vae.

### Piyerure Tumpa pe aracuaa re

<sup>13</sup>Ime yave quía pepite pe iyaracuaa vae, tuico cavi. Jucuarãi yave, icavi vae uyapo vae uicuaacata quirãi iyaracuaa co uñemimichi reve.

<sup>14</sup>Ërei peacatãa yave ñru vae reta re jare pepochi yave chupe reta, agüiye piyembicate. Echa'ã piyembicate yave, peapu co. Piyapo'ã peĩ añete vae rupi. <sup>15</sup>Jucuarãi piyapo yave, piyerure'ã peĩ Tumpa pe umee vaerã peve aracuaa. Pico upurugüirovia mbae vae reta yugüireco rami. Pico pere vae

reño. Pico aña reta yugüireco rami. <sup>16</sup>Echa'ã peacataã yave ñru vae reta re jare pepochi yave chupe reta, piñerãrota uyupii jare piyapota opaete mbae icavi mbae vae. <sup>17</sup>Ërei piyerure yave Tumpa pe umee vaerã peve aracuaa, ndarau piyapo pichĩ vae. Pepiacatuta co. Pepiaguasuta co. Piyapota co Tumpa uipota piyapo vaerã vae. Pipararecota co opaete vae. Pepiacavita co. Pepirãta co pepurugüirovia re. Ndarau pepurumbitavi. <sup>18</sup>Pe reta penoi yave mbiacatu, pico pepiacatu reve. Jucuarãi yave, piyapota jupi vae.

### Cua ivi pegua iamigo oyovaicho Tumpa ndive

**4** <sup>1</sup>¿Maera pa piñerãro uyupii? Tamimbeu peve. Piñerãro uyupii, ime ñugüinoi icavi mbae vae pepia pe ramo. <sup>2</sup>Pipota tẽi mbaembae, ãrei penoi'ã. Pepuruyuca jare jecuae pipota tẽi mbaembae, ãrei pepuere'ã penoi. Piñerãro uyupii. Ërei penoi'ã, piyerure'ã Tumpa pe jese ramo. <sup>3</sup>Piyerure tẽi mbaembae re Tumpa pe, ãrei jae umee'ã peve. Piyerure cavi'ã. Echa'ã piyerure mbaembae re piporu vaerã pepia jei vae reño. <sup>4</sup>Pe reta menda re uyuvanga vae reta rami co. ¿Picuaa'ã pa quirãi cua ivi pegua iamigo oyovaicho Tumpa ndive? Jáeramo pipota yave piyeyapo ivi pegua iamigorã, piyeyapota co Tumpa jovaichorã. <sup>5</sup>Añete vae co cua Tumpa ñnee pe uyecuatía oĩ vae: “Espíritu Santo yandepia pe ico vae yanderau ete.” Jucuarãi uyecuatía oĩ. <sup>6</sup>Ërei Espiritu Santo umee yandeve jeta ete ipiacavi. Echa'ã Tumpa ñnee pe uyecuatía oĩ cuarãi: “Tumpa oyovaicho uyembicate vae reta ndive. Ërei umee ipiacavi uñemimichi vae reta pe.” Jucuarãi uyecuatía oĩ.

<sup>7</sup>Jáeramo piyapo Tumpa uipota piyapo vaerã vae. Piñerãro aña guasu ndive, jare jae osita pegüi. <sup>8</sup>Peya Tumpa re jare Tumpa oyata peré. Pe reta co jae iyoa vae reta. Agüiye ma piyapo pichĩ vae. Piyoe pepia agüiye vaerã penoi pepiyamingueta icavi mbae vae. <sup>9</sup>Pepiatiti jare piyao. Pepiatiti pepuca vaerãve. Pepiatiti piyerovia vaerãve. <sup>10</sup>Piñemimichi yandeYa jovai, jare jae pemptuichacata.

### Agüiye pere icavi mbae vae uyucoti

<sup>11</sup>Cherivi reta, agüiye pere icavi mbae vae uyucoti. Ime yave quía jei icavi mbae vae tiví coti vae, uãa co oĩ tiví. Jocua nunga jei oĩ icavi mbae vae mboroyocui coti jare uãa co oĩ mboroyocui. Ërei neãa yave mboroyocui, ndiyapo'ã mboroyocui jei vae. Jaeño neãa mboroyocui. <sup>12</sup>Jaeño Tumpa umee mboroyocui jare ipuere upuruãa. Jae ipuere upurumbiasa jare ipuere upurumbai. Nde ndepuere'ã etei ndepuruãa.

### Picuaa'ã mbae ra uyeyapota piareve pe

<sup>13</sup>Piyapisaca michi pegua cua re. Echa'ã pe reta pere cuarãi: “Añave ani curiye yaata jocua tenta guasu pe, jare yaicota joco pe penti año pegua. Yaguata mbaembae jare ñameeta mbaembae ñamingana vaerã corepoti.” Jucuarãi pere. <sup>14</sup>Ërei pe reta picuaa'ã mbae ra uyeyapota piareve pe. Picuaa'ã imeñota ra peĩ piareve pe. Echa'ã perecove ivĩti rami co. Uyecuaa

michi peguaño. Jayave imambae mbaeti ma oĩ. <sup>15</sup>Jáeramo pereta tēi cuarāi: “YandeYa uipota yave, yaicota joco pe jare yayapota jocua jocua.” Jucuarāi pereta tēi. <sup>16</sup>Pere'ã yave jucuarāi, piyembicate co peĩ pe reta etei piyapota vae re. Jare jucuarāi piyembicate yave, piyapo icavi mbae vae.

<sup>17</sup>Jáeramo picuaa yave mbae icavi piyapo vaerã vae, piyapo'ã yave, peyoa co.

#### Icocatu vae icavi mbae vae uyapo vae reta

**5** <sup>1</sup>Piyapisaca michi pegua, picocatu vae reta. Piporara eteta co. Jáeramo piyao pesapicai reve. <sup>2</sup>Jeta ete penoi vae jepita'ã mbae ave, jare cupii reta urucumeguata peremimonde ipõra ete vae reta. <sup>3</sup>Oro jare corepoti penoi vae opata iyuquiri. Jare jocua uicuaacata pe reta piyapo co icavi mbae vae. Jáeramo piporarata co, tata yanderapi yave yaiporara rami. Picocatu co. Ërei ndarau penoi ara reta piyerovia vaerã jeta ete penoi vae re. <sup>4</sup>Mase, uparaviqui peve vae reta umbaeviro peco reta pe, ërei pembiepi'ã chupe reta. Jae reta iñeengueta peve. Jare yandeYa uyandu ma quirāi iñeengueta peve jocua umbaeviro vae reta. <sup>5</sup>Cua ivi pe pico rambueve, piyecou tembũ icavi vae pe jare piporu pecorepoti piyapo vaerã jeta icavi mbae vae. Piyeminguirã ma co. Ërei imambae pemanota. <sup>6</sup>Pe reta pembijeco jocua jupi vae jare piyuca vi. Jare jae ipuere'ã uyerepi pegüi.

#### Pepiaguasu jare piyerure Tumpa pe

<sup>7</sup>Jáeramo, cherivi reta, pepiaguasu yandeYa ou ye regua. Tamijaanga umaeti vae. Umaeti yave, uãro ima güinoi vaerã mbaeviro. Ipiaguasu ete. Echa'ã oquiñoi yave, temiti ucuacuaa jare yagüiye. <sup>8</sup>Jae ramiño vi pe reta pepiaguasu. Jecuaeño piñemiatangātu. Echa'ã uyaro ma yandeYa ou ye vaerã.

<sup>9</sup>Agüiye piñeenguru piyupe, cherivi reta. Echa'ã piñeenguru yave piyupe, piyembijecota. Echa'ã upuruãa vae imambae outa uvãe. <sup>10</sup>Cherivi reta, pemandúa Tumpa iñee aracae umimbeu vae reta re. Jae reta imiari ñru vae reta pe yandeYa jee re. Jae reta uicuaaca yandevẽ quirāi yaiporara yave, icavi co ñamiaguanta vaerã yandepiaguasu reve. <sup>11</sup>Añete co, yande yae uyerovia ma co jucuarāi umiaguanta vae reta. Picuaa co quirāi Job ipiaguasu ete, jare quirāi yandeYa umivendise ete taicue rupi. Echa'ã yandeYa yanderau jare yandeparareco ete.

<sup>12</sup>Ërei, cherivi reta, agüiye mbae pere ara jee re ani ivi jee re ani mbae jee re ave. Pere “añete co” ani “añete'ã co.” Uasa pere yave, peyoata co jare Tumpa perãata co.

<sup>13</sup>Ime yave quía pepite pe uyemipia'ã oĩ vae, tuyerure Tumpa pe. Ime yave quía pepite pe uyerovia vae, tumbiadora Tumpa canta pe. <sup>14</sup>Ime yave quía pepite pe imbaerasi vae, tueni upurugüirovia vae reta itenondegua reta. Jayave jae reta toñoño aceite imbaerasi vae re yandeYa jee re, jare tuyerure Tumpa pe jese. <sup>15</sup>Jare mburugüirovia reve uyerure reta yave, imbaerasi vae ucuerata. Echa'ã yandeYa umbigüerata. Jare imbaerasi vae uyapo yave mbaeyoa reta, Tumpa umbiasata



chupe. <sup>16</sup>Peyoa yave uyucoti, pemimbeu piyupe. Jayave piyerure piyee Tumpa pe, Tumpa pembigüera vaerã. Penti jupi vae uyerure yave ipia reve, Tumpa uyapota jeta ete chupe. <sup>17</sup>Elías co jae penti ivi pegua yande rami. Ërei jae uyerure ipia reve Tumpa pe agüiye vaerã oqui. Jare oqui'ã etei mbapi año jare seis yasi. <sup>18</sup>Jayave Elías uyerure ye Tumpa pe jare uyembipi oqui jare temiti ucuacuaa ye.

<sup>19</sup>Cherivi reta, ime yave quía pepite pe añete vae güi opia vae, jare ñru vae ombori yave umiñatima ye vaerã añete vae pe, <sup>20</sup>picuaa cua: Jocua oporombori vae uepi opia vae jecove mano güi, jare jucuarãi ombori ramo, Tumpa umbiasata opia vae pe opaete imbaeyoa.

# PRIMERA CARTA DEL APOSTOL SAN PEDRO

---

**1** <sup>1</sup>Che co jae Pedro. Che co jae Jesucristo jemimondo. Aicutatía aĩ cua tupapire opaete Israel pegua Ponto jare Galacia jare Capadocia jare Asia jare Bitinia rupi uñemiai vae reta pe. <sup>2</sup>YandeRu Tumpa peparavo jare ndei ivi uyeyapo mbove uicuaa pe reta piyeyapota co tai retarã. Jare Espíritu Santo peñoño tee Tumpa peguarã. Oyoe ma pepia Jesucristo jugüi pe. Jáeramo añave piyapo Tumpa uipota piyapo vaerã vae. Tumpa tumee peve jeta ete ipiacavi jare ipiacatu.

## Ñããro ñãñ yayerovia reve

<sup>3</sup>Tuyembiaadoraca Tumpa. Jae co yandeYa Jesucristo Tu. Jae yandeparareco ete. Jáeramo yandeyapo tai retarã. Jare Jesucristo icove ye ou umanocue vae reta ipite güi ramo, añave ñããro ñãñ yayerovia reve. <sup>4</sup>Tumpa uñuvatu ma peve ara pe pembaerã. Jocua icavi ete co. Ipuere'ã etei uyepepica jare ndarau etei opa. <sup>5</sup>Jare imbaepuere pe Tumpa uyandareco oĩ peré perovia jese ramo. Jáeramo piyembiasacata. Cua uyecuaata ara taicuegua reta pe.

<sup>6</sup>Jáeramo piyerovia ete cua re, yepe tẽi aramoi añave michi pegua pepiatiti mbaembae yavai peve vae jeco pegua. <sup>7</sup>Echa'ã cua mbaembae yavai peve vae uicuaacata peve ipirãta ra pepurugüirovia. Oro yambichiriri tata pe, yandepuere vaerã yamombo chugüi iquiacue, ipõra ete oĩ vaerã oro, yepe tẽi oro opata. Jae ramiño vi Tumpa uipota ipirãta ete vaerã pepurugüirovia. Echa'ã pepurugüirovia icavi ete Tumpa pe oro güi. Jare pepurugüirovia ipirãta yave, piyembutuichaca eteta co Jesucristo uyecuaa ye yave. <sup>8</sup>Yepe tẽi peecha'ã Jesucristo, ãrei peau. Yepe tẽi añave peecha'ã, ãrei perovia jese. Jáeramo piyerovia ete. Tumpa etei umee peve cua yerovia, jare yavai pemimbeu cavi vaerã ñru vae reta pe cua yerovia regua. <sup>9</sup>Jare perovia Jesucristo re ramo, Tumpa umeeta peve piyembiasaca vaerã.

<sup>10</sup>Tumpa iñee aracae umimbeu vae reta uicutatía mbiacavi Tumpa umeeta peve vae re. Jae reta uipota ete uicuaa yembiasa uñemeeta peve vae regua, jare upirandu ete uyupe jese. <sup>11</sup>Cristo iEspíritu ico jae reta ipia pe jare umimbeu ndei uyeyapo mbove quirãi Cristo uiporarata jare quirãi taicue rupi uyembiaadoracata. Jare jae reta upirandu tẽi uyupe mbae ra uipota jei

Espíritu Santo jare quirãî yave ra uyeyapota. <sup>12</sup>Tumpa uicuaaca chupe reta jocua uicuatía vae yandeve peguarã co - iyupeguarã'ã co. Jare Jesucristo ombou Espíritu Santo ara güi jemimondo reta pe, jae reta umimbeu vaerã peve ñee icavi vae. Jare ángel reta uipota ete uicuaa cua mbaembae regua.

### Pico peyoya mbae reve

<sup>13</sup>Jáeramo pepia pe piyemingueta cavi cua re. Piñemoa. Jecuaeñoi peãro piyerovia reve mbiacavi Jesucristo uyecuaa ye yave uñemeeta peve vae. <sup>14</sup>Pe reta co jae Tumpa tai reta. Jáeramo piyapo jae uipota piyapo vaerã vae. Tenonde yave pico pe pere vae reño, picuaa'ã Tumpa ramo. Agüiye ma pico jucuarãî. <sup>15</sup>Tumpa peparavo, jare Tumpa iyoya mbae vae co. Jáeramo opaete mbae piyapo vae pe pico peyoya mbae reve. <sup>16</sup>Echa'ã Tumpa iñee pe uyecuatía oĩ cuarãî: “Pico peyoya mbae reve” —jei Tumpa—. “Echa'ã che co jae iyoya mbae vae.” Jucuarãî uyecuatía oĩ.

<sup>17</sup>Jare pemandúa quirãî piyerure yandeRu pe yave, piyerure peĩ uau'ã penti vaẽño ñru vae güi vae pe. Jae upuruãata opaete vae uyapo vae rupi. Jáeramo cua ivi pe pico rambueve, pequiye chugüi. <sup>18</sup>Tenonde yave pe reta pico petenondegua reta iyemboe rupi. Ërei mbaerã'ã co pico. Añave Tumpa perepi jocua güi. Ërei piyerepi'ã corepoti jare oro pe. Echa'ã corepoti jare oro opata co. <sup>19</sup>Tumpa perepi Cristo jugüi pe. Jocua jugüi icavi ete Tumpa pe. Echa'ã Cristo uñemee umano vaerã, Israel pegua reta penti ovecha-rai icavi ete vae umee Tumpa pe rami. <sup>20</sup>Tumpa uiparavo Cristo umano vaerã ndei ivi uyeyapo mbove. Ërei cua ara taicuegua reta pe ramo Cristo ou ivi pe umano vaerã peré. <sup>21</sup>Jare pe reta perovia Tumpa re Cristo jeco pegua. Echa'ã Tumpa umbijecove ye Cristo güeru umanocue vae reta ipite güi jare umbiadoraca ma. Añave perovia ma Tumpa re, jare pepuere peãro piyerovia reve jae perepi ete vaerã.

<sup>22</sup>Espíritu Santo pembali perovia vaerã añete vae. Jáeramo añave pepia uyeyoe jare cua jeco pegua añetete piyerau. Jáeramo jecuaeño piyerau opaete pepia reve. <sup>23</sup>Penoi ma tecove ipiau vae. Cua nunga tecove ou'ã peru jare pesi güi. Echa'ã tecove jae reta umee peve vae opata. Ërei tecove ipiau vae ndarau etei opa. Penoi tecove ipiau vae Tumpa iñee rupi. Tumpa iñee jecuaeño umee tecove jare ndarau etei opa. <sup>24</sup>Tumpa iñee pe uyecuatía oĩ cuarãî:

“Ivi pegua reta temiti reta rami co.

Echa'ã temiti ipoti yave, ipõra co.

Ërei temiti umano yave, umano vi ipoti.

Jae ramiño vi yepe tẽi ivi pegua reta uyembutuicha, ãrei opata co ipirãta.

<sup>25</sup>Ërei yandeYa iñee ndarau etei opa.”

Jucuarãî uyecuatía oĩ. Jare cua co jae ñee icavi vae ñru vae reta umimbeu peve vae.

**2** <sup>1</sup>Jáeramo agüiye piyapo icavi mbae vae. Agüiye piyembitavi. Agüiye piñeacatãa. Agüiye pendayepota. <sup>2</sup>Sambiai oa ramo vae reta jou neche jare jucuarãî ipirãta. Jae ramiño vi pequirẽi reve piyemboe Tumpa iñee re pepirãta vaerã pepurugüirovia re. <sup>3</sup>Echa'ã picuaa ma yandeYa ipiacavi co peve.

### Ita icove vae

<sup>4</sup>Jecuaëño peya yandeYa re. Jae co jocua ita icove vae. Ivi pegua reta omombo jocua ita. Ërei Tumpa uiparavo. Echa'ã uau ete. <sup>5</sup>Jae ramiño vi pe reta co jae ita icove vae reta rami. Piyeyapo ma penti tenta Espiritu Santo uyapo oĩ vae rami. Tumpa peñono tee iyupeguarã. Piyeyapo ma sacerdote retarã. Echa'ã sacerdote reta Israel pegua umee Tumpa pe maemimba uyeyucacue reta. Jae ramiño vi pe reta piyapo Espiritu Santo uipota piyapo vaerã vae. Jucuarãi yave, pemiyyeroviata Tumpa Jesucristo rupi. <sup>6</sup>Echa'ã Tumpa iñee pe uyecuatía oĩ cuarãi:

“Mase” —jei Tumpa—, “añono Jerusalén pe ita tenondegua vae. Che aiparavo jare aau.

Güirovia jese vae ndarau etei jei: ‘Agüiyeta tõi arovia jese.’ ”  
Jucuarãi uyecuatía oĩ. <sup>7</sup>Pe reta peau, perovia jese ramo. Ërei güirovia'ã jese vae reta pe tae cua Tumpa iñee pe uyecuatía oĩ vae:

“Ita tenta iyapoa reta omombo vae uyeyapo ma ita tenondegua vae.

<sup>8</sup>Jae co penti ita ivi pegua reta ipisapãa jese vae rami.

Uyepiaca reta jocua ita re.”

Jucuarãi uyecuatía oĩ. Echa'ã jae reta uicuaa cavi'ã Tumpa iñee, güirovia'ã Jesucristo re ramo. Tumpa uipota jucuarãi uyeyapo vaerã.

### Pe reta co jae Tumpa uiparavo vae reta

<sup>9</sup>Ërei pe reta co jae Tumpa uiparavo vae reta. Pe reta piyeyocui Tumpa pe iporoyocua pe. Tumpa peñono tee iyupeguarã pico vaerã jae imbaerã. Jucuarãi Tumpa uyapo pe reta pemimbeu vaerã ñru vae reta pe quirãi Tumpa ipiacavi co jare quirãi jae peparavo pico vaerã jae jembipe icavi ete vae pe, agüiye vaerã pico pītumimbi pe. <sup>10</sup>Tenonde yave pe reta Tumpa jentarã reta'ã co. Ërei piyeyapo ma Tumpa jentarã retarã. Tenonde yave Tumpa peparareco'ã. Ërei añave peparareco.

### Piyeyocui cavi Tumpa pe

<sup>11</sup>Cherivi reta, pe reta pico'ã upurugüirovia mbae vae reta yugüireco rami, jare michi peguaño picota cua ivi pe. Jáeramo agüiye pico pe pere vae reño. Echa'ã perete perecove jovaicho co. <sup>12</sup>Piyapo icavi vae upurugüirovia mbae vae reta ipite pe. Echa'ã jucuarãi piyapo yave, yepe tõi jae reta jei icavi mbae vae pecoti, ãrei uechata icavi vae piyapo vae, jare jocua jeco pegua umbiadorata reta Tumpa, ou uvãe yave ara Tumpa uãa reta vaerã.

<sup>13</sup>Piyapo opaete ivi pegua mboroyocui reta. Echa'ã cua yandeYa jei vae co. Jáeramo piyapo peruvicha guasu jei peve piyapo vaerã vae. Echa'ã jae co opaete perentaigua reta juvicha guasu. <sup>14</sup>Piyapo vi peruvicha reta jei peve piyapo vaerã vae. Echa'ã peruvicha guasu ombou reta peve uiporaraca vaerã icavi mbae vae uyapo vae reta pe jare umbutuichaca vaerã icavi vae uyapo vae reta. <sup>15</sup>Iyaracuaa mbae vae reta jei icavi mbae vae pecoti, pecuaa'ã ramo. Jáeramo piyapo icavi vae agüiye vaerã ipuere reta jei jucuarãi. Echa'ã

cua co jae Tumpa jei vae. <sup>16</sup>Tumpa perepi ma mbaeyoa güi. Ërei agüiye piyapo icavi mbae vae Tumpa perepi ma mbaeyoa güi ramo. Echa'ã Tumpa perepi mbaeyoa güi, piyeyocui vaerã chupe. <sup>17</sup>Pipiu opaete vae. Peau opaete upurugüirovia vae reta. Pequiye Tumpa güi. Pipiu peruvicha guasu.

<sup>18</sup>Che tae uyeyocui vae reta pe cua: Piyapo pepatrón jei peve piyapo vaerã vae pipiu reve. Amocue pepatrón reta ipiacavi jare ipiaguasu peve. Ërei yepe tẽi amocue pepatrón reta uyapo icavi mbae vae peve, ãrei jeseve piyapo jei peve piyapo vaerã vae. <sup>19</sup>Piyapo yave picuaa Tumpa uipota piyapo vaerã vae, jare piporara yave jocua jeco pegua, pemiãyeroviata Tumpa. <sup>20</sup>Ërei piyapo yave icavi mbae vae, pepatrón uiporaracata peve. Jare yepe tẽi piporara pepiaguasu reve, ãrei ndarau piyembutuichaca. Ërei pepatrón uiporaraca yave peve, yepe tẽi piyapo icavi vae, piporara yave pepiaguasu reve, pemiãyeroviata Tumpa. <sup>21</sup>Echa'ã cuarã Tumpa peparavo. Echa'ã Cristo uiporara peré, pe reta piyapo vaerã jae uyapo rami. <sup>22</sup>Echa'ã Cristo iyoa'ã. Upurumbitavi'ã etei. <sup>23</sup>Yepe tẽi ñru vae reta jei icavi mbae vae icoti, ãrei Cristo jei'ã icavi mbae vae icoti reta. Uiporara oĩ yave, jei'ã uiporaracata co uiporaraca chupe vae reta pe. Jaeño oñono Tumpa ipo pe. Echa'ã uicuaa Tumpa upuruãa jupi vae rupi. <sup>24</sup>Cristo etei güiraa yanembaeyoa reta jete re jocua curusu re, yande ñamano vaerã mbaeyoa reta güi jare yaico vaerã jupi vae re. Jae umano ramo, yande ñanoi tecove opa mbae vae. <sup>25</sup>Echa'ã tenonde yave pe reta pepia Tumpa güi, ovecha reta tape güi opia rami. Ërei añave peyu ye ma uyandareco perezave re vae pe, ovecha reta yugüeru ye iyandarecoa pe rami.

### Umenda vae reta tuyugüireco cavi uyupii

**3** <sup>1</sup>Jae ramiño vi cuña reta tuyeyocui ime pe. Echa'ã jucuarãi yave, yepe tẽi ime güirovia'ã Tumpa ñnee, ãrei aramoi jembireco ipuere güiroviaca ime pe Tumpa ñnee umimbeu'ã chupe reve. Echa'ã ime uechata quirãi icavi ico jembireco. <sup>2</sup>Uechata quirãi jembireco ico cavi uipiu reve, jare quirãi uyapo'ã mbae pichĩ vae. <sup>3</sup>Cuña reta agüiye tuiptota tuñemopõra ete mbaembae jete re uyecuaa vae peño. Echa'ã amocue cuña reta uyapicatu cavi ía jare oñono iyee mbaembae oro pegua vae jare omonde temimonde jepi ete vae uñemopõra vaerã. <sup>4</sup>Ërei cuña reta tuiptota tuñemopõra icavi vae ipia pe oĩ vae pe. Echa'ã jocua mbaembae jete re oĩ vae opata co. Ërei icavi vae ipia pe oĩ vae ndarau opa. Jáeramo tuñemimichi jare agüiye tuñeengata ime pe. Echa'ã cua icavi ete Tumpa pe. <sup>5</sup>Aracae yave cuña güirovia Tumpa re vae reta uñeñoño tee Tumpa peguarã, jare jae reta vi uñemopõra icavi vae ipia pe oĩ vae pe. Echa'ã jae reta vi uyeyocui ime pe. <sup>6</sup>Sara uyeyocui Abraham pe jare jei chupe: “Cheya.” Jáeramo cuña añave güirovia Tumpa re vae reta Sara rami co, icavi vae uyapo reta yave. Jare jucuarãi uyapo yave, ndarau uquiye mbaembae güi.

<sup>7</sup>Jae ramiño vi cuimbae reta tuyugüireco cavi jembireco ndive. Tuyandareco cavi jese jare tumbutuicha. Timandúa quirãi cuimbae ipirãta ete cuña güi. Echa'ã Tumpa uyapo cuimbae jare jembireco penti

ramiño jare umee mocui reve pe yugüireco vaerã ipiacavi rupi. Cuimbae reta jucuarãi yugüireco yave, Tumpa uyapisacata iyerure reta re.

### Pico cavi uyupii

<sup>8</sup>Cuaño ma tamimbeu ye peve. Pico cavi penti ramiño. Pepiacavi piyupe. Piyerau. Piyeparareco. Piñemimichi. <sup>9</sup>Ïru vae uyapo yave icavi mbae vae peve, agüiye piyapo icavi mbae vae chupe. Jae ramiño vi ïru vae uñeengata yave peve, agüiye piñeengata chupe. Piñeengata vaerãve piyerure Tumpa pe jese, Tumpa uyapo vaerã icavi vae chupe. Echa'ã cuarã Tumpa peparavo, ipuere vaerã uyapo icavi vae peve vi. <sup>10</sup>Tumpa iñee pe uyecuatía oĩ cuarãi:

“Pipota yave pico cavi pepiacatu reve,  
agüiye pere icavi mbae vae quía pe,  
jare agüiye peapu quía re.

<sup>11</sup>Agüiye piyapo icavi mbae vae.

Jaeño piyapo icavi vae.

Jecuaño pipota pico cavi pepiacatu reve.

<sup>12</sup>Echa'ã yandeYa jecuaño umae jupi vae reta re, jare uyapisaca iyerure reta re.

Ërei umae'ã icavi mbae vae uyapo vae reta re.”

Jucuarãi uyecuatía oĩ.

<sup>13</sup>Ndarau ndipo quía uipota uyapo icavi mbae vae peve, pe reta icavi vae jecuaño piyapo yave. <sup>14</sup>Ërei piporara yave jupi vae piyapo ramo, piyerovia. Aramoi ïru vae reta uipotata pemingüiye. Ërei agüiye pequiye chugüi reta. Agüiye piyemambeco jese. <sup>15</sup>Pembiadora Cristo pepia pe. Echa'ã jae co yandeYa. Jare ime yave quía upirandu peve maera ra peãro peĩ piyerovia reve vae, jecuaño piñemicuatïro pemimbeu vaerã chupe piñemimichi jare pipiu reve. <sup>16</sup>Agüiye piyapo mbae picuaa agüiyeta tẽi piyapo vae. Jucuarãi yave, ïru vae reta jei yave icavi mbae vae pecoti, imarata co iyapu peré vae re. Echa'ã uicuaata quirãi piyapo icavi vae Cristo re perovia ramo. <sup>17</sup>Tumpa uipota yave, aramoi piporarata icavi vae piyapo vae jeco pegua. Ërei cua icavi co. Icavi'ã co piyapo yave icavi mbae vae jare piporara yave jocua jeco pegua. <sup>18</sup>Cristo vi penti veseño uiporara yanembaeyoa reta re. Jae co jupi vae, ãrei uiporara jupi mbae vae reta imbaeyoa reta re. Jare jucuarãi uiporara yanembipiacatu vaerã Tumpa ndive. Ërei yepe tẽi ïru vae reta uyuca, ãrei Espiritu Santo umbijecove ye güeru umanocue vae reta ipite güi. <sup>19</sup>Jayave Cristo oo espíritu rupi uñemiñee umanocue vae reta ipereso ñugüiñoi vae pe. <sup>20</sup>Echa'ã jocua umanocue vae reta yugüireco Noé ico yave. Jae reta güirovia'ã Tumpa jei vae, yepe tẽi Tumpa ipiaguasu chupe reta jare uãro Noé jocua chalana guasu uyapo oĩ rambueve. Ërei mboviño oyepe i güi jocua chalana guasu pe. Ochoño uyembiasaca. <sup>21</sup>Jare jocua penti jaanga co. Jae ramiño vi añave pe reta piyembiasaca piyembibautizaca yave Jesucristo icove ye ou umanocue vae reta ipite güi ramo. Pepuere'ã piyembiasaca piyoe perete vae

rupi. Jaeño pepuere piyembiasaca pipota yave piyapo Tumpa jei piyapo vaerã vae. <sup>22</sup>Jesucristo oo ma ara pe jare ico ma Tumpa iyipi pe iyacata coti. Ángel reta jare opaete mbaepuere güinoi vae reta uyeyocui chupe.

### Piyeyocui piyupe mbaepuere reta penoi vae pe

**4** <sup>1</sup>Cristo uiporara cua ivi pe ico rambueve. Jáeramo piñemicuatĩro piporara vaerã jae uiporara rami. Echa'ã yaiporara yave, mbaeyoa ipuere'ã ma yanderé. <sup>2</sup>Jucuarãi yave, ndarau yaico yae vae reño cua ivi pe yaico rambueve. Yaipotata yayapo Tumpa jei vae. <sup>3</sup>Echa'ã ara uasa vae reta pe yaico yae vae reño upurugüirovia mbae vae reta yugüireco rami. Jocua ara reta pe yayapose pichĩi vae, yacause, yayapose paraa reta yasavipo vaerã, jare yambiatorase tumpa-raanga reta, yepe tẽi mboroyocui jei agüiye vaerã yambiatora. <sup>4</sup>Jare upurugüirovia mbae vae reta pe yavaĩ ma uicuaa vaerã maera ra pe reta piyapo'ã ma opaete mbae icavi mbae vae jae reta ndive. Jáeramo jei reta icavi mbae vae pecoti. <sup>5</sup>Èrei Tumpa uãa yave icove vae reta jare umanocue vae reta, jae reta vi uyemboita Tumpa jovai. <sup>6</sup>Jare cua jeco pegua Tumpa jembiocui reta umimbeu ñee icavi vae umanota vae reta pe, iespĩritu reta yugüireco vaerã Tumpa ico rami, yepe tẽi cua ivi pe yugüireco rambueve ivi pegua reta uiporaraca chupe reta.

<sup>7</sup>Èrei uyaro ma opaete mbae opa vaerã. Jáeramo piñemoa jare jecuaeño piyerure Tumpa pe. <sup>8</sup>Tamimbeu pepe cua icavi ete vae: Piyerau. Echa'ã piyeru yave, ndarau piyembijeco jeta pemaeyoa reta re. <sup>9</sup>Piyemĩngaru piñeenguru mbae reve. <sup>10</sup>Tumpa umee penti penti pe mbaepuere reta piyeyocui vaerã chupe. Jáeramo piyeyocui piyupe mbaepuere reta penoi vae pe. Jucuarãi piyeyocui cavita co Tumpa pe Tumpa ipiacavi tuicha vae rupi. <sup>11</sup>Uñemiñee vae tuñemiñee Tumpa umimbeu chupe mbae jei vaerã vae rami. Uyeyocui ĩru vae reta pe vae, tuyeyocui chupe reta mbaepuere Tumpa umee chupe vae pe. Jucuarãi yave, ĩru vae reta umbiatorata Tumpa Jesucristo rupi opaete piyapo vae re. YandeYa Jesucristo tuyembiatoraca jare tugüinoi opaete mbaepuere jaeño mai pegua. Amén.

### Cristo re güirovia ramo uiporara vae

<sup>12</sup>Cherivi reta, piporara eteta co. Èrei piporara peĩ yave, agüiye pepiacañi jese. Echa'ã uyeyapo vi jucuarãi ĩru vae reta pe. <sup>13</sup>Èrei piporara peĩ yave, piyerovia. Echa'ã picuaa piporara peĩ Cristo uiporara rami. Jare cua jeco pegua, opaete vae uicuaa yave quirãi Cristo uyembiatoraca co, pe reta piyerovia eteta. <sup>14</sup>Īru vae reta jei yave icavi mbae vae pecoti Cristo re perovia ramo, piyerovia. Echa'ã Tumpa iEspĩritu ico pepia pe. Jae reta jei icavi mbae vae Cristo coti. Èrei pe reta pmbiatoraca Cristo. <sup>15</sup>Èrei agüiye quía tupuruyuca ani toñomi mbaembae ani tuyapo icavi mbae vae ani tumae ĩru vae iparaviqui re. Echa'ã jucuarãi uyapo

yave, uiporarata co icavi mbae vae uyapo ramo. <sup>16</sup>Ërei penti Cristo imbae vae uiporara yave Cristo re güirovia ramo, agüiye timara. Tumbiadora Tumpa jese.

<sup>17</sup>Tumpa uāata co opaete ivi pegua reta, jare tenonde uāata rani jae imbae reta. Yepe tēi yande co jae imbae reta, ãrei ñanerāata co. Jáeramo uiporara eteta co jocua Tumpa inēe icavi vae güirovia mbae vae reta. Echa'ã Tumpa jei chupe reta güirovia vaerã. <sup>18</sup>Tumpa inēe pe uyecuatía oĩ cuarã:

“Tumpa umbujupi ma vae reta yavai rupi uyembiasacata.

Jáeramo ndarau etei uyembiasaca Tumpa jei vae güirovia'ã vae reta. Echa'ã uyembai'ã imbaeyoa reta.”

Jucuarãi uyecuatía oĩ. <sup>19</sup>Jáeramo Tumpa jei vae rupi uiporara vae reta jecuaeño tuyapo icavi vae jare tumaeño Tumpa re uyandareco vaerã jese reta. Echa'ã Tumpa yandeapo jare jecuaeño uyandarecota yanderé.

### Pemiatangātu Tumpa imbae reta

**5** <sup>1</sup>Tambiaracuaa ma tenondegua pepite pe ñugüinoi vae reta. Echa'ã che co jae penti tenondegua, jare amimbeu ñru vae reta pe quirãi Cristo uiporara yanderé. Jare Cristo uyecuaa yave, che vi ayeroviata jae ndive. Tupumbiaracuaa cuarã: <sup>2</sup>Pemiatangātu Tumpa imbae pepite pe ñugüinoi vae reta. Piyandareco jese reta pequirēi reve. Agüiye piyapo peparaviqui peatēi reve. Piyapo peparaviqui pipota ete piyeyocui Tumpa pe ramo. Agüiye piyapo pemingana corepoti vaerãño. <sup>3</sup>Jare pe reta pico cavi, ñru upurugüirovia vae reta uicuaa vaerã quirãi icavi co jae reta vi yugüireco vaerã. Agüiye piyocuiño pembae vae echa rami. Echa'ã jae reta Tumpa imbae reta co. <sup>4</sup>Jare Cristo ou ye yave - jae co opaete yanderé uyandareco vae - umeeta peve corona ndarau etei opa vae. Echa'ã pe reta piyeroviata jae ndive.

<sup>5</sup>Tambiaracuaa ma cuimbae tairusu vae reta cuarã: Piyapo petenondegua reta jei vae. Jare opaete vae piyeyocui piyupe piñemimichi reve. Echa'ã Tumpa umee ipiacavi uñemimichi vae reta pe. Ërei oyovaicho uyembicate vae reta ndive. <sup>6</sup>Jáeramo piñemimichi Tumpa jovaque. Echa'ã jae imbaepuere tuicha ete co. Jare jae pemptuichacata ara ou uvãe yave piyembutuichaca vaerã. <sup>7</sup>Pemimbeu Tumpa pe opaete pepiatiti jare piyemipiã'ã jese vae. Echa'ã jae uyandareco oĩ peré.

<sup>8</sup>Jecuaeño piñemoa. Echa'ã aña guasu perovaicho co, jare uipota uyapo icavi mbae vae peve, penti yaguapita uguata ueca mbae uyuca jou vaerã vae rami. <sup>9</sup>Ërei piñemimirãta pepurugüirovia re agüiye vaerã aña guasu pemiamiri. Picuaa co quirãi opaete ñru upurugüirovia vae ivi pe yugüireco vae reta uiporara ñugüinoi pe reta piporara rami. <sup>10</sup>Ërei Tumpa ipiacavi tuicha ete co. Jae yandeparavo umee vaerã yandave yerovia opa mbae vae Cristo Jesús rupi. Piporarata co michi pegua. Ërei Tumpa etei pembiaracuaata, jare pemimirãtata, jare pemiatangātuta. <sup>11</sup>Tumpa tuyembiadoraca jare tugüinoi opaete mbaepuere jaño mai pegua. Amén.



**Saludo reta**

<sup>12</sup>Cua mboviño ma aicutatía peve pumbiaracuaa vaerã, jare araacata Silvano ndive peve. Aicuaa Silvano co jae yanderivi uyeyocui cavi peve vae. Amimbeu ma peve Tumpa ipiacavi añetete vae. Piñemimirãta peĩ jocua mbiacavi re.

<sup>13</sup>Opaete upurugüirovia vae Babilonia pe ñügüinoi vae reta jei peve Tumpa ndiveño peĩ. Tumpa uiparavo reta jae peparavo rami. Jae ramiño vi cherivi Marcos jei peve Tumpa ndiveño peĩ. <sup>14</sup>Piyembisaluda yave, piñecuãva piyerau reve. Tipiacatu opaete Cristo Jesús re güirovia vae reta. Amén.

# SEGUNDA CARTA DEL APOSTOL SAN PEDRO

---

**1** <sup>1</sup> Che co jae Simón Pedro. Che co jae Jesucristo jemimondo jare ayeyocui chupe. Jesucristo co jae yanembiasa vae. Tumpa jare Jesucristo jupi co. Jáeramo umee peve pepurugüirovia vaerã ore ndupurugüirovia rami. Yayerovia ete cua mburugüirovia re. Aicuatía aĩ cua tupapire peve.

<sup>2</sup> Aipota picuaa cavi vaerã Tumpa jare yandeYa Jesús, penoi vaerã jeta ete Tumpa ipiacavi jare ipiacatu.

## **Pico penti ramiño Tumpa ndive**

<sup>3</sup> Tumpa umee ma yandeve imbaepuere rupi yaico cavi vaerã jare yayapo vaerã jae uipota yayapo vaerã vae. Jare opaete cua ñanai yaicuaa Tumpa ramo. Echa'ã Tumpa yandeparavo yayapo vaerã icavi vae jare yayembutuichaca vaerã. <sup>4</sup> Jare imbaepuere rupi Tumpa umee ma yandeve jei uyapota vae icavi ete vae reta. Yayerovia ete cua re. Jare cua jei uyapota vae reta rupi Tumpa umee ma peve pico vaerã penti ramiño jae ndive. Echa'ã jae perepi opaete icavi mbae vae ivi pegua güi, agüiye vaerã pico pe pere vae reño. <sup>5</sup> Jáeramo piñemiatangãtu. Perovia co Tumpa re. Jecuaeño pipota piyapo icavi vae. Jae ramiño vi jecuaeño pipota picuaa cavi Tumpa regua. <sup>6</sup> Jae ramiño vi jecuaeño piñemoa. Jae ramiño vi jecuaeño pepiaguasu. Jae ramiño vi jecuaeño piyapo Tumpa uipota piyapo vaerã vae. <sup>7</sup> Jae ramiño vi jecuaeño pepiacavi. Jae ramiño vi jecuaeño pepuruau. <sup>8</sup> Echa'ã opaete cua piyapo yave, piñemimirãtata co pepurugüirovia re jare picuaa cavita co yandeYa Jesucristo. Jáeramo pepuereta piyeyocui cavi yandeYa pe. <sup>9</sup> Erei opaete cua uata chupe vae uicuaa cavi'ã mbaembae regua. Iyaracuaa'ã co. Ñacañi ma co aipo quirã Tumpa umbiasa chupe imbaeyoa uyapocue vae reta.

<sup>10</sup> Jáeramo, cherivi reta, piñemiatangãtu picuaaca vaerã ñru vae reta pe quirã pe reta co jae añetete Tumpa uiparavo vae reta. Echa'ã jucuarã piyapo yave, ndarau etei pepia Tumpa güi. <sup>11</sup> Jare jucuarã piyapo yave, pique cavita co piyerovia ete reve yandeYa Jesucristo iporoyocua opa mbae vae pe. Jae co yanembiasa vae.

<sup>12</sup> Jáeramo che jecuaeño pumimanduata cua re, yepe tẽi picuaa ma co jare pepirãta ma co añete vae piyemboe jese vae re. <sup>13</sup> Icavi echa cheve

pumimandúa vaerã jese cua ivi pe aico rambueve, pumiatangãtu vaerã. <sup>14</sup>Echa'ã aicuaa imambae amanota co yandeYa Jesucristo uicuaaca cheve rami. <sup>15</sup>Jecuaeño pumimanduata cua re, jecuaeño pemandúa vaerã jese che amano ma yave.

### Ore nduecha co yandeYa Jesucristo imbaepuere

<sup>16</sup>Nduicuaaca peve yandeYa Jesucristo imbaepuere jare quirãï jae ou yeta co. Jocua nduicuaaca peve vae aracae ndaye reta'ã co. Jocua ndugüirovia vae añete co. Echa'ã ore nduecha co yandeYa Jesucristo imbaepuere. <sup>17-18</sup>Echa'ã ore noi jae ndive jocua ivitu guasu jae uiparavo vae re, yandeRu Tumpa umbiadoraca yave jare uechaca oreve imbaepuere. Jare ore nduyandu jocua ñee ara güi ou chupe vae. Echa'ã Tumpa etei uyembidoraca vae jei cuarãï: “Cua co jae cheRai aau ete vae. Chembiyerovia ete.” Jucuarãï jei.

<sup>19</sup>Ërei pepuere perovia catu Tumpa iñee aracae umimbeu vae reta uicuatía vae ore nduecha vae güi. Jáeramo icavi co pepia pe piyemingueta cavi vaerã jae reta uicuatía vae re. Echa'ã jae reta uicuatía vae yanembori yaicuaa cavi vaerã yavai yaicuaa vaerã vae, penti tembipe yanembori yaecha cavi vaerã pītumimbi pe rami. Pepia pe piyemingueta cavi yave jese, picuaa cavita co, penti yasitata jembipe tuicha ete vae pepia pe umiembipe rami. <sup>20</sup>Taicuaaca peve cua: Jocua Tumpa iñee aracae umimbeu vae reta uicuatía vae jae reta iyeminguetaiño'ã co. <sup>21</sup>Echa'ã Tumpa iñee aracae umimbeu vae reta imiari'ã jae reta etei uipotata imiari ramo. Espiritu Santo etei umimbeu chupe reta mbae jei vaerã. Jáeramo jae reta jei vae Tumpa iñee etei co.

### Upurumbitavi vae reta

(Judas 4-13)

**2** <sup>1</sup>Ërei Israel pegua reta ipite pe yugüireco aracae amocue upurumbitavi vae reta. Jae reta jei iyapu reve: “Che co jae penti Tumpa iñee umimbeu vae.” Jae ramiño vi yugüirecota pepite pe amocue upurumbitavi vae reta. Jae reta jeita iyapu reve: “Che co jae penti Tumpa iñee re oporomboe vae.” Jae reta ipoqui eteta umimbeu vaerã moromboe añete mbae vae. Uipotata reta urucumegua Tumpa iparaviqui. Jare uicuacuta reta yandeYa umbiepi imbaeyoa reta re vae. Ërei imambae yandeYa urucumeguata reta. <sup>2</sup>Jare jeta vae uyapota pichii vae upurumbitavi vae reta umimbeuta chupe reta uyapo vaerã vae. Jare cua jeco pegua ñru vae reta jeita icavi mbae vae moromboe añete vae coti. <sup>3</sup>Jare upurumbitavi vae reta uipotata pemaembae jare pemitavita upiro vaerã pegüi pemaembae. Ërei ima ma Tumpa uãa reta. Jáeramo urucumeguata reta imambae.

<sup>4</sup>Echa'ã Tumpa umbiasa'ã ángel iyoa vae reta. Jae omombo ara güi cañitei pe. Joco pe uñeapiti ñugüinoi pītumimbi pe jare uãro ñugüinoi

Tumpa uãa reta vaerã. <sup>5</sup>Jae ramiño vi aracae Tumpa umbiasa'ã upurugüirovia mbae vae reta. Jaeño uepi iporu guasu güi Noé jocua ñru siete vae ndive. Echa'ã Noé umimbeu tẽi ñru vae reta pe uyapo vaerã jupi vae. Ërei jae reta uipota'ã güirovia Tumpa jei chupe reta uyapo vaerã vae. Jáeramo Tumpa ombou iporu guasu opa vaerã umbai reta. <sup>6</sup>Jae ramiño vi Tumpa ombou tata tenta guasu reta Sodoma jare Gomorra pe opa umbai vaerã. Jaeño upita joco pe tanimbu reta. Jare jocua tenta guasu reta pe uyeyapo vae rupi Tumpa jei vae uyapo'ã vae reta ipuere uicuaa Tumpa uiporacata co chupe reta. <sup>7</sup>Ërei Tumpa uepi Lot. Echa'ã jae jupi jare uyemipia'ã mbaembae pichii vae jocua jecopochi vae reta uyapo vae re. <sup>8</sup>(Echa'ã jocua jupi vae ico jae reta ipite pe, jare uecha jare uyandu icavi mbae vae uyapo reta vae. Jáeramo uyemipia'ã opa ara rupi.) <sup>9</sup>Jae ramiño vi yandeYa uicuaa quirã uepi vaerã jei vae uyapo vae reta mbaesusere reta güi jare quirã uiporacata vaerã jupi mbae vae uyapo vae reta pe ara jae uãa reta vaerã vae ou uvãe regua. <sup>10</sup>Amocue vae uyapo pichii vae jae jei vae rupiño jare güiriro mbaepuere güinoi vae reta. Tumpa uiporacata eteta co jocua reta pe. Echa'ã jae reta uyembicate jare ñatẽi uyapo mburuvicha reta jei uyapo vaerã vae. Uquiy'eã reta jei vaerã icavi mbae vae mbaepuere güinoi vae reta coti. <sup>11</sup>Ángel reta imbaepuere tuicha ete jocua jupi mbae vae uyapo vae reta imbaepuere güi. Ërei yepe tẽi imbaepuere tuicha co, ãrei ángel reta ipuere'ã umbijeco yandeYa jovaque jocua mbaepuere güinoi vae reta. <sup>12</sup>Ërei jocua jupi mbae vae uyapo vae reta jei icavi mbae vae uicuaa mbae vae coti. Jae reta maemimba reta rami co. Yaipisi jare yayuca maemimba reta. Jae ramiño vi jocua jupi mbae vae uyapo vae reta umanota icavi mbae vae uyapo vae jeco pegua. <sup>13</sup>Jare cua uyeyapota chupe reta jupi mbae vae uyapo ramo. Echa'ã ara rupi yepe icavi echa chupe reta uyapo vaerã icavi mbae vae. Jae reta uñemĩru pe reta ndive. Ucaru reta yepe pe reta ndive. Ërei uyerovia upurumbitavi vaerã. Icavi'ã co ucaru reta vaerã pe reta ndive. Echa'ã peĩru añetete vae reta'ã co. <sup>14</sup>Jae reta jecuaño uipota uyuvanga menda re. Jecuaño uipota uyapo ipotave mbaeyoa, jare uyapoca mbaeyoa ipurugüirovia re ipirãta'ã vae reta pe. Jae reta jecuaño uyemboe uipota vaerã ñru vae reta imbaembae. Tumpa uiporacata chupe reta. <sup>15</sup>Echa'ã yugüireco'ã Tumpa jei yugüireco vaerã rami. Opia reta Tumpa güi. Uyapo reta Beor tai Balaam jee vae uyapo rami. Echa'ã Balaam uau ete corepoti jupi mbae vae uyapo vae rupi umingana vae. <sup>16</sup>Ërei Tumpa uicuaaca Balaam pe agüiye vaerã tẽi uyapo jocua jupi mbae vae. Echa'ã yepe tẽi penti mburica ipuere'ã uyemingueta, ãrei Tumpa umee Balaam imburica pe uyemingueta vaerã penti cuimbae uyemingueta rami, jare jucuarãi uicuaaca Balaam pe - jae co penti Tumpa ñnee aracae umimbeu vae - agüiye vaerã tẽi uyapo jocua uipota uyapo vae. <sup>17</sup>Jocua jupi mbae vae uyapo vae reta icua tipa ma vae reta rami co. Jae ramiño vi amapĩtu ivitu ete yave tanta osi vae reta rami co. Echa'ã

yugüiraa voita pītumimbi oĩ vae pe. <sup>18</sup>Imiari reta uyembicate reve. Jáeramo jei vae reño yugüireco vae reta güirovia reta, jare uyapo ye pichĩ vae, yepe tẽ tenonde yave oyepe uyapo'ã Tumpa jei vae reta güi. <sup>19</sup>Jocua jupi mbae vae uyapo vae reta jei tẽi chupe reta uyeyorata co. Ërei jae reta etei icavi mbae vae jembiocui reta co. Echa'ã ime yave quía mbae güinoi mbaepuere jese vae, jae ico jocua mbae jembiocuirã. <sup>20</sup>Echa'ã oyepe yave pichĩ vae ivi pegua güi yandeYa Jesucristo regua uicuaa vae rupi - jae co yanembiasa vae - Ërei taicue rupi umbipi yave uyapo ye pichĩ vae jare pichĩ vae güinoi mbaepuere jese, icavi mbae ete co tenonde ico vae güi. <sup>21</sup>Echa'ã uicuaa ma quirã uyembujupica vaerã. Ërei uyapo'ã mboroyocui Tumpa umimbeu chupe reta vae. Icavi ete tẽi co agüiye vaerã uicuaa quirã uyembujupica vaerã. <sup>22</sup>Ërei uyeyapo chupe reta jocua yae chupe vae rami. Echa'ã yae cuarã: “Yimba oo ye jou igüecue. Jae ramiño vi cuchi uyeyoe vae oo ye uñemutuñuu.” Jucuarã yae. Jare cua añete co.

### YandeYa ivãe ara uvãeta co

**3** <sup>1</sup>Cherivi reta, cua tupapire aicuatía peve vae mocui ma co. Mocui reve pe pumimandúa picuaa ma vae re, añetete pepia pe piyemingueta vaerã jese. <sup>2</sup>Aipota pepia pe piyemingueta vaerã Tumpa ñee araca umimbeu vae reta jei vae re. Jae reta uñeño tee Tumpa peguarã. Jae ramiño vi aipota pepia pe piyemingueta vaerã mboroyocui ore numimbeu peve vae re. Ore co jae yandeYa jemimondo reta. Jae co yanembiasa vae. <sup>3</sup>Aipota picuaa vaerã cua rani: Ara taicuegua reta pe amocue vae oyoyaita Tumpa ñee umimbeu vae reta. Yugüirecota jae jei vae reño. <sup>4</sup>Jare jeita cuarã: “Pe reta pere tẽi Jesucristo ou yeta co. Ërei ndarau etei ou. Echa'ã yandetenondegua reta umano güive opaete mbaembae oyovaqueño co oĩ. Tumpa opaete uyapo güive opaete mbaembae oyovaqueño co oĩ.” Jucuarã jeita. <sup>5</sup>Ërei jae reta uipota'ã imandúa quirã araca ete Tumpa uyapo opaete ara re ñugüinoi vae ñee imbaepuere pe jare quirã uyapo ivi jare i guasu reta, <sup>6</sup>jare quirã opa umbai opaete ivi pe oĩ vae iporu guasu ombou yave. <sup>7</sup>Ërei Tumpa umimbeu yandeve quirã mbaembae ara re añave ñugüinoi vae jare ivi vi oyovaqueñota oĩ umbai regua tata pe. Echa'ã jucuarãita Tumpa uyapo, uãa uyapo'ã jei vae reta yave. Jayave jae omondota reta tata guasu pe.

<sup>8</sup>Cherivi reta, icavi co picuaa vaerã cua: YandeYa pe penti ara mil año ramiño co jare mil año penti ara ramiño co. <sup>9</sup>Amocue vae ipia pe uyemingueta tẽi yandeYa ndarau ou ye. Echa'ã jei reta ima ete ma co jei uyapota vae. Ërei jucuarã'ã. Echa'ã yandeYa ipiaguasu yandeve. Uipota'ã penti ave oo vaerã tata guasu pe. Uipota opaete vae ueya vaerã iyemingueta icavi mbae vae ipia pe oĩ vae.

<sup>10</sup>Ërei yandeYa ivãe ara outa co penti imonda vae pĩtu yave ou mbaembae oñomi vaerã rami. Jare yandeYa ivãe ara pe opaete mbaembae

ara re añave yaecha vae uyembaita tanta jiapu reve. Jacu eteta co jare opaete mbaembae opata ocai. Ivi vi jare opaete mbaembae ivi pe ñugüinoi vae ocaita co. <sup>11</sup>Jáeramo pico cavi peyoa mbae reve jare jecuaeño piyapo Tumpa jei vae. Echa'ã picuaa opaete mbaembae añave yaecha vae opata ocai. <sup>12</sup>Peãro pequirẽi reve Tumpa ivãe ara ou uvãe vaerã. Echa'ã Tumpa ivãe ara pe Tumpa uapita opaete mbaembae ara re ñugüinoi vae jare opata umbai. Jacu eteta co jare opaete mbaembae opata ocai. <sup>13</sup>Ërei Tumpa uyapota ara re mbaembae ipiau vae. Jae ramiño vi uyapota ivi ipiau vae. Jare joco pe imeta jaẽno mbae jupi vae. Echa'ã Tumpa cua jei uyapota co.

<sup>14</sup>Jáeramo, cherivi reta, cua mbaembae ipiau vae peãro ramo, piñemiatangãtu agüiye vaerã piyapo mbaeyoa. Jucuarãi yave, pepiacatuta jare ndarau quía pembijeco mbae re yandeYa ou ye yave. <sup>15</sup>Picuaa quirãi yandeYa ipiaguasu co yandeve yayembiasaca vaerã. Jare cua re yanderivi Pablo yaau vae uicuatía ma peve. Tumpa umee Pablo pe aracuaa umimbeu cavi vaerã peve. <sup>16</sup>Jare opaete tupapire uicuatía vae pe Pablo umimbeu yembiasa regua. Amo pe yavai yaicuaa vaerã mbae ra uipota jei Pablo uicuatía vae. Jare amocue vae güirova Pablo uicuatía vae. Jae ramiño vi jae reta güirova ñru Tumpa ñnee uyecuatía oĩ vae. Jae reta uyemboe cavi'ã Tumpa ñnee re jare ipirãta'ã ipurugüirovia re. Jare jucuarãi güirova ramo, jae reta etei uyerova Tumpa güi.

<sup>17</sup>Picuaa ma co cua mbaembae regua, cherivi reta. Jáeramo pe reta vi piñemoa, agüiye vaerã piyavi jocua icavi mbae vae uyapo vae reta uyavi rami. Echa'ã jucuarãi piyavi yave, ndarau pepirãta pepurugüirovia re. <sup>18</sup>Ërei piñemimírãta pepurugüirovia re Tumpa ipiacavi rupi. Jare jecuaeño pipota picuaa cavi yandeYa Jesucristo regua. Jae co yanembiasa vae. YandeYa tuyembiaadoraca añave jare jaẽno mai pegua. Amén.

# PRIMERA CARTA DEL APOSTOL SAN JUAN

---

## Ñee tecove opa mbae vae umee vae

**1** <sup>1</sup>Nduicuatía noĩ peve jocua Ñee tecove opa mbae vae umee vae regua. Jae jecuaeño ico ndei ivi uyeyapo mbove. Jare ore nduyandu jocua Ñee. Nduecha cavi. Numae jese. Nduyaviqui vi orepo pe etei. <sup>2</sup>Jocua Ñee tecove opa mbae vae etei co. Numimbeu peve quirãi ore etei nduecha. Nduicuaaca peve jae co tecove opa mbae vae. Jae imeño mai ico yandeRu Tumpa ndive ndei ivi uyeyapo mbove, ãrei ou yecuaa oreve. <sup>3</sup>Numimbeu peve nduecha jare nduyandu vae, pe reta vi piñemĩru vaerã ore ndive. Añetete ñañemĩru ma yandeRu Tumpa jare Tai Jesucristo ndive. <sup>4</sup>Jare cua mbaembae regua nduicuatía peve piyerovia ete vaerã.

## Tumpa ico tembipe oĩ vae pe

<sup>5</sup>Numimbeu peve ñee Jesucristo umimbeu oreve vae. Jae co cua: Tumpa ico tembipe oĩ vae pe. Ico'ã etei pĩtumimbi oĩ vae pe. <sup>6</sup>Aramoi yae ñañemĩru ma co jae ndive. ãrei yaico yave pĩtumimbi oĩ vae pe yugũireco vae rami, yandeapu co. Yaico'ã co añete vae rupi. <sup>7</sup>ãrei yaico yave tembipe oĩ vae pe yugũireco vae rami - echa'ã Tumpa vi ico tembipe oĩ vae pe - ñañemĩru uyupii, jare Jesucristo jugũi yandeyoe opaete yanembaeyoa reta güi. Jesucristo co jae Tumpa Tai.

<sup>8</sup>Yae yave yandeyoa'ã co, yayembitavi co. Yae'ã etei co añete vae. <sup>9</sup>Yamimbeu yave Tumpa pe yanembaeyoa reta, yandepuere yarovia catu Tumpa umbiasa vaerã yandeve yanembaeyoa reta, jae jupi ramo. Jae yandeyoeta co opaete jupi mbae vae yayapo vae güi. <sup>10</sup>Yae yave yayapo'ã co mbaeyoa, Tumpa iñee ico'ã yandepia pe. Echa'ã Tumpa jei yayapo co mbaeyoa. Jáeramo yayapo'ã yave mbaeyoa, Tumpa iyaputa tẽi co.

## Cristo uyerure Tumpa pe yanderé

**2** <sup>1</sup>Cheraĩ reta, acuatía cua mbaembae regua peve agũiye vaerã peyoa. ãrei yandeyoa yave, ime co quía uyerure yandeRu Tumpa pe yanderé vae. Jae co Jesucristo. Jae co jupi vae. <sup>2</sup>Tumpa uiporacata tẽi yandeve

yanembaeyoa reta jeco pegua. Ërei Jesucristo uiporara yandepépica pe, agüiye vaerã Tumpa uiporaraca yandeve. Jare Jesucristo umano opaete ivi pegua reta imbaeyoa reta re, yanembaeyoa reta reño'ã co.

<sup>3</sup>Jesucristo iporoyocui reta yayapo yave, cua uicuaaca yandeve yaicuaa co. <sup>4</sup>Ime yave quía, “Aicuaa co Jesucristo”, jei vae, iyapu co uyapo'ã yave Jesucristo iporoyocui reta. Jocu nunga jei'ã añete vae. <sup>5</sup>Ërei Jesucristo jei vae uyapo vae añetete uau ete Tumpa. Jare yaau yave Tumpa, yaicuaa yande co jae Jesucristo imbae reta. <sup>6</sup>Ime yave quía, “Che co jae Cristo imbae”, jei vae, tuico cavi Jesucristo ico rami.

### Mboroyocui ipiau vae

<sup>7</sup>Cherivi reta, cua aicutía añ peve vae mboroyocui ipiau vae'ã co. Jaeño penti mboroyocui indechi vae iyipi güive picuaa vae. Cua mboroyocui indechi vae co jae ñee piyandu iyipi güive vae. <sup>8</sup>Ërei cua mboroyocui mburau regua jecuaño ipiau. Jesucristo yanderau jare pe reta piyerau vi. Echa'ã pītumimbi uasa ma jare tembipe añetete vae jembipe oī.

<sup>9</sup>Ime yave quía, “Che aico tembipe oī vae pe”, jei vae, ãrei umitarēi yave ĩru upurugüirovia vae, jecuaño ico pītumimbi oī vae pe. <sup>10</sup>Ime yave quía ĩru upurugüirovia vae uau vae, jae jecuaño ico tembipe oī vae pe. Jáeramo ipuere uecha cavi uguata cavi vaerã uyepiaca mbae reve. <sup>11</sup>Ërei ime yave quía ĩru upurugüirovia vae umitarēi vae, jae jecuaño ico pītumimbi oī vae pe. Jáeramo jae co uguata oo pītumimbi pe vae rami. Uicuaa'ã queti ra oo oī vae. Echa'ã ipuere'ã etei uecha pītumimbi pe.

<sup>12</sup>Aicutía cuarāi peve, cherai reta, Tumpa umbiasa peve pemaeyoa reta ramo. Umbiasa ma peve Jesucristo jee re. <sup>13</sup>Tae ucuacuaa vae reta pe cua: Aicutía cuarāi peve picuaa Jesucristo ramo. Jae imeño mai ico ndei ivi uyeyapo mbove. Tae tairusu vae reta pe cua: Aicutía cuarāi peve pemiamiri añã guasu ramo. Aicutía cuarāi peve, cherai reta, picuaa yandeRu Tumpa ramo.

<sup>14</sup>Tae ye ucuacuaa vae reta pe cua: Aicutía cuarāi peve picuaa Jesucristo ramo. Jae imeño mai ico ndei ivi uyeyapo mbove. Tae tairusu vae reta pe cua: Aicutía cuarāi peve pepirãta pepurugüirovia re ramo, jare Tumpa ñee ico pepia pe ramo, jare pemiamiri añã guasu ramo.

<sup>15</sup>Agüiye peau cua ivi pegua. Agüiye peau mbaembae ivi pe ñugüinoi vae. Ime yave quía cua ivi pegua uau vae, uau'ã co Tumpa. <sup>16</sup>Cua ivi pegua uau vae reta jecuaño uipota iporopota jare uipota opaete mbaembae ipõra vae uecha vae jare uyembicate imbaembae re. Ërei opaete cua ivi pegua co. YandeRu Tumpa pegua'ã co. <sup>17</sup>Jare cua ivi pegua opata co. Jare opa ma yave, ndarau quía uipota ye. Ërei Tumpa jei vae uyapo vae icota jaeño mai pegua.

### Cristo ndive oyovaicho vae

<sup>18</sup>Cherai reta, ou ma uvãe ara taicuegua reta. Piyandu quirāi Cristo ndive oyovaicho vae outa co. Ërei añave ime ñugüinoi jeta Cristo ndive



oyovaicho vae reta. Jáeramo yaicuaa ou ma co uvãe ara taicuegua reta. <sup>19</sup>Jae reta uyembiyao yandegüi, añetete'ã uñemiĩru yande ndive ramo. Echa'ã añetete uñemiĩru yave yande ndive, jecuae uyembatita tẽi yande ndive. Ërei uyembiyao reta yandegüi, uyecuaa vaerã añetete'ã co uñemiĩru yande ndive.

<sup>20</sup>Ërei Espiritu Santo ou ma pepia pe. Jáeramo pe reta picuaa opaete. <sup>21</sup>Pe reta jae'ã co añete vae picuaa'ã vae. Picuaa co añete vae. Jáeramo aicutía peve. Jare picuaa quirã penti apu añete vae pegua'ã co.

<sup>22</sup>Ime yave quía, “Jesús jae'ã co Cristo”, jei vae, jae co penti iyapu vae. Ime yave quía güirovia'ã yandeRu Tumpa jare Tai re vae, jae co Cristo ndive oyovaicho vae. <sup>23</sup>Ime yave quía güirovia'ã Tumpa Tai re vae, jae uicuaa'ã etei yandeRu Tumpa. Ërei güirovia Tumpa Tai re vae uicuaa co yandeRu Tumpa.

<sup>24</sup>Jáeramo jecuaño perovia iyipi güive piyemboe jese vae. Echa'ã jucuarã yave, jecuaño piñemiĩru cavita Tumpa Tai ndive jare yandeRu Tumpa ndive vi. <sup>25</sup>Jare Tumpa jei ma umeeta co yandeve tecove opa mbae vae.

<sup>26</sup>Cuarã aicutía ma peve, amimbeu vaerã peve jocua uipota pembopia vaerã Tumpa güi vae reta. <sup>27</sup>Ërei Tumpa umee ma peve Espiritu Santo, jare jae ico pepia pe. Jáeramo picuaa ma cua regua ĩru vae umimbeu peve mbae reve. Echa'ã Espiritu Santo pemboe opaete mbaembae re, jare Espiritu Santo jecuaño jei añete vae. Ipuere'ã etei iyapu. Jáeramo jecuaño piñemiĩru Jesucristo ndive Espiritu Santo pemboe rami.

<sup>28</sup>Añave, cherai reta, piñemiatangātu piñemiĩru vaerã Jesucristo ndive. Jucuarã yave, jae ou ye yave, ñaĩta jae jovai yayerovia reve. Ndarau ñanemara jae ndive ñañeovãiti yave. <sup>29</sup>Picuaa quirã Tumpa co jae jupi vae. Jáeramo picuaa vi quirã Tumpa umee ma tecove opa mbae vae opaete jupi vae uyapo vae reta pe.

### Tumpa tai reta

**3** <sup>1</sup>Mase, yandeRu Tumpa ñanereni jae tai retarã. Cua uicuaaca yandeve quirã yandeRu Tumpa yanderou ete. Jáeramo upurugüirovia mbae vae reta yandecuaa cavi'ã, uicuaa'ã Tumpa ramo. <sup>2</sup>Cherivi reta, añave yande co jae Tumpa tai reta. Jare Tumpa ndeiño uicuaaca yandeve quirãita ra ñaĩ. Ërei yaicuaa ñaĩta co Cristo rami jae ou ye yave. Echa'ã yaecha cavita. Jae etei oĩta yanderovai. <sup>3</sup>Jare ime yave quía uãro oĩ uyerovia reve uecha vaerã vae, jae uipota ete ico iyoa mbae reve. Echa'ã Cristo iyoa mbae vae co.

<sup>4</sup>Ime yave quía mbaeyoa uyapo vae, jae uyavi Tumpa iporoyocui. Echa'ã iyoa vae uyavi Tumpa iporoyocui. <sup>5</sup>Jare picuaa quirã Jesucristo uyeyapo cuimbaerã umbai vaerã yanembaeyoa reta. Jare jae iyoa'ã etei. <sup>6</sup>Ime yave quía uñemiĩru Jesucristo ndive vae, jae uipota'ã jecuaño iyoa. Jecuaño uipota iyoa vae Jesucristo imbae'ã co. Uicuaa'ã etei Jesucristo.

<sup>7</sup>Cherai reta, agüiye quía tapembĩtavi. Jesucristo jupi co. Jae ramiño vi jupi vae uyapo vae jupi co. <sup>8</sup>Jecuaño mbaeyoa uyapo vae aña guasu imbae co. Echa'ã aña guasu jecuaño iyoa iyipi güive. Jare Tumpa Tai uyeyapo cuimbaerã umbai vaerã aña guasu iparaviqui.

<sup>9</sup>Tumpa güi tecove opa mbae vae güinoi vae jecuaeño uyapo'ã mbaeyoa. Echa'ã güinoi ma tecove Tumpa güi. Jáeramo ipuere'ã jecuaeño uyapo mbaeyoa. Echa'ã ime ma güinoi tecove opa mbae vae Tumpa güi. <sup>10</sup>Jare yandepuere yaicuaa quía ra co jae Tumpa tai reta jare quía ra co jae ãña guasu tai reta. Ime yave quía jupi vae uyapo mbae vae, jae Tumpa imbae'ã co. Jae ramiño vi ime yave quía ñru upurugüirovia vae uau'ã vae, jae Tumpa imbae'ã co.

<sup>11</sup>Echa'ã iyipì güiive piyandu cua ñee: Yayerau. <sup>12</sup>Agüiye yayapo Caín uyapo rami. Echa'ã Caín ãña guasu imbae co jare uyuca tivì. Jare picuaa co maera uyuca. Caín uyapo icavi mbae vae, jare tivì uyapo jupi vae. Jáeramo Caín uyuca tivì.

<sup>13</sup>Agüiye pepiacañi, cherivì reta, upurugüirovia mbae vae reta pemitarèi yave. <sup>14</sup>Yande yaicuaa yaasa ma co mano güi tecove opa mbae vae pe, ñru upurugüirovia vae reta yaau ramo. Ñru upurugüirovia vae uau'ã vae güinoi'ã tecove opa mbae vae. <sup>15</sup>Ime yave quía ñru upurugüirovia vae umitarèi vae, jae penti upuruyuca vae rami co. Jare picuaa quirãì penti upuruyuca vae güinoi'ã etei tecove opa mbae vae. <sup>16</sup>Jesucristo etei uicuaaca yandeve Tumpa ipuruau. Echa'ã umano yanderé. Jae ramiño vi icavi co yande ñamano vaerã ñru upurugüirovia vae reta re. <sup>17</sup>Èrei ime yave quía mbaembae ivì pegua re icocatu vae, jare ime yave upurugüirovia vae mbaembae uata chupe vae, jocua icocatu vae ñatèi yave omborì mbaembae uata chupe vae, jae güinoi'ã Tumpa ipuruau ipia pe. <sup>18</sup>Cherai reta, añetete yaau yave ñru vae, yayapota mbae yamborì vaerã. Ndarau ñanemiariño yandepurugüirovia re. <sup>19-20</sup>Cuarãì yaicuaata yaico co añete vae re, jare yepe tèi yayembijeco mbae re yandepia pe, èrei yandepiacatuta Tumpa jovaque. Echa'ã Tumpa uicuaa jeta ete opaete yande yaicuaa vae güi. Tumpa uicuaa opaete. <sup>21</sup>Cherivì reta, yayembijeco'ã yave yandepia pe, jecuaeño yandepuere yaya Tumpa re yaquiyè mbae reve. <sup>22</sup>Jare yayerure yave Tumpa pe mbae re, jae umeeta yandeve, yayapo iporoyocui reta ramo. Echa'ã jocua yayapo vae umbiyerovia Tumpa. <sup>23</sup>Jare Tumpa jei yandeve yarovia vaerã Tai Jesucristo jee re jare yayerau vaerã. Jae co mboroyocui Tumpa umimbeu yandeve vae. <sup>24</sup>Jare Tumpa iporoyocui reta uyapo vae uñemñiru Tumpa ndive, jare Tumpa uñemñiru jae ndive. Jare yaicuaa Tumpa uñemñiru co yande ndive. Echa'ã Tumpa umee yandeve Espíritu Santo ico vaerã yandepia pe.

#### Ñee uyuavi vae reta

**4** <sup>1</sup>Cherivì reta, ime cua ivì pe jeta upurumbitavi vae reta. Jae reta jei iyapu reve: “Che co jae penti Tumpa ñnee umimbeu vae.” Jáeramo pepia pe piyemingueta cavi piyandu vae re, agüiye vaerã perovia ñee ou'ã Tumpa güi vae. <sup>2</sup>Yandepuere yaicuaa ou ra ñee Tumpa iEspíritu güi. Echa'ã ñee umimbeu peve vae jei yave Jesús co jae Cristo cuimbaerã uyeyapo vae, jocua ñee ou Tumpa güi. <sup>3</sup>Èrei ñee umimbeu peve vae yave jei'ã Jesús co jae Cristo, jocua ñee ou'ã Tumpa güi. Jocua upurumbitavi vae oyovaicho Cristo ndive. Echa'ã piyandu quirãì Cristo ndive oyovaicho vae reta yugüeruta co. Jare ime ma ñgüinoi ivì pe.

<sup>4</sup>Cherai reta, pe reta co jae Tumpa imbae reta, jare pemiamiri ma Cristo ndive oyovaicho vae reta. Echa'ã Espíritu Santo ico pepia pe jare jae imbaepuere tuicha ete ivi pegua reta iya imbaepuere güi. <sup>5</sup>Echa'ã jae reta ivi pegua co. Jáeramo uyemingueta mbaembae ivi pegua reño, jare upurugüirovia mbae vae reta uyapisaca cavi jese reta. <sup>6</sup>Ërei yande co jae Tumpa imbae reta. Ime yave quía uicuaa Tumpa vae, jae uyapisaca yanderé. Ërei ime yave quía Tumpa imbae'ã vae, jae uyapisaca'ã yanderé. Jare cuarãi yaicuaa añete vae pegua ra penti ñee, ani tavi pegua ra.

### Tumpa mburuau etei co

<sup>7</sup>Cherivi reta, yayerau. Echa'ã Tumpa umee yandeve mburuau. Jare upuruau vae güinoi tecove opa mbae vae Tumpa güi, jare uicuaa Tumpa. <sup>8</sup>Upuruau mbae vae uicuaa'ã Tumpa. Echa'ã Tumpa mburuau etei co. <sup>9</sup>Tumpa ombou Tai jae vaño ivi pe yande ñanoi vaerã tecove opa mbae vae Tai uyapo yandeve vae jeco pegua. Jare jucuarãi Tumpa uicuaaca yandeve yanderau co. <sup>10</sup>Jáeramo yaicuaa ma mburuau añetete vae. Echa'ã tenonde yave yande yaau'ã Tumpa. Ërei Tumpa yanderau jare ombou Tai ivi pe, jae uiporara vaerã yanembaeyoa reta re, agüiye vaerã Tumpa uiporaraca yandeve.

<sup>11</sup>Cherivi reta, Tumpa yanderau ete. Jáeramo jae uipota yayerau vaerã. <sup>12</sup>Mbaeti etei quía uecha Tumpa. Ërei yayerau yave, Tumpa ico yandepia pe, jare mburuau Tumpa coti ñanoi vae jecuaeño ucuacuaa.

<sup>13</sup>Jare Tumpa umee ma yandeve iEspíritu. Jáeramo yaicuaa yande ñañemĩru co Tumpa ndive, jare Tumpa ico yandepia pe. <sup>14</sup>Ore nduecha Tumpa Tai, jare numimbeu ĩru vae reta pe quirãi yandeRu Tumpa ombou Tai ivi pe umbiasa vaerã ivi pegua reta. <sup>15</sup>Ime yave quía, “Jesús co jae Tumpa Tai”, jei vae, jae uñemĩru Tumpa ndive, jare Tumpa ico ipia pe. <sup>16</sup>Yaicuaa Tumpa yanderau co jare yarovia jecuaeño yanderauta co. Tumpa mburuau etei co. Jare upuruau reve ico vae uñemĩru Tumpa ndive, jare Tumpa ico ipia pe.

<sup>17</sup>Jare ñañemĩru Tumpa ndive ramo, mburuau Tumpa coti ñanoi vae ucuacuaa, yandepuere vaerã ñaĩ Tumpa jovai yaquiye mbae reve jocua ara ñanerãa yave. Echa'ã cua ivi pe yaico rambueve, Tumpa ico yandepia pe. <sup>18</sup>Ndarau yaquiye Tumpa güi, jae yanderau ramo. Tumpa ipuruau tuicha ete. Jáeramo ndarau yaquiye chugüi. Echa'ã ime yave quía Tumpa güi uquiye vae, jae ipia pe uyemingueta Tumpa uiporaracata co chupe. Tumpa güi uquiye vae uicuaa'ã Tumpa uau ete co.

<sup>19</sup>Yande yaau Tumpa jae rani yanderau ramo. <sup>20</sup>Ime yave quía, “Che aau Tumpa”, jei vae, umitarēi yave ĩru upurugüirovia vae, iyapu co. Echa'ã uau'ã ĩru upurugüirovia vae, yepe tēi ipuere uecha. Jáeramo ipuere'ã uau Tumpa. Echa'ã uecha'ã etei Tumpa. <sup>21</sup>Jare Tumpa umimbeu ma yandeve cua mboroyocui: “Uau Tumpa vae tuau vi ĩru upurugüirovia vae.”

### Quirãï yaicuaa Tumpa tai reta

**5** <sup>1</sup>Opaete güirovia Jesús co jae Cristo vae reta güinoi tecove opa mbae vae Tumpa güi. Jare uau yandeRu Tumpa vae uau vi Tumpa tai reta. <sup>2</sup>Yaau yave Tumpa jare yayapo yave Tumpa iporoyocui reta, yaicuaa yaau co Tumpa tai reta. <sup>3</sup>Echa'ã yaau yave Tumpa, yayapo iporoyocui reta, jare yavai'ã co yayapo vaerã iporoyocui reta. <sup>4</sup>Tecove opa mbae vae Tumpa güi güinoi vae umiamiri ivi pegua oyovaicho jae ndive vae. Añete co, yandepuere ñamiamiri ivi pegua oyovaicho yande ndive vae yandepurugüirovia rupi. <sup>5</sup>Güirovia Jesús co jae Tumpa Tai vae ipuere umiamiri ivi pegua oyovaicho jae ndive vae.

### Espíritu Santo umimbeu vae

<sup>6</sup>Jesucristo umbipi iparaviqui uyembibautizaca ma i pe yave, jare opa uyapo iparaviqui umano curusu re yave. Jaeño'ã umbipi iparaviqui. Opa uyapo umano curusu re yave. Jare Espíritu Santo umimbeu cua regua. Echa'ã Espíritu Santo jecuaeño umimbeu añete vae. <sup>7</sup>Jare ime ara pe mbapi cua regua umimbeu vae. Echa'ã yandeRu Tumpa jare Ñee jare Espíritu Santo umimbeu päve. Jare cua mbapi pentiño co. <sup>8</sup>Jae ramiño vi ime ivi pe mbapi cua regua umimbeu vae. Echa'ã Espíritu Santo jare i jare Jesús jugüi umimbeu päve penti ramiño. <sup>9</sup>Yarovia ivi pegua reta umimbeu yandevae vae, yepe tēi amo pe umimbeu yandevae añete vae'ã co. Èrei Tumpa umimbeu yandevae vae jecuaeño añete vae. Jáeramo jecuaeño yandepuere yarovia Tumpa umimbeu yandevae vae. Jare jae umimbeu yandevae Jesús regua cuarãi: “Cua co jae cheRai.” <sup>10</sup>Tumpa Tai re güirovia vae uicuaa ipia pe Jesús co jae Tumpa Tai. Jare Tumpa etei umimbeu yandevae cua. Jáeramo cua güirovia'ã vae güirovia'ã Tumpa. Èrei cua añete'ã yave, Tumpa iyaputa tēi co yandevae. <sup>11</sup>Jare Tumpa umimbeu yandevae cua: Jae umee yandevae tecove opa mbae vae. Ime ñanoi cua tecove opa mbae vae Tumpa Tai re yarovia ramo. <sup>12</sup>Tumpa Tai güinoi ipia pe vae ime güinoi tecove opa mbae vae. Tumpa Tai güinoi mbae ipia pe vae güinoi'ã tecove opa mbae vae.

### Picuaa penoi co tecove opa mbae vae

<sup>13</sup>Pe reta perovia Tumpa Tai jee re. Jáeramo aicutía cua peve picuaa vaerã penoi co tecove opa mbae vae. <sup>14</sup>Jare yandepuere yarovia catu Tumpa. Echa'ã yaicuaa Tumpa uyandu co yandevae yayerure yave chupe mbae jae uipota yayerure vaerã chupe jese vae re. <sup>15</sup>Jare cuarãi yayerure chupe mbae re yave, yaicuaa jae uyapota co yandiyerure. Echa'ã yaicuaa jae uyandu co yandevae.

<sup>16</sup>Penti upurugüirovia vae uyapo yave mbaeyoa, ñru upurugüirovia vae ipuere uyerure Tumpa pe jese, jocua mbaeyoa mano pegua'ã yave. Jucuarãi yave, Tumpa umaeñota mbaeyoa uyapo vae re icono vaerã. Ime co penti

mbaeyoa mano pegua. Penti upurugüirovia vae uyapo yave jocua nunga mbaeyoa, ñru upurugüirovia vae agüiye tuyerure Tumpa pe jese. <sup>17</sup>Opaete mbae jupi mbae vae mbaeyoa co. Èrei ime mbaeyoa mano pegua'ã vae.

<sup>18</sup>Yaicuaa tecove opa mbae vae Tumpa güi güinoi vae jecuaeño uyapo'ã mbaeyoa. Echa'ã Tumpa Tai etei uyandareco jese agüiye vaerã aña guasu uipisi.

<sup>19</sup>Yaicuaa yande co jae Tumpa tai reta jare quirãi aña guasu güinoi mbaepuere opaete upurugüirovia mbae vae reta re.

<sup>20</sup>Jae ramiño vi yaicuaa Tumpa Tai ou ma co cua ivi pe jare umee yandevé yaicuaa vaerã Tumpa añetete vae. Ñañemĩru ma Tumpa ndive. Echa'ã ñañemĩru ma Tumpa Tai Jesucristo ndive. Jae co Tumpa añetete vae. Jae umee yandevé tecove opa mbae vae.

<sup>21</sup>Cherai reta, agüiye pemiadora tumpa-raanga reta. Amén.

# SEGUNDA CARTA DEL APOSTOL SAN JUAN

---

<sup>1</sup>Che co jae Juan. Jecuaño aico upurugüirovia vae reta itenondeguarã. Nde co jae penti cuña Tumpa uiparavo vae. Aicuatía aĩ cua tupapire ndeve jare nemembi reta pe. Che puau añete vae perovia ramo. Jae ramiño vi opaete añete vae uicuaa vae reta perau che puau rami. <sup>2</sup>Echa'ã jocua jecuaño añete vae ico yandepia pe, jare icota yande ndive jaeño mai pegua.

<sup>3</sup>YandeRu Tumpa jare yandeYa Jesucristo - jae co yandeRu Tai - tumee peve ipiacavi jare ipuruparareco jare ipiacatu, añetete co peau ramo.

## Moromboe añete vae Cristo regua güirovia vae

<sup>4</sup>Aicuaa yave nemembi reta yugüireco añete vae rupi, ayerovia ete. Echa'ã yandeRu yandeocui jucuarãi yaico vaerã. <sup>5</sup>Jare añave che numiñera, cherindi, nemandúa vaerã iyipi güive yaicuaa vae re. Echa'ã iyipi güive Tumpa yandeocui yayerau vaerã. Cua aicuatía ndeve vae mboroyocui ipiau vae'ã co. <sup>6</sup>Añetete yaau yave Tumpa, yayapota Tumpa iporoyocui reta. Jare iyipi güive piyandu cua mboroyocui. Jáeramo icavi co jecuaño piyapo vaerã.

<sup>7</sup>Echa'ã ime ma ivi pe ñugüinoi jeta upurumbitavi vae reta. Jae reta jei'ã Jesús co jae Cristo cuimbaerã uyeyapo vae. Jocua upurumbitavi vae reta oyovaicho Cristo ndive. <sup>8</sup>Yaparaviqui ma tanta ñanoi vaerã Tumpa umeeta yandeve vae. Jáeramo piñemoa, agüiye vaerã pemicañi. Aipota penoi vaerã opaete Tumpa uipota penoi vaerã vae.

<sup>9</sup>Amocue vae ipia pe uyemingueta tēi jae reta uicuaa cavi ete mbaembae regua ĩru vae reta güi. Ērei güirovia'ã yave moromboe añete vae Cristo regua, uicuaa'ã Tumpa. Moromboe añete vae Cristo regua güirovia vae uicuaa yandeRu Tumpa. Jae ramiño vi uicuaa Tumpa Tai. <sup>10</sup>Ou yave pepi penti oporomboe vae, umimbeu'ã yave peve cua moromboe añete vae, agüiye pemaño jese upita vaerã perenta pe, jare agüiye pere chupe: “Tumpa ndiveño.” <sup>11</sup>Echa'ã pere yave chupe: “Tumpa ndiveño”, piñemiñru ma jae ndive icavi mbae vae uyapo vae re.

**Aipota aa pepi**

<sup>12</sup>Aipota jeta jae peve, ãrei jaeño ma jaeta peve cua tupapire pe. Echa'ã aipota aa pepi ñanemiari yandiyupe vaerã, yayerovia ete vaerã.

<sup>13</sup>Ndepiquii Tumpa uiparavo vae imembi reta jei ndeve: “Tumpa ndiveño eĩ.” Amén.

# TERCERA CARTA DEL APOSTOL SAN JUAN

---

<sup>1</sup> Che co jae Juan. Jecuaeño aico upurugüirovia vae reta itenondeguarã. Che nduau, cherivi Gayo, añete vae nderovia ramo.

<sup>2</sup> Cherivi, aicuaa quirãi nde ndico cavi Tumpa coti. Jare jecuaeño ayerure Tumpa pe nderé, jecuaeño ndico cavi vaerã opaete mbaembae re jare agüiye vaerã nembraerasi. <sup>3</sup> Echa'ã amocue yanderivi reta yugüeru cua pe umimbeu cheve quirãi añete vae ico ndepia pe jare quirãi nde jecuaeño ndico añete vae rupi. Jáeramo ayerovia ete nderé. <sup>4</sup> Añete co, ayerovia ete ayandu yave quirãi cheraí reta jecuaeño yugüireco anete vae rupi.

## **Gayo ombori ñru upurugüirovia vae reta**

<sup>5</sup> Cherivi, ñru upurugüirovia vae reta nembori yave, yepe tẽi ndicuaa'ã reta, ndiyeyocui cavi neí Tumpa pe. <sup>6</sup> Jae reta etei umimbeu ndepuruau upurugüirovia vae cua pe uyembati vae reta pe. Icavi ete co nembori reta vaerã yugüeru yave nerenta güi. Ndiyapota Tumpa uipota ndiyapo vaerã vae. <sup>7</sup> Echa'ã jae reta vi uyeyocui ñugüinoi Tumpa pe. Jare uguata reta opaete que rupi rambueve, jei'ã upurugüirovia mbae vae reta pe ombori vaerã. <sup>8</sup> Jáeramo icavi co yande yambori reta vaerã. Echa'ã cuarãi yandepuere ñañemiñru jae reta ndive umimbeu vaerã ñru vae reta pe añete vae regua.

## **Icavi mbae vae Diótfrefes uyapo vae**

<sup>9</sup> Aicuatía ma cua re upurugüirovia vae uyembati vae reta pe. Ërei Diótfrefes uipota'ã uyapo che jae chupe uyapo vaerã vae. Echa'ã icavi ete echa chupe uyemitenonde vaerã ñru upurugüirovia vae reta ipite pe. <sup>10</sup> Jáeramo che aa yave pepi chemanduata co Diótfrefes uyapo vae re. Jae uyemingueta icavi mbae vae orecoti. Ombori'ã etei upurugüirovia vae ambie coti güi pepi yugüiraa vae reta. Jae ramiño vi jei ñru upurugüirovia vae reta pe agüiye vaerã ombori reta. Jare ime yave upurugüirovia vae reta iquirẽi ombori reta vae, Diótfrefes umaeño'ã jese reta uyembati vaerã ñru upurugüirovia vae reta ndive.



### Opaete vae uyemingueta cavi Demetrio re

<sup>11</sup>Cherivi, jecuaeño iyapo icavi vae. Agüiye iyapo icavi mbae vae. Icavi vae uyapo vae Tumpa tai co. Ërei icavi mbae vae uyapo vae uicuaa'ã Tumpa.

<sup>12</sup>Opaete vae uyemingueta cavi Demetrio re. Echa'ã jae jecuaeño ico añete vae rupi. Ore vi numimbeu peve jae jecuaeño uyapo icavi vae. Jare picuaa ore numimbeu peve vae añete co.

### Saludo reta

<sup>13</sup>Aipota tēi jeta jae ndeve, ãrei jaeño ma jaeta ndeve cua tupapire pe.  
<sup>14</sup>Ërei aipota aa apou ndepi imambaeño ñanemiari yandiyupe vaerã.

<sup>15</sup>Tumpa tumee ndeve ipiacatu. Neamigo reta jei ndeve Tumpa ndiveño eĩ. Tumpa ndiveño toĩ cheamigo joco pe ñugüinoi vae reta.

# LA CARTA DEL APOSTOL SAN JUDAS

---

<sup>1</sup> Che co jae Judas. Che co jae Jacobo tivi. Che ayeyocui Jesucristo pe. Aicuatía aĩ cua tupapire yandeRu Tumpa uiparavo vae reta pe. Tumpa perau jare peñoño tee Jesucristo peguarã. Jesucristo jecuaño uyandareco peré.

<sup>2</sup> Tumpa tumee peve jeta ete ipuruparareco jare ipiacatu jare ipuruau.

## **Moromboe añete mbae vae reta**

*(2 Pedro 2.1-7)*

<sup>3</sup> Cherivi reta, aipota ete aicuatía peve yandiyembiasa regua. Ërei icavi echa cheve aicuatía vaerã peve ñru mbaembae regua. Jáeramo cua tupapire pe aipota pumbiaracuaa pepuere vaerã piñemiatangãtu yandepurugüirovia re. Echa'ã Tumpa uicuaaca cua mburugüirovia oñoño tee iyupeguarã vae reta pe. Agüiye etei perovia moromboe añete mbae vae. <sup>4</sup> Echa'ã amocue cuimbae Tumpa jei vae uyapo mbae vae uñemiñru viari pe reta ndive. Jae reta jei Tumpa ipiacavi chupe reta ramo, ipuere uyapo pichii vae. Ërei jae reta oyovaicho yandeYa Jesucristo ndive. Ima ma Tumpa uicuaaca yandeve quirã jae reta uiporarata co.

<sup>5</sup> Jáeramo yepe tẽi picuaa ma, ãrei aipota pumimandúa ye cua re: YandeYa uepi Israel pegua reta güeru Egipto güi. Ërei taicue rupi opa uyuca jei vae güirovia'ã vae reta. <sup>6</sup> Jae ramiño vi Tumpa uiporaraca amocue ángel pe. Echa'ã tenonde voi Tumpa umee chupe reta mbaepuere. Ërei jae reta uipota'ã uyeyocui Tumpa pe ramo, ueya yugüirecoarenda. Jáeramo Tumpa uñapiti oñoño reta pitumimbi pe. Joco pe jaño mai pegua uãro ñugüinoi Tumpa uãa reta vaerã jocua ara pe. <sup>7</sup> Jae ramiño vi Tumpa uiporaraca Sodoma jare Gomorra jare tenta guasu iyipi rupi ñugüinoi vae reta pegua reta pe. Echa'ã jocua tenta guasu reta pegua reta jecuaño uyapo aguasa jare cuimbae joco pe yugüireco vae reta jecuaño uyerereco uyupii. Jáeramo Tumpa uiporaraca ete chupe reta uicuaaca vaerã ñru vae reta pe agüiye vaerã uyapo jae reta uyapo rami. Jáeramo Tumpa opa uyuca reta tata pe. Jare jocua tata uyemijaanga tata opa mbae vae re.

<sup>8</sup>Jae ramiño vi moromboe añete mbae vae re oporomboe vae reta ipia pe uyemingueta cavi'ã. Jae reta uyapo pichĩ vae jete pe, jare güirĩro mburuvicha reta, jare jei icavi mbae vae mbaepuere güinoi vae reta coti. <sup>9</sup>Ërei Miguel etei - jae co ángel reta itenondegua - uipiu umbijeco vaerã aña guasu. Echa'ã jae uyeaca yave aña guasu ndive Moisés jetecue re, jei chupe: “YandeYa tuñeengata ndeve.” <sup>10</sup>Ërei moromboe añete mbae vae re oporomboe vae reta jei icavi mbae vae uicuaa mbae vae coti. Jae reta maemimba reta rami co. Echa'ã yugüireco jei vae reño. Jáeramo uiporaracata. <sup>11</sup>Tumpa uiporaracata chupe reta. Uyapo reta Caín uyapo rami. Jae ramiño vi corepoti uipota ete ramo, uyapo reta icavi mbae vae Balaam uyapo rami. Jae ramiño vi uyapo reta Tumpa jei chupe reta agüiye vaerã uyapo vae, Coré uyapo rami. <sup>12</sup>Pe reta piyembati yave pecaru vaerã piyerau reve, jae reta vi ucaru pe reta ndive imara mbae reve. Ërei icavi'ã co ucaru reta vaerã pe reta ndive. Echa'ã añetete'ã co peĩru reta. Jae reta amapĩtu ama mbaeti güinoi vae reta rami co. Echa'ã jocua nunga amapĩtu tanta osi ivitu ete yave, ãrei ama oqui'ã etei. Jae ramiño vi temiti reta ía ipiru ndei ipuere yagüiye mbove vae rami co. Echa'ã taicue rupi temiti reta etei ipiru, iya opa omombo japo reta reve ramo. <sup>13</sup>Ou ivitu tanta uyepeyu i guasu íarambo yave, uyeyapo íaparoa tuicha vae, ãrei i íarambo jaño uyecuaa tiriyai. Jocua oporomboe vae reta jocua íaparoa rami co. Echa'ã jae reta uyapo uñemimaraca vaerãño. Jae ramiño vi jae reta yasitata uguata vae reta rami co. Echa'ã yugüiraata pĩtumimbi oĩ vae pe yugüireco vaerã joco pe jaño mai pegua.

<sup>14</sup>Jare Enoc - jae co siete ñemoña pegua Adán güi vae - jae co penti Tumpa ñee aracae umimbeu vae - jei cua reta re cuarã: “Mase, yandeYa outa jeta ete oñono tee iyupeguarã vae reta ndive. <sup>15</sup>Jare ou yave, uãata opaete vae. Uicuaacata quirã Tumpa jei vae uyapo'ã vae reta jecuaño uyapo icavi mbae vae uipota'ã uyapo Tumpa jei vae ramo. Jae ramiño vi uicuaacata quirã jocua iyoa vae reta jei icavi mbae vae icoti.” Jucuarã jei.

<sup>16</sup>Jae reta ñeenguru ñru vae reta re jare ñera ñru vae reta re. Jecuaño yugüireco jei vae reño. Umbiyerovia-raangaiño ñru vae reta. Echa'ã uipotañoi ñru vae reta umee vaerã mbaembae chupe reta.

### **Piñemimirãta pepurugüirovia re**

<sup>17</sup>Ërei, cherivi reta, pemandúa yandeYa Jesucristo jemimondo reta umimbeu peve vae re. <sup>18</sup>Echa'ã jae reta umimbeu peve quirã ara taicuegua reta pe amocue vae oyoyaita Tumpa ñee umimbeu vae reta jare quirã jecuaño yugüirecota jei vae reño Tumpa jei vae uyapo'ã ramo. <sup>19</sup>Jocua reta iporomboe güirovia vae reta uyembiyao moromboe añete vae güirovia vae reta güi. Echa'ã jocua reta uicuaa'ã etei Tumpa jare mbaeti güinoi Espĩritu Santo ipia pe. <sup>20</sup>Ërei piñemimirãta pepurugüirovia re, cherivi reta. Echa'ã pepurugüirovia Tumpa pegua co. Jare piyerure Espĩritu Santo imbaepuere rupi. <sup>21</sup>Jecuaño pico cavi, Tumpa ipuere

vaerã uicuaaca peve ipuruau. Jare jecuaeño peãro piyerovia reve penoi vaerã tecove opa mbae vae yandeYa Jesucristo ipuruparareco rupi.

<sup>22</sup>Piparareco amocue ipurugüirovia re ipirãta'ã vae. <sup>23</sup>Pembori ñru vae reta uyembiasaca vaerã mbaembae tata güi peepi rami. Piparareco reta, ãrei piñemoa vi imbaeyoa reta güi. Echa'ã icavi co piñamitãa vaerã chugüi imbaeyoa reta.

### **Yambiadora Tumpa**

<sup>24-25</sup>Añave yambiadora Tumpa. Echa'ã jae yanembiasa yandeYa Jesucristo uyapo vae rupi. Jaeño co Tumpa. Jae uyembioraca ete co jare güinoi mbaepuere tuicha ete vae añave jare jaeño mai pegua. Jáeramo ipuere umee peve mbaepuere agüiye vaerã pepia chugüi jare piyemboi vaerã teco mbae reve jae jovai. Joco pe peecheda Tumpa jare piyerovia eteta. Amén.

# APOCALIPSIS

## O REVELACIÓN A SAN JUAN

---

**1** <sup>1</sup>Che co jae Juan. Che co jae Jesucristo jembiocui. Tumpa uicuaaca Jesucristo pe imambae uyeyapota vae. Jare Jesucristo ombou ángel uyeyocui chupe vae umimbeu vaerã cheve, che amimbeu-yuapi ye vaerã Jesucristo jembiocui reta pe. <sup>2</sup>Cua aicutatía vae Tumpa ñnee co. Jesucristo etei umimbeu cheve cua. Che aecha cua opaete.

<sup>3</sup>Cua amimbeu peve ndei uyeyapo mbove. Cua umingueta vae reta jare cua uyandu vae reta uyeroviata co, uyapo reta yave Tumpa jei vae cua pe aicutatía vae. Echa'ã uyaro ma ara reta cua amimbeu peve vae uyeyapo vaerã.

### **Siete tenta guasu Asia pegua pe uyembatimbati vae reta pe**

<sup>4-5</sup>Che aicutatía añ cua tupapire pepurugüirovia vae siete tenta guasu Asia pegua pe piyembatimbati vae reta pe. Tumpa jare Espíritu Santo siete jembiape güinoi vae - jae Tumpa iguapia jovai oĩ - jare Jesucristo tumee peve ipiacavi jare ipiacatu. Tumpa iyipi güive jare añave jecuaño ico. Jare jae jecuae oĩa. Jesucristo co jae jecuaño umimbeu cavi Tumpa regua vae. Jae tenonde voi icove ye ou umanocue vae reta ipite güi. Jae co opaete ivi pegua reta juvicha guasu reta Juvicha. Jae yanderau jare umbai opaete yanembaeyoa reta jugüi pe. <sup>6</sup>Jare yandeapo mburuvicha guasu retarã jare sacerdote retarã yayeyocui vaerã Tumpa pe - jae co Jesucristo Tu. Jesucristo tuyembiadoraca jare tugüinoi opaete mbaepuere jaño mai pegua. Amén.

<sup>7</sup>Mase, jae outa amapĩtu reve, jare opaete vae uechata. Israel pegua reta vi uechata. Echa'ã Israel pegua reta uicutuca. Jare opaete jocua ivi pegua reta ipiatiti eteta jese. Cuarãi tuyeyapo. Amén.

<sup>8</sup>—Che co jae Alfa jare Omega jee vae —jei yandeYa Tumpa—. Che co jae tenondegua vae jare taicuegua vae. Che co jae añave jare iyipi güive ico vae. Che co jae jecuae oĩa vae. Che co jae opaete mbaepuere güinoi vae —jei.

### Juan uecha cuimbaerã uyeyapo vae

<sup>9</sup>Che co jae periquei Juan, Jesús re yarovia ramo. Che vi aiporara aĩ pe reta rami Tumpa iporoyocuia jeco pegua, jare chepiaguasu pe reta pepiaguasu rami.

Che aĩ ivi i mbite pe oĩ vae Patmos jee vae pe penti peresorã Tumpa ñnee amimbeu jare Jesús regua chemiari ramo. <sup>10</sup>Espíritu Santo imbaepuere rupi añevãe domingo ara pe, jare ayandu cheraicue coti ñee jiapu ete vae. Jiapu penti trompeta rami. <sup>11</sup>Jare ñee jei:

—Che co jae Alfa jare Omega jee vae. Che co jae tenondegua vae jare taicuegua vae.

Jayave jei:

—Icuatía penti tupapire pe ndeechata vae. Jayave emondo tupapire upurugüirovia vae siete tenta guasu Asia pegua pe uyembatimbati vae reta pe. Emondo Efeso pe, jare Esmirna pe, jare Pérgamo pe, jare Tiatira pe, jare Sardis pe, jare Filadelfia pe, jare Laodicea pe —jei cheve.

<sup>12</sup>Jayave ayerova aecha vaerã chemingueta vae. Jare ayerova amae yave, aecha siete vela iguapica oro pegua reta. <sup>13</sup>Jare aecha jocua siete vela iguapica reta ipite pe penti cuimbae. Cuimbaerã uyeyapo vae echa cheve. Güinoi temimonde pucu ipi rupi uvãe vae. Jare ipitía rupi aecha güinoi penti cuacuaa oro pegua. <sup>14</sup>Ía tĩ ovecha-raagüe tĩ vae rami echa cheve. Tĩ asĩ co roi tĩ asĩ vae rami. Jare jesa tata jendĩ oĩ vae rami co. <sup>15</sup>Ipi bronce uyembacu yave tata pe uyepiro ete vae rami echa cheve. Jare uyemingueta yave, ñnee jiapu ete i guasu jiapu rami. <sup>16</sup>Jae güinoi siete yasitata reta ipo iyacata pe, jare iyuru güi oẽ penti quisepucu jaimbeyovai vae. Jova jembipe ete guarasi ara mbite yave jembipe rami.

<sup>17</sup>Jare aecha yave, aa jae jovai cuimbae umano vae rami. Jayave jae oñono ipo iyacata cheré jare jei cheve:

—Agüiye equiye. Che co jae tenondegua vae jare taicuegua vae —jei—. <sup>18</sup>Che co jae jecuaeño ico vae. Amano, ãrei, mase, añave aico jaeño mai pegua. Jare che anoi mbaepuere mano jare cañitei re —jei—. <sup>19</sup>Icuatía opaete mbaembae ndeecha vae regua jare emimbeu mbae re uyemijaanga jocua mbaembae. Jucuarãi nemimbeuta mbae taicue rupi uyeyapota vae —jei cheve—. <sup>20</sup>Taicuaaca ndeve mbae re uyemijaanga siete yasitata reta chepo checata pe ndeecha vae jare mbae re uyemijaanga siete vela iguapica oro pegua reta. Siete yasitata reta uyemijaanga siete ángel reta re. Jocua siete ángel reta uyeyocui upurugüirovia vae jocua siete tenta guasu reta pe uyembatimbati vae reta pe. Jare siete vela iguapica reta uyemijaanga upurugüirovia vae jocua siete tenta guasu reta pe uyembatimbati vae reta re —jei—.

### Ñee Efeso peguarã

**2** <sup>1</sup>Icuatía ángel upurugüirovia vae Efeso pe uyembati vae reta pe uyeyocui vae pe cuarãi: ‘Cua jei siete yasitata reta ipo iyacata pe uipisi vae - jae siete vela iguapica oro pegua reta ipite pe uguata vae co:

<sup>2</sup>Che aicuaa peparaviqui. Tanta peparaviqui jare pepiaguasu vi. Piñemĩru'ã icavi mbae vae uyapo vae reta ndive. Ime pepite pe ñugüinoi jocua “Che co jae Jesús jemimondo” jei vae reta. Ërei jae reta Jesús jemimondo reta'ã co. Jare pe reta peeca picuaa vaerã añetete ra co Jesús jemimondo reta. Jare añave picuaa iyapu reta co. <sup>3</sup>Jare pe reta cherau ramo, pepiaguasu jare pemiaguanta pecueri mbae reve.

<sup>4</sup>Ërei chepuere pumbijeco mbae re. Jae co cua: Cherau'ã ma tenonde yave cherause vae rami. <sup>5</sup>Jáeramo pemandúa quirã tenonde yave cherau ete. Peeya piyemingueta icavi mbae vae pepia pe oĩ vae, jare piyapo ye mbaraviqui reta tenonde yave piyapose vae rami. Echa'ã peeya'ã yave piyemingueta icavi mbae vae pepia pe oĩ vae, aata imambae pepi jare ambisirita pevela iguapica jenda güi.

<sup>6</sup>Ërei ayerovia cua re: Nicolaíta reta uyapo vae icavi'ã peve. Echa'ã jocua icavi'ã ete vi cheve.

<sup>7</sup>Uipota uyandu vae tuyapisaca Espiritu Santo upurugüirovia vae uyembatĩmbati vae reta pe jei vae re. Upurumiamiri vae pe ameeeta jou vaerã jocua ivira tecove umee vae güi. Jocua ivira ime paraíso mbite pe oĩ. Joco pe ico Tumpa.' Jucuarãi icuatía —jei—.

#### Ñee Esmirna peguarã

<sup>8</sup>Jare icuatía ángel upurugüirovia vae Esmirna pe uyembati vae reta pe uyeyocui vae pe cuarã: ‘Cua jei jocua tenondegua vae jare taicuegua vae - jae umano, ãrei icove ye: <sup>9</sup>Che aicuaa peparaviqui jare quirã piporara jare peparavete (ãrei picocatu co Tumpa coti). Aicuaa vi quirã jocua judío-raanga reta jei icavi mbae vae pecoti. Yepe tẽi jei reta: Ore co jae judío reta, ãrei jae'ã co. Echa'ã jae reta uyapo Satanás jemiapo. <sup>10</sup>Agüiye pequiye piporarata vae güi. Mase, aña guasu peñocata amocue pe reta peresoriru pe, uyecuaa vaerã pepurugüirovia añetete ra. Jare piporarata diez ara pegua. Jecuaño perovia cheré, yepe tẽi aramoi pemanota pepurugüirovia jeco pegua. Jucuarãi yave, ameeeta peve tecove opa mbae vae.

<sup>11</sup>Uipota uyandu vae tuyapisaca Espiritu Santo upurugüirovia vae uyembatĩmbati vae reta pe jei vae re. Upurumiamiri vae re ndarau etei mbaepuere güinoi mano mocuia.'

Jucuarãi icuatía —jei—.

#### Ñee Pérgamo peguarã

<sup>12</sup>Jare icuatía ángel upurugüirovia vae Pérgamo pe uyembati vae reta pe uyeyocui vae pe cuarã: ‘Cua jei quisepucu jaimbeyovai vae güinoi vae:

<sup>13</sup>Aicuaa peparaviqui jare quiape pico. Echa'ã perenta guasu pe jeta ete vae uyapo Satanás jemiapo. Ërei pe reta jecuaño picuaaca quirã perovia cheré. Peeya'ã etei pepurugüirovia, yepe tẽi yavai ete peve jocua ara reta pe Antipas uyeyucaca pepite pe yave. Antipas uyeyucaca, chemimbeu cavi ramo. Echa'ã Satanás etei ico perenta guasu pe.

<sup>14</sup>Ērei chepuere pumbijeco mbovi mbaembae re. Echa'ã ime pepite pe ñugüinoi Balaam iporomboe güirovia vae reta. Balaam ombae Balac quirã ipuere umbiavai Israel pegua reta. Echa'ã jae reta umbipi jou tembú tumpa-raanga reta pe ñemee vae jare uyapo aguasa. <sup>15</sup>Jae ramiño vi ime pepite pe ñugüinoi nicolaíta reta iporomboe güirovia vae reta, jare jocua moromboe icavi'ã ete cheve.

<sup>16</sup>Jáeramo peeya piyemingueta icavi mbae vae pepia pe oĩ vae. Peeya'a yave, aata pepi imambae jare añerãrota jae reta ndive. Aiporuta jese reta quisepecu cheyuru güi oẽ vae.

<sup>17</sup>Uipota uyandu vae tuyapisaca Espíritu Santo upurugüirovia vae uyembatimbatí vae reta pe jei vae re. Upurumiamiri vae pe ameeta jocua maná uyecuaa mbae vae. Ameeta vi chupe penti ita tĩ vae. Jocua ita re ime penti tee ipiau vae uyecuatía oĩ. Jaeño ameeta ita chupe vae uicuaata jocua tee.'

Jucuarã icuatía —jei—.

### Ñee Tiatira peguarã

<sup>18</sup>Jare icuatía ángel upurugüirovia vae Tiatira pe uyembatí vae reta pe uyeyocui vae pe cuarã: 'Cua jei Tumpa Tai. Jae jesa tata jendi oĩ vae rami co, jare ipi bronce uyembacu yave tata pe uyepiro ete vae rami:

<sup>19</sup>Che aicuaa reparaviqui jare pepuruau jare pepurugüirovia jare quirã piyeyocui cheve jare pepiaguasu. Jare jecuaeño reparaviqui tanta. Añete co, tenonde yave reparaviqui tanta, ěrei taicue rupi reparaviqui tanta ete.

<sup>20</sup>Ērei chepuere pumbijeco cua re: Pemaño jocua cuña Jezabel jee vae re oporomboe vaerã pepite pe. Jae jei jae co penti cuña Tumpa ñee umimbeu vae. Ērei jae umbitavi cherembiocui reta. Echa'ã jae umimbeu chupe reta uyapo vaerã aguasa jare jou vaerã tembú tumpa-raanga reta pe ñemee vae. <sup>21</sup>Jare amee ma ara reta jocua cuña pe ueya vaerã iyemingueta icavi mbae vae ipia pe oĩ vae, agüiye vaerã uyapo aguasa. Ērei jecuaeño uyapo jocua icavi mbae vae. <sup>22</sup>Mase, amimbaerasita jocua cuña, jare aiporaraca eteta jae ndive menda re uyuvanga vae reta pe, ueya'ã reta yave icavi mbae vae jae ndive uyapo vae. <sup>23</sup>Jare ayucata jocua cuña imembi reta, jare opaete upurugüirovia vae uyembatimbatí vae reta uicuaata quirã che aicuaa opaete vae iyemingueta ipia pe oĩ vae. Jare ameeta peve penti penti mbae piyapo vae rupi. <sup>24-25</sup>Ērei tae peve cua: Cua reño pumbijeco. Ērei piñemimírãta mburugüirovia penoi vae re che ayu ye regua. (Cuarã chemiari aĩ upurugüirovia vae Tiatira pegua jocua cuña iporomboe güirovia mbae vae reta pe. Echa'ã jae reta uicuaa'ã Satanás iporomboe uyecuaa mbae vae jei chupe vae.)

<sup>26</sup>Upurumiamiri vae pe ameeta mbaepuere ipuere vaerã oyocui ivi pegua reta, jecuaeño yave uyapo cheparaviqui. <sup>27</sup>Jare oyocuita penti popoca fierro pegua pe. Güinoita mbaepuere jese reta mbaepuere penoi pembiperasoraso vaerã penti iru ñaeu pegua vae rami. Echa'ã cheRu umee cheve etei cua nunga mbaepuere. <sup>28</sup>Jare ameeta chupe yasitata neimbove asi uyecuaa vae.



<sup>29</sup>Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarãi icuatía —jei—.

### Ñee Sardis peguarã

**3** <sup>1</sup>Jare icuatía ángel upurugüirovia vae Sardis pe uyembati vae reta pe uyeyocui vae pe cuarãi: 'Cua jei jocua siete yasitata reta güinoi vae - jae co Espiritu Santo siete jembiapo güinoi vae uyeyocui chupe vae:

Che aicuaa peparaviqui. Ìru vae reta jei tẽi picove catu co, ãrei picove catu'ã co Tumpa coti. <sup>2</sup>Piñemoa ngatu jare piñemimirãta jocua imeño penoi vae re. Echa'ã pepirãta'ã etei jese. Piyapo'ã mbaraviqui Tumpa uipota piyapo vaerã vae. <sup>3</sup>Jáeramo pemandúa Tumpa umee peve vae re jare quirãi piyapisaca jese. Piñemimirãta jocua re, jare peeya piyemingueta icavi mbae vae pepia pe oĩ vae. Echa'ã piñemoa ngatu'ã yave, aata pepi immbae penti imonda vae uique o pe rami, jare ndarau picuaa quirãi yave ra aata pepi.

<sup>4</sup>Ime mbovi Sardis pegua uyapo'ã icavi mbae vae reta. Jae reta uguatata che ndive jemimonde tĩ vae reve icavi vae uyapo vae ramo.

<sup>5</sup>Upurumiamiri vae pe ameeta temimonde tĩ vae omonde vaerã, jare ndarau ambai jee libro tecove opa mbae vae pegua güi. Aicuaacata cheRu jare ángel cheRu pe uyeyocui vae reta jovaque jae co chembae.

<sup>6</sup>Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarãi icuatía —jei—.

### Ñee Filadelfia peguarã

<sup>7</sup>Jare icuatía ángel upurugüirovia vae Filadelfia pe uyembati vae reta pe uyeyocui vae pe cuarãi: 'Cua jei iyoa mbae vae. Jae co añete vae jei vae. Jae güinoi mbaepuere Tumpa umee David pe vae. Jocua mbaepuere penti onque illave rami co. Echa'ã jae uipea yave penti onque, mbaeti quía ipuere uyuquenda ye. Jae ramiño vi jae uyuquenda yave penti onque, mbaeti quía ipuere uipea ye:

<sup>8</sup>Che aicuaa peparaviqui. Mase, aechaca ma peve penti onque uyepea oĩ vae. Mbaeti quía ipuere uyuquenda jocua onque. Pempaepuere michi co, ãrei piyapo che jae peve piyapo vaerã vae jare checuacu'ã.

<sup>9</sup>Ime pepite pe ñugüinoi jocua uyapo Satanás jembiapo vae reta. Yepe tẽi jei reta: Ore co jae judío reta, ãrei jae'ã co. Iyapu reta. Mase, ayapota chupe reta yugüiraa vaerã uyeatica perovai, jare aicuaacata chupe reta che puau co.

<sup>10</sup>Piyapo che jae peve piyapo vaerã vae pepiaguasu reve ramo, che puepita opaete ivi pe yugüireco vae reta uiporarata vae güi. <sup>11</sup>Mase, aa yeta immbae. Piñemimirãta mburugüirovia penoi vae re, agüiye vaerã ìru vae pe unemee ndecorona ndegüi.

<sup>12</sup>Upurumiamiri vae pe ameeta ico vaerã cheTumpa jo pe, jare ndarau etei oẽ chugüi. Güinoita mbaepuere tuicha vae penti oquita ipirãta ete

vae rami. Jare aicuatiaata jese cheTumpa jee jare cheTumpa jenta guasu jee - jae co Jerusalén ipiau vae cheTumpa ombouta ara güi vae. Jae ramiño vi aicuatiaata jese cheree ipiau vae.

<sup>13</sup>Uipota uyandu vae tuyapisaca Espíritu Santo upurugüirovia vae uyembatimbatí vae reta pe jei vae re.'

Jucuarãi icuatía —jei—.

### Ñee Laodicea peguarã

<sup>14</sup>Jare icuatía ángel upurugüirovia vae Laodicea pe uyembati vae reta pe uyeyocui vae pe cuarãi: 'Cua jei jocua Amén jee vae. Jae jecuaeño umimbeu cavi añete vae Tumpa regua. Jae co opaete Tumpa uyapo vae iYa:

<sup>15</sup>Che aicuaa peparaviqui, jare quirãi chemitarëi'ã jare cherau'ã. Icavita tõi co cheve chemitarëi yave ani cherau yave. <sup>16</sup>Chemitarëi'ã jare cherau'ã. Jáeramo pomombota, penti cuimbae tembú uyúe mbae vae iyuru güi omombo rami.

<sup>17</sup>Echa'ã pe reta pere cuarãi: Yaicocatu co. Jeta mbaembae ñanoi. Mbaeti etei mbae uata yandevé. Jucuarãi pere. Ërei picuaa'ã quirãi pepiatiti ete, jare peparavete, jare peresa mbae, jare penani.

<sup>18</sup>Che pumbiaracuaa pegua vaerã chegüi oro tata pe uyembichiriri iquiacue oë vaerã chugüi vae, picocatu vaerã, jare temimonde tĩ vae peremimonderã, agüiye vaerã penani yave pemara. Jae ramiño vi che pumbiaracuaa piñono vaerã moa peresa pe pepuere vaerã pemae. <sup>19</sup>Che aiporaraca aau vae pe, amboe vaerã. Jáeramo piñemiatangātu jare peeya piyemingueta icavi mbae vae pepia pe oĩ vae.

<sup>20</sup>Mase, che ayemboi aĩ onque pe jare ambopu aĩ onque. Ime yave quía chiñee uyandu vae, uipea yave onque, aiqueta acarú vaerã jae ndive, jare jae ucaruta che ndive.

<sup>21</sup>Upurumiamiri vae pe ameeta uguapi vaerã che ndive cheguapia pe. Echa'ã che vi apurumiamiri jare aguapi cheRu ndive iguapia pe.

<sup>22</sup>Uipota uyandu vae tuyapisaca Espíritu Santo upurugüirovia vae uyembatimbatí vae reta pe jei vae re.'

Jucuarãi icuatía —jei—.

### Ara pe ñugüinoi vae reta umbiadora yandeYa

**4** <sup>1</sup>Cua jaicue rupi amae jare aecha penti onque uyepéa oĩ ara pe. Jare ñee tenonde yave ayandu vae jei cheve. Penti trompeta rami iñeeãta reve jei cheve:

—Iyupi cua pe jare aechacata ndeve mbaembae uyeyapota vae.

<sup>2</sup>Jare jupivoiño Espíritu Santo imbaepuere rupi aecha penti guapia ara pe jare quía uguapi oĩ guapia pe. <sup>3</sup>Jare joco pe uguapi oĩ vae ita ipõra ete vae reta jasje jare cornalina jee vae echa cheve. Jare aecha penti yĩ jocua guapia iyipi rupi. Jare yĩ ita ipõra ete vae esmeralda jee vae echa cheve. <sup>4</sup>Jare aecha jocua

guapia iyipi rupi ñru veinticuatro guapia reta. Jare aecha jocua guapia reta pe uguapi ñugüinoi veinticuatro tenondegua reta. Omonde reta temimonde tĩ vae jare ññaca re güinoi reta corona oro pegua. <sup>5</sup>Jare jocua guapia güi ou ama uvera rami vae. Jare ayandu jiapu vae reta. Jare aecha jocua guapia jovai siete lámpara jendi ñugüinoi vae reta. Jae co Espíritu Santo siete jemiapo güinoi vae. <sup>6</sup>Jare jocua guapia jovai aecha vi i guasu rami vae, ñrei vidrio pegua echa cheve. Jare jocua guapia iyipi pe etei aecha irundi mbaembae icove vae reta. Jae reta güinoi jeta jesa ipuere vaerã umae jenonde jare jaicue uyerova mbae reve. <sup>7</sup>Jare penti jocua icove vae penti yaguapĩta echa. Jare ñru icove vae penti toro echa. Jare ñru icove vae jova cuimbae jova echa. Jare ñru icove vae penti güiraquee tuicha vae uveve oĩ vae echa. <sup>8</sup>Jare penti penti jocua irundi mbaembae icove vae reta güinoi seis ipepo reta, jare jete rupi güinoi jeta jesa. Jare jecuaño jei reta:

—YandeYa Tumpa opaete mbaepuere güinoi vae iyoa mbae etei co. Jae iyipi güive jare añave jecuaño ico. Jare jae jecuae oĩta.

Jucuarãi jei reta ara rupi jare pĩtu rupi. Uputuu'ã etei reta.

<sup>9</sup>Jare jocua mbaembae icove vae reta umbiadora jocua guapia pe uguapi vae jecuaño ico vae, jare umee yasurupai chupe. <sup>10</sup>Jare jocua veinticuatro tenondegua reta uyeatica jocua guapia pe uguapi vae jecuaño ico vae jovai umbiadora vaerã, jare oñono reta icorona jocua guapia jovai, jare jei reta:

<sup>11</sup>—Jupi co nde neno vaerã opaete yembiadora jare mbaepuere, oreYa Tumpa. Echa'ã nde ndiyapo opaete mbaembae. Opaete mbaembae ueyapo nde ndere vae rupi —jei reta.

### Tupapire jare Ovecha-rai

**5** <sup>1</sup>Jare aecha penti libro guapia pe uguapi vae ipo iyacata pe. Jocua libro güinoi uyecuatiacue japipe rupi jare icupe rupi, jare uyeyuquenda oĩ. Güinoi siete yemboyaa, agüiye vaerã quía uipea umingueta. <sup>2</sup>Jare aecha penti ángel ipirãta vae, jare ángel ññeãta reve jei: —¿Ime pa quía jupi co cua libro uipea vaerã vae? ¿Ime pa quía jupi co cua libro iyemboyaa uequi vaerã vae? —jei.

<sup>3</sup>Jare mbaeti co jocua libro ipuere uipea vae ara pe jare ivi pe jare ivigüi pe. Mbaeti co quía ipuere umae jese.

<sup>4</sup>Jare ayao ete. Echa'ã mbaeti quía uñevãe jupi libro uipea umingueta vaerã vae. Mbaeti quía uñevãe jupi libro re umae vaerã vae.

<sup>5</sup>Jayave penti tenondegua vae jei cheve:

—Agüiye iyao. Mase, Judá ññemoñaeta pegua Yaguapĩta jee vae - jae co David Iyipi jee vae - upurumiãmiri ma uequi vaerã jocua siete libro iyemboyaa jare uipea vaerã tupapire —jei.

<sup>6</sup>Jare aecha penti Ovecha-rai. Uyeyucaca echa cheve. Uyemboi oĩ jocua guapia jare jocua irundi mbaembae icove vae reta ipãu pe, jocua tenondegua reta ipite pe. Jae güinoi siete jãti jare siete jesa - jae co Espíritu Santo siete jemiapo güinoi vae opaete ivi rupi uyemondoca vae. <sup>7</sup>Jare jocua Ovecha-rai oo uequi libro guapia

pe uguapí vae ipo iyacata güi. <sup>8</sup>Jare libro güinoi ma yave, jocua irundi mbaembae icove vae reta jare jocua veinticuatro tenondegua reta uyeatica Ovecha-rai jovai. Penti penti güinoi arpa jare mbae ipiche cavi vae tinee oĩ copa oro pegua pe. Jocua mbae ipiche cavi vae uñeño tee Tumpa peguarã vae reta iyerure reta co.

<sup>9</sup>Jare jae reta ucanta penti canta ipiau vae. Ucanta cuarã:

—Jupí co nde neno vaerã jocua libro. Jupí co nde ndeequi vaerã jocua libro iyemboyaa reta. Echa'ã nde ndiyeyucaca jare ndeepí Tumpa imbae retarã nderugüi rupi opaete ivi ambiembie pegua reta ipite güi. <sup>10</sup>Jare ndiyapo reta mburuvicha guasu retarã jare sacerdote retarã ipuere vaerã uyeyocui ñaneTumpa pe. Jare oporoyocuita reta ivi pe.

Jucuarã ucanta reta.

<sup>11</sup>Jayave amae ye, jare ayandu jeta ángel reta ñee. Jocua ángel reta uyemboi ñugüinoi jocua guapia jare jocua mbaembae icove vae reta jare jocua tenondegua reta iyipí rupi. Jare uyepapa jeta ye ye. <sup>12</sup>Jare ángel reta ñeeãta reve jei:

—Jupí co Ovecha-rai uyeyucaca vae güinoi vaerã mbaepuere, jare icocatu vaerã, jare iyaracuaa vaerã, jare uyembia doraca vaerã. Jupí co yasurupai tuicha ñamee vaerã chupe —jei reta.

<sup>13</sup>Jayave opaete ara pe jare ivi pe jare ivigüi pe jare i guasu pe ñugüinoi vae reta ayandu jei:

—Tuyembia doraca guapia pe uguapí vae jare Ovecha-rai jaño mai pegua. Ñamee yasurupai tuicha chupe reta. Tugüinoi reta opaete mbaepuere.

<sup>14</sup>Jayave jocua irundi mbaembae icove vae reta jei:

—Amén.

Jare jocua veinticuatro tenondegua reta uyeatica jare umbia doradora imeño mai ico vae.

### Libro iyemboyaa reta

**6** <sup>1</sup>Jare aecha Ovecha-rai uipea penti jocua libro iyemboyaa. Jayave ayandu penti mbaembae icove vae jei:

—Eyu.

Ara jiapu vae echa uyemingueta yave.

<sup>2</sup>Jare aecha penti cavayu tĩ vae, jare opo cavayu re vae güinoi güirapa. Jare uñemee chupe corona. Jare jecuaño upurumiamiri.

<sup>3</sup>Jare Ovecha-rai uipea ñru libro iyemboyaa. Uyepea ma mocui. Jayave ayandu ñru mbaembae icove vae jei:

—Eyu.

<sup>4</sup>Jare aecha oo ñru cavayu. Ërei cua cavayu pĩta vae. Jare opo cavayu re vae pe uñemee mbaepuere umiñerãro vaerã ivi pegua reta uyeyuca vaerã. Jare uñemee vi chupe penti quisepucu tuicha ete vae.

<sup>5</sup>Jare Ovecha-rai uipea ñru libro iyemboyaa. Uyepea ma mbapí. Jayave ayandu ñru mbaembae icove vae jei:

—Eyu.

Jare aecha ñru cavayu. Ërei cua cavayu jũ vae. Jare opo cavayu re vae güinoi ipo pe umipesa pipe vae. <sup>6</sup>Jare ayandu ñee jocua irundi mbaembae icove vae reta ipite pe jei:

—Mocui libra trigo jepi penti ara mbaraviqui jepi pegua, jare seis libra cebada jepi penti ara mbaraviqui jepi pegua. Jare agüiye erucumegua aceite jare vino.

<sup>7</sup>Jare Ovecha-rai uipea ñru libro iyemboyaa. Uyepea ma irundi. Jayave ayandu ñru mbaembae icove vae jei:

—Eyu.

<sup>8</sup>Jare aecha ñru cavayu. Ërei cua cavayu iyu vae. Jare opo cavayu re vae jee co Mano. Jare Cañitei jee vae oo Mano jee vae jaicue. Jare uñemee chupe reta mbaepuere jeta ye ye ivi pegua reta re, ipuere vaerã uyucaca reta quisepecu pe jare caruai pe jare mbaerasi pe jare maemimba pochi vae reta pe.

<sup>9</sup>Jare Ovecha-rai uipea ñru libro iyemboyaa. Uyepea ma pandepo. Jayave aecha uñemeearenda igüi pe Tumpa ñnee jeco pegua uyeyucaca vae reta. Echa'ã jae reta uyeyucaca, umimbeu Tumpa ñnee ñru vae reta pe ramo. <sup>10</sup>Jare jae reta ñneeãta reve jei:

—Nde co jae iyoa mbae vae, oreYa. Nde co jae añete vae jei vae. ¿Maera pa ndeño neãa ivi pegua oreyuca vae reta? ¿Quirãi yave pa ndiporaracata chupe reta? —jei reta.

<sup>11</sup>Jare temimonde ti vae uñemee penti penti pe, jare penti vae jei chupe reta: —Peputuño joco pe michi pegua. Echa'ã uyeyucacata vi rani perivi Tumpa pe uyeyocui vae reta, pe reta piyeyucaca rami —jei.

<sup>12</sup>Jare aecha Ovecha-rai uipea ñru libro iyemboyaa. Uyepea ma seis. Jayave ivi tanta ucãta. Jare guarasi uyeyapo jũ penti tarapo jũ vae rami, jare yasi uyeyapo pita tugüi rami. <sup>13</sup>Jare yasitata ara re ñugüinoi vae reta oa ivi pe, penti iva ía yagüiye mbae vae reta oa jáca güi ivitu tanta umicãta yave vae rami. <sup>14</sup>Jare ara etei uyembiyao mbite rupi jare uñeñoma penti tupapire uñeñoma rami. Jare opaete ivitu reta jare ivi i mbite pe ñugüinoi vae reta usiri jenda güi. <sup>15</sup>Jare ivi pegua reta juvicha guasu reta jare mburuvicha reta jare icocatu vae reta jare sundaro reta juvicha reta jare mbaepuere güinoi vae reta jare opaete uyeyocui vae reta jare opaete uyeyocui mbae vae reta uñemi ivicua reta pe jare ita ivitu reta re ñugüinoi vae reta ipite rupi. <sup>16</sup>Jare jei ivitu guasu reta jare ita reta pe:

—Pea oreré. Oreñomi guapi pe uguapi vae jova güi. Oreñomi, agüiye vaerã nduecha Ovecha-rai. Echa'ã jae pochi ete oreve —jei reta—. <sup>17</sup>Ou ma uvãe ara Ovecha-rai pochi vaerã oreve, jare mbaeti etei quía ipuere umiaguanta —jei reta.

### Ciento cuarenta y cuatro mil vae reta

**7** <sup>1</sup>Jare cua jaicue rupi aecha irundi ángel reta uyemboi ñugüinoi ivi pe. Penti uyemboi guarasi oẽ vae coti, jare ñru uyemboi guarasi uique vae coti. Ñru uyemboi norte coti, jare ñru uyemboi sur coti. Jare jae reta oyopia irundi ivitu ivi iyipi rupi uyepeyu vae, agüiye vaerã uyepeyu ivi reta íarambo

jare i guasu reta iárambo, jare agüiye vaerã uipeyu ivira reta. <sup>2-3</sup>Jare aecha ñru ángel ou guarasi oẽ vae coti güi, jare jocua ángel güeru Tumpa imeño mai ico vae imarca. Jayave ángel ñneeãta reve jei jocua irundi ángel reta pe:

—Agüiye perucumegua ivi reta jare i guasu reta jare ivira reta, ndei ñaneTumpa jembiocui reta isiva numimarca mbove.

Echa'ã jocua irundi ángel pe uñemee ma mbaepuere urucumegua vaerã ivi reta jare i guasu reta.

<sup>4</sup>Jare ayandu mbovi Tumpa jembiocui reta ángel reta umimarca vae. Umimarca reta ciento cuarenta y cuatro mil Israel pegua reta opaete ati reta güi. <sup>5</sup>Umimarca reta doce mil Judá ñnemoñaeta reta güi. Umimarca reta doce mil Rubén ñnemoñaeta reta güi. Umimarca reta doce mil Gad ñnemoñaeta reta güi. <sup>6</sup>Umimarca reta doce mil Aser ñnemoñaeta reta güi. Umimarca reta doce mil Neftalí ñnemoñaeta reta güi. Umimarca reta doce mil Manasés ñnemoñaeta reta güi. <sup>7</sup>Umimarca reta doce mil Simeón ñnemoñaeta reta güi. Umimarca reta doce mil Leví ñnemoñaeta reta güi. Umimarca reta doce mil Isacar ñnemoñaeta reta güi. <sup>8</sup>Umimarca reta doce mil Zabulón ñnemoñaeta reta güi. Umimarca reta doce mil José ñnemoñaeta reta güi. Umimarca reta doce mil Benjamín ñnemoñaeta reta güi.

#### Jeta ete vae jemimonde tĩ vae reta

<sup>9</sup>Cua jaicue rupi aecha jeta ete vae opaete ivi ambiembie ipite güi yugüeru vae reta. Mbaeti quía ipuere uipapa. Jae reta uyemboi ñugüinoi jocua guapia jare Ovecha-rai jovai. Jae reta jemimonde tĩ jare ipo pe güinoi carandai joqui. <sup>10</sup>Jare ñneeãta reve jei reta:

—ÑaneTumpa guapia pe uguapi vae upurumbiasa vae co. Ovecha-rai vi upurumbiasa vae co —jei reta.

<sup>11</sup>Jare opaete ángel reta uyemboi ñugüinoi jocua guapia jare jocua tenondegua reta jare jocua irundi mbaembae icove vae reta iyipi rupi. Jayave jae reta uyeatica guapia jovai jare umbiadora Tumpa. <sup>12</sup>Jae reta jei:

—Amén. Ñamee yasurupai tuicha ñaneTumpa pe. Jae co iyaracuaa catu vae. Jae co opaete mbaepuere güinoi vae. Tuyembiadoraca jaeño mai pegua. Amén —jei reta.

<sup>13</sup>Jayave penti jocua tenondegua vae upirandu cheve:

—¿Quía reta pa co cua jemimonde tĩ vae reta? ¿Queti güi pa yugüeru? —jei.

<sup>14</sup>—Cheya, nde co ndicuaa —jae chupe.

Jayave jei cheve:

—Cua reta yugüeru cua pe uiporara ete rendave pe. Uputuca jemimonde jare umitĩ Ovecha-rai jugüi pe —jei—. <sup>15</sup>Jáeramo yugüireco ma Tumpa iguapia jovai, jare uyeyocui reta Tumpa pe ara rupi jare pĩtu rupi Tumpa jo pe. Jare guapia pe uguapi vae uyandarecota jese reta —jei—. <sup>16</sup>Ndarau ye iyembai reta. Ndarau ye iúe reta. Ndarau ye jasi chupe reta guarasi. <sup>17</sup>Echa'ã Ovecha-rai jocua guapia mbite pe oĩ vae uyandarecota jese reta jare güiraata reta icua i oẽ vae tecove umee vae reta pe. Jare Tumpa oyoeta jesai chugüi reta —jei.

### Libro iyemboyaa taicuegua vae

**8** <sup>1</sup>Jare Ovecha-rai uipea ñru libro iyemboyaa. Uyepea ma siete. Jayave mbaeti mbae uyendu ara pe media ora rupi. <sup>2</sup>Jare aecha jocua siete ángel Tumpa jovai uyemboi ñugüinoi vae reta. Jare uñemee chupe reta siete trompeta.

<sup>3</sup>Jare ou ñru ángel uyemboi mbae ipiche cavi vae imesa iyipi pe, jare güinoi mbae ipiche cavi vae jiru oro pegua. Jare uñemee ángel pe jeta mbae ipiche cavi vae, ángel umee vaerã Tumpa pe opaete uñeño tee Tumpa peguarã vae reta iyerure reta reve jocua mbae ipiche cavi vae imesa oro pegua pe. Echa'ã jocua mesa oï Tumpa iguapia jovai. <sup>4</sup>Jare mbae ipiche cavi vae jatãti jare uñeño tee Tumpa peguarã vae reta iyerure reta uyupi pãve ángel ipo güi Tumpa jovai.

<sup>5</sup>Jayave ángel uipisi jocua mbae ipiche cavi vae jiru jare umitinee tatãpi jendi vae mesa pe oï vae pe. Jayave omombo ivi pe. Jare jiapu ara, jare uyecuaa ama uvera vae reta, jare ivi ucãta.

### Trompeta reta

<sup>6</sup>Jare jocua siete ángel siete trompeta güinoi vae reta uñemicuatïro umiñee vaerã.

<sup>7</sup>Jayave penti ángel umiñee trompeta, jare oa ivi pe amandau jare tata tugüi reve. Jare mbïte seri ivïra reta jare opaete ñana ocai.

<sup>8</sup>Jayave ñru ángel umiñee trompeta. Mocui ma umiñee. Jare penti ivitu guasu echa vae oa i guasu pe. Ocai echa jocua ivitu guasu. Jare mbïte seri i guasu uyeyapo tugüirã. <sup>9</sup>Jare mbïte seri jevae i rupigua i guasu pe yugüireco vae reta umano. Jare mbïte seri chalana guasu reta icumegua.

<sup>10</sup>Jayave ñru ángel umiñee trompeta. Mbapi ma umiñee. Jare oa ara güi penti yasitata tuicha vae. Jendi oï penti lámpara rami, jare oa mbïte seri i usiri vae reta pe jare icua icua i oë vae pe. <sup>11</sup>Jare jocua yasitata co jee Ajenjo. Jare jocua mbïte seri i usiri vae reta iro ma. Jare jeta ete vae umano i iro vae jou ramo.

<sup>12</sup>Jayave ñru ángel umiñee trompeta. Irundi ma umiñee. Jare mbae uyeyapo guarasi pe agüiye vaerã jembipe irundi ora rupi opa ara. Jae ramiño vi mbae uyeyapo yasi jare yasitata reta pe agüiye vaerã jembipe irundi ora rupi opa pïtu. <sup>13</sup>Jayave aecha penti güiraquee uveve ara mbïte rupi, jare ayandu iñeeãta reve jei:

—Ivi pegua reta uiporara eteta co ñru mbapi ángel reta trompeta umiñee yave. Echa'ã jae reta ndeiño umiñee —jei.

**9** <sup>1</sup>Jayave ñru ángel umiñee trompeta. Pandepo ma umiñee. Jare aecha penti yasitata oa ara güi ivi pe. Jare uñemee chupe ivicua quipe ete vae illave. <sup>2</sup>Jayave uipea ivicua quipe ete vae, jare jocua ivicua güi oë tatãti. Tatãti tata tuicha ete vae güi oë vae echa. Jare guarasi uyecuaa'ã tatãti ivicua güi oë vae jeco pegua. Jáeramo pïtumimbi ma oï.

<sup>3</sup>Jare oë jocua tatãti güi tucu reta, jare uguata ivi rupi. Jare uñemee chupe reta mbaepuere oñopi vaerã ivi pegua reta, chumicarape reta

ñaneõpi rami. <sup>4</sup>Jare Tumpa oyocui tucu reta agüiye vaerã urucumegua ñana jare ivira reta jare opaete temiti reta. Ërei ipuere oñõpi mbaeti güinoi Tumpa imarca isiva re vae reta. <sup>5</sup>Jare uñemee tucu reta pe uiporaraca vaerã ivi pegua reta pe pandepo yasi pegua. Tucu reta ndarau upuruyuca. Jaeño jasi eteta ivi pegua reta pe, penti chumicarape ñaneõpi yave jasi ete yandeve vae rami. <sup>6</sup>Jare jocua ara reta pe ivi pegua reta uipota tẽita umano. Ërei ndarau ipuere. Iquirẽi ete tẽita umano. Ërei ndarau etei ipuere.

<sup>7</sup>Jare jocua tucu reta cavayu uñemicuatĩro ma uñerãro vaerã vae reta echa. Jare iñaca re güinoi vae corona oro pegua echa. Jare jova cuimbae jova echa. <sup>8</sup>Jare ía cuña ía echa. Jare jái reta yaguapĩta jái reta echa. <sup>9</sup>Jare ipitía re güinoi vae camisa fierro pegua echa. Jare uveve reta yave, ipepo tanta jiapu, jeta ete cavayu reta uruguata icarretón ñerãro pe jiapu rami. <sup>10</sup>Jare tucu reta juguai chumicarape juguai echa. Jare juguai pe güinoi ipõpia. Jare güinoi mbaepuere uiporaraca vaerã ivi pegua reta pe pandepo yasi pegua. <sup>11</sup>Jare jocua tucu reta juvicha guasu penti ángel jocua ivicua quipe ete vae pe ico vae co. Jare hebreo iñee pe jae jee co Abadón. Jare griego iñee pe jee co Apolión.

<sup>12</sup>Uasa ma penti susere. Ërei mocui mbaesusere ye ueyepota curi.

<sup>13</sup>Jayave ĩru ángel umiñee trompeta. Seis ma umiñee. Jare ayandu ñee jocua mbae ipiche cavi vae imesa oro pegua jãti reta ipite güi ou vae. Jocua mesa oĩ Tumpa jovai jare güinoi irundi jãti. <sup>14</sup>Jare jocua ñee jei jocua ángel trompeta umiñee ramo vae pe:

—Iyora jocua irundi ángel ĩ usiri vae Eufrates pe uñeapĩti vae reta.

<sup>15</sup>Jayave oyora jocua irundi ángel reta. Jae reta uñemicuatĩro ma uyuca vaerã mbite seri ivi pegua reta. Uicuaa reta año jare yasi jare ara jare ora uyuca reta vaerã. <sup>16</sup>Jare uypapa sundaro cavayu re opo vae reta. Ayandu doscientos millones co ñugüinoi.

<sup>17</sup>Jare aecha jocua cavayu uyecuaa cheve vae reta. Aecha vi opo jese vae reta ipitía rupi güinoi icamisa fierro pegua pĩta vae jare jovi vae jare iyuru vae. Jare cavayu reta iñaca yaguapĩta iñaca echa. Jare cavayu reta iyuru güi oẽ tata jare tatãti jare azufre. <sup>18</sup>Jare tata jare tatãti jare azufre cavayu reta iyuru güi oẽ vae uyuca mbite seri ivi pegua reta. <sup>19</sup>Echa'ã jocua cavayu reta güinoi mbaepuere uyuca vaerã ivi pegua reta iyuru pe jare juguai pe. Echa'ã juguai mboi rami co. Güinoi iñaca ipuere vaerã uichuu ivi pegua reta.

<sup>20</sup>Jare opaete ivi pegua reta uyeyucaca mbae vae cua mbaepuruyuca reta pe vae ueya'ã etei icavi mbae vae jecuaeño uyapo vae. Jecuae umbiadora reta aña reta jare tumpa-raanga oro pegua jare corepoti pegua jare bronce pegua jare ita pegua jare ivira pegua, yepe tẽi tumpa-raanga reta ipuere'ã uecha jare uyandu jare uguata. <sup>21</sup>Jae reta jecuae upuruyuca jare uyapo paye reta jare uyapo aguasa jare imonda.



### Ángel jare libro michi vae

**10** <sup>1</sup>Jare aecha ñru ángel ipirãta ete vae ugüeyi ou ara güi. Jemimonde co jae penti amapĩtu jare iñãca re oĩ penti yii. Jova guarasi echa jare ipi mocui tata jendi vae echa. <sup>2</sup>Jare güinoi ipo pe penti libro michi vae uyepea oĩ vae. Jare ou uyemboi i guasu re jare ivi re. Ipi iyacata oĩ i guasu re jare ipi iyaso oĩ ivi re. <sup>3</sup>Jayave tanta usapĩcai penti yaguapĩta uñee rami. Jare ángel usapĩcai ma yave, jiapu ara siete vese.

<sup>4</sup>Jare siete vese ma jiapu ara yave, añemicuatĩro mbae aicutatía vaerã. Ërei ayandu ñee ara güi jei cheve:

—Agüiye emimbeu quía pe mbae siete ara jiapu reta jei vae. Agüiye icuatía mbae jei vae —jei.

<sup>5</sup>Jare jocua ángel aecha uyemboi i guasu re jare ivi re vae uupi ipo ara coti. <sup>6</sup>Jare jei Tumpa jee re opata uyeyapo imambae. Tumpa co jae imeño mai ico vae. Jae uyapo ara jare opaete ara re oĩ vae, jare ivi jare opaete ivi pe oĩ vae, jare i guasu jare opaete i guasu pe oĩ vae. <sup>7</sup>Ërei ñru ángel umiñeeta trompeta. Siete ma co cua re. Jare jocua ara reta pe jocua ángel umbipi umiñee yave, Tumpa opata uyapo jocua tenonde yave uyecuaa'ã vae. Echa'ã Tumpa uicuaaca cua iñee aracae umimbeu vae reta pe. Echa'ã jae reta uyeyocui Tumpa pe.

<sup>8</sup>Jare ayandu ye ñee ara güi jei cheve:

—Ecuá ángel i guasu re jare ivi re uyemboi oĩ vae pe ipisi jocua libro michi vae uyepea oĩ vae ángel ipo pe oĩ vae.

<sup>9</sup>Jayave aa ángel coti jare jae chupe:

—Emee cheve jocua libro michi vae.

Jayave ángel jei cheve:

—Ipsi opa jeu. Ndeu ma yave, nderie jasita ndeve, ãrei ndeyuru pe jãeta co ei rami —jei.

<sup>10</sup>Jayave aequi jocua libro michi vae ángel ipo güi jare opa jau. Jare cheyuru pe jãe ete co ei rami. Ërei jau ma yave, cherie jasi cheve.

<sup>11</sup>Jayave ángel jei cheve:

—Nemimbeu yeta co Tumpa iñee jeta ete vae ivi ambiembie pegua pe jare mburuvicha guasu reta pe.

### Mocui cuimbae umimbeu Tumpa vae reta

**11** <sup>1</sup>Jare uñemee cheve penti ivira mbaembae amiaanga pipe vaerã. Jare ayandu ñee jei cheve:

—Epũa ecua emiaanga Tumpa jo jare uñemeearenda, jare ipapa Tumpa jo pe umbiadora Tumpa vae reta. <sup>2</sup>Ërei agüiye emiaanga Tumpa jo joca. Echa'ã jocua oca uñemee judío mbae vae reta pe. Jare jae reta güinoita mbaepuere tenta guasu uñeño tee Tumpa peguarã vae re cuarenta y dos yasi pegua —jei—. <sup>3</sup>Jare ameeta mbaepuere jocua mocui cuimbae

chemimbeuta vae reta pe, jare jae reta umimbeuta chiñee mil doscientos sesenta ara pegua. Jare mocui reve uyemondeta temimonde jü vae pe —jei.

<sup>4</sup>Jocua mocui ivira oliva jee vae uyemijaanga jocua mocui cuimbae reta re. Jae ramiño vi jocua mocui vela iguapica Tumpa ivi uyapo vae jovai uyemboi vae uyemijaanga jocua mocui cuimbae reta re. <sup>5</sup>Jare ime yave quía iquirēi tēi uyapo icavi mbae vae jocua mocui cuimbae reta pe vae, oēta tata jocua mocui cuimbae reta iyuru güi jare opata uapí jovaicho reta. Jucuarāita umano iquirēi tēita uyapo icavi mbae vae jocua mocui cuimbae reta pe vae. <sup>6</sup>Cua mocui reve güinoita mbaepuere ara re agüiye vaerā oqui opaete ara reta Tumpa iñee umimbeu reta rambueve. Jae ramiño vi güinoita mbaepuere i re uyapo vaerā tugüirā. Jae ramiño vi güinoita mbaepuere uiporaraca vaerā ivi pegua reta pe ipotave mbaerasi jae reta uipota rupiño.

<sup>7</sup>Jare opa ma Tumpa regua umimbeu yave, jocua maemimba ivicua quipe ete vae güi oēta vae uñerārota jae reta ndive jare umiamirita jare uyucata. <sup>8</sup>Jare jocua mocui cuimbae jetecue upitata calle pe jocua tenta guasu yandeYa curusu re uyecutu vae pe. Yandepuere yambijee jocua tenta guasu Sodoma jare Egipto. Echa'ā jocua tenta guasu pegua reta oyovaicho Tumpa ndive. <sup>9</sup>Jare opaete ivi ambiembie pegua reta umaeta jocua mocui cuimbae jetecue re mbapí ara y medio pegua. Ndarau umaño reta quía re oñoti vaerā. <sup>10</sup>Jare ivi pegua reta uyeroviata jocua mocui cuimbae jetecue re. Uyapota reta fiesta jare omondota uyupe regalo reta. Echa'ā ndei umano mbove, jocua mocui Tumpa iñee umimbeu vae reta uiporaraca ete ivi pegua reta pe.

<sup>11</sup>Jare mbapí ara y medio uasa ma yave, Espíritu Santo Tumpa güi ou vae umee tecove jocua mocui jetecue pe, jare mocui reve upüa uyemboi. Jare cua uecha vae reta uquiye ete co. <sup>12</sup>Jare uyendu ñee ara güi. Iñeeāta reve jei: —Piyupi cua pe.

Jayave jocua mocui reve uyupí ara pe amapĩtu reve. Jare jovaicho reta uecha yugüiraa.

<sup>13</sup>Jare jocua ora pe etei ivi tanta ucāta jare jeta catu tenta reta usururu jocua tenta guasu pe. Jare jocua ivicāta pe umano siete mil cuimbae reta. Jare tenta guasu pegua umano mbae vae reta uquiye ete jare umbiadora Tumpa ara pe ico vae.

<sup>14</sup>Uasa ma mocui susere. Ërei ĩru mbaesusere immbae uyeyapota.

### **Trompeta taicuegua vae**

<sup>15</sup>Jare ĩru ángel umiñee trompeta. Siete ma umiñee. Jare uyendu ñee reta ara pe. Iñeeāta reve jei reta:

—Ivi pegua iporoyocuiā reta uyeyapo ma yandeYa iporoyocuiarā. Uyeyapo ma Cristo iporoyocuiarā. Jare jae oporoyocuita jaeño mai pegua —jei reta.

<sup>16</sup>Jare jocua veinticuatro tenondegua reta Tumpa jovai iguapia reta pe uguapí ñugüinoi vae uyeatica Tumpa jovai umbiadora vaerā. <sup>17</sup>Jare jei reta:

—OreYa Tumpa. Nde co jae opaete mbaepuere güinoi vae. Nde co jae iyipi güive jare añave jecuaeño ico vae. Nde co jae jecuae oïta vae. Numees yasurupai ndeve. Echa'ã ndicuaaca ma quirãi nembraepuere tuicha ete co, jare añave ndeporoyocui neĩ —jei reta—. <sup>18</sup>Jare ivi pegua reta pochĩ ndeve. Ërei nde vi ndepochĩ chupe reta. Jare ou ma uvãe ara umanocue vae reta uñeãaca vaerã, jare nde nemee vaerã imbaerã niñee umimbeu vae reta pe - echa'ã jae reta uyeyocui ndeve - jare uñeño tee ndeve peguarã vae reta pe. Jae reta co sambiaĩ reta jare ucuaaca vae reta uipiu reve nemiadora vae. Ou ma uvãe ara nde nembai vaerã ivi urucumegua vae reta —jei reta.

<sup>19</sup>Jare Tumpa jo uyepea oĩ ara pe jare uyecuaa Tumpa jo pe ita reta Tumpa uicuatía mboroyocui reta jese vae jiru. Jare uvera jare jiapu ara. Jare ivi ucãta. Jare oa jeta amandau.

### Cuña jare maemimba guasu pïta vae

**12** <sup>1</sup>Jare uyecuaa ara re chepiacañi ete jese vae. Jae co penti cuña. Jemimonde guarasi co, jare uyemboi oĩ yasi iárambo, jare icorona doce yasitata reta co. <sup>2</sup>Ipurúa jare imembi oata ma oĩ. Jãse imembirasi ramo.

<sup>3</sup>Jare uyecuaa ye ara re ñru chepiacañi ete jese vae. Jae co penti maemimba guasu pïta vae. Siete co ñãca reta jare diez jãti reta. Jare penti penti ñãca re güinoi corona. <sup>4</sup>Jare juguai uipisi mbite seri yasitata reta omombo ivi coti. Jare jocua maemimba guasu uyemboi cuña imembita vae jovai, opa vaerã tẽi jou imembi, oa ma yave. <sup>5</sup>Jare cuña imembi cuimbae co. Jocua imembi cuimbae oyocuita opaete ivi pegua reta ipopoca fierro pegua pe. Jare cuña imembi uyereraaca Tumpa pe Tumpa iguapia oĩ vae pe. <sup>6</sup>Jare jocua cuña osi ñana coti. Echa'ã joco pe Tumpa umicuatiro chupe jendarã. Jare amocue vae umingararu jocua cuña mil doscientos sesenta ara.

<sup>7</sup>Jare uyeyapo penti ñerãro ara pe. Miguel jare ángel chupe uyeyocui vae reta uñerãro jocua maemimba guasu ndive. Jare maemimba guasu jare ángel chupe uyeyocui vae reta uñerãro jae reta ndive. <sup>8-9</sup>Ërei jae reta ipuere'ã umiamiri Miguel jare ángel chupe uyeyocui vae reta. Jare maemimba guasu uyemomboca ara güi. Mbaeti ye ma jendarã ara pe. Jocua maemimba guasu jocua mboi araca Eva umingueta vae co. Jae co aña guasu. Jae co Satanás. Jae umbitavi opaete ivi pegua reta. Ërei jae uyemomboca ma ara güi ivi pe, jare ángel chupe uyeyocui vae reta vi uyemomboca ara güi jae ndive.

<sup>10</sup>Jare ayandu ñee ara pe. Ñneeãta reve jei:

—Ou ma uvãe Tumpa upurumbiasa vaerã. Echa'ã jae güinoi opaete mbaepuere. Ou ma uvãe Tumpa oporoyocui vaerã Cristo imbaepuere rupi. Echa'ã Satanás umbijecose yanderivi reta Tumpa jovai ara rupi jare pïtu rupi. Ërei añave uyemomboca ara güi —jei—. <sup>11</sup>Jare yanderivi reta umiamiri Satanás Ovecha-rai jugüi rupi jare Tumpa ñee ñru vae reta pe umimbeu vae rupi. Uicuaa reta umanota co, Ërei uquiye'ã umano vaerã —jei—. <sup>12</sup>Jáeramo piyerovia pe reta ara pe pico vae. Ërei ivi pe pico vae reta jare i guasu pe pico

vae reta piporara eteta co. Echa'ã añã guasu ugüeyi ma pepite pe. Jare jae pochí etc. Echa'ã jae uicuaa michi peguaño ma ipuere uparaviqui —jei.

<sup>13</sup>Jare jocua maemimba guasu uicuaa yave uyemomboca ma co ivi pe, uaicuemoña jocua cuña imembi cuimbae vae. <sup>14</sup>Èrei uñemee cuña pe mocui güiraquee tuicha vae ipepo, ipuere vaerã uveve ñana pe uñemi vaerã jocua mboi güi. Jare joco pe amocue vae umingararu mbapi año y medio.

<sup>15</sup>Jare jocua mboi omombo jeta i iyuru güi. Uipota tẽi jocua iporu uepiti vaerã cuña jare güiraa vaerã uyuca. <sup>16</sup>Èrei ivi etei ombori cuña. Echa'ã ivi uyepea, yande yaipea yandeyuru vae rami, jare iporu jocua maemimba guasu iyuru güi oẽ vae opa ucañi ivi uyepea vae pe. <sup>17</sup>Jayave maemimba guasu pochí cuña pe, jare oo uñerãro cuña imembi ndeño umano vae reta ndive. Echa'ã jae reta uyapo Tumpa iporoyocui reta jare umimbeu Jesús regua.

### Mocui maemimba guasu reta

**13** <sup>1</sup>Jare jocua maemimba guasu uyemboi oĩ i guasu jembei pe. Jare aecha ñru maemimba guasu oẽ i guasu güi. Siete co iñãca reta jare diez jãti reta. Jare güinoi corona penti penti jãti re. Jare iñãca reta re güinoi tee reta. Jare jocua tee reta uicuaaca quirãi jocua maemimba guasu jecuaeño jei icavi mbae vae Tumpa coti. <sup>2</sup>Jare maemimba guasu joco pe aecha vae penti yagua echa. Jare ipi oso ipi echa, jare iyuru yaguapita iyuru echa. Jare maemimba guasu tenonde aecha vae umee cua ñru maemimba guasu pe imbaepuere. Jare umaeño jese uguapi vaerã iguapia pe jare güinoi vaerã mbaepuere tuicha vae.

<sup>3</sup>Jare aecha penti jocua maemimba guasu i guasu güi oẽ vae iñãca ipere umano vaerã tẽi. Èrei ucuera ma jocua ipere mano pegua güi. Jare opaete ivi pegua reta ipiacañi jocua maemimba guasu re. <sup>4</sup>Jare opaete ivi pegua reta umbiadora maemimba guasu tenonde aecha vae. Echa'ã jae umee mbaepuere tuicha vae ñru maemimba guasu pe. Jae ramiño vi opaete ivi pegua reta umbiadora jocua ñru maemimba guasu. Jae reta jei: —Mbaeti co quía ye cua maemimba guasu rami. Mbaeti etei quía ipuere uñerãro jae ndive.

<sup>5</sup>Jare Tumpa umaeño jocua ñru maemimba guasu re uyembutuicha vaerã jare jei vaerã icavi mbae vae Tumpa coti. Jare uñemee chupe mbaepuere jucuarãi uyapo vaerã cuarenta y dos yasi. <sup>6</sup>Jare jecuaeño jei jeta icavi mbae vae Tumpa coti jare Tumpa jee coti jare Tumpa jenta coti jare ara pe yugüireco vae reta coti. <sup>7</sup>Jare Tumpa umaeño jese uñerãro vaerã uñeño tee Tumpa peguarã vae reta ndive jare umiamiri vaerã. Jare uñemee chupe mbaepuere opaete ivi ambiembie pegua reta vae re. <sup>8</sup>Jare umbiadora opaete ivi pegua reta jee uyecuatia'ã oĩ Ovecha-rai ilibro tecove opa mbae vae pegua pe vae. Ovecha-rai uyeyucaca co ndei ivi uyeyapo mbove.

<sup>9</sup>Uipota uyandu vae tuyapisaca cua re. <sup>10</sup>Uipurumiamiri vae reta uyucata amocue vae quisepecu pe, jae reta etei quisepecu pe upuruyuca ramo. Jare upurumiamiri vae reta güiraata ñru vae reta iivi güi jembiocui

retarã. Jáeramo icavi co uñeño tee Tumpa peguarã vae reta ipiaguasu vaerã jare jecuaeño mburugüirovia güinoi vaerã.

<sup>11</sup>Jare aecha ñru maemimba guasu oẽ ivigüi güi. Jare mocui co jãti penti ovecha rami. Ërei uyemingueta jocua maemimba guasu tenonde aecha vae rami. <sup>12</sup>Jare imbaepuere oyovaque jocua ñru maemimba guasu i guasu güi oẽ vae imbaepuere ndive, jare oyocui opaete ivi pegua reta umbiadora vaerã jocua ñru maemimba guasu ipere mano pegua güi ucuera vae. <sup>13</sup>Jare maemimba guasu taicue aecha vae uyapo jeta miacañi reta. Echa'ã jae mbae uyapo tata ou vaerã ara güi ivi pegua reta jovaque. <sup>14</sup>Jare imbaepuere pe uyapo miacañi reta jocua ñru maemimba guasu jovaque. Jare jucuarãi umbitavi ivi pegua reta. Jare jei ivi pegua reta pe uyapo vaerã jocua ñru maemimba guasu jaanga. Echa'ã umimandúa reta quirãi ipere ete penti quisepecu pe, ërei icove ye. <sup>15</sup>Jare jocua maemimba guasu taicue aecha vae güinoi mbaepuere umee vaerã tecove jocua ñru maemimba guasu jaanga pe, jocua jaanga uyemingueta vaerã. Jare uyucaca opaete ñatẽi umbiadora maemimba guasu jaanga vae reta.

<sup>16</sup>Jare oyocui opaete vae - sambiaï reta jare ucuacuaa vae reta, icocatu vae reta jare iparavete vae reta, uyeyocui mbae vae reta jare uyeyocui vae reta - güinoi vaerã penti marca ipo iyacata re ani isiva re. <sup>17</sup>Jare ime yave quã jocua ñru maemimba guasu imarca ani jee ani jee inúmero mbaeti güinoi vae, ipuere'ã mbae ogua jare ipuere'ã mbae umee. <sup>18</sup>Icavi co penoi vaerã aracuaa. Uicuaa cavi vae tui papa maemimba guasu inúmero. Echa'ã penti cuimbae inúmero. Inúmero co seiscientos sesenta y seis.

### Ciento cuarenta y cuatro mil vae reta icanta

**14** <sup>1</sup>Jare aecha jocua Ovecha-rai uyemboi oĩ ivitu guasu Sión re, jare joco pe ñugüinoi jae ndive jocua ciento cuarenta y cuatro mil vae reta. Jae reta isiva re uyecuatía oĩ Ovecha-rai jee jare Ovecha-rai Tu jee. <sup>2</sup>Jare ayandu ñee ara güi. Tanta jiapu i guasu jiapu rami jare ara jiapu rami. Jare ayandu vi arpa ombopu vae reta iarpa ombopu ñugüinoi.

<sup>3</sup>Jare ucanta reta penti canta ipiau vae Tumpa iguapia jare jocua irundi mbaembae icove vae reta jare tenondegua reta jovai. Jare mbaeti quã ipuere uicuaa jocua canta, jaeño jocua ciento cuarenta y cuatro mil vae reta. Echa'ã Cristo uepi jocua reta ivi pegua reta ipite güi. <sup>4</sup>Jae reta uyeminguia'ã cuña reta re. Echa'ã güireco'ã etei cuña. Jae reta yugüiraa Ovecha-rai jaicue jae que rupi oo vae rupi. Jae reta uyerepica co ivi pegua reta ipite güi. Jae reta rani uyeyucaca, Tumpa jare Ovecha-rai pe uyeyocui ramo. <sup>5</sup>Jare jae reta upurumbitavi'ã etei. Mbaeti quã ipuere umbijeco reta mbae re.

### Ángel reta ñee reta

<sup>6</sup>Jare aecha ñru ángel uveve ara mbite rupi. Tumpa umee ángel pe umimbeu vaerã ñee icavi vae opa mbae vae ivi pegua reta pe. Umimbeu opaete ivi ambiembie pegua reta pe. <sup>7</sup>Ñeeãta reve jei chupe reta:

—Pequiye Tumpa güi jare pemiadora. Echa'ã ora ou ma uvãe upuruãa vaerã. Pemiadora. Echa'ã jae uyapo ara jare ivi jare i guasu jare icua i oẽ vae reta —jei.

<sup>8</sup>Jare jocua ángel jaicue uveve ñru ángel jare jei:

—Jocua tenta guasu Babilonia jee vae opa ma uyembai. Jocua Babilonia pegua reta umbiadora tumpa-raanga reta, jare uicuaaca opaete ñru ivi pegua reta pe jucuarãi uyapo vaerã. Jáeramo Tumpa pochí chupe reta —jei.

<sup>9</sup>Jare ñru ángel uveve jaicue, jare ñneeãta reve jei:

—Ime yave quía jocua maemimba guasu i guasu güi oẽ vae jare jaanga umbiadora jare imarca isiva re ani ipo re güinoi vae, <sup>10</sup>jae uiporara eteta. Echa'ã Tumpa pochí eteta chupe jare uiporaraca eteta chupe. Jocua nunga uiporarata tata jare azufre ángel ñneñono tee Tumpa peguarã vae reta jare Ovecha-rai jovai —jei—. <sup>11</sup>Jare tatãti uyupita jaeño mai pegua jocua reta uiporarata ñugüinoi vae güi. Jare jae reta ndarau ipuere uputuu ara rupi jare pĩtu rupi. Echa'ã umbiadora reta jocua maemimba guasu jare jaanga jare güinoi maemimba guasu jee imarca —jei.

<sup>12</sup>Icavi co ipiaguasu vaerã ñneñono tee Tumpa peguarã vae reta. Jae reta uyapo Tumpa iporoyocui reta jare güirovia Jesús re.

<sup>13</sup>Jare ayandu penti ñee ara güi jei cheve: —Icuatía cuarãi: Uyeroviata co cua güive yandeYa re güirovia reve umanota vae reta.

—Uyeroviata co —jei Espiritu Santo—. Echa'ã uputuuta reta iparaviqui güi. Jare Tumpa uicuaacata jae reta uyapocue vae —jei.

### Ou ma uvãe nembraeviro vaerã

<sup>14</sup>Jare aecha amapĩtu tĩ vae jare jocua amapĩtu re uguapĩ oĩ cuimbaerã uyeyapo vae echa vae. Jare ññaca re güinoi corona oro pegua, jare uipisi penti hoz jaimbe vae. <sup>15</sup>Jare penti ángel oẽ Tumpa jo güi jare ñneeãta reve jei amapĩtu re uguapĩ oĩ vae pe:

—Iporu jocua hoz nenoĩ vae nembraeviro vaerã. Echa'ã ou ma uvãe nembraeviro vaerã. Echa'ã yagüiye ma ivi pe oĩ vae. Icavi co nembraeviro vaerã —jei.

<sup>16</sup>Jare amapĩtu re uguapĩ oĩ vae uiporu hoz güinoi vae ivi re jare uaviro ivi pe oĩ vae. <sup>17</sup>Jare ñru ángel oẽ Tumpa jo ara pe oĩ vae güi. Jae vi güinoi hoz jaimbe vae. <sup>18</sup>Jare ñru ángel oẽ ñnemeearenda güi. Jae güinoi mbaepuere tata re. Jare ñneeãta reve jei ángel hoz jaimbe vae güinoi vae pe:

—Iporu hoz jaimbe vae nenoĩ vae jare eaviro ivi pegua uva reta. Echa'ã yagüiye ma uva reta —jei.

<sup>19</sup>Jayave jocua ñru ángel uiporu ivi re hoz güinoi vae jare uaviro ivi pegua uva reta. Jayave omombo reta uva ññetami pipe vae pe. Jocua uyemijaanga Tumpa iarasĩ re. <sup>20</sup>Jare jocua uva ññetami pipe vae oĩ tenta guasu güi ñana coti. Joco pe uitami uva. Jare tugüi oẽ jocua uva ññetami pipe vae güi, jare uvãe cavayu reta iyayu rupi jare usiri sesenta legua rupi.

### Ángel reta jare siete mbaesusere taicuegua vae reta

**15** <sup>1</sup>Jare uyecuaa ye ara re chepiacañi ete jese vae. Aecha joco pe siete ángel siete mbaesusere taicuegua vae güinoi vae reta. Echa'ã jocua reta re opata co Tumpa iarasi.

<sup>2</sup>Jare aecha i guasu vidrio pegua vae tata ndive uyea vae echa vae. Jare jocua maemimba guasu i guasu güi oẽ vae jare jaanga jare imarca jare jee inúmero umiamiri vae reta uyemboi ñugüinoi jocua i guasu vidrio pegua vae re, jare güinoi arpa reta Tumpa umee chupe reta vae. <sup>3</sup>Jare ucanta reta Moisés Tumpa pe uyeyocui vae icanta jare Ovecha-rai icanta. Jei reta:

—Nde ndiyapo vae oremipiacañi ete, oreYa Tumpa. Nde neno opaete mbaepuere. Nde ndiyapo vae jupi co jare añete vae pegua co. Nde co jae opaete ivi pegua reta Juvicha Guasu —jeyeta—. <sup>4</sup>Opaete vae uquiyeta ndegüi, oreYa. Opaete vae umbiadorata nderee. Echa'ã ndeño co jae iyoo mbae vae. Opaete ivi pegua reta yugüeruta nemiadora vaerã. Echa'ã uyecuaa ma quirã nde nepuruãa jupi vae rupi —jeyeta—.

<sup>5</sup>Cua jaicue rupi aecha uyepea oĩ ara pe ita Tumpa uicuatía mboroyocui reta jese vae reta jiru oi vae. <sup>6</sup>Jare jocua siete ángel reta oẽ Tumpa jo güi. Güinoi reta jocua siete mbaesusere. Jemimonde nieso tĩ vae iquia mbae vae co, jare ipitía rupi güinoi icuacuaa oro pegua. <sup>7</sup>Jare jocua irundi mbaembae icove vae reta güi penti umee jocua siete ángel reta pe siete copa oro pegua. Jocua copa reta tinee ñugüinoi Tumpa iarasi pe. Tumpa co jae imeño mai ico vae. <sup>8</sup>Jare Tumpa iyaruandaa jare imbaepuere jeco pegua Tumpa jo tinee tatãti pe. Jare mbaeti quía ipuere uique Tumpa jo pe ndei jocua siete mbaesusere jocua siete ángel reta güinoi vae uyeyapo mbove.

### Siete copa Tumpa iarasi güinoi vae reta

**16** <sup>1</sup>Jare ayandu penti ñee Tumpa jo güi. Iñeãta reve jei jocua siete ángel reta pe:

—Pecua pepiyere ivi re jocua siete copa Tumpa iarasi güinoi vae reta.

<sup>2</sup>Jayave penti ángel oo upiyere copa güinoi vae ivi re. Jare opa ituyutuyu ivi pegua reta jocua maemimba guasu imarca güinoi vae. Echa'ã jae reta umbiadora jocua maemimba guasu jaanga.

<sup>3</sup>Jare ĩru ángel upiyere copa güinoi vae i guasu re. Mocui ma upiyere. Jare i guasu uyeyapo umanocue vae jugüi rami. Jare opaete mbaembae i guasu pe yugüireco vae reta umano.

<sup>4</sup>Jare ĩru ángel upiyere copa güinoi vae i usiri vae reta jare icua i oẽ vae reta re. Mbapi ma upiyere. Jare i usiri vae reta jare icua i oẽ vae reta uyeyapo tugüirã. <sup>5</sup>Jare ayandu ángel i re mbaepuere güinoi vae jei:

—Jecuaeño iyipi güive jare añave nde co jae jupi vae, oreYa. Nde co jae iyoo mbae vae. Jáeramo ndiporaraca chupe reta —jeyeta—. <sup>6</sup>Echa'ã jae reta uyuca

uñeñono tee ndeve peguarã vae reta jare niñee umimbeu vae reta. Jáeramo neme ma chupe reta tugüi i ipepica pe. Icavi co ndiyapo vaerã jucuarãi —jei.

<sup>7</sup>Jare ayandu ñru ñee uñemearendã güi jei:

—Icavi co, oreYa Tumpa. Nde neno opaete mbaepuere. Jecuaeño nepuruãa ñete vae jare jupi vae rupi —jei.

<sup>8</sup>Jare ñru ángel upiyere copa güinoi vae guarasi re. Irundi ma upiyere. Jare uñeme mbaepuere guarasi pe ipuere vaerã uapi ivi pegua reta tata pe. <sup>9</sup>Jayave guarasi jasi ete jare uapi ivi pegua reta. Jáeramo ivi pegua reta jei icavi mbae vae Tumpa jee coti. Echa'ã jae güinoi mbaepuere opaete cua susere reta re. Ërei ivi pegua reta ueya'a iyemingueta icavi mbae vae ipia pe oĩ vae. Umbiadora'a etei Tumpa.

<sup>10</sup>Jare ñru ángel upiyere copa güinoi vae jocua maemimba guasu iguapia re. Pandepo ma upiyere. Jayave pītumimbi ou opaete maemimba guasu iporoyocua rupi. Jare opaete maemimba guasu pe uyeyocui vae reta uiporara ete. Uñecūsuu reta uiporara ete ramo. <sup>11</sup>Jare jei reta icavi mbae vae Tumpa ara pe ico vae coti, uiporara ete jasi jare opa ituyutuyu ramo. Ërei jeseve ueya'a reta icavi mbae vae uyapo vae.

<sup>12</sup>Jare ñru ángel upiyere copa güinoi vae i usiri vae Eufrates jee vae re. Tuicha co jocua Eufrates. Seis ma upiyere. Jare tipa voi Eufrates. Jucuarãi Tumpa umicuatiro mburuvicha guasu reta guarasi oẽ vae coti güi yugüeruta vae japerã. <sup>13</sup>Jare aecha jocua maemimba guasu tenonde aecha vae, jare jocua ñru maemimba guasu i guasu güi oẽ vae, jare jocua ñru maemimba guasu ivigüi güi oẽ vae - jae jei umimbeu co Tumpa iñee, Ërei upurumbitavi. Jare aecha penti ñña iquia ete vae oẽ iyuruyuru güi. Mbapi pite echa jocua ñña reta. <sup>14</sup>Jae reta co ñña miacañi ipuere uyapo vae reta. Jae reta yugüiraa opaete ivi rupi mburuvicha guasu reta jenta jenta rupi. Jae reta umbati opaete mburuvicha guasu reta uñerãro vaerã Tumpa opaete mbaepuere güinoi vae ndive. Uñerãrota reta co Tumpa ndive jocua ara pe.

<sup>15</sup>—Mase —jei yandeYa—, che aa yeta immbae, penti imonda vae ou mbaembae oñomi rami. Piyeroviata co jecuaeño piñemicuatiro yave. Jecuaeño piyapicatu peremimonde, agüiye vaerã pemara ñru vae reta perecha penani peĩ yave —jei.

<sup>16</sup>Jare Tumpa umbatica reta hebreo iñee pe Armagedón jee vae pe.

<sup>17</sup>Jare ñru ángel upiyere copa güinoi vae ivitu re. Siete ma upiyere. Jare uyendu penti ñee Tumpa jo ara pe oĩ vae güi Tumpa iguapia güi. Iñeeãta reve jei: —Opa ma uyeyapo.

<sup>18</sup>Jare tanta jiapu ara. Jare uvera. Jare ivi tanta ucãta. Ivi pegua reta yugüireco güive jucuarãi'ã ucãta ivi. Echa'ã jocua ivicãta tanta ete co.

<sup>19</sup>Jare jocua tenta guasu uyembiyao mbapi pe jare opaete ivi rupi jenta tenta guasu uyembai. Jare Tumpa imandúa jocua tenta guasu Babilonia jee vae re uiporaraca ete vaerã chupe. Echa'ã Tumpa pochi ete chupe. <sup>20</sup>Jare opaete ivi i mbite pe ñugüinoi vae reta opa osi, jare mbaeti ma uñevãe ivitu guasu reta.

<sup>21</sup>Jare oa ara güi amandau tuicha tuicha vae ivi pegua reta re. Jare amandau



penti penti poi irundi arroba rupi. Jare ivi pegua reta jei icavi mbae vae Tumpa coti amandau jeco pegua. Echa'ã amandau uiporaraca ete ivi pegua reta pe.

### Cuña iaguasa vae

**17** <sup>1</sup>Jare jocua siete ángel jocua siete copa güinoi vae reta güi penti ou jei cheve:

—Eyu cua pe. Taicuaaca ndeve quirãi ñeñacata co jocua cuña iaguasa vae i guasu reta re uguapi vae —jei—. <sup>2</sup>Ivi pegua mburuvicha guasu reta uyapo aguasa jocua cuña ndive. Ivi pegua reta uipota ete uyapo aguasa jae ndive, usavipo vae uyúe ete vino rami —jei.

<sup>3</sup>Jayave ángel chereraa Espíritu Santo imbaepuere pe ñana coti. Jare joco pe aecha penti cuña opo oĩ penti maemimba guasu pĩta vae re. Jare jocua maemimba guasu re uyecuatía oĩ jeta jee jare jocua cuatía reta rupi jei icavi mbae vae Tumpa coti. Jare siete co jocua maemimba guasu inãca jare diez jãti. <sup>4</sup>Jare cuña jemimonde pĩta, jare güinoi oro jare ita ipõra ete vae reta jete re. Uipisi penti copa oro pegua. Ërei jocua copa tinee oĩ mbaembae pichĩ vae pe. Echa'ã jocua cuña iaguasa vae co. <sup>5</sup>Jare isiva re uyecuatía oĩ jee cuarãi: “Babilonia mbaepuere tuicha vae güinoi vae. Jae co iaguasa vae reta ichi. Jae co ivi pegua pichĩ vae uyapo vae reta ichi.” Jucuarãi uyecuatía oĩ. Jaeramo uyecuaa jocua cuña jee.

<sup>6</sup>Jare cuña usavipo echa cheve. Echa'ã jou ma ñeñono tee Tumpa peguarã vae reta jugüi. Jae reta uyeyucaca umimbeu Jesús re ramo. Jare aecha yave jocua cuña, chepiacañi ete jese.

<sup>7</sup>Jare ángel jei cheve:

—¿Maera pa nepiacañi? Tamimbeu ndeve ndeño uyecuaa vae cuña regua. Jae ramiño vi tamimbeu ndeve ndeño uyecuaa vae jocua maemimba guasu cuña opo jese vae regua. Siete co jocua maemimba guasu inãca jare diez jãti —jei—. <sup>8</sup>Maemimba guasu ndeecha vae icose, Ërei ico'ã ma. Ërei oëta ivicua quipe ete vae güi. Ërei oo yeta cañitei pe. Jare ivi pe yugüireco vae reta uecha yave jocua maemimba guasu icose vae, ipiacañita reta. Echa'ã jae reta jee uyecuatía'ã oĩ libro tecove opa mbae vae pegua pe ivi uyeyapo güive. Jocua maemimba guasu mbaeti ma ico. Ërei ico yeta co —jei—.

<sup>9</sup>Jare iyaracuaa vae uicuaata cua: Jocua siete inãca uyemijaanga siete ivitu guasu cuña uguapi jese vae re —jei cheve—. <sup>10</sup>Jae ramiño vi uyemijaanga siete mburuvicha guasu reta re. Pandepo mburuvicha guasu reta uasa ma. Penti imeño ico, jare penti ndeño ico. Jare jae ou yave, michi peguaño güinoita mbaepuere —jei—. <sup>11</sup>Jare jocua maemimba guasu icose Ërei mbaeti ma ico vae icota iru mburuvicha guasurã. Ocho co jocua re. Ërei jae oyovaque jocua siete vae güi penti ndive. Jare jae vi oota cañitei pe —jei—. <sup>12</sup>Jare jocua diez jãti ndeecha vae uyemijaanga diez mburuvicha guasu reta re. Cua diez reve ndeño güinoi iporoyocua. Ërei güinoita reta mbaepuere yugüireco vaerã mburuvicha guasu retarã penti ora pegua jocua maemimba guasu i guasu güi oë vae mbaepuere

güinoi yave —jei cheve—. <sup>13</sup>Opaete cua diez mburuvicha guasu reta penti ramiño co, jare omborita reta jocua maemimba guasu opaete imbaepuere pe. <sup>14</sup>Cua reta uñerãrota Ovecha-rai ndive, jare Ovecha-rai umiamirita. Echa'ã Ovecha-rai co jae opaete vae iya reta iYa. Jae co opaete mburuvicha guasu reta Juvicha Guasu. Jare Ovecha-rai ndive ñugüinoi vae reta Tumpa uiparavo vae reta co. Echa'ã Tumpa uiparavo jocua reta uyeyocui cavi vaerã Ovecha-rai pe —jei cheve ángel.

<sup>15</sup>Jayave jei cheve:

—Ndeecha ma jocua cuña iaguasa vae uguapi oĩ i guasu reta re. Jocua i guasu reta uyemijaanga opaete ivi ambiembie pegua reta re. <sup>16</sup>Ndeecha ma vi jocua maemimba guasu jãti diez co. Jocua diez jãti reta uyemijaanga diez mburuvicha guasu reta re. Jae reta umitarẽita jocua cuña iaguasa vae. Ueyata reta jaeño upita vaerã. Jae nanita co. Jayave jocua diez mburuvicha guasu reta jouta cuña isoo jare opata uapi tata pe —jei—. <sup>17</sup>Echa'ã Tumpa umiquirẽi jocua diez mburuvicha guasu reta umee vaerã iporoyocua penti ramiño jocua maemimba guasu pe. Jare maemimba guasu güinoita iporoyocua reta Tumpa ñnee reta uyeyapo regua. <sup>18</sup>Jare jocua cuña ndeecha vae uyemijaanga jocua tenta guasu opaete ivi pegua mburuvicha guasu reta re mbaepuere güinoi vae re —jei.

### Babilonia uyembai ma

**18** <sup>1</sup>Jare cua jaicue rupi aecha ñru ángel ugüeyi ou ara güi. Ángel imbaepuere tuicha ete co. Tembipe oĩ ivi rupi ángel umiembipe ramo. <sup>2</sup>Jare ángel ñneeãta reve jei:

—Tenta guasu Babilonia jee vae uyembai ma. Añave yugüireco joco pe año reta. Pentí peresoriru rami co. Echa'ã opaete año mbaembae pichĩ vae uyapo vae reta jare opaete güira mbaembae pichĩ vae uyapo vae reta yugüireco joco pe, pereso reta peresoriru pe yugüireco rami —jei—. <sup>3</sup>Opaete ivi pegua reta uipota ete uyapo aguasa Babilonia pegua reta ndive, usavipo vae uyúe ete vino rami. Jáeramo Tumpa pochi chupe reta. Jare ivi pegua mburuvicha guasu reta uyapo aguasa Babilonia pegua reta ndive. Jare opaete ivi rupi umaemee vae reta icocatu ma Babilonia pegua reta jeta mbaembae jepi ete vae ogua ramo —jei.

<sup>4</sup>Jare ayandu ñru ñee ara güi jei:

—Peẽ joco güi, chembae reta, agüiye vaerã piyapo mbaeyoa reta jae reta uyapo rami, jare agüiye vaerã piporara mbaesusera eta chupe reta uyeyapota vae —jei—. <sup>5</sup>Jae reta uyapo jeta ete mbaeyoa reta. Tumpa uiporaracata chupe reta imbaeyoa reta jeco pegua —jei—. <sup>6</sup>Tuiporara reta, jae reta uiporaraca peve rami. Tuiporara ete reta opaete icavi mbae vae uyapo vae jeco pegua. Jeta ete icavi mbae vae uyapo reta ñru vae reta pe. Jáeramo tuiporara ete reta. <sup>7</sup>Jae reta uyembicate ete jare ogua jeta mbaembae jepi ete vae. Jáeramo tuiporara ete reta jare tipiatiti ete reta. Echa'ã jae reta jei iyupe ipia pe: 'Yaico mburuvicha guasu reta yugüireco rami. Yaico'ã co cuña ime umano vae reta yugüireco rami. Ndarau etei yandepiatiti' —jei reta, jei—. <sup>8</sup>Jáeramo penti ara peño uyeyapota chupe reta jeta mbaesusera. Outa chupe

reta caruai. Jae reta ipiatitita jare umanota. Jare jenta guasu opata ocai. Echa'ã yandeYa Tumpa uãata reta jare opaete mbaepuere güinoi —jei—.

<sup>9</sup>Jare ivi pegua mburuvicha guasu reta ipiatitita jese jare uyaota, jatãti uecha yave. Echa'ã jae reta uyapo aguasa joco pe, jare joco pe yugüireco yave, uyerovia ete opaete mbaembae jepi ete vae re. <sup>10</sup>Ërei jae reta uyemboita mbiri tenta guasu güi, agüiye vaerã uiporara jocua guasu tenta pegua reta uiporarata rami. Jare jeita reta: 'Paravete. Babilonia penti tenta guasu tuicha ete vae co tẽi. Penti ora peño Tumpa uiporaraca chupe' —jeita reta, jei—. <sup>11</sup>Jare opaete ivi rupi umaemee vae reta ipiatitita jese jare uyaota. Echa'ã ndarau ma quía ogua imbaembae —jei—. <sup>12</sup>Ndarau ma quía ogua mbaembae oro pegua jare corepoti pegua jare ita ipõra ete vae reta pegua, jare temimonde reta nieso ipõra ete vae jare seda, jare temimonde pita vae reta, jare mbaembae ivira icavi ete vae pegua. Ndarau ma quía ogua mbaembae maemimba tuicha vae elefante jee vae jãi pucu pegua jare ivira jepi ete vae pegua jare cobre pegua jare fierro pegua jare ita tanta ete vae pegua —jei—. <sup>13</sup>Ndarau ma quía ogua mbaembae ipiche cavi vae reta, jare vino, jare aceite, jare harina ipu ete vae, jare trigo. Ndarau ma quía ogua mburica reta, jare ovecha reta, jare cavayu reta, jare carro reta, jare cuimbae reta, jare cuña reta —jei—.

<sup>14</sup>Babilonia pegua reta jecuaeño uipota mbaembae jepi ete vae jare ipõra ete vae. Ndarau etei ma güinoi jocua mbaembae icavi vae —jei—. <sup>15</sup>Ogua reta jeta ete jocua mbaembae icavi vae. Jáeramo jocua mbaembae umee vae reta icocatu. Ërei umaemee vae reta uyemboita mbiri Babilonia güi agüiye vaerã uiporara jocua tenta guasu pegua reta uiporarata rami. Ipiatitita jese jare uyaota —jei—. <sup>16</sup>Jare jeita: 'Paravete. Penti tenta guasu tuicha ete vae co tẽi. Jare tenta guasu pegua reta jemimonde reta nieso ipõra vae co. Omonde reta temimonde pita vae reta jare oñono reta iyee mbaembae oro pegua jare ita ipõra vae reta pegua' —jeita reta, jei—. <sup>17</sup>Icocatu ete reta. Ërei penti ora peño umicañi reta opaete imbaembae icavi vae' —jeita reta, jei—. Jare opaete chalana guasu iya reta jare chalana guasu pe uparaviqui vae reta - opaete i guasu rupi uguata umaemee vaerã vae reta - uyemboita mbiri Babilonia güi —jei—. <sup>18</sup>Jare usapicaita reta tenta guasu jatãti uecha yave. Jare jeita reta: 'Jocua tenta guasu tuicha ete co tẽi opaete ñru tenta guasu reta güi' —jeita reta, jei—. <sup>19</sup>Jare oñonota reta ivicuii iñãca re usapicai reve. Jae reta ipiatitita uyao reve jare jeita: 'Paravete. Penti tenta guasu tuicha ete vae co tẽi. Jocua tenta guasu pegua reta ogua jeta mbaembae jepi ete vae. Jáeramo opaete chalana guasu iya reta umaemee vae icocatu ma. Ërei penti ora peño opa ma imbaembae' —jeita reta, jei—.

<sup>20</sup>Piyerovia jese, ara pe pico vae. Pe reta co jae temimondo reta jare Tumpa iñee umimbeu vae reta jare ñru uñeño tee Tumpa peguarã vae reta. Echa'ã Tumpa uiporaraca chupe reta, jae reta uiporaraca peve ramo —jei.

<sup>21</sup>Jare penti ángel ipirãta ete vae uipisi penti ita. Tuicha co jocua ita umbaesio pipe vae rami co. Jayave ángel omombo ita i guasu pe jare jei:

—Jucuarãita uyembai imambae ete jocua tenta guasu Babilonia jee vae. Ndarau ye ma quía uecha —jei—. <sup>22</sup>Jare uyemimbi vae reta ndarau ye ma uyemimbi joco pe. Jae ramiño vi uparaviqui vae reta ndarau ye ma uparaviqui joco pe. Jae ramiño vi umbaesó vae reta ndarau ye ma umbaesó joco pe. <sup>23</sup>Jae ramiño vi ndarau ye ma jendi joco pe mechero. Jae ramiño vi ndarau ye ma quía umenda joco pe. Echa'ã umaemee vae joco pe yugüireco vae reta uyembutuichacase ñru vae reta pe. Ërei Babilonia pegua reta umbitavi opaete ivi pegua reta paye reta uyapo vae pe —jei.

<sup>24</sup>Jare Babilonia pe uñevãe Tumpa ñnee umimbeu vae reta jugüi jare ñru uñeño tee Tumpa peguarã vae reta jugüi. Opaete ivi pe uyeyucaca vae reta jugüi uñevãe joco pe.

### Ara pegua reta umbiadora yandeYa Tumpa

**19** <sup>1</sup>Cua jaicue rupi ayandu jeta vae ara pe ñugüinoi vae reta ñneeãta reve jei: —YandeYa tuyembiaadora. Echa'ã jae yanembiasa. YandeYa Tumpa opaete mbaepuere güinoi. Tuyembiaadora opaete vae pe —jei reta—. <sup>2</sup>Jae upuruãa añete vae rupi jare jupi vae rupi. Echa'ã jae uãa jocua cuña iaguasa vae mbaepuere tuicha vae güinoi vae. Echa'ã jocua cuña uyapoca mbaeyoa opaete ivi pegua reta pe aguasa uyapo vae rupi. Ërei Tumpa uiporaraca ma jocua cuña pe, jae uyucaca Tumpa jembiocui reta ramo —jei reta.

<sup>3</sup>Jare jae reta jei ye:

—YandeYa tuyembiaadora. Tatãti uyupita jaeño mai pegua.

<sup>4</sup>Jare jocua veinticuatro tenondegua reta jare jocua irundi mbaembae icove vae reta uyeatica jare umbiadora Tumpa iguapia pe uguapi oi vae. Jae reta jei: —Amén. YandeYa tuyembiaadora.

<sup>5</sup>Jare ou penti ñee Tumpa iguapia güi jei:

—Pembiaadora yandeYa Tumpa. Pe reta co jae Tumpa jembiocui reta. Pe reta co jae sambiai reta jare ucuacuaa vae reta uipiu reve umbiadora Tumpa vae —jei.

<sup>6</sup>Jayave ayandu mbae ye. Jeta ete vae uyemingueta ñugüinoi echa cheve. Tanta jiapu i guasu jiapu rami jare ara jiapu rami. Jare ayandu jei:

—YandeYa tuyembiaadora. YandeYa Tumpa opaete mbaepuere güinoi vae oporoyocui ma —jei—. <sup>7</sup>Yayerovia ete jese jare yambiadora. Echa'ã ou ma uvãe Ovecha-rai umenda vaerã jare jembirecorã vae uyeyapicatu cavi ma —jei—. <sup>8</sup>Jare uñemee jembirecorã vae pe omonde vaerã penti temimonde nieso ipõra vae. Jocua jemimonde iquia mbae jare tí asi. Echa'ã jocua nieso ipõra vae uyemijaanga jupi vae uñeño tee Tumpa peguarã vae reta uyapo vae re —jei.

### Ovecha-rai umendata

<sup>9</sup>Jare penti ángel jei cheve:

—Icuatía cuarãi: Ovecha-rai umenda yave, Tumpa uiparavota amocue vae ucaru vaerã jae ndive. Uyerovia eteta jocua reta —jei—. Cua ñee Tumpa ñnee etei co —jei.

<sup>10</sup>Jayave che ayeatica ángel jovai ambiadora vaerã. Ërei jae jei cheve: —Agüiye chembiadora. Che vi ayeyocui Tumpa pe, nde ndiyeyocui chupe rami. Che vi amimbeu Jesús regua, yanderivi umimbeu jesegua rami. Tumpaño embiadora. Echa'ã Jesús regua umimbeu vae reta umimbeu co Tumpa ñnee, Tumpa ñnee aracae umimbeu vae reta umimbeu rami —jei.

### Cavayu tĩ vae re opo vae

<sup>11</sup>Jare aecha ara uyepea oĩ. Jare aecha vi joco pe penti cavayu tĩ vae. Jare opo cavayu re yandeYa. Jae co jecuaño jei vae uyapo vae. Jae co jecuaño umimbeu cavi Tumpa regua vae. Jae upuruãa jupi vae rupi jare uñerãro jupi mbae vae uyapo vae reta ndive. <sup>12</sup>YandeYa jesa tata jendi oĩ vae rami co, jare ññaca re güinoi jeta corona reta. Jare uyecuatía oĩ jese penti tee. Jaeño uicuaa jocua tee. Mbaeti quía ye uicuaa. <sup>13</sup>Jare jemimonde tugüi pe uñemipita vae co. Jare jae jee co Tumpa ñnee. <sup>14</sup>Jare jeta ete vae yugüeru ara güi yandeYa jaicue jeta ete sundaro reta rami. Opo reta cavayu tĩ vae reta re. Penti penti jemimonde nieso ipõra vae co. Tĩ jare iquía mbae jocua jemimonde.

<sup>15</sup>Jare yandeYa iyuru güi oẽ penti quisepecu jaimbe vae. Pipe uyucata jeta ivi pegua reta. Jare oporoyocuita ipopoca fierro pegua pe. Uiporaraca eteta opaete jovaicho reta pe. Echa'ã Tumpa opaete mbaepuere güinoi vae pochí ete chupe reta. <sup>16</sup>Jare yandeYa jemimonde re jare iu re uyecuatía oĩ penti tee. Jae co cua: “Mburuvicha guasu reta Juvicha Guasu jare opaete vae iya reta iYa.”

<sup>17</sup>Jare aecha penti ángel uyemboi oĩ guarasí re. Jare jae ñneeãta reve jei opaete güira uveve ñugüinoi vae reta pe:

—Peyu piyembati. Tumpa opaete mbaepuere güinoi vae pemingaruta. <sup>18</sup>Peyu peu mburuvicha guasu reta jetecue, jare sundaro reta juvicha reta jetecue, jare cuimbae ipirãta ete vae reta jetecue. Peyu peu cavayu reta jetecue, jare opo jese vae reta jetecue. Peyu peu jeta ete cuimbae reta jetecue - uyeyocui mbae vae reta jetecue jare uyeyocui vae reta jetecue, sambiai reta jetecue jare ucuacuaa vae reta jetecue —jei.

<sup>19</sup>Jare aecha jocua maemimba guasu jare ivi pegua mburuvicha guasu reta jare opaete isundaro reta uyembati ma ñugüinoi uñerãro vaerã cavayu re opo vae jare isundaro reta ndive. <sup>20</sup>Jare uyepisica jocua maemimba guasu jocua írú maemimba guasu jei umimbeu co Tumpa ñnee upurumbitavi vaerã vae ndive. Echa'ã jocua upurumbitavi vae tenonde yave uyapo miacañi reta jocua maemimba guasu jovai, umbitavi vaerã maemimba guasu imarca güinoi vae reta. Echa'ã jae reta umbiadora jocua maemimba guasu jaanga. Jayave cua mocui reve uyemomboca jecove reve tata guasu pe. Joco pe jendi oĩ azufre. <sup>21</sup>Jare opaete maemimba guasu isundaro reta uyeyucaca cavayu re opo vae iquisepecu pe. Echa'ã jocua quisepecu oẽ iyuru güi. Jare opaete güira reta uyemingapiita jetecue reta re.

### YandeYa oporoyocuita mil año pegua

**20** <sup>1</sup>Jare aecha penti ángel ugüeyi ou ara güi. Jae güinoi ivicua quipe ete vae illave, jare ipo pe aecha penti cadena tuicha vae. <sup>2</sup>Jare ángel uipisi jocua maemimba guasu tenonde aecha vae. Jae co jocua mboi aracae Eva umingueta vae. Jae co aña guasu. Jee co Satanás. Jare ángel uipocua Satanás mil año pegua. <sup>3</sup>Jayave omombo ivicua quipe ete vae pe. Jayave uyuquenda ivicua jonque jare oñono jese mbae agüiye vaerã quía ipuere uipea ye. Jucuarãi uyapo agüiye vaerã Satanás umbitavi ivi pegua reta mil año pegua. Ërei mil año opa ma yave, Satanás uyeyoraca yeta michi pegua. <sup>4</sup>Jare aecha guapia reta jare amocue vae joco pe uguapi vae reta. Jare uñemee chupe reta upuruãa vaerã. Jare aecha Jesús regua umimbeu ramo uñeãcasiaca vae reta. Echa'ã jae reta umimbeu Tumpa iñee. Jae reta umbiadora'ã jocua maemimba guasu i guasu güi oẽ vae, jare umbiadora'ã jaanga, jare mbaeti etei vi güinoi imarca isiva re jare ipo re. Jare jae reta icove ye yugüeru umanocue vae reta ipite güi jare oporoyocui Cristo ndive mil año. <sup>5</sup>Jocua reta tenonde icove ye yugüeru umanocue vae reta ipite güi. Ërei ñru umanocue vae reta icove yevi'ã jae reta ndive. Mil año uasa yave ramo icove ye ñru umanocue vae reta. <sup>6</sup>Uyeroviata reta co tenonde icove yeta yugüeru umanocue vae reta ipite güi vae reta. Echa'ã uñeñono tee Tumpa peguarã vae reta co. Jocua mano mocuia ndarau ipuere jese reta. Jae reta yugüirecota sacerdote retarã, uyeyocui vaerã Tumpa jare Cristo pe. Jare oporoyocuita reta Cristo ndive mil año pegua.

<sup>7</sup>Jare mil año opa ma yave, Satanás uyeyoraca yeta jare oëta jocua pesorirru rami vae güi. <sup>8</sup>Jayave oota opaete ivi rupi umbitavi vaerã jeta ivi ambiembie pegua reta. Oota Gog pe jare Magog pe. Jare umbatita jeta ete vae uñerãro vaerã Cristo ndive. Jae reta jeta eteta co, ivicuiti i guasu jembei pe oĩ rami. <sup>9</sup>Jare aecha quirãi jae reta yugüeru opaete Israel pegua reta iivi rupi jare uyere ñugüinoi jocua tenta guasu Tumpa uau vae re. Echa'ã joco pe yugüireco uñeñono tee Tumpa peguarã vae reta. Ërei Tumpa ombou tata ara güi, jare tata opa uapi reta.

<sup>10</sup>Jare aña guasu umbitavi reta vae uyemomboca tata guasu azufre jendi oĩ pipe vae pe maemimba guasu jare jocua ñru maemimba guasu jei umimbeu co Tumpa iñee upurumbitavi vaerã vae ñugüinoi vae pe. Jare joco pe mbapi reve uiporarata ara rupi jare pñtu rupi jaeño mai pegua.

### Guapia tí vae

<sup>11</sup>Jare aecha penti guapia tí vae. Tuicha co. Jare aecha vi guapia pe uguapi oĩ vae. Ivi jare ara opa osi jae jovai güi. Jare mbaeti ma ivi jare ara jendarã. <sup>12</sup>Jare aecha umanocue vae reta uyemboi ñugüinoi Tumpa jovai. Sambiai reta jare ucuacuaa vae reta uyemboi ñugüinoi joco pe. Jare uyepea oĩ libro reta. Jae ramiño vi uyepea oĩ ñru libro. Jocua libro uicuaaca quía tecove opa mbae vae güinoi vae. Jare umanocue vae reta uñeãaca penti penti uyapocue vae rupi.

Echa'ã penti penti uyapocue vae uyecuatía oĩ libro reta pe. <sup>13</sup>Jare i guasu umaẽno opaete umanocue vae pipe ñugüinoi vae reta re oẽ vaerã chugüi. Jare mano jare cañitei umaẽno opaete umanocue vae pipe ñugüinoi vae reta re oẽ vaerã chugüi. Jare penti penti uñeãca uyapocue vae rupi. <sup>14</sup>Jare mano jare cañitei uyemomboca tata guasu pe. Cua co jae mano mocuia. <sup>15</sup>Jare jee uyecuatía'ã jocua libro tecove opa mbae vae pegua pe vae penti penti uyemomboca tata guasu pe.

### Ara ipiau vae jare ivi ipiau vae

**21** <sup>1</sup>Jare aecha ara ipiau vae jare ivi ipiau vae. Echa'ã ara tenonde ico vae jare ivi tenonde ico vae mbaeti ma. Jae ramiño vi mbaeti ma i guasu. <sup>2</sup>Jare che etei aecha jocua tenta guasu uñeño tee Tumpa peguarã vae - jae co Jerusalén ipiau vae - ugüeyi ou Tumpa oĩ vae güi ara güi. Uyeyapicatu oĩ penti cuñatai umendata vae rami.

<sup>3</sup>Jare ayandu penti ñee ara güi. Iñeeãta reve jei:

—Mase, Tumpa ime ma ico ivi pegua reta ndive. Jae icota jae reta ndive. Ivi pegua reta yugüirecota Tumpa imbaerã, jare Tumpa icota jae reta ndive. Tumpa eteño icota jae reta iTumparã —jei—. <sup>4</sup>Jare Tumpa oyoeta opaete jesai reta. Ndarau ye quía umano. Ndarau ye quía ipiatiti. Ndarau ye quía uyao. Ndarau ye mbae jasi quía pe. Echa'ã mbaembae tenonde ico vae reta mbaeti ma —jei.

<sup>5</sup>Jare Tumpa uguapí oĩ iguapia pe jare jei:

—Ayapopiauta opaete mbaembae.

Jayave jae jei cheve:

—Cua icuatía. Echa'ã chiñee añete co. Opaete vae ipuere güirovia catu —jei.

<sup>6</sup>Jare jei vi cheve:

—Uyeyapo ma. Che co jae Alfa jare Omega jee vae. Che co jae tenondegua vae jare taicuegua vae. Ime yave quía uipota i tecove opa mbae vae pegua jou vae, tamee tou jepi mbae reve —jei—. <sup>7</sup>Upurumiamiri vae reta pe ameeata imbaerã opaete mbaembae. Che etei aicota jae reta iTumparã jare jae reta yugüirecota cherai retarã —jei—. <sup>8</sup>Èrei uquiye vae reta, jare güirovia mbae Tumpa vae reta, jare pichii vae uyapo vae reta, jare upuruyuca vae reta, jare iaguasa vae reta, jare ipaye vae reta, jare umbiadora tumpa-raanga vae reta, jare opaete iyapu vae reta yugüiraata tata guasu azufre jendi oĩ pipe vae pe ñru vae reta ndive. Cua co jae mano mocuia —jei.

### Jerusalén ipiau vae

<sup>9</sup>Jare jocua siete ángel siete copa tinee siete mbaesusera taicuegua vae pe vae güinoi vae reta güi penti ou che aĩ vae pe jare jei cheve:

—Eyu cua pe. Taechaca ndeve Ovecha-rai jembirecorã vae.

<sup>10</sup>Jayave ángel chereraa Espíritu Santo imbaepuere pe penti ivitu guasu re. Ivate ete jocua ivitu. Jayave uechaca cheve jocua tenta guasu Jerusalén jee vae ugüeyi ou ara güi Tumpa oĩ vae güi. Jocua tenta guasu uñeño tee Tumpa peguarã. <sup>11</sup>Tumpa umbiyaruanda ma. Jare uvera penti ita ipõra ete



vae uvera rami. Ita ipõra ete vae jaspe jee vae echa. Jocua jaspe jee vae jesãca vidrio rami. <sup>12</sup>Jare tenta guasu ñequeñe vae tuicha jare ivate, jare güinoi doce jonque. Jare jonque reta pe ñugüinoi doce ángel reta. Jare jonque reta re uyecuatía ñugüinoi Israel pegua reta jee. Echa'ã doce ati co jocua Israel pegua reta. <sup>13</sup>Guarasi oẽ vae coti tenta guasu jonque reta mbapi co. Norte coti tenta guasu jonque reta mbapi vi. Sur coti tenta guasu jonque reta mbapi vi. Guarasi uique vae coti tenta guasu jonque reta mbapi vi. <sup>14</sup>Jare tenta guasu ñequeñe vae iguapica reta doce co. Jare iguapica reta re uyecuatía ñugüinoi Ovecha-rai jemimondo reta jee. Echa'ã doce co jocua Ovecha-rai jemimondo reta.

<sup>15</sup>Jare imiari cheve vae güinoi penti ivira oro pegua umiaanga vaerã tenta guasu jare jonque reta jare ñequeñe vae. <sup>16</sup>Jare guarasi oẽ vae coti jare norte coti jare sur coti jare guarasi uique vae coti tenta guasu ñequeñe vae oyovaque. Jare ángel umiaanga tenta guasu ivira pe. Jare ipucucue jare ipiguasucue jare ivatecue oyovaque. Penti penti cuatrocientos sesenta legua rupi. <sup>17</sup>Jare ángel umiaanga tenta guasu ñequeñe vae. Ivatecue ciento cuarenta y cuatro codo. Penti cuimbae jendivanga uyemiaanga yave, jae co penti codo. Echa'ã jucuarã umiaanga ángel.

<sup>18</sup>Jare tenta guasu ñequeñe vae ita ipõra ete vae jaspe jee vae pegua co. Jare tenta guasu etei oro catuui. Jesãca vidrio rami. <sup>19</sup>Jare tenta guasu ñequeñe vae iguapica reta ita ipõra ete vae pegua co. Uyuavi reta uyugüi. Penti jaspe jee vae. Ìru zafiro jee vae. Ìru ágata jee vae. Ìru esmeralda jee vae. <sup>20</sup>Ìru ónice jee vae. Ìru cornalina jee vae. Ìru crisólito jee vae. Ìru berilo jee vae. Ìru topacio jee vae. Ìru crisopraso jee vae. Ìru jacinto jee vae. Ìru amatista jee vae. <sup>21</sup>Jare jocua doce tenta guasu jonque reta doce ita ipõra ete vae perla pegua co. Penti penti onque uyeyapo penti perla güi. Jare tenta guasu icalle reta oro catuui. Jesãca vidrio rami.

<sup>22</sup>Jare mbaeti etei Tumpa jo joco pe. Echa'ã yandeYa Tumpa opaete mbaepuere güinoi vae jare Ovecha-rai yugüireco joco pe penti Tumpa jo ipepica pe. <sup>23</sup>Jare tenta guasu pegua reta ueca'ã guarasi jare yasi umiembipe vaerã. Echa'ã Tumpa jare Ovecha-rai jocua tenta guasu pegua reta jembipe co. <sup>24</sup>Opaete ivi pegua reta uguata cavita joco pe, tembipe oita ramo, jare ivi pegua reta juvicha guasu reta yugüeruta joco pe umbiadora vaerã Tumpa. <sup>25</sup>Jare ndarau etei uyeyuquenda tenta guasu jonque reta ara rupi. Jare ndarau vi pïtu joco pe. <sup>26</sup>Jare opaete ivi pegua reta yugüeruta joco pe umbiadora vaerã Tumpa. <sup>27</sup>Èrei ndarau etei uique jocua tenta guasu pe ipotave iquia vae jare ipotave pichï vae uyapo vae jare ipotave iyapu vae. Jaeño Ovecha-rai ilibro tecove opa mbae vae pegua pe jee uyecuatía oĩ vae reta uiqueta joco pe.

**22** <sup>1</sup>Jayave ángel uechaca cheve i usiri vae iquia mbae vae. Jesãca ete. Vidrio echa cheve. Tecove opa mbae vae pegua co jocua i. Oẽ usiri Tumpa jare Ovecha-rai iguapia güi. <sup>2</sup>Jare tenta guasu icalle mbite rupi jare i usiri vae jembei reta rupi ñugüinoi ivira tecove opa mbae vae pegua reta. Jocua ivira ía doce uyuavi vae reta co jare yagüiye opa yasi rupi. Jare ivi pegua reta ipuere uiporu ivira joqui reta moarã agüiye vaerã imbaerasi.



<sup>3</sup>Jare ndarau ma oĩ yepipeyu ivi re. Echa'ã Tumpa jare Ovecha-rai iguapia oĩta joco pe. Jare Tumpa jembiocui reta uyeyocuita chupe. <sup>4</sup>Jare jae reta uechata Tumpa. Jare güinoita reta isiva re Tumpa jee. <sup>5</sup>Jare ndarau pĩtu joco pe. Ndarau uiporu mechero jare guarasi jembipe. Echa'ã yandeYa Tumpa umeeta chupe reta tembipe. Jare jae reta oporoyocuita jaño mai pegua.

### Cristo ou yeta imambae

<sup>6</sup>Jare ángel jei cheve:

—Cua ñee reta añete co. Yandepuere yarovia catu. Aracae yandeYa Tumpa uicuaaca mbaembae ñnee umimbeu vae reta pe. Echa'ã jae oñono tee reta iyupegarã ñnee umimbeu vaerã. Jae ramiño vi yandeYa Tumpa chembou aicuaaca vaerã jembiocui reta pe imambae uyeyapota vae. Che co jae penti ángel Tumpa pe uyeyocui vae —jei—. <sup>7</sup>'Mase, aa yeta imambae' —jei yandeYa, jei—. 'Piyapo yave ñee cua tupapire pe ñugüinoi vae reta, piyeroziata co. Echa'ã cua ñee reta umimbeu peve uyeyapota vae' —jei, jei.

<sup>8</sup>Che etei aecha cua mbaembae jare ayandu vi. Jare aecha jare ayandu yave, ayeatica ángel cua mbaembae uicuaaca cheve vae jovai ambiadora vaerã. <sup>9</sup>Èrei jae jei cheve:

—Agüiye chembiadora. Che vi ayeyocui Tumpa pe, nde ndiyeyocui chupe rami. Che vi amimbeu Tumpa ñnee, yanderivi umimbeu rami. Echa'ã jae reta vi uyapo ñee cua libro pe uyecuatía oĩ vae reta. Tumpaño embiadora —jei.

<sup>10</sup>Jare jei vi cheve:

—Emimbeu ñru vae reta pe ñee cua libro pe ñugüinoi vae reta. Echa'ã cua ñee reta umimbeu uyeyapota vae jare coiño ma ou uyeyapo vaerã —jei—. <sup>11</sup>Jupi mbae vae uyapo vae jecuaño tuyapo jupi mbae vae. Jae ramiño vi pichii vae uyapo vae jecuaño tuyapo pichii vae. Jae ramiño vi jupi vae uyapo vae jecuaño tuyapo jupi vae. Jae ramiño vi uñeño tee Tumpa peguarã vae jecuaño tuñeño tee Tumpa peguarã —jei—.

<sup>12</sup>Mase, aa yeta imambae —jei yandeYa, jei—. Jare ameeta opaete vae pe imbaerã penti penti uyapocue vae rupi —jei, jei—. <sup>13</sup>Che co jae Alfa jare Omega jee vae. Che co jae tenondegua vae jare taicuegua vae —jei, jei—. <sup>14</sup>Piyapo yave yandeYa iporoyocui reta, piyeroziata co. Echa'ã piyapo yave, pepuereta peu ivira tecove opa mbae vae pegua ía, jare pepuereta pique jocua tenta guasu pe jonque reta rupi —jei—.

<sup>15</sup>Echa'ã tenta guasu pe ndarau uique Tumpa ñnee ndive oyovaicho vae reta, jare ipaye vae reta, jare iaguasa vae reta, jare upuruyuca vae reta, jare tumparaanga reta umbiadora vae reta, jare opaete iquirëi reve iyapu vae reta —jei.

<sup>16</sup>Jare yandeYa Jesús jei cheve:

—Che etei amondo penti ángel cheve uyeyocui vae umimbeu vaerã peve cua mbaembae upurugüirovia vae uyembatimbatì vae reta rupi. Che co jae David Iyipi jee vae. Che co jae David ñnemoña reta pegua. Che co jae yasitata guasu jembipe vae neimbove asi uyecuaa vae —jei.

<sup>17</sup>Jare Espíritu Santo jare Ovecha-rai ndive umendata vae jei:

—Eyu.

Jare uyandu vae tei:

—Eyu.

Iúe vae ipuere ou cua pe. Ipotave vae ipuere jou i tecove opa mbae vae pegua jepi mbae reve. <sup>18</sup>Ñee cua tupapire pe ñugüinoi vae reta uicuaaca uyeyapota vae. Che amimbeu opaete cua ñee reta uyandu vae reta pe cua: Ime yave quía cua ñee reta ndive iru ñee reta umiiruta vae, Tumpa umeeta chupe uiporara vaerã susere cua tupapire pe uyecuatía ñugüinoi vae reta. <sup>19</sup>Jare ime yave quía ñee cua tupapire pe ñugüinoi vae reta uipotata umbai vae, Tumpa ndarau umaño jese jou vaerã jocua ivira tecove opa mbae vae pegua ía. Ndarau vi umaño jese uique vaerã tenta guasu uñeño tee Tumpa peguarã vae pe. Ndarau vi umaño jese güinoi vaerã imbaerã mbaembae icavi vae cua libro pe uyecuatía oĩ vae.


<sup>20</sup>YandeYa umimbeu cheve opaete cua. Jae etei jei:

—Añete co, aa yeta imambae.


Yande yae:

—Amén. Eyu, yandeYa Jesús.


<sup>21</sup>YandeYa Jesús tumee ipiacavi opaete imbae reta pe. Amén.



**PRIMER VIAJE MISIONERO DE PABLO**



**SEGUNDO VIAJE MISIONERO DE PABLO**




**TERCER VIAJE MISIONERO DE PABLO**




**VIAJE DE PABLO A ROMA**

# El Templo en el tiempo de Jesucristo



Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines

